


Diidz ne rdeed
guielmban



New Testament in Zapotec, Mixtepec (MX:zpm:Zapotec,
Mixtepec)

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files dated 29 Jan 2022
5317ca58-7555-5e4c-a420-e1e9210e2df2

Contents

| | |
|----------------------------|-----|
| MATEO | 1 |
| MARCOS | 57 |
| LUCAS | 92 |
| JUAN | 150 |
| HECHOS | 193 |
| ROMANOS | 244 |
| 1 CORINTIOS | 266 |
| 2 CORINTIOS | 288 |
| GALATAS | 303 |
| EFESIOS | 312 |
| FILIPENSES | 320 |
| COLOSENSES | 326 |
| 1 TESALONICENSES | 332 |
| 2 TESALONICENSES | 337 |
| 1 TIMOTEO | 340 |
| 2 TIMOTEO | 347 |
| TITO | 352 |
| FILEMON | 356 |
| HEBREOS | 358 |
| SANTIAGO | 374 |
| 1 PEDRO | 380 |
| 2 PEDRO | 386 |
| 1 JUAN | 390 |
| 2 JUAN | 396 |
| 3 JUAN | 397 |
| JUDAS | 398 |
| APOCALIPSIS | 400 |

XTIIDZ NDZON DIOS MIÑE PQUIAA MATEW

¹ Jesús meñ ne pxeel Dios ga, lo xtií Abraham, lo xtií David, ga brieequia me. Lëë grë xmenğoldoo me nu:

² Abraham goc pxoz Isaac,
Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsiel Judá),

Far goc pxoz Srom,
Srom goc pxoz Aram.

⁴ Aram goc pxoz Minadab,
Minadab goc pxoz Naasón,
Naasón goc pxoz Salmon.

⁵ Salmóngoc pxoz Booz (Rahab brieelë tsiel Salmon),
Booz goc pxoz Obed (Rut brieelë tsiel Booz),
Obed goc pxoz Isai.

⁶ Isai goc pxoz rey David,
David goc pxoz Salomón (lëë Salomón ga gop tsiel Urí wnaa ne bionie David).

⁷ Salomón goc pxoz Roboam,
Roboam goc pxoz Abí,
Abí goc pxoz Asá,

⁸ Asá goc pxoz Josafat,
Josafat goc pxoz Joram,
Joram goc pxoz Uzí.

⁹ Uzí goc pxoz Jotam,
Jotam goc pxoz Acaz,
Acaz goc pxoz Ezequí.

¹⁰ Ezequí goc pxoz Manasés,
Manasés goc pxoz Amón,
Amón goc pxoz Josí,

¹¹ Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee zhoo zha Babiloin grë zha Israel, beynie zho zho Babiloin.

¹² Babiloin, ga gol tib xpëed Jeconí brieelë Salatiel,
Salatiel goc pxoz Zorobabel.

¹³ Zorobabel goc pxoz Abiud,
Abiud goc pxoz Liaquim,
Liaquim goc pxoz Azor.

¹⁴ Azor goc pxoz Sadoc,
Sadoc goc pxoz Aquim,
Aquim goc pxoz Liud.

¹⁵ Liud goc pxoz Leazar,
Leazar goc pxoz Matán,
Matán goc pxoz Jacob.

¹⁶ Jacob co nagon goc pxoz José, meñ ne ptsieelnia Marí.
Marí goc xníaa Jesús, Meñ ne nacle diidz ga cxeel Dios guíaad lo guidzliu.

¹⁷ Zig choopchop bdziñ lo dii co, dzigoraa brieequia Jesús. Tsiida zho wban desde Abraham haxta David; stsiida zho wban desde Salomón haxta len dze ne bey zho Babiloin; stsiida zho wban desde len dze co haxta bdziñ dze ne goc me mëed.

Gol Jesús (Lc. 2:1-7)

¹⁸ Znu bzhaac Marí grop José len dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espíritu Sant pqualo tib mëed zdoo me. ¹⁹ Zeene bien Joséw, miñe been me gocladz me mazd nsaan me Marí; sac sca rnabey ley ni zienalpaa me miñe rnabey ley; per laa me gocladz zhlianse nzozit me, sacne racladz me nrree xquieltó Marí. ²⁰ Zhgab co no me, tibaque blulo tib xanjl Dios lo me lo mcaal.

—José (xiag David) —rëb anjl co—, peet tsienied guic luu, pcaania Marí gac me tsiel luu; sac gon mëdyeen ne zoney me ga, Espíritu Sant bnabey pqualo win zdoo me. ²¹ Zeene gal dze ne laa win gal, JESUS cueelë luu win, sca grieelë win sac win csilaa grë menladz win lo dol.

²² Ga brieequia miñe bnee Dios padzeela, zeene bzeet zha ne biadnee xtiidz mew, rëb zho:

²³ Bii zan to ganle zeene laa tib mëedbgui yquiaalo zdoo tib wnaayeen ne gard gnee mgui lo.

Zeene laa win gal, Emanuel grieelë win.

(Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me ptsieelnia Marí. ²⁵ Laa me wban tipse grop me per ib bgaald me Marí, haxta bded dze ne laa mëdyeen co gol. Bdziñ dzew, laa win gol, dzigo bleelë José win JESUS.

2

Güeygan bla zha rac Jesús

¹ Tib guiedz win ne ndxie xtan Judé lë Belén, ga gol Jesús. Lëetse len dze co zob men ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdziñ Jerusalén, ² bnabdiidz zho rëb zho:

—¿Pa lo dien no mëed ne gac men ne gnabey ladz to nu, mëed ne griin gol ga? Bdzion no tib mel nëz ne no no, mel co blu lo no laa win gol-le, miñ co ne ziaad no nu ziaaddziañ no win.

³⁻⁴ Grë menquiedz Jerusalén, zeene bin zhow bzee zdoo zho. Laa Herod, riendraa me zha gun me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien pa lo nac diidz gal Men ne nole diidz cxeel Dios guiaad lo guidzliu ga. ⁵ Dzigó rëbcha zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

⁶ Tel Belén,

niicle ne winraaw lo grë guiedz ne ngab Judé, per nroob nona;

sac gon ga grieequia tib men ne gnabey,

men ne so yquiaanap grë men Israel, ne nac zho zha ne ngab lo naa.

⁷ Nacne zhlianse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rëb me lo zho:

—Ga gołtsie gołtsieguib mëed co. Zigne gdziel to win, gołtëniegagh diidz lo naa nu, zeena ye naa ga gagan naa win.

⁹ Blozhse sca pso me diidz lo zho, laa zho bio nëz stib laa zho zie. Laa mel ne goñ zho brieequia nëz ne ziaad zho ga, laa ma neraque lo zho; haxta bdzin ma ngali guic yu ne no mëdeyen co, gataa laa ma blëz.

¹⁰⁻¹¹ Zeene goñ zho laa mel co blëz ga, per nli rley zho. Bzëeb zho leñ yu co, goñ zho laa mëdeyen co no ga grop xniaa win, dzigo pquitsgzhib zho lo win, bnee zho tib xtiidz zho lo win. Blozh ga blee zho ncuane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹² Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

¹³ Laa gza zha rac co zey, zeene güeylulo tib xanjł Dios lo José lëetse nixgues me, rëb anjł co lo me:

—José, na zeena guche i pcaanie mëdeyen qui nëz grop xniaa win, gołsë nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to gbi ga.

¹⁴ Guieel cogazh guche José, pcaanie me mëdeyen co nëz grop xniaa win, laa zho ziese nëz Egipt; ¹⁵ ga blëz me haxta bdzin dze ne laa Herod gut. Ga brieequia miñe bnee zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

Bnabey Herod gut grë mëedlas

¹⁶ Laa zeene goñ Herod wbiredraa gza meñ rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëedbgui yeen ne no grë guiedz co, desde win ne golvëz, haxta win ne rap chop iz. Tibaque nan me sca ngaa mëdeyen ne nac Jesús ga niet win, sac blee me cuent zhile gac chop iz psilo goñ gza zha rac co blan mel co. ¹⁷ Guiełnëdox ne bio grë miech co, ga brieequia miñe bzeet Jeremí meñ ne biadteed xtiidz Dios padzeela, zeene znu rëb me:

¹⁸ Tib redz nroob ne zëeb leñ guiedz Ramá.

Grë wnaa Judá, zha ne ziaad lo xtił Raquel, mbanse rac zho, roon zho no zho xquiełnë xpëed zho; zha rna zha ne cchoobladz zdoo zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanjł me güeynee lo José lo mcaal zaatne no José nëz Egipt, rëb me lo José:

²⁰ —José, guche i, pcaanie mëdeyen qui nëz grop xniaa win, gołbire nëz Israel stib; laa zha ne quianał win ga gutle.

²¹ Dzigo brienie José mëdeyen co ga grop xniaa win, bio me nëz laa me wbire zeynie win nëz Israel. ²² Per zeene bin José lëeque tib xpëed Herod meñ ne lë Arquelá, meñ co biaan xlugar Herod zobnabey xtan Judé, bdzieb José ndzinñie me mëdeyen co nëz co. Dzigo bneeque Dios lo me lo mcaal tsie me nëz Galilé.

²³ Goł zho Galilé, bdzinaque zho guiedz Nazaret, ga wbannie zho mëdeyen co. Ga brieequia miñe bzeet grë zha ne biadteed xtiidz Dios padzeela, zeene rëb zho: meñ Nazaret guiab miech nac Jesús.

3

*Psilo Juan Bautist noseed me miech
(Mr. 1:1-8; Lc. 3:1-9, 15-17; Jn. 1:19-28)*

¹ Leñ dze ne psilo Juan Bautist noseed Juan miech xtan zha Judé, dan zit ne no me ga; ² rnee me lo zho:

—¡Golsaan xquiełntseeb to, gólnab lo Dios gun me to perdon grëtaa dol ne ziyun to; sac gon laa dze bdziñle laa me csilo gnabey!

³ Lëë Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi meñ zëëb tib dan zit, rnee me:

“Golzhixcuaa nëz ne ted meñ ne rnabey,

golsaan grë guiełntseeb ne run to.”

⁴ Niapse guits lad camell niaa xab Juan, guid nac ncuaañe ndxie leñ me, ni niapse nguzhanch ni dzin dan row me.

⁵ Nzian grë menquiedz Jerusalén, grë meñ Judé, grë meñ ne no gax ro guiubee Jordán, rreee zho riequiaadiag zho zhiwseed me. ⁶ Grë zha ne rxobdol grëse xtol zho, dzigo rchoobnis me zho ro guiubee co.

⁷ Laa zeene ran me grë zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—¡Miech ngoopdol, masaque nac to zig nac meel! Nan to na lëë, loxaque chobnis to laa to laale lo grë guiełnëdox ne ziaadyob. ⁸ Led scada gon, none zaacse gban to zeena glu nli dib zdoo to psaan to grë xquiełntseeb to. ⁹ Ni gacniatsde to guiab to loxaque por nacse to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham. ¹⁰ Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rrieequia laa me nzhenle xquiiyag me cchug me yag ne sca nac.

¹¹ Nli tib wrobnisse nu rnedz naa lo to, nacsew zig tib señ, sac lëë gdib rluw laa to psaan xquiełntseeb to, laa to bzëëb xnëz Dios. Sangué meñ ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib meñ non nac me, tel naa peet nond naa, per ni par tib ngundziin ne glit lab me raguiald naa gac naa. ¹² Laa me guiaad zig tib zha ne rbeeguizh zhobxtil, sac zha co rlozhse runmbe zho zho, rgotsoz zhow, laa paj rielaal zho lo gui, ga reca. Per gui ne gzëëg grë paj ne guiadbee me ga, gdziñd dze guiuuw.

Brobnis Jesús

(Mr. 1:9-11; Lc. 3:21-22)

¹³ Leñ dze co brieë Jesús nëz Galilé zie me nëz ro guiubee Jordán, laa me zie par choobnis Juan me. Bdziñ me ¹⁴ nëd Juan choobnis Juan me, rëb Juan lo me:

—Lëda i gon, naa none guial lo luu choobnis luu naa.

¹⁵ Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne miñe rnabey Dios.

Dzigoraa pchoobnis Juan me. ¹⁶ Laa me zieriee lo nis zeene laa zhan gbaa bzhal, gonpaa me zig rlu tib palom rlu Espiritu Sant laa me ziad-zëëb bdziñ me guic me, ¹⁷ ni blu zëëb tib tsi meñ co nëz gbaa rnee me:

—Xpëed naa gon nac meñ qui, rleynie naa me, meñ nziuu nac me lo naa.

4

Gocladz menđox niungüet ma Jesús

(Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espíritu Sant me tib dan zit, zaatne guiend miech; ga gocladz mendox niungüet ma me niun me mine racladz ma.

² Zeene goc choo ngbidz choo guieel no me dan co ni tib lë peet rowd me, laa me pcaabedz ³ hor co bdziñ mendox zaatne no me ga, rëb ma:

—Telne nli Xpëed Dios nac luu, bnabey tsaalo grë quie riñ ncuane gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶ rëb ma lo me:

—Telne nli Xpëed Dios nac luu, bringaa nu, benque led znu zhobnee lo Xtiidz Dios: “Znabey Dios grë xanjl me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me ncuane nod gun me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaan ndaan ne rap tib tib guiedz co, ⁹ rëb ma lo me:

—Bui ganle, grëse ncuaan qui gon gnedz naa lo luu telne squiitsgzhib luu lo naa niina, gunnon luu naa.

¹⁰ Horco pquiab me rëb me lo ma:

—iBiche lo naa nu mendox! Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquitsgzhib luu; ni mine rnabey me min co none gun luu.”

¹¹ Dzigoraa biche ma lo me, dzigo bdziñ bla anjl bdeed zho ncuane dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brie me ga güey me nëz Galilé, guiedz ne lë Nazaret.

¹³ Zhisaque goca, brieque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulón ni zha xtii Neftalí. ¹⁴ Ga briequia mine bzeet Isá (men ne pxeel Dios padzeela biadnee xtiidz me), zeene psiaab Dios guic Isá rëb Isá:

¹⁵ Grëse menzit ne ndxie xtan Galilé, nëz dan ro guiubee Jordán, gax ro Nisdoo Galilé, zaatne gocchen Zabulón ni Neftalí;

¹⁶ miech ne no lo ncow nac zho, per niina tib biini nroob biab lo zho. Ladzniale guielgut no zho, per laa biini co biab lo zho par grie zho ga.

¹⁷ Ga psilo Jesús pseed me miech, rnee me lo zho csaan zho xquieIntseeb zho, bgib zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozmel

(Mr. 1:16-20; Lc. 5:1-11)

¹⁸ Len dze co, tib dze zieded Jesús gax ro Nisdoo Galilé gon me chop ngoozmel, tib zho lë Simón Pedr, stib zho lë Ndrés; grop bets zho lëetse laa zho noron guie x ne rgaa mel lo nis. ¹⁹ Dzigo bredz me zho, rëb me lo zho:

—¡Goltë goltëna! zhits naa! ¡Laa naa cxel to tsie to stib gooz, tsietop to grë miech ne sëëb xnëz Dios!

²⁰ Horcogazh psan zho guiex ne rgaa mel ga, laa zho ziana! zhits me.

²¹ Zhisaque bzë me ro nis co, gon me laa Jacob ni Juan (lëë grop xingan men ne lë Zebedë ga) no tib len barcw gza pxoz zho, noquiaabdie zho guiex ne rgaa mel; dzigo bredz me zho. ²² Zigne bredz me zho biaanñieque pxoz zho barcw ga, laa zho ziana! zhits me.

Zëëb diidz grëtaa milagr ne run Jesús

²³ Dipse xtan zha Galilé, guiedz ne rdzintaa Jesús rie me grë yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguiac me grë men rzacnë, tel pe guielguiidztaa rzac zho.

²⁴ Tel pa lotaaw zëëb diidz scataa run me grë milagr, haxta nëz Siria bin miecha. Nzian grë men co brieë ga bdzinne zho grë zhimguidz zho lo me: no grë men rzacnë co noguitnie men dox, no zho rlan guielguidz gutye, no zho gutoo dipse xcuerp, no zho rlan grë pe stib guielguidz, nogaa zho rlan grë pe yoo; grëse zho beenguiac me zho. ²⁵ Zaatne zieetaa me, miech guizhiu ne na! zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guiube Jordán.

5

Cho nac zha ne wen zie (Lc. 6:20-23)

¹ Tib dzew, gon Jesús laa grë miech guizhiu co bdzin lo me, dzigo bzoquia me glaa tib guic gui win. Ga zob me, bdzin grë xpëëdsuel me lo me, ² dzigo psilo me pseed me zho, rëb me:

³ —¡Wen zie zha ne rien ib none gbig zho lo Dios, sac ib zdzin zho zaatne rnabey me!

⁴ ¡Wen zie zha ne mban rac roon niina, sac schoobladz Dios zdo zho!

⁵ ¡Wen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ ¡Wen zie zha ne racladz gon grë miñe rnabey Dios, rzac zhow zigne rzac zha ne rcaabedz, zha ne rnabgaa zhis, sac ible zacnie Dios zho parne grieelo gon zhow!

⁷ ¡Wen zie zha ne rquia zdo miech, sac zigne rquia zdo zho samiech zho scaque Dios squia zdo me zho!

⁸ ¡Wen zie zha ne mbele zdo, zha ne biaanmbele lo xto!, sac zanlo zho Dios!

⁹ ¡Wen zie zha ne noxco zaacse gban miech, tid zho, sac masaque mëëd gac zho lo Dios!

¹⁰ ¡Wen zie zha ne loxaque porne quiayun zho miñe rnabey Dios, rquiana! miech zho, sac ible zdzin zho zaatne rnabey me!

¹¹ 'Zig nac to, zeëne csilo grë miech yquiaago zho to, ctsidil zho to, yquiadiidzguizh zho to loxaque ne rliladz to naa, ¡wen zie to ga! ¹² ¡Nley go!co zdo to, nguieel golgac, sac gon tib guielnzaac nroob ne gneedz Dios lo to! Go!soladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini (Mr. 9:50; Lc. 14:34-35)

¹³ Masaque nac to lo guidzliu rii zig nac zed. Nanle to ganle pa lotaa rquinn zed, per telne nzhida, ¿pa dien rquiina? ¡Lëë gdib rliaala lo guizh, zaatne rded rzë miech rzëeni zhow!

¹⁴ 'Nac to zig tib biini ne noziini lo guidzliu. Grielod tsongueets to, sac tib guiedz ne ndxie glaa tib guic gui, grielod tsongueetsa. ¹⁵ Golguien ganle nacd biini parne tsolana, sinque parne gziiniw lo grè miech ne no len yu. ¹⁶ Zaacse sca golgac, mine rquiin min co golgun, masaque lëew gac zig tib biini; zeena zeene gan miech biini co zien zho ganle pa lotaa men nroob nac PxoZ to men ne no gbaa.

¹⁷ 'Guiabde to togo bod laa naa zial zialtichee naa ley ne psan Moisés, o grëgaa mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca. ¹⁸ Gneli naa lo to ganle: Laga niaa guidzliu rii, laga niaa gbaa, ib none gac mine zhobnee lo ley, mine bneegaa zha ne biadteed xtiidz Dios, ni tib lë paat gdzëeda. ¹⁹ Gacxe waa zha ne quits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grè zha ne ygaa zaatne rnabey Dios. Sangue zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grè zha ne gdzin zaatne rnabey Dios.

²⁰ 'Rso naa diidz lo to sca, zaacse golgac gunde to zigne run grè maistr ley, grè zha farisé; sac telne tsoxcode to gban to zigne racladz Dios, grielod gdzin to zaatne rnabey me.

Nodne gut miech (Lc. 12:57-59)

²¹ 'Led nanle to ganle, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co. ²² Sca rnee ley co, per zig nac zha ne gon në rac zdoor ran samiech, rrieequia beetle zho ga, ye zho riegual quizh falt co. Zig nac zha ne gnee pe tib diidznë lo samiech, none gacredz zho lo wxtis zeena gunquizh zho zho dol co; zha ne quiegaa samiech, lëëque zha rguib guey zho gabil ga.

²³ 'Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴ gase golsan gon co, goltsie goltsienabgazh perdon lo zha ne rlëe to lo ga, gbireraa to dzigo gdeed to gon co. ²⁵ Zha ne sca rlëenie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguuib. ²⁶ Gneli naa lo to ganle grieede to ga, haxtaque lozh quizh to grè dimi ne gnab wxtis lo to.

Nodne tsonie miech zha ne led tsieeld zho

²⁷ 'Nanlaque to ganle zha rnee stib ley ne biaan lo xmengol to, rneew: "Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho." ²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib lëque xcuerp to, lëdle dib nacsew tsietsobe gabil. ³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, lëdle nitlo to len gabil dib nacse xcuerp to.

Nodne csëbtsieel miech (Mt. 19:9; Mr. 10:11-12; Lc. 16:18)

³¹ 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa."

³² Per gni naa lo to ganle: telne quiangobd tsieel zho stib mgui, ni rsëbtsieel

zho, lëëque zha rguib ga yquianie tsieel zho stib mgui. Mgui ne ctsieelnia wnaa co, dol ga gun zho, sac gon nole tsieel wnaa co.

Nodne yquidie miech

³³ 'Ziyon to ganle zha nac stib ley ne biaan lo xmenol to rneew: "Zha ne gzeet lë Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow." ³⁴ Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac gon ga nac zaatne zob Dios; ³⁵ per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me; ³⁶ guiaabgaa to gzeet to guic to. Gunscade to, sac gon zig nac guic to, per ni tib guitsguic to grielod csan nquits to, grielodgaa csan ngas tow. ³⁷ Gacxe waa ncuuane rgobey to zrieelo gun to, golguiab: "zun naaw", togo riengaa to grieloda, golguiab: "grieloda"; tsode to dieen cho gzeet to, sac gon led Diosdraa rnabey min co.

Nodne ctsire miech guielne (Lc. 6:27-36)

³⁸ 'No stib ley znu rnee: "Tel cuee zho tib bziaalo luu, guiaand luu scase bleequ stib bziaalo zho, tel cueegaa zho tib lay luu, scaque been blee stib lay zho." ³⁹ Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisauque nia to.

⁴⁰ 'Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho. ⁴¹ Zeene grieequia zha ne gnabey to güey to xyo zho tib groi hor, golgüeya, haxta tib hor goltsie güey tow. ⁴² Zha ne gnabtaa pe cos lo to, goldeeda; zig nac zha ne ziadtiin, goldeed ncuuane ziadtiin zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdzieel xtiidz luu bleynie zho, scagaa zha ne rlëe lo luu, blëenie zho." ⁴⁴ Per led scada gon, jnone zaacse gac to lo zha ne rlëe lo to! jZha ne rgodee to, golnab lo Dios gunlay me zho! ⁴⁵ Zeena sca glu nli xpëed men ne zob gbaa nac to. Gogan ganle tel me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grëse zho, rbed me dien cho ngable lo me, chogaa ngabd lo me. ⁴⁶ jGase nasca golwi! Tel loxaque zha ne ndzieeldiidz to zha cose rleyne to, jniacxe zgaa to guielnzaac ne gdeed Dios? Haxta zha ne mazdraa ntseeb run min co. ⁴⁷ Tel loxaque zha ne nacse menlidz to, lo zha cose zaacse rnee to, jpe lëe guielwen ga nã rlu to? Haxta zha ne runbeyd Dios run min co. ⁴⁸ Goltsoxco sca ndzinli golgac, zigne rleyne PxoZ to (men ne zob gbaa) grëse miech, scaque none gun to.

6

Zha ne run xyudar samiech

¹ 'Zeene gun to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed PxoZ to men ne zob gbaa. ² Gacxe waa, zeene gun to xyudar zha ne guiend pe yquiin, gooldide tow zigne run grë zha ne rquiaalo rquia zdoos samiech; sac zha co tel pe ncuuane rgad zho, rzo zho len yadoo, rzo zho ro nëz rlozhd yquiaabdzie zhow par gacnãpaa miecha, zeena zha ne gona guiab zho: jZha wentaa zha qui! jGneli naa lo to ganle ne sca rianzuiu zho lo miech, lëe g d g d i b guielnzaac ne yгаа zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne gacnana. ⁴ Dzigo scagaa PxoZ to nroob guielnzaac ne gneedz me lo to, sac tel me gresew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzodiidznie to me, gunde to zigne run gre zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rze miech. Gneli naa lo to ganle leele guielnzaac ne yгаа zho ga. ⁶ Golguien zeene gzodiidznie to me, golsëeb len lidz to dziits golsioog ro yu, ga golzodiidznie me. Ible tedsod nroob guielnzaac gneedz me lo to, sac niicle ncuaañe mazdraa ngeuets zhliana, ran mew.

⁷ Ni zeene nozodiidznie to me, gunde to ncuaañe nonee to leew rlozh, leew rsilo zigne run gre zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸ Gunscade to, sac me ne nac me PxoZ to gardle gnee to xliaadz to lo me laa me nanle pe nac ncuaañe rquiin to. ⁹ Gacxe waa zeene gzodiidznie to me, znu golnee: Dios, luu ne nac luu PxoZ no, zob luu gbaa;

luuse nac men ne mazdraa ndzon.

¹⁰ Luu nac men ne gnabey no, mine gnabeytaa luu zigne raca gbaa, scaque none gaca lo guidzliu nu.

¹¹ Been guielnzaac bneedz ncuaañe dioow no nadze.

¹² Bzhiguiel been no perdon grese dol ne ziodziuuñ no lo luu, zigne rdziuuñ no samiech no perdon gre falt ne run zho lo no.

¹³ Gdeete luu diidz yquuil mendox no, been guielnzaac bla no lo ma.

Luu nac men ne rnabey, men ne rap poder, men ne mazdraa nroob. Mine rnab no nu, ndionpaa no zuñ luuw.

¹⁴ Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque PxoZ to men ne zob gbaa, zuñ me zho perdon. ¹⁵ Zha ne gund samiech zho perdon, niicle megaa gund me perdon xtol zho.

¹⁶ Siba, zeene nocuan to nozodiidznie to me, gunmbande to lo to. Sac gre zha ne rquiaalo miech wen nac zho, sca run zho; zeene nocuan zho xtsiinpaa run zho runmban zho lo zho par gan miech laa zho nocuan. Gneli naa lo to ganle, zha ne sca run leele guielnzaac ne yгаа zho ga. ¹⁷⁻¹⁸ Gunscade to, nguieel golgac ine golzëe biegw guic to, golquiib lo to, zeena ni tib choot guien laa to nocuan, loxaque PxoZ to gacnana, sac grese ncuaañe rac ngeuets ran mew. Grese ncuaañe rac, me ran, me nac men ne gneedz tib guielnzaac nroob lo to.

¹⁹ Tsenalde to loxaque dien zha gapchen to lo guidzliu rii, sac nac ncuaañ lo guidzliu rii rban ngbaana, rnitlo mxila, haxta noxtseeb guioochena.

²⁰ Mazd goltsoxco yгаа to guielnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil.

²¹ Golgona ganle, guielnzaac ne gon gunlo to, ga glu pa gdziñ xalm to, sac zaatne gunlo to guielnzaac co ga nac zaatne gdziñ xalm to.

²² Rrieequia nac bziaalo to zig nac tib biini. Telne niapse lo gre ncuaañe ndzinli rwi to, dzigo gdipse xcuerp to no lo guielbiini. ²³ Laa telne loxaque lo gre ncuaañe nonguield rwi to, dzigo gdipse xcuerp to no lo guielcow ga. iZha rnazhe lo guielcow co, tel leëque biini noyac guielcow!

²⁴ 'Golgona ganle, grieelod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵ 'Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to, pe guie to, pe gacwxabгаа to. Stiba, zniacxe mazdraa non guielwagw lo xquielmban to? Xabгаа tow, zniacxe mazdraa nona lo xcuerp to? ²⁶ Golwi lo grè mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxoz to men ne zob gbaa, men co rdeed ncuane row ma. iTel to gon, mazdraa non to lo grè mguin co! ²⁷ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, zniacxe zrieelo to gunnool tow?

²⁸ 'Zig nac lar, zpe nacne tant tso to zhgab dien pe gacwxab to? Pe rwide to lo grè guiee ne ganle zèeb dan, zha rrooba, led yeda rio zhgab dien zha gacwxaba, per niow rnaw; ²⁹ gni naa lo to ganle, per ni rey Salomón con grè xab niazh me, blud me scataa niow.

³⁰ 'Gase na ganle golwi, niicxe grè guiee dan co na, zna dze zob nguiaw, gzhe widz laaw bidzle, laaw tsele, ni scataa niow rgacwxab Dios, zpe lel to dzigo ygacwxabd me, niicle ne squi gard guien to dib zdoo to gnalo to me?

³¹ 'Tsode to zhgab sca guiab to: "zBay pa griee pe dioow ne, pa griee pe dio ne, pa griee pe dziaacwxab ne?" ³² Grè miech ne runbeyd Dios, tibaque zhgab co rio zho. Sangue to golsoladz ganle, Pxoz to men ne zob gbaa, nanle me pe nac grè xliaadz to, ³³ me nac men ne gneedz ncuane yquin to, per ib none glo tsoxco to gban to zigne rnabey me. ³⁴ Golguien sca tsode to zhgab dien zha ted to gzhe widz, sac gzhe widz co zhaalaque xco ne ziaad. Tib tib dze zhaase zhaase zhgab ne ziaadniew.

7

Nodne gzee zdoo ne cho zha rac (Lc. 6:37-38, 41-42)

¹ Blozh ga rëbchaa me lo zho:

—Golguien, ib gunde to në gac zdoo to zeene ran to ncuane nonguield ne run stib miech, sac to tozhal gunquizh zhow; zeena scagaa Dios, gunscad me to. ² Sac gon tel zha rzac to samiech to, scasaque sac Dios to.

³ 'Lëda ga gon tso to lozhd gzee zdoo to dien cho pe run, ni nenda mazdraa mine run to! ⁴ zPe ro to glisqui to mine run stib zho, ni tel mazdraa nac mine run to? ⁵ Golguien sca glude to ncuane nacle to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rlëeniew, sac gon rrieequia lo mëcw ga gdeed tow, ib zun zho mine run mëcw zactseeb zho lo to. Naca zig nac quie perl, gdeete tow lo zha ne rleynieda, sac gon rrieequia lo nguts ga gdeed tow, tel ngutsa niicle ncuane mazdraa non glaal zho lo ma, loxaque gzeëni maw.

Ncuane gnabtaa ne zгаа new (Mr. 1:22; Lc. 6:31, 43-44, 47-49; 11:9-13; 13:24-27)

⁷ 'Ncuane rquin to, golnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlë me, scagaa me scaania me to. ⁸ Sac grëse zha ne rbig lo me rnab zho ncuane rquin zho, rdeed mew. Zha ne rguib ncuane racladz, racnie me zho rdziel zhow. Zha ne rbedzlë me, rcaania me zho.

⁹ 'Golwi ganle, zig nac to zeene rnab xpëed to quiet gow win, zniacxe ziazh to co to tib quie nia win? ¹⁰ Zeene rnabгаа win mel, zniacxe zdeed to tib meel lo

win? ¹¹ Led rioxco to lëë niapse ncuuaane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelej Pxoꝝ to dzigo, men ne zob gbaa, tsoxcd me to. Ib tedsod grëse zha ne gnab lo me gdeed me ncuuaane rabinieri zho, zdeed mew.

¹² Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa mine bnee grë zha ne biadteed xtiidz Dios padzeelaw, sca rnabeya.

¹³⁻¹⁴ 'Goltsoxco sca tsienal to mine rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëeb nëz co, per nëz co zгаа miech guielmban ndzon ne rdeed Dios. Sac gon zha ne mban zigne notaa guic zho, rrieequia tib nëz nzhen ga zie zho; ndal miech ne zie nëz co, per nëz ne nitlo zho ga zie zho.

¹⁵ Nsin golso lo zha ne gacladz yquidie to gnë zho xtiidz Dios noteed zho, niicle ndooladz rlu zho pale cho grë mëcwxiiil yeen, per zha ntseeba, masaque nac zho zig grë coyot blë. ¹⁶ Zigne runbey miech tib yag por nex ne rquia low, scaque wen wen golwi zha nac ncuuaane run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo grë lbë guiets. ¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuuaana, nex ncuuan rquia low. ¹⁸ Grieeelod yquia nex ncuuan tib lo yag ne rquia nex wen, ni grieeelodgaa yquia nex wen tib lo yag ncuuan. ¹⁹ Gacxe waa grë yag ne rquia nex ncuuan, paat rquiinda, lëë gdib rruga, rlozh ga rzëeg zhow. ²⁰ Min co nagon rne naa lo to, zha ne sca guiaad, por ncuuaane run zho ga gunbey to cho nac zho.

²¹ Grë zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdzind zho zaatne rnabey Pxoꝝ naa. Sac zha ne nlipaa run mine rnabey me, zha cose gdzin ga. ²² Gal dze co, nzian zha ne grieequia gnë lo naa: "Conque rdziuunbey no luu, blactaa name bio no bionee no Xtiidz luu lo miech, nzian milagr ne bdziuun no, haxta menox bdziunxoon no zeene bzeet no lë luu." ²³ Niicle sca gnë zho, ib ycaaniad naa zho, sonëz naa zho; sac ni lalnu beend zho ncuuaane ndzinli.

²⁴ Zha ne rquiaadiag mine rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. ²⁵ Niicle riab guiedox per peet racd lidz zho, niicle rriee medox, nis naal ne raclo rded zaatne zoba ga, per rbixcheda.

²⁶ Laa grë zha ne rquiaadiag xtidd naa, ni rioxcd zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh. ²⁷ Znuse bnitlo lidz zho, sac zeene biab guiedox, lo medox ne brie, lo nis naal ne goclo bded zaatne zoba, znuse bixchew, ni stib lëw biaand.

²⁸ Zeene blozh bnee Jesús, grë miech ne noquiaadiag ga, per nli rzee zdoos zho gon zho zha rseed me, ²⁹ sac rlu men rnabey nac me, led yed me rseed miech zig rseed grë maistr ley.

8

Biac tib mgui ne rlan lepr (Mr. 1:40-45; Lc. 5:12-16)

¹ Laa Jesús ziad-zëeb cho gui win co, miech guizhiu ne nal zhits me, ² tibaque brieequia tib mgui ne rlan guiedzdox ne lë lepr, wbig me pquiits-gzhib me lo Jesús, rëb me:

—Tebaa siguieel luu gunguiac luu naa.

³ Dzigo pxobnia Jesús guic mgui, rëb Jesús:

—Zunguiac naa luu. ¡Niinagazh laa luu guiaanmbe!

Horcogazha laa grë guiedz co bnitlo. ⁴Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyсан gon ne rieguial gdeed luu zigne rnabey ley ne psan Moisés, zeena gan zho ganle laa luu biacle.

Biac tib zha ne rquia dziin tib lo menquiib

(Lc. 7:1-10)

⁵Loxaque bdzin Jesús guiedz Capernaum, laa tib men ne rnabey lo xmenquiib zha Roma bdzinle lo me, rnab men co gunguiac Jesús tib zha ne quia xtsiin me, rëb me:

⁶—Been tib guielnzaac beenguiac tib zha ne rquia xtsin naa, laa zho nix lidz naa ib gacd grial zho, mban rac zho yoobdox ne rquia zho.

⁷Dzigo rëbchaa Jesús:

—Peet nacda, na sè naa guio ne gunguiac naa zho.

⁸—Coo —rëb menquiib co—, rieguiald csodziin naa luu sëe luu haxta lidz naa. Nanpaa naa zrieelo luu nugazh gnabey luu guiac zho. ⁹Sac zig nac naa no zha ne rnabey lo naa, ni ron naa mine rnabey zho; scagaa tel guiep naa tib lo zhaguiib ne rnabey naa: “Güey nu”, rie zho; rnegaa naa: “Dë nu”, riaad zho; zha ne runгаа dziin lo naaw, mine rnabeytaa naa zho, run zhow. Scaque luu nagon nanopaa naa zrieelo sca gnabey luu guiac xmoz naa.

¹⁰Zeene gon Jesús sca rnee men co, rley me, rëb me lo grë zha ne zianal zhits me ga:

—Lo grë zha Israel, gard gon gan naa tib zha ne squitaa dib zdoo rnalo Dios. ¹¹Ni golquiaadiaga ganle, zdzin dze grële zha zit ne squi gnalo Dios, zha co yгаа sobnie Abraham, sobnie Isaac ni Jacob zaatne rnabey Dios. ¹²Laa grë zha Israel, niicle nac zho zha ne nac diidz gdzin ga, lel lo ncow nëz ley guiaan zho, ga tso zho goonnë zho, haxta gow lay zho lo guielnedox co.

¹³Blozh ga rëbchaa me lo menquiib co:

—Bzë nasca, gocnan ganle zigne bliladzse luu guiac xmoz luu, sca gaca. Horcogazha laa moz co biac.

Biac xniadzoop Pedr

(Mr. 1:29-34; Lc. 4:38-41)

¹⁴Laa zeene bdzin Jesús lidz Pedr, gon me laa xniadzoop Pedr nix rlan xlëe.

¹⁵Dzigo bded me zaatne nix zhuz co, zigne bzhen me nia zhuz laa xlëe co blëz. Horcogazh guche zhuz beenlo zhuz ncuaaane dow zho.

¹⁶Ziedzele dzew, laa ngbidz rzëëblew, zeene bdzin grë miech co, nzian grë zha ne nosaci mendox bdzinne zho lo me. Grëse zho beenguiac me, goctox me lo grë mendox ne nosacsi zho ga, benxoon me ma; ni zha ne rlangaa pe stib guielguidz, grëse zho beenguiac me. ¹⁷Ga brieequia mine bzeet Isá, men ne biadteed xtiidz Dios lo miech padzeela, zeene rëb me: “Grëse xquielnë ne, grëse guielguidz ne rziaac ne, me biw.”

Zha ne racladz sëeb xnëz Jesús

(Mr. 4:35-41; Lc. 8:22-25; 9:57-62)

¹⁸Zeene gon Jesús scataa ndal miech ne goclo lo me ga, dzigo gnabey me xpëdscuel me gzhixcuuaa zho, sac laa zho no tedquia stib nëz ro nisdoo co.

¹⁹Dzigo wbig tib men ne nac maistr ley lo me, rëb maistr co:

—Zaatne tsietaa luu gon, sënal naa zhits luu.

²⁰Dzigo rëbchaa me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë nguïn, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

²¹ Wbiquaque stib zha ne rzënalë zhits me, rëb zho:

—Ye naa gon sënal naa zhits luu, per bzhiguiel bneedz diidzbey cuëz naa gangazh naa tsoliu pxoz naa.

²² Pquiab zhe rëb me:

—Dënal zhits naa. Psaan, nzian grë zha gut no, tsow tsiequeets zho samengut zho.

²³ Dzigo laa me bzëëbnie xpëëdscuel me tib len barcw, laa zho zie. ²⁴⁻²⁵ Laa zho zie lo nis co, tibaque zeëne psilo brieë tib medox, masaque rlis me lo nis co, laaw psilo rzëëb len barcw. Dzigo lëëlëd güey zho güeycuaan zho me, sac lëëtaque nixguies me.

—Ligier ganle —rëb zho—, blee mcaal lo luu. ¡Bui ganle laa ne nitlo lo nis rii, csaand luu guet ne nu!

²⁶ Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëë gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blëz me co, niicle nis cow laaw bredze. ²⁷ Zeëne gon zhow, bzee zdoo zho.

—Bay chozhe waa nac men rii —rnee zho—. ¿Zha nac ne haxta me, haxta nis ron xtiidz me?

Men Gadar ne nosacsi men diox

(Mr. 5:1-20; Lc. 8:26-39)

²⁸ Laa zho bdziñdze stib nëz ro nisdoo co, zaatne nac xtan zha Gadar, zeëne brieëquia chop mgui ne nosacsi mendox, bdziñ lo Jesús ga. Zha ntseeba, rdzieb miech zho, choot rdete nëz co. Len baa brieë grop mgui co bdziñ zho ga, ²⁹ nguiedz roptsie zho rnee zho:

—¡Peet gund luu no Jesús, psaan no! Rdziunbey no luu, Xpëëd Dios nac luu. Ne nligaa been guielnzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bnaab grë mendox co lo Jesús rëb ma:

—Telne cuee luu no nu, bzhiguiel bneedz diidz lose grë nguts qui gdziñ no.

³² —Niinaga sca goltsie —rëb me.

Zigne psaan mendox co grop mgui co, güey ma bdziñ ma lo grë nguts co. Horco psilo grë nguts co, rquiaa ma corr güeyypix ma tib ro yeedox ne quia ro nisdoo co, bliaal ma lo nis, grëse ma gut.

³³ Zha ne quianap grë nguts co, gzase zho bzhoon. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga. ³⁴ Grëse miech co, brieë zho zieso zho. Zeëne bdziñ zho gon zho laa Jesús zo ga, dzigo bnaab zho lo me siguiel me gbi me xtan zho.

9

Biac tib men ne gutoo

(Mr. 2:1-12; Lc. 5:17-26)

¹ Dzigo wbiireque bzëëb zho len barcw, bdziñ zho guiedz Capernaum stib, sac ga nac zaatne rbëz Jesús len dze co. ² Zhisaque goc bdziñ me, laa zho bdziñniele tib men rzacné lo me, dipse men co gutoo, ib gacd së me. Lo yag zhoob me bdziñnie zho me ga.

Zeëne gon Jesús dib zdoo grë zha co rnalo zho ne me gunguiac men rzacné co, rëbchaa me lo men rzacné co:

—¡Nley bloo zdoo luu xin! ¡Laa naa benle perdon grëse xtol luu!

³ Ga zob blalaa maistr ley, zeene gon zho sca bnee me, bza zdoo zho rëb zho: “¡Quiaguitnie men qui Dios gon squi rzë xtiidz me!” ⁴ Bienga Jesús sca rza zdoo zho, dzigo rëbchaa me:

—Lëda i gon squi rza zdoo to. ⁵ Nli nganda guiab ne lo miech: “Laa naa benle perdon grëse xtol luu”; per grielod lega guiab ne laa ne gunguiac zho. ⁶ Gacnan to sca ganle naa ne nac naa Mgui ne pxeel Dios, ible rap naa poder par gon naa miech perdon.

Dzigo rëbchaa me lo men rzacnë co:

—¡Niinagazh guche i, bi yag ne bzhoob luu i, zeen bzë!

⁷ Zigne sca bnee me, laa mgui co bzoli, laa me zey. ⁸ Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho quizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹ Blozh ga laa Jesús brieë ga. Ro nëz zieded me gon me tib men lë Matew, lëëtaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

¹⁰ Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëëb diidz nac zha ntseeb, tipse brenie Jesús zho grë xpëëdsuel me.

¹¹ Blalaa zha farisé, gon zho sca tipse zobnie me grë zha co, bded ga, rëbchaa zho lo xpëëdsuel me:

—¡Mod scataa na rownie xmaistr to grë zha ngoopdol, grë zha beed ne nac recaudador!

¹² Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacnë ga rquiin zho, çniacxe squiin zho zaatne no zha ne ndip ndaan? ¹³ Golsoladz ganle znu rnee Dios: “Laa naa racladz gacndooladz miech, yquia zdoo zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

¿Pe nacne rcuand xpëëdsuel Jesús?

(Mr. 2:18-22; Lc. 5:33-39)

¹⁴ Bdzinaque xpëëdsuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëëdsuel luu? Ni no grë no zha farisé, zhiga zhiga laa no rcuandle.

¹⁵ Pquiab me rëb me lo zho:

—Zaatne nadien noyac tib guieltsieel, çpe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelna zo lo zho? Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial tso zho guielnë, rieguial ycuan zho.

¹⁶ Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gon paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ¹⁷ Scaque tsod zha ne cotsow vin cub tib len guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel nziu cuba none len guid cubaque tsotsowa.

Brieëban tib mëdwnaa yeen

(Mr. 5:21-43; Lc. 8:40-56)

18 Lëëtaaque sca quianee Jesús lo xpëëdsuel Juan Bautist, zeene bdziñ tib mgui ne nac zha non yadoo. Zigne bdziñ me pquitsgzhìb me lo Jesús, rëb me:

—Been tib guielnzaac së luu guio ne lidz naa. Laa tib xpëdwanaa naa blozh niina, per nanpaa naa telne cxobnia luu guic win, zbeeban luu win.

19 Dzigo bio Jesús nëz zienal me zhits men co, gza xpëëdsuel me. 20 Lad grë miech ne zienal ga, lad co no tib men wnaa, gogle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

21 Ga zie me, zeene wbig me nëz zhits Jesús, bzhen me ro lar ne mbix Jesús, 21 sac tibaque güeynie guic me, ziac me totsaque yгаа xab Jesús nia me.

22 Dzigo wbire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

23 Laa zeene bdziñ Jesús lidz men rnabey co, laa zha ne rool ndxiele, noquiaa zho grë di ne rac lo ngutoo, grëraa zha ne ndxie ga, nguiedz zëëb tsi zho roon zho, tib ruid ne rac. 24 Dzigo rëbchaa me lo zho:

—Golree nëz ley, sac gon gute mëëd qui, nixguiesse win.

Zha ne rlëë, zha ne rzhidzniegaa me, laa zho brieë ley. 25 Dzigo laa me bzëëb len yu zaatne nix mëëd co, bzhen me nia win. ¡Horcogazha laa win guche!

26 Grëse guiedz ne ndxie dib gax ga, gocnan miech scataa milagr nroob ne been me, bleeban me mëëd co.

Biac chop zha ne rold lo ni tib zha ngop

27 Zeene laa Jesús wbi ga, nëz zie me brieenal chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdoo no!

28 Bdziñ Jesús yu ne rbëz me, laa zho wbig lo me. Dzigo rëbchaa me lo zho:

—¿Dib zdoo to dzigo lëë rliladz to zrieelo gunguiac naa to?

—Dib zdoo now —rëb zho.

29 Dzigo pquiaania me zhits bziaalo zho, ni rëb me:

—Miñe bliladz to i nasca, laaw gac niina zigne bliladz tow.

30 ¡Horcogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho, 31 ni zigne brieë zho ga, laa zho bzodiidzlew. Blozh ga, grëse guiedz ne ndxie dib gax ga, gocnan miech scataa nac milagr ne run me.

32 Loxaque wbi grop zha ne biac lo ga, laa bla zho bdziñlaque, bdziñnie zho tib men ne nosacsi mendox, psanngop ma men co. 33 Dzigo benxoon Jesús mendox co, zeene laa ma bzhoon laa men co psilo bnee. Grë miech guizhiu ne ndxie ga, per nli rzee zdoo zho, rnee zho:

—¡Wlaltaa gard dzian ne tib men ne squitaa gun grë milagr qui!

34 Laa grë zha farisé rnee:

—Ma ne rnabey lo mendox nacie men qui, gane rrieelo runxoon me mendox.

35 Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

³⁶ Zeene ran me grë miech guizhiu ne rcaalsa lo me, rquia zdo me zho, sac ran me mban rac zho guiend cho tib zha ne gacnie zho, rac zho zig grë mëcwxiiil yeen ne guiend xbaxtor.

³⁷⁻³⁸ Tib vuel t haxta rëb me lo xpëedsuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne golle gliaap.

10

Bzo Jesús zha ne tsienee xtiidz me

(Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëedsuel me ga, bzo me zho tsienee zho Xtiidz Dios lo miech, bdeed me poder lo zho gunxoon zho mendox zaatne nosacsi ma miech, ni gunguaiac zho grë men rzacnë.

²⁻⁴ Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz grieve zha Roma Israel),

ni Judas Iscariot (zha ne güeyto Jesús).

Pxel Jesús zha ne tsienee xtiidz me

(Mr. 6:7-13; Lc. 9:1-6)

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar. ⁶ Zaatne no grë zha Israel, gase goltsie; lëë grë mëcwxiiil ne nonziaab ga.

⁷ 'Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ 'Grëse zha ne rzacnë, golgunguaiac zho; zha ne rlan guiedz lepr, golšanmbe zho; zaatne nix zha ne gutle, golcueeban zho; grë zha ne nosacsi mendox, golgunxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ 'Peet güeyde to, xab tow, lab tow, miñe nacwse to, miñe quiase ni to, miñcose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuaañe gow to.

¹¹ 'Guiedz ne gdziñtaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co. ¹² Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, ¹³ golnab gunlay Dios zho. Telne wen gac zho lo to, zunlay me zho, togo guncasdga zho to, dzigo toque gunlay me. ¹⁴ Zha ne sca siguield ycaania to, golriiegazh lidz zho; guiedz ne siguield zho yquiaadiag zho miñe nonee to, golbigazh guiedz co; gollit grë yudie co ni to, gollu lo zho ganle led xtoIdraa to ga tel laa zho nitlo. ¹⁵ Gneli naa lo to ganle zeene gal dze ne laa Dios gun xquielwxtis me, bii

lëetaa gac guielnë ne yгаа grë miech ne bio guiedz Sodom, guiedz Gomorr, lëdle guielnë ro ne yгаа grë miech ne sca siguield ycaania to.

¹⁶ Nsin golso, golguien ganle rreequia tib mëcwxil yeense nac to, ni laa naa rxel to zaatne no grë coyot dox. Ndooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel.

¹⁷ Nligaa nsin golso, sac gon ib ziezio miech to lo wxtis, ni lëëque len yadoo ga quin zho to, ¹⁸ haxta ziezio zho to lo grëraa zha nroob ne rnabey. Laa zho guna, loxaque ne nac to zha ne no xnëz naa, ni gagaa nagon gdeeda diidz gnee to xtidz naa lo grë zha co, ni lo grëragaa miech ne nacd zha Israel.

¹⁹ Zeene sca tsiezo zho to lo grë zha rnabey co, tsode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to. ²⁰ Led tow gnee, sinque, jzhiEspiritu PxoZ to men ne zob gbaa, men co gnee ga!

²¹ Zlëenedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëed zho ctsidil zho, tsielo zho zho ladznia zha ne gut zho. ²² Tel to, guiets yag gan miech to, per telne dziits so to tel pe nactaa lo guielnë ne ted to, ib zгаа to tib guielmban ndzon ne gdzindraa dze lozh. ²³ Guiedz ne no to, zeene laa miech csilo yquiaanal to, golriee ga, goltsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

²⁴ Golwi ganle zha ne nac mëedscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵ Tel zha gun miech maistr, scaque gun zho mëedscuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuaaane gnee miech to, sac gon niicxe naa name ne nac naa Dad, mendox rnee zho nac naa.

²⁶ Gdziebde to, zdzin dze ne glu ganle cho zienal mine nac diidzli, chogaa zienal guielntseeb, gal dze co grësew xoobnen.

²⁷ Grëse mine rne naa lo to zeene nese rziodiidza, golneew lo miech, haxta glaa guic yu golso, nguiedz golneew. ²⁸ Gdziebde to miech, golguien ganle no tib men nroobraa, lëe men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

²⁹ Nligaa gdziebde to, csaand Dios lega pe gac to. Golwi ganle, zig nac grë mguin niicle ne rzac miech peet nond ma, haxta chop ma rdeed zho por tib gaay centav; per PxoZ to gon men ne zob gbaa rsaanladz me ma, ni tib ma guete telne gdeete me diidz. ³⁰ Pelel to dzigo csaan me, haxta guits guic tow, grësew ngaba lo me. ³¹ Gdziebde to sca, golguien ganle nonraa to lo tib dzoon mguin.

³² Gneli naa lo to ganle, zha ne glu lo miech nacie zho naa, scaque naa zeen gal dze co zlu naa lo PxoZ naa men ne zob gbaa, nacie naa zho. ³³ Sangue zha ne ctoladznie naa lo miech, scaque naa ziep naa lo me runbeyd naa zho.

³⁴ jGuiabde to togo laa naa zial loxaque par cuin wense miech! Lëda gon, ye zial naa zialgunctil naa zho. ³⁵ Sac zha ne sëeb xnëz naa, zlëenie xpëed zho zho, tel mëedgaaw, zlëenie pxoz zho zho; scaque men wnaaw, zlëenie xinzhizh zho zho, zha ne nacгаа nguzhizha, zlëenie xnïaa tsiel zho zho. ³⁶ jLëëque menlidz miech gac zha ne glëë gan zho!

³⁷ Zha ne mazdraa rquia zdoo glëenie pxoz zho zho, glëenie xnïaa zho zho, glëeniegaa xpëed zho zho, porne gun zho mine rnabey naa, peet xtsiind zha

co par ygab zho xnëz naa. ³⁸ Scaque zha ne yquia zdoos cueeladz zho zho guiaadnal zho zhits naa, grielod ygab zho lo naa. ³⁹ Sac grëse zha ne rquia zdoos guielmban ne rap zho lo guidzliu rii, ygaad zho guielmban ndzon ne gneedz Dios; sangue zha ne cueeladz xquielmban, niicle tel csacsi miech zho loxaque ne no zho xnëz naa, ib zgaa zho guielmban ndzon co.

⁴⁰ Niina gon ne squi tsie to, grëse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho. ⁴¹ Zha ne cuëzlo tib men ne noteed xtiidz Dios lo miech, guielnzaac ne gdeed Dios lo men co, ye zho ygaa guielnzaac co. Zha ne cuëzlo tib miech ndzinli, guielnzaac ne gdeed Dios lo zha co, ye zho ygaaw. ⁴² Ni zha ne gneedz maase tib zhigaque nis yag lo cho tib zha win ne nac to ne nac to xpëedscuel naa, ib tedsod zdeed Dios guielnzaac ne tsieguial zho.

11

Zha ne pxeel Juan Bautist (Lc. 7:18-35)

¹ Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieaque, güey me grë guiedz ne ndxie gax ga, güeyseed me grë miech co.

²⁻³ Len dze co no Juan Bautist ladzguiib, ga no Juan bin Juan zha nactaa grë milagr ne run Jesús, dzigo pxeel Juan bla xpëedscuel Juan güeynabdiidz zho lo me, dien pe lëele Men ne zëëble diidz cxeel Dios lo guidzliu ga nac me, te dzigoraag gdziñ men co ye. ⁴ Dzigo rëbchaa me lo zho:

—Grë ncuaañe bin to rne naa, grëgaa ncuaañe gon to run naa, goltsie golzodiidza lo Juan. ⁵ Ran to ganle grë zha ne rold lo, grë zha ne gacd së, grë zha ne rlan guiedz lepr, grë zha ne rcuaat, laa zho riac; haxta grë zha ne gutle, laa zho rrieaban. Xtiidz Diosa, laaw quiagaaz lo grëse zha ne rquiina. Grësew, golzodiidza. ⁶ Ni golguiab lo me, dichos zha ne racchopd guic, sinque tiblique rac zho riladz zho cho nac naa.

⁷⁻⁸ Zeene laa xpëedscuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha non nacw me? Per nanle to ganle zha ne scataa racwxab riod zho dan. ⁹ Nligaa cho dien güeynie guic to nac me, ¿te rëb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ¹⁰ Me ga raquiet lo Xtiidz Dios zaatne znu rnee: Sxel naa tib zha ne tednerga lo luu, zha co gzhixcuaa nëz ne ted luu.

¹¹ Ne nligaa lo grëse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

¹² Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque brieequia zha ne rlëenie zhiwseed Dios, gaxe waa zha ne nlipaa rdziebd, zha cose rcaaniaw, rzëëb zho xnëz me. ¹³ Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet zhow. Ni niina ne laa Juan biaad, laa men co blanso. ¹⁴ Juan gon biaad niina zig no diidz guiaad Li;

golgacnañ sca ganle cho nac me. ¹⁵ Zha ne racladz guien zho zha nac grë mine none naa nu, jyquiaadiag zhow!

¹⁶⁻¹⁷ 'Nac grë miech rii, riend zho pe racladz zho. ¿Cho ganle run zig run zho? Lëë zho run mine run mëëdlas ne rio wguít ro nëz, niicle rool xcompañer win di nguieel ríeed run, niicle roolga zho di ngan, roond win. ¹⁸ Sac gon biaad Juan, ran zho rowd me tel pe ncuaañe row zho, ríed me ncuaañe rie zho, dzigo laa zho rnee mendox nacie me. ¹⁹ Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, íb riend me cho rtsieelsa me, haxta grë zha ngoopdol, haxta grë zha yozh ne rtop dimi ne razh lo zha Roma rzënie me. Sca rnee zho, sangue zha ne rgaa guielbiini ne rdeed Dios, riën zho cho nac zha ne ziaadgun xtsiin me.

*Miech ne bzhiguiel ncaania xtiidz Jesús
(Lc. 10:13-15, 21-22)*

²⁰ Blozhse ga, dzigo psilo Jesús bzeet me mine ygaa grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per íb psaand zho xquielntseeb zho, rëb me:

²¹ —jProbsaxe grë men guiedz Corazín, grë men guiedz Betsaid! Sac gon gonpaa zho grë poder ne rap Dios, per íb psaand zho xquielntseeb zho. Tel niaca mine nian grë men guiedz Tiro, grë men guiedz Sidón, grë milagr ne gon zho beñ naa, íb ndedsod mban niac grë zha co nio zho guielnë, zëëb nsaan zho xquielntseeb zho, mbig zho lo Dios. ²² Gacnañ zha Corazín, gacnañ zha Betsaid sca ganle, gal dze ne gun Dios guielwxtis, lëëtaa caxtigw ne ygaa zha Tiro ni zha Sidón, mazdraa mine ygaa zho. ²³ Scaque zha Capernaum, masaque rzac zho niina zha nziuuraa lo Dios, per gacnañ zho ganle haxta guiet lo ncowdoo ne guey mendox ga guey zho; sac gon tel niaca mine nian zha Sodom grë milagr ne ran zho noyun naa, íble nsaan zha co xquielntseeb zho, nitlod zho. ²⁴ jGacnañ zha Capernaum ganle gal dze ne gun Dios guielwxtis, lëëtaa caxtigw ne ygaa zha Sodom, mazdraa mine ygaa zho!

²⁵ Dzigo bzodiidzníe Jesús Dios, rëb me:

—Dios luu ne nac luu Pxo z naa, luu rnabey gbaa luu rnabey guidzliu, rnedz naa xquizh lo luu sac grë mine noyun luu nu niina bdeete luu diidz niacnañ grë zha raca, sinque laaw blu luu lo grë zha ne nac zig grë mëëdlas.

²⁶ Sca quiaayun luu, sac íb scale racladz luu gaca.

²⁷ Blozh ga rëb me lo grë miech ne ndxie ga:

—Grëse ncuaañe ran to quiaayun naa, Dios men ne nac Pxo naa, me bneedz poder rii lo naa; sac íb laa me bzo naa, naa guña. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ 'Grëse to ne nac to zha ne në noded, rdib rdzag to quiaaguib to dien zha guiaanwen zdoo to, goltë lo naa, naa gneedz tib wdziiladz ndzon lo to.

²⁹ Nligaa golbig lo naa, goltënal zhiwseed naa, golang tib miech tiblíladz, tib miech ndooladz zigne nac naa; zeena gap to descans co. ³⁰ Nacda ncuaañe ngan, nacda ncuaañe guiab to glëbde to gun tow.

12

*Dze ne rdziiladz zha Israel lo dziin
(Mr. 2:23-28; Lc. 6:1-5)*

¹ Len dze coquew, tib dze lëëtaque dze ne rdziiladz zha Israel lo dziina, bded Jesús zaatne zëëb zhobxtil grë xpëëdsuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. ² Gon bla zha farisew, dzigo rëb zho:

—jLēda i goṇ noyūn to, noguiits to ley i! Goḷguien gaṇle dze nda nac dze rii.

³Pquiabchaa me rēb me lo zho:

—ǰPe gard glab to zaatne ziaad gaṇle zha beēn rey David, tib dze zeene pcaabedz me grē me zha ne ziegza me, ni zienied zho pe gow zho? ⁴Rneew, bzēēb me leṇ yadoo güeyṇab me guietxtil ne nac gon, downie me grē zha ne ziegza me ga, ni loxaque zha ne nace pxoz row guietxtil co, ǰpe led bdiitsd me ley ga? ⁵Lo xley Moisés name zhobnee gaṇle zha haxta dze ne rdziiladz to lo dziin ruṇ grē pxoz dziin leṇ yadoo, ni rneeda doḷ ga sca ruṇ zho. ⁶Goḷwi gaṇle zha rats ley par gac dziin leṇ yadoo, ni yadoose ga, gacnaṇ to gaṇle lo to nu zo meṇ ne mazdraa non lo yadoo.

⁷Rnee Dios lo Xtii dz me, quiambēzd me diēṇ peraa gun miech, diēṇ peraa cogon zho lo me, sinque miṇe racladz me guiēṇ zho yquia zdoo zho samiech zho. Teḷ niaca miṇe nli rien to miṇ co, zien to gdziibdoḷde to zha ne rapd doḷ.

⁸Gacnaṇ to gaṇle naa ne nac naa Mgui ne pxeel Dios, naa rnabey dze rii, naṇpaa naa pe nonguiel gac.

Biac tib mgui ne mband tib nia

(Mr. 3:1-6; Lc. 6:6-11)

⁹Bded ga, goḷ stib dze ne rdziiladz zho lo dziina, güey Jesús leṇ yadoo win ne zob lad guiedz co. ¹⁰Lad grē miech ne ndxie leṇ yadoo co, no tib mgui ne mband tib nia; porque laa zha farisé bnabdiidzlaque lo me diēṇ pe nonguiela guṇguiac me miech dze ne rdziiladz zho lo dziin. Sca bnabdiidz zho, sac quiauguib zho diēṇ pe yquiaaqi zho me tsieso zho me lo wxtis.

¹¹Dzigo pquiab me rēb me lo zho:

—Togase diēṇ, zha ruṇ to zeene lēētse dze rii rietsobe tib xpēcwxiiil to tib leṇ blē nroob, ǰled zēēb lēē rie to riebee to ma? ¹²Teḷ sca rquia zdoo to mēcwxiiil, iḡolguiēṇ gaṇle mazdraa gon non miech lo tib mēcwxiiil! Gacxe waa ible nonguiela guṇ ne xyudar samiech ne, niicle maase dze nda nac dze co.

¹³Dzigo rēbchaa me lo mgui ne nē nia ga:

—jBzigaa nia luu!

Zigne bzigaa mgui nia mgui, biacgazha, biaanā zig nac stib miṇe ndaan-taque ga.

¹⁴Grē zha farisé co, zigne brieē zho ga laa zho psilo bnediidz diēṇ zha gdeeda diidz gut zho Jesús. ¹⁵Biēṇ Jesús sca no guic zho, dzigo mazd brieē me ga. Miech guizhiu ne zienal zhits me, grēse meṇ rzacnē ne zienal ga, beēṇguiac me zho; ¹⁶per pso me diidz lo zho, choot lo gzodiidzd zhow.

¹⁷Ga brieēquia miṇe pquiaa Isá, tib meṇ ne biadteed xtiidz Dios padzeela, zeene rēb me:

¹⁸Lēē meṇ rii bzooblo naa guṇ xtsiṇ naa, rleynie naa me, rzac zdoo naa grē ncuaaṇe ruṇ me.

Zded naa zhiEspíritu naa gacnie me, me nac meṇ ne cxobneṇ xtidz naa lo grēse miech.

¹⁹Tiḷnied me miech, sedzd yaṇ me lo zho, sod me ro nēz gopstie me.

²⁰Grē zha ne gzhe gzhele rac, zig tib goobgui ne quiaxweele, zig tib lē guier ne noyiidiele,

csaṇd me zdoo zho;

zha ne mban rac lo xliaadz zho,

csaṇd me zho.

Miṇ co tsoxco me, haxta gaṇ me grēse miech gacnaṇ miṇe nac diidzli, ni tsienal zhow.

²¹Haxta zeene gaṇ me ye grē zha ne nacdraa zha Israel,

laa zho gnalo me.

Rëb zho mendox nacnie Jesús
(Mr. 3:20-30; Lc. 6:43-45; 11:14-23; 12:10)

²² Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi mendox mgui. Znuse beenguiac me mgui, gagazh psilo gon mgui, psilo bnee mgui. ²³ Grë miech ne ndxie lo me ga, per nli bzee zdoo zho, rnee zho:

—¡Bay pe lëe meñ qui naye nac Meñ ne zëëble diidz ga cxeel Dios!

²⁴ Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo mendox ma co nacnie me, gane rrieelo runcxoon me mendox.”

²⁵ Bien Jesús sca rza guic zho, dzigo rëbchaa me lo zho:

—¡Ncuuaane gacd gon rnee to! Tel tib wxtis nadien lëëque zha ne nacnie zho csilo tilnie zho, ¿niacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, ¿niacxe nitlod dii co? ²⁶ Scaque mendox nagon, telne lëëque lëe ma guncxoon samendox ma, ¡pe nale na bnitlo ma! ²⁷ Nana ne squi rnee to Beelzebú nacnie naa gane rrieelo runcxoon naa mendox, ¿zha ne nacgrë to dzigo, cho nacnie zho ne ye zho runcxoon ma? Gase naganle rlu dolldox i quiayun to, squi rnee to. ²⁸ Sangue tel naa zhiEspíritu Dios nacnie naa gane runcxoon naa mendox, ni ga rlu ganle laa Dios psilo quianabeyle nu.

²⁹ ¡Masaque nac mendox zig tib zha ne no xfuers, zha ne gacladz cuee grë ncuuaane no lidz zha co, none cxidoogazh zho zho! ³⁰ Tel mendoxa rlëënie ma naa, ni nanle to ganle zha ne rlëe lo ne, gacnied zho ne.

³¹⁻³² ‘Gacnan to ganle, grëse dol ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon min co; sangue zha ne gneenë zhiEspíritu me, ib gundraa me zho perdon.

³³ Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo yag ncuuaangaaw, nex ncuuaaque rquia low. ³⁴ ¡Scaque to nagon zhin mendox! ¿Zha nan to nadien gac to miech wen, tel desde zdoo to ntseeb? Miech ntseeb to gane squi rzë xtiidz to, sac gon, ¡grëse diidz ne rrieer ro miech, zdoo zho rzaw! ³⁵ Gacxe waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse diidznë rrieche ro zho. ³⁶ Ni gal dze ne gon gun Dios guielwxtis, ib tedsoz zunquizh me miech tib tib diidz ntseeb, tib tib diidznë ne sca rrieer ro zho. ³⁷ Sac gon zigne rzë xtiidz zho niina, min co cueequia zho gal dze co, o mincogaa cteedquie zho.

Racladz zha farisé gan zho milagr
(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rëb zho lo me: —Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rëb me lo zho:

—Nazdpaa ntseeb to, squitaa gocndip zdoo to nëz lo Dios, ¿zha nacraa milagr ne racladz to gan to? ⁴⁰ Stibaque milagr gon gan to, lëe min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. ⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios, laa to nëde to gon to diidz niicle ne lo to nu zo tib meñ ne mazdraa

non lo Jonás. ⁴² Scaque rein ne bzob nēz Sabá, steedquie me to gal dze co, sac tel rein co golwi ganle pa lo guidzliu ne brie me biaadgan me rey Salomón, biadquiaadiag me grē xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

⁴³ Telne csaande to xquieIntseeb to i gon, low lozh to. Sac to zig bzhaac tib zha ne psacsi mendox. Zeene brie me zdoos zho, güey ma güeyquianzē ma grē dan zit güeyguib ma dien pa cuēz ma. Gonse ma rdzielz zaatne cuēz ma, ⁴⁴ rēb ma: “Mazd laa naa gbireque guia naa zaatne brie naa ga.” Zeene biire ma bdziñ ma zdoos zha co, gon ma nroob lugar no, pale tib yu dets, ⁴⁵ nacne güeyaque ma güeyxi ma zgadz samendox ma, ma ne mazdraa ntseeb blēznie ma zdoos zha co. jDzigole mazdraa mban biaan zha co, lēdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzēeb zho haxta len yu, sac scataa miech guizhiu ne ndxie lo me ga. ⁴⁷ Dzigo rēb tib zho lo me:

—Laa xniaa luu gon ni zha bets luu quiambēz luu nēz ley, racladz zho gzodiidznie zho luu.

⁴⁸ Pquiab me rēb me:

—jXnia naa ye, bets naa ye?

⁴⁹ Blis nia me, blu me grē xpēēdscuel me, dzigo rēbchaa me:

—Zha ne gon nac zig zha rii, lēē xnia naa ga, lēē bets naa ga. ⁵⁰ jSac grēse zha ne run mine rnabey Pxoos naa men ne zob gbaa, grēse zha co nac bets naa, nac bzian naa, nac xnia naa!

13

Nac Xtiidz Dios zig zhubxtil (Mr. 4:1-20; Lc. 8:4-15)

¹ Blozh ga brie Jesús güey me ro nisdoo. Ga zob me, ² zeene gon me nzian miech ne nocaalsa lo me ga, nacne bieper me güeysoob me tib len barcw zo gax ro nis co, psilo me pseed me zho.

³⁻⁴ Ndal grē ncuaañe pseed me zho, per niapse nd cuent rnee mew lo zho. Lēē tib cuent ne bzodiidz me ga nu, rēb me:

—Tib zha name güey gon zhubxtil. Zeene laa zho quialaal zhub co, now bliaal gax ro nēz, now bliaal lad quie, now bliaal len yag guiets. Mine bliaal gax ro nēz ga, güey grē mguin znuse dow maw. ⁵ Mine bliaal zaatne nac lad quie, znuse znuse blana, ⁶ per zeene laa lo ngbidz brie, znusaque bgoola, bidzgaw; sac guieñd nroob low. ⁷ Mine bliaal zaatne nac len yag guiets co, zeene laa yag guiets pxii, bnitlogaw. ⁸ Sangue mine bliaal zaatne nac lo liu naal, blana, brooba ni goca; lo tib tib zhub co no zhimziona brie galptsii zhub, now brie tsongala, nogaaw brie haxta tib gayoow.

⁹ Blozh ga, rēbchaa me:

—Zha ne racladz guien mine rne naa nu, yquiaadiag zhow.

¹⁰ Zeene laa grē miech co zey, dzigo wbig xpēēdscuel me nbnabdiidz zho lo me dien pe nac ne sca niapse nd cuent rseed me grē miech. ¹¹ Pquiab me rēb me:

—Tel to, Dioszhal rlu lo to zha rnabey me, niicle ncuaañe mazdraa nguetsa; laa grēaa miech ne gard gbig lo me, grieeelod guien zhow. ¹² Sac zha ne noxcole dien zha rnabey me, zdeedraa me guieibiini lo zho guien zhow, laa zha ne noxcoda, mine riense zho, stiche mew. ¹³ Sca rseed naa zho parne tsoguic zho zha rnabey Dios, per nac zho niicle nzhal lo zho rwi zho,

per peet ranḁ zho; niicle nzhiäl diag zho per peet rond zho; ib peet rienḁ zho.

¹⁴ Lëe miṇe nac zho i bzeet Isá, zeene znu rëb me:

Nac miech qui, niicle peraa ron zho, per peet rienḁ zho;

niicle rwiraa zho, per peet ranḁ zho.

¹⁵ Ne nliṇaa miech nad, miech ndip zdoo nac zho,

rrieequia ntse zho diag zho, ntse zho lo zho;

parne peet gond zho, peet ganḁ zho.

lb rienḁ zho zha gbig zho lo naa, ygab zho xnëz naa, parne csilaa naa zho.

¹⁶ Sangue to —rëb Jesús lo zho—. ¡Dichos to porne rienḁ to pe ranḁ to, ni riengaa to miṇe ron to! ¹⁷ Blactaa zha ne biadteed xtiidz Dios padzeela, blactaa zha ne güeynaḁ miṇe nac diidzli, bzoobladz zho nianḁ zho grë ncuaaṇe ranḁ to niina, per bgaad zho nianḁ zhow; bzoobladz zho nquiaadiag zho grë ncuaaṇe noquiaadiag to, per bgaad zho nion zhow.

¹⁸ Golquiaadiag sca ganḁ zha nac xcuent zha ne güey gon ga. ¹⁹ Ro nëz ne sca bliaaḁ zhoḁ co, sca nac palal miech ne riepaa zha ne rienee Xtiidz Dios lo zho, per rioguicḁ zhow, rlozh ga rdziṇaque menḁox, rietiche ma telḁ palalse miṇe rienḁ zho. ²⁰ Lad quie ne bliaaḁ spalal zhoḁ co, sca nac grë zha ne rley rcaania Xtiidz Dios; ²¹ per led dib zdood zho rcaania zhow, gane zeene laa miech rsilo rlëe lo zho, laa miech rtsidilḁ zho porne rliladz zhow, rsaanga zhow. ²² Nogaa zho nac zig nac lenḁ yag guiets co. Rquiaadiag zho Xtiidz Dios, per rsilo zho lelḁ grë ncuaaṇe no lo guidzliu rii mazdraa rionie guic zho, rquidie grë dimi zho. Grë ncuaaṇ co rioxcora zho, laa ne tsonie Xtiidz Dios guic zho, miṇ co rquiaqui ib runḁ zho miṇe rnabey me. ²³ Laa liu naaḁ ne bliaaḁ miṇe scataa goc ga, sca nac grë zha ne dib zdoo rquiaadiag Xtiidz Dios, rienḁ zho zha naca, ni rban zhow zigne rnabeya. Rrieequia grë ncuaaṇe runḁ zho, no zho nac zig mzion ne brieec galptsii zhoḁ ga, no zho nac zig miṇe brieec tsongaḁ, nogaa zho nac zig miṇe brieec tib gayoow ga.

Zha nac xquielrnabey Dios

(Mr. 4:30-34; Lc. 13:18-21)

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib menḁ ne gon zhoḁxtil. Niapse zhoḁ wen, zhoḁ nal gon me, ²⁵ per no tib zha ne rlëe lo me, goḁ tib pcow liu, horne grëse miech nixguies, güey zho güeylaaḁ zho xmidz guizh ncuaaṇ zaatne gon me.

²⁶ Zeene laa zhoḁxtil co psilo blanḁ mzion, hor coraa blu laa guizh ncuaaṇ co no lada. ²⁷ Grë zha ne quia xtsiinḁ me, zeene gonḁ zhow güey zho rëb zho lo me: “Tebaa ganḁ luu ganḁ, dipse lad xoob luu zëeb guizh ncuaaṇ, ¿dieenḁ pa brieew gocbniw ga?” ²⁸ Dzigo rëb me: “Rienḁ naa no cho tib zha ne rlëe lo naa, zha co beenḁ dziinḁ co.”

Goḁladz zho, hor cogazh nielaadz zhow per bzhiguielḁ me, ²⁹ rëb me lo zho: “Tsielaadzde tow, sac telḁ glaadz tow niina ye zhoḁxtil gliaadzniew.

³⁰ Goḁsaan sca zëeba ga, na zeene laa wlaap gac, hor co gnabey naa zha ne quits zhoḁ, ctogazh zhow gdziinḁ zhow tib lad tseca; lozhraa ga quits zho zhoḁ, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ranḁ miech dan rii. Nanḁ to ganḁ midz moxtaz nac midz ne mazdraa win, ³² ni telḁ gacbniw, rrooba ni lëew rroobraa lo grë guizh ne ranḁ zho ro yu, raca lal tib yag nex, haxta rdzinḁ grë mguinḁ rzhixcuaa ma zhiptsieez ma lo grë zhicwa.

³³ Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne riaa quietxtil. Niipaque ncobi riots tson lmud rin, ni dib nase ncob co rzibe.

³⁴ Grëse miñe pseed Jesús grë miech co, niapse con cuent bnee mew lo zho.

³⁵ Ga brieequia miñe bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuaañe gard gacnañ miech wlal ne bre guidzliu.”

Zha nac xcuent guizh ncuaañ co

³⁶ Blozhse bnee Jesús lo grë miech co guey zho, yeque me laa me zey gza xpëëdsuel me. Bdziñ zho ro yu, ga bñab zho lo me siguiel me gnee me lo zho dien zha nac xcuent guizh ncuaañ ne bzeet me ga. ³⁷ Dzigo rëbchaa me lo zho:

—Golgona sca, znu gon nac cuent co. Rrieequia gon naa ga nac men ne gon zhob co. ³⁸ Liu ne bñiaaw ga, nac lo guidzliu, zhobxtil co nac grë miech ne nole xnëz Dios, laa guizh ncuaañ co nac grë zha ne no ladznia mendox. ³⁹ Zha ne güeygan guizh ncuaañ co, lëe mendox ga. Dze lo wlaap co, gac dze ne gun Dios xquielwxtis me, zha ne tsie wlaap ga, lëe anjl ga. ⁴⁰ Ni zigne sca cuee zho guizh ncuaañ co lad zhobxtil, gzëg zhow, scapaa nagon gal dze ne gac xquielwxtis Dios, ⁴¹ sxel naa grë xanjl naa tsie zho tsiebee zho grë zha ntseeb, zha ne sca runcal xtol grëraa miech, lad zha ne no xnëz naa. ⁴² jGrëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdcox co. ⁴³ Laa grë zha ne güeynal miñe nac diidzli, zha co gdziñ zaatne rnabey Pxoza naa, masaque zig xbiini ngbidz glu zho ga. jZha ne racladz guiena yquiaadiag zhow!

⁴⁴ Ziaad gac xquielrnabey Dios zig tib ncuaañ non ne noliu tib lo xcuaañ miech. Zha ne gdziel tib ncuaañe sca non, ib tedsod zie zho sto zho grëse ncuaañ rap zho griez dimi si zho liu co, parne gunchen zho ncuaañ non co.

⁴⁵ Zha ne rzëeb lo xquielrnabey Dios ziaad gac zho zig tib zha ne rzi quie perl miñe mazdraa niazh. ⁴⁶ Zeene ron zho pa no tib perl co, rto zho grëse ncuaañ rap zho, rie zho rzi zhow.

⁴⁷ Nacaque xquielrnabey Dios, zig tib guix nroob ne rgaa mel niina, zeene rsëeb ngooz mela lo nis grë lose mel rtopa. ⁴⁸ Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rquiin laa tib chicuid zole rio ma, laa ma ne rquiind rsëeb zho. ⁴⁹ Scapaa nagon gac miech gal dze ne gun Dios xquielwxtis me, ziaad grë xanjl me cuee zho grë zha ntseeb lo zha ne no xnëz me, ⁵⁰ tsieron zho zho lo guidox ne rieguial zho. Ga tso zho goonnë zho, haxta gow lay zho lo guielnëdcox co.

⁵¹ Blozhse ga, rëb me lo zho:

—¿Pe bien to na zha nac grë miñe blozh bne naa lo to nu?

Grëse zho pquiab rëb zho:

—Bien now.

⁵² Dzigo rëbchaa me:

—Tib zha ne rienle zha nac grë ley ne psañ Moisés, ni squi guien zho zha nac zhiwseed Dios miñe zialnie naa niina, masaque nac zho zig tib zha gol ne quianie chop lo ncuaañ non lidz zho, quianie zho grë miñ gol-le ni quianiequegaa zho miñ cub.

Güey Jesús ladz me

(Mr. 6:1-6; Lc. 4:16-30)

⁵³ Blozhse sca bzodiidz me grë cuent co lo zho, laa me briee ga zie me nëz ladz me.

⁵⁴ Bdziñ me ga güey me yadoo, psilo me pseed me grë miech co. Per nli rzee zdoo zho ron zho grë miñe rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guiełbiini ne squitaa rap me i, ne rnee miech ndal grē milagr ne run me? ⁵⁵ Tib zhinse ngurēyag name nac me. Led lēē xingan Marí i, bets me name nac Jacob, nac José, nac Simón ni Judas; ⁵⁶ grē bzian mew, nu no zho grē zho. ¿Pa dzigo güey me wseed qui?

⁵⁷ Ib beencaad zho me, haxta rlēē zho lo me. Zeene gon me sca rac zho, rēbcha me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lēdle ladz zho ni menlidz zho ni menladz zho nēd gunbey zho.

⁵⁸ Beend me nzian milagr ga, sac sca ndip zdoo grē miech co ib nēd zho niladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Len dze co bin rey Herod (men ne rnabey Galilé) grē ncuane run Jesús, sac tel pa lotaaw zēēb xtiidz me; ² dzigo rēb Herod lo grē zha ne run dziin lo me:

—Rien naa lēē Juan Bautist ga quiayun grē min co, segur brieaban me.

³ Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, ⁴ loxaque ne rnee Juan lo me nonguiełda ga lēēque Herodí ptsieelnia me, sac tsielpaa bets me Lip nac Herodí. ⁵ Gocladz Herod niut me Juan, per bdzieb me menguiedz, sac rleynie zho Juan, rien zho xtiidz Dios ziadteed Juan lo miech.

⁶ Laa tibtaa dzew, lēētaque noyac zhilni Herod dze ne bloozh me stib iz, bded tib xindzooq Herodí squi ndxie grē zha ne zobnie me psilo ndzooq biee ndzooq. Bdziladz me gon me zha biee ndzooq, ⁷ haxta brieer ro me rēb me: “Ncuane gacladzataa luu gnab luu, znedz naaw.” ⁸ Per glōle pquiił Herodí ndzooq, nacne rēb ndzooq lo me: “Mīne racladz naa, xooq guic Juan tib len bandej gneedz luuw lo naa niinagazh.”

⁹⁻¹⁰ Zeene bin Herod sca rēb ndzooq, mbanse rac me; per rdeetraaw diidz niab me grieloda, sac grēse zha ne zobnie me ga, bin zho rēb me zdeed me ncuane gnabtaa ndzooq. Dzigo racse me pxeel me zha ne güeychug guic Juan len ladzguiib. ¹¹ Zeene wbire zho, zhoobse guic Juan tib len bandej bdeed zhow lo ndzooq, dzigo güey ndzooq güeydeed ndzooq lo xniaa ndzooq.

¹² Zeene gocnan xpēēdsuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaan Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo brieer me ga bzēēb me barcw zie me tib zaatne guiełd miech. Per znuse bien diidza, nzian grē guiedz co zha ne gocnana, tib ro nis güey zho, glōle zho bdziñ zaatne no gdziñ me ga.

¹⁴ Laa me noyet len barcw, zeene blis lo me gon me laa grē miech guizhiu co ndxiele ga; pquia zdoo me zho, beenguiac me grē nguidz ne zienie zho.

¹⁵ Laa dze ziedzelew, wbig xpēēdsuel me rēb zho lo me:

—Mazd gudz lo grē miech qui guey zho na, zeena guiob tsie zho grē guiedz win ne ndxie gax i tsiesi zho ncuane gow zho; sac gon laa dze bdzele.

¹⁶ Pquiab me rēb me lo zho:

—¿Pe nacne guey zho squise? To none gdeed ncuane gow zho.

¹⁷ Rēbcha zho:

—¿Per pe dien yguiaan no zho? Pe rnase gaay guietxtil ni chop meḷ ne ziaadnie no nu, lo grētaa miech qui.

¹⁸ Dzigo bnabey me zho güeynie zho guietxtil co, güeynie zho meḷ co lo me, ¹⁹ ni bnabey me grē miech co bzob zho lo grē guizh nguia ne zëëb ga. Horco bzhen me gza guietxtil co ni grop meḷ co, blis lo me nēz gbaa, bdeed me xquizh lo Dios. Blozhse bdeed me xquizh, beengroḷ me gza guietxtil co, meḷ co ne, zigse rdeed mew lo xpëëdsuel me scase scase bdiiz zhow lo grē miech co. ²⁰⁻²¹ Grēse zho dow zho haxta zaatne bieltaa zdoo zho. Miech tafa, zha bguise rga zīg gaay mil, nandragaa grē meḷ wnaa, grē mēēdlas; ni zeene blozh dow zho, scase ncuane nroob biaan, biodzē tsiipchop chicuid bio grē guietxtil co, bio grē meḷ co.

Rzë Jesús lo nisdoo

(Mr. 6:45-56; Jn. 6:16-21)

²² Zeene blozh ga, bnabey Jesús xpëëdsuel me bzëëb zho leḷ barcw, zeena zienerga zho tedquia zho stib nēz ro nis co; laa me bii blēz ga, nozonēz me grē miech co. ²³ Blozhse bzonēz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

²⁴ Horco laa barcw ne zie xpëëdsuel me ga no lo nis co, ib gacd csëëniob zhow, sac rriee me rtsire mew, nēzrii nēzrec raca lo nis. ²⁵ Merle guini liuw, tibaque zeene laa me bdziḷ zaatne zie zho ga, tib lo nis co ziezē me.

²⁶ Zeene goḷ zho laa meḷ co sca ziaad-zē lo nis co, bdzieb zho, broptsie zho rnee zho:

—jTib ndziin i goḷ ziaad i!

²⁷ Dzigo bnee me lo zho rēb me:

—jGdziebde to, naa zial nu!

²⁸⁻²⁹ Pquiab Pedr rēb Pedr:

—Telne luu i ziaad i, bneedz diidz sē naa lo nis glanso naa lo luu i.

—jDē sca! —rēb me.

Lëëlēd biet Pedr leḷ barcw, laa Pedr ziezēle lo nis co ³⁰ zeene goḷ Pedr scataa rlis me low, bdzieb Pedr. Tibaque zeene bien Pedr laa Pedr nod-edequiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen me nia Pedr, bzoli me Pedr lo nis co.

—jAque luu goḷ Pedr! —rēb me—. ¿Pe nacne gocchop guic luu? ¿Gard goḷ gliladz wen luu cho nac naa?

³² Zeene laa me biepnie Pedr leḷ barcw, laa me co blēz. ³³ Grēraa zha ne no leḷ barcw ga, rleynie zho me, rzee zdoo zho rnee zho:

—jNasi nagoḷ ndion no nli Xpëēd Dios nac luu!

³⁴ Zeene bdziḷ zho stib nēz ro nis co, zaatne rnee zho Genesaret, ga biet zho barcw. ³⁵ Grē miech co zeene gocnaḷ zho laa me bdziḷ ga, znuse znuse pxoon zho diidz grēraa guiedz ne ndxie gax ga. Dzigo brie grē miech co, güeynie zho grē meḷ rzacnē lo me, ³⁶ rnab zho lo me siguiel me maase ni xabse me xēḷ grē meḷ rzacnē co. Grēse zha ne bzhen ni xab me, biac zho.

15

Ncuane runctal xtoḷ miech

(Mr. 7:1-23)

¹ Tib dze, bdziḷ bla zha farisé ni zla maistr ley ne ziaad nēz Jerusalén, lo Jesús; rēb zho lo me:

² —¿Pe nacne dien zianaḷd xpëëdsuel luu miḷe blu xmenḡol ne, pe nacne zeene laa zho row, ib rguibdz zho nia zho zigne nopaa tsara?

³ Pquiab me rēb me lo zho:

—¿To waa, pe nacne quiaguiits to xley Dios? Golguien ganle laa ne gun to mine rnabey Dios zigne naca, leḷ ncuaaṅe blu xmeṅol to, miṅ co zianaḷ to. ⁴ Led znu gon rnee lo xley Dios: “Gon pxoz luu, gon xniaa luu”, ni rneew: “Zha ne quie pxoz, quiegaa zho xniaa zho, ib none guet zho.” ⁵ Laa to gon rnee to: “Peet nacda gund zho xyudar xmeṅol zho niicle no me liaadz, tsaque gdeed zho gon.” ⁶ Tib lad rsaṅ to xley Dios, miṅe blu xmeṅol to miṅ co noxcoraa to. ⁷ ¡Loxaque guieḷwquidie qui no to! Rquiaalo to miech wen nac to, per lēepaa mine ruṅ to i ga bzeet Isá zeṅe rēb me:

⁸ Grē miech rii, rquiaalose zho ruṅnon zho naa, rond zho diidz gun zho miṅe rnabey naa.

⁹ Zhlēse nac grē ncuaaṅe ruṅ zho, rnee zho laa zho riaadgaṅ naa; sac niapse guicle zho riab grē wseed ne quialu zho lo miech.

¹⁰ Dzigo bnee me lo grē miech ne ndxie lo me ga, rēb me:

—Golquiaadiag miṅe gni naa lo to nu, ni goltsoxco guieṅ to zha naca.

¹¹ Golgacnaṅ ganle, grē ncuaaṅe rdziṅ zdo miech, led miṅcod ruṅctal xtoḷ zho; sinque grē ncuaaṅ ntseeb ne rza guic zho, diidz ntseeb ne rriee ro zho, miṅ co ruṅctal xtoḷ zho.

¹² Horco wbig xpēēdscuel me, rēb zho:

—¿Pe bieṅ luu ganle blēē zha farisé gon zho sca rēb luu lo zho?

¹³ Pquiab me rēb me:

—Grēse yag ne squi beenbnid Pxoz naa meṅ ne zob gbaa, ib none laaw gliadz zolo zolow. ¹⁴ Golṣaan zho, nli zha noseed miech per nac zho zig nac zha ne roḷd lo. Ni nanle to ganle, teḷ tib zha ne sca roḷdle lo ni xēnaque zho nia stib zha ne raṅd, zaatne nac tib len blē, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rēb Pedr:

—Bzhiguiel bnē lo no dieṅ zha nac diidz ne nē luu ga, ne rnee luu led ncuaaṅe rowd miech ruṅctal xtoḷ zho.

¹⁶ Pquiab me rēb me:

—¿Pe niicle to riendaquew dzigo lēē? ¹⁷ ¿Pe riende to grē ncuaaṅe row miech, led miṅcod ruṅctal xtoḷ zho? Sac grē ncuaaṅe row zho rdziṅda len zdoomban zho, zhaa zaatne rdziṅa; tib rietedsew xcuerp zho, rlozh ga rrieeḡaw. ¹⁸ Sangue grē diidznē ne rriee ro zho, zdoomban zho ga rzaw, ni lēē miṅ co nac miṅe ruṅctal xtoḷ zho. ¹⁹ Zdoomban zho nac zaatne rza grē ncuaaṅ ntseeb ne ruṅ zho, zig nac:

zeṅe rio zho grē zhgab yozh,
zeṅe rut zho samiech zho,
zeṅe rionie zho zha ne nole tsieel,
zeṅe rionie zho zha ne nacd tsieel zho,
zeṅe ruṅ zho guieḷgbaan,
zeṅe lega rnexuu zho samiech zho,
zeṅe rneenē zho samiech zho.

²⁰ Grē ncuaaṅ ntseeb co nagon nac miṅe ruṅctal xtoḷ miech, guṅctald zho xtoḷ zho niicle tsard nia zho zigne nacpaa grē zhiwseed meṅol.

*Biac xpēēd tib wnaa zit
(Mr. 7:24-30)*

²¹ Ga brieē Jesús, güey me haxta nēz Tiro ni nēz Sidón.

²² Nēz co no me güey tib wnaa ne ziaad lo xtii zha Canaán lo me, nguedz zēēb tsi wnaa co rnab me lo Jesús siguiel Jesús tsiengunguiac tib xpēdwnaa me nosacsi meṅdox. ²³ Per ib pquiabd Jesús lo xtiidz wnaa co, dzigo wbig xpēēdscuel me, rēb zho:

—Mazd bzhiguiel pquiaadiag miñe rnee wnaa qui, bui ganle zha ncuëtaa zëëb tsi me nal me zhits ne.

²⁴ Pquiab Jesús rëb me:

—Ziald naa par guñ naa xyudar zha zit, sinque laa Pxoza naa pxeel naa par guñ naa xyudar grë zha Israel ne rzac zig grë mëcwxiil ne zonziaab lo xbaxtor.

²⁵ Scaque nonee me laa wnaa co wbig pquuitsgzhib lo me.

—Bzhiguiel —rëb me—, been tib guielnzaac been xyudar naa.

²⁶ Rëbchaa Jesús lo me:

—Nonguiel da gon, cob ne quiet ne no nia mëëd gdeed new lo mëcw.

²⁷ —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma miñe rrieengaa nia mëëd.

²⁸ Horco pquiab Jesús rëb me:

—jSquiw nagon! jRlu nli dib zdoo luu rnalo luu naa! Gacxe waa miñe rnab luu i guñ naa, niinagazh laaw gac.

Horcogazh biac xpëëd wnaa co.

*Nzian miech ne beenquiab Jesús
(Mr: 8:1-10)*

²⁹ Nëz co wbi Jesús bdziñ me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga. ³⁰ Ga zob me rdziñ grë miech co rdziñnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guiend tib nia, grë zha ne guiend tib ni, grë zha ngop, ni grëragaa zha ne rlan pe stib guielguidz; grëse zho beenguiac me. ³¹ jNcuaañe gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiend tib ni, guiend tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoo zho grë ncuaañe ran zho. Grëse miech ne ndxie ga, rzee zdoo zho, rley zho roolnie zho Dios.

³² Dzigo bredz me xpëëdscuel me rëb me lo zho:

—Rquia zdoo naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

³³ Pquiab zho rëb zho:

—¿Per pe yguiaañ ne zho? ¿Pa guioxi ne guielwagw ne yquiin grëtaa miech qui dan rii, naca zaatne guiend miech?

³⁴ Dzigo bnabdiidz me lo zho, rëb me:

—¿Bla quietxtil ziaadnie to i?

—Gadzaquew no —rëb zho—, ni chop tson mel win.

³⁵⁻³⁶ Dzigo bnabey me grëse miech co bzob zho lo liu. Blozh bzhen me gza gadz quietxtil co, ni gza mel co, bdeed me xquizh lo Dios; blozhse bdeed me xquizh, zigse rungröl me quietxtil co scase scase rdeed mew lo xpëëdscuel me rguizh zhow lo grë miech co; scaque been me gza mel co.

³⁷⁻³⁸ Grëse miech co dow zho haxta zaatne bieltaa zdoo zho. Miech guizhiuw, zha bguise rgaa zho maase tap mil, nandragaa grë men wnaa, grë mëëdlas; ni zeene blozh ga bii biodzë gadz chicuid bio grë miñe biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb len barcw zie ne nëz xtan zha Magdal.

16

Gocladz zha farisé niungüet zho Jesús
(Mr. 8:11-21; Lc. 12:54-56)

¹ Magdal no Jesús, bdzin bla zha farisé ni zla zha saducé lo me, gocladz zho niungüet zho me dien pe nxind me tib diidz, pe tib ncuaañe nonguieldgaa niun me. Rquiaalo zho rnab zho lo me gon me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—iPe nlipaa rnee to riende to zha nac grë ncuaañe noyac len dze rii! Zha zëeb dzigo runbey to pe rlu lo xcow. Zeene ran to rquia xcow nizhnie bdze dze, rienle to guiet stib dze co zriee lo ngbidz. Sil ne ranгаа to quia xcow nizhnie, quia xcow nlaan zhan gbaa, rienle to guioxoo guiab dze co.

⁴ Nazdpaa ntseeb to, squitaa gocndip zdoo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib mine gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene brieë zho ga, zoladzd xpëedscuel me ney zho guietxtil ne niow zho.

⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho:

—Porne nagon ziaadnied ne guietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—iGardaque lëë guien to cho nac naa! ¿Pe nacne tso to zhizhgab guietxtil?

⁹ Ni lalnu lëë peet riende to! ¿Pe rsoladzde to zeene gaayaque guietxtil bguiaañ ne gaay mil miech, bla chicuida biaan? ¹⁰ Scaque zeene gadzaque guietxtil ni bgaaw dow tap mil miech, ¿pe niicle min co rsoladzdraa to?

¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús
(Mr. 8:27-30; Lc. 9:18-21)

¹³ Bdzin Jesús nëz xtan zha Cesarea de Filipino grë xpëedscuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee Lív, no zho rnee Jeremiw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig bиаad zha ne bиаad padzeela.

¹⁵ Dzigo rëb me lo zho:

—¿To waa? ¿Cho rzac to nac naa?

¹⁶ Pquiab Pedr, rëb Pedr:

—iLuu nac Men ne zëëble diidz ga cxeel Dios! ¡xpëed Dios nac luu!

¹⁷ Dzigo rëbchaa me:

—Dichos luu Simón (xingan Jonás) brieë diidz qui ro luu, sac gon Pxoza naa men ne no gbaa, men co bneedz guielbiini qui lo luu, nacda ncuaañe cho miech nëw lo luu. ¹⁸ Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuua naa xyadoo naa; tsod zha ne grieelo gnitlo yadoo co, per ni guielgut gnitloda. ¹⁹ Laa naa rzo luu, luu gnee Xtidz naa lo miech zeena gacnañ zho zha grieelo ygaa zho zaatne rnabey

Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

Bzeet Jesús zha gun miech me
(Mr: 8:31-9:1; Lc: 9:22-27)

²¹ Len dze co psilo Jesús bzeet me lo xpëëdsuel me zha csacsi miech me. Rëb me nroob ncuaañe cteed zho me, zeene laa me tsie Jerusalén; grë zha non lo menguedz, grë pxoz ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

²² Gon Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet. ²³ Zeene bin mew, zoque Pedr ga, biecw me rëb me:

—jBiche lo naa nu mendox! jLoxaque no luu par gungüet luu naa! Zienied guic luu mine rnabey Dios, sinque mine rleynie miech, min co zienie guic luu.

²⁴ Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csacsi miech zho. Nodne yquia zdo zho xquielmban zho, ²⁵ sac zha ne yquia zdo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zгаа zho tib guielmban ndzon ne gdzind dze lozh. ²⁶ Zha ne zienie guic loxaque gapchen, ¿pa dien yquiina lo zho, tel lëew yquiaaqui guey zho gabil? ¿Niacxe zrieelo gdziib zho dimi, laa zho len gabil? ²⁷ Naa ne nac naa Mgui ne pxeel Dios, zdzin dze ne gbiire guial naa stib, guialnie naa grë xanj1 naa, glu naa ganle pa lotaa men nroob nac Pxzoz naa; dze co gded naa mine tsieguial tib tib miech, tel zha wban zho. ²⁸ Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

17

Bdzëëlo Jesús
(Mr: 9:2-13; Lc: 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëëlo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rrona. ³ Tibaque zeene gon zho laa Moisés ni Li men ne biadteed xtiidz Dios padzeela, nozodiidznie me. ⁴ Rdzieb zho, lo dzeb co briee ro Pedr rëb Pedr:

—Maestro, jtebaa zha grieelo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Li.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib men co, rnee me:

—Lëe xpëed naa i gon, rleynie naa me, rzac zdo naa mine quiaayun me. Mine rnee me, golgona.

⁶ Mazdraa bdzieb zho bin zho sca rnee men co, lëëlëd pquitsgzh1b zho haxta bdzin lo zho lo liu. ⁷ Dzigo wbig Jesús, pcaannia me zho, rëb me:

—Gol1soli, gdziebde to.

⁸ Zeene blis lo zho bui zho, mese zo ga, gondraa zho schop men co.

⁹ Blozhse ga, laa zho wbi ga. Cho gui co ziad-zëëbnie me zho, pso me diidz lo zho miñe goñ zho ga, choot lo gzodiidzd zhow, nieeda gaļ dze ne laa me brieëban.

¹⁰ Dzigo bñabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigoraa guiaad Men ne zëëble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guiadseed miech gon zho xtiidz Dios. ¹² Ni gacnan to ganle laa me biaadle, per beenbeyd miech me, leļ psacsi zho me been zho me miñe gocladztaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

Biac tib mëed ne nosacsi men̄dox

(Mr. 9:14-29; Lc. 9:37-43)

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieë tib mgui, wbig me lo Jesús, pquiitsgzhib me lo Jesús, rëb me:

¹⁵ —Laa naa rnab lo luu, bzhiguiel beenguiac xpëed naa, nrooble nosacsi guidz gutye win. Blactaa ziyobe win lo gui, ziyobe win lo nis ne. ¹⁶ Blansonie naa win lo xpëedscuel luu nu, per rrieelod zho guñguiac zho win.

¹⁷ Dzigo rëbchaa Jesús lo xpëedscuel me:

—¡Pe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¡Ncuaañe cxeewdraa naa lo to squi nac to! ¡Goltënie mëed qui nu!

¹⁸ Dzigo goctox Jesús lo men̄dox ne nosacsi mëed co, ben̄cxoon me ma, hor cogazh laa mëed co biac.

¹⁹ Haxta wbiraa zho ga, wbig zho lo me bñabdiidz zho dien pe nacne brieelod zho niun̄cxoon zho men̄dox ne nosacsi mëed co. ²⁰⁻²¹ Dzigo rëbchaa me:

—Brieelode to niun̄cxoon to ma, sacne rnalode to Dios. Teļ niaca miñe rnalole to Dios siquier palal yeen, gzoob ne siquier lal tib midz moxtaz, niicxe ncuaañe mazdraa ngan gnab to lo me, zun mew; tsod ncuaañe grieelod gun to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa, ²³ haxta zut zho naa; per zeene gac tson ngbidz gut naa, zrieëbaan naa.

Zeene bin zho sca rnee me, bio zho guielnë, mbanse rac zho.

²⁴ Bdziñ me guiedz Capernaum, loxaque bzëëb me lad guiedz, laa zha ne rtop dimi ne razh yadoo wbigle lo Pedr, bñabdiidz zho dien pe rguizh me dimi co. Pquiab Pedr rëb Pedr lo zho:

²⁵ —Rguizh mew, ¿pe nacne quizhd mew?

Zeene bdziñ zho len yu ne rbëz me, gardle guiab Pedra lo me, glOLE me bñabdiidz rëb me lo Pedr:

—Zig nac dimi ne razh lo men̄ ne nac rey dien, ¿pe ye xpëed me rguizha, te loxaque zha zit rguizha ye?

²⁶ Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho, ²⁷ per par guiabd zho rdziond ne diidz, güey güeyron xanzuel luu lo nis. Meļ ne

glopa yгаа low, bzhēn ma pxal ro ma, ga gdziel luu dimi; dimi co güeynie bdiizh miñe no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Len dze co bnabdiidz xpëēdscuel Jesús lo me, dien cho tib zho gac zha ne mazdraa gacnon lo grē zha ne no xnēz Dios.

² Dzigo bredz me tib mēēdbgui win, bzo me win glowtaa lo zho, ³ rēb me:

—Gneli naa lo to ganle, telne csaande to xquielntseeb to, telne gacnguud-zladzde to, gac to zig mēēdwini rii, per ni xnēz Dios grielod sēēb to. ⁴ Zha ne racladz gac zho zha non, none gac zho tib miech ndooladz, none gac zho zig tib mēēdlas. ⁵ Miech ne gacnie zha ne sca nac, zha ne rleynie naa, rriequia naale ga racnie zho.

⁶ Per miech ne yquuil zho gūntal zho xtol zho, jprobsaxe zha co! Mazd zhi guielnēw lo zho ygadoo tib quie molin zhobxtil yan zho tsieron zho zho nisdo. ⁷ Nac lo guidzliu rii, runfalte guielntseeb low! Runfalte ncuaañe gūntal xtol miech, jper probsaxe zha ne yquuil zha ne nole xnēz naa, gūntal zho xtol zho!

⁸ Golguien telne tib nia to, tib nigaa to rquiaqui runctal to xtol to, gołtichegazha. Peet nacda maase tibaque ni to, tibaque nia to zob totsaque yгаа to guielmban ndzon ne gdziñd dze lozh, lēdle zob gropa ni laa to guey gabil, lo beldox ne gdziñd dze guuu. ⁹ Scaque bziaalo to, mine rquiaqui runctal to xtol to, gołtichegazha, peet nacd maase tibaque lo to zob totsaque yгаа to guielmban ndzon ne gdziñd dze lozh, lēdle zob gropa ni laa to guey lo beldox ne nac gabil.

¹⁰ Ib gunde to csanwin to grēraa zha ne no xnēz naa, zha ne nac zha mban, sac gon non zho lo Dios, anj ne quianap zho, tibaque zo me lo Pxoz naa men ne zob gbaa.

¹¹ Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grē zha ne zonziaab lo me.

¹² Rzac Dios miech zig tib men ne rquianē zdo xpëcwxil. Telne quianie zho tib gayoo ma, ni gziaab tib ma, led zēēb lēē rsañ zho stapgal tsiimtap ma ne zo lo zho, rbire zho rieguib zho ma ne bziaab ga. ¹³ Zeene rdziel ma lo zho, rlozhd gleynie zho ma, lēē ma rac guielbley que grēraa xcompañer ma.

¹⁴ Scadaa nagon rzac Pxoz naa miech, grē zha ne nole xnēz me, ib racladz me gziaab zho.

¹⁵ Golguien sca, tib tib to zeene cho tib zha ne nacgrē to gūn pe tib falt lo to, gołtsie gołtsienee lo zho; gropsa to gołzodiidz pe nac miñe pxin zho. Telne siguiel zho guiaan to mpas, laa to beenle gan ga gneewen to stib. ¹⁶ Laa telne nēd zho, dzigo gołguib tib zha ne sē, chopгаа zha ne sē gan ganle zha rac zho.

¹⁷ Tel niicle scaw nēdaque zho guiaan to mpas, dzigo mazd gołguiab lo grēse zha ne nacgrē to gnee zho lo zho. Telne niicle xtiidz zha co nēd zho gon zho, dzigotaa mazd gołsaan zho, sacdraa to bets to ga, gołcuee zho lad to, gołsac zho zig rzac miech grē zha ne zianal guielntseeb.

¹⁸ Gneli naa lo to ganle, grēse zha ne gon xtiidz to zeene rnee to lo zho gacwen zho, scagaa Dios scaania me zho; per zha ne gonda, ycaaniad me zho.

¹⁹ Ni racladz naa gacnan to ganle, grē zha ne no xnēz naa, niicle tib nēzaque zho, per telne tipse rac zho, ncuaañe gnabtaa zho lo Pxoz naa men ne zob gbaa, zdeed mew. ²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo guṅ falt lo naa, ¿blataa vuelte no guṅ naa zho perdon? ¿Gadztaaw lëë?

²² Pquiab me rëb me:

—Lëda guṅ Pedr, led loxaque gadzdse vuelte. Teḷ blataa vuelte guṅ zho falt lo luo, none guṅ luo zho perdon.

Zha ne beend perdon

²³ Grë zha ne no xnëz Dios, ib none guṅ zho perdon samiech zho.

Tib rey name, tib dzew bredz me grë zha ne rquia dziin lo me, par dien zha quiayun zho dziin. ²⁴ Loxaque psilo me, zeene laa xcuent tib zha co blozh brieë, nroob brieëquia zho lo me; ²⁵ par quizh zhow, peet nzhenḷ zho. Dzigo bnabey me to zho grop tsiel zho, xpëëd zho ne, ni grëse ncuane rap zho, parne grieelo gagh xquielqui zho. ²⁶ Zeene guṅ zho sca rëb me, pquiitsgzhib zho lo me, rëb zho: “iBeenḷ guielnzaac, gop tib paciens, na dien zha guṅ naa quizh naa xquielqui naa lo luo!” ²⁷ Guṅ me zha rac zho, pquia zdo me zho, psilaa me zho, beenquizhdaque me zho xquielqui zho.

²⁸ Loxaque brieë zho ga, bdziel zho tib zha ne nzëëb palal yeenḷ dimi lo zho, tib zha ne rquiaque xtsiinḷ rey cow. Zigne guṅ zho zha co, zolinëz wbig zho bdie zho yanḷ zho, rnab zho gagagh quizh zho xtimi zho. ²⁹ Dzigo pquiitsgzhib zha co lo zho, rnab zho siguelḷ zho gap zho paciens, dien zha gaclo dimi co quizh zhow. ³⁰ Pe nquiaadiag zho ga, bnab zho bio zha co ladzguib, haxta bdiizh zho dimi ne zëëb zho ga. ³¹ Grëraa zha ne rquia dziin lo rey co, zeenḷ gocnaḷ zhow, bdeednë zho, güey zho güeyzodiid zhow lo me. ³² Zeene bin mew, bnabey me gocredz zho, goctox me lo zho rëb me: “iPe clas miech nac luo! Pe rsoladz luo zha rac luo bnab luo pquia zdoo naa luo, haxta beenquizhd naa luo guielquidox ne zëëb luo ga. ³³ ¿Pe nacne pquiad zdoo luo zha co, zigne pquia zdoo naa luo?” ³⁴ Blëë me guṅ me sca beenḷ zho, bnabey me bio zho ladzguib, haxta blozh bdiizh zho grëse xquielqui zho.

³⁵ Scadaa nagonḷ guṅ Pxoḷ naa to, telneḷ gunde to samiech to perdon, teḷ pe nac falt ne guṅ zho lo to.

19

Zha ne rsëbtsiel

(Mr. 10:1-12; Lc. 16:18)

¹ Blozhse sca bnee Jesuḷ lo zho, brieenie me zho ga güeyted zho grë guiedz ne ndxie xtan zha Judé, grë miḷneḷ riaanḷ nëz danḷ ro guiubee Jordán, nëz ne rlan ngbidz. ² Miech guizhiu ne rriee grë guiedz co, rdziḷ lo me; grë meḷnḷ rzacnë ne rdziḷnie zho, beenḷguiac me zho.

³ Ga no me, bdziḷnḷ bla zha farisé gocladz zho niungüet zho me, par dien pe nxiḷnd me tib diidz; bnabdiidz zho lo me rëb zho:

—Pe gnë luo dien, ¿pe wena csëbtsiel zha bgui ne gacladztaa csëbtsiel?

⁴ Pquiab me rëb me:

—¿Mod ranḷde to zha zhubnee lo Xtiidz Dios? Lo co zhubnee ganḷe zeeneḷ psanḷ me miech, tib nëz zho psanḷ me, tib mgui ni tib wnaa. ⁵ Ni rneew, ib none grieexhaa mgui lo pxoz zho, lo xniaa zho par gbannie zho wnaa ne nac tsiel zho, gag zho tibaque miech grop zho. ⁶ Nligaa nacdraa zho chop miech, sinque laa zho rac tbaque. Dios nac meḷnḷ ne psanḷ ycatsiel miech, cho dzigo nac miech par quiits zho miḷneḷ rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdoo goc xmenḡol to, gane bdeed Moisés diidz csëbtsieel zho; saḡue Dios psand me diidz csëbtsieel miech. ⁹ Gacnan to ganle, zha ne csëëb wnaa ne nac tsieel zho, ni tel peet guelyozh beenḡ wnaa co, dol ga guḡ zho csëëb zho tsieel zho ycaa zho stib wnaa. Scaquegaa mgui ne ycaa wnaa ne psëëb zho ga, dol ga guḡ zho sac gon no tsieel wnaa co.

¹⁰ Dzigo rëbchaa xpëëdscuel me:

—Tel scataa nac xcuent guieltsieel, mazd lëëquew dzigo ctsieelniad ne.

¹¹ Pquiab me rëb me:

—Nligaa no mgui ne rtsieelniad, per zhis zho, ni no pe nacne sca rianaḡ zho.

¹² No zho desde rac zho mëëd, nacd zho zha ne grielo tsonie wnaa; no zho ib miech sca rsaḡ zho. Nogaa zha ne ib zha rbeeladz zho ctsieelniad zho, parne grielo tsoxcoraa zho guḡ zho xtsiin Dios. Zha ne sca rquiabladz ctsieelniad, maase ctsieelniad zho.

Beenlay Jesús mëëdlaa

(Mr. 10:13-16; Lc. 18:15-17)

¹³ Ga no Jesús, ndal zha ne bdziḡ bdzinnie zho xpëëdlaa zho lo me, parne cxobnia me guic win guḡlay me win. Grë zha ne nac xpëëdscuel me, lel psilo zho rtsidil zho pe nacne nodzinnie zho grë mëëdlaa co lo me.

¹⁴ Zeene gon me sca quiayun zho, rëbchaa me lo zho:

—Ctsirede to grë mëëdlaa yeen qui, goḡsaan guiaad win lo naa. Sac gon grë mëëdlaa yeen, ni zha ne nac zig nac win, zha co nac zha ne sëëb ygab lo Dios.

¹⁵ Dzigo psilo me pxobnia me guic grë mëëdlaa yeen co, beenlay me win. Blozhse ga, laa me brieë ga.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶ Laa me zierieë ga, zeene bdziḡ tib mgui nguieg, tib zha ricwa, rëb zho lo me:

—Nan naa luu nac tib men ne noseed miech, ni tib men wen nac luu. Bnë dien, ¿pe nac minḡ guḡ naa parne grielo ygaa naa guielmban ndzon ne gdziḡd dze lozh?

¹⁷ Pquiab Jesús rëb me:

—Rnee luu lëë tib men wen nac naa. ¡Nligaaw, Diosse nac men wen! Telne nli racladz luu ygaa luu guielmban co, none tsoxco luu gban luu minḡ rnabey Dios.

¹⁸ Pquiab zho rëb zho lo me:

—¿Pa minḡ waa?

Rëbchaa me:

—Minḡ rnee:

Gute luu samiech luu,
telne nole tsieel luu, tsonied luu zha ne led tsieeld luu,
cuand luu samiech luu,
yquiadiidzguizhd luu samiech luu,

¹⁹ gon pxoz luu, gon xniaa luu, cueed luu xquielto me.
Bleynie samiech luu, zigne rleynie luu luu.

²⁰ Dzigo rëbchaa zho:

—Ni tib miñe rnee luu i gard quits naa, grësew zanañ naaw zigne naca. Racladz naa gacnañ naa, dien peraa no guñ naa.

²¹ Horco rëb me lo zho:

—Tel racladz luu gac luu tib zha ne gban grëse miñe rnabey Dios, güey sca güeyto grëse ncuaañe rap luu, dzigo güeytiiz dimi co lo grë zha ne guiend pe yquiuñ. Lozh ga, dë dënañ zhits naa. Miñ co nagon guñ luu, dzigo zgaa luu guielmban ndzon co; ni scagaa nroob guielnzaac ne yгаа luu nëz lo Dios.

²² Zeene bin zho sca rëb me, mbanse rac zho laa zho zey, sac nroob ncuaañe quianie zho.

²³ Dzigo rëbchaa Jesús lo xpëedscuel me:

—Gneli naa lo to ganle, grë zha ne squi rapchen rzacxuu zho par sëeb zho xnëz Dios gnabey me zho. ²⁴ Ne nligaa ngan rzac zhow! Mazd ngandse rded tib camell guieer guzh lëdle sëeb tib zha ne squi rapchen xnëz Dios.

²⁵ Zeene bin zho sca rëb me, rzee zdoo zho, rnee zho:

—Bay, ¿chosezhe dzigo waa nac zha ne zrieelo sëeb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grieelo sëeb xnëz me; sangue me nan me no zho. Sac tel me, tsod ncuaañe grielod guñ me.

²⁷ Horco pquiab Pedr rëb Pedr lo me:

—No dzigo waa, ¿pe nac miñe yгаа no? Nañle luu ganle, tel no grëse ncuaañe rdziaap no, laa no psaña, ziaadnañ no zhits luu.

²⁸ Pquiab me rëb me:

—Golgona ganle, dze ne gacncub grëse ncuaañe no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnañ zhits naa, sob to lo gza tsiipchop xcan ne rieguiañ to. To gac zha ne guñ guielwxtis lo gza tsiipchop dii ne nac zha Israel. ²⁹ Grëragaa zha ne psañ lidz, psañ zho bets zho, bzian zho, xniaa zho, pxoz zho, tsiel zho, xpëed zho, liuñ zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zgaa zho tib guielmban ndzon ne gdziñdraa dze lozh.

³⁰ Ni zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

¹ Grë zha ne no xnëz Dios, zac zho lo me zig bzhaac grë zha ne güey xtsiin tib men co.

Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me. ² Bdzuel me palal zho, biaan zho diidz palal quizh me zho dze, laa zho bzëeb lo dziin. ³ Glaale ngbidza brie me güeyted me len guiedz, lëetse güeytsib me lo bla zha ne zob ga racladz dziin. ⁴ Dzigo bree me zho, rëb me: “Goltsie xtsin naa, na quizh naa to miñe non xtse to.”

⁵ Rwe ngbidza, biire me güey me güeyguib me spalal zho. Maase las treza güeyaque me stib.

⁶ Zhile sëeb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbchaa me lo zho: “¿Pe nacne squire noded dze to?” ⁷ Pquiab zho rëb zho: “Choot nreedzaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁸ 'Zeene laa dze blozh bdze, bnee me lo zha ne zo lo xtsiin me, rëb me: "Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb." ⁹ Dzigo bded zha ne bdzele dze bzëëb lo dziin ga, tib tib zho pcaase zho mine non zho tib dze. ¹⁰ Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹¹ 'Zeene gon zho lalga pcaa zho grë zho, blëë zho, güey zho güeylisqui zhow lo men ne nacchen dziin ga, rëb zho: ¹² "Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyeenaque been zho dziin?" ¹³ Pquiab me rëb me: "Bets, nosacsid naa to, biaanle ne diidz name palal quizh naa xtse to. ¹⁴ Nana sca golgüey xtimi to i, zeena golsë. Ib zdoo naa rala lalga quizh naa to grëse to. ¹⁵ ¡Stiba, xtimi naaw, zrielo gundziin naaw zigne racladz naa! ¿Te në rac zdoo to ye, ran to rquia zdoo naa miech?"

¹⁶ 'Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bwaw.

Bzeet Jesús stib laa miech csacsi me

(Mr. 10:32-45; Lc. 18:31-34)

¹⁷ Nëz no Jesús zie me nëz Jerusalén, tibaque bredz me gza tsiipchop xpëëdsuel me, ¹⁸ bzeet me lo zho zha gan miech me zeene laa zho gdzin Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. ¹⁹ Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriëbaan naa.

²⁰ Tibaque zeene wbig tsiel Zebedé wbignie me grop xingan me Jacob ni Juan, pquiitsgzhib me lo Jesús rnab me gan Jesús tib favor ne racladz me. ²¹ Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëëd rii naa cue luu zeene gdzin dze ne laa luu zob zobnabey luu; tib zho nëz derech, stib zho nëz revés.

²² Pquiab Jesús rëb me lo wnaa co:

—¡Ni luu gon riend pe rnab luu! ¿Niacxe zlëb zho gan zho grë guielnë ne gan naa, tedgaa zho grë mine teed naa?

Pquiab zho rëb zho:

—Zlëëb no.

²³ Rëbchaa me lo zho:

—Nli nenda zan to grë guielnë ne gan naa, ni zdedgaa to mine teed naa; per ne gneedz naa diidz sob to cue naa nëz derech, nëz revésgaa, led naad raguial min co; sac laa lugar co biaanle par zha ne tsieguiala, ni Pxoz naa men ne zob gbaa men cose nan dien chow.

²⁴ Grëraa xpëëdsuel me, zeene bin zho pe nac mine rnab Jacob grop Juan, blëë zho lo zho. ²⁵ Dzigo bredz Jesús zho grë zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. ²⁶ Sangue to gon gunscaade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷ Scaquegaa zha ne racladz gnabey zho lo to, none glo cseed zho gon zho mine gnabey to zho. ²⁸ Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin

lo zho, ni gded naa xquielmban naa zeena laa zho lo grëtaa ncuaañe ngadoo zho. Ni nañpaa naa miech guizhiu ne laa.

Biac chop zha ne rold lo

(Mr. 10:46-52; Lc. 18:35-43)

²⁹ Miech guizhiu nañ zhits Jesús, laa me zieriee guiedz Jericó. ³⁰ Ro nëz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, men xtii rey David, pquia zdoo no!

³¹ Blalaa zha ne zie ga, psilo zho ndox zho lo grop zha co parne guioog ro zho, per leñ hor cole nguiedzraa rbedz zho me. ³² Nacne zeene bdziñ me zaatne zob zho, blëz me, bnabdiidz me lo zho rëb me:

—¿Pe nadien guñ to naa?

³³ Pquiab zho rëb zho:

—¡Racladz no guiac lo no!

³⁴ Pquia zdoo me zho goñ me sca rac zho, dzigo pquiaania me zhits guidlo zho. Horcogazh laa lo zho biac, laa zho zienal zhits me.

21

Bdziñ Jesús Jerusalén

(Mr. 11:1-11; Lc. 19:28-40; Jn. 12:12-19)

¹ Sca no Jesús nëz grë xpëëdsuel me, laa me bdziñ guiedz Betfagé. Gaxle ga riaan Jerusalén, nëz danse squi riaan Gui Oliv. Dzigo pxeel me chop xpëëdsuel me, rëb me lo zho:

² —Goltsie guiedz win ne ndxie danse lo ne i. Ga gdziñ to zaatne quiadoo tib burr gus grop xpëed, dzigo golxadz ma goltënie ma nu. ³ Tel cho gnabdiidz pe nacne noxadz to ma, golguiab lo zho: Men ne rnabey ne, men co rquiin ma, na zigne lozh xtsiñ ma guiaadsañ no ma.

⁴ Ga brieequia mine bnee tib men ne biadteed xtiidz Dios lo miech padzeela, zeene rëb me:

⁵ Golguiab lo men Jerusalén:

“Golwi ganle, laa men ne nac zhirey to ziaad i. Tib men ligase rlu me, zob me lad tib burr win, tib ladse ma ne rey yo zob me.”

⁶ Laa zho zie, zigne bnabeyse me zho ga, scase been zho. ⁷ Zeene wbire zho, laa zho bdziñnie burr co grop xpëed ma. Pxob zho lar ne rbix zho lad xpëed ma, laa me bzob ma. ⁸ Zigse zie me, no grë miech guizhiu co, rta zho lar ne rbix zho ro nëz rded burr ne zob me ga; nogaa zha ne rchoo nia grë yag nguia, rdziin zhow ro nëz rded me. ⁹ Grëse zho, zigtaa zha ne nera, zigtaa zha ne nala, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleynie ne me! ¡Zha ndzontaa Dios, pxeel me men nroob qui lo ne!

¹⁰ Zeene bdziñ me Jerusalén, rlozhd gzee zdoo grë miech ne ndxie ga, rnabdiidzlsa zho rnee zho:

—¿Bay cho nac men qui?

¹¹ Rquiab grë zha ne nañ zhits me ga, rnee zho:

—¡Lëë Jesús i! ¡Lëë men Galilé qui, noteed xtiidz Dios lo miech!

Blee Jesús miech len yadoo

(Mr. 11:15-19; Lc. 19:45-48; Jn. 2:13-22)

¹² Biini liu co, zeene bdziñ Jesús Jerusalén stib, güey me yadoo nroob ne zob lad guiedz co. Bdziñ me goñ me nzian miech ne ndxie ga, masaque tib

lgui quiayun zho, zha ne no wto, zha ne no wzi. Nacne güey me ptiixche me xmezha zha ne notsëë dimi, ptiixche me xmezha zha ne no wto palom; blee me zho ga grëse zho, ¹³ rëb me lo zho:

—Led znu gon zhubnee lo Xtiidz Dios: “Zaatne nac lidz naa nu, nu none guiaad grëse miech sodiidznie zho naa.” Laa to gon, quiayun to lugar rii zig tib zhibliee ngbaan.

¹⁴ Ga no me bdzin bla zha ne rold lo, zla zha ne në ni, wbig zho lo me. Gzase zho beenguiac me. ¹⁵ Nzian mëedlas yeen ne ndxie len yadoo ga, psilo win nguiedz rnee win: “jZha ndzontaa xingan rey David!”

Grë zha ne nac pxoz ne rnabey, ni grë maistr ley, zeene gon zho milagr ne been me ga, ni gon zho zha rnee grë mëedlas co, rlëe zho, ¹⁶ rëb zho lo me:

—¿Pe ib rond luu ganle pe nonee grë mëedlas qui?

Pquiab me rëb me:

—Ron naaw. ¿To waa, pe rande to ganle zha zhubnee lo Xtiidz Dios, zaatne raquiet mine noyac nu? Led rneew lëe:

Haxta grë mëedlas ne bii radz,
ye win rley win roolnie win me.

¹⁷ Blozhse sca rëb me, zoque zho ga, laa me bio nëz zie me nëz Betain. Ga blëz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸ Sil co zeene no me nëz gdzin me Jerusalén, pcaabedz me. ¹⁹ Gon me zob tib yag guigw gax ro nëz, dzigo güey me güeyso me low dien pe ndziel tib nex low niow me. Bdzin me gon me loxaque zhiblagsew zëëb, nacne rëb me low:

—jLëë blozh xtse luu nu gon! jGdzindraa dze ne yquia nex lo luu!

²⁰ Biini liu, zeene laa zho zie Jerusalén stib, gon xpëëdsuel me, laa yag guigw co bidzle. Bzee zdoo zho, bnabdiidz zho lo me rëb zho:

—¿Bui ganle, bay zha nacne squi znuse wbidz yag guigw qui?

²¹ Pquiab me rëb me:

—Gneli naa lo to ganle, telne dib zdoo to rnalo to Dios, niicle ncuane mazdraa ngan gnab to lo me, zun mew. Lëëraasi none dib zdoo to gliladz to zaca, ni palal gacchopd guic to. ²² Grëse ncuane gnab to zeene rzodiidznie to me, zneedz mew, totsaque dib zdoo gliladz to laa to ycaaniaw.

²³ Bdzin me Jerusalén, wbiire güey me len yadoo. Ga noseed me miech, zeene bdzin bla zha ne nac pxoz ne rnabey ni zla zha ne nac men non lo menguiedz, bnabdiidz zho lo me rëb zho:

—¿Cho dzigo nac luu ne squitaa ziaadnabey luu len yadoo? ¿Cho rnabey luu?

²⁴ Pquiab me rëb me lo zho:

—Ye naa laa naa gun tib wnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuane noyun naa. ²⁵ Golnë dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee me?” ²⁶ Tel na dzieetsgaa ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan menguiedz nli Dios pxeel Juan biadteed Juan xtiidz me lo miech.

²⁷ Dzigo mazd mine been zho rëb zho lo me:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grē min rii.

Zha nac zha ne rond diidz

²⁸ Golquiaadiaga ganle. Tib mgui, quianie me chop mēēdbgui. Tib dzew, bredz me tib zho rēb me lo zho: “Xin, none gon tsie luu nadze, tsietop luu uv xcuua ne.” ²⁹ Pquiab zho rēb zho: “¡Gad naa!” Wdzeelaaw, bien zho nonguiēda ga sca gun zho, dzigo bio zho nēz güey zho. ³⁰ Laa stib zho, zeene bredz me zho bnabey me zho tsie zho lo dziin, rēb zho: “Peet nacda, na maase ga naa.” Blozh ga pasē zho nie.

³¹ Golnē dien, lo grop mēēd co, ¿cho nac zha ne bin xtiidz pxoz?

Pquiab zho rēb zho:

—Zha glo cow.

Dzigo rēbchaa me:

—Gneli naa lo to ganle, mincodaa quiayac nu niina: Grē zha ne rzac to mazdraa ngoopdol, zig nac grē zha ne rtop dimi ne razh lo zha Roma, zig nac grē wnaa ro nēz, mazd glole zha co nozēēb xnēz Dios, lēdle to. ³² Biaadpaa Juan Bautist name biadseed me miech csaan zho xquieIntseeb zho, gban zho zigne racladz Dios, ni pe liaadz to nion to mine rnee me. Mazd grē wnaa ro nēz, grē zha ne rtop dimi ne razh lo zha Roma, znuse psaan zho xquieIntseeb zho. Laa to, niicle ran to nosaan grē zha co xquieIntseeb zho, per ib rsaande to mine nac to.

Xcuent zha ne pquianap liu

(Mr. 12:1-12; Lc. 20:9-19)

³³ Dzigo bzodiidz me stib cuent lo zho rēb me:

—Tib meñ name, nroob lbē uv beenbni me lo liun me. Psilo me ptse me igose liu co, bzaa me zaatne gzhii grē uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieē, laa me zey zit.

³⁴ Zeene gol mēē ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguiāl me ycaa me.

³⁵ Per lel bnaaz zho zho, zha ne blooquie zho, zha ne bdeedgolp zho, haxta beet zho tib zho. ³⁶ Wbiire pxeel me zla zho, hor cole nziarraa zho pxeel me, per niapse sca psacsi zha co zho.

³⁷ Tibaque zeene pxeelaque me xpēēd me, bza guic me rēb me: “Ganse zho xpēēd naaw, zon zho mine gnee me.”

³⁸ Pex nion zho diidz, zeene gon zho xpēēd me, rēbchaa zho: “¡Lēē zha qui nagon guiaannie liu rii! ¡Golgotsaa dziuut ne zho, zeena guiaana lo ne!”

³⁹ Dzigo bnaaz zho xpēēd me, güeynie zho me zaatne nac tib lad lo liu co, ga güeygut zho me.

⁴⁰ ¿Zha sca dien rzac to gun bizhuan liu co gza zha co, zeene laa me gbire?

⁴¹ Pquiab grē zha ne nac pxoz ne rnabey, ni zha ne nac zha non lo menguiēdz ga, rēb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguiāl me ycaa me.

⁴² Dzigo rēbchaa me lo zho:

—Haxta lo Xtiidz Dios no tib zaatne znu rnee, ¿pe gard ganle glab tow? Rneew:

Quie ne psēēb zha ne nozaa yu,
ni nanđ zho lēēpaa quie co nac mine rnazdziits yu.
¡Ncuane gzee zdoo new! Sac Dios bnabey sca goca.

⁴³'Gacnan to ganle, scadaa nagon griece to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaan xlugar to. ⁴⁴Zha ne tsietsoobe lo quie ne raquiet ga, zac zho zig tib ncuaaane rac tson tap lê; laa tel lêegaaw tsoë lad zho, zac zho zig tib ncuaaane die die rac.

⁴⁵Grë zha ne nac pxoz rnabey ga, ni grë zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me. ⁴⁶Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xfiidz Dios nac me.

22

Zha ne nêd sëëb xnëz Dios

¹Bzodiidz Jesús stib cuent lo zho, rëb me:

²—Grë zha ne rbedz Dios ygab zho xnëz me, none tsoxco zho gon zho mine rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpëed me.

³'Tib rey name, ziaadyob ctsieelnia xpëed me, nzian zha ne bredz me tsie lo lni. Zeene laa dze co bdzin, pxeel me zha ne quia dziin lo me zietsedz grë zha ne bredz me lo lni ga, per nêd zho nienal zho. ⁴Wbiire me pxeel me zla zho rëb me: "Goltsietsedz zho, golguiab, laa guielwagw ne yquiin goclole, siguiel zho na guiaad zho." ⁵Per ib beencasd zho zha ne pxeel me ga, no zho briece zie lo xcuaa, no zho briece zie zhiwto, ⁶nogaa zho lel bnaaz zho zha co, psacsi zho zho, beet zho zho. ⁷Zeene gon me sca been zho, blëe me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzëëg zho guiedz co. ⁸⁻⁹Blozh ga biire pxeel me zla zho, rëb me: "Laa guielwagw rii goclole, mine naca goltsie tib nëz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguiald zho guiaad zho nu."

¹⁰'Dzigo briece zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdzinne zho zho lo lni. Gol hor wagw, biodzëse len yu ndxie miech. ¹¹Zeene laa rey bzëëb zienee me lo zho, gon me lad co no tib zha co nacwxabd zho zigne rieguial gacwxab zha ne sca rie tib lo guieltsieel. ¹²Dzigo rëbchaa me lo zho: "Bets, ðpe nacne squise luu bzëëb luu nu, bui ganle nacwd luu lar ne bneedz zho niacw luu?"

'Dzese zob zho, rdzielid zho pe guiab zho lo me. Gonse me sca rac zho, ¹³bnabey me zha ne nodziib lo mezh rëb me: "Golzobdoo zha rii, golxidoo grop nia zho, grop ni zho, golcuae zho nu goltsieron zho lo ncow nëz ley. ðGa nac zaatne rieguial zho, ga gan zho guielnëdow ne no ted zho, goonnë zho, haxta gow lay zho!"

¹⁴'Minçodaa nagon rac len dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

Pe nonguiel quizh miech contribucion

(Mr. 12:13-17; Lc. 20:20-26)

¹⁵Blalaa zha farisé ne ndxie ga güey zho bnediidz zho dien zha gungüet zho Jesús cxin me tib diidz, zeena min co yquiaaqui tsiezo zho me lo wxtis.

¹⁶Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdzin zho rëb zho lo me:

—Maestro, ndion no niapse diidzli zienal luu, ni scagaa zeene rseed luu miech, rdziebd luu mine nac diidzli min co rnee luu lo zho. ¹⁷Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguiela ye.

¹⁸⁻¹⁹Bienga me racladz zho gungüet zho me, dzigo rëbchaa me lo zho:

—¿Pe nan to na riend naa pe no guic to? Masaque rëb to na lëë, znuse gungüet to naa. Go needz tib pes ne rguizh to nu ganle.

Dzigo bdeed zho tib pes plat lo me. ²⁰ Blozh ga, rëbchaa me lo zho:

—¿Cho nu, cho lë nu quia lo pes rii?

²¹ Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mïne rieguial sca ycaa rey, goldeeda lo rey; scaquegaa mïne rieguial ycaa Dios, lo Dios goldeeda.

²² Zeene gon zho sca ptsire me lo xtiidz zho, bzee zdoo zho, mazd mïne been zho laa zho wbichese ga, laa zho zey.

¿Pe nli zrieedan miech?

(Mr. 12:18-27; Lc. 20:27-40)

²³ Dze coquew, güey bla zha saducé lo Jesús. Nac zha saducé riladzd zho zdziñ dze grieeban miech. Dzigo bdziñ zho, ²⁴ rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsiel mgui, ni gopd wnaa mëëd, dzigo none betsaque zho ctsieelnia wnaa co stib, zeena gap wnaa mëëd ne guiaan xlugar xpëëd zha ne gut ga.

²⁵ Bïo tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaan xpëëd zho. Dzigo ptsieelnia stib bets zho wnaa co. ²⁶ Blozh ga gutaque zha co, pa së zho nsan mëëd. Ptsieelniaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieelnia me, ²⁷ tibaque zeene yeque me laa me gut.

²⁸ Mïne racladz no gacndion no, ¿chopaa dzigo gac tsiel wnaa co zeene laa zho grieeban? Sac gza gadzse zho ptsieelnia me.

²⁹ Pquiab Jesús rëb me lo zho:

—I nagon laa to rxin, mïne naca riende to zha nac Xtiidz Dios, niicle riladzde to zrieelo me gun me ncuaan ro ne gard gan miech. ³⁰ Sac gon zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anj ne no gbaa.

³¹ Stiba, ib nli zrieedan mengut. Mod rande to zha zhoobnee zaatne raquiet zeene rëb Dios: ³² “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacd me xDios mengut, sinque xDios zha mban nac me!

³³ Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios mïne mazdraa non

(Mr. 12:28-34)

³⁴ Grë zha farisé ne ndxie ga, gon zho sca psioog Jesús ro grë zha saducé co.

Horco biire grë zha farisé co bzodiidz zho stib. ³⁵⁻³⁶ Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, ¿pa miñ nac mïne mazdraa non?

Sca rëb zho, sac gocladz zho niungüet zho me. ³⁷⁻³⁸ Pquiab me rëb me lo zho:

—Lëë mïne mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleynie Dios, meñ nroob ne rnabey luu.” Lëëw nac mïne mazdraa non, ni lëëw gloopaa raquiet lo grëse ley. ³⁹ No stib mïne rnee: “Bleynie samiech luu zigne rleynie luu luu.” Ye miñ rii nona, meraque lala

con min glo. ⁴⁰ Zha ne gban zigne rnabey grop ley rii, lëele grë ley ne psan Moisés ga, lëele grë zhiwseed zha ne biadteed xtiidz Dios ga, zianaḷ zho.

¿Cho xpëed nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacne bnabdiidz me lo zho rëb me:

—¿Zha dien rzac to guiaad Men ne zëëble diidz ga cxeel Dios? ¿Cho lo xti grieequia me?

Pquiab zho rëb zho:

—Lo xti David grieequia me.

⁴³ Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

⁴⁴ Rëb Dios lo men ne rnabey naa:

“Cue naa nëz derech, nu bzob,

nieda lozh gnaz naa grëse zha ne rlëe lo luu, csaḅ naa zho ladznia luu.”

⁴⁵ Gase nagon telne nli zha xti David gac Men ne cxeel Dios ga, ¿zha nac dzigo rnee David men co rnabey David?

⁴⁶ Ni tib zho ib bdziidz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Mine nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëedscuel me, ² rëb me lo zho:

—Grë maistr ley ni grë zha farisé ib lëe xtsiin zho ga, nac cseed zho miech zha nac ley ne psan Moisés. ³ Golguien golgon xtiidz zho, iper nsin golso, ib gunde to mine run zho! Nac zho, ni lalnu rund zho mine rseed zho miech.

⁴ Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

⁵ ¡Grë ncuane run zho, laaw runse zho par ganpaa miecha! Par quiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rriba. ⁶ ¡Zeene rbedz miech zho tib wagw nroob, rdziladz zho zhapaa rzob groḷ mezh, niicle len yadoogaaw, zaatne glupaa zha non nac zho, ga rzob zho! ⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ Sangue to gon yguibde to dien zha gnee miech “zha rac” nac to, sac tibaque men rac no, lëe me ga zëëble diidz cxeel Dios; golguien ganle tel to lalga nac to, rriequia bets to grë to. ⁹ Ib gunde to zig run grëraa miech, runnon zho tib samiech zho rnee zho lëe pxoz zho ga, sac tibaque men ne nac Pxoḅ to, lëe men co no gbaa. ¹⁰ Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me.

¹¹⁻¹² Nodne gaglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

¹³ ¡Probsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni

stiba, per ni to nod xnëz me. ¹⁴ [j]Probsaxe to! GuieIntseeb i gon run to, rio to rlozhd gool to xlay to rzo to ro nëz, ni noque to rla to ncuaañe rapse grë wnaa viud; ib tedsod gon guieInëdox ne ygaa to.] ¹⁵ [j]Probsaxe to, rzac to na lëew ga run to! Rio to gui dan rbix to, haxta rded to nisdoo, rquiaguib to dien cho sëeb xnëz to ni rlozh ga laa ne ygab zho nëz lo Dios, leInëz len gabil zienie to zho. ¹⁶ [j]Probsaxe to, nac diidz name to noseed miech, ni per ni to riend pe rnee to! Rnee to lo miech: “Zha ne rzeet yadoo ni tel gund zho mine rnee zho, peet nacd ga, per tel gzeet zho grë or ne no len yadoo ni gund zhow, dol ga gun zho.” ¹⁷ [j]Nadzpaan xnen to, nadzpaan ncow nac guic to! ¿Niacne mazdraa non or lo yadoo? Golguien ganle por yadoo, naclay grë or co. ¹⁸ Rneeque to: “Zha ne gzeet lo pcoog, led dolda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gun zho.” ¹⁹ [j]Pe nlipaa rnee to peet riende to! ¿Niacne mazdraa dzigo non gon que lo pcoog? ¿Pe rande to por lo pcoog co raclay gon? ²⁰ Golguien ganle, zha ne rzeet lo pcoog, yele grë ncuaañe ndziib low ga quiazeet zho; ²¹ zha ne gzeetga yadoo, haxta Diosle ga gon rzeet zho, sac ga rbëz me. ²² Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

²³ [j]Probsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grë guizh bitxtil, guizh nizh, guizh comin run to tsiilal, rded to tib lala mine rieguial tsiesan to yadoo, laa ley ne mazdraa non zienie guic to gun to mine nrabeya. Nli rieguiala gdeed to grë gon co, per none scaque tsoxco to gun to mine nac diidzli, none yquia zdoo to samiech to, none dib zdoo to gnalo to Dios. Min rii nac mine mazdraa non.

²⁴ [j]Ne nlipaa ib riende to pe quiaayun to! Rzac to na noxco to gunctalde to xtol to, masaque ni tib ngurudz rsaande to tso lo ncuaañe row to, ni riende to rrieequia haxta tib camell rab to. ²⁵ [j]Probsaxe to, masaque nac to zig tib plat, zig tib tas ne nëz zhtisew mbe rna, laa nëz lena rnadraa! Laglaase rquiaalo to miech wen nac to, per tibaque noban to, tibaque nosacsi to samiech to. ²⁶ Golguien none glo csaan to xquieIntseeb to, none gac to zig tib plat zig tib tas ne zigtaa mbe nëz zhtisa, scaгаа mbe nëz lena. ²⁷ [j]Probsaxe to, nac to gon zig grë baa ne dieen paraa nquitsbie rna! Niow rlu nëz zhtisa, laa nëz lena loxaque grë ncuaañe biodz, loxaque grë dzit ngutoo nodzë. ²⁸ Sca gon nac to, ne rac to zootxe luu waa nli miech ndzinli nac to, per nëz len zdoo to loxaque zhgab ne dien zha yquidie to miech, zha csacsi to miech no to.

²⁹ [j]Probsaxe to maistr ley, probsaxe to farisé! Ni lalnu guieIno guieIno lo to, rio to rzhixcuua to ro xpaa grë zha ne guiadteed xtidz Dios, ni lëepaa grë pxozgol to beet zho. Dieen peraa run to rquiaalo to rsoladz to zho. ³⁰ Rnee to: “Telne niaca mine nole ne len dze co, ndeete ne diidz nsacsi xmengol ne grë men rii.” ³¹ [j]Lëeque to gon nobeero ga, zha nactaa lo dii ntseeb ne ziaad to! ³² [j]Scaque nasca golgun! [j]Goltsienal grë mine been pxozgol to ga! ³³ [j]Miech ngoopdol! [j]Zhin mendox! Telne csaande to xquieIntseeb to i, ib tedsod gon gabil guey to.

³⁴ [j]Grë zha ne cxel naa, zig nac zha ne guiadteed xtidz naa, zha ne nacie Espiritu Sant, zha ne ygaa guieIni yquiaa zho mine gnabey Espiritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lëeque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho. ³⁵ Blactaa grë miech ne sca peet xtol dziyut to grë xmengol to, psilow desde Abel haxta Zacari xingan Berequi, men ne beet xmengol to zaatne nac gax lo pcoog len yadoo. Ni ye to gon zëeb xchen grëse zha co. ³⁶ [j]Gneli naa lo to ganle, grë miech ne gon mban len dze rii, grë to zho ygaa guieInëdox ne tsieguial to por grëtaa guieIntseeb co!

³⁷ 'iAque tow men Jerusalén! ¿Pe nacle squitaa nac to, rut to zha ne ziadteed xtiidz Dios lo to, rgoquie to grè zha ne rxeel me lo to? Blactaa gocladz naa, niacnie naa to, nquianaap naa to, zig run nguid rguedez ma xpèed ma, per bzhiguielde to. ³⁸ Gacnan to sca ganle, nadzetaa gon laa lidz to nu guiaan ngan, ³⁹ sac gandraa to naa, haxta gal dze ne guiab to: "¿Zha ndzontaa men qui pxeel Dios lo nel!"

24

iNsin golso!

(Mr. 13:1-23; Lc. 17:22-24; 21:5-24)

¹ Laa Jesús zieriee len yadoo grè xpèedscuel me, zeene pcuèezdze zho me, rëb zho:

—Gotsaa gwi ne ganle zha niaataa yadoo rii.

² Blozhse bui zho low, rëbchaa me lo zho:

—Niicle squitaa nagon niaaw, per zdziñ dze ne nitlow dib nacsew. Ni stib quie qui guiaanndraa zigne squi zhobxcuaaw i.

³ Brie me len yadoo ga grè me zho, laa zho zie nëz Gui Oliv. Bdziñ zho cho gui co, ga bzob me grè me zho. Dzigo wbig gax bla zho lo me, bnabdiidz zho rëb zho:

—Bzhiguiel bnè lo no dien, ¿pa hor dzigo gac mine bzeet luu ga? ¿Zha glu zeene laa luu ziaadyoble guiaad? Zeene nitlogaa guidzliu, ¿zha gacndion no laa dze co ziaadyoble?

⁴ Pquiab me rëb me lo zho:

—Nsin golso, zeena choot yquidiede to. ⁵ Sac nzian zha ne grieequia guiab zho zha nac Men ne zèèble diidz cxeel Dios; ni nzian miech ne yquidie zho.

⁶ Zeene gon to nëzrii nëzrec noxtseeb csilo dil, guiabde to togo lèèle dze ne guial naa ga bdziñ; sac niicle noyacle dila, noxtseebragaa pa csilo gaca, led lèdle ne nitlo guidzliu ga. ⁷ Garaa csilo grè dilдох, grè guiedz nroob laaw tilnie saguiedz nrooba; grè zha ne rnabey grè guiedz nroob, laa zho tilnie sazha rnabey zho. Nëzrii nëzrec csilo gni grè zhodox, nzian zaatne gan miech gbin.

⁸ Ni lega loxaque mine rsilosew ga, sac nroobraa guielnè ne gan miech lozh ga.

⁹ Zeene laa grè ncuuan rii noyac, įnsin golso! Sac hor co laa miech tsielo to lадznia zha ne csacsi to, haxta zut zho palal to, grèse miech stsidil zho to loxaque ne nac to zha ne no xnèz naa. ¹⁰ Nzian zha ne nole xnèz naa, len dze co laa zho gbiche, laa zho csilo lèèque zha glèènie zha ne nacgrè zho, haxta zielo zho zho lадznia zha ne gut zho. ¹¹ Len dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza.

¹² Grè zha ne nole xnèz naa, zeene gan zho grètaa guielntseeb, grètaa dol ne quiaayun miech len dze co, ndal zho gleyniedraa zho Dios dib zdoo zho. ¹³ Per zha ne tiblique gac, gbiched zho lo Dios, niicle tel petaa gan zho noyac, zha co gac zha ne gdziñ lo me. ¹⁴ Niicle scataa noyac grè ncuuan co, ib none ygaaз Xtiidz Ndzon Dios lo grèse miech, grètaa zaatne ndxie miech laa zho gacnana; lozhraa ga dzigo laa guidzliu rii nitlo.

¹⁵ Zeene gan to zaatne nac Lugar Nda len yadoo, zo tib ncuuane rieguiald so ga, tib ncuuane ziaad gnitlo, zigne bzeet Daniel men ne biadteed xtiidz Dios (zha ne glaba, none guien zho zha naca), hor co golguib dien zha xoon to. ¹⁶ Zha ne no grèraa guiedz ne ngab Judé, none xoon zho tsie zho dan, ga tsietsolan zho. ¹⁷ Zha ne lèètaque hor co no glaa guic lidz, none lèèlèd xoon zho, ib guiabd zho sèèb zho len yu tsiebee zho ncuuane rap zho. ¹⁸ Zha ne quiaгаа lo dziin dan, ib gund zho tsie zho lad guiedz tsixi zho xab zho.

19 jProb grē men wnaa ne lēetse len dze co zoney xpēēd, men ne quianiegaa mēdyeen ne bii radz! 20 Golnab lo Dios gan̄de to guielnē co len mēē ne rac nā, dze ne rdziiladzga to lo dziin. 21 Ne nligaa guielnēdoxa. Wlal ne biaan guidzliu haxta lo nadze, gard gan̄ miech tib guielnēdox sca, ni gandragaa zhow ted ga. 22 Telne csaan Dios nroob dze gac guielnē co, ni stib miech rii guiaan̄draa; per na por grē zha ne bzooblo me sēēb xnēz me, gdeete me diidz gaca nroob dze.

23 Zigne rne naa ga, len dze ne scataa gan̄ miech grē dil co, zha ne gnē lo to: “Goltē nu gan̄le, lēē Men̄ ne nole cxeel̄ Dios ga blanso nu”, gnēgaa zho: “Golt̄sie nec gan̄le, laa me bdziñ ga”, gliladzde tow. 24 Sac zrieequia zha ne yquidie guiab zho zha nac men̄ co, zrieequia zha ne guiab xtiidz Dios ziadteed zho lo miech, zun̄ zho grē milagr nroob, parne yquidie zho miech, haxta zha ne nole xnēz Dios, zguib zho dien̄ zha gdeeda diidz yquidie zho zho. 25 jNsin sca golso! Benque laa naa nilew lo to. 26 Nligaa zha ne gnē lo to laa men̄ ne pxeel̄ Dios ga blansole, gliladzde tow. Nenda cxeel̄ zho to tib dan zit, gnē zho: “Golt̄sie gan̄le laa me no ga”, gnēgaa zho pa tib len̄ yu ne no me, ni tib xtiidz zho gliladzde to. 27 Sac zeen̄ gā dze ne guiaad me stib, gacda ncuaan̄ ngeuets zhliaan, grēse miech gan̄ me. Zig tel̄ guiab tib belye nroob ne glu zhan̄ gbaa, desde nēz ne rlan̄ ngbidz haxta nēz ne rzēēb ngbidz, ĩniacxe gan̄d grēse miecha? 28 Zlupaa zeene laa me guiaad; nan̄le to gan̄le zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

29 Zeene lozhse gan̄ miech grē guielnēdox co, laa lo ngbidz ycow, gziinidraa mēē. Grē mel ne ndziib gbaa, laa ma gliaal; grēraa ncuaañe no gbaa, masaque nēzrii nēzrec gaca. 30 Horco zlu gan̄le zeene laa Mgui ne pxeel̄ Dios ga, ziadzēēb lo xcow con grē guielndzon, con grē poder ne rap me, grēse miech mban gac zho, zoon zho gan̄ zho me. 31 Grē xanj̄l Dios, hor co laa Dios cxeel̄ zho tsiecuedz zho zhitrompet zho parne ycaalsa grēse zha ne ngab xnēz me, tel̄ pa lotaa lo guidzliu no zho.

32 Golzoob cuidaz zha nac yag guigw. Led nan̄le to gan̄le, zeene laa grē zhicwa racnieen, ni rsilo rdzib zhiblaga, gase rlu ne laa mēē nēēg ziaadgaxle. 33 Scaque nagon̄ zeene gan̄ to laa grē miñe rne naa lo to nu rsilo noyac, dzigo nan̄le to laa dze ne guiaad men̄ co ziaadgaxle. 34 Gneli naa lo to gan̄le, nzian miech ne mban niina bii zan̄ zho zeene laa grē ncuaañ co csilo gac; sac ible ncuaañe gaca. 35 Zdziñ dze ne nitlo gbaa, nitlo guidzliu, sangue miñe rne naa lo to nu, nitloda; ible laaw none gac.

36 Lēēraasi choot nand dien̄ pa dzew, dien̄ pa horgaaw, per ni grē anj̄l ne no gbaa, per ni naa nan̄da, loxaque Pxzose naa nan̄a.

37-39 Nan̄le to gan̄le zha bzhaac miech len̄ dze ne wban Noé, ib bliladz̄d zho xtiidz me. Guxt no zho lo zhilni zho, zha ne notsieelnia, zha ne nobediingaa xpēēd, laa dze bdziñ laa Noé bzēēb len̄ barcw; tibaque zeene baa zho biini laa guiedox co nonitole zho. Scadaa nagon̄ sac grē miech nad rii, tibaque zeene tsaa zho biini laa Mgui ne pxeel̄ Dios ga ziaadle. 40 Horco zaatne quia chop mgui lo dziin dan; tib zho tsienal̄ zhits me, stib zho guiaan̄. 41 Zaatne quia yot chop wnaa, tib zho tsienal̄ zhits me, stib zho guiaan̄.

42 jNsin sca golso, sac gon̄ nan̄de to dien̄ pa horpaa guiaad me, benque laa vis racle lo to! 43 Golgan̄ gan̄le, tel̄ niaca miñe gacnan̄ miech laa ngbaan̄ tsieban lidz zho guieel, per nan̄d zho dien̄ pa horpaaw; ĩniacxe zaaguies zho? Led sobna zho lēē, nsin nsin so zho. 44 Scaque to nagon̄, none nsin so to, sac gon̄ lega naclew zeen̄ gan̄ to laa me ziaadle.

⁴⁵ 'Golgaṅ gaṅle, masaque laa to gac nagoṅ zig tib ngundziin ne riaaṅnie ro lidz meṅ ne rquia zho xtsiin.

'Ngundziin ne ndzinli, zeene laa meṅ ne quia zho xtsiin ga greee, ine niowse guiaan zho guiaanṅie zho grëraa zha ne no lidz me. ⁴⁶ Zha ne sca guṅ, jwen tsie zho, sac zeene gbire me gaṅ me scataa noxco zho dziin ne pso me zho, ziaṅziuu zho lo me ⁴⁷ haxta so me zho, zha yquiaanap grëse ncuaaṅe rap me!

⁴⁸ 'Telṅ ngundziin yozhgaaw, miṅe tsienie guic zho guiab zho gbireniobd meṅ ne quia zho xtsiin ga, ⁴⁹ csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho, ⁵⁰ tibaque zeene gaṅ zho laa me bdzinle. ⁵¹ Zha ne sca guṅ, per paaṅ dien guṅ me, ib tedsod nroob caxtigw ne cteed me zho, sonëz me zho geyue zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guieṅnëdox ne ted zho.

25

Zha bzhaac tsii wnaa nguieg

¹ Blozh ga rëbchaa Jesús lo zho:

—Par sëëb miech zaatne rnabey Dios, masaque naca zig rzëëb miech tib lo lni zaatne noyac tib guieṅtsieel.

'Tsii wnaa nguieg name, briece zho ziexinëz zho mguì ne ctsieelnia, tib tib zho bise zho psin win ne rec nceit ne rziini. ²⁻⁴ Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhense zho psin co scasë bi zhow, bid zho nceit ne niodzëraaw.

⁵ 'Goc pa hora rio zhimcaalo zho, ni rdziṅdaque mguì ne ziexinëz zho ga, tibaque zeen laa zho pquia mcaal. ⁶ Golṅ grolṅ guieela, zeen laa vis rac, laa mguì co ziaadle, zha ne ziexinëz me ga, zac greece zho tsiedzieel zho me. ⁷ Lëëledṅ briece mcaallo gza wnaa nguieg co, psilo zho nozhixcuuaa zho zhipsin zho. ⁸ Zeene gonṅ gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiin zho, sac laa zhipsin zho noyuule. ⁹ Pquiab zho rëb zho: “Grieeloda, sac miṅe yquiinse zhipsin no ziaadnie no. Mazd goṅtsie zaatne rto zhow, ga goṅtsiexiw.” ¹⁰ Per lo lal ne ziexi zho nceit, laa mguì co bdziṅ. Zeene wbire zho, laa ro yu nioogle, loxaque gza zha ne nsinle zo ga, zha cose bzëëb len yu. ¹¹ Dzigo psilo zho, rcaṅ nia zho ro yu, rbedz zho mguì co cخال me ro yu sëëb zho. ¹² Per bdeete me diidz nzëëb zho, rëb me: “Runṅbeyd naa to gonṅ, naṅd naa dien cho nac to.”

¹³ 'jNsin sca golso! —rëb Jesús—. Sac gonṅ nande to pa dzepaa, pa horpagaa gbiire guiaad Mguì ne pxeelṅ Dios.

Zha ne biaanṅie ðimi

¹⁴ 'Mguì ne pxeelṅ Dios ga, ziaad gac me zig tib meṅ ne no greece tsie tib viaj zit.

'Tib meṅ name no greece me tsie me tib guiedz zit, dzigo bredz me zha ne runṅ dziin lo me, bdeed me palalga xtimi me lo zho guṅdziin zhow lenṅ dze ne guieṅd me ga. ¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me miṅe rgobey me grieelo zho guṅdziin zho, dzigo laa me briece laa me zie.

¹⁶ 'Zha ne biaanṅie gaay mil pes plat co, güey zho bloonon zhow, beeṅa gan zgaay mila. ¹⁷ Zha ne biaanṅie chop mila, ye zho güey zho bloonon zho ðimi co, scaque beeṅa gan schop mila. ¹⁸ Laa zha ne pcaania tib mila ga, leṅ güey zho güeyteen zho tib guieer güeyloliu zhow.

¹⁹ 'Goc bla iza laa men co bdzin, dzigo bredz me zho tib tib zho, tsie zho gzodiidz zho dien yo dimi ne biaanⁿie zho ga.

²⁰ 'Bdzin zha ne pcaania gaay mil pes plat co, bdzinnie zho xtimi me, rëb zho: "Laa xtimi luu nu gon, lëë gaay mil pes ne psan luu lo naa nu, laa zgaay mil min rii nac mine bdziniaaw." ²¹ Rley me rëb me lo zho: "¡Zha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. ¡Na bded, zeena yгаа luu grë guie|bley ne quiayac nu!"

²² 'Blozh ga, bdzinaque zha ne biaanⁿie chop mila ga, ye zho laa zho bdzinnie xtimi me, rëb zho: "Laa xtimi luu nu gon, lëë chop mil pes ne psan luu lo naa nu, laa schop mil min rii nac mine bdziniaaw." ²³ Pquiab me rëb me: "¡Squiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. ¡Na bded, zeena yгаа luu grë guie|bley ne quiayac nu!"

²⁴ 'Zeene bdziinta zha ne biaanⁿie tib mila ga, rëb zho lo me: "Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; ²⁵ gane mazd bialoliu naaw. Tib mil naca bneedz luuw, ledaaw nu." ²⁶ Blëë guic me, rëb me lo zho: "¡Biche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷ ¿pex nac dzigo waa bioxcod luu maase mbediin luu dimi qui, ndziniaaw palal ncaania naaw niina?" ²⁸ Dzigo rëbchaa me lo zha ne ndxie ga: "Niinagazh golcob tib mil pes qui lo zha qui, goldeeda lo zha ne ziaadnie tsiw i. ²⁹ Sac zha ne rioxco rundziin ncuaaⁿe rcaania zho, zacnroobraa ncuaaⁿe yquianie zho. Laa zha ne squi nac, haxta mine pcaaniale zho, zdiooba lo zho. ³⁰ Golxen zha yozh qui, goltsiesan zho lo ncow nëz ley. Ga gan zho guie|nëdox ne tsieguial zho, ga goon zho haxta gow lay zho."

Zha gan Jesús guie|wxtis

³¹ Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grë xanj| naa, zlu grëtaa guie|ndzon ne rap naa, laa naa sob lo xcan ne ragual naa soob naa. ³² Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho. ³³ Zha ne no xnëz naa, zha co gdzin naa cue naa nëz derech, laa zha ne nod xnëz naa, cue nëz revés.

³⁴ 'Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: "Goltë grëse to, to ne nac to zha ne nziuu lo Pxo^x naa. Golted zeena ycaania to zaatne cuëz to, ible par to bzaa mew desde zeene bzaa me guidzliu. ³⁵ Sac zeene pcaabedz naa, bneedz to ncuaaⁿe dow naa; zeene bnab zhis naa, bneedz to ncuaaⁿe go naa; zeene bial naa ladz to, bneedz to lidz to blëz naa; ³⁶ zeene gon to guie|nd xab naa, bgacwxab to naa; zeene bhacnë naa, zeene bio naa ladzguuib, biaad to biaadgan to naa." ³⁷⁻³⁹ See ddo^o zho gnë zho: "¿Per pa hor bneedz no ncuaaⁿe doow luu, ncuaaⁿe go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziond no nzhaacnë luu, bdziond no niogaa luu ladzguuib?"

⁴⁰ 'Dzigo guiep naa lo zho: "Gzobtaa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nona, rrieequia xyudar naa ga been to, rrieequia naa ga biaadgan to."

⁴¹ 'Laa zha ne ndxie nëz revés, hor co laa naa gzonëz zho, guiep naa lo zho: "¡Golbiche lo naa nu, miech ndziibdee! ¡Golsë lo guidox ne rieguial to, zaatne

no guey men^dox grë xanj^l ma! ⁴² Sac gon, bio dze pcaabedz naa ni bneedzde to ncuaaⁿe niow naa; bⁿab zhis naa, ni bneedzde to pe nie naa. ⁴³ Bial naa ladz to, ni bneedzde to zaatne mbëz naa; gon to guiend xab naa, ni ni tib lë lar bneedzde to niacw naa. Bio naa ladzguiib, bzhacnë naa, ni pe liaadz to niaadgaⁿ to naa.”

⁴⁴ 'Squiab zho gnë zho lo naa: “Per pa hor bdzion no luu rcaabedz luu, rnabгаа zhis luu; pa hor bdzion no guiend pa cuëz luu, guiend lar ne gacw luu; pa horgaa bdzion no no luu ladzguiib, nixгаа luu rzacnë luu.”

⁴⁵ 'Dzigo gueip naa lo zho: “Grëse vuel^t ne bzoliaadz to niun^t to xyudar zha ne no xnëz naa, bzoliaadz to niegan^t to niegan^t zho zho niicle zha ne mazdraa wina, rrieequia naa ga sca been^t to.”

⁴⁶ 'Horco grëse zha co laa zho guey lo guidox ne gdzindraa dze griece zho; laa zha ne bioxco wban zigne rnabey naa, grëse zho laa zho yгаа tib guiemban ndzon ne gdzindraa dze lozh.

26

Bnediidz zho dien zha gnaaz zho Jesús

(Mr. 14:1-2; Lc. 22:1-2; Jn. 11:45-53)

¹ Zeene blozh sca bnee Jesús lo grë miech co, dzigo rëbchaa me lo xpëëds^cuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

³ Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob. ⁴ Laa zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui men guiedza. ⁵ Rnee zho: “Lëëraasi choot gnabeyd yгаа me merpaa dze lni, zeena gacntseebd menguedz.”

Pchoob tib wnaa nceit nex guic Jesús

(Mr. 14:3-9; Jn. 12:1-8)

⁶ Betain ga no tib men ne biac lo guiedz lepr, lë Simón. Lëëtaque no Jesús lidz men co, ⁷ zeene bdziⁿ tib wnaa bdzinnie tiblo nceit nex, nosew tib len ncuaaⁿ win niaa niapse quie rbebni, tiblo nceit niazha. Squi zob Jesús lo mez^h, güey wnaa co güeychoob me nceit co guic Jesús. ⁸ Zeene gon xpëëds^cuel Jesús sca been^t wnaa co, blëë zho, rnee zho:

—¡Pa rieguiala squi pxin zhlë wnaa qui nceit qui! ⁹ Tel niaca mine ndow, pe zhidaa dimi ne nguizh zhow, nquiinpaa dimi co ngaaza lo grë zha ne guiend pe yquiin.

¹⁰ Gon Jesús sca rac zho, dzigo rëbchaa me lo zho:

—¿Pe nacne rlëë to lo wnaa qui? Go^lsaan me. Par naa nroob non mine been me i. ¹¹ Tel nli lëë racladz to gun^t to xyudar zha ne guiend pe yquiin, zac ygad to lo zho stib dze, sac tibaque ran^t to zho; sangue naa zhile laa naa gbiche lo to.

¹² Led pxin zhlëd wnaa rii zhincit me, sac gon rrieequia laa me bzhixcuaale xcuerp naa nu ga^l dze ne ygueetsa. ¹³ Gneli naa lo to ganle, dipse lo guidzliu zaatne cseedtaa miech Xtüidz Dios, ible soladz zho wnaa rii, seet zho mine been me nu.

Güeyto Judas Jesús

(Mr. 14:10-11; Lc. 22:3-6)

14 Lo gza tsiipchop zha ne nac xpëëdsuel Jesús ga, brieë zha ne lë Judas Iscariot güeyzodiidnie Judas grë zha ne nac pxoz ne rnabey, 15 rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. 16 Nacne psilo Judas noigub Judas dien zha gdeeda diidz csañ Judas me ladznia zho.

Dowxtseenie Jesús xpëëdsuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

17 Mer dze ne rsilo lni Pascwa, len dze ne sca row zho guietxtil ne riotsd ncobi ga, bnabdiidz xpëëdsuel Jesús lo me dien pa lo racladz me tsiegunlo zho ncuaañe gowxtseenie me zho wdze co. 18 Dzigo rëbchaa me lo zho:

—Nanle to ganle cho lidz zrieelo gdziñ ne. Gołtsie Jerusalén golguiab lo zho: “Znu në xmaistr no: Gneedz luu lidz luu me diow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

19 Dzigo laa zho zie. Güey zho zaatne pxeel me zho ga, ga beenlo zho xtsee co.

20-21 Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

22 Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun miñ co? ¿Pe naaw?

23 Pquiab me rëb me lo zho:

—Zha ne gan to csëëb xcuun len xquien naa, lëë zho ga. 24 Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¡probsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

25 Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

26 Laa zho noyow, zeene bzhen Jesús tib guietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Gołquiina, lëë xcuerp naa i gon.

27 Ni bzhen me tib cop norob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Gołguie vin qui, 28 sac lëë xchen naa i, miñe no gzhiee par guiaañmbe grë miech lo xtol zho sëëb zho xnëz Pxoza naa, sac lëë stib mod cub nu psañ me parne sëëb miech xnëz me. 29 Lëë lultm vuelt nu guie naa vin rii, sac zhaale stib vin cub ne guie naa gal dze ne guenie naa tow zaatne rnabey Pxoza naa. Dzigo psilo me biilnie me Dios gza me zho.

Bzeet Jesús zha gun Pedr

(Mr. 14:26-31; Lc. 22:31-34; Jn. 13:36-38)

30 Blozhse biilnie zho Dios, laa me brieë ga gza me zho, laa me zienie zho nëz Gui Oliv.

31 —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiil.” 32 Miñcopaa nagon gun miech naa, per zeene laa naa grieëban glole naa ga Galilé, ga cuëz naa to.

33 Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁴ Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuelt guiab luu runbeyd luu naa.

³⁵ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëëdsuel me.

Bzodiidznie Jesús Pxoze me Getsemani

(Mr. 14:32-42; Lc. 22:39-46)

³⁶ Zeene bdzinnie Jesús zho zaatne lë Getsemani, dzigo rëbchaa me lo zho:

—Nuse nagon golsob, laa naa ga gazodiidznie naa Pxoze naa.

³⁷ Horco psilo mban rac zdoo me, riabguieinë me, dzigo bredz me Pedr, ni grop xingan Zebedé, bzënie me zho palal ³⁸ dzigo rëbchaa me lo zho:

—Mban rac zdoo naa, zootle zig zet naa lo guieinë rii. Nuse nagon golguiaan, per golsobna.

³⁹ Bzë me spalal, dzigo pquiitsgzhib me haxta bdziñ lo me lo liu; psilo me bñab me lo Dios, rëb me:

—Papá, laa naa rnab lo luu, telne zala zdoo luu, bzhiguiel psilaa naa lo grë guieinë rii. Miñ rii rnab naa lo luu, per telne grieeloda, miñe gnëtaa luu, miñ co gac.

⁴⁰ Zeene guso me, güey me zaatne biaan gza tson zha co, gon me laa zho nixguesle; dzigo rëbchaa me lo Pedr:

—¿Pe ni palal blëbde to nzobna to? ⁴¹ Golsobna, golnab lo Dios zeena yquuild menodox to. Niicle ne squi lëbdraa xcuerp to sobna to, per golnab lo Dios, sac gon miñ co nac miñe racladz zhiespíritu to.

⁴² Dzigo güey me stib, güeyzodiidznie me Dios; scaque miñe bñab me glo miñcoque bñab me. ⁴³ Zeene wbiire me bdziñ me lo zho, gon me laa zho nixgueslaque, sac lëbdraa zho mcaal. ⁴⁴ Wbiire güey me güeynab me lo Dios, scaque miñcoque bñab me. ⁴⁵ Zeene laa me wbiretaa bion vuelt co, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Mgui ne pxeel Dios, laa hor nagon bdziñ zeene laa grë miech ntseeb rii guidaanaa naa. ⁴⁶ Goltsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷ Laa Jesús bii quianeeque, zeene laa Judas (tib zha ne nac xpëëdsuel me) bdziñ, bdzinnie Judas tib dzoon zha ne pxeel grë pxoze ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. ⁴⁸ Biaaniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me. ⁴⁹ Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me. ⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëeléd wbig be grë zha co, bzhen zho me. ⁵¹ Horco biet tib zha ne rzënie me ga, bñob zho zhispad zho psilaa zho tib niaw, bliengaa zho diag tib zha ne rquia xtsiñ men ne nac pxoze nroob. ⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho. ⁵³ ¿Niacxe nan to naa grieelod gnab naa

lo Pxoꝝ naa niina cxeel me tsiipchop partid xanjł me guiaadla ne nu? ⁵⁴ Per telne sca guñ naa, ¿zha dzigo gac miñe zhobnee lo Xtiidz Dios, zaatne raquiet miñe noyac nu?

⁵⁵ Dzigo rëbchaa me lo grë zha ne bdziñ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? ⁵⁶ Per ible laa grë ncuuan riñ gon noyac, zeena grieequia grë miñe bzeet grë zha ne biadteed xtiidz Dios lo miech padzeela.

Horco grëse zha ne nac xpëedscuel me laa zho bzhooñ, tipse me psañ zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brieenie zho Jesús bdziñnie zho me lidz Caifás, men ne nac pxoꝝ nroob. Grë zha ne rnabey lo menquiedz Israel, laa zho ndxiele ga. ⁵⁸ Ye Pedr maase zit zit nañ Pedr laa Pedr bdziñ xley men co. Bdziñ Pedr güeysobga Pedr lo grë zha ne ndxienap, quiambëz Pedr dien zha guñ zho Jesús.

⁵⁹ Grë pxoꝝ ne rnabey, grë zha ne nac zha non lo menquiedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuua maase diidzguizh ycaadz zho Jesús, parne gdeeda diidz gnab zho guet me.

⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹ rëb zho:

—Bdziñ no gon rnee me laa me ctixche yadoo ne zob lad guiedz nu, zaatne riodziñ ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoꝝ nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

⁶³ Gon pxoꝝ nroob co rquiabdaque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶⁵ Horco ptsiez pxoꝝ nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëta xtiidz me noguitnie me Dios. ⁶⁶ Nana waa, ¿pe gnë to zha dziuñ ne me?

Pquiab be zho rëb zho:

—jlb rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me, ⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzooop ne quia dziin lidz men rnabey co; rëb ndzooop lo Pedr:

—¿Ye luu lëe rzënie Jesús, men Galilé ne bdziñnie zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele nêz ro puert ne quia ro nêz, zeene gon stib ndzooop ne rquia dziin ga Pedr, rêb ndzooop lo zha ne ndxie ga:

—Ye ngui qui gon nacgrê men Nazaret ne bdziinne zho i.

⁷² Scaque bneelid Pedr, haxta rzeet Pedr Dios rêb Pedr runbeyd Pedr me.
⁷³ Wdzeepaaw, rêb zha ne ndxie ga lo Pedr:

—Ne nligaa ye luu rzênie men ne bdziin i. jRlupaa name zig rnee zha nêz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieer ro Pedr zeene laa tib gall pcuedz. ⁷⁵ Horco psoladz Pedr xtiidz Jesús zeene rêb me lo Pedr: “Gardle ycuезд gall, tsonle vuell rêb luu runbeyd luu naa.” Dzigo mbanse rac Pedr. Brieer Pedr ga, psilo Pedr biin Pedr guieinê co.

27

¹ Ziadyiinile liuw, wbiire pcaalsa grê pxoz rnabey, grê zha non lo menguedz, bnediidz zho dien zha gnabey zho guet Jesús. ² Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lèelêd güey Judas lo grê pxoz rnabey co, lo grê zha non lo menguedz ga, zietsire Judas dimi ne bdiizh zho Judas ga. Mban rac Judas, ⁴ bdziin Judas rêb Judas lo zho:

—Naraa rien naa lêda nu ben naa. jTib dol nrooble nu, znu bialto naa tib men ne peet xtold!

Pquiab zho rêb zho:

—jMincotaa gon ndiond no! jXcuentzhe luu ga!

⁵ Horco pchel Judas dimi co len yadoo. Lo guieinê co brieer Judas ga güey Judas lèêque Judas pxiiyan Judas.

⁶ Grê zha ne nac pxoz rnabey ga, güey zho ptop zho dimi co. Per blozh ga, rien zho dien zha gon zhow.

—jZha dziiuun ne dimi rii? —rêb zho—. Telne guiaana yadoo, per rdzieelda, sac gon xchen tib miech bdzêew.

⁷ Dzigo bzodiidz zho dien zha gaça, nace mazd pquiin zhow bzhii zho tib lê liu, zaatne rdieen yu ne raa grê ncuaan psin ne rquiin; parne lo liu co ygueets grê zha zit ne guet Jerusalén. ⁸ Nace brieelê liu co “Liu ren”, ni sca runbey zhow len dze rii. ⁹⁻¹⁰ Ga brieequia mine bzeet zha ne biadteed xtiidz Dios padzeela, zeene rêb zho: “Galptsii pes plat ne bzhii zha Israel men nziuu co, dimi co bzhii zho tib lê liu, zaatne rdieen yu ne raa grê ncuaan psin ne rquiin. Sca nê Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdziinne zho Jesús lo Pilat, ga bnabdiidz Pilat lo Jesús rêb Pilat:

—Bnê dien, jpe nli luu nac zhirey zha Israel?

Pquiab me rêb me:

—Nliw.

12 Grë zha ne nac pxoz rnabey ga, ni grë zha ne nac zha non lo menguedz, rzadraa ncuane rquiaqui zho me; per ni tib diidz rtsired me lo zho. 13 Dzigo rëbchaa Pilat lo me:

—¿Pe nacne rquiabd luu? ¿Pe ib rond luu grëtaa ncuane rquiaqui zho luu i?

14 Bzee zdoo Pilat gon Pilat, ible rquiabd me.

15 Gzobse iz, zeene raļ Ini Pascw rnabey Pilat rlaa tib zha ne no ladzguiib, zha ne gnabtaa menguedz laa. 16 Leņ dze co no tib zha ntseeb ladzguiib lë Barrabás, zëëb xtiidz zho. 17 Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

18 Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bgaa me.

19 Laa Pilat zob lo xcan ne run me guielwxtis, zeene bdziņ tib mandad rëb lo me:

—Znu në tsiel luu: bzhiguiel me peet guņd luu meņ qui, rlu peet xtold me; sac nieewdze me nroob ptseb mcaal tsiel luu.

20 Grë zha rnabey co, bio zho pquuil zho menguedz gnab zho csilaa Pilat Barrabás, ni gnab zho guet Jesús. 21 Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—jBarrabás psilaa!

22 Dzigo rëbchaa Pilat:

—Meņ ne waa nac diidz pxeel Dios lo to nu, ¿zha guņ naa me?

Pquiab zho rëb zho:

—jBnabey yquia me lo cruz!

23 —¿Per pe nacne yquia meņ rii lo cruz? —rëb Pilat—. jNi tib doļ rapd me!

Biireque zho nguiedz roptsie zho rnab zho yquia me lo cruz. 24 Gonse Pilat rquiaadiagd zho xtiidz me, leļ mazdraa rac zho, dzigo bnab me nis, squi ndxie zho bdiib me nia me, rëb me lo zho:

—jNaņle to nasca, led xtoldraa naa nu ne laa xchen meņ rii gzhiee, sac nanpaa naa peet falt rapd me!

25 Pquiab be zho rëb zho:

—jPeet nacd ga! jZhits no grë xpëed no cuib doļ co, na no guiotizha!

26 Dzigo bnabey Pilat blaa Barrabás, laa Jesús race me bnabey me zha ne bdin Jesús, blozhse ga laa me psan Jesús ladznia menguiib ne tsiequiaa me lo cruz.

27 Biire grë menguiib co bzëëbnie zho me nëz leņ yulow, ga pcaalsa grëraa menguiib ne nacgrë zho, briņ zho igose me. 28 Blee zho xab me, bgacw zho me tib lar nizhnie nlaan, zig rna lar ne racw grë rey, 29 bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquuitsgzhib zho lo me, rnee zho:

—jGolwi ganle zha ractaa zhirey zha Israel!

30 No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

31 Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brienie me ga zienie zho me zaatne yquia me lo cruz. 32 Nëz zienie zho me bdzieel zho tib meņ Ciren lë Simón, bnabey zho meņ co bi me zhicruz me.

³³ Zeene bdziñ zho zaatne nac “Gui Beerguic Ngutoo” (Gólgota), ³⁴ ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnéd me nie mew.

³⁵⁻³⁶ Blozhse pquiaa zho me lo cruz, bzhen zho tib xab me pchug zhow biaañie zho tib lëgaw, laa stiba bio zho rif; dzigo laa zho bzob ga, bzobnap zho. ³⁷ Guic zhicruz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA ISRAEL.” Sca pquiaa zho, sac minco pquiaqui sca pquiaa zho me lo cruz. ³⁸ Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. ³⁹ Grëse miech ne rdedtaa ran zho laa me quia ga, rzhidznie zho me, haxta rdzi zho guic zho ⁴⁰ rnee zho lo me:

—Led rëb luu lëë laa luu ntsil yadoo, ni tsonaque ngbidz nzaalo luu stiba, çpe nac dzigo rriee lod luu guieet luu i? Telne nli Xpëéd Dios nac luu, biet lo qui.

⁴¹ Scaque grë pxoz rnabey, grë maistr ley, grë zha farisé ni grë zha ne nac zha non lo menquiedz, rzhidznie zho me, rnee zho:

⁴² —Stib miech scataa beenguiac me, stib miech scataa bla me, çpe nac dzigo rriee lod me gla me me? çGoon me name nac zhirey ne, quiet me i sca zho; zeena dziuunbey ne men rnabey nac me! ⁴³ çConque tant rnalo me Dios, haxta rnee me Xpëéd Dios nac me, guiaadsilaa Dios me i nazho!

⁴⁴ Ye ngbaan ne quiaagza me lo cruz ga, mincoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig groñ dzew, tibaque zeen goc tib ncow dipse lo guidzliu, haxta las tres biao biini stib. ⁴⁶ Horco nguiedz zëëb tsi Jesús, rnee me:

—Elí, Elí. çLama sabactani?

Diidz co nac zig nac ne rnee ne: Luu nac xDios naa, luu nac xDios naa. çPe nacne psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, men ne biadteed xtiidz Dios padzeela, men co rbedz me. ⁴⁸ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me. ⁴⁹ Laa zla zho rnee:

—Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len yadoo, groltaa goca; psilo bni tib zhodox, grë quie masaque wbila, ⁵² nzian ro baan grë zha ne bnalo Dios mazd padzeela bzhal. ⁵³ Zeen goñ dze ne brieeban me, ye zho laa zho brieeban, brieë zho len baa, bzëëb zho lad guiedz; nzian miech ne gon zho.

⁵⁴ Grë menquiib ne quianap me ga, ni zha ne rnabey lo zho, zeene gon zho bni zho co, ni gon zho grë ncuane goc ga, per nli bdzieb zho.

—çNe nlipagaa —rnee zho—, Xpëéd Dios nac men qui!

⁵⁵ Nzianlaa men wnaa, zit zo zho rwi zho. Lëë grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nëz Galilé. ⁵⁶ Lad co no Marí Magdal, Marí tseeil Zebedé, ni Marí ne nac xniaa Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëëb ngbidza, zeene bdziñ tib mgui lë José lo Pilat, bnaab me diidzbey tselit me xcuerp Jesús lo cruz; tib zha ricwa, men guiedz Arimaté

nac me, ye me zienal zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lë lar cub, pchel José me lar co, ⁶⁰ güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹ Laa Marí Magdal bii biaan ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat, ⁶³ rëb zho:

—Gun luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca bиаadquidie miech ga, rëb me, zeene gac tson ngbidz guet me laa me grieeban. ⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieeban. Nanle luu ganle, tel gac min co, cho gnë peraa gzhixcuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë menguiib co. Bdziñ zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biaan grë menguiib co yquiaanapa.

28

BRIEEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhmal, silgaw zie Marí Magdal grop me stib Marí co zieso zho ro baan Jesús.

² Lëëtaaque hor co bni tib zhodox, lo zho co biet tib xanjl Dios gbaa dbod me quie nroob ne nioog ro baa co, bdiix mew tib lad, zbobga me lada. ³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg.

⁴ Grë menguiib ne quianap ro baa ga, zeene gon zho anjl co, per nli bdzieb zho, rzhidz zho. Lo dzeb co, pcowgazh zho, grëse zho biab liu. ⁵ Zeene laa grop wnaa co bdziñ, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to. ⁶ Per guiendle me nu, jlaa me brieebanle zigne bneele me ga! Golwi ganle nu nac zaatne pxob zho me. ⁷ Niinagazh goltsie goltsienie diidz lo xpëedscuel me, golguiab lo zho laa me brieebanle. Galilé me cuéz me zho, ga gan zho me. Laa to nanlew nasca.

⁸ Lëëled briece grop wnaa co ga, rias zho laa zho zienie diidz lo xpëedscuel me; lala rdzieb zho, ni lala rley zho. ⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquitsgzhib zho lo me, bdeedz zho ni me. ¹⁰ Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

¹¹ Horcoraa laa bla zhaguib ne pquianap ro baan Jesús ga bdziñ lad guiedz. Güey zho lo grë pxoz rnabey, bzodiidz zho zha gon zho bzhal ro baa co. ¹²⁻¹³ Dzigo pcaalsa grë pxoz co grë zho zha ne nac zha non lo menguedz, dien zha gan zho. Nacne biaan zho diidz, mazd gdeed zho dimi lo grë menguiib co, parne gneelid zho, sinque guiab zho, segur xpëedscuelaque me

güeybee me leñ baa, per biend zhow sac nixguies zho. Nroob dimi bdeed zho lo grë men^guiib co, ¹⁴rëb zho:

—Peet tsienied guic to, niicle telⁿe gon gobernadora na no guionee lo me, zeena peet gund me to.

¹⁵Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina leñ dze co, masaque bliladz zho nli sca goca, jni haxta lo nadze sca zienie guic zho!

¹⁶Zeene bdzin dze ne gdzieelo Jesús xpëedscuel me nëz Galilé, brie zga tsiiptib zha ne bzo gaxpaa lo me ga, güey zho nëz co; bdzin zho guic gui ne rëble me ga gdzieelo me zho. ¹⁷Zeene gon zho me pquitsgzhìb zho liu.

Lo grë zha ne ndxie ga, no zho rien^paa lëe me ga, nogaa zha ne bii racchop guic. ¹⁸Dzigo wbig me lo zho, rëb me:

—Laa to gon^le nasca naa rnabey. Grëse ncuane no gbaaw, nogaa guidzliuw, ladznia naa psan Pxo^z naaw. ¹⁹Niina nagon, laa naa rsan diidz lo to: goltsie dipse lo guidzliu, goltsieseed miech gac zho zha ne sëeb xnëz naa, golchoobnis zho, golguiab lo zho lëe min co rnabey Pxo^z naa, rnabey naa ne nac Xpëed me, ni rnabeygaa Espíritu Sant. ²⁰Golseed zho gban zho, grëse mine bnabey naa to gun to. Min co rsan naa diidz lo to gun to; ni gacnan to gan^le, ib csaand naa to, gzataa dzew niicle haxta dze ne nitlo guidzliuw, naa gacnie to.

XTIIDZ NDZON DIOS MIÑE PQUIAA MARCW

¹ Nu ganle laa naa csilo gzodiidz naa, miñe been Jesús, Men ne bneelee Dios cxeel me lo guidzliu.

² Lo guits ne pquiaa Isá, tib men ne biadteed xtiidz Dios padzeela, lo co zhubnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhubnee lo guits co:

Sxel naa tib zha ne tedner lo luu,
zeena zha co gzhixcuaa nēz ne ted luu.

³ Dan tso zho,

zon miech zeene laa tsi zho zēēb gnee zho:

“Golzhixcuaa nēz ne ted men ne rnabey,
golsaan grē guiełntseeb ne ruł to.”

⁴ Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquiełntseeb zho gbig zho lo Dios, ni chobnis zho, zeena csilaa Dios zho lo grētaa xtoł zho. ⁵ Dzigo rrieē miech grē guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobdol zho grē xtoł zho, dzigo rchoobnis me zho leł guıubee Jordán.

⁶ Guits lad camell niaa xab me, ncuaañe rzhidoo leł me guid niaaw ni niapse nguzhanch ni dzin dan row me. ⁷ Zeene rseed me grē miech co, rnee me lo zho:

—Iraa ziaad men ne mazdraa non lo naa. Teł naa peet nond naa, tib guiełnzaac nroob ga ygaa naa telne niaca miñe grieelo maase lab me glit naa; per na ni miñ co rdziñd naa. ⁸ Laa naa rchoobnis to niina con nis; sañgue me con Espıritu Sant cchoobnis me to.

Brobnis Jesús

(Mt. 3:13-17; 4:1-17; Lc. 3:21-22; 4:1-15)

⁹ Leł ngbidz coquew, laa Jesús brieē guiedz Nazaret xtan zha Galilé, güey me pchoobnis Juan me leł guıubee Jordán. ¹⁰ Laa me norieedze lo nis, zeene goñ me laa zhan gbaa bzhial, laa men ne nac Espıritu Sant biet gbaa zig tib palom laa me ziad-zēēb guic me. ¹¹ Ni lēētaque zēēb tib tsi men co gbaa, rnee me:

—Xin, rleynie naa luu goñ, nziuu luu lo naa.

¹² Zeene blozh brobnis me, dzigo güeynie Espıritu Sant me tib dan ngan, zaatne no grē ma ntseeb; ¹³ bio me ga choo ngbidz. Ga no me güey Satanás (ma ne rnabey lo grēse mendox), gocladz ma niungüet ma me.

Bdedse ga, güey grē xanjł Dios güeygan zho me.

¹⁴ Leł ngbidz co bnabey Herod bio Juan ladzguıib. Ladzguıible no Juan zeene brieē Jesús güeyted me grē guiedz ne ngab Galilé güeyseed me miech Xtiidz Ndzon Dios, ¹⁵ rnee me lo zho:

—Laa dze ne gnabey Dios ziaadgaxle, laaw bdziñ dzele. ¡Golsaan grē xquiełntseeb to, gołnab perdon lo Dios; dib zdoō to gołlıladz Xtiidz me!

Tap zha ne quia gooz mel

(Mt. 4:18-22; Lc. 5:1-11)

¹⁶ Tib dze zieded Jesús ro Nisdoo ne lē Galilé, goñ me laa Simón grop Ndrés quia gooz mel lo nis co; sac ible dziin co nac xtsiñ zho. Grop bets zho laa zho noroñ guix ne rgaa mel lo nis. ¹⁷ Dzigo bredz me zho, rēb me lo zho:

—¡Goltë, goltëna! zhits naa! ¡Laa naa cxel to tsie to stib gooz, tsietop to grë miech ne sëëb xnëz Dios!

¹⁸ Horcogazh psan zho guiox ne rnaaz zho mel ga, laa zho zienal zhits me.

¹⁹ Zhisaque bzë Jesús ro nis co, gon me laa Jacob ni Juan no tib len barcw noquiaabdie zho guiox ne rnaaz zho mel, lëë grop xingan Zebedé ga; ²⁰ dzigo bredz me zho. Zigne bredz me zho, zoque Zebedé lo barcw ga grë xmoz Zebedé, laa zho zienal zhits me.

Tib mgui ne nosacsi mendox.

(Lc. 4:31-37)

²¹ Laa zho bdziñ guiedz ne lë Capernaum. Zeene gol dze ne rdziiladz zho lo dziin nëz Israel, güey Jesús yadoo win ne zob lad guiedz co güeyseed me miech. ²² Grë miech ne ndxie len yadoo ga, rzee zdoo zho ran zho zha rnee me, sac rlu men rnabey nac me; led yed me rseed zigne rseed grë zha ne nac maistr ley.

²³ Lad grë miech co no tib mgui ne nosacsi mendox, tibaque zeene nguiedz pcooptsie ma mgui, ²⁴ rnee ma:

—¿Pe gon luu no Jesús Nazaren? ¿Ziaad luu lëë par gnitlo luu no? Runbey naa luu, tib men peet xtold nac luu ni Dios pxeel luu.

²⁵ Dzigo goctox Jesús lo ma, rëb me:

—¡Psoog ro luu! ¡Na zeena psaan men qui!

²⁶ Horco masaque beencxidz ma mgui co, ni rquiaadan ma redz laa ma psaan mgui. ²⁷ Grëse miech ne ndxie ga, bzee zdoo zho rnabdiidzlsa zho rnee zho:

—¿Bay cho nac men qui? ¡Wseed cub i gon ziaadnie me! ¡Rlu zha rnabey nac me, zha haxta mendox rdzieb zeene ractox me lo ma!

²⁸ Znuse brieets bliaal diidz zha beenguiac Jesús mgui co; grëse guiedz ne ngab Galilé gocnañ miecha.

Biac xniadzoop Simón Pedr

(Mt. 8:14-17; Lc. 4:38-41)

²⁹ Ga brieë Jesús güey me lidz Simón grop Ndrés gza me Jacob ni Juan.

³⁰ Bdziñ zho, lëëtaque laa xniadzoop Simón nix rlan xlëë, nacne rëb zhow lo me. ³¹ Dzigo bded me zaatne nix zhuz co, bzhen me nia me, blische me me. Horcogazh laa zhixlëë me blëz, guche me ga psilo me beenlo ncuane dow zho.

³² Ziedzele dzew, laa ngbidz rzëëblew, zeene psilo grë miech co zo zo rdziñnie zho grë men rzacnë, grë zha ne nosacsi mendox ne; bioogse ro yu co ndxie miech. ³³ Zootle zig grëse miech ne no lad guiedz co pcaalsa ga.

³⁴ Ndal grë men rzacnë co zhaase zhaase guielguidz ne rzac zho, per beenguiac Jesús zho; zha ne nosacsi mendox, beencxoon me grë mendox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

Pseed Jesús miech Galilé

(Lc. 4:42-44)

³⁵ Silgaw, scase bii ncow rnaw guche Jesús brieë me lad guiedz co, güey me zaatne guiendraa miech, güeyzodiidznie me Dios. ³⁶ Zeene rnit me choot guien; dzigo brieë Simón ni zla zha ne nacgza Simón güeyguib zho me.

³⁷ Zeene bdziel me, rëbcha zho lo me laa grë miech co quiguible me.

³⁸ Dzigo pquiab me rëb me lo zho:

—¡Sca ye! Per ib laa ne none goñ guio grëraa guiedz ne ndxie dib gax nu, zeena ye grë guiedz qui gnee naa Xtíidz Dios lo miech; sac ible miñ co pxeel me naa ziañ naa lo guidzliu.

³⁹ Dzigo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtíidz Dios, ni ruñcxoon me grë meñdoox ne nosacsi miech.

Biac tib mgui ne rlan lepr
(Mt. 8:1-4; Lc. 5:12-16)

⁴⁰ Tib vuilt, wbig tib mgui ne rlan guiedzdox ne lë lepr lo Jesús (masaque riaañ dipse guid lad mgui), pquitsgzhíb mgui lo me, rëb mgui:

—Tebaa siguieel luu gunguiac luu naa.

⁴¹ Pquia zdoo Jesús mgui, pxobnia me guic mgui rëb me:

—Zunguiac naa luu. ¡Niinagazh laa luu guiaanmbel!

⁴² Zigne sca bnee me laa mgui co biac, mbese biaan xcuerp mgui. ⁴³ Blozh ga bzonëz me mgui, ni pso me diidz lo mgui ⁴⁴ rëb me:

—Bina ganle, choot lo gzodiidzd luu goñ zha biac luu. Bzë, güey lo pxoz, güeyсан gon ne rnabey xley Moisés gdeed luu; zeena gan zho ganle laa luu biacle.

⁴⁵ Ni zigne briece mgui ga, psilo mgui grë lo miech bzodiidz mgui zha biac mgui. Grëse miech gocnana, nacne brieelodraa nenlo ndziñ Jesús grë lad guiedz co. Mine been me, blëz me zaatne choot miech guiend; per niicle scaw, miech guizhiu ne rriece grë guiedz co rdziñ lo me.

2

Biac tib meñ ne gutoo
(Mt. 9:1-8; Lc. 5:17-26)

¹ Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu, ² miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtíidz Dios.

³ Laa grë miech co ndxie ga, zeene bdziñ tap zha bgui ney zho stib meñ bgui, zhoobse me lo yag, ib gacd së me sac dipse me gutoo. ⁴ Ni ne scataa miech guizhiu ne ndxie, gacd ted zho nëz ro yu gdziñnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho meñ co dib yag ne zhoob me ga. ⁵ Zeene goñ Jesús ne nli dib zdoo zho rililadz zho me gunguiac meñ rzacné co, dzigo rëbchaa me lo meñ co:

—Xin, niinagazh laa naa gun perdon grëse xtoñ luu.

⁶ Blalaa zha ne nac maistr ley zob ga, zeene bin zho sca rëb me lo meñ rzacné co, bzachaa zdoo zho: ⁷ “¡Lëda i goñ squi rnee meñ qui! Quiaguitnie me Dios i squi rzë xtiidz me. ¡Tibaque meñ ne ruñ perdon xtoñ miech, ni lëe meñ co nac Dios!”

⁸ Bienga Jesús sca rza zdoo zho, dzigo rëbchaa me:

—¿Pe nacne rlëe to ron to mine rne naa? ⁹ Parga nli, cholze zha ne zac guiab: “Laa naa gun perdon grëse xtoñ luu.” ¹⁰ Per laa naa glu lo to ganle, naa ne nac naa Meñ ne pxeel Dios ziañ naa lo guidzliu, ible naa no gun miech perdon.

Dzigo bnee me lo meñ rzacné co, rëb me:

¹¹ —¡Guche i, bi yag ne bzhoob luu i, zeen bzë!

¹² Zigne sca bnee me laa mgui co bzoli, blis me yag co, grop lo grë miech co goñ zho laa me briece ga, laa me zey. Grëse zho rzee zdoo zho, rleynie zho Dios rnee zho:

—¡Nasi laa ne nodziñ ncuanea gard dziñ ne!

*Bredz Jesús Leví**(Mt. 9:9-13; Lc. 5:27-32)*

¹³ Blozh ga, laa Jesús brieë ga laa me zie nëz ro nisdoo stib; nzian miech ne pcaalsa lo me ga, dzigo pseed me zho.

¹⁴ Ro nis co ziezë me goñ me Leví,ingan Alfé, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

¹⁵ Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh bzobnie me zho grë xpëëdsuel me; sac ndal grë zha co zienal zhits me.

¹⁶ Blalaa maistr ley ne nacgrë zha farisé, goñ zho sca tipse noyownie Jesús grë zha co; bded ga, rëbchaa zho lo xpëëdsuel me:

—¡Mod sca na rownie xmaistr to grë zha ngoopdo!, grë zha beed ne nac recaudador!

¹⁷ Dzigo rëbchaa Jesús lo zho:

—Nanle to ganle, men ne run rmed, zaatne no zha ne rzacné, ga rquiin zho, ¿niacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdo!.

*¿Pe nacne rcuand xpëëdsuel Jesús?**(Mt. 9:14-17; Lc. 5:33-39)*

¹⁸ Lëëtaaque dze co nocuan xpëëdsuel Juan Bautist, grë zho zha farisé. Dzigo bdziñ bla zha ne bnaabdiidz lo Jesús, rëb zho:

—¿Pe nac waa ib rcuand xpëëdsuel luu? Zha grë xpëëdsuel Juan Bautist ni grë zha farisé, rcuan zho.

¹⁹ Pquiab Jesús, rëb me:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielné, ycuan zho ni ran zho laa mguí ne notsieelnia mban?

²⁰ Per zdziñ dze zeene laa mguí co gbiche; ni zeene laa dze co gdziñ, dzigosi nagon rieguial tso zho guielné, rieguial ycuan zho.

²¹ Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca guñ paat yquind wquiaabdie co. Zeene laa lar cub gbe, lëëque lëew gunnat zaatne nriez lar gox. ²² Scaque tsod zha ne cotsow vin cub tib len guid ne padzeelale noquín, sac stsiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

*Ttop xpëëdsuel Jesús mzion zhobxtil**(Mt. 12:1-8; Lc. 6:1-5)*

²³ Tib dze ne rdziiladz zho lo dziin nëz Israel, bdednie Jesús xpëëdsuel me zaatne zëëb zhobxtil, dzigo zigse zieded zho pchoo zho palal mzion zhobxtil co. ²⁴ Goñ zha farisew, dzigo rëbchaa zho:

—¡Lëda i goñ noyun to! ¡Golguien ganle dze nda nac dze rii!

²⁵ Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho? ²⁶ Rneew, bzëëb me len yadoo güey nab me guietxtil ne nac goñ, downie me grë zha ne ziegza me ga, ni loxaque zha ne nacse pxoz row guietxtil co. Len iz co nac men ne lë Abiatar pxoz nroob. ²⁷ Golgacnan sca ganle, biaand dze rii par csacsi miech xcuerp zho, sinque ne rleynie Dios miech gane psan mew. ²⁸ Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac mine nonguiel gac.

3

Biac tib mgui ne mband tib nia
(Mt. 12:9-14; Lc. 6:6-11)

¹ Goḷ stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia.

² Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me. ³ Dzigo bredz me mgui co, bnabey me bzo mgui groltaa lo grë zha ne ndxie ga; ⁴ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuanea yquin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd. ⁵ Dze bui me lo zho grëse zho, wbinladz guic me, ni mban goc zdoo me gon me scataa ntseeb zdoo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

⁶ Grë zha farisé, ni grë zha ne nacie rey Herod, zigne briece zho ga laa zho psilo bnediidz dien zha gdeeda diidz gut zho Jesús.

⁷ Len dze co, tib vult bdzin Jesús ro nisdoo grë xpëëdsuel me. Miech guizhiu ne naḷ zhits zho, ga zie grë zha ne ziaad nëz Galilé, grë zha ne ziaad nëz Judé, ⁸ grë zha Jerusalén, grë zha ne ziaad nëz Idumé, grë zha no dib nëz dan ro guiubee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

⁹ Dzigo bnabey Jesús xpëëdsuel me, yguib zho tib len barcw zaatne gac so me zeena ctaagwd grë miech co me. ¹⁰ Zëëble diidz ndal miech ziyunguiac me, dzigo grëse zha ne rlan pe guielguidz, rbigbe zho dien zha grieelo maase lad xab me xen zho.

¹¹ Grë menox ne noguitnie miech, zeene ran ma me, runquitsgzhil ma zha ne noguitnie ma lo me ni rquiaadan ma redz rnee ma:

—¡Xpëëd Dios nac luu!

¹² Per ractox me lo ma, rsaand me gnee ma parne xoobnenḍ cho nac me.

Ble Jesús gza tsiipchop xpëëdsuel me
(Mt. 10:1-4; Lc. 6:12-16)

¹³ Blozh ga biepe me tib guic gui win zob ga, ga bredz me zha ne gocladzse me. Zeene pcaalsa zho grë zho, ¹⁴ dzigo lad co ble me tsiipchop zha ne sènie me, zha ne cxeel me tsieseed miech Xtiiidz Dios. Lëë zha co bleelë me poxtl, ¹⁵ ni bdeed me poder lo zho gunxoon zho menox.

¹⁶⁻¹⁹ Znu lë gza tsiipchop zha ne ble me ga:

Simón (lëë Simón co bleelë me Pedr),

Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

*Rëb zho mendox nacie Jesús**(Mt. 12:22-32, 46-50; Lc. 8:19-21; 11:14-23; 12:10)*

²⁰ Wbire Jesús ga, laa me bdziñ ro yu grë me zho. Scaaque ndal miech ne pcaalsa ga tib, ni rdeetew diidz gownie me zho. ²¹ Zeene bin menlidz mew, dzigo brieë zho ziexi zho me, sac rëb zho bod rzhinle guic me.

²² Haxta grë maistr ley, zha ne brieë nëz Jerusalén bdziñ ga, rnee zho:

—Beelzebú, ma ne rnabey lo mendox, ma co nacie me gane rrieelo runcxoon me mendox.

²³ Dzigo bredz me zho bzodiidz me tib cuent lo zho, rëb me:

—¿Pa nan to na grielo lëëque mendox gunxoon samendox ma? ²⁴ Tel tib guiedz nadien gac miech chop dii, csilo zho tillsa zho, ¿niacxe nitlod guiedz co? ²⁵ Tib diigaa miecha, tel csilo zho lëëque zha tilnie menlidz zho, ¿niacxe nitlod zho? ²⁶ Scaquegaa mendox nagon, telne lëëque lëë ma tilnie samendox ma, ¿pe nale na bnitlo ma! ²⁷ Masaque nac mendox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho.

²⁸ 'Gneli naa lo to ganle, grëse dol ne run miech, grë tel zha rgueie zho, rdzibdee zho, bii zun Dios zho perdon min co; ²⁹ sangue zha ne gneenë Espiritu Sant, dol nroob ga run zho, gdziñd dze ne gun Dios zho perdon.

³⁰ Sca rëb me lo zho, sac sca quianee zho rëb zho mendox nacie me.

³¹ Horco laa xniaa me ni zha bets me bdziñ, per leyse blëz zho; dzigo pxeel zho zha ne zietsedz me. ³² Blalaa zha ne zob gaxpaa lo me, zha co been vis rëb zho:

—Laa xniaa luu gon, ni zha bets luu ziaadguib luu.

³³ Pquiab me rëb me:

—¿Xnia naa ye, bets naa ye?

³⁴ Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa. ³⁵ Sac grëse zha ne run mine racladz Dios, lëë bets naa ga, lëë bzian naa ga, lëë xnia naa ga.

4*Xcuent zha ne güey gon**(Mt. 13:1-23; Lc. 8:4-15)*

¹ Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacie güeytsep me tib len barcw ne zo ro nis co, ga bzob me laa grë miech co bre tib ro nis. ² Ndal grë ncuane pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

³ —¡Golquiaadiaga ganle! Tib mgui name, brieë me güey me gon zhoxtil.

⁴ Zeene laa me quialaal zhob co, mine bliaal gax ro nëz; znuse güey grë mguin güeytow maw. ⁵ Laa mine bliaal zaatne nac lo quie, znuse znuse blana; ⁶ per zeene laa lo ngbidz brieë, znusaque bgoola blozh ga bidzgaw; sac guiend nroob low. ⁷ Laa mine bliaal zaatne nac len yag guiets, zeene laa grë yag guiets co broob znuse bnitlo yag guietsa, pasëw niac. ⁸ Sangue grë mine bliaal zaatne nac lo liu naal, blana, brooba ni goca; lo tib tib zhob co no mzion co brieë galptsii zhob, now brieë tsongala, nogaaw brieë haxta tib gayoow.

⁹ Blozh ga, rëbchaa me lo zho:

—Zha ne racladz guiend mine rne naa, yquiaadiag zhow.

¹⁰ Zeene laa grë miech co zey, laa gza tsiipchop xpëedsuel me, ni zla zha ne rzënie me, laa zho bnabdiidz lo me dien zha nac cuent co. ¹¹ Dzigo rëbchaa me lo zho:

—Tel to, Dioszhal rlu lo to zha rnabey me, niicle ncuaaṇe mazdraa nguetsa; laa lo grēraa miech ne gard gbig lo me niapse con cuent rzodiidz naaw lo zho parne guien zhow. ¹² Per niicle scaw, nzhal diag zho ron zho, per peet riend zho; nzhal lo zho rwi zho, per peet ranḍ zho; ib nēd zho gbig zho lo Dios, gnab zho guṇ me zho perdon.

¹³ Nana to, telne biende to zha nac cuent co, ¿zha guien to grēraa miṇe gne naa dzigo? Golquiaadiaga ganle, znu gon naca: ¹⁴ Mgui ne güeylaal zhub ga, rriequia lēē zha ne rienee Xtiidz Dios lo miech ga, laa zhubxtil co nac Xtiidz Dios. ¹⁵ No miech nac zig nac ro nēz ne blialal palal zhub co: rquiaadiag zho Xtiidz Dios, rlozh ga lēēlēd rdziṇ mendox rquuil ma zho, rsaanga zhow. ¹⁶ Nogaa zho nac zigne nac lo quie co: zeēṇe rquiaadiag zho Xtiidz Dios, ine rley zho rcaania zhow, ¹⁷ per led dib zdood zho rcaania zhow; gane zeēṇe laa miech rsilo rlēē lo zho, laa miech rtsidil zho porne rliladz zhow, rsaanga zhow. ¹⁸ Zzhisгаа zho nac zigne nac len yag guiets co: nli rquiaadiag zho Xtiidz Dios, ¹⁹ per rsilo zho lel grē ncuaaṇe no lo guidzliu rii mazdraa rionie guic zho, rquidie grē dimi zho, rzoobladz zho yquianie zho grēse ncuaaṇe racladz zho. Grē ncuaaṇ co rioxcoraa zho, laa ne tsonie Xtiidz Dios guic zho, miṇ co rquiaqui ib rund zho miṇe rnabey me. ²⁰ Laa nogaa zho nac zigne nac liu naal co: rquiaadiag zho Xtiidz Dios, dib zdoos zho rliladz zhow, ni rban zhow zigne naca. Grē zha co, no zho nac zig mzion ne brieē galptsii zhub ga, no zho nac zig miṇe brieē tsonḡala, nogaa zho nac zig miṇe brieē tib gayoow ga.

Xcuent biini ni midz moxtaz

(Mt. 13:31-32, 34-35; Lc. 8:16-18; 13:18-19)

²¹ Blozh ga, biire pcaalsa miech lo me, dzigo rēb me lo zho:

—¿Pa dien rquini biini? ¿Pe rquiaguiv par tsolana tib len guin o soogaaw tib zhan lon? Led zeēṇe rquiaguiv lēē, zaatne griello gziiniw ga rzoob zhow. ²² Scaque nagon grēse ncuaaṇe rac nguetsa, grēse ncuaaṇe rnee miech zhliana, ib none xobneṇa.

²³ Telne racladz to guien to miṇe rne naa, golquiaadiaga; ²⁴ ni zigne ron tow scagaa goltsoxco golḡuna. Telne tsoxco to guṇ tow, scagaa ziogicraa tow. ²⁵ Sac zha ne tsoxcow, zdeedraa Dios guielbiini lo zho; saṅue zha ne tsoxcoda, haxta tel palalse guielbiini ne bdeed me lo zho stiche mew.

²⁶ Ni rēb me lo zho:

—Znu gon nac zha ne ngab lo Dios; nac zho zig bni ne ran miech. ²⁷ Zha ne rielaal bni co, liu rcow, liu riini, laa zho raaguies, laa zho riebe. Sca sca laa dze zie, laa bni co ratslo, laaw rlan, laaw rroob, per riend zho zha nacne laaw rroob.

²⁸ Zhal guidzliu rdeeda guielnzaac co, guizh nac zhub co zeēṇe rlana, rac palal dzew laaw rlan mzion. ²⁹ Laa zeēṇe laaw ral, dzigo laa zho rietiitsa, sac laa dze bdzinle ne laaw tsas.

³⁰ ¿Zha ganle gni naa lo to zeēṇa guien to zha nac xquielrnabey Dios? —rēb Jesús—. ¿Pa tib cuent ganle gzodiidz naa lo to zeēṇa guien to zha naca? ³¹ Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win, ³² ni tel gacbniv, rrooba, ni lēēw rroobraa lo grē guizh ne ran zho ro yu, haxta grē nguiv riezaa zhiptsieez ma low sacne ncala.

³³ Nzian grē cuent rii pquini me par cseed me grē miech co, ni laa me bnee miṇe rgobey me guien zho. ³⁴ Niapse sca rseed me zho, laa zha ne nac xpēēdscuel me, zeēṇe zhasew rnee mew lo zho zigne naca.

Pcuēz Jesús tib medox

(Mt. 8:23-27; Lc. 8:22-25)

35 Zeene bdze dze co, rguetsle liuw rëbchaa me lo xpëëdsuel me:

—Golgotsaa dieedquia ne stib nëz lo nis rii.

36 Blozhse bnee me lo grë miech co, laa zho biep leñ barcw ne zob me ga grë me zho, laa zho zie. Ye blalaa barcw ne zob lo nis co zienał.

37 Laa zho zie, tibaque zeene laa tib medox psilo brieë, masaque rlis me lo nis co; zeene riasoli low riechoona leñ barcw, laa barcw psilo noyodzële nis.

38 Dzigo güey zho güeycuaan zho Jesús, sac lëëtaque laa me nixguies nëz zhan barcw ncoogse me tib lmad.

—jMaestro! —rëb zho—. Bui ganle, ¿pe znuse csaan luu nitlo ne nu?

39 Dzigo guche Jesús, bnee me lo me co, bnee me lo nis co, rëb me:

—jLëëw ga na! jGolcuedze!

Zigne sca bnee me, laa me co blëz, niicle nis cow laaw bredze. 40 Dzigo rëbchaa me lo zho:

—¿Pe nacne squitaa rdzieb to? jGardaque dzigo lëë gliladz to cho nac naa!

41 Rieñdraa zho zha guñ zho lo dzeb co, ni rnabdiidzlsa zho rnee zho:

—¿Bay cho nac me, zha nacne haxta me, haxta nisdoo ron xtiidz me?

5

Men Gadar ne nosacsi mendox

(Mt. 8:28-34; Lc. 8:26-39)

1 Bdzin Jesús nëz dan ro nisdoo co gza xpëëdsuel me, ga nac xtan zha Gadar.

2 Laa me bieldze leñ barcw, zeene laa tib mgui ne nosacsi mendox bdzin lo me. Leñ baa brieë mgui co bdzin me ga, 3-4 sac leñ baa nac zaatne rbëz me. Miech ne lëbd zho low, nzian vuelt ziezoob zho caden nia me, ni me ne, per znuse rchug mew, rzhooŋga me. jChoot rlëbd lo me! 5 Dze, guieel quianzë me grë dan co, rietso me grë leñ baa. Roptsiëdan me, ni lëëque me rzheñ quie rchug me guidlad me. 6 Laa dze co, zitraa goñ me Jesús, rias me bdzin me pquitsgzhib me lo Jesús. 7-8 Dzigo goctox Jesús lo mendox ne noguitnie me, rëb Jesús:

—jMendox, psaan men qui!

Horco pcooptsiëdan mendox co mgui co, ni rnee ma lo Jesús:

—¿Pe guñ luu naa Jesús? Ruñbey naa luu, Xpëëd Dios ne no gbaa nac luu. jNe nlipagaa been guiełnzaac csacsid luu naa!

9 Dzigo bnabdiidz Jesús lo ma dien cho lë ma. Pquiab ma rëb ma:

—Legion lë no, sac nzian nac no.

10 Rnab grë mendox co lo Jesús, gzonëzd me ma zit. 11 Gaxaque zhan gui co ndxie tib dzoon nguts noyow, 12 dzigo bnab ma lo Jesús, rëb ma:

—Bzhiguiel lose grë nguts qui bzonëz no.

13 Bdeed Jesús diidz. Dzigo laa grë mendox co psaan mgui co, laa ma zie bzëëb ma zdoon grë nguts ne ndxie ga; psilo grë nguts co rquiaa ma corr güeypix ma glaa tib ro yee ne quia ro nisdoo co, bliaał ma haxta lo nis. Ga biep ma nis, grëse ma gut. Rgaa ma zig chop mil.

14 Zha ne quianap grë nguts co, gzase zho bzhoon güeyzodiidz zhow lad guiedz, ni grëraa yu ne zob gax ga. Brieë grë miech co, zieso zho. 15 Zeene bdzin zho, per nli bdzieb zho, sac goñ zho laa mgui ne sca bdziitnie mendox ga zobse lo Jesús, laa mgui nacwxable, rlu ndzinlile nac guic mgui. 16 Psilo grë zha ne goñ zha biac mgui co, ni zha goc grë nguts co, psilo zho rzodiidz zhow lo grë zha ne bdzin ga. 17 Min co bin grë zha co, mazd bnab zho lo Jesús siguiel me gbi me xtan zho.

18 Zeene laa Jesús zie sëëb me len barcw, dzigo laa mgui co wbigaque lo me, nan mgui nziguiel me nienal mgui zhits me. 19 Per bdeete me diidz, rëb me:
—Wbire, güey güeyzodiidz lo grë menlidz luu ganle pa lotaa pquia zdoo Dios luu, zha nactaa milagr nroob ne been me beenguiac me luu.

20 Dzigo wbiere mgui. Güey mgui dib xtan zha Decápolis, güeyzodiidz mgui lo grë miech co zha beenguiac Jesús mgui. Grëse zha ne rona, rzee zdoo zho.

*Brieban xpëdwnaa tib men lë Jair
(Mt. 9:18-26; Lc. 8:40-56)*

21 Zeene laa Jesús biire brieequia stib nëz ro nisdoo co, miech guizhiu ne pcaals lo me ga. 22 Ga zo me zeene laa tib men ne nacgrë zha ne rnabey yadoo lë Jair bdzin. Zigne bdzin me lo Jesús pquitsgzhib me, 23 rëb me:

—Been tib guielnzaac gotsaa guio ne gunguiac luu xpëed naa. Laa win rlozhle; nanpaa naa telne cxobnia luu guic win, ziac win.

24 Dzigo laa Jesús zie nëz lidz men co. Ndal miech ne zienal zhits me, haxta rtaagw zho me. 25 Lad grë miech co zienal tib wnaa, gocle tsiipchop iz rlan me tib guielguidz, rzac me zigne rzac men wnaa gzob mëë, tibaque rlan mew ib rbëzda. 26 Nzianle lo men ne run rmed ziye me, grëse ncuane rap me bloozh me lo rmed; per laa ne cuëz guielguidz co, lel znu rzhizhooraaw. 27-28 Ziyonle me grë milagr ne run Jesús. Bza zdoo me rëb me: “Totsaque ygaa maase lad lar ne mbix me xeen naa, ziacle naa.” Dzigo bded me lad grë miech co, wbig gax me nëz zhits Jesús, bzhen me lad lar ne mbix Jesús. 29 Nligaa hor cogazh laa guielguidz co blëz, bien me laa me biac.

30 Zeene bien Jesús ne laa me beenguiac wnaa co, dzigo ptsire lo me rwi me lo grë miech co, rëb me lo zho:

—¿Cho ga bzhen lad xab naa?

31 Rëbchaa xpëedscuel me:

—¿Zha nan luu glu dien cho bzhen lad xab luu, ni squitaa ndaagw ziaad luu lad grë miech qui?

32 Per laa me rwi lo grë miech co dien chow. 33 Nanpaa wnaa co ne me ga, rdzieb me, rzhidz me laa me wbig pquitsgzhib me lo Jesús bneeli me zha nacne sca been me. 34 Dzigo rëbchaa Jesús lo me:

—Xin, laa luu biac sacne bliladz luu naa. Bzë na, peet tsieniedraa guic luu, laa guielguidz co bichele.

35 Laa Jesús bii quaneeque, zeene laa bla zha ne ziaad nëz lidz Jair bdzin, rëb zho lo Jair:

—Csodziindraa luu lo men qui, laa xpëed luu gutle.

36 Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoo luu bliladz naa.

37 Psaandraa me cho grë miech co nienal zhits me, loxaque Pedr, Jacob ni Juan bets Jacob; zha cose zienie me.

38 Zeene bdzin zho lidz men co, tib ruid ne rac, nguiedz zëëb tsi zho roon zho no zho xquielnë mëëd co. 39 Dzigo bzëëb Jesús len yu, rëb me lo zho:

—¿Pe nacne squitaa roon to? Goonde to, gon led gute ndzoop win rii, nixguies ndzoop.

40 Lele rzhidznie grë miech co me, bin zho sca rëb me. Dzigo bnabey me brieë zho ley grëse zho, loxaque pxoz mëëd co, xniala win ni gza tson xpëedscuel me zha ne nal zhits me ga bzëëbnie me len yu ne nix win. 41 Wbig me bzhen me nia win, rëb me lo win:

—¡Guche i na, ndzoop yeen! (Talita, cumi.)

⁴² Zigne sca bnee me laa mëed co guche, laa win bzë. Tib mëed tsiipchop iza. Grëse miech co per nli rzee zdoo zho. ⁴³ Dzigo pso me diidz lo zho choot lo gneed zhow; blozh ga bnabey me bdeed zho ncuaa_{ne} dow mëed co.

6

Güey Jesús ladz me

(Mt. 13:53-58; Lc. 4:16-30)

¹ Ga brieë Jesús grë xpëëds_{cuel} me, laa me bdzi_n Nazaret zaatne nac ladz me.

² Laa zeene go_l dze ne rdziiladz zho lo dziin, laa me bdzi_n le_n yadoo, psilo me pseed me grë miech co. Per nli rzee zdoo zho ron zho grë mi_{ne} rnee me, rnabdiidz_{lsa} zho rnee zho:

—¿Pazhe waa squitaa pseed me_n qui? ¿Zha nac guie_lbiini ne squitaa rap me i, ne rnee miech ndal grë milagr ne ru_n me? ³ Tib ngurëyagse name nac me. Led lëë xingan Mari i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib bee_ncasd zho me. ⁴ Zeene go_n me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni me_nlidz zho ni me_nladz zho nëd gu_nbey zho.

⁵ Brieelod niu_n me nzian milagr ga, blase zha rzac_{në} pxobnia me guic, be_nguiac me. ⁶ Bzee zdoo me go_n me scataa ndip zdoo zho, ib bliladz zho cho nac me.

Blozh ga mazd güey me grë guiedz ne ndxie gax ga, güeyseed me miech.

Pxeel Jesús xpëëds_{cuel} me tsieseed zho miech

(Mt. 10:5-15; Lc. 9:1-6)

⁷ Tib dze, bredz me gza tsiipchop xpëëds_{cuel} me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par gu_ncxoo_n zho me_ndox. ⁸ Pso me diidz lo zho güeyd zho pe yquiin zho nëz, lëë gdib tib lë yag ne gzoxca zho güey zho. Zig nac ncuaa_{ne} gow zho, zig nac dimi, pe tib bzuiudgaa, güeyd zhow. ⁹ Lab zho, mi_{ne} quia_{se} ni zho; xab zho, mi_{ne} nacwse zho mi_ncose tsienie zho. ¹⁰ Ni rëb me lo zho:

—Guiedz ne gdzi_n to, zha ne gneedz zaatne cuëz to, lidz zha co go_lcuëz haxta gdzi_n dze ne gbi to guiedz co. ¹¹ Laa zaatne ne ib gneedzd zho pa cuëz to, niicle nëdgaa zho yquiaadiag zho mi_{ne} gnee to, dzigo go_llit grë yudie co ni to, go_lrieegazh ga, zeena guie_n zho gan_{le} lëda ga bee_n zho.

¹² Dzigo laa zho brieë, laa zho zie. Güey zho, güeynee zho lo grë miech csaan zho xquie_lntseeb zho, gb_ig zho lo Dios. ¹³ Nzian zha ne nosacsi me_ndox, be_ncxoo_n zho me_ndox co; grë zha ne rzac_{në}, bdëëb zho nceit guic zho, be_nguiac zho zho.

Gut Juan Bautist

(Mt. 14:1-12; Lc. 9:7-9)

¹⁴ Bin rey Herod rzeet zho Jesús, sac te_l pa lotaaw zëëb diidz grëtaa milagr ne ru_n me. Grë miech co, no zho rzac brieëban Juan Bautist lëë me ga nac Jesús, gane ru_n me grëtaa milagr co; ¹⁵ nogaa zho rnee Líw, me_n ne biaad pteed Xtiidz Dios padzeela; zzhisgaa zho rnee, no cho stib me_n ne ziaad noteed Xtiidz Diosa, zig biaad grë zha ne biaad padzeela.

¹⁶ Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho ya_n me, per lëë me ga brieëban.

17-18 Sca rnee Herod sac rsoladz me zha been me Juan. Me bnabey bгаа Juan bio Juan ladzguiib, loxaque ne rnee Juan lo me nonguielda ga lëeque Herodí ptsieelnia me; sac tsieelpaa bets me Lip nac Herodí.

19 Blëënie wnaa ne nac Herodí ga Juan, rzac me tebaa zha gut me Juan; per rdeetew diidz, ²⁰ sac rdzieb Herod lega pe gun me Juan, rien me tib zha ne zienal mine nac diidzli, tib zha ne peet xtold nac Juan; dzigo ib rdeete me diidz pe gun wnaa co Juan. Niicle ne cadque zeene rnee Juan lo me, rio me zhgaf rienđ me dien zha gun me, per rdziladz me rquiaadiag me grë mine rnee Juan.

²¹ Laa tibtaa dze laa mine no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grë zha ne nacie me dziin, grë zha ne zo lo menguiib, ni grë zha non lo zha Galilé. ²²⁻²³ Laa zho no mezh noyow zho, zeene bzëëb xindzooop Herodí psilo ndzooop biee ndzooop. Bdziladz Herod gon me zha biee ndzooop, grë zha ne zob lo mezh ga ne. Dzigo rëb Herod lo ndzooop, tel petaa gnab ndzooop zdeed mew; haxta brieer ro me rëb me:

—Ncuaane gacladztaa luu gnab luu, niicle zig grol grë ncuaane rap naaw, nedz naaw.

²⁴ Rias ndzooop güeynabdiidz ndzooop lo xniaa ndzooop. Dzigo rëbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

²⁵ Bdzin ndzooop lo Herod rëb ndzooop:

—Racladz naa xoob guic Juan Bautist tib len plat, gneedz luuw lo naa niinagazh.

²⁶ Zeene bin Herod sca rëb ndzooop, mbanse rac me; per rdeetraaw diidz niab me grieloda, sac grëse zha ne zobnie me ga, bin zho rëb me zdeed me ncuaane gnabtaa ndzooop. ²⁷ Dzigo racse me pxeel me tib menguiib ne tsiechug guic Juan.

²⁸ Güey menguiib co len ladzguiib pchug zho guic Juan. Bdzin zho, zhoobsew tib len plat bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

²⁹ Zeene bin xpëëdsuel Juana, dzigo güey zho güeylis zho me ga güeyqueets zho me.

*Bguiaan Jesús gaay mil miech
(Mt. 14:13-21; Lc. 9:10-17; Jn. 6:1-14)*

³⁰ Zeene laa gza xpëëdsuel Jesús bdzin lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdzin; haxta ni riobd gow me grë xpëëdsuel me. Dzigo rëb me lo zho:

³¹ —Mazd golgotsaa guio ne tib zaatne zitlaa lo grë miech rii, zeena grielo gdziiladz to niip.

³² Dzigo bzëëb me tib len barcw grë me zho, laa zho zie. ³³ Nzian zha ne gon zie me, beenbey zho ne mew. Dzigo ndal miech ne no grë guiedz gax co brieer, rias zho zie zho glole zho bdzin zaatne no gdzin me. ³⁴ Zeene biet me len barcw, gon me laa grë miech guizhiu co ndxiele ga. Pquia zdoo me zho gon me scataa ndxie zho zootle grë mëcwxiiil yeen ne guiend xbaxtor, dzigo psilo me nzian grë ncuaane pseed me zho.

³⁵⁻³⁶ Gol bdze dze co, wbig xpëëdsuel me lo me rëb zho:

—Mazd gudz lo grë miech qui guey zho na, zeena guiob tsie zho grë guiedz ne ndxie dib gax i, tsiesi zho ncuaane gow zho; sac gon laa dze bdzele, ni choot miech guiend nu.

³⁷ Pquiab me rëb me lo zho:

—To goldeed ncuaane gow zho.

Rëbchaa zho lo me:

—¿Pe zhizhe dimi ne yquiin gziuu guietxtil ne gow grëtaa miech qui?

³⁸ Dzigo bnabdiidz me lo zho, rëb me:

—¿Bla guietxtil ziaadnie to? ¡Golwi dien!

Zeene biire zho güeyso zho, rëbchaa zho lo me:

—Loxaque gaay guietxtil ziaad, ni ziaad chop mel.

³⁹ Dzigo bnabey me bzob grë miech co, wdzeepaaw bioogse lo guizh nguia ne zëeb ga ndxie zho. Tib dzoonga tib dzoonga zho bre, ⁴⁰ zaatne bre tib gayoo zho, zaatne breegaa groj gayoo zho.

⁴¹ Dzigo bzhen me gza gaay guietxtil co, ni grop mel co, blis lo me bui me nëz gbaa, bdeed me xquizh lo Dios. Blozh ga, beengroj me guietxtil co, zigse rdeed mew lo xpëedscuel me, scase scase noguiz zhow lo grë miech co. Scaque been me grop mel co. ⁴² Grëse miech co, dow zho haxta zaatne bieltaa zdoos zho. ⁴³⁻⁴⁴ Miech tafa, zha bguise rgaa zig gaay mil; ni zeene blozh dow zho, scase ncuaane nroob biaan, biodzë tsiipchop chicuid bio grë guietxtil co, bio grë mel co.

Rzë Jesús lo nisdoos

(Mt. 14:22-27, 34-36; Jn. 6:16-21)

⁴⁵ Zeene blozh ga, bnabey Jesús xpëedscuel me bzëeb zho len barcw, zeena zienerga zho tedquia zho stib nëz ro nis co, gdziñ zho guiedz ne lë Betsaid; laa me bii blëz ga, nozonëz me grë miech co. ⁴⁶ Blozhse bzonëz me zho, dzigo güey me tib guic gui zob gax ga, güeyzodiidznie me Dios.

⁴⁷ Zig rguets liuw, laa barcw ne zie xpëedscuel me ga no lo nis co. Laa me zo ga tipse me, ⁴⁸ ran me rlu ib gacd csëëniob zhow, sac rriee me rtsire mew. Merle guimbe liuw, tibaque zeene gon zho laa me bdziñ zaatne zie zho ga; tib lo nis co ziezë me, rac me zig nac zeene tibted me lo zho.

⁴⁹ Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¡Tib ndziin i gon ziaad i!

⁵⁰ Sac grëse zho ranlo zho laa me sca ziezë lo nis co. Dzigo bnee me lo zho rëb me:

—¡Gdziebde to, naa zial nu!

⁵¹ Zeene laa me bieper len barcw ne zie zho ga, laa me co blëz; dzigo mazdraa bzee zdoos zho. ⁵² ¡Per ib rienñ zho cho nac me, niicle ne gonle zho been me milagr nroob co bguiaan me miech guizhiu co!

⁵³ Zeene laa zho bdziñ stib nëz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga. ⁵⁴ Loxaque biet me len barcw laa grë miech co beenbeyle me. ⁵⁵ Rias zho güey zho grë guiedz co, güeynie zho diidz laa me bdziñ ga. Dzigo psilo grë miech co rxob zho zhimguidz zho lo yag, rdziñnie zho zho lo me zaatne rontaa zho no me. ⁵⁶ Zaatne gdziñtaa me, niicle guiedz nrooba, niicle guiedz lasa, rbee grë miech co zhimguidz zho rienie zho zho zaatne nac len guiedz; ga rnab zho lo me siguiel me maase ni lar ne mbixse me xen grë men rzacne co. Ni grëse zha ne rzhen xab me, riac zho.

7

Ncuaane runctal xtol miech
(Mt. 15:1-20)

¹ Tib dze, bdziñ bla zha farisé, ni zla maistr ley ne ziaad nēz Jerusalén, lo Jesús. ² Dzigo gon zho blalaa zha ne nac xpēēdscuel Jesús, zeene laa zho row rguibd zho nia zho zigne nacpaa grē zhiwseed xmengol zho.

³ (Nac zha farisé, ni grēsegaa zha Israel telne tsard nia zho zigne nac xcostumbr xmengol zho, ible rowd zho; sac zienaldox zho miñe nac costumbr.

⁴ Zeene rbire zho lo lgui, ib no mod ne riar nia zho dzigora zho row zho. Nzian grē wseed co psan xmengol zho zienal zho, zig nac zha riar grē tas, grē cant, grē xtsiñ rotie zho miñe niaa guib, ni grē lo bangw ne rzob zho row zho.)

⁵ Dzigo rēb zho lo Jesús:

—¿Pe nacne zienald xpēēdscuel luu miñe blu xmengol ne? ¿Pe nacne squize nia beed zho i row zho?

⁶ Pquiab Jesús rēb me lo zho:

—Nlipaa miñe bnee Isá, men ne biaad pteed Xtiidz Dios, zeene znu pquiaa me:

Grē miech rii, rquiaalose zho runnon zho naa, rond zho diidz gun zho miñe rnabey naa.

⁷ Paat rquiind riaad zho riaadgan zho naa; sac niapse guicle zho riab grē wseed ne quialu zho lo miech.

⁸ Sac tel to gon, nosaan to grē miñe rnabey Dios, lel grē xcostumbr miech zienal to.

⁹ Xcostumbr to nac miñe mazdraa rioxco to, laa miñe rnabey Dios quiasan to tib lad. ¹⁰ Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib miñe rnee: “Zha ne quie pxoz, quiegaa xniaa, ib none guet zho.” ¹¹ Laa to lel rnee to, zac gund miech xyudar xmengol zho, telne bloogone zho pe nac ncuaane rieguial gdeed zho lo me. ¹² Tole rdeete diidz ga gon zho xyudar pxoz zho, xyudar xniaa zho. ¹³ Tib ladle gon rsan to Xley Dios ga sca run to, lēēpaaze grē costumbr ne biaanñie to, ni quiasangaa to lo zha ne ziaadquia, miñ co noxcoraa to. Ni nzianraa grē falt ne squi quaiyun to.

¹⁴ Dzigo bnee me lo grēraa miech ne ndxie ga, rēb me lo zho:

—Golquiaadiag miñe gni naa lo to nu, ni goltsoxco guien to zha naca.

¹⁵⁻¹⁶ Golgacnan ganle: Grē ncuaane rdziñ zdo miech, led miñcod runctal xtol zho; sinque grē ncuaane ntseeb ne rza zdo zho, miñ co nac miñe runctal xtol zho.

¹⁷ Laa zeene laa me bdziñ ro yu grē xpēēdscuel me, dzigo bnabdiidz zho lo me dien zha nac diidz ne sca rēb me lo grē miech co. ¹⁸ Rēbchaa me lo zho:

—¿Pe niicle to riendaquew dzigo lēé? ¿Pe riende to, grē ncuaane row miech, led miñcod runctal xtol zho? ¹⁹ Sac grē ncuaane row zho rdziñda len zdoomban zho, zhaa zaatne rdziña. Grē guielwagw, len bziuud zdoose zho, len zhitripse zho rieteda, rlozh ga rriegaw xcuerp zho.

Ga blu me lo zho ganle, grēse ncuaane nac guielwagw lēda runctal xtol miech. ²⁰ Ni rēb me lo zho:

—Miñe rza zdoomban miech, miñ co nac miñe runctal xtol zho. ²¹ Sac zdoomban zho rza grē ncuaane ntseeb ne run zho, zig nac:

zeene rio zho grē zhgab yozh,

zeene run zho grē guelyozh,

zeene rban zho,

zeene rut zho samiech zho,

²² zeene rionie zho zha ne nacd tsieeld zho,

zeene rzoobladz zho ncuaane rap stib miech,

zeene run zho grē guelntseeb,

zeene rquidie zho,
 zeene rien zho run zho grë ncuaañe ndzinlid,
 zeene në rac zdoo zho ran zho cho zha ne stibnoded,
 zeene rzhixcuua zho diidzguizh,
 zeene racniats zho,
 zeene run zho grëraa ncuaañe paat rquiind.

²³ Grëse ncuaañe ntseeb rii, zdoomban miech rzaw, ni lëëw nac mine runctal xto! zho.

Biac xpëed tib wnaa zit
 (Mt. 15:21-28)

²⁴ Ga briee Jesús, laa me zie nëz Tiro. Zeene bdziñ me nëz co ga bdziel tib yu ne blëz me, gocladz me choot niacnañd ne laa me no ga; per brieloda, znuse bien diidza.

²⁵⁻²⁶ Zeene bin tib wnaa Sirofenis laa Jesús bdziñ ga, dzigo güey me, sac noguitnie mendox tib xpëed me. Zigne bdziñ me pquitsgzhib me lo Jesús, rnab me tsiegunxoon Jesús mendox co. Tib wnaa zit nac wnaa co; ²⁷ dzigo rëbchaa Jesús lo me:

—Blëz niip dien. None glo mëed gow, nonguielda cuee ne guiet nia mëed gedeed new lo mëcw.

²⁸ Pquiab wnaa co, rëb me:

—Nli scaw, zigne rnee luu i; per niicle mëcwa led rio ma zhan mezh rtop ma grë mine rrieengaa nia mëed.

²⁹ Dzigo rëbchaa Jesús:

—¡sqiwi nagon! Lëëgazha i rnee luu. Peet tsieniedraa guic luu naa sca; bzë, laa mendox ne nosacsi xpëed luu bichele.

³⁰ Laa wnaa co zey. Zeene bdziñ me lidz me, goñ me ñe laa xpëed me nixse lo lon, per laa mendox co psaanle win.

Biac tib men ne rcuaat

³¹ Ga briee Jesús, güeyted me nëz Sidón. Sidón briee me bdziñ me ro Nisdoos Galilé stib, zaatne nac xtan zha Decápolis. ³² Ga bdziñnie zho tib mgui lo me, rcuaat mgui ni nca rnee mgui; bñab zho lo me cxobnia me guic mgui gunguic me mgui.

³³ Dzigo bleee me mgui lad grë miech ne ndxie ga. Zitlaa güeynie me mgui, ga psëeb me mzhugnia me gropse leñ diag mgui ni bdëeb me zhinzuc me lo ludz mgui. ³⁴ Blozh ga, blis lo me bui me nëz gbaa, bneeladz zdoo me, dzigo rëb me:

—¡Bzhial! (¡Efata!)

³⁵ Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal. ³⁶ Dzigo pso Jesús diidz lo grë miech co, choot lo gzodiidzd zho zha biac mgui co.

Per laa ne rso me diidz lo zho, dzigole nëzrii, nëzrec rzodiidz zhow; ³⁷ sac rzeedox zdoo zho goñ zho mine been me ga.

—¡Ncuaañe gzee zdoo ne i been men qui! —ree zho—. Zha haxta nguaat, haxta ngop, runguic me.

8

Bguiaan Jesús tap mil miech
 (Mt. 15:32-39)

¹ Len dze co, miech guizhiu ne biire pcaalsa lo Jesús stib. Zeene goc tson ngbidza, guienndraa ncuaañe gow zho. Dzigo bredz me xpëedscuel me, rëb me lo zho:

²—Rquia zdoo naa grë miech rii, tsonle ngbidz ga rac blanso zho nu, ni na quianiedraa zho ncuaañe gow zho. ³Teñe squise zho gzonëz naa zho, glëbd zho, scow zho nëz, sac no zho zit brieë zho ziaad zho nu.

⁴Pquiab zho rëb zho:

—¿Pe pe yguiaan ne zho? ¿Pa guioxi ne guietxtil ne gow grëtaa miech qui dan rii, naca zaatne guieñd miech?

⁵Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew —rëb zho.

⁶Dzigo bnabey me grëse miech co bzob zho liu. Blozh ga bzhen me gza guietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpëëdsuel me rguiz zhow lo grë miech co. ⁷Zienie zho zla meñ las; bzhen me gza meñ co bdeed me xquizh lo Dios, blozh ga bnabeyaque me zho bdiiz zho ma.

⁸⁻⁹Grëse miech co, dow zho haxta zaatne bieltaa zho dzigo laa me bzonëz zho. Rгаа zho maase tap mil, ni zeene blozh dow zho bii bdop gadz chicuid mine biaan.

¹⁰Blozh ga, laa me bzëëb leñ barcw grë xpëëdsuel me, laa zho zie nëz xtan zha Dalmanut.

*Racladz zha farisé gan zho milagr
(Mt. 16:1-12; Lc. 12:54-56)*

¹¹Blalaa zha farisé ne no nëz co, zeene bin zho laa me bdziñ ladz zho, güey zho rzadraa ncuaañe rlisqui zho lo me. Rnab zho glu me cho nac me, rëb zho lo me:

—Racladz no dzianlo no guñ luu tib milagr, teñe nli gbaa ziaad luu.

¹²Zeene gon me sca rac zho, bio me guieñe; dzigo haxta bneeladz zdoo me, rëb me lo zho:

—¿Zha rnaraa milagr ne racladz to gan to? Gneli naa lo to ganle, ni stib milagr gon gandraa to.

¹³Blozhse sca rëb me lo zho, ndxieque zho ga laa me bzëëb leñ barcw laa me zie stib nëz ro nis co.

¹⁴Zeene brieë zho ga, zoladz xpëëdsuel me ney zho ncuaañe niow zho, lëe gdib tib guietxtil zienie zho leñ barcw. ¹⁵Laa zho zie, tibaque zeene rëb me lo zho:

—Golguieñ gon, napaa noyac-wet to lo zhincobi zha farisé, lo zhincobigaa rey Herod.

¹⁶Zeene bin zho sca rëb me, bza zdoo zho rnee zho:

—Ne gon me nagon ziaadnied ne guietxtil gane squi rnee me.

¹⁷Biëñ me sca rnee zho, dzigo rëbchaa me lo zho:

—¿Pe nacne rnee to ziaadniede to guietxtil? ¿Riende to lëe zha rne naa? Ndip nac zdoo to gane riende tow. ¹⁸¿Pa rquiin lo to, pa rquiin diag to ne laaw zob? ¹⁹¿Pe rsoladzde to zeene gaayaque guietxtil ni bgaaw bguian naa gaay mil miech? ¿Bla chicuid biodzë mine biaan hor co?

Pquiab zho rëb zho:

—Tsiipchopa.

²⁰Dzigo rëbchaa me:

—Zeene waa gadzaque guietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

²¹Dzigo rëb me lo zho:

—¿Pe niicle nana riendaque to pe rne naa?

Biac tib meñ ne rcow lo

²² Bdzin Jesús guiedz ne lë Betsaid, ga güeynie zho tib mgui ne rcow lo lo me, bñab zho cxobnia me guic mgui guñguiac me mgui. ²³ Dzigo bzheñ me nia mgui güeynie me mgui zaatne nacle ro guiedz co. Ga bdëëb me zhinzuc me len bziaalo mgui, ni pquiaania me zhits guidlo mgui; blozh ga bñabdiidz me lo mgui dien pe ranle mgui palal.

²⁴ Zeene laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

²⁵ Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuaañe ran mgui, niicle zitraaw niini ran mguiw.

²⁶ Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidzd mguiw lad guiedz.

Bnee Pedr cho nac Jesús

(Mt. 16:13-20; Lc. 9:18-21)

²⁷ Blozhse ga, laa Jesús briece ga grë xpëëdsuel me laa zho zie nëz Cesarea de Filipo, zieted zho grë guiedz las ne ndxie nëz co. Laa zho no nëz, tibaque zeene bñabdiidz me rëb me lo zho:

—¿Cho dien ron to rnee miech nac naa?

²⁸ Pquiaab zho, rëb zho:

—No zho rnee Juan Bautista, no zho rnee Líw, meñ ne biadteed xtiidz Dios padzeela; nogaa zho rnee no cho stib meñ ne ziadteed xtiidz Dios.

²⁹ Dzigo rëb me lo zho:

—¿To waa, cho rzac to nac naa?

Pquiaab Pedr, rëb Pedr lo me:

—¿Luu nac Meñ ne zëëble diidz ga cxeel Dios guiaad lo guidzliu!

³⁰ Dzigo pso me diidz lo zho choot lo gneed zhow.

Bzeet Jesús zha guñ miech me

(Mt. 16:21-28; Lc. 9:22-27)

³¹ Bded ga, psilo Jesús bzeet me lo grë xpëëdsuel me zha csacsi miech me. Rëb me nroob grë ncuaañe cteed zho me; grë zha non lo menquiedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me griebean. ³² Grëse miñe ted me, laaw nozodiidz me lo zho.

Goñ Pedr sca rnee me, dzigo bredz Pedr me, blisqui Pedr lo me dien pe nacle rnee me laa me guet. ³³ Zeene goñ me zha rzë xtiidz Pedr, zoque Pedr ga biecw me bui me lo grëraa xpëëdsuel me, goctox me rëb me:

—¿Biche lo naa nu mendox! Zienied guic luu miñe rnabey Dios, sinque laa guic luu zienie miñe racladz luu.

³⁴ Dzigo blunia me lo grë miech ne ndxie ga, yquiaadiag zho miñe gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho miñe rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho. ³⁵ Sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne rleynie zho naa, porne rleynie zho grë Diidz Ndzon rii, zha co yгаа tib guielmban ne mazdraa ndzon. ³⁶ Nana, tel zha ne guñlo grëse ncuaañe no lo guidzliu rii. ¿Pa yquiiñ grë ncuaañ co lo zho, tel lëew yquiaaqui laa zho guey gabil? ³⁷ ¿Niacxe zrieelo gdziib zho dimi co laa zho len gabil? ³⁸ Naa ne nac naa Meñ ne pxeel Dios zial naa lo guidzliu, zha ne ctoladz guiab zho lo grë miech ngoopdol rii laa zho no xnëz naa, o ctoladzniegaa zho xtidz naa, scaque naa stoladznie

naa zho gaḷ dze ne laa naa guaḷ stib. Dze ne guaḷnie naa grē anjḷ, ni glu naa grē guaḷindzon ne rap Dios.

9

¹ Ni rēb me lo grē miech co:

—Gneli naa lo to ganḷe, nzian grē zha ne ndxie nu niina ib tedsod gardaque guet zho, bii zaṅ zho ganḷe zeene laa Dios glu ne nli meṅ rnabey nac me.

Bdzēēlo Jesús

(Mt. 17:1-13; Lc. 9:28-36)

² Goca xoop ngbidz, brieē Jesús gza me Pedr, Jacob ni Juan, güey zho bzoquia zho tib guic gui glaa.

Bdziṅ zho glaa guic gui co, tibaque zeene gon zho laa me bdzēēlo.

³ Masaque rquiabni xab me, nquitsbie rnaw; ni tib miech grieelod scataa mbe quiib lar. ⁴ Gonḷo zho zeene laa Lí ni Moisés (grop zha ne biadteed xtiidz Dios glo) bdziṅaque, laa zho nozodiidznie me. ⁵ Dzigo rēbchaā Pedr lo me:

—Maestro, jne nligaa wena guaiaṅ ne nu! Laa no gzaa tsoṅ yu yag xiid win nu tso to: tiba tso luu, tiba tso Moisés, stiba tso Lí.

⁶ Rdzieb Pedr gza Pedr schop zha co, lo dzeb co niicle riendaque Pedr pe rnee Pedr. ⁷ Tibaque znuse bdop tib xcow pquia ngali zaatne zo zho ga; dzigo bin zho zēēb tib tsi meṅ co lo xcow co, rnee me:

—Lēē xpēēd naa i gon, rleynie naa me. Golgon miṅe rnee me.

⁸ Lēēlēd biecw lo zho rwi zho, choot gondraa zho, Jesússe zo lo zho ga.

⁹ Blozhse ga, laa zho wbique ga. Laa zho ziezēēb dan noyet zho cho gui co, zeene rēb me lo zho:

—Miṅe gon to gon, choot lo gneede tow. Goḷcuēz haxta gaḷ dze ne grieēban Men ne pxeḷ Dios.

¹⁰ Nacne choot lo bneed zhow, per psilo zho gza tsoṅ zho rnabdiidzlsa zho, zha mod grieēban tib zha ne gutle.

¹¹ Dzigo bnabdiidz zho lo me, rēb zho:

—¿Bay zha nacne rnee maistr ley, glo Lí no guaiaad stib, dzigoraā guaiaad Men ne zēēble diidz ga cxeḷ Dios?

¹²⁻¹³ Pquiab me rēb me lo zho:

—Nliw, ible nacle diidz ne glo Lí guidaseed miech gon zho xtiidz Dios, per laa me biaadle; ni zigne bzeetse grē zha ne biadteed xtiidz Dios ted me, scase beēṅ miech me. Scaque Men ne cxeḷ Dios ga, rnee lo Xtiidz Dios nroob csacsi miech me, ible gandzed zho me.

Biac tib niib ngop

(Mt. 17:14-21; Lc. 9:37-43)

¹⁴ Zeene bdziṅ Jesús zaatne biaaṅ grēraā xpēēdscuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodiḷdiidznie zho. ¹⁵ Grē miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me. ¹⁶ Dzigo bnabdiidz me rēb me:

—¿Pe nadiēṅ squitaa nodiḷdiidz to?

¹⁷ Lad grē miech co pquiab tib zho, rēb:

—Maestro, lo luu ziaḷnie naa tib xpēēd naa guṅguiaac luu win; ib gacd gnee win sac noguitnie mendox win. ¹⁸ Tel pataa zo win, zeene laa ma rzēēb zdoo win rron ma win liu; ga nix win rdzib mtsiṅ ro win, ni row lay win; nrooble noyo win lēbdraa win sē win. Blansonie naa win nu, dzigo bnab naa lo xpēēdscuel luu guṅcxoon zho mendox co, per brieelod zho.

¹⁹ Dzigo rēbchaā Jesús lo zho:

—iPe na squitaa miech nad nac to, ib rnalode to Dios! ¿Palal tiemp ne so naa gne naa lo to? iNcuuaane cexecwdraa naa lo to squi nac to! iGol̄t̄enie mēēdwin qui nu!

²⁰ Güey zho güeynie zho mēēdwin co lo me. Zigne gon̄ mendox co me, psilo been̄cxidz ma win, znuse biab win liu, rtiibxto win ni rdzib mtsiin ro win.

²¹ Dzigo bnabdiidz me lo pxoz win, goc palal dze psilo sca rac win.

Rēbchaa pxoz win:

—Bii mēdyeen win psilo squi rac win. ²² Pe zhidaa vuel̄t zieron̄ men̄dox qui win lo gui, zieron̄ ma win lo nis ne, racladz ma gut ma win. Bzhiguiel̄ tel̄ne zrieelo gun̄guiac luu xpēēd naa, iꝑquia zdoo naa, been̄ tib guiel̄nzaac been̄guiac win!

²³ Rēbchaa Jesús lo me:

—¿Zha rnee luu “tel̄ne zrieelow”? iZha ne dib zdoo rnalode Dios, grēse ncuuaane racladz zho, zaca!

²⁴ Lēēlēd ꝑꝑuiab pxoz mēēd co, rēb me:

—Rnalo naa Dios, per bzhiguiel̄ been̄ xyudar naa, iꝑib zdoo naa gnalo naa me!

²⁵ Zeene gon̄ Jesús laa grē miech co rbigberaa, dzigo goctox me lo men̄dox ne noguitnie mēēd co, rēb me:

—Men̄dox, luu gon̄ psan̄ ngop mēēd rii, luu psan̄ nguaat win. iNiinagazh psaan win, ib gbiiredraa luu ygaal̄ luu win!

²⁶ Horco biire been̄cxidz ma mēēd co stib, masaque roptsiedan ma laa psaan win, nixtaque win ga, zootle gutle win. Nzian grē miech co, tibaque nan̄ zho gutle win. ²⁷ Laa zeene bzhen̄ Jesús nia win, blis me win ga, laa win bzoli.

²⁸ Zeene bdziñ Jesús len̄ yu ne rbēz me grē xpēēdscuel me, bnabdiidz zho lo me rēb zho:

—¿Bay pe nacre brielod no ndziun̄cxoon̄ no men̄dox co?

²⁹ Dzigo rēbchaa me lo zho:

—Grē men̄dox ne sca nac, rquinn̄ dib zdoo ne gnab ne lo Dios dzigo zrieelo gun̄cxoon̄ ne ma.

Bzeet Jesús laa miech csacsi me

(Mt. 17:22-23; Lc. 9:43-45)

³⁰⁻³¹ Brie Jesús ga grē xpēēdscuel me, laa zho wbire nēz xtan Galilé stib. Racladz me cho gacnan̄ pa lo no me; sac len̄ dze co nzian grē ncuuaane noseed me zho. Haxta bzeet me zha csacsi miech me, rēb me:

—Naa ne nac naa Men̄ ne ꝑxeel̄ Dios, ible ziaab naa ladznia miech, ni zut zho naa. Per zeene gac tson̄ ngbidz gut naa, laa naa grieegan.

³² Per ib riend zho pe nacre sca rnee me, niicle gnabdiidzga zho rdzieh zho gnabdiidz zhow lo me.

¿Cho nonraa?

(Mt. 18:1-5; Lc. 9:46-50)

³³ Bdziñ zho guiedz ne lē Capernaum; grēse zho laa zho ndxie len̄ yu ne blēz zho, tibaque bnabdiidz Jesús lo zho, rēb me:

—Gol̄nē dien, ¿pe scataa nodiidiidz to zeene ziaad ne nēz?

³⁴ Ni tib zho ib ꝑꝑuiabd, sac zeene ziaad zho nēz quianeelsa zho dien cho nac zha ne nonraa.

³⁵ Dzigo bzob me, bredz me zho gza tsiipchop zho rēb me lo zho:

—Zha ne racladz gac zho zha non, none guiaan̄win zho gac zho zig tib ngundziin lo samiech zho.

³⁶ Dzigo bzo me tib mēēdbgui win glowtaa lo zho; blozh ga bdeedz me win ni rēb me lo zho:

³⁷ —Zha ne ngab xnëz naa, ni gleynie zho tib mëédwin zig mëédwin rii, gun naa cuent naa ga rleynie zho; ni zha ne sca rleynie naa, yele men ne pxeel naa ga rleynie zho.

³⁸ Blozh ga, rëbcha Juan lo me:

—Maestro, bdzon no gon bzeet tib zha co lë luu zeene benxoon zho mendox; nacne nli blisqui now lo zho, sac gon, led yed zho nacgrë ne.

³⁹ Dzigo pquiab me rëb me lo zho:

—¡Guñscade to! Sac gon zha ne sca rzeet lë naa zeene run zho milagr, niacxe lëëque zha glëë lo naa. ⁴⁰ Zha ne nacnie ne, glëëd zho lo ne.

⁴¹ 'Golgacnan sca ganle, grëse zha ne gdeed maase tib zhigaque nis guie zha ne ngab lo naa, ib tedsod stsiere Dios minë been zho ga. ⁴² Sangue zha ne yguib gunctal zho xtoł zho ne nac zho zig tib mëédlas yeen; mazd lëëtaa minë ted zha co sobdoo tib quie molin zhobxtıl yquıaw yan zho tsieron zho zho nisdo.

Choot gdeete diidz guiab lo dol

(Mt. 18:6-9; Lc. 17:1-2)

⁴³⁻⁴⁴ 'Zha ne rien nia zho nac minë rquiaqui runctal zho xtoł zho, mazd cchuggazh zho nia co zho. Peet nacd maase tibaque nia zho zob totsaque yгаа zho guiełmban ndzon ne gdzınd dze lozh, lëdle zob gropa ni laa zho guey gabil, lo beldox ne gdzınd dze guıuu. ⁴⁵⁻⁴⁶ Telne rienгаа zho ni zho nac minë rquiaqui runctal zho xtoł zho, mazd cchuggazh zho ni co zho. Peet nacd maase tibaque ni zho zob totsaque yгаа zho guiełmban ndzon ne gdzınd dze lozh, lëdle zob gropa ni laa zho guey gabil, lo beldox ne gdzınd dze guıuu. ⁴⁷ Tel tib logaa zho nac minë rquiaqui runctal zho xtoł zho, mazd cueegazh zho bzıaalo co zho. Peet nacd maase tibaque bzıaalo zho zob totsaque yгаа zho guiełmban ndzon co, lëdle zob grop bzıaalo zho ni laa zho guey gabil. ⁴⁸ Zaatne nac gabil, ib gdzınd dze ne guıuu lo bel co; grë mziog ne ndxie ga, gdzınd dze ne nitlo ma. ⁴⁹ Grëse zha ne gdzın ga, masaque cuib gui lad zho zig rbib zed lad bëë.

⁵⁰ 'Zig nac zed, rquiindoxa zeene nzhiw, per zeene nzhida, ¿pa dien yquına? Scauegaa to nagon golgac zig zed ne nzhi, zeena yquın to lo guidzliu rii; niowse golbannie samiech to, glëëlsade to.

10

Zha ne rsëbtsieel

(Mt. 19:1-12; Lc. 16:18)

¹ Brieë Jesús Capernaum güeyted me grë guiedz ne ndxie nëz xtan zha Judé, grë guiedz ne ndxie nëz dan ro guıubee Jordán. Miech guızhiu ne rcaalsa lo me, dzigo rsilo me rseed me zho zigne runtaque me.

² Tib vuelt bdzın bla zha farisé gocladz zho niungüet zho me, par dien pe nxınd me tib diidz; bñabdiidz zho rëb zho:

—Maestro, mgui ne racladz csëbtsieel, ¿pe gnë luu pe zrielo csëbtsieel zho?

³ Pquiab me rëb me lo zho:

—¿Zha zho psan Moisés diidz lo to?

⁴ Pquiab zho rëb zho:

—Tel Moisésa, bdeed me diidz csëbtsieel zha ne racladz csëbtsieel, lëëraasi none yquia tib guits gdeed zho lo wnaa zaatne raquiet ne laa zho psan wnaa.

⁵ Dzigo rëbcha me lo zho:

—Ne squicxe waa miech nad nac to ib ronde to diidz, min co nacne biaan ley co. ⁶ Per ib nodne csëbtsieel miech; sac gon, zeene psan Dios grëtaa ncuaañe no, tib nëz miech bzaa me: tib mgui ni tib wnaa. ⁷⁻⁸ Gacxe waa, mgui

ne rtsieelnia ib none grieezhaa zho lo pxoz zho, lo xniaa zho, par gbannie zho wnaa ne nac tsiel zho; laa zho gactipse grop zho. Nacdraa zho chop miech, sinque laa zho rac tibaque. ⁹Dios nac meṇ ne psan ycatsieel miech, cho dzigo nac miech par quiits zho miṇe rnabey me.

¹⁰Laa zeṇe bdziṇ me leṇ yu ne rbēz zho, dzigo bnabdiidzaque xpēēdscuel me miṇ co lo me stib. ¹¹Dzigo rēbchaa me lo zho:

—Mgui ne rsēbtsieel ni rbannie zho stib wnaa, noguitnie zho wnaa ne gocpaa tsiel zho ga, ni doḷ ga ruṇ zho. ¹²Niicle wnaagaaw, wnaa ne rsēbtsieel ni rbannie zho stib mgui, lēēque doḷaque ga ruṇ zho.

Beenlay Jesús mēēdlas

(Mt. 19:13-15; Lc. 18:15-17)

¹³Tib vuelt nzian meṇ ne bdziṇ bdziṇnie zho xpēēdlas zho lo Jesús, par cxobnia me guic win guṇlay me win. Grē zha ne nac xpēēdscuel me, leḷ psilo zho ndox zho lo grē zha ne bdziṇnie grē mēēdlas co.

¹⁴⁻¹⁵Zeṇe goṇ me sca quiayun zho, wbiṇladz guic me, dzigo rēb me lo zho:

—Ctsirede to grē mēēdlas yeeṇ qui, goḷsaan guiaad win lo naa. Sac goṇ grē mēēdlas yeeṇ, ni zha ne nac zigne nac win, zha co nac zha ne sēēb ygab lo Dios.

¹⁶Blozhse sca bnee me, dzigo psilo me bdeedz grē mēēdlas co, ni pxobnia me guic win beenlay me win.

Bzodiidznie tib zha ricw Jesús

(Mt. 19:16-30; Lc. 18:18-30)

¹⁷Laa Jesús nole nēz tsie me stib guiedz, zeṇe rias tib niib nguieg bdziṇ pquiitzghib lo me, rēb niib lo me:

—Nan naa luo nac tib meṇ ne noseed miech, ni tib meṇ wen nac luo; ħbnē dien pe nac miṇe guṇ naa zeṇa ygaa naa guieḷmban ndzon ne gdziṇdraa dze lozh?

¹⁸Rēbchaa Jesús lo niib:

—Rnee luo lēē tib meṇ wen nac naa. iNligaaw, Diosse nac meṇ wen! ¹⁹Nanle luo ganle zha nac Xley Dios, rneew:

Gute luo samiech luo,

teḷne nole tsiel luo, tsonied luo zha ne led tsiel luo,

cuand luo samiech luo,

yquiadiidzguizhd luo samiech luo,

yquidieed luo samiech luo,

goṇ pxoz luo, goṇ xniaa luo; bin miṇe rnabey me luo.

²⁰Dzigo pquiab niib rēb niib lo me:

—Maestro, grēsew zigne bzeetse luuw i, ni tiba gard quits naa wlal ne nac naa zha nguieg.

²¹Dze rwi Jesús lo niib, rleynie me niib.

—Stibaque miṇe rquiin guṇ luo —rēb me—, güey, güeyto grēse ncuaaṇe quianie luo, dzigo bdiiz dimi co lo grē zha mban ne guieṇd pe yquiin; sca nroobraa guieḷnzaac ne ygaa luo gbaa. Lozh ga, bleeladz xquieḷmban luo dēnal zhits naa.

²²Zeṇe bin niib co sca rēb Jesús, biab guieḷnē niib, mbanse rac niib laa niib zey; sac ne nligaa nroob ncuaaṇe quianie niib.

²³Dze rwi me goṇ me laa zha nguieg co zey, dzigo rēb me lo xpēēdscuel me:

—iGrē zha ne squi rapcheṇ, rzacxuu zho par sēēb zho xnēz Dios gnabey me zho!

²⁴Zeṇe bin zho sca rēb me, rzee zdoo zho. Dzigo biire me bnee me rēb me lo zho:

—Xin, jne nligaa tib miech ne ndziib rap chen, rzacxuu zho sëëb zho xnëz Dios gnabey Dios zho! ²⁵ Mazd znuse rded tib camell guieer guzh, lëdle sëëb tib zha ricw xnëz Dios.

²⁶ Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, çhose dzigo nac zha ne zrieelo sëëb xnëz Dios?

²⁷ Dze rwi me lo zho, dzigo rëbchaa me:

—Par miech zootle tsod zha ne grieelo sëëb xnëz me. Sangue me, nan me no zho; sac tsod ncuuaane grielod gun me.

²⁸ Dzigo rëb Pedr lo me:

—Tel no, grëse ncuuaane rdziaap no laa no psana, laa no ziaadnał zhits luu.

²⁹ Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëed zho, liun zho, porne riladz zho naa ni riladz zho Xtuidz Ndzon Dios; ³⁰ nli nroob guielnë gan zho, per gneli naa lo to ganle: grëse ncuuaane sca psan zho ga, lo guielmban riique laa zho gbiire gana stib tib gayoogaw tib tiba; ni ib tedsod zgaa zho tib guielmban ndzon ne gdziindraa dze lozh.

³¹ Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

Biire bzeet Jesús laa miech csacsi me

(Mt. 20:17-28; Lc. 18:31-34)

³² Brieer Jesús ga laa me zie Jerusalén. Nzian grë zha ne zianał zhits me, nerse me lo zho laa zho zie. Grë zha ne nac xpëedsuel mew, rzee zdoo zho; laa grëraa miech co per nli rdzieb zho. Dzigo bredz me gza tsiipchop zha ne nac xpëedsuel me ga, psilo me bzeet me grëse tel zha ziaadyob ted me, rëb me lo zho:

³³ —Bii zan to ganle, naa ne nac naa Men ne pxeel Dios, niina ne laa ne gdzin Jerusalén ible zielo zho naa ladznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdraa zha Israel. ³⁴ Xidznie zho naa, stuc zho lo naa, zguin zho naa, ni haxta zut zho naa; per dze ne gac tson ngbidz gut naa laa naa grieeban.

³⁵ Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu gun luuw.

³⁶ Dzigo rëb me:

—ÇPe favor ne racladz to gun naa lo to?

³⁷ Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nëz derech stib no nëz revés.

³⁸ Pquiab Jesús, rëb me lo zho:

—iNi to gon riend pe rnab to! ÇPe zlëb to gan to grë guielnë ne gan naa, pe zlëb to ted to grë miñe teed naa?

³⁹ Rëbchaa zho:

—iZlëëb no!

Dzigo rëbchaa me lo zho:

—Nli zan to guielnë ne gan naa, ni zded to miñe teed naa; ⁴⁰ per ne gnedz naa diidz sob to cue naa nëz derech o nëz revésgaa, led naad raguial miñ co; laa lugar co bianañe par zha ne nole diidz ygaaw.

⁴¹ Grëraa zha ne nac xpëedsuel me, zha ne nacgza Jacob ga grop Juan, zeene bin zho zha rzë xtiidz Jacob grop Juan blëë zho lo zho. ⁴² Dzigo bredz Jesús zho grëse zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. ⁴³ Sangué to gon, guñscade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib ngundziin lo to. ⁴⁴ Scaquegaa, zha ne racladz gnabey lo to, none glo cseed zho gun zho miñe gnabey to zho. ⁴⁵ Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaañe ngadoo zho. Ni nanpaa naa miech guizhiu ne laa.

Biac tib men lë Bartimé

(Mt. 20:29-34; Lc. 18:35-43)

⁴⁶ Sca no grë miech guizhiu co nëz, laa zho bdziñ guiedz Jericó. Laa zeene laa grë miech taf co zieriee ro guiedz co, laa tib ngui ciegw lë Bartimé zob ga rtop gon (xingan tib men lë Timew). ⁴⁷ Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—jJesús, men xtií rey David, pquia zdoo naa!

⁴⁸ Nzian grë miech co ndox lo me nan zho guioog ro me, per dzigole mazdraa nguiedz roptsie me, rnee me:

—jJesús, pquia zdoo naa!

⁴⁹ Dzigo pcuëzñi Jesús, bnabey Jesús güeytsedz zho me. Bdziñ zho lo me, rëb zho:

—jLigier guso i! Dë ganle laa me rbedz luu.

⁵⁰ Zeene bin mew, haxta squi bron me lar ne mbix me, guso me ga laa me bdziñ lo Jesús. ⁵¹ Dzigo rëbchaa Jesús lo me:

—Bnë nadien, ¿pe racladz luu gun naa?

Pquiab me rëb me:

—Maestro, racladz naa guiac lo naa.

⁵² Dzigo rëbchaa Jesús:

—jNiinagazh laa lo luu gan! Laa luu biac, sacne dib zdoo luu bnalo luu naa.

Ligier na bzë.

Horcogazha laa lo men co psilo bui, laa me zienal zhits Jesús.

11

Bdzin Jesús Jerusalén

(Mt. 21:1-11, 18-19; Lc. 19:28-40; Jn. 12:12-19)

¹ Zhile gdziñ zho Jerusalén, laa zho zie gax zaatne riaan guiedz Betfagé ni guiedz Betain, nëz dan squi riaan Gui Oliv, zeene bredz Jesús chop xpëëdscuel me ² rëb me lo zho:

—Goltsie guiedz win ne ndxie danse lo ne i. Zigne sëëb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltënie ma nu. ³ Tej cho gnadiidz pe nacne noxadz to ma, dzigo golguiab: men ne rnabey ne men co rquiiñ ma, na zigne lozh xtsiñ ma guiaadsan no ma.

⁴ Laa zho zie, nligaaw laa zho güeydzil burr co quiadoo ma tib ro nëz, gax tib ro yu. ⁵ Blalaa zha ne zo ga, zeene gon zho laa zho noxadz ma, rëbchaa zho:

—¿Pe gun to burr qui dzigo na, ne noxadz to ma?

⁶ Dzigo pquiab zho zigne rëbse Jesús lo zho ga, nacne bdeed men co diidz laa zho zienie ma.

⁷ Bdziñnie zho ma lo Jesús lëëque lar ne rbix zho pxob zho lad ma, bzobga me ma. ⁸ Nzian grë miech co zigse zie Jesús, scase scase ner zho rta zho lar

ne rbix zho rded me, nogaa zho rchoo nia grë pe yag rdziin zho zaatne rded me. ⁹ Grëse zho, niicle zha ne ner lo mew, niicle zha ne naļ zhits mew, rley zho nguiedz roptsie zho, rnee zho:

—įZha ndzontaa meņ qui pxeel Dios lo ne! ¹⁰ įZha wentaa ziaad me gac me zhirey ne! įMe gnabey zigne bnabey pxozgol ne rey David! įZha ndzontaa Dios ne zob gbaa!

Sca nguiedz roptsie zho rleynie zho me, laa me bdziņ Jerusalén.

¹¹ Bdziņ me Jerusalén, güey me güeyso me leņ yadoo. Blozhse bui me dipse leņ yadoo, laa me brieecque ga laa me zie nēz Betain grë xpēēdsuel me, sac bdzele dzew.

¹² Biini liu, loxaque zieriee zho Betain laa me psilo rcaabedz. ¹³ Zitlaa ziaad me goņ me tib zhaņ yag guigw, nxii nac low zēēb zhiblaga; dzigo zie me zieso me dien pe gdzielđ tib guigw low gow me. Bdziņ me zaatne zoba, ni tib guigw guieđ low loxaque zhiblagsew scataa zēēb, sac gardpaa gdziņ mēē ne rquia guigw. ¹⁴ Dzigo rēb me lo yag guigw co:

—įSquitaa nagon guiaan luu! įGdziņdraa dze yquia nex lo luu gow miech! Grëse xpēēdsuel me, bin zho sca bnee me lo yag co.

Blee Jesús miech leņ yadoo

(Mt. 21:12-17, 20-22; Lc. 19:45-48; Jn. 2:13-22)

¹⁵ Bdziņ zho Jerusalén, bzēēb me leņ yadoo. Psilo me blee me grëse miech ne quiaayun lguį ga, zigtaa zha ne no wtow, zigtaa zha ne no wziv. Grë zha ne no wto palom, grë zha ne notsēē dimi, ptiixche me xmezš zho. ¹⁶ Blozh ga, pso me diidz choot nodraa sēēbnie grë ncuaaņ co leņ yadoo, ¹⁷ rēb me lo zho:

—Led znu goņ rnee lo Xtiidz Dios: “Zaatne nac lidz naa nu, nu guiaad grëse miech ne ndxie lo guidzliu sodiidznie zho naa.” Laa to goņ quiaayun to lugar rii zig tib zhibliee ngbaan.

¹⁸ Grë zha ne nac pxoz nroob ni grë zha ne rnabey lo maistr ley, bin zho sca rēb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. ¹⁹ Zeene laa liu pcow, laa me wbique Jerusalén stib grë xpēēdsuel me.

²⁰ Biini liu co, laa zho zieded zaatne zob yag guigw ne sca güeyguib me nex lo ga, goņ zho laaw bidzle dib low. ²¹ Dzigo beencsoladz Pedr mew, rēb Pedr: —Maestro, bui gaņle laa yag guigw ne bdzibdee luu ga bidzle.

²² Pquiab me rēb me:

—Zha ne dib zdoo rnalos Dios, ²³ gneli naa lo to gaņle: Niicle ncuaaņe mazdraa ngaņ gnab zho lo me, zuņ mew; lēēraasi none dib zdoo zho giladz zho zac miņe rnee zho, ni palal gacchopđ guic zho. ²⁴ Golgona sca gaņle, grëse ncuaaņe gnab to lo Dios, dib zdoo to golliladz ne zneedz mew, dzigo sca zac miņe rnab to. ²⁵ Ni zeene gnab to lo Dios, golsoladz dien pe no cho rlēēnie to, dzigo golgun zho perdon; zeena scagaa, Pxož to meņ ne zob gbaa zuņ me to perdon tel pe nactaa xtol to. ²⁶ Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷ Blozh ga, laa zho bdzinaque Jerusalén stib. Lēētaaque laa Jesús quiawi dib leņ yadoo, zeene bdziņ bla zha ne nac pxoz nroob, bla zha ne nac maistr ley ni zha ne nac meņ non lo menġuiedz, ²⁸ rēb zho lo me:

—įCho dien nac luu ne squitaa ziaadnabey luu leņ yadoo? įCho rnabey luu?

²⁹ Pquiab me rēb me lo zho:

—Laa naa gun̄ tib wnaabdiidz lo to. Teḽne stsire to low, dzigo gni naa lo to ganle cho rnabey naa ne laa naa noyun̄ grē ncuaaḽe noyun̄ naa. ³⁰ Golnē dien, ¿cho pxeel Juan baaad me pchoobnis me miech? ¿Pe Dios pxeel me, te miechsew ye?

³¹ Psilo zho rnaabdiidzlsa zho, rnee zho:

—Teḽne dzieets ne Dios pxeel Juan, dzigo laa me gnē: “¿Pex nac dzigo waa bliladzde to miḽe bnee Juan?” ³² Teḽ na dzieetsgaa ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grēse menguiedz nan̄ ne nli Dios pxeel Juan biadteed Juan xtiidz Dios lo miech. ³³ Dzigo mazd miḽe been zho, rēb zho:

—Ndiond no dien cho pxeel Juan.

Dzigo rēbchaa me lo zho:

—Niicle naagaa nagon, grieelod gni naa lo to cho rnabey naa quiayun̄ naa grē ncuaaḽ rii.

12

Xcuent zha ne pquianap liu

(Mt. 21:33-46; Lc. 20:9-19)

¹ Dzigo psilo Jesús bzodiidz me tib cuent, rēb me:

—Tib mgui name, nroob lbē uv beenbni me lo liun̄ me. Psilo me ptse me igose liu co, bzaa me zaatne gzhii grē uv co, ni bzaa me tib yu glaa zaatne sob zha ne yquiaanapa. Blozh ga, blediin̄ me liu co lo bla zha ne ran liu, dzigo laa me brīee ga, laa me zey zit.

² Zeene gol̄ mēe ne ral uv, pxeel me tib xmoz me lo zha ne quianap liu co, parne gdeed zho uv ne rieguial̄ me ycaa me. ³ Per leḽ bnaaz zho moz co, bdiḽ zho zho; blozh ga, scase bzonēz zho zho.

⁴ Dzigo biire men̄ ne nacchen̄ liu co pxeel me stib moz, scasaque been zho: goctseeb zho lo moz co, pquiaago zho zho, bdiḽ zho zho, blē zho guic zho.

⁵ Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho. ⁶ Tibaque zeene loxaque xinganse me rīaan. Rleyniedox me xpēed me, per laa me pxeel me, bza guic me rēb me: “Gaḽse zho xpēed naaw, zon zho miḽe gnee me.”

⁷ Zeene gon̄ zho laa xpēed me bdziḽ, rēbchaa zho: “¡Lēē zha qui nagon̄ guiaann̄ie liu rii! ¡Gol̄gotsaa dziuut ne zho zeene guiaana lo ne!” ⁸ Dzigo bnaaz zho men̄ co, beet zho me, güeyga zho güeyron̄ zho me tib lad lo liu co.

⁹ Sca nagon̄ —rēb Jesús—, been zha ne quianap liu co. Golnēse nadien, ¿pe nac miḽe gun̄ bizhuan liu co? Ib tedsod zeene laa me guiaad, znitlo me zha co; zhaale lo zha ne csaḽ me liun̄ me.

¹⁰ Gol̄soladz ganle znu rnee lo Xtiidz Dios:

Quie ne psēeb zha ne nozaa yu, ni nand zho lēepaa quie co nac miḽe rnazdziits yu.

¹¹ ¡Ncuaaḽe gzee zdoo new! Sac Dios bnabey sca goca.

¹² Zeene gon̄ zho sca bnee me, gocladz zho naazgazh zho me ga; sac biḽ zho miḽe run̄ zho ga bzeet me. Per bnaazd zho me, sac rdzieb zho grē miech guizhiu ne ndxie ga, nacne zeyga zho.

Pe nonguiel̄ quizh miech contribucion

(Mt. 22:15-22; Lc. 20:20-26)

¹³ Zhisaque goca, laa zho pxeelaque zla zha farisé, ni zla zha ne nacie Herod, zie ziegungüet zho Jesús par dien̄ zha cxin̄ me tib diidz; zeena sca gdeeda diidz tsiezo zho me lo wxtis. ¹⁴ Bdziḽ zho lo me, rēb zho:

—Maestro, ndion no niapse diidzli rnee luu, led lega gund luu mine rnee tib miech, sac tibeyse nac miech lo luu, ni laa luu zienal cseed zho mine nac diidzli zeena seeb zho xnöz Dios. Min co nagon, nacne racladz no gnë luu lo no dien, ¿pe nonguiela ga rdeed no dimi ne razh lo rey te nonguiel da ye? ¿Pe dzidzraa no dimi co, te mazd dizhdraa now ye?

¹⁵ Bienga Jesús racladz zho gungüet zho me, dzigo rëbchaa me lo zho:

—¿Pe nacne racladz to gungüet to naa? Golguuid tib xpes to nu ganle.

¹⁶ Dzigo bdeed zho tib pes lo me. Blozh ga, rëbchaa me lo zho:

—Golnë lo naa dien, ¿cho nu quia lo pes rii? ¿Cho lë nu quia low?

Pquiab zho rëb zho:

—Lëë rey Roma i, lëë lë me i quia low.

¹⁷ Dzigo rëb me lo zho:

—Mine nonguiel ycaa rey, goldeeda lo rey; scaquegaa mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gun zho.

¿Pe nli zrieaban miech?

(Mt. 22:23-33; Lc. 20:27-40)

¹⁸ Bdzinaque zla zha saducé, rëb zho lo me:

¹⁹ —Maestro, znu pquiaa Moisés lo libr ley ne psan Moisés lo no: tel glo mgui guet lo wnaa ne nac tsiel mgui ni gopd wnaa mëed, dzigo none betsaque zho tsielna wnaa co stib, zeena gap wnaa mëed ne guiaan xlugar xpëed zha ne gut ga.

²⁰ Bio tib dii zha co znu bzhaac, gadz bets nac zho. Ptsielnia zha ne nac zha gol, zeene laa zho gut, biaan xpëed zho. ²¹ Dzigo ptsielnia stib bets zho wnaa co, blozh ga gutaque zha co, pasë zho nsañ mëed. Ptsielniaque me stib zho, goc zho tson, niicle zha co psandaque mëed. ²² Sca sca haxta bza gza gadzse zho tsielnia me, per ziese zho ni tib zho psand mëed; tibaque zeene yeque me, laa me gut. ²³ Mine racladz no gacndion no, ¿chopaa dzigo gac tsiel wnaa co gal dze ne laa zho grieaban; sac gza gadzse zho tsielnia me?

Sca bnabdiidz zho, sac nac zha saducé riladzd zho ne nli dzin dze grieaban zha ne ret.

²⁴ Dzigo pquiab Jesús rëb me lo zho:

—I nagon laa to rxin. Mine naca riende to zha nac Xtiidz Dios, niicle riladzde to zrieelo me gun me ncuaan ro ne gard gan miech. ²⁵ Sac gon, zeene gal dze ne laa grë miech grieaban, niicle mguiw niicle wnaaw led yedraa hor co dien cho tsielnia zho; sac hor co laa zho gac zig nac grë anjl ne no gbaa. ²⁶ Stiba, ible nli zrieaban mengut. ¿Pe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rëb Dios lo Moisés: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” ²⁷ Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

Xley Dios mine mazdraa non

(Mt. 22:34-40)

²⁸ Zeene sca nozodiidznie Jesús zha saducé co, gon tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguiel bnë lo naa dien, lo grë xley Dios, ¿pa min nac mine mazdraa non?

²⁹ Pquiab Jesús rëb me:

—Min rii nac miñe mazdraa non, znu rneew: “Grëse to men Israel, golquiaadiaga ganle: men ne nac Dios ne riladz ne, tibaque me ni me nac men ne rnabey ne. ³⁰ Dib zdoo to, dib xalm to, dib guielbiini ne no guic to, dipse xfuers to gollenyie me.” Lëe tiba nu, ³¹ laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

³² Dzigo rëbchaa maistr ley co lo Jesús:

—Diidzli rnee luu maestro, tibaque Dios no. ³³ Ni none dib zdoo ne, dib guielbiini ne no guic ne, dipse xfuers ne gleynie ne me; ni gleynie ne samiech ne zigne rleynieque ne ne. Min co nac miñe mazdraa non, lëdle gzëëg ne pe cos cogon ne lo me o dien peragaa guñ ne.

³⁴ Zeene gon Jesús sca niini rzë xtiidz me, rëbchaa Jesús lo me:

—Zhile runfalt sëëb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

¿Cho xpëed nac Crist?

(Mt. 22:41-46; Lc. 20:41-44)

³⁵ Sca noseed Jesús miech len yadoo ga, zeene bnabdiidz me lo zho, rëb me:

—¿Bay zha nacne rnee grë maistr ley, lo xtii rey David ga grieequia Men ne nacle diidz ga cxeel Dios? ³⁶ Sac zeene bdeed Espiritu Sant guielbiini lo rey David, znu bnee David:

Bnee Dios lo men ne rnabey naa, rëb Dios lo me:

“Cue naa nëz derech, nu bzob,

nieeda lozh gnaz naa grëse zha ne rlëe lo luu, csañ naa zho ladznia luu.”

³⁷ Gase nagon telne nli zha xtii David gac Men ne nole diidz cxeel Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

Zha run grë maistr ley

(Mt. 23:1-36; Lc. 11:37-54; 20:45-47)

³⁸ Laa me noseed grë miech co, zeene pso me diidz lo zho rëb me:

—Ible tsienalde to miñe run maistr ley gon. Sac grë zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdzieel zho zho dib ro nëz. ³⁹ Zig nac len yadoo, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob grol mezh zeene laa wagw gac. ⁴⁰ Ni rlozh ga, rio zho rla zho tel pe ncuaañe rapse grë wnaa viud; ni parne peet guiabd miech lo zho, xtse rzó zho rzadraa pe lay ne gool zho.

‘Sca gon nac zho, per ib tedsod zeene laa grë miech ngoopdol quizh xfalt, zha nac zha ne mazdraa nroob caxtigw yгаа.

Gon ne bdeed tib wnaa viud

(Lc. 21:1-4)

⁴¹ Blozh ga, güey Jesús güeysob me gax zaatne zhoob grë alcancí. Dzese rwi me ran me zha riesañ miech gon len grë alcancí co; ndal grë zha ricw rdziñ, nroob dimi rsañ zho.

⁴² Tibaque zeene bdziñ tib wnaa viud, tib men prob nac me, ye me laa me psan chop gaay win len alcancí co.

⁴³ Dzigo bredz Jesús xpëëdscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. ⁴⁴ Sac zha, dimi ne riaañle lo zho i

rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

13

¡Nsin golso!

(Mt. 24:1-28; Lc. 17:22-24; 21:5-24)

¹Laa Jesús zieriee len yadoo nroob co grë xpëedscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡zha rnataa grë quie ngol ne niaaw!

²Pquiab me rëb me lo zho:

—Nligaa lëe zha niaataaw. Per niicle squitaa gon ran tow niina, zdziñ dze ne nitlow dib nacsew. Ni stib quie qui guiaandraa zigne squi zhobxcuaaw i.

³Brie me ga, laa me zie gza me zho. Bdziñ zho cho Gui Oliv, ga bzob zho grë zho. Nienpaa ro yadoo co zaatne zob zho ga; dzigo wbig Pedr, Jacob, Juan ni Ndrës lo me, gza tap zho bnabdiidz lo me rëb zho:

⁴—Bzhiguiel bnë lo no dien, ¿pa hor dzigo gac mine bzeet luu ga? ¿Zha nac señ ne tso zeene laaw csilo gac?

⁵Dzigo psilo me bnee me lo zho, rëb me:

—Nsin golso zeena choot yquidiede to. ⁶Sac nzian zha ne greequia gnë zho zha nac Men ne zëëble diidz cxeel Dios; ni nzian miech ne yquidie zho.

⁷Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga. ⁸Sac garaa csilo grë dillox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. Ni lega loxaque mine rsilosew ga, sac nroobraa guielnë ne gan miech lozh ga.

⁹Zeene laa grë ncuuan rii rsilo noyac, ¡nsin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co, ¹⁰sac ib none brieets bliaallew lo grëse miech zeene gal dze ne laa guidzliu nitlo. ¹¹Zeene tsiezo zho to lo wxtis, tsode to zhgab dien pe guiab to lo wxtis; sac Espiritu Sant nac men ne gacniën to, ni mine csiaab me guic to min co gnee to.

¹²Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëed zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xnïaa zho. ¹³Ible gandzed miech to, grëse zho glëë lo to sacne rililadz to naa; per scagaa, grëse zha ne dziits so haxta lozh grë guielnë co, ible scaania Dios zho.

¹⁴Zeene gan to laa ncuane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsietsolan zho. ¹⁵Zha ne no glaa guic yu, none lëëled xoon zho, ib guiabd zho sëëb zho len yu tsiebee zho ncuane nacchen zho. ¹⁶Zha ne zogaa dana, ib gund zho ne laa zho tsie ro lidz zho tsixi zho xab zho. ¹⁷¡Prob grë men wnaa ne lëëtaque len dze co zoney xpëed, men ne quaniegaa mëdyeen ne biï radz! ¹⁸Golnab lo Dios gande to guielnë co len mëe ne rac nal, sac ne nligaa guielnë nrooba. ¹⁹Wlal ne bïaan guidzliu haxta lo nadze, gard gan miech tib guielnëdox sca, ni gdzindragaa dze ne gan zhow stib. ²⁰Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

²¹ 'Leñ dze co, tel cho zha gnë lo to: "Gołwi ganle, lëë meñ rii nac Meñ ne nole diidz ga cxeel Dios", gnëгаа zho: "Gołwi nec ganle, lëë me i", gliladzde tow. ²² Sac ndal grë zha ne grieequia guiaadquidie miech, no zho gnë zha nac meñ co, nogaa zho gnë zha ziadteed Xtiidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios. ²³ ¡Nsin sca gołso! Ib cxende to, beñque laa naa nilew lo to.

Ziaad Jesús tib

(Mt. 24:29-35, 42, 44; Lc. 21:25-36)

²⁴ Zeene lozhse gan miech grë guielñëdox co, laa lo ngbidz ycow, gziinidraa mëë. ²⁵ Grë mel ne ndziib gbaa, laa ma gliaal; grëraa ncuaañe no gbaa, masaque nëzrii nëzrec gaca. ²⁶ Horco bii zan zho ganle, zeene laa Meñ ne pxeel Dios ziad-zëëb glaa lo xcow con grë guielndzon con grë poder ne rap me. ²⁷ Lozh ga laa me gnabey grë xanjl me, tsie zho tsietop zho grëse zha ne ngab lo me, niicle zaatne mazdraa zit lo guidzliuw, mazdragaa zit gbaaw.

²⁸ 'Gołzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. ²⁹ Scaquegaa nagon, zeene gan to laa grë mine rne naa lo to nu rsilo noyac, dzigo nanle to lëë dze co ziaadyoble. ³⁰ Gneli naa lo to ganle, nzian miech ne mban niina bii zan zho zeene laa grë ncuaañ co csilo gac; sac ible ncuaañe gaca. ³¹ Zdzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac. ³² Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda; loxaque Pxzose naa nana. ³³ Gacxe waa, nsin gołso, golinab lo Dios; sac gon nande to dien pa hora.

³⁴ 'Nac cuent rii zig nac tib zha ne rriee zie tib guiedz zit. Zeene laa zho rriee, rsañse zho diidz dien pe gun tib tib moz ne guiaañ ro lidz zho, ni rso zho diidz lo zha ne rquianap ro puert nsin so zho, ib gaguiesd zho. ³⁵ Scadaa to nagon nsin gołso, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib groł guieel, wxingaa horne rcuedz gall, o ziaadyuñmbegaa liu. ³⁶ Nsin gołso, zeena ñe zobna to zeene laa naa glanso. ³⁷ Mine rne naa lo to nu, laaw rne naa par grëse miech.

14

Bnediizd zho dien zha gnaaz zho Jesús

(Mt. 26:1-5; Lc. 22:1-2; Jn. 11:45-53)

¹ Schop ngbidz runfalt csilo lni Pascw, lni ne row zho quietxtil ne riotsd ncobi; grë pxoz nroob ni grë maistr ley, laa zho noguib dien zha ngeetsse gnaaz zho Jesús gut zho me, ² rnee zho:

—Laa me no yгаа, per lëëraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

Pchoob tib wnaa nceit nex guic Jesús

(Mt. 26:6-16; Lc. 22:3-6; Jn. 12:1-8)

³ Leñ dze co, laa Jesús no guiedz Betain. Lëëtaaque laa me no mezh lidz Simón ne blan guiedz lepr, zeene bdzin tib wnaa bdzinnie tiblo nceit nex, nosew tib leñ ncuaañ win niaa niapse quie rbebni, tiblo nceit niazha. Dzigo blë wnaa co ncuaañ win co, blozh ga pchoob me nceit co guic Jesús.

⁴ Blalaa zha ne zobgrë Jesús ga, zeene gon zho sca been wnaa co, blëë zho, rëb zho:

—¿Pa rieguiala squi pxin zhlë wnaa qui nceit qui? ⁵ Telne niaca mine ndow, nguizhpaa zhow tson gayoo pes plat, nquinpaa dimi co ngaaza lo grë zha mban ne guieñd pe yquiin.

Laa zho nolisquiw lo wnaa co, ⁶ dzigo rëbchaa Jesús lo zho:

—Golsaan me. ¿Pe nacne rlisqui tow lo me? Led lega pxind mew, tib guieInzaac nroob i been me lo naa. ⁷ Telne nli rquia zdoos to zha ne guiend pe yquín, zac ygad to lo zho stib dze, sac tibaque ran to zho; sangue naa dzin dze ne gbiche naa lo to, gandraa to naa. ⁸ Laa wnaa qui been mine brieelo lo me, laa me pchoob nceit nex rii guic naa zeena nzhixcuaale xcuerp naa gal dze ne laa naa ygueets. ⁹ Gneli naa lo to ganle, dipse lo guidzliu zaatne cseedtaa miech Xtuidz Dios, ible soladz zho wnaa rii, seet zho mine been me nu.

¹⁰ Lo gza tsiipchop zha ne nac xpëedscuel Jesús ga, brieel zha ne lë Judas Iscariot güeyzodiidznie Judas grë zha ne nac pxoz nroob, rëb Judas laa Judas gun me ntregar. ¹¹ Zeene bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien pa hor gdeeda diidz gun Judas me ntregar.

Dowxtseenie Jesús xpëedscuel me

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Mer dze ne rsilo lni Pascw, dze ne rowxtsee zho tib carner, ni rsilo zho row zho quietxtil ne rquiad ncobi lad, dze co bnaabdiidz xpëedscuel Jesús dien pa lo racladz me tsiegunlo zho ncuane gowxtseenie me zho wdze co.

¹³ Dzigo pxeel me chop zho Jerusalén, rëb me lo zho:

—Goltzie Jerusalén. Ga gan to tib mgui nzobyan tib re nis, dzigo goltzienal zhits me. ¹⁴ Yu ne gan to sëeb me, golguiab lo bizhuan yu co: “Znu në maestro: ¿Pa len yu me gneedz luu gac zaatne gowxtseenie me xpëedscuel me wdze rii?” ¹⁵ Dzigo ga glu me tib len yu nroob ne riaan glaa, nzhixcuaale lena, grële ncuane yquín no ga; dzigo ga golgunlo zhixtsee ne.

¹⁶ Laa grop zha co brieel, laa zho zie. Bdzin zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beenlo zho xtsee co.

¹⁷ Bdze dzew, laa me bdzin len yu co grë xpëedscuel me.

¹⁸ Laa me no mezh noyownie me zho, zeene rëb me lo zho:

—Laa naa gni lo to ganle, lëëque tib zha ne gon noyownie naa nu tsielo naa ladznia zha ne gut naa.

¹⁹ Zeene bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

²⁰ Pquiab me rëb me lo zho:

—Ladaque to no zho, zha ne nosëeb xcuun len xquien naa, lëë zho ga. ²¹ Naa ne nac naa Men ne pxeel Dios, niina laa miech gut naa zigne raquietsew lo Xtuidz Dios; per, ¡probsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

²² Laa zho noyow zeene bzhen Jesús tib quietxtil, bdeed me xquizh lo Dios, blozh ga beengrol mew dzigo bdiidz mew lo zho, ni rëb me:

—Golquiina, lëë xcuerp naa i gon.

²³ Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co. ²⁴ Ni rëb me lo zho:

—Lëë xchen naa i, mine gzhiee par grëse miech ne sëeb xnëz Dios, sac lëë stib mod cub nu psan Dios parne sëeb miech xnëz me. ²⁵ Lëë lultm vuilt nu guie naa vin rii, sac zhaale stib vin cub ne guie naa zeene laa naa gdzin zaatne rnabey Pxoos naa.

Dzigo psilo me biil me bla salm gza me zho.

Bzeet Jesús zha guñ Pedr
(Mt. 26:30-35; Lc. 22:31-34; Jn. 13:36-38)

²⁶ Blozhse biilnie me Dios grë me zho, dzigo laa me brienie zho ga zienie me zho nêz Gui Oliv.

²⁷ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nêzrii nêzrec gliiaal mëcwxiiil.” ²⁸ Sca guñ zho naa, per zeene laa naa grieeban glole naa ga Galilé, ga cuëz naa to.

²⁹ Dzigo rëbchaa Pedr lo me:

—Niicle telne saan grë zha qui luu, sangue naa goñ csaand naa luu.

³⁰ Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vuelte rëb luu runbeyd luu naa.

³¹ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per guñscad naa. ¿Pe nacne guiep naa runbeyd naa luu?

Scaque rnee grëraa zho.

Bzodiidznie Jesús Pxoze me Getsemani
(Mt. 26:36-46; Lc. 22:39-46)

³² Bdzin Jesús zaatne lë Getsemani gza me zho, dzigo rëbchaa me lo zho:

—Nuse nagon gołsob, laa naa ga gazodiidznie naa Pxoze naa.

³³ Horco psilo mban rac zdoo me, riabguiełnë me, dzigo bredz me Pedr, Jacob ni Juan, bzënie me zho palal ³⁴ dzigo rëbchaa me lo zho:

—Mban rac zdoo naa, zootle zig zet naa lo guiełnë rii. Nuse nagon golguiaan, per gołsobna.

³⁵ Bzë me spalal, dzigo pquiitsgzhib me haxta bdzin lo me lo liu; psilo me bnaab me lo Dios ne telne zrieelow mazd tete me grë guiełnë ne no gan me,

³⁶ rëbchaa me:

—¡Papá, par luu grëse cos zrieelo guñ luuw! ¡Bzhiguiel psilaa naa lo guiełnë rii! Per telne grieeloda, miñe gnëtaa luu, sca gaca.

³⁷ Zeene biire me bdzin me zaatne biaan gza tson zha co, goñ me gzase zho nixguies; dzigo rëbchaa me lo Pedr:

—Simón, ¿nixguies luu lëë? ¿Pe ni palal blëëbd luu nzobna luu? ³⁸ Gołsobna, gołnab lo Dios zeena yquiild menđox to. Niicle ne squi lëbdraa xcuerp to sobna to, per gołnab lo Dios, sac goñ min co nac miñe racladz zhiespíritu to.

³⁹ Dzigo biire güey me stib, güeyzodiidznie me Dios; scaque miñe bnaab me lo mincoque bnaab me stib. ⁴⁰ Zeene bdzin me lo zho, goñ me laa zho bii nixguies. Ni rdziel zho pe guiab zho lo me.

⁴¹ Laa zeene goc tson vuelte biire me güeynab me lo Dios, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Men ne pxeel Dios, naataa laa hor bdzin zeene laa grë miech ntseeb rii guiadnaaz naa. ⁴² Gołtsieso, zeena zio ne; sac goñ laa zha ne glu naa lo zho ziaadle nu.

Bnaaz zho Jesús
(Mt. 26:47-56; Lc. 22:47-53; Jn. 18:2-11)

⁴³ Laa Jesús bii quianeeque, zeene laa Judas (tib zha ne nac xpëëdscuel me) bdzin, bdzinnie Judas tib dzoon zha ne pxeel grë pxoze ne rnabey, grë maistr ley ni grë zha non lo menđuedz Israel. No zho nzheñ spad, nogaa zho nzheñ yag. ⁴⁴ Biaanñiele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier golso golxen me, ib csaande to xoon me.

⁴⁵ Nligaaw, zigne bdziñ Judas bredz Judas Jesús; blozh ga dow Judas bzhid cuas me. ⁴⁶ Horco wbig grë zha ne zienal zhits Judas ga bzhen zho me. ⁴⁷ Lo grë zha ne nacgza Jesús ga, hor co biasaque tib zho bdoz zho zhispad zho pchug zho tib diag xmoz men ne nac pxoz nroob.

⁴⁸ Dzigo rëbchaa Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa? ⁴⁹ Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuaan rii gon noyac zeena gac grë mine raquiet lo Xtiidz Dios.

⁵⁰ Grë zha ne nac xpëedscuel me ga, grëse zho bzhoon, tipse me psan zho ga.

⁵¹ Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho; ⁵² per znuse briece mgui len lar co, bzhoon mgui coletse mgui.

Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ga brieenie zho Jesús bdzinnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo menquiedz, laa zho pcaalsa ga.

⁵⁴ Ye Pedr, maase zit zit nal Pedr laa Pedr bdziñ xley men co. Bdziñ Pedr, güeysobga Pedr lo grë zha ne ndxienap, lëetaque laa zho quiazdëe lo gui.

⁵⁵ Grë pxoz co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdziel zho dien pew. ⁵⁶ Nzian zha ne pquidie rëb zho znu nac ncuaane noyul me, per rrieequiad xtiidz zho; sac zhaase zhaase rnee zho. ⁵⁷ Tibaque zeene guso blalaa zho, bnexuu zho rëb zho:

⁵⁸ —Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

⁵⁹ Niicle scaw, rzëdaque xtiidz zho tipse.

⁶⁰ Dzigo hor co bzoli men ne nac pxoz nroob, bzo me glowtaa lo grë miech co, bnabdiidz me lo Jesús rëb me:

—¿Pe nacne rquiabd luu? ¿Diidzli dzigo lëe nac grë mine rnee zho i!

⁶¹ Dzese zo Jesús ib rquiabd me. Biireque men co bnabdiidz me stib rëb me:

—¿Nligaa cho nac luu? Bnë tel nli Xpëed Dios nac luu, Men ne nacle diidz ga cxeel me lo guidzliu.

⁶² Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶³ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—, ⁶⁴ laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

⁶⁵ Dzigo hor co blalaa zho laa zho psilo noutsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiñ luu?

Ye grë zha ne quianap ga, rgap zho lo me.

*Rëb Pedr runbeyd Pedr Jesús**(Mt. 26:69-75; Lc. 22:56-62; Jn. 18:15-18, 25-29)*

⁶⁶ Laa Pedr bii zoque ley. Ga zo Pedr, zeene laa tib wnaa ne nac zhicriad meṅ rnabey co bdiṅ; ⁶⁷ goṅ me laa Pedr zob gax lo gui nodzëe Pedr. Dze rwi me lo Pedr, tibaque zeene rëb me:

—¿Ye luu lëe rzënie Jesús, meṅ Nazaret ne bdiṅnie zho i?

⁶⁸ Per bneelid Pedr.

—Dieen pe rooṅ luu —rëb Pedr—. Runbeyd naa meṅ co.

Brieega Pedr zie Pedr nëz ro zawan, lëëtaque hor co pcuedz tib gall.

⁶⁹ Dzeque rwi wnaa co lo Pedr; dzigo rëbchaa me lo grë zha ne ndxie ga:

—¡Lëëw, zha ne rzënie me nac mguí qui!

⁷⁰ Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie meṅ co. ¡Zha Galilé name nac luu!

⁷¹ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—¡Dios zobwi ganle, telne rned naa diidzli, maase cuibdee naa!

⁷² Lëëtaaque hor co laa gall pcuedz stib. Dzigoraa psoladz Pedr xtiidz Jesús zeen rëb me lo Pedr: “Gardle grop gall, tsonle vuelt rëb luu runbeyd luu naa.” Dzigo mbanse rac Pedr, psilo Pedr biin Pedr guieṅne co.

15*Güeynie zho Jesús lo Pilat**(Mt. 27:1-2, 11-14; Lc. 23:1-5; Jn. 18:28-38)*

¹ Ziadyiinile liuw, scase bii nchooṅ rnaw, wbiire pcaalsa grë pxoz non grë zho zha ne rnabey lo maistr ley, grë zha non lo menquiedz ni grë zha ne nac zhiwxtis zho. Blozhse bnediidz zho, laa zho pxidoo Jesús güeyšan zho me lo Pilat meṅ ne nac gobernador.

² Bdiṅ me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

³ Tibaque quia grë zha ne nac pxoz non, rzadraa grë ncuaaṅe rcaadz zho me. ⁴ Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuaaṅe rcaadzdoṅ zho luu.

⁵ Bzee zdoo Pilat goṅ Pilat ible pquiabd me.

*Bnab zho guet Jesús**(Mt. 27:15-31; Lc. 23:13-25; Jn. 18:38-19:16)*

⁶ Gzobse lni Pascw rsilaa Pilat tib zha ne no ladzguiib, tel cho zha ne gnabtaa menquiedz laa. ⁷ Len dze co no tib mguí lë Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeene goctseeb zho lo gobiern. ⁸ Nacne psilo grë miech co, rnab zho lo Pilat csilaa Pilat tib zha ne no ladzguiib zigne runtaque Pilat grëraa iz.

⁹ Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa meṅ ne rnee zho zhirey to nu?

¹⁰ Sca rëb Pilat lo zho, sac nanle me niapse por rlëe grë pxoz non co ran zho Jesús gane rnabey zho bgaa me güeyšan zho me ga. ¹¹ Per lel psilo grë miech co rnab zho csilaa Pilat Barrabás; ni lëëque grë pxoz co pquiil zho. ¹² Dzigo rëb Pilat lo zho:

—¿Zha dzigo racladz to gac meñ rnee zho zhirey to nu?

¹³ Pquiab be grë miech co, roptsie zho rnee zho:

—¡Bnabey yquia me lo cruz!

¹⁴ —¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¡Bnabey yquia me lo cruz!

¹⁵ Goñ Pilat zha rac zho ni racladzaque me guianñziuu me lo zho, nacne mazd bzoob me xtiudz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús ntregar lo grë menguiib ne tsieyquiaa me lo cruz.

¹⁶ Biire grë menguiib co bzëëbnie zho Jesús nëz leñ yulow, ga pcaalsa grëraa menguiib ne nacgrë zho. ¹⁷ Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey. ¹⁸ Dzigo psilo zho nguedz roptsie zho rnee zho:

—¡Golwi ganle zha ractaa zhirey zha Israel!

¹⁹ Bzhen zho tib goobgui, rdeed zhow guic me, rtsuc zho lo me, rquiaalo zho rquitsgzhib zho lo me zig rquitsgzhib zho lo zha non.

Güeyquiaa zho Jesús lo cruz

(Mt. 27:32-44; Lc. 23:26-43; Jn. 19:17-27)

²⁰ Blozhse sca bdziitnie zho me, laa zho blee lar morad ne nacw me ga, biire zho bgacw zho me mine nac xab me; dzigo laa zho brieenie me ga zienie zho me zaatne yquia me lo cruz.

²¹ Nëz zienie zho me, bdzieel zho tib mgui Ciren lë Simón (lëë pxoz Lejandr ga grop Ruf), znu ziaad me wbire me dan. Dzigo bnabey zho me bi me zhicruz Jesús.

²² Zeene bdziñnie zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”); ²³ ga bdeed zho nziuu notsa guizh rmed ne lë mirr, nan zho nie mew, per god mew. ²⁴ Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaanñie zho tib lëgaw tib tib zho, laa stiba bio zho rif. ²⁵ Zig hor wxeeren ga pquiaa zho me lo cruz.

²⁶ Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psacsi zho me, rneew: “LËË MEN RII QUIA NU, PORNE NAC ME ZHIREY ZHA ISRAEL.” ²⁷ Ye chop ngbaan pquiaagza zho me lo cruz, tiba ga zhicruz zho bzo tib nëz cho zhicruz me. ²⁸ [Ga brieequia mine raquiet lo Xtiudz Dios, zaatne rnee: “Bloo zho me lad zha ntseeb.”]

²⁹ Grë miech ne rded zaatne quia me lo cruz ga, runnguzee zho me, rzhidznie zho me, haxta rdzi guic zho rnee zho lo me:

—¡Pe led rëb luu lëë, laa luu ntsil yadoo ni tsonaque ngbidz nzaalo luuw stib! ³⁰ Nana zho, ¡pe gacd lëëque luu bla luu lo caxtigw qui, biet lo cruz qui!

³¹ Scasaque grë pxoz non ni grë maistr ley, rzhidznie zho me; rnee zho:

—Stib miech scataa beenguiac me, stib miech scataa bla me, pe nac dzigo rrieelod me gla me me. ³² ¡Telne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiagza me lo cruz ga, rbidzgo zho lo me.

Gut Jesús

(Mt. 27:45-56; Lc. 23:44-49; Jn. 19:28-30)

³³ Goḷ goḷ dzew, tibaque zeene goc tib ncow dipse lo guidzliu, haxta las tres bīaa biini stib. ³⁴ Horco nguiedz zēeb tsi Jesús, rnee me:

—¡Eloi, Eloi! ¿Lama sabactani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

³⁵ Grē zha ne ndxie ga, zeene bin zho sca rbedz me, no zho nañ Lí, men ne biadteed xtiidz Dios padzeela, men co rbedz me. ³⁶ Dzigo rias tib zho güeygadz tib lē zhiil lo nziu bla, bzoob zhow tib guic goobgui pquiaa zhow ro me.

—¡Gotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷ Tibaque zeene pquiaa me stib redz nroob, znuse blozh me.

³⁸ Lēētaaque laa me nolozh, zeene briez nzoli lar nroob ne quia len yadoo, groltaa goca. ³⁹ Gax lo me ga zo men ne rnabey lo grē menguiib co, zeene gon men co zha gut me, rēbchaa me:

—¡Ne nligaa, Xpēed Dios nac men qui!

⁴⁰ Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José. ⁴¹ Nzianlaa nac zho, lēē grē wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdziñ me Jerusalén.

Bgueets Jesús

(Mt. 27:57-61; Lc. 23:50-56; Jn. 19:38-42)

⁴²⁻⁴³ Lēētaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnaab me diidzbey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambēz gdziñ dze ne gnabey Dios.

⁴⁴ Bzee zdoo Pilat zeene bin me laa Jesús gutle. Bnabey me gocredz zha ne rnabey lo menguiib ne quianap Jesús; ⁴⁵ haxta bdziñraa men co rēb nliw, dzigoraab bdeed me diidz tsielit José Jesús lo cruz.

⁴⁶ Nacne güey José, güey si me tib lē lar nroob. Zeene blozh blit me Jesús lo cruz pcheḷ me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷ Ga zo Marí Magdal ni Marí xniaa José, gon zho pa lo bgueets me.

16

BRIEBAN JESUS

(Mt. 28:1-10, 16-20; Lc. 24:1-53; Jn. 20:1-23)

¹ Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güey si zho grē nceit nex ne tsietēeb zho lad xcuerp Jesús. ² Laa zeene biini liu, dze ne rzobni zhmaal, silgaw loxaque ziaadlan ngbidza laa gza wnaa co brie laa zho zie ro baan Jesús.

³ Nēz no zho, rnabdiidzlsa zho dien zha gdiob quie nroob ne niioog ro baa, cho siguiel coba. ⁴ Ni zeene bdziñ zho, gon zho laa quie co bdiiooble.

⁵ Laa zho bzēeb len baa, zeene gon zho nēz derech laa tib mgui nguieg zob ga, nacw me tib lar nool, dib nquitsbiese rna lar co. Bdzieb zho gon zho me;

⁶ dzigo rēbchaa me lo zho:

—Gdziebde to. ¿Jesús lēē, men Nazaret ne pquiaa zho lo cruz, men co ziaadguib to? Guiendle me nu, ¡laa me brieabanle! Goḷwi ganle nu nac zaatne

pxob zho me. ⁷ Gołtsie, gołguiab lo Pedr ni lo grëraa xpëëdsuel me tsie zho Galilé, ga tsiedzieel zho me zigne rëble me lo zho glo.

⁸ Rias gza wnaa co laa zho brieë ga, masaque rzhidz zho rdzieb zho. Lo dzeb co ni par gnee zho gacd.

⁹ [Dze ne rzobni zhmał ga, sil co brieëban Jesús, ni Marí Magdal nac zha ne glopaa goñ me; lëë Marí co ga beënguiaç me zeëne beñcxooñ me gadz menđox ne nosacsi Marí. ¹⁰ Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquiełñe me.

¹¹ Niicle bin zho rëb Marí laa me brieëbanle, goñlo Marí me; per bliladzd zhow.

¹² Bded ga, brieëquia me lo schop xpëëdsuel me lëëtaque no zho nëz zie zho dan. ¹³ Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladzd zho.

¹⁴ Laa stibtaa vuelt, lëëtaque ndziib zho lo mezh no zho wagw gza tsiiptib zho, tibaque zeëne laa me brieëquia; dzigo goctox me lo zho sac goñ me ib bliladzd zho xtiidz me; ni goñ me scataa nad zdoo zho, sac niicle güey zha ne goñ me güeynie zho diidz ne nli brieëban me, ni bliladzd zhow. ¹⁵ Ni rëb me lo zho:

—Gołtsie dipse lo guidzliu, gołtsieseed miech Xtiidz Ndzon Dios. ¹⁶ Grëse zha ne dib zdoo gliladza ni chobnis zho, scaania Dios zho; sangue zha ne gliladza, laa zho bnitlole ga. ¹⁷⁻¹⁸ Grë zha ne sca dib zdoo gliladz naa: znee zho stib diidz ne rneed zho. Niicle xen zho grë meeł ntseeb, concuaangaa miech zho, ib peet gacd zho. Ni zeëne cxobnia zho guic grë men rzacñe, zunguiac zho zho; grë menđox ne noguitnie miech, zeëne gzeet zho lë naa zuncxooñ zho ma.

¹⁹ Blozhse sca bnee me lo zho, laa me zey gbaa bzob me cue Dios nëz derech.

²⁰ Dzigo grëse xpëëdsuel me laa zho brieë, brieëts bliaal zho zieseed zho miech Xtiidz Dios. Ni me nac men ne noyacniën zho ruñ zho grë milagr nroob, zeëna glu ne nli Xtiidz me nac miñe noseed zho miech.]

XTIIDZ NDZON DIOS MINE PQUIAA LUC

¡Diuzh Tiofl!

¹ Nanle luu ganle, nole bla zha ne bioxco pquiaa zho grë ncuaañe goc zeene bíaad Jesús men ne pxeel Dios ga. ² Ncuaañe nlipaa goca, grë ncuaañe pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzëniepaa mew, zha ne pso me noneew lo miech.

³ Yeque naa pquiaa naa wen wen bnabdiidz naa, bleeni naa diidz grëse dien zha psilo grë ncuaañ co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnañ luuw; ⁴ zeena lozh gacnañ luu zha nac diidzli rii, wseed ne blu zho lo luu i.

⁵ Len dze ne nac Herod rey rnabey me dib xtan zha Judé, len dze co no tib pxoz lë Zacarí, me nac tib zha ne nacgrë “Zha Abí”. Niicle tseeel mew, zha xtií pxoz Aarón ziaad wnaa co, lë me Lisabet.

⁶ Zigtaa Zacaríw, zigtaa Lisabeta, noxco me mine rnabey Dios, mban mew zigne naca, ni tib xley Dios rguiitsd me. ⁷ Men gol-le nac me grop me, per ni tib mëéd quianied me, sac niaad Lisabet gapd me mëéd.

⁸ Laa tib dzew bgaa grë zha ne nacgrë Zacarí gun zho dziin len yadoo. ⁹ Nac xcostumbr grë zha ne nac pxoz, rio zho tib rii dien chopaa yгаа tsielaadz goxyaal len yadoo, dzigo bgaa Zacarí. ¹⁰ Goxyaal co nolaadz me len yadoo, laa grë miech ne ndxie nëz ley nonabгаа lo Dios, ¹¹ tibaque zeene brieequia tib xanjl Dios bzo cue pcoog nëz derech, zaatne nozëëg me yaal ga. ¹² Zeene gon me anjl co bdzieb me, rdzieldraa me zha gun me lo dzeb co. ¹³ Dzigo rëb anjl co lo me:

—¡Gdziebd luu! Diidzse zialnie naa lo luu, gacnañ luu ganle mine bnab luu lo Dios ga, pquiaadiag mew; gane niina laa tseeel luu gap tib mëédbgui. Zeene gal win, Juan cuelel to win. ¹⁴ Tib guiebley nroob gac win lo to, niicle lo grëragaa miecha, ¹⁵ sac tib men nziuu gac win lo Dios. Zeene gac win zha broob, ni tib ro nziu guied win, per ni vin yquiaarod win; ansraa gal win, laa Espíritu Sant nacniele win. ¹⁶ Win gac men ne co guic nzian grë zha Israel, gbiire gbig zho lo Dios, men ne rnabey zho. ¹⁷ Zigne goc Lí, men ne bíaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmengol zho zha ne bleynie me; csaan zho grë xquieIntseeb zho, gban zho zigne racladz me; zeena niowse gac zho ycaania zho me.

¹⁸ Pquiab Zacarí rëb Zacarí lo anjl co:

—¡Ncuaañe gacd i gon rnee luu! Zigtaa naaw, zigtaa tseeel naaw, mengol-le nac no.

¹⁹ Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii. ²⁰ Per ne squi riladzd luuw, na laa luu guiaañ ngop, haxta gal dze ne gac mine rne naa lo luu nu, dze co glan xtiidz luu stib.

²¹ Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rried me zaatne ziezëëg me yaal ga. ²² Zeene brieë me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

²³ Bzase dze ne been me dziin len yadoo, dzigo laa me zey lidz me. ²⁴ Goca bla ngbidz, laa mëéd co pquialo zdoo tseeel me.

Dipse len gaay mēē bio zhuz co ro yu, ib bried me, rley me rnee me:
²⁵ —jZha wentaa Dios, bneedz me diidz bdziñ dze yquianie naa mēēd rii, zeena gzhidzniedraa miech naa!

Güeynie tib anjl diidz laa Jesús gac mēēd

²⁶ Goc xoop mēē zoney Lisabet mēēd, pxeel Dios anjl co stib güey me Nazaret, guiedz ne ndxie xtan zha Galilé. ²⁷ Ga no tib ndzooop nguieg lē Marí, len dze co no xtiidz ndzooop co ctsieelna ndzooop tib zha xtií rey David, lē José.

²⁸ Bdziñ anjl co zaatne no ndzooop, pquiaabdiuzh me ndzooop, rēb me:

—jDichos luu gon, sac tib zha nziuu nac luu lo Dios! Me quianap luu.

²⁹ Zeene gon Marí anjl co, ni gon Marí zha rnee me, bzee zdoo Marí, riend Marí dien pe nac scataa rzē xtiidz me. ³⁰ Dzigo rēbchaa me lo Marí:

—jGdzieebd luu! Laa Dios gon bzooblo luu ygaa luu tib guielnzaac nroob.

³¹ Zdoo luu yquiaalo tib mēēdbgui, zeene laa win gal, JESUS cueelē luu win.

³² Tib men nroob gac win, zien miech ganle Xpēēd Dios ro ne no gbaa nac win; ni so me win gnabey win zig bnabey xmengol win David. ³³ Win gnabey lo grēse zha Israel, ni gdziñd dze ne lozh xquielnabey win.

³⁴ Pquiab Marí rēb Marí lo anjl co:

—jMēēd ye? jPer zha grieelo gap naa mēēd, ni tib naa zo nu?

³⁵ Rēbchaa anjl co:

—Niapse por poder ne rap Dios gac miñ co. Zeene laa Espiritu Sant guiaad gacnie luu, hor co laa poder co gacnie luu, laa mēēd co yquiaalo zdoo luu; gacxe waa Xpēēd Dios gunbey miech win, miñe rnabey Dios miñ co gun win.

³⁶ Ye belyeen luu Lisabet, niina lo guielgol-le laa tib mēēd pquialo zdoo me; zēēb diidz ib grielod gap me mēēd, per na racle xoop mēē zoney me mēēd,

³⁷ sac par Dios tsod ncuane grielod gac.

³⁸ Dzigo rēb Marí:

—Tel scaw, miñe rnee luu i, maase gaca. Laa naa zo nu par gun naa miñe gnabeytaa Dios naa.

Blozhse ga, laa anjl co zey.

Güeygan Marí Lisabet

³⁹⁻⁴⁰ Goc bla dzew, briede Marí ga zie me ziegān me Lisabet tib guiedz win ne ndxie gui glaa ne nac xtan zha Judé. ⁴¹ Bdziñ me, wbig me pquiaabdiuzh me Lisabet. Bdiuzh co bnee me, zeene biasoli xpēēd Lisabet zdoo Lisabet; dzigo hor co bdeed Espiritu Sant guielbiini lo Lisabet, ⁴² nguiedz bnee Lisabet rēb me lo Marí:

—jDichos luu Marí bgaa luu guielnzaac qui! Sac gon, lo grēraa no nac no men wnaa, luu bzooblo Dios. Mēēd ne zoney luu i, zha nziuu nac win lo me.

⁴³ jib guiaanladzd naa dze rii, znu biaad luu nac luu xniaa men ne rnabey nua, biaadgan luu naa! ⁴⁴ Haxta mēēd ne zoney naa nu, rley win biasoli win zdoo naa, zeene pquiaabdiuzh luu naa. ⁴⁵ jDichos luu, bin luu miñe nē Dios, ni bliladz luu zun mew!

⁴⁶ Dzigo hor co bnee Marí rēb me:

jMen nroob nac Dios! jGdib zdoo naa roolnie naa me!

⁴⁷⁻⁴⁸ Rleynie naa me nac me men ne psilaa naa, sac gon niicle peet nond naa, tib ngundziin winse nac naa lo me, per laa me bzooblo naa.

Grē miech, zigtaa len dze riw, zigtaa len dze ne ziaadragaaw, ziab zho naa nac tib wnaa ne mazdraa dichos.

⁴⁹ Ne nligaa zha nactaa guielnzaac rii bneedz me lo naa.

Men ro, men nroob nac me, jguienndraa cho zig me!

⁵⁰ Grëse miecha, zha ne rioxco rquiaadiag miñe rnabey me, tibaque racnie me zho, ib rsaand me zho.

⁵¹ ¡Golwi ganle zha nactaa grë ncuaañe run me!
Grë ncuaañe no guic zha niats gun zho, bnitlo mew,

⁵² ptiche me grë zha ne zob rnabey.
Laa grë zha ndooladz, zha ne rzac miech peet nond, beennon me zho.

⁵³ Grë zha mban ne guiend pe yquiin, nroob guielnzaac ne bdeed me lo zho, laa grë zha ne rapchen, scase bzonëz me zho.

⁵⁴ ¡Pe zhidaa ziyacnie me grë zha ne nac xtii Israel, mençol ne goc zig tib ngunzdiin lo me ga! ¡Tibaque rlu me rleynie me zho!

⁵⁵ Ib biaanladzd me xtiidz me miñe bnee me lo pxozgol ne Abraham, zeene rëb me gdziñd dze ne csaan me Abraham, ni grëraa zha ne greequia lo xtii Abraham.

⁵⁶ Maase tson mëë biaan Mari ga blëz me lo Lisabet, dzigoraa wbi me ga bdziñ me lidz me stib.

Gol xpëed Lisabet

⁵⁷ Bdziñ dzew, laa xpëed Lisabet bza mëë, laa me gop win. ⁵⁸ Grë zha ne no gax lidz me, grë zha ne nac menlidz me, zeene bin zho scataa pquia zdoos Dios me bdeed Dios mëed co lo me, rley zho güeygan zho me.

⁵⁹ Dze ne goc mëëdbgui yeen co xon ngbidz, blalaa zha ne güeynal zhits pxoz win, zhits xniaa win güeynie zho win bio win bey ne rio xpëëdbgui zha Israel, parne glu lo Dios ngab win. Tibaque nan zho Zacarí nrieelë win, zigne lëque pxoz win, haxta scale nonee zho lo win, ⁶⁰ per hor co rëb Lisabet, led scad gac lë win, Juan grieelë win.

⁶¹ Dzigo pquiab zho rëb zho:

—¿Pe nacne sca grieelë win? Ni tib menlidz to lëd Juan.

⁶² Bnabdiidzaque zho lo pxoz win, blu zho señ lo me dieñ zha racladz me gac lë win. ⁶³ Dzigo bnaab me bdeed zho tib lë lo zaatne yquiaa me; bzee zdoos zho zeene blozh pquiaa me gon zho rnee lo co: “Juan grieelë win.” ⁶⁴ Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios. ⁶⁵ Grë zha ne zo ga, zha ne runbey me, zeene gon zhow, per nli rzee zdoos zho.

(Nëzrii nëzrec bzhoon diidz laa mëed co gol, grëse guiedz ne ndxie gui glaa co gocnan miecha. ⁶⁶ Zha ne rona, rza zdoos zho rnee zho: “¿Bay cho gac mëdyeen co?” Sac nligaa rlu nacnie Dios win.)

⁶⁷ Horco bdeed Espiritu Sant guielbiini lo Zacarí, psilo me bnee me rëb me: ⁶⁸ ¡Xquizh xquielnzaac men nroob ne rnabey, men ne nac xDios ne nac ne zha Israel!

Sac gon laa me ziaad, ziaadgan me ne, ziadbee me ne lo xquielnë ne.

⁶⁹ Nasi laa me pxeel men nroob ne ziaadsilaa ne, lëë men co ga no greequia lo zha xtii David, men ne been xtsiin me ga.

⁷⁰ Padzeelale bzeet me cxeel me men co, grë zha ne biaad pteed xtiidz me, bzeet zhow.

⁷¹ Rëb zho, ib sxeel me men ne guiaadsilaa ne ladznia zha ne nosacsi ne, zha ne rlëë lo ne.

⁷² Sac ib gdziñd dze csaan me grë zha xtii pxozgol ne, rquianëpaa zdoos me zho.

Ib guiaanladzd me miñe rëb me lo Abraham,

⁷³ zeene rëb me laa me cxeel men ne csilaa ne,

⁷⁴ zeena dziodzbedraa ne lo zha ne rlëë lo ne, lo zha ne rsacsi ne;

sinque ine tibli gac ne dziuun ne mine rnabey me.

⁷⁵ Gzataa dze ne gneedz me guielmban lo ne, ine mbe zdoo ne, dziuun ne mine rleynie me.

⁷⁶ Luu gon xin, bzooblo Dios ro ne zob gbaa, cteed xtiidz me lo miech, luu tedner tsienee luu lo zho, laa men co no guiaad.

⁷⁷ Luu gnee lo grë zha Israel, guien zho ganle zha gon Dios zho perdon, parne ycaania me zho.

⁷⁸ Ne nligaa rleynie me ne, rquia zdoo me ne, gane laa me cxeel Xpëed me, men co gac zig tib biini,

⁷⁹ Biini co gziini lo grë zha ne mban lo guielcow, zeena biini co glu nëz lo ne, guio ne nëz ne peet zhgab, peet dzeb guienđ.

⁸⁰ Zigse zie dzew, scase scase zieroob mëdyeen co, ni scaquegaa dib zdoo win rleynie win Dios. Zeene laa win broobpaa, dzigo güey win bio win tib dan zit, haxta bdziñ dze ne laa win psilo pseed miech laa win blulo lo zho.

2

Gol Jesús

(Mt. 1:18-25)

¹ Lëëtaaque len dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnan me dien palal zho. ² Lëë primer vuelt ga ptop zho lë miech, lëë iz co zob men ne lë Cïrein zobnabey me guiedz Siria.

³ Bnabey August grëse miech zha ne no stib ladz ben, laa zho no tsie zaatne nacpaa ladz zho tsiedeed zho lë zho, parne ga ygab zho. ⁴ Min co nagon nacne brie José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmengol me rey David. ⁵ Gard ctsieelniapaa me Marí, per nole xtiidz me grop me. Len dze co ziaadyobpaa gal xpëed Marí.

⁶⁻⁷ Bdziñ me Belén, bgaadraa me zaatne nrieelo mbëz me len yu, lega nac ti len lidz ma bdeed zho blëz me. Lëëtaaque bdziñ me ga, laa mëed co gol. Racse Marí pchel me win lar, bdiix me win tib len yag ne row ma guizh; lëë mëedglo ga lo me.

⁸ Guieel co, blalaa zha ne nac baxtor, laa zho ndxie quianap zho xpëcwxiil zho dan, ⁹ tibaque zeene brieequia tib xanj Dios lo zho, dipse zaatne ndxie zho ga biab tib biini nroob. Zeene gon zho anjl co, gon zho biini nroob co, per nli bdzieb zho. ¹⁰ Dzigo bnee anjl co, rëb me lo zho:

—iGdziebde to! iGolgon diidz cub ne ganle zialnie naa lo to nu! iTib guielbley nroob gac diidz riil lo grëse miech! ¹¹ Men ne gon quiambëz to ga guiaad csilaa to, laa me blansole lo guidzliu. Me nac Men ne zëëble diidz ga cxeel Dios, me nac men ndzon ne rnabey. Belén, zaatne goc ladz rey David, ga gol me naguieel. ¹² Goltzie, zaatne tsiedziel to tib mëedbgui yeen, nrielse win lar zhoob win len yag ne row ma guizh, lëë me ga.

¹³ Tibaque zeene gon zho laa stib dzoon anjl brieequia gocgrë anjl ne quianee lo zho ga, psilo grë anjl co roolnie zho Dios, rnee zho:

¹⁴ iHaxta zaatne glaaraa gbaa, nozhoobnen ganle pa lotaa men nroob nac Dios!

iNasi, grëse miech zrieelo guiaanwen zho lo me; zdoo me rala laa me nobedz zho!

¹⁵ Zeene laa grë anjl co zey gbaa stib, psilo grë baxtor co rnee zho:

—iNiinaga golgotsaa guio Belén! iGotsaa guiowi ne dien, zeena dzian ne mine biaadnie anjl co diidz lo ne nu!

¹⁶ Lëälëd bio zho nëz laa zho zie. Bdziñ zho zaatne blëz José ga grop Marí, nligaa laa mëdyeeñ co nix ga, nixse win tib leñ yag ne row ma guizh. ¹⁷ Dzigo bzodiidz zho grëse zha rëb anjl co lo zho, zeene güeynie me diidz laa win gol.

¹⁸⁻¹⁹ Grë zha ne bina, per nli rzee zdoo zho; laa Marí nosew zdoo me, tibaque rsoladz mew.

²⁰ Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanj me güeynie diidz lo zho, rley zho sac brieelo gon zho mëdyeeñ co.

²¹ Dze ne goc xon ngbidz gol win, dze co bio win bey ne rio xpëëdbgui zha Israel, par glu xnëz Dios ngab zho; dze coquew bleelë zho win JESUS, zigne rëb xanj Dios zeene güeynie me diidz ne laa win gac mëed lo Marí.

Güeynie zho Jesús yadoo

²²⁻²⁴ Nac ley ne psan Moisés lo zha Israel, wnaa ne sca rap mëëdbgui, zeene rac zho tap zmal, none tsienie zho chop ma cogan zho leñ yadoo; yase tsienie zho tib nëz coc, tib nëzgaal palom. Ni rnabeya: “Grëse mëëdbgui ne rac mëëdglo, ib none gdeed zho win gac win tib zha ne gon xtsiin Dios.” Nacne zeene bza dze co, dzigo brie Marí zie me Jerusalén grop me José, zienie me mëdyeeñ co yadoo csan me win ladznia Dios; lëe nëzle ga zienieque me gon ne no gdeed me ga.

²⁵ Lëëtaaque dze ne bdziñnie zho win leñ yadoo, laa tib meñ lë Simeón no ga. Meñ Jerusalén nac meñ co, rleynie me Dios, rioxco me mban me zigne rnabey Dios, ni nacie Espíritu Sant me. Quiambëz me gan me Meñ ne nole diidz ga cxeel Dios csilaa zha Israel, ²⁶ sac rëble Espíritu Sant lo me ible laa me no gan meñ co. ²⁷ Laa dze co, Espíritu Santaque psiaab guic me zie me yadoo. Nacne lëëtaque no me leñ yadoo, laa zho bdziñnie mëdyeeñ co ga, ziesan zho win ladznia Dios zigne rnabey ley. ²⁸ Dzigo me wbig bdeedz win, rdeed me xquizh lo Dios, rëb me:

²⁹ Xquizh xquielnzaac luu Dios, miñe në luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu rii!

³⁰⁻³¹ ¡Meñ ne nacle diidz cxeel luu guiaadsilaa miech lo xtoł zho, grop lo naa laa naa ran me niina!

³² ¡Grëse miech ne ndxie lo guidzliu, me nac biini ne gziini lo zho!

¡Me csanñziuu zha Israel, ne nac zho zha ne ngab lo luu!

³³ Zeene gon Marí grop José scataa rzë grë diidz ne rnee Simeón rzeet Simeón mëdyeeñ co, bzee zdoo me. ³⁴ Dzigo bnab Simeón lo Dios gacniën Dios me gza me mëdyeeñ co. Blozh ga, rëbchaa Simeón lo xniaa win:

—Tib guielbley nroob ne gac mëed rii lo zha Israel, por win ndal zho grieel lo guielcow ne no zho, laa zho gbig lo Dios. Ni scagaa zrieequia zha ne glëenie win, per lëëque zha csacsi zho ga. Mban gac zdoo luu, nroob guielne ne tso luu gan luu zha sac miech win. ³⁵ Ga glu ganle zha nac zdoo tib tib miech.

³⁶⁻³⁷ Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, leñ dze co rac tapgal tap iz biaan me viud. Nguieg me ptsieelnie me, per loxaque gadz iz wbannie me tsiel me. Lëe pxoz me ga brieelë Fanuel, lëe zhey co ga nac zha xtii Aser. Tib meñ ne rteed xtiidz Dios lo miech nac me, ³⁸ dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëe mëdyeeñ co ga nac meñ ne quiambëz zho ga guiaadsilaa zho.

³⁹ Blozhse been José miñe rnabey xley Dios grop me Marí, dzigo laa me wbi ga. Bdedraa ga, beynie me mëed co Nazaret, zaatne nac ladz me. ⁴⁰ Ga

broob win, zigse zierooob win scase scase rac macis win, scase riabiiniraa win. Tibaque nacie Dios win.

Biaan Jesús len yadoo

⁴¹⁻⁴² Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mēēdbgui ne rap lalga iz, zrieelole tsie zho lo lni co.

⁴³ Zeene laa lni co bded, laa me bio nēz grop me laa me wbi ga. Ib biend me biaan win Jerusalén, ⁴⁴ tibaque güeynie guic me lad grēraa miech ne wbiere lni, lad co zienal win. Laa me no nēz, zeene bdzetaa dzew, laa me psilo rguib win, bnabdiidz me lo grē zha lidz me, lo grē zha ne runbey me, ⁴⁵ per ni tib zho choot rdeete win diidz. Nacne wbiereque me nēz Jerusalén stib, zieguib me win.

⁴⁶ Dze ne racle tson ngbidz blozh lniw, dzigoraa güeydziel me win len yadoo, laa win zob lo grē zha ne nac maistr ley, noquiaadiag win grē zhiwseed zho ni nzian grē ncuane rnabdiidz win lo zho. ⁴⁷ Rzee zdoo zho ran zho scataa nixbiini win, niicle zeene rnee wina, zeene rtsiregaa win lo xtiidz zho. ⁴⁸ Zeene gon me laa win zob lad grē men co, bzee zdoo me; dzigo rēbchaa xniaa win lo win:

—Xin, ¿pe nacie squi been luu? Ptseeb luu no gon, quia no grop no pxoz luu noguib no luu.

⁴⁹ Pquiab win rēb win:

—Nguibde to naa. ¿Pe rande to ib none gon naa xtsiin Pxoz naa?

⁵⁰ Ib biend me pe nacie sca rēb win. ⁵¹ Dzigo laa win zienal zhits me, laa me zeynie win Nazaret; nose grē min co zdoo xniaa win.

Tib mēēd nguzobdiidz nac win, ron win xtiidz me. ⁵² Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

3

Psilo Juan Bautist noseed me miech (Mt. 3:1-12; Mr. 1:1-8; Jn. 1:19-28)

¹⁻² Bdzin dzew, laa Juan psilo pseed miech. Lēē len iz co rac tsiin iz zob men ne lē Tiber nac me rey, rnabey me grē guiedz ne ngab lo zha Roma. Len dze co zob Pilat rnabey me grē guiedz ne ndxie nēz Judé, laa Herod zob rnabey grē guiedz ne ndxie nēz Galilé. Len dze coque zob bets Herod, men ne lē Lip rnabey me grē guiedz ne ndxie nēz Ituré ni nēz Traconit; laa Lisian rnabey grē guiedz ne ndxie nēz Abilin. Zha ne nac zhipxoz nroob zha Israel len dze co, nac Anás ni Caifás. Len dze copaa nagon güeynee Dios lo Juan (xpēēd Zacari) dan ngan ne no Juan ga.

³ Nacne hor co psilo Juan güeyted me grē guiedz ne ndxie ro guiubee Jordán, rnee me lo grē miech co, csaan zho xquielntseeb zho gbig zho lo Dios ni chobnis zho, zeena csilaa Dios zho lo grē xtol zho. ⁴ Ga brieequia mine bnee Isá, men ne bиаad pteed xtiidz Dios, zeene znu pquiaa me:

Bii zon miech ganle zeene laa tib tsi men zēēb tib dan ngan, rnee me:

“Golzhixcuaa nēz ne ted men ne rnabey, golsaan grē guielntseeb ne run to.

⁵ Zaatne nac len blē, golscodzēēw, grē gui glaa, grē gui las, golsiaablow.

Nēz ne niecw, nēz ne quiaya quiaguiet nac, golszhixcuaaw.

⁶ Grëse miech, laa zho gaṅ meṅ ne pxeel Dios ga ziaadsilaa zho.”

⁷ Zeene raṅ Juan laa miech rdziṅ lo me cchoobnis me zho, rnee me lo zho: —iMiech ngoopdol, masaque nac to zig nac meel! Naṅ to na lëë, loxaque chobnis to laa to laale lo grë guieṅnëdox ne ziaadyob guiaad. ⁸ Led scada gon, none ndzinli gban to zeena glu nliṅ paaṅ to xquieṅntseeb to. Ni gacniatsde to guiab to, loxaque por nacse to zha xtiṅ Abraham, laa Dios csilaale to; sac gneli naa lo to ganle, telne gacladz Dios, haxta grë quie zac gnabey me tsaalow miech ne gac zha xtiṅ Abraham. ⁹ Nanle to ganle, grë yag nex ne rquiad nex lo, zeene raṅ zho sca naca, rchug zhow, rzëëg zhow; scadaa nagon sac grë zha ne gband zigne racladz Dios, ib tedlaad zho lo gui; sac rrieequia laa me nzenle xquibyag me, cchug me grë yag ne sca nac.

¹⁰ Dzigo rnabdiidz zho lo Juan, pe no guṅ zho parne ygaad zho grë guieṅnë co. ¹¹ Dzigo rquiab me rnee me lo zho:

—Telne quianie to chop lar ne racw to, none gdeed to tiba lo zha ne guieṅd xab; telne quianiegaa to ncuaaṅe gow to, none gdeed to palala yquiiṅ zha ne quianieda.

¹² Wbigaque bla recaudador ne zie chobnis, rnabdiidz zho dieṅ pe guṅ zho. ¹³ Pquiab Juan, rëb Juan lo zho:

—Cuandraa to samiech to, miṅe rieguiaṅse zho quizh zho, miṅ co goṅnab lo zho.

¹⁴ Ye zla meṅguib wbig, rnabdiidz zho rëb zho:

—¿Telzhe no waa, pe nac miṅe dziuun no?

Rquiab Juan rnee Juan lo zho:

—Ndzinli golgac, ib ctebde to samiech to par dieṅ pe gla to lo zho; zha ne peet xtold, ib yquiaaquide to zho ncuaaṅe beṅd zho. None sac zdoo to dimi ne quiaayazh to.

¹⁵ Nzian grë miech co quiambëznë zho gacnaṅ zho dieṅ pe lëële Meṅ ne bzooblo Dios ga cxeel me nac Juan. ¹⁶ Dzigo rëb Juan lo zho:

—Tib wrobnisse nu rnedz naa lo to, saṅgue meṅ ne no guiaad ga Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa meṅ non nac me, tel naa peet nond naa, per ni par tib ngundziin ne glit lab me ni me, raguiald naa gac naa. ¹⁷ Laa me guiaad zig tib zha ne rbeeguizh zhobxtil, sac zha co, rlozhse rbeeguizh zho zhob rgotsow zhow, laa paj rlaal zho lo gui, ga reca. Per gui ne gzëëg grë paj ne guiadbee me ga, gdziṅd dze guiuuw.

¹⁸ Sca rnee me lo zho, par guieṅ zho zha nac Xtiidz Dios. ¹⁹ Tib vuelt haxta lo rey Herod goctox me, sac lëëque Herodī, wnaa ne nac tsiel bets Herod nonie Herod; grë guieṅntseeb ne quiaayun Herod, blisqui mew. ²⁰ Per laa ne nion Herod diidz, lel beṅ me stib guieṅntseeb, bnabey me bgaa Juan bio Juan ladzguib.

Brobnis Jesús

(Mt. 3:13-17; Mr. 1:9-11)

²¹ Leṅ dze ne nochoobnis Juan miech ga, tib dzew laa Jesús bdziṅ lo Juan ga, ye me bnaṅ cchoobnis Juan me. Blozhse brobnis me, laa me quiazodiidznie Dios, tibaque zeene bzhiäl zhan gbaa, ²² laa meṅ ne nac Espiritu Sant biet, rlu me zig rlu tib palom, laa me bdziṅ guic Jesús, hor co blu zëëb tib tsi meṅ co nëz gbaa, rnee me:

—Xin, rleynie naa luu gon, nziuu luu lo naa.

Xmenṅol Jesús

(Mt. 1:1-17)

²³ Galptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

²⁴ José co goc xpëed Elí,
Elí goc xpëed Matat,
Matat goc xpëed Leví,
Leví goc xpëed Melqui,
Melqui goc xpëed Jan,
Jan goc xpëed José,

²⁵ José goc xpëed Matatí,
Matatí goc xpëed Amós,
Amós goc xpëed Nahúm,
Nahúm goc xpëed Esli,
Esli goc xpëed Nagai,

²⁶ Nagai goc xpëed Maat,
Maat goc xpëed Matatí,
Matatí goc xpëed Semei,
Semei goc xpëed José,
José goc xpëed Judá,

²⁷ Judá goc xpëed Joan,
Joan goc xpëed Resa,
Resa goc xpëed Zorobabel
Zorobabel goc xpëed Salatiel,
Salatiel goc xpëed Neri,

²⁸ Neri goc xpëed Melqui,
Melqui goc xpëed Adi,
Adi goc xpëed Cosam,
Cosam goc xpëed Lmodam,
Lmodam goc xpëed Er,

²⁹ Er goc xpëed Josué,
Josué goc xpëed Liezer,
Liezer goc xpëed Jorim,
Jorim goc xpëed Matat,

³⁰ Matat goc xpëed Leví,
Leví goc xpëed Simeón,
Simeón goc xpëed Judá,
Judá goc xpëed José,
José goc xpëed Jonán,

³¹ Jonán goc xpëed Liaquim,
Liaquim goc xpëed Melé,
Melé goc xpëed Mainán,
Mainán goc xpëed Matata,
Matata goc xpëed Natán,

³² Natán goc xpëed David,
David goc xpëed Isai,
Isai goc xpëed Obed,
Obed goc xpëed Booz,
Booz goc xpëed Salmon,
Salmóngoc xpëed Naasón,

³³ Naasón goc xpëed Minadab,
Minadab goc xpëed Aram,

Aram goc xpëed Srom,
 Srom goc xpëed Far,
 Far goc xpëed Judá
³⁴ Judá goc xpëed Jacob,
 Jacob goc xpëed Isaac,
 Isaac goc xpëed Abraham,
 Abraham goc xpëed Taré,
 Taré goc xpëed Nacor,
³⁵ Nacor goc xpëed Serug,
 Serug goc xpëed Ragau,
 Ragau goc xpëed Peleg,
 Peleg goc xpëed Heber,
 Heber goc xpëed Sala,
³⁶ Sala goc xpëed Cainán,
 Cainán goc xpëed Rfaxad,
 Rfaxad goc xpëed Sem,
 Sem goc xpëed Noé,
 Noé goc xpëed Lamec,
³⁷ Lamec goc xpëed Matusalén,
 Matusalén goc xpëed Enoc,
 Enoc goc xpëed Jared
 Jared goc xpëed Mahalaleel,
 Mahalaleel goc xpëed Cainán,
³⁸ Cainán goc xpëed Enós,
 Enós goc xpëed Set,
 Set goc xpëed Adán.
 Adán goc zig tib xpëed Dios.

4

Gocladz men̄dox niungüet ma Jesús *(Mt. 4:1-17; Mr. 1:12-15)*

¹ Zeene blozh brobnis Jesús guiubee Jordán ga, nacie Espiritu Sant me, dzigo güeynie me Jesús tib dan ngan, zaatne choot miech guiend. ² Ga bio Jesús, ni tib lë peet dowd me; gzase dze pquiianaḷ men̄dox niungüet ma me niun me miñe racladz ma. Zeene goc choo dze no me ga, gon̄ ma lëbdraa me rcaabedz me, ³ dzigo rëbchaa ma lo me:

—Telne nli Xpëed Dios nac luu, bnabey tsaalo grë quie rii ncuaañe gow luu.

⁴ Dzigo pquiab me rëb me lo ma:

—Znu zhubnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me, ⁶ rëb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladztaa naa. Grësew, dib guielndaan ne no low, znedz naaw lo luu ⁷ telne squiitsgzhìb luu lo naa, gunnon luu naa.

⁸ —jBiche lo naa nu men̄dox! —rëb me lo ma—. Znu gon zhubnee lo Xtiidz Dios: “Diosse nac men̄ ne rnabey, mese none gunnon luu, lo me rieguial yquiitsgzhìb luu; ni miñe rnabey me miñ co none gun luu.”

⁹ Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, bringaa nu, ¹⁰benque led znu rnee lo Xtiidz me: “Znabey Dios grë xanjl me yquiaanap luu, ¹¹zgueedz zho luu, zeena ni tib quie ycaand ni luu.”

¹²Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me gun me ncuaañe nod gun me.”

¹³Gonse ma rdzielz zha gungüet ma Jesús, dzigo biche ma lo me palal dze.

¹⁴Blozhse ga, dzigo laa Jesús wbi ga bdziñ me nêz Galilé, scaque nacie Espíritu Sant me. Znuse beenbey miech me por grëtaa ncuaañ ro ne ruñ me, grëse guiedz ne ndxie nêz co, rzeet zho me. ¹⁵Zaatne rdziñtaa me, rie me xyadoo zho, rseed me zho Xtiidz Dios, rleynie zho me, rley zho ron zho grë miñe rnee me.

Güey Jesús Nazaret

(Mt. 13:53-58; Mr. 6:1-6)

¹⁶Tib dzew, laa me bdziñ Nazaret, zaatne broob me. Goł dze ne rdziiladz zha Israel lo dziin, güey me xyadoo zho zig runaque me grëraa zaatne ziye me. Zeene goł horne rlab zho Xtiidz Dios, dzigo bded me, ¹⁷bdeed zho miñe pquiaa Isá glab me. Pخال me low, lëetse zaatne znu rnee blab me:

¹⁸ZhiEspíritu Dios nacie naa,

ible Dios bzooblo naa, gnee naa Diidz Ndzon ne nac xtiidz me lo grëse zha ne rquinnëw.

Laa me pxeel naa gne naa lo grë zha ne ngadoo lo ncuaañe nosacsi zho, zeena guien zho zha gree zho lo grë ncuaañ co.

Laa me pxeel naa gziini naa lo grë zha ne no lo guielcow,

grë zha ne rzac guien draa zha gree zho lo zhizhgab zho, laa me pxeel naa, naa cuee zho lo zhgab co.

¹⁹Laa naa zialnie diidz lo miech, gacnan zho pa lotaa noxco Dios gunlay me grëse zha ne gbig lo me.

²⁰Blozhse blab me lo co, ptibëd mew bdeed mew lo zha ne quianapa, dzigo laa me bzob. Grëse zha ne no len yadoo ga, dze rwi zho lo me, ²¹dzigo bnee me lo zho, rëb me:

—Grë diidz ne blozh blab naa lo to nu, len dze rii gon laaw noyac cumplir.

²²Grëse zho rleynie zho me, rlozhd gzee zdoos zho ron zho grëtaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed men qui? ¡Led lëë xingan José!

²³Dzigo rëb me lo zho:

—No tib diidz ne rnee: “Zha ne racnie stib miech, none guien zho glo menladz zho gacnie zho.” Rienpaa naa gon, miñ co racladz to gnë to lo naa; quiambëz to gan to grë milagr ne ziyon to ben naa guiedz Capernaum.

²⁴Gneli naa lo to ganle: Zha ne riaad rteed xtiidz Dios, ible znu ranzed menladz zho zho; gane rrieelod pe gun zho. ²⁵⁻²⁶Gołsoladz ganle zeene biaad Lí, bio tib tiemp ne biabd guie tson iz grol, tib gbindox ne gon miech Israel nu. Ndal wnaa viud ne nac menladz me mban bded zho, guien pe nguiin zho, per brieelod niun me xyudar zho; leł xyudar tib wnaa Sarept pxeel Dios me güeygun me, guiedz ne ndxie gax Sidón. ²⁷Scaque zeene biaad Liséw, ndal zha Israel rlan guiedzdox ne nac lepr, per ni tib zho beenguiacd me; leł tib zha Siria lë Naamán, men co beenguiac me.

²⁸Zeene gon zho sca rnee me, blëë zho. ²⁹Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga, ³⁰zeene znuse bded me lad zho, ziega me.

Biac tib mgui ne nosacsi mendox
(Mr. 1:21-28)

³¹ Ga wbi Jesús, bdziñ me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho. ³² Rzee zdo zho ron zho grë zhiwseed me, grëse miñe rnee me, rlu zha rnabey nac me.

³³ Tib vuelt, lad grë zha ne noseed me ga no tib mgui ne nosacsi mendox; roptsie mendox co rnee ma lo me:

³⁴ —iPsaan no! ¿Pe guñ luu no Jesús Nazaren? ¿Ziaad luu lëë par gnitlo luu no? iRunbey naa luu, luu nac men ndzon ne pxeel Dios!

³⁵ Dzigo goctox me lo ma, rëb me:

—iPsoog ro luu! iNa zeeña psaan men qui!

Horco, squi ndxie grë miech co bron ma mgui co liu, miñcose been ma, laa ma brieelaa ma zie. ³⁶ Rlozhd gzee zdo grë miech co, rnabdiidzlsa zho rnee zho:

—¿Zha nac xtiidz men qui, zha nacne haxta mendox rdzieb ma me, rzhoon ma zeeñe laa me ractox lo ma?

³⁷ Grëse guiedz ne ndxie gax ga, zigse zie dze rzhoon diidz scataa milagr ne ruñ me.

Biac xniadzoop Pedr
(Mt. 8:14-17; Mr. 1:29-39)

³⁸ Brieel Jesús len yadoo, zie me nëz lidz Simón. Bdziñ me lëëtaque laa xniadzoop Simón nix rlan xlëë, nzho rac me; dzigo wbig zha ne been vis laa zhuz co rzacñë, bnab zho lo me guñguac me me. ³⁹ Nacne bded me zaatne nix zhuz co, goctox me lo xlëë co. Horcogazha laaw blëz, guche zhuz co ga, beenlo me ncuaañe dow zho.

⁴⁰ Laa ngbidz rzëëblew, zeeñe bdziñ grë miech co lo Jesús, bdziñnie zho grë zhimguidz zho. Zhaase zhaase guielguidz ne rzac tib tib mguidz co, per grëse zho zigne rxobnia me guic zho laa zho riac. ⁴¹ Nzian zho benccoñ me mendox ne nosacsi zho, zeeñe laa ma rrieel, nguiedz roptsie ma rnee ma lo me:

—iRdziuñbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nan ma me nac Men ne nacle diidz ga cxeel Dios.

⁴² Biini liu co, silgaw brieel Jesús lad guiedz co güey me tib zaatne choot miech guieñd. Zeeñe bnit me lo grë miech co, brieel zho güeyguib zho me haxta bdziel me lo zho; rnab zho lo me Capernaumse ga cuéz me, paat tsiedraa me. ⁴³ Dzigo rëbchaa me lo zho:

—Grieeloda, ib none ga naa grëraa guiedz, gaseed naa miech gacnan zho zha racladz Dios gban zho; sac ible miñ co pxeel me naa ziañ naa.

⁴⁴ Nligaaw, grëse guiedz ne ndxie nëz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

5

Nroobdox mel bgaa
(Mt. 4:18-22; Mr. 1:16-20)

¹ Tib vuelt miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiidz Dios. ² Gax ga zo chop barcw, blalaa ngooz mel biet lena, laa zho no lo nis ga noguieb zho guieñ ne rnaaz zho mel. ³ Nacne güey me biep me tib len barcw co, bnabey me

Simón psëë Simóna bzëëba lo nis palal; sac lëë xbarcw Simón ga. Dzigo leen co bzob me pseed me grë miech co.

⁴ Zeene blozh bnee me lo zho, rëbcha me lo Simón:

—Nana ganle zeeynie barcw rii guionie new zaatne quietlaa nis, zeena gron to guix ne rgaa mel i gnaaz to palal ma.

⁵ Pquiab Simón rëb Simón:

—Dib guieel-le bdzio no lo nis rii, per ni tib mel bnaazd no; per lega ne luu rneew, na dieñ laa no grona stib.

⁶ Bron zho guix co lo nis, zeene laa zho cueew, ya zig zrieza, biodzëse lena no mel. ⁷ Horco blunia zho lo grëraa zha ne nacgrë zho no stib len barcw co, parne tsie zho gun zho xyudar zho. Bdziñ zha co cogcza zho, gropse len barcw co pcodzëë zho grë mel co; ya zig zdedquiew lo nis.

⁸ Zeene gon Simón scataa mel taf ne bgaa, pquiitsgzhib me lo Jesús, rëb me:

—Bzhiguiel mazd psaan naa, tib miech ngoopdo! nac naa, rdzieeld so luu lo naa nu.

⁹ Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga. ¹⁰ Scasaque rac Jacob ni Juan (xingan tib men lë Zebedé), zha ne nacgza Simón.

—Gdzieebd luu —rëb Jesús lo Simón—. Zigne squi gon rioxco luu riaad luu gooz mel niina, desde nadze laa luu tsoxco gun luu stib gooz; laa naa cxel luu tsietop luu grë miech ne sëëb xnëz Dios.

¹¹ Zigo bdziñnie zho barcw co ro nis, bzo zhow ga, laa zho zienal zhits me.

Biac tib zha ne rlan guiedz lepr

(Mt. 8:1-4; Mr. 1:40-45)

¹² Laa Jesús no tib guiedz co, tib dzew, bdziñ tib mgui ne rlan guiedzdox ne lë lepr lo me, pquiitsgzhib mgui haxta bdziñ lo mgui liu, rëb mgui lo me:

—Tebaa siguieel luu gunguiac luu naa.

¹³ Dzigo pxobnia me guic mgui, rëb me:

—Zunguiac naa luu. ¡Niinagazh laa luu guiaanmbe!

Horcogazha laa mgui biaanmbe lo guiedz co. ¹⁴ Dzigo pso Jesús diidz lo mgui, choot lo gzodiidz mgui zha biac mgui; ni rëb me lo mgui:

—Bzë, güey lo pxoz, güeyšan gon ne rnabey xley Moisés gdeed luu; zeena gan zho ganle laa luu biacle.

¹⁵ Niicle sca nëd me gacnan miecha, per znuse znuse rliaal diidz grëtaa milagr ne run me; miech guizhiu ne rdziñ lo me, zha ne zie yquiaadiag zhiwseed me, zha ne zieegaa gunguiac me zho tel pe guielguidz ne rzac zho.

¹⁶ Zhiga, zhiga rbiche me lo miech, rie me zaatne choot guien d riezodiidznie me Pxoz me.

Biac tib zha ne gutoo xcuerp

(Mt. 9:1-8; Mr. 2:1-12)

¹⁷ Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieë dib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë mine rnee me.

¹⁸ Laa grë miech co ndxie ga, zeene bdziñ bla zha bgui, ney zho stib men bgui, zhoobse me lo yag, ib gacd së me sac dipse me gutoo. Gocladz zho nzeëbnie zho me len yu ne no Jesús ga, ndziñnie zho me lo me. ¹⁹ Per ib gocd nedd zho lad grë miech co. Nacne biepaque zho guic yu, pxal zho tible guic co, ga pteed zho men rzacné co dib yag ne zhoob me ga, bdziñ me lo Jesús.

²⁰ Zeene gon Jesús ne nli dib zdoo zho rnalo zho me, me gunguiac men rzacné co, rëbcha me lo men co:

—Peet tsienied guic luu, niinagazh laa naa guṇ perdon grēse xtoḷ luu.

²¹ Zeene bin grē zha farisé co, grē maistr ley co sca rēb me, rneechaa zho gaz zho: “¿Cho dzigo rzac mgui qui nac me? ¡Falt i gonṇ noyṇ me lo Dios! ¡Tibaque meṇ ne ruṇ perdon xtoḷ miech, ni lēē meṇ co nac Dios!”

²² Bienga Jesús sca quianee zho, dzigo rēbchaa me:

—¿Pe nacne rzac to laa naa quiayṇ falt? ²³⁻²⁴ Nli cholze zac guiab laa zho guṇ perdon xtoḷ miech, per grieeḷod guṇguiac zho zho. Goḷwi ganḷe laa naa guṇguiac mgui rii, zeena gacnaṇ to naa ne nac naa Mgui ne pxeel Dios, ible rap naa poder par guṇ naa miech perdon.

Dzigo bnee me lo meṇ rzacnē co, rēb me:

—¡Niinagazh guche i, bi yag ne bzhoob luu i, zeen bzē!

²⁵ Zigne sca bnee me, laa mgui co bzoli, squi ndxie grē miech co laa me blis yag co, ine roolnie me Dios laa me zey. ²⁶ Psilo zho grēse zho, roolnie zho Dios; lala rzee zdoo zho, lala rdzieb zho, rnee zho:

—¡Nadzesi, laa ne bdziaṇ ncuaneaṇ gard dziaṇ ne!

Bredz Jesús Leví

(Mt. 9:9-13; Mr. 2:13-17)

²⁷ Blozh ga, laa Jesús brieē ga. Ro nēz zieded me gonṇ me tib meṇ lē Leví, zobse meṇ co lo mezh ne rietizh zho dimi ni razh lo zha Roma, sac me rtop dimi co. Dzigo bredz Jesús me tsienal me zhits Jesús. ²⁸ Biaanaque xmezsh me ga, guso me ga, laa me zienal.

²⁹ Bded ga, güeynie me Jesús tib wagw lidz me. Grē zha ne ruṇ dziin co, ni grēragaa zha ne bdziṇ ga, tipse brenie Jesús zho grē xpēēdsuel me.

³⁰ Blalaa zha farisé, ni zla maistr ley, rlēē zho gonṇ zho sca zobnie Jesús grē zha co, bded ga rēbchaa zho lo xpēēdsuel me:

—¡Lēda i gonṇ ruṇ to! ¿Pe nacne sca tipse rownie to grē zha ngoopdol co, grē zha beed ne nac recaudador ga?

³¹ Dzigo rēbchaa Jesús lo zho:

—Nanḷe to ganḷe, zha ne ruṇ rmed, zaatne no zha rzacnē ga rquiin zho, ¿niacxe squiin zho zaatne no zha ne ndip ndaan? ³² Scaque naa nagon, zialguibd naa zha wen, sinque laa naa zialguib grē zha ngoopdol, zeena gbīg zho lo Dios.

¿Pe nacne rcuand xpēēdsuel Jesús?

(Mt. 9:14-17; Mr. 2:18-22)

³³ Bdziṇaque bla zha ne bnabdiidz, rēb zho lo Jesús:

—¿Pe nac waa ib rcuand xpēēdsuel luu, tibaque quiayow zho, tibaque quiaye zho? Zha xpēēdsuel Juan, zha xpēēdsuel farisé, rdziaṇ no tibaque nociuan zho, tibaque nonab zho lo Dios.

³⁴ Pquiab Jesús rēb me lo zho:

—Zaatne nadien noyac tib guieltsieel, ¿niacxe znabey to ycuand grē zha ne ndxie lo lni, ni ran to laa mgui ne notsieelna zo lo zho? ³⁵ Per zdziṇ dze zeene laa mgui co gbiche, ni zeene laa dze co gdziṇ, dzigosi nagon riegual ycuand zho.

³⁶ Blozhse sca bnee me, rēbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lē lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lē lar cub lad lar gox. ³⁷ Scaque zha ne rgotsow vin, tsod zha ne cotsow vin cub tib lenṇ guid ne padzeelale noquin, sac stsiez vin cuba; lozh ga zigtaa vina, zigtaa guid cow, laaw nitlo ga. ³⁸ Gacxe waa, tel vin cuba none lenṇ tib guid cubaque tsotsowa.

³⁹ 'Nac cuent rii zig rzac miech vin, zha ne bienle rie vin ne padzeelale notsow, rdziladz zho guie zho vin cub; sac biaanle guic zho rnee miech: "Vin ne padzeela notsow, min co nizhraa rdioow."

6

Dze ne rdziiladz zha Israel lo dziin

(Mt. 12:1-8; Mr. 2:23-38)

¹ Tib vuel, lëetse dze ne rdziiladz zho lo dziina, bded Jesús zaatne zëeb zhoxtil grë xpëedscuel me; psilo zho pchoo zho mzion zhoxtil co, zigse runmbe zho zhoob co, scase row zhow. ² Gon blalaa zha farisé sca no zho, dzigo rëbchaa zho:

—jLëda i gon noyun to! Golguien ganle dze nda nac dze rii.

³ Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴ Rneew, bzëeb me len yadoo güey nab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

⁵ Ni rëb me lo zho:

—Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mt. 12:9-14; Mr. 3:1-6)

⁶ Gol stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me. ⁷ Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

⁸ Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga; ⁹ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquin, te nonguiela gun ne guielntseeb ye? Zig nac samech ne zha ne noxtseeb xquielmban, ¿pe maase csaan ne guet zho?

¹⁰ Dze rwi me lo zho tib tib zho, dzigo rëbchaa me lo mgui co:

—jBzigaa nia luu!

Zigne bzigaa mgui co nia mgui, laaw biac.

¹¹ Zeene gon zho sca beenguiac me nia mgui, per nli rlëe zho, psilo zho quianediidz zho dien zha gun zho me.

Bzo Jesús zha ne tsienee xtiidz me

(Mt. 4:23-25; 10:1-4; Mr. 3:13-19)

¹² Tib vuel, güey Jesús tib guic gui, dipse guieel blëz me ga bzodiidznie me Dios. ¹³ Biini liu co, bredz me grëse zha ne nac xpëedscuel me, dzigo lad co ble me tsiipchop zho, zha ne tsiepaa tsienee xtiidz me lo miech. ¹⁴⁻¹⁶ Znu lë gza tsiipchop zha co:

Simón (zha ne bleelë me Pedr),
Ndrés (bets Pedr),

Juan,

Jacob,

Lip,

Bartol,

Matew,

Mazh,
 Jacob (xingan Alfé),
 Simón (zha ne no lad grë zha ne racladz cuee wxtis Roma Israel),
 Judas (bets Jacob),
 ni Judas Iscariot (zha ne güeyto me).

¹⁷ Cho gui co biet me grë xpëëdsfuel me, bdzın̄ zho tib ro lets. Loxaque bdzın̄ zho ga, laa stib dzoon xpëëdsfuel me bdzın̄aque lo me ga; zhiıts co nal̄ stib dzoon miech, no zho racladz yquiaadiag zhiwseed me, nogaa zho zie ga par guñguaiac me zho. Miech guizhiuw, zha ne ziaad nêz Judé, zha ne ziaad nêz Tiro, zha ne ziaad nêz Sidón, zha ne brieegaa Jerusalén.

¹⁸ Nzian grë zha co nosacsi mendox, grëse zho beenguiac me zho. ¹⁹ Rbig be grë miech co racladz zho xen̄ zho lad xab me, sac ran̄ zho, zha ne rzhen̄ lad xab me, tel̄ pe guiel̄guidztaa rzac zho, run̄guaiac me zho por grëtaa poder ne rap me.

Cho nac zha ne wen zie

(Mt. 5:1-12, 38-48; 7:1-5, 12)

²⁰ Dzigo dze bui Jesús lo grëse zha ne nac xpëëdsfuel me, rëb me lo zho: —ıWen zie zha ne rien̄ none gbig zho lo Dios, sac ib zdzın̄ zho zaatne rnabey me!

²¹ ıWen zie zho! Sac niicle tel̄ne noyan̄ zho gbin, per me gdeed ncuaañe yquiin̄ zho; niicle tel̄ no hor mban rac zho roon zho; per zdzın̄ dze ne gdeed me tib guiel̄bley nroob lo zho.

²² ıZig nac to, zeene csilo miech glëënie zho to, guncxoon̄ zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnêz Mgui ne pxeel̄ Dios nu, ıwen zie to ga! ²³ ıNley gol̄co zdoo to dze co, nguieel̄ gol̄gac, sac gon̄ tib guiel̄nzaac nroob ne gneedz Dios lo to! Gol̄soladz gan̄le, scaque been̄ pxozgol zho grë zha ne pxeel̄ me padzeela biadnee xtiidz me.

²⁴ ıSangue grë zha ne rzac grëse ncuaañe rquiin̄ zho quianie zho, ib rquiind zho gbig zho lo Dios, ıprobsaxe zho, sac lo guidzliu riise gac ncuaañ co guiel̄bley lo zho!

²⁵ ıProbsaxe zho, sac niicle ne grëw quianie zho niina, per zdzın̄ dze gan̄ zho gan̄le zha nac gbin; rlozhd gzhıdz zho, rlozhd gley zho niina, per zdzın̄ dze laa zho gan̄ gan̄le zha nac guiel̄në!

²⁶ ıPadzeela, biaad bla zha ne pquidie rëb zho Dios pxeel̄ zho, bio pxozgol to bleynie zho zho, ıprobsaxe to tel̄ne yguib to sca gleynie miech to!

²⁷ ıGol̄quiaadiaga gan̄le: Zha ne rlëë lo to, gol̄leynie zho, tel̄ pe nac xliaadz zho gol̄gacnie zho. ²⁸ Zeene rdzibdee zho to, gol̄nab lo Dios gun̄lay me zho; zeene rsacsigaa zho to, gol̄nab lo Dios yquia zdoo me zho. ²⁹ Tel̄ gneedz zho tib puñet lo to, gzoobd nia to, gol̄saan zho maase yquiaa zho stiba.

ıZha ne gla xabnal̄ to, gol̄saan maase ye biaagw güey zho. ³⁰ Zha ne gnabtaa pe cos lo to, gol̄deeda; tel̄ scasegaa xen̄ zhow, ib gnabde tow lo zho. ³¹ None zaace gac to lo miech, zeena scagaa zha, zaace gac zho lo to.

³² ıSac gon̄, tel̄ loxaque zha ne ndzieeldiidz to, zha cose rleynie to, ıled ncuaañ nroobd ga run̄ to! Haxta grë zha ntseeb run̄ min̄ co. ³³⁻³⁴ Tel̄ loxaque zha ne run̄segaa favor lo to, lo zha cosegue run̄ to favor; zeene run̄gaa to tib pextad, lo zha ne rgobeyse to zguzh lo to, lo zha cose run̄xtad to, ıni lalnu peet nond ncuaañe run̄ to ga! Sac gon̄ haxta grë zha ntseeb run̄ min̄ co.

³⁵ ıGol̄quien̄ sca, none gleynie to zha ne rlëë lo to, none gacnie to zho lo xliaadz zho. Zha ne guiaad tib pextad lo to, gol̄deed ncuaañe rnab zho, ib guiabde to nend lega scase gun̄ to favor co lo zho. Zha ne gun̄ grë min̄ rii,

nroob guieInzaac ne gdeed Dios lo zho, ni ga glu zho ganle nli xpëed me nac zho; sac gon tel me wen me lo grëse miech, niicle zha ne run falt lo mew, niicle zha ne riendгаа gdeed xquizh lo me, rsaand me zho. ³⁶ Ndzinli sca golgac, zigne sca wen PxoZ to lo grëse miech, scaque none wen gac to lo zho.

³⁷ Ib gunde to në gac zdoo to, zeene ran to ncuaañe nonguiëd ne run stib miech, sac to tozhal gunquizh zhow; zeena scagaa Dios gunscad me to. Golguien none gun to samiech to perdon, zeena scagaa Dios zun me to perdon; ³⁸ sac grëse ncuaañe run miech, mincoque rcaania zho. Grëse ncuaañe gun to, scaania tow, ni haxta ndziibraa mine ycaania to. Sac ncuaañe gun to lo samiech to, mincoque gun Dios to.

³⁹ Blozh sca bnee me, dzigo rëbchaa me:

—Golwi ganle, zig nac zha ne rold lo, çniacxe zrieelo glu zho nëz lo stib zha ne rold lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

⁴⁰ Grë zha ne nac mëedscuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, zdziñ zho medid co.

⁴¹ jLëda ga gon tso to lozhd gzee zdoo to dien cho pe run, ni nenda mazdraa mine run to! ⁴² çPe ro to glisqui to mine run stib zho, ni tel mazdraa nac mine run to? jGolguien sca glude to ncuaañe nacde to! jGlo goltsoxco ndzinli gac to, dzigo lozh ga zac tsienee to zha gacndzinli stib zho!

Nex rlu zha nac tib tib yag

(Mt. 7:17-20, 24-27; 12:34-35)

⁴³ Tib tib yag rdeedsew nexxa. Griee lod yquia nex ncuaañ tib lo yag ne rdeed nex wen; griee lodгаа yquia nex wen tib lo yag me rquia nex ncuaañ.

⁴⁴ Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodгаа lbë zarz ne gdeed uv. ⁴⁵ Scadaa nagon nac miech, zha ne wena, ncuaañ wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuaañe ntseeb run zho, niapse diidz dox rnee zho, sac desde zdoo zho no guieIntseeb co. Gacxe waa, tel zha rzë xtiidz tib miech, gase rlu zha nac zdoo zho.

⁴⁶ Griee lod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni rund zho mine rne naa.

⁴⁷ Zha ne rquiaadiag mine rne naa, ni rioxco zho rban zhow zigne naca, ⁴⁸ rrieequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclor ded zaatne zoba ga, per rbixcheda. ⁴⁹ Laa zha ne rquiaadiag xtidz naa, ni rioxcod zho gban zhow, ziaad gac zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lëw biaan.

7

Biac tib zha ne rquia dziin tib lo menquiib

(Mt. 8:5-13)

¹ Zeene blozh sca bnee Jesús lo grë miech co, dzigo laa me wbi ga, bdziñ me Capernaum. ² Lëëtaaque len dze co rzacnë tib zha ne run dziin lo tib men ne rnabey lo menquiib zha Roma, no guiedz co; nzhoo rac zho zootle laa zho guetle. Rleyniedox men co zho, ³ zigne bin me laa Jesús bdziñ, lëëled pxeel me bla zha ne nac zha non lo menquiedz Israel, güey zho güeynee zho lo Jesús

siguieḽ Jesús tsiegunḡguiaac Jesús zhunguḡdziin me. ⁴ Bdziḡ zho bñab zho lo Jesús siguieḽ me tsie me.

—Bzhiguielḽ been xyudar me —rëb zho—. Tib zha wen nac me, ⁵ rleynie me menladz ne, haxta bzaa me tib xyadoo no lad guiedz nu.

⁶ Dzigo zianalḽ Jesús zhits zho. Zhile gdziḡ zho lidz meḡ rñabey co, zeeneḽ bdzieelo zho bla zha ne ndzieeldiidz me, zienie tib xtiidz me lo Jesús. Ržë xtiidz me, rëb me:

—Bzhiguielḽ mazd guiaate luu. Naraa rienḽ naa choot nacd naa, par csodziin naa lo luu guiaad luu haxta ro lidz naa. ⁷ Nligaa rienḽ naa tib zha winse nac naa par gbig naa lo luu, gane niicle biald naa nialdzieelḽ naa luu. Nanḡaa naa, zaatne ziaad luu i, con tib lan xtiidz luu zac gnabey luu guiac zhunguḡdziin naa. ⁸ Sca rnee naa, sac telḽ naa no zha ne rñabey lo naa, zeeneḽ rñabey zho naa none gon naa miḡne rnee zho; scaque zhaguiib ne rñabey naa, zeeneḽ rne naa tib lo zho: “Güey nu”, rie zho; zeeneḽ rnegaa naa: “Dë nu”, riaad zho; zha ne nacgaa zhunguḡdziin naaw, miḡne rñabeytaa naa zho, ruḡ zhow.

⁹ Zeeneḽ bin Jesús sca rzë xtiidz meḡ co, bzee zdoo me, ptsire lo me, rëb me lo grë zha ne zianalḽ zhits me:

—Goḽwi ganle pa lotaa rñalo meḡ qui Dios. Lo grë zha Israel gonḽ, ni tib zho gard gaḡ naa squitaa dib zdoo gnalo Dios.

¹⁰ Grë zha ne güey mandad ga, zeeneḽ bdziḡ zho gonḽ zho laa nguḡdziin co biacle.

Rrieeban xpëed tib wnaa viud

¹¹ Bded ga, güey Jesús tib guiedz lë Naín grë xpëedscuel me, miech guizhiu ne zianalḽ zhits zho.

¹² Zeeneḽ bdziḡ zho gax ro guiedz co, lëëtaque bdzieelo zho tib dzoon miech ziequeets xpëed tib wnaa viud; lëëse mëed ga lo wnaa co. ¹³ Gonḽ Jesús zha rac me, pquia zdoo Jesús me, wbig Jesús rëb Jesús lo me:

—¡Goondraa luu!

¹⁴ Dzigo bzhenḽ Jesús yag ne zhoob ngutoo co. Zeeneḽ gonḽ gza zha ne nxobyañ yag cow, hor co bzodze zho; dzigo bnee me lo mëed co rëb me:

—Xin, jguche i!

¹⁵ Horcogazha brieeban niib co, bzobli niib, laa niib psilo bnee.

Rley xniaa niib, pcaania me niib.

¹⁶ Zeeneḽ gonḽ grë miech co sca brieeban mëed co, lala rdzieb zho, lala rdeed zho xquizh lo Dios, rnee zho:

—¡Tib meḡ nroob ne gonḽ ziadteed xtiidz Dios i, ziaad lo ne! ¡Laa ne bdzianḽ niina ganle, laa Dios ziaadgaḡ ne, ziadbee me ne lo xquielḽnë ne!

¹⁷ Gdipse nëz Judé, ni grëraa guiedz ne ndxie dib gax ga, gocnaḡ miech milagr nroob ne beenḽ Jesús ga.

Zha ne pxeel Juan Bautist

(Mt. 11:2-19)

¹⁸ Bin Juan Bautist grëtaa milagr ne ruḡ Jesús ga, sac rie xpëedscuel Juan riezodiidz zhow lo Juan. Dzigo pxeel Juan chop zho, ¹⁹ zienabdiidz lo Jesús, dien pe me nac Meḡ ne nole diidz ga cxeel Dios, te dzigoraa gdziḡ meḡ co ye.

²⁰ Bdziḡ zho lo Jesús, wbig zho lo me, rëb zho:

—Laa Juan pxeelḽ no ziaadnabdiidz no lo luu, dien pe lëële Meḡ ne nacle diidz ga cxeelḽ Dios i nac luu, te naraa guiaad me ye.

²¹ Lëëtaaque ndal miech ndxie lo me ga, quiayunguiac me grë meḡ rzacnë. Nzian zho, telḽ pe guielḽguiidztaa rzac zho, no zho nosacsi meḡdox, no zho rold lo, grëse zho runḡguiaac me zho. ²² Dzigo rëbchaa me lo zha ne pxeelḽ Juan ga:

—Grëse miñe bin to rne naa, grëgaa ncuuañe gon to quiayun naa, goltsie golzodiidza lo Juan. Ran to ganle, grë zha ne rold lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieeban. Grësew golzodiidza lo me, golguiab lo me ganle blactaa zha ne rquiin gbigo lo Dios, laa zho noquiaadiag xtiidz Dios; ²³ ni golguiab lo me: dichos zha ne tiblique riladz cho nac naa.

²⁴ Zeene laa xpëedsuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, ¿zha güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, ²⁵ te rëb to ye masaque grë lar niazha ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho. ²⁶ Nligaa cho güeynie guic to nac me, ¿te rëb to ye tib men ne noteed xtiidz Diosa?

‘Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ²⁷ Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuaa nëz ne ted luu.” ²⁸ Ne nligaa lo grëse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

²⁹ Len dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela gun zho miñe rnabey Dios, güey zho pchoobnis Juan zho. ³⁰ Sanguie grë maistr ley ni grë zha farisé, pe liaadz zho nion zho miñe rnabey Dios, ib güeyd zho nchoobnis Juan zho.

³¹ Blozhse sca bnee me, rëbchaa me:

—Nac grë miech rii, ib riend zho pepaa racladz zho. ¿Cho ganle run zigne run zho? ³² Lëe zho run miñe run grë mëedlas ne rio wguit dib ro nëz. Niicle rool xcompañer win di nguieel, rieved win; niicle roolga zho di ngan, roond win. ³³ Sac gon, ziaad Juan, ran zho rowd me grë ncuuañe nac xquielwagw zho, niicle vina ried mew; dzigo rnee zho mendox nacie me. ³⁴ Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib riend me cho rtsielsa me, haxta grë zha yozh ne rtop dimi ne razh lo zha Roma, haxta grë zha ngoopdol rzénie me. ³⁵ Sca rnee zho, sañgue zha ne rgaa guielbiini ne rdeed Dios, riñ zho cho nac zha ne ziaadgun xtsiin me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdziñ me, bded me bzob me lo mezh.

³⁷ Lad guiedz co no tib wnaa ro nëz, bin me laa Jesús bdziñ lidz zha farisé co, dzigo bi me tib bot nceit nex, tiblo nceit niazha, brree me zie me nëz lidz zha co. ³⁸ Bdziñ me ga, wbig me zaatne zob Jesús, psilo me roon me. Zigse roon me, lëeque nis ne riet lo me ga, bdiib me ni Jesús, ni pcuiidz mew con guits guic me. Dzigo ptsieelro mew, blozhse ga blee me nceit co bdëeb mew.

³⁹ Zeene gon zha farisé co sca been wnaa co, bza zdoo zho rëb zho: “Telne niaca miñe nli men ne ziadteed xtiidz Dios nac men qui, niñ me ganle tib wnaa ngoopdol i, ndeete me diidz squitaa nguëëbnia zho zhits ni me.”

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne blediñ dimi lo zho. Tib zho zëeb gaay mil pes plat, stib zho zëeb gaay gayoow.

⁴² Gonse men co ni tib zho rdziel zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo mine been men co?

⁴³ Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo mine been me.

—Scaw gon —rëb Jesús—. ⁴⁴ ¡Minçopaa nagon squi rac wnaa prob qui! Gon ganle zeene bzëeb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuidz mew con guits guic me. ⁴⁵ Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiatsieelro me ni naa. ⁴⁶ Nac costumbr none nchoob luu nceit guic naa, per beend luuw; mazd mele gon biaad biadtëeb me nceit nex rii zhits ni naa. ⁴⁷ Laa me noyun min rii, sacne nlipaa rzac zdoo me ben naa me perdon grëtaa doldox ne nzëeb me. Zigne rneeque ne ga, tel zha ne zhis xtoła, zhi rzac zdoo zho zeene laa zho rac perdon.

⁴⁸ Dzigo bnee Jesús lo wnaa co, rëb Jesús peet tsienied guic me, laa Jesús beenle perdon grëse xtoł me. ⁴⁹ Zha ne zobgza Jesús lo mezh ga, zeene gon zho sca rëb Jesús psilo zho rnabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtoł wnaa qui?

⁵⁰ Horco biire Jesús bnee me lo wnaa co, rëb me:

—Laa naa psilaa luu lo xtoł luu, sac dib zdoo luu bnalo luu naa. Bzë naa, peet tsieniedraa guic luu.

8

Güeyseed Jesús miech dipse Galilé

¹ Bded ga, brieë Jesús grë xpëedsuel me güey me grëraa guiedz ne ndxie nëz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa men wnaa güeynal zhits zho, tel pe ncuane quianie grë men wnaa co, rdeed zhow run zho xyudar me; sac rzac zdoo zho beenguiac me zho. No zho beenguiac me lo guielguidz, nogaa zho beñcxoon me mençox ne nosacsi zho. Ga güeynal tib wnaa lë Mari Magdal (lëë wnaa co beñcxoon Jesús gadz mençox ne nosacsi me), ga güeynal stib men lë Zhuan (lëë tsieel Chuz ga, men ne quianap grë lo xtsiin rey Herod) ni stib men lë Susan.

Nac Xtiidz Dios zig zhobxtil

(Mt. 13:1-23; Mr. 4:1-20)

⁴ Tib dzew, miech guizhiu ne pcaalsa lo Jesús; nzian guiedz ne brieë zho bdziñ zho lo me. Laa me noseed zho, zeene bzodiidz me tib cuent rii lo zho, rëb me:

⁵ —Tib mgui name, brieë zho güey zho gon zhobxtil. Zeene laa zho quialaal zhub co liu, now bliaal gax ro nëz, now bliaal lad quie, nogaaw bliaal len yag guiets. Mine bliaal ro nëz ga, zha ne bded bzëni zhow, blozh ga güeyaque grë mguin dow maw. ⁶ Mine bliaal zaatne nac lad quie, blana per znuse bidza sac guiend gop ga. ⁷ Mine bliaal len yag guiets co, zigne blana blanaque stib dzoon yag guiets, znuse bnitlo yag guietsa. ⁸ Sanguë mine bliaal zaatne nac niapse lo liu, blana, brooba, ndzon goca, tib tib zhub ne biab liu ga now goc haxta tib gayoo zhub.

Blozhse bzodiidz me cuent co, nguiedz bnee me lo zho rëb me:

—¡Zha ne racladz guien mine rne naa, yquiaadiag zhow!

⁹ Dzigo wbig grë zha ne nac xpëedscuel me, bnabdiidz zho lo me dien zha nac cuent co. ¹⁰ Rëbchaa me lo zho:

—Tel to, Dioszhal rlu lo to ganle zha rnabey me, niicle ncuane mazdraa ngueetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guien zhow; per niicle scaw, ib rzoobdiagd zhow, ib rioguicd zho zha naca.

¹¹ Znu gon nac cuent co: Zhobxtil co nac Xtiidz Dios. ¹² Ro nëz ne sca bliaal zhob co, ga rlu ganle zha rzac zha ne rquiaadiag Xtiidz Dios, per znusaque rdzin mendox rquiil ma zho gliladzd zhow, zeena laad zho lo dol. ¹³ Lad quie ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli riladz zhow palal dze, per zeene ran zho zha run miech zho, zha rnee miech lo zho, rsaanga zhow. ¹⁴ Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grë zhgab ne dien zha gapchen cho, dien zha gdeedguxt xcuerp zho lo guidzliu rii, min co rionie guic zho; pa së zho gban zigne rnabey Dios. ¹⁵ Laa lo liu naal co, ga rlu ganle zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho riladz zhow. Grëse ncuane run zho, ndzinli rrieequiaw; sac tiblque rac zho.

Xcuent biini

(Mt. 12:46-50; Mr. 3:31-35; 4:21-25)

¹⁶ Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolangaa zhow tib zhan lon. Sac biini ne rquia, glaa rzoba par gziiniw len yu, zeena guiab biini lo grëse zha ne sëeb len yu. ¹⁷ Scaque nagon, grë ncuane rac ngueets, grë ncuane rnee miech zhliana, none xoobnena.

¹⁸ Wen wen golquiaadiag mine rne naa, ni goltsoxcow. Sac zha ne tsoxcow, zdedraa Dios guiebini lo zho; sangue zha ne tsoxcoda, haxta tel palalse guiebini ne rzac zho quianie zho, stiche mew.

¹⁹ Dze co, scaque noseed me miech, zeene bdzin xniaa me ni zha bets me ziegan zho me. Per brielod ndzin zho haxta lo me, sac miech guizhiu ne ndxie lo me ga. ²⁰ Dzigo rëb tib zho lo me:

—Laa xniaa luu gon, ni zha bets luu bdzin ley ziaadguib zho luu.

²¹ Pquiab me rëb me:

—¿Xnia naa ye, bets naa ye? Grëse zha ne gon rquiaadiag Xtiidz Dios ni rioxco zho mban zhow, lëe zha co nac xniaa naa, zha co nac bets naa, zha co nac bzian naa.

Pcuëz Jesús tib medox

(Mt. 8:23-27; Mr. 4:35-41)

²² Tib bdze dze, bzëebnie Jesús xpëedscuel me tib len barcw, rëb me lo zho, tedquia zho stib nëz ro nis co.

²³ Laa zho zie lo nis co zeene laa me gootguies. Tibaque zeene psilo brieet tib medox, masaque riasoli lo nis co, zootle laa barcw ne no zho ga yguitsle len nis. ²⁴ Zeene gon zho scataa ntseeb rac lo nis co, lëëlëd güey zho güeycuuan zho me.

—¡Maestro! —rëb zho—. ¡Blee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co. ²⁵ Dzigo rëbchaa me lo zho:

—¿Pe nacne rdzieb to? ¿Niacxe riladzde to Dios dib zdoo to?

Ne nligaa rdzieb zho, ni lala rzee zdoo zho, rnabdiidzlsa zho rnee zho:

—¿Bay cho nac me? ¿Zha nacne haxta me, haxta nis ron xtiidz me?

Men Gadar ne nosacsi mendox
(Mt. 8:28-34; Mr. 5:1-20)

²⁶ Bdzin zho stib nêz ro nis co, ga nac xtan zha Gadar. Zo zho ga, nêz dan squi riaan xtan zha Galilé. ²⁷ Laa Jesús bietdze leñ barcw, zeene laa tib mgui ne no nêz co bdzin lo me. Mban rlu mgui co nosacsi mendox me, niicle xab me nacwdraa me; ib rbêzd me lidz me, niapse grê leñ xpaa ngutoo rio me. ²⁸ Zeene gon me Jesús, masaque roptsie me bdzin me pquitsgzhib me lo Jesús, zëeb tsi me rnee me:

—¡Psaan naa Jesús! Nanpaa naa gon Xpëed Dios nroob ne zob gbaa nac luu. ¡Bzhiguiel csacsid luu naa!

²⁹ Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzê me grê dan ngan, zaatne choot miech guienđ.

³⁰ Dzigo bnabdiidz Jesús lo ma dien cho lê ma. Pquiab ma rêb ma:

—Legion lê no.

Sca rêb ma sac nzian nac ma no ma zdoo mgui co. ³¹ Ni bnab ma lo Jesús gzonêz me ma lo ncowdoo ne noraa ma ne nacgrê ma. ³² Gaxaque ga ndxie tib dzoon nguts notop lag, bnab ma gdeed me diidzbey lose grê nguts co gdzin ma. Dzigo bdeed me diidz.

³³ Horco laa grê mendox co psaan mgui co, güeysëeb ma zdoo grê nguts co. Psilo grê nguts co rquiaa ma corr, güeypix ma tib ro yeedox ne quia ro nis co, bliaal ma haxta lo nis; grêse ma gut.

³⁴ Grê zha ne quianap nguts co, bzhoon zho, rias zho güeyzodiidz zhow lad guiedz, ni grêraa yu ne zob gax ga. ³⁵ Nacne briece grê miech co ziewi zho. Zeene bdzin zho, per nli bdzieb zho gon zha laa men co zob gax lo Jesús, laa me nacwvable, rlu niinile nac guic me. ³⁶ Psilo grê zha ne gon zha biac me rzodiidz zhow lo grê zha ne bdzin ga. ³⁷ Mazdraa bdzieb grê miech co bin zhow, dzigo mazd bnab zho lo Jesús siguiel me gbi me xtan zho.

³⁸ Zeene laa Jesús zie sëeb me leñ barcw par gbi me ga, dzigo wbig mgui co rnab me lo Jesús siguiel Jesús tsienal me zhits Jesús; per bzhiguielđ Jesús nienal me, rêb Jesús lo me:

³⁹ —¡Biaan! Güey, güeyzodiidz lo grê menlidz luu ganle zha nactaa milagr ne been Dios beenguiac me luu.

Dzigo wbiere men co. Güey me lad guiedz, grêse lo miech güeyzodiidz me zha nactaa guielnzaac ne been Jesús ga, beenguiac Jesús me.

Brieaban tib xpêdwana tib men lê Jair
(Mt. 9:18-26; Mr. 5:21-43)

⁴⁰ Zeene laa Jesús biire bdzin stib nêz ro nis co, miech guizhiu ne quiambêz me ga, rley zho gon zho laa me bdzin. ⁴¹ Loxaque bdzin me, laa tib men ne rnabey yadoo lê Jair wbigle pquitsgzhib lo me. Rnab Jair siguiel me tsienal me lidz Jair tsiegunguiac me tib xpêdwana win Jair.

⁴² Nzhoo rac mëed co, tib mëed tsiipchop iza, ni lëese mëed ga lo me.

Dzigo laa Jesús zie nêz lidz men co. Miech guizhiu ne zienal zhits me, haxta rtaagw zho me. ⁴³ Lad grê miech co zienal tib wnaa rzacnê, gocle tsiipchop iz rlan me tib guielguidz, rzac me zigne rzac grê men wnaa gzob mëe; tibaque rlan mew ib rbêzda. Grêle ncuane rap me bloozh me lo grê men ne run rmed, per ni tib zho runguiacd me. ⁴⁴ Laa me no lad co, tibaque wbig gax

me nêz zhits Jesús, bzhen me ni lar ne mbix Jesús; hor cogazha laa me biac.

⁴⁵ Bien Jesús sca bzhen wnaa co lad xab me, dzigo rëbchaa me:

—¿Cho ga bzhen lad xab naa?

Grëse zho rnee led zhada. Dzigo rëbchaa Pedr lo me:

—Maestro, wi ganle zha ndaagwta ziaad luu lad grë miech rii, haxta rcheep zho luu, ¿zha nan luu choot xend lad xab luu?

⁴⁶ —Per no cho bzhen lad xab naa —rnee me—, sac bienpaa naa beenguaiac naa zho.

⁴⁷ Zeene gon wnaa co bien Jesús sca bzhen me lad xab me, rdzieb me laa me wbig pquitsgzhib me lo Jesús. Squi ndxie grë miech co, bzodiidz me zha nacne sca been me, ni zha zigne bzhen me lad xab Jesús laa me biac. ⁴⁸ Dzigo rëbchaa Jesús lo me:

—Xin, laa luu biac sacne dib zdoo luu bnalo luu naa. Bzë na, peet tsieniedraa guic luu.

⁴⁹ Laa Jesús bii quianeeque lo wnaa co, zeene laa tib zha ne nac mandad ziaad nêz lidz Jair bdzin, rëb zho lo Jair:

—Csodziindraa luu lo men qui, laa xpëed luu gutle.

⁵⁰ Zeene gon Jesús sca rëb zha co, rëbchaa me lo Jair:

—Peet tsienied guic luu. Dib zdoo luu bnalo Dios, zeena peet gacd xpëed luu.

⁵¹ Bdzin zho lidz Jair, psaandraa Jesús nal grë miech co zhits me ndzin zho zaatne nix mëed co. Loxaque Pedr, Jacob, ni Juan, pxoz win ni xniaa win bzëëbnie me len yu ne nix win. ⁵² Grë miech ne ndxie ga, roon zho no zho xquielnë win; dzigo rëbchaa Jesús lo zho:

—Goonde to; sac gon nixguiesse mëedwin rii, gute win.

⁵³ Psilo zho lej rzhidznie zho me, sac nanpaa zho gutle win. ⁵⁴ Dzigo wbig me, bzhen me nia win, nguiedz bnee me lo win, rëb me:

—¡Guche i na, ndzooop yeen!

⁵⁵ Zigne sca bnee me, laa mëed co brieegan, laa win guche ga; dzigo bnabey me bguiaan zho win.

⁵⁶ Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidz me zha brieegan win.

9

Pxeel Jesús xpëedscuel me güeyseed zho miech

(Mt. 10:5-15; 14:1-12; Mr. 6:7-29)

¹⁻² Tib dze bredz Jesús gza tsiipchop xpëedscuel me, pxeel me zho tsienee zho lo miech gacnan zho zha racladz Dios gban zho; bdeed me poder lo zho gunxoon zho grë mendox ne nosacsi miech, ni gunguiac zho grë men rzacné.

³ —Goltsie —rëb me lo zho—. Per lb güeyde to ncuane yquini to nêz. Zig nac dimi, zig nac ncuane gow to, pe bziuud, pe baxtongaa, güeyde tow; xab tow, mine nacwse to mincose goltsienie. ⁴ Guiedz ne gdzin to, zha ne gneedz zaatne cuëz to, lidz zha co golcuëz, haxta gdzin dze ne gbi to guiedz co. ⁵ Per telne gdzin to tib guiedz, nêd miech yquiaadiag zho mine zienee to, dzigo gollit grë yudie co ni to, golrieegazh ga, zeena guien zho ganle dol ga been zho lo Dios, nêd zho ycaania zho xtiidz me.

⁶ Dzigo laa zho brieeg, laa zho zie. Grëse guiedz ne ndxie dib gax ga, güey zho güeynee zho Xtiidz Dios lo miech, ni beenguaiac zho grë men rzacné.

⁷ Bin rey Herod rzeet zho Jesús, sac tel pa lotaaw zëeb diidz grëtaa milagr ne run me. Grë miech co, no zho rzac Juan Bautist ga brieegan, lëe me ga nac Jesús; ⁸ nogaa zho rnee bod Lív, men ne biadteed xtiidz Dios padzeela, me

ziaad stib; zzhisгаа зho rnee no cho stib мен biadteed xtiidz Dios padzeelaw, sinque brieegan me gane ziaad me stib.

⁹ Zeene ron Herod rnee grē miech co lēe Juan ga, rio me zhgab, rnee me: —¿Bay cho nac мен co? Per gacda Juan; naazhal name nbabey pchug zho yan Juan.

Racladz Herod tebaa zha gañ me Jesús.

Bguiaan Jesús gaay mil miech
(Mt. 14:13-21; Mr. 6:30-44; Jn. 6:1-14)

¹⁰ Goc bla dzew, laa grē zha ne pxeel Jesús ga wbiere bdziñ lo me. Blozhse bzodiidz zho lo me grēse tel zha güey zho, dzigo güeynie me zho tib lugar riaan gax guiedz Betsaid.

¹¹ Zeene bin grē miech co laa me briece, dzigo brieenal zho me, bdziñ zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beenguiac me grē zha ne rzacñe. ¹² Laa dze rdzelew, wbig gza tsiipchop xpēedsuel me rēb zho lo me, mazd gnee me lo grē miech co gbi zho ga; zeena guiob tsie zho grē guiedz las, grē yu ne riaan gax ga, yguib zho dien pa cuéz zho, yguib zho dien pe gow zho; sac choot miech nod ga.

¹³ Dzigo rēbchaа me lo zho:

—To goldeed ncuaane gow zho.

Pquiab zho rēb zho:

—Gaayaque quietxtil ni chop mel ziaadnie no nu, ipe rnase ncuaan co lo grētaa miech qui! Niicle niaca mine gziuu ncuaane gow zho, pe zhidaa dimi yquini, ¿pa guioxi now?

¹⁴⁻¹⁵ Nligaa miech tafa, zig gaay mil rgaa loxaque zha bguise. Dzigo nbabey me zho güey zho, güeynee zho lo grē miech co sob zho, cue zho groļ gayooga, groļ gayooga zho tib lugar. ¹⁶ Laa grē miech co bzob, dzigo bzhen Jesús gza gaay quietxtil co ni grop mel co, blis lo me nēz gbaa, bdeed me xquizh lo Dios. Blozhse ga, beengrol me gza quietxtil co, mel co ne, dzigo zigse rdeed mew lo xpēedsuel me, scase scase rguiiz zhow lo grē miech co. ¹⁷ Grēse zho dow haxta zaatne bieltaa zdoо zho; ni zeene blozh dow zho, biodzē tsiipchop chicuid bio grē mine biaan.

Bnee Pedr cho nac Jesús
(Mt. 16:13-19; Mr. 8:27-30)

¹⁸ Tib dze biche Jesús lo miech palal, güey me tib zaatne güeyzodiidznie me Dios; loxaque xpēedsuelse me güeynal zhits me. Ga nbabdiidz me lo zho rēb me:

—¿Cho dien ron to rnee miech nac naa?

¹⁹ Pquiab zho rēb zho:

—No zho rnee Juan Bautista, nogaa zho rnee Líw (men ne biadteed Xtiidz Dios padzeelaw); nogaa groļ zho rnee no cho stib мен ne biadteed Xtiidz Dios padzeelaw, sinque brieegan me gane ziaad me stib.

²⁰ —¿To waa? —rēb me lo zho—. ¿Cho rzac to nac naa?

Horco pquiab Pedr, rēb Pedr lo me:

—iLuu nac Men ne zēēble diidz ga cxeel Dios!

²¹ Dzigo pso me diidz lo zho choot lo gneod zhow.

Bzeet Jesús zha gun miech me
(Mt. 16:21-28; Mr. 8:31-9:1)

²² Tib vuelt bzeet Jesús lo grē xpēedsuel me zha csacsi miech me. Rēb me, nroob grē ncuaane cteed zho me; grē zha non lo menquiedz, grē pxoz nbabey,

grè zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieeban.

²³ Ni rëb me lo grè miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho, ²⁴ sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zгаа zho tib guielmban ne gdzind dze lozh. ²⁵ Zha ne zienie guic loxaque gapchen, ÿpa dien yquiina lo zho, tel por lëew rsacsi zho zho, tel lëew yquiaaqui guey zho gabil? ²⁶ Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladzniegaa zho xtudz naa; scaque naa stoladznie naa zho gal dze ne laa naa guial stib. Dze ne guialnie naa grè xanjl Pxoaz naa, guiallu naa guielndzon ne rap me.

²⁷ Blozhse sca bnee me, rëbchaa me lo grè miech co:

—Ni gni naa lo to ganle, nzian grè zha ne ndxie nu niina, ib tedsod bii zan zho zeene laa Dios glu zha rnabey me.

Bdzëëlo Jesús

(Mt. 17:1-8; Mr. 9:2-8)

²⁸ Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

²⁹ Laa me nozodiidznie Dios, zeene laa me bdzëëlo. Masaque biinidoo ne rrie lo me, xab mew, nquitsbie rnaw, haxta rquiabniw. ³⁰⁻³¹ Tibaque brieequia Lí grop Moisés bdzin lo me ga, psilo zho nozodiidznie zho me grè guielnë ne cteed miech me Jerusalén, zeene laa me gbi lo guidzliu. Masaque biinidoo ne riab, ncuaane gzee zdoo new.

³² Laa zha ne zienal zhits me, rcow zho mcaal zob zho ga; per zeene biab biini nroob co, hor co bzhiäl lo zho gon zho zha rlu me gza me Lí ni Moisés.

³³ Laa grop men co ziebiche lo Jesús, zeene rëb Pedr lo me:

—Maestro, iwena gon tebaa gbiaaz ne nu! Na maase gzaa no tson yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr rien daque dien pe nacne sca rnee Pedr.

³⁴ Laa Pedr bii quaneque, zeene bre tib xcow zaatne zo zho ga; per nli bdzieb zho gon zho laa zho biaan len xcow co. ³⁵ Dzigo bin zho zëëb tib tsi men co lo xcow co, rnee me:

—Lëë Xpëed naa i gon, rleynie naa me. Golgon mine rnee me.

³⁶ Zeene blozh bin zho tsi men co, gon zho loxaque Jesússe zo ga.

Grëse mine gon zho ga, ib choot lo bneed zhow len dze co.

Biac tib mëed ne nosacsi mendox

(Mt. 17:14-21; Mr. 9:14-29)

³⁷ Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me. ³⁸ Lad grè miech co brieet tib mgui, wbig me lo Jesús rëb me:

—Maestro, bzhiguiel bui ganle zha rac xpëed naa. Tibaque mëëdbgui rii nac mëed lo naa, ³⁹ ni na laa mendox nosacsi win. Zeene rdzin ma rcoptsiedan ma win, rron ma win liu, ga nix win runcxidz ma win, ni masaque rdzib mtsiin ro win; nen rsaan ma win. ⁴⁰ Blansonie naa win nu, bnab naa lo xpëëdsuel luu guñcxoon zho mendox co, per brieelod zho.

⁴¹ Dzigo rëbchaa Jesús:

—iPe nac squitaa miech ntseeb nac to, ib nëde to gnalo to Dios! ÿPa lal dze ne so naa gnë naa lo to? ÿNcuane cxeewdraa naa lo to squitaa nac to! Dënie xpëed luu nu —rëb me lo men co.

⁴² Zeene laa mëed co ziegax lo Jesús, hor co bron mendox co win liu, nix win ga masaque rzhidz win. Dzigo goctox Jesús lo ma, benxoon me ma. Horcogazh biac mëed co, laa me bdeed win lo pxoz win. ⁴³ Grë miech ne ndxie ga, per nli rzee zdoo zho gon zho scataa nroob poder ne rap Dios.

Grëse miech ne ran grëtaa milagr ne run Jesús, rzee zdoo zho.

Bzeet Jesús stib laa miech csacsi me

(Mt. 17:22-23; Mr. 9:30-32)

⁴⁴ Biire Jesús bzeet me lo xpëedscuel me zha gun miech me, rëb me:
—Wen wen golquiaadiag mine gni naa lo to nu ganle. Naa gon ne nac naa Mgui ne pxeel Dios, ible zielo zho naa ladznia miech.

⁴⁵ Per ib riend zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidzгаа zho, rdzieb zho gnabdiidz zhow lo me.

¿Cho nonraa?

(Mt. 18:1-5; Mr. 9:33-40)

⁴⁶ Horco psilo zho noneelsa zho dien cho tib zho gac zha non.

⁴⁷ Bien Jesús sca no zho, dzigo bnee me lo zho, bredz me tib mëëdbgui win,
⁴⁸ rëb me:

—Grë zha ne no xnëz naa, zha ne guncas tib mëëdwin zig mëëd rii, gleynie zho win, rriequia naa ga rleynie zho. Ni zha ne gleynie naa, rriequia men ne pxeelle naa ga rleynie zho. Telne racladz to gacnan to dien cho nac zha non, gacnan to ganle, zha ne tsoxco gac zig tib ngundziin lo samiech, zha co nac zha non.

⁴⁹ Blozh ga, rëbchaа Juan lo me:

—Maestro, bdzion no tib zha co gon bzeet zho lë luu zeene benxoon zho mendox, nacne nli blisqui now lo zho, sac led yed zho nacgrë ne.

⁵⁰ Dzigo pquiab me, rëb me:

—¡Guncade to! Sac gon zha ne racnie ne, grieelod lëëque zha glëënie ne.

Ndox Jesús lo Juan grop Jacob

(Mt. 8:19-22)

⁵¹ Len dze ne ziaadyob gbi Jesús lo guidzliu rii, len dze co bio me nëz laa me zie nëz Jerusalén. Tiblique bio guic me, ib pquiad zdoo me, laa me zie. ⁵² Zeene bdzin me xtan Samar, pxeel me bla zho bdedner zie zho tib guiedz win ne ndxie nëz co, par dien pa lo gdeed miech co cuëz me. ⁵³ Bdzin zho guiedz co, choot bzhiguield ndeed zaatne mbëz me; sac bien zho nëz Jerusalén tsie me. Nac zha Samar, rlëënie zho zha Israel.

⁵⁴ Zeene bin Jacoba grop Jacob Juan, blëë guic zho, rëbchaа zho lo me:

—Maestro, ¡mazd tibaque gotsaa gnab ne gliaal gui lad grë miech rii, zeena nitlogazh zho!

⁵⁵ Biecwaque me, goctox me lo zho rëb me:

—Riende to lëë zhapaa nac men ne nacnie to. ⁵⁶ Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial csilaa naa zho lo dol.

Ga briece zho güey zho stib guiedz.

⁵⁷ Nëz zie zho, zeene wbig tib mgui co rëb me lo Jesús, laa me racladz tsienal me zhits Jesús, tel pa lotaa nac zaatne tsie Jesús. ⁵⁸ Dzigo pquiab Jesús rëb Jesús lo me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

⁵⁹ Laa zha ne bredz me tsienal zhits me, pquiab zho rëb zho:

—Sënal naa zhits luu, per bzhiguiel bneedz diidzbey cuëz naa, gaŋgazh naa tsoliu pxoz naa.

⁶⁰ Rëbchaa me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënal, zeena tsie luu tsienee luu lo miech, gacnaŋ zho zha racladz Dios gban zho.

⁶¹ Pquiab stib zho rëb lo me:

—Maase sënal naa zhits luu, per bneedz diidz ganiegazh naa diidz lo grë menlidz naa.

⁶² Dzigo rëbchaa me:

—Zha ne xen nia rad ni csilo zho gwi zho nëz zhits zho, niacxe zrieelo ygan zho ngon. Scaque zha ne sëëb xnëz Dios, grieelod sëëb zho telne mazdraa rleynie zho grë ncuuaŋ lo guidzliu rii.

10

Güey tsongaltsii zha ne güeynee Xtiidz Dios

(Mt. 11:20-24)

¹ Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

² —Golnab lo Dios —rëb me—, cxeelraa me zha ne guŋ xtsiin me. Sac ne nligaa ndaldoo miech ne quiambëz yquiaadiag Xtiidz me, zha ne gneelew lo zho rgaad. ³ Goltsie sca, per nsin nsin golso. Golguien gaŋle rrieequia nac to zig cho mëcwxiil yeen, ni laa naa rxel to zaatne no grë coyot dox. ⁴ Peet güeyde to, güeyde to dimi, güeyde to ncuuaŋe gow to, lab tow, miŋe quiase ni to mincose goltsienie.

'Miech ne yquiaabdiuzh to nëz, sode to dieen zharaa yquiaabdiuzh to zho.

⁵ Zeene yguib to zaatne cuëz to, yu ne gdzintaa to, golnab gunlay Dios grë zha ne no yu co. ⁶ Telne squiaadiag zho miŋe rnee to, zunlay me zho; telne nëdgaa zho yquiaadiag zhow, dzigo toque gunlay me. ⁷ Zha ne gneedz zaatne cuëz to, lidzse zha co golcuëz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne ruŋ dziin, ib none ycaa zho miŋe non xtsiin zho.

⁸ 'Guiedz ne yquiaadiag miech miŋe zienee to, zaacse golgac lo zho, tel pe guielwagw ne gneedz zho, golquiina; ⁹ golgunguiac grë men rzacne ne no ga. Golguiab lo zho, laa dze ne nolu Dios zha sëëb miech xnëz me, laa dze co bdzinle. ¹⁰ Sangue guiedz ne siguiel d miech yquiaadiag zho miŋe zienee to, golree grë ro xnëz zho, ¹¹ gaŋlo zho glit to grë yudie co ni to, zeena guien zho gaŋle nëz ne nitlo zho ga zie zho. Golguiab lo zho, zha bguiba, sac binpaa zho zha grieelo sëëb zho xnëz Dios ni nëd zho gon zho diidz. ¹² Gacnaŋ zho gaŋle, gal dze ne guŋ Dios xquielwxtis me, lëëtaa gac guielne ne tsieguial zha Sodom, mazdraa nac guielne ne tsieguial zho.

¹³ 'Scadaa nac zha Corazín ni zha Betsaid. ¡Probsaxe zho, sac gon gonpaa zho grë milagr ne ruŋ Dios, per ib psaaŋd zho xquielntseeb zho! Tel niaca miŋe ngaa grë men Tiro, grë men Sidón, nian grë milagr ne gon zho, ib ndedsod mban niac grë zha co nio zho guielne, zëëb nsaan zho xquielntseeb zho mbig zho lo Dios. ¹⁴ Gacnaŋ zho gaŋle, gal dze ne guŋ Dios guielwxtis, lëëtaa chaxtigw ne yгаа zha Tiro ni zha Sidón, mazdraa miŋe yгаа zho. ¹⁵ Scaque zha Capernaum, masaque rzac zho niina zha nziuuraa lo Dios, per gacnaŋ zho gaŋle haxta quiet len gabil ga guey zho.

¹⁶ Blozhse sca bnee me, rëbchaa me lo zho:

—Grëse zha ne yquiaadiag miñe gnee to, rrieequia naa ga rcaania zho. Zha ne nëdga ycaania to, rrieequia naa ga nëd zho ycaania zho; ni zha ne nëd ycaania naa, rrieequia meñ ne pxeel naa ga nëd zho ycaania zho.

Wbire tsongaltsii zha ne pxeel Jesús ga

(Mt. 11:25-27; 13:16-17)

¹⁷ Zeene laa gza tsongaltsii zha co wbire, rley zho bdziñ zho lo Jesús. Rëb zho haxta grë mendox bdzieb ma zho, zeene bzeet zho lê me.

¹⁸ Dzigo pquiab me rëb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye. ¹⁹ Laa naa bneedz poder qui lo to, parne gdeete to diidz guñ ma miñe racladz ma; grë meeldox, grë meegu ntseeb, niicle gzoobni to ma, peet gacde to. ²⁰ Nli laa to runcxoon mendox niina, per gleyde to por miñ co, sinque mazd golley porne laa lê to zhooble lo Dios, laa to ngable lo me.

²¹ Horco biaad tib guiebley nroob zdoo Jesús, bnee me lo Dios, rëb me:

—Papá, luu nac meñ ne rnabey gbaa, luu nac meñ ne rnabey guidzliu, rnedz naa xquizh lo luu, sac grë miñe noyuñ luu nu niina, bdeete luu diidz niacnañ grë zha raca, sinque laaw blu luu lo grë zha ne nac zig grë mëédlas. Sca quaiyuñ luu, sac ib scale racladz luu gaca.

²² Blozh ga rëb me lo grë miech ne ndxie lo me ga:

—Grëse ncuaañe ran to quaiyuñ naa, Dios meñ ne nac Pxz naa, me bneedz poder rii lo naa; sac ib laa me bzo naa, naa guña. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz guñbey me, zunbey zho me.

²³ Dzigo rëbchaa me lo xpëedscuel me:

—Dichos to bgaa to noyañ to grë miñ rii. ²⁴ Sac gon blactaa zha ne biadteed xtiidz Dios padzeela, haxta grë zha ne bnabey leñ dze co, bzoobladz zho niañ zho grë ncuaañe noyañ to, bzoobladz zho nquiaadiag zho grë ncuaañe noquiaadiag to.

Xcuent tib zha Samar

²⁵ Tib dze wbig tib zha ne nac maistr ley lo Jesús, bnabdiidz zho lo me, rëb zho:

—Maestro, bnë lo naa dien, ¿pe nac miñe guñ naa parne grielo ygaa naa guieľmban ndzon ne gdziñd dze lozh?

²⁶ Pquiab Jesús rëb me:

—¿Zha dien zhobnee lo ley? ¿Pe rnabeya?

²⁷ Rëbchaa maistr ley co:

—Znu rneew: “Dib zdoo luu, dib nace luu, dib guieľbiini ne no guic luu, dipse xfuers luu, bleynie Dios; ni bleynie samiech luu, zigne rleynie luu luu.”

²⁸ —iMin qui nagon bioxco guñ luu —rëb Jesús—, zeena ygaa luu guieľmban ndzon ne gdziñd dze lozh ga!

²⁹ Per par glud ne noxcod me guñ me miñe rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleynie naa?

³⁰ Dzigo bzodiidz Jesús tib cuent lo me, rëb Jesús:

—Tib meñ wladz name brie me Jerusalén zie me guiedz Jericó. Nëz zie me briequia ngbaan, bdiñ ngbaan me, mer niut ngbaan me; grëse ncuaañe ney me, haxta xab me blan ngbaan. ³¹ Laa me nix ga, zeene laa tib pxoz bded. Zigne gon pxoz me, biecwga pxoz bded pxoz tib lad. ³² Wdzeepaaw, zeene laa tib zha ne runaque dziin leñ yadoo ziaad ga; scaque zigne gon zho me, tib

tib bded zho. ³³ Sca nix me ga, zeene laa tib zha Samar bdziñ. Zeene gon zho me, wbig gax zho lo me; pquia zdoo zho me gon zho zha rna me. ³⁴ Gagazh been zho me rmed, blee zho vin bdiib zho lo grè rid ne ney me, bdëëb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdziñnie zho me tib yu ne rbëz miech ne zo nëz; ga blëznie zho me, pquianap zho me.

³⁵ Biini liu, zeene laa zho brieë ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rëbchaa me lo maistr ley co:

—Lo gza tson zha ne nadien bded zaatne nix men co, cho tib zho bien samiech zho ga nac me?

³⁷ Pquiab maistr ley co rëb me:

—Zha ne bion bded gaw, sac zha co pquia zdoo me.

Dzigo rëbchaa Jesús lo me:

—Sca nagon none gun luu.

Blëz Jesús lidz Mart ni Marí

³⁸ Laa Jesús no nëz gza xpëëdsuel me. Bdziñ me tib guiedz win, ga no tib wnaa lë Mart, dzigo men co bdeed zaatne blëz zho.

³⁹⁻⁴⁰ Bdziñ zho lidz Mart, lëëlëd bzëëb Mart ro tie. Zhixco ro tie no Mart, laa tib bel Mart lë Marí zob noquiaadiag grë zhiwseed Jesús. Gon Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rëb Jesús lo me:

—Aque luuw nli Mart, squitaa noxco luu dien zha gac xtsiin ro tie luu. ⁴² No tib ncuane mazdraa none tsoxco luu, ni lëë min co nu gon noyun Marí; gane grieelod ycaa naa mine quiaayun me.

11

Zha none gzodiidznie ne Dios

(Mt. 6:9-15; 7:7-11)

¹ Tib vuelt, loxaque blozh bzodiidznie Jesús Dios, wbig tib xpëëdsuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpëëdsuel me zha gzodiidznie zho Dios.

² Dzigo rëbchaa Jesús:

—Zeene gzodiidznie to Dios, golguiab:

Dios, luu nac PxoZ no, zob luu gbaa;

luuse nac men ne mazdraa ndzon.

Luu nac men ne gnabey no,

mine gnabeytaa luu, zigne raca gbaa,

scaque none gaca lo guidzliu nu.

³ Been guielnzaac bneedz ncuane dioow no nadze.

⁴ Bzhiguiel been no perdon grëse dol ne ziodziun no lo luu,

zigne rdziun no samiech no perdon grë falt ne run zho lo no.

Gdeete luu diidz yquuil mendox no,

been guielnzaac bla no lo ma.

⁵ 'Sca nagon gnee to —rëb Jesús—. Ncuane gnab to lo me zneedz mew. Samiechse to name, gzoob ne wxina, lega nacle glanso tib zha ne ndzieeldiidz

to ni guieḽ pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguiel beenxtad tsonaque xcuḽ luu lo naa. ⁶ Lega nacle blanso tib zha ne runbey naa, na guieḽ pe gded naa yquiuḽ zho.” ⁷ Segur znē zho: “Gūnneete luu naa nu, dziitsle niioog ro lidz naa, nataa nixguies grē xpēēd naa; grielod gache naa gnedz naa ncuaaḽe racladz luu.” ⁸ Per telne sonaad to ga, gaḽse zho tibaque quianee to, gnid naa zho tsieched zho gneedz zho ncuaaḽe racladz to. Per gneedzd zhow porne ndzieeldiidz to zho, sinque laa zho gneedza porne goḽ zho tibaque quianab tow. ⁹ Scaque nagon none guḽ to, zeene pe gnab to lo Dios. Ncuaaḽe rquiuḽ to, goḽnaba lo me, scagaa me zneedz mew. Golguib tel pe racladz to, me nac meḽ ne gacnie to gdziel tow. Golcuedzlē me, scagaa me saania me to. ¹⁰ Sac grēse zha ne rbig lo me rnab zho ncuaaḽe rquiuḽ zho, rdeed mew. Zha ne rguib ncuaaḽe racladz zho, racie me zho rdziel zhow. Zha ne rbedzlē me, rcaania me zho.

¹¹ Golguieḽ gaḽe, zig nac to, zeene rnab xpēēd to tib meḽ gow win, ḽniacxe ziazh to co to tib meel nia win? ¹² Zeene rnabgaa win tib dzit, ḽniacxe zgo to tib meegu nia win? ¹³ Led rioxco to lēe niapse ncuaaḽe wen rdeed to lo xpēēd to, niiclé ne miech ntseeb nac to. Telne sca rioxco to xpēēd to, peleḽ Pxoḽ to dzigo, meḽ ne zob gbaa, tsoxcod me to. Ib tedsod grēse zha ne gnab lo me gdeed me ncuaaḽe rquiuḽ zho, zdeed mew; haxta zha ne gnab cxeel me Espiritu Sant gacnie zho, zuḽ me miḽe gnab zho.

*Rēb zho meḽdox nacie Jesús
(Mt. 12:22-30, 43-45; Mr. 3:20-27)*

¹⁴ Tib vuelḽ beḽcxooḽ Jesús meḽdox ne nosacsi tib mgui co. Ib gacd gnee mgui, sac psan ngop ma mgui. Dzigo zigne beḽcxooḽ Jesús ma, laa mgui psilo bnee. Grē miech ne ndxie ga, bzee zdoo zho goḽ zhow. ¹⁵ Nogaa zho rnee, Beelzebú ma ne rnabey lo meḽdox, ma co nacie me gane rrieelo runcxooḽ me meḽdox. ¹⁶ Brieequia spalaz zho, rnab zho lo me guḽ me pe stib milagr, parne gliladz zho nli Dios pxeel me.

¹⁷ Bien Jesús zha rza guic zha ne noneenē me ga, dzigo rēbchaa me lo zho: —Ncuaaḽe gacd goḽ rnee to! Tel tib guiedz nadien, csilo miech, lēēque zha tilnie meḽladz zho, ḽniacxe nitlod guiedz co? Tib diigaa miecha, tel lēēque zha tilnie meḽlidz zho, led znuse lēē nitlo dii co. ¹⁸ Scaque meḽdox nagon, telne lēēque lēē ma guḽcxooḽ samēdox ma, ḽpe nale na bnitlo ma! Laa naa rne miḽ rii lo to, porne rnee to ma ne rnabey lo meḽdox nacie naa, gane rrieelo runcxooḽ naa ma. ¹⁹ Nana telne sca rzac to, ḽzha ne nacgrē to dzigo, cho nacie zho ne ye zho runcxooḽ ma? Gase naganle rlu doḽdox i quaiyuḽ to squi rnee to. ²⁰ Sangue tel naa, Dios nacie naa runcxooḽ naa meḽdox, ni ga rlu gaḽe laa Dios pxeelle meḽ ne gnabey lo to.

²¹ ¡Masaque nac meḽdox zig tib zha ne no xfuers! Tib zha ne no xfuers, tel tibaque ney zho xquib zho, ḽcho dien lega sēēb lidz zho gla ncuaaḽe quianie zho? ²² Per zeene rrieequia stib zha ne mazdraa no xfuers, zha cole ritche zha co, runcxooḽ zho zho, riaannie zho grē ncuaaḽe gopchen zho. ²³ Golgacnaḽ sca gaḽe, zha ne rlēē lo naa, ga rlu nacnied zho naa; ni zha ne racnied naa lo xtsiḽ naa, paat yquiuḽ zho.

²⁴ Meḽdox ne rsacsi miech, zeene laa ma rsaan zho, rie ma riequianzē ma dan zaatne choot miech guieḽ, rguib ma dien pa cuēz ma; ranse ma rdzielḽ zaatne cuēz ma, rnee ma: “Mazd gbire naa guia naa lidz naa stib.” ²⁵ Dzigo rbire ma, zeene rdziḽ ma lo zha ne psacsi ma ga, masaque rzac ma zho zig rzac miech tib yu ne griiḽ blioob, tib yu ne ine nzhixcuaa len. ²⁶ Dzigo rie ma riexi ma zgadz samēdox ma, ma ne mazdraa ntseeb, rdziḽ ma gza ma rzēēb ma zdoo zha co, rsilo ma rsacsi ma zho. ¡Horcole mazdraa mban run ma zho!

²⁷ Sca quianee Jesús, zeene nguiedz bnee tib wnaa ne no lad grē miech ne ndxie lo me ga, rēb wnaa cō:

—¡Dichos wnaa ne gop luu, wnaa ne bgadz luu!

²⁸ Pquiab Jesús rēb me:

—¡Mazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

Zha ne riladzd cho nac Jesús

(Mt. 5:15; 6:22-23; 12:38-42; Mr. 8-12)

²⁹ Miech guizhiu ne quiadzinraa lo me ga, dzigo bnee me rēb me:

—Nadzpaan tseeb zdoo to nac to miech ne mban len dze rii. Tibaque quia to racladz to gan to pe stib milagr, parne glladz to Dios pxeel naa, ¿zha rnaara milagr ne racladz to gan to? Gacnan to ganle, stibaque milagr gon gan to, tib min csoladz to zha goc Jonás. ³⁰ Haxta dzigoraan nagon guien to nli Dios pxeel naa. Sac tel Jonás, zeene gocnan zha Ninive zha bzhaac me, dzigo bliladz zho nli Dios pxeel me. ³¹ Ni gacnan to ganle, zeene gal dze ne laa Dios gun xquielwxtis me, zieso wnaa ne goc rein nēz Sabá, steedquie me to. Sac gon pa lo ga brieec me, biaad me biadquiaadiag me grē xtiidz Salomón; ni to, lo to nu zo men ne mazdraa non lo Salomón, ni nēd to gon to xtiidz me. ³² Scaque grē zha Ninive, steedquie zho to; sac gon zeene güeynee Jonás lo zha Ninive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

³³ Tsod zha ne yquiaagui tib biini, lozh ga ctoos zho pe cos low, gzolangaazhow zaatne ngueets. Sac biini ne rquia, glaa rzoba par gziiniw len yu, zeena guiab biini lo grēse zha ne seēb len yu. ³⁴ Rrieequia nac bziaalo miech zig nac tib biini. Telne niapse lo grē ncuane ndzinli rwi zho, dzigo gdipse xcuerp zho no lo guielbiini. Laa telne loxaque lo grē ncuane nonguiel dga rwi zho, dzigo gdipse xcuerp zho no lo guielcow ga. ³⁵ Golguien sca pa lo rwi to, napaa laa ne tso to lo biini, lel lo guielcow no to. ³⁶ Sac gon, tel dipse xcuerp to no lo guielbiini, ni tib lēw nod lo ncow, zlupaa to; sac masaque nac to ga zig tib zha ne zo gax tib lo biini nroob.

Güey Jesús lidz tib zha farisé

(Mt. 23:1-36; Mr. 12:38-40; Lc. 20:45-47)

³⁷ Zeene blozhse bnee Jesús lo grē miech co, dzigo bredz tib zha farisé me güeynie zho me tib wagw lidz zho.

Bdizin me lidz zho, bded me bzob me lo mez, ³⁸ psilo me dow me, per bdiibd me nia me zigne nacpaa xcostumbr grē zha Israel. Zeene gon zha farisé cow, rlozhd gzee zdoo zho; ³⁹ dzigo rēbchaa me:

—Grē to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgbaan run to; masaque nac to gon zig tas, zig plat ne nēz zhtisse mbe rna, laa nēz lena rnaara di beed.

⁴⁰ Nadzpaan cow nac guic to! ¿Pe riende to racladzd Dios ne laglaase glu miech wen nac to, sinque racladz me desde zdoo to gac to miech wen? Sac dib nace to psan me to. ⁴¹ Laa ne squi no to noban to, mazd goldeed ncuane nacchenpaa to lo grē zha ne guien d pe yquiin, zeena gac to miech ne nli paa wen.

⁴² ¡Probsaxe to! Rzac to demas nguzobdiidz to lo Dios, rio to haxta grē guizh bitxtil, grē guizh rud, ni grēragaa guizh ne ran to, rdeed to xdiezm to yadoo; per rioxcode to gban to zigne rnabey Dios, ib rioxcode to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to. ⁴³ ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh

lo to, zeene rdzieel zho to dib ro nêz. ⁴⁴ iProbsaxe to, lëëtaa rdzieel to grë to maistr ley! Masaque nac to zig nac grë baa ne rludraa pa nac. Tel baa cow, zeene rded zho zaatne niaaw, ib riend zho lad grë ncuiaan noyodz ga, noded zho.

⁴⁵ Horco pquiab tib maistr ley, rëb zho lo me:

—Maestro, ÿye no dzigo lëë rzoob luu squi nac?

⁴⁶ Pquiab Jesús rëb me:

—Ye to gon. iProbsaxe to! Rio to rzadraa ley ne rnabey to gun miech, ni per ni to rioxcode to siquier csilo to gun tow. ⁴⁷ iProbsaxe to! Paat rquiinda gon squi rio to, rlozhd dieen paraa rzhixcuaa to ro xpa grë zha ne biadteed xtiidz Dios padzeela. ⁴⁸ iIgwal ntseeb to grë pxozgol to! Sac gon, zha beet grë zha co, laa to no rzhixcuaa to ro baa. ⁴⁹ Nanle Dios squitaa ntseeb zdo to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho groj zho.” ⁵⁰ Gacnan to sca ganle, grë to miech ne mban len dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu, ⁵¹ desde Abel haxta Zacarí men ne beet pxozgol to len yadoo zaatne nac gax lo pcoog. iNe nligaa grëse dol co gon, to quizha! ⁵² iProbsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nêde to giladz tow, ni niicle nêëdga to giladz zha ne racladz ycaaniaw.

⁵³⁻⁵⁴ Blozhse ga, laa me brieë ga. Grë zha farisé, grë maistr ley, per nli rlëë zho bin zho sca rëb me. Psilo zho nzian grë ncuaañe rnabdiidz zho lo me, rguib zho dien zha gunglëë zho me, par dien pe cxiñd me pe tib diidz, zeena min co yquiaaqui zho tsiezoob zho xdemand me.

12

Grë ncuaañe rac ngueets zhliaan

(Mt. 10:19-20, 28-33; 12:32)

¹ Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëëdsuel me, rëb me:

—Golguien gon, gunde to mine run zha farisé, tel zha rquiaalose zho miech wen nac zho. ² Sac grëse ncuaañe sca ngueets rac, grëse ncuaañe rlud miech, zdziñ dze ne xoobneña.

³ Zig nac grë ncuaañe zhliaanse rnee to lo ncow niina, zdziñ dze ne gon miecha zobna ngbidz; grë ncuaañe rnee to len yuse, zdziñ dze ne dib lad guiedz gacnan miecha.

⁴ Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grieelodraa zho gun zho. ⁵ Golguien, Dios nac men ne mazdraa nroob, mine rnabey me min co none gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonëz me zho nêz len gabil.

⁶ Nligaa gdziebde to miech, csaand Dios lega pe gac to. Golwi ganle, zig nac grë mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladzd me ma. ⁷ Pelel to dzigo csaan me, haxta guits guic tow, grësew ngaba lo me. Gdziebde to sca, golguien ganle nonraa to lo tib dzoon mguin.

⁸ Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grë xanjl Dios, nacie naa zho. ⁹ Sañgue zha ne ctoladznie naa lo miech, scaque naa ziep naa lo grë

anjɫ co ruɲbeyd naa zho. ¹⁰ No zha ne rneenë naa, per zuɲ Dios zho perdon doɫ co; saɲgue zha ntseeb ne gneenë Espírítu Sant, íb guɲdraa me zho perdon.

¹¹ Zeene tsiezo miech rii to lo grë zha ne rnabey xyadoo zho, tsiezogaa zho to lo grë zha ne nac wxtis, tsode to zhgab dien pe gnee to; ¹² sac zeene sca tsiegala, Espírítu Sant csiaab guic to pe nac miɲe gnee to lo zho.

Zha ne loxaque rapchen

¹³ Horco wbig tib zha ne no lad grë miech co, rëb zho lo Jesús:

—Maestro, bzhiguiel bnee lo bets naa glë zho ncuaane psan pxoz no, gneedz zho miɲe raguial naa yca naa.

¹⁴ —Aque luuw nli —rëb Jesús—, ¿cho në lo luu laa naa noyun guielwxtis co? Ziald naa gon par quiiz naa ncuaane rap miech.

¹⁵ Dzigo bnee me lo grë miech co, rëb me:

—iGolguien gon, gzoobladzde to demas gapchen to! Sac niicle ndziibraa gapchen miech, grieelod por grë ncuuan co ndzon gac lo xquielmban zho.

¹⁶ Znu gon bzhaac tib men ne nroob gopchen. Nat liu quianie me, zeene rlaap me grë ncuaane ran me, nroob ncuaane rlis me low. ¹⁷ Bdziɲ tib dze rgaadraa pa tsotsow grë ncuuan co, dzigo bzob me dien zha guɲ me. ¹⁸ Tibaque zeene rëb me: “Miɲe naca laa naa guɲ nroob grë yu qui, zeena zigtaa grë guielnzaac quiw, grëragaa ncuaane rap naa, ga tsotsowa grësew. ¹⁹ iPe zhidaa iz ne lëb grë ncuuan co! Peet tsieniedraa guic naa, íne guxt sob naa, gow naa, guie naa ncuaane gacladztaa naa.” ²⁰ Miɲ co rza guic me, tibaque zeene rëb Dios lo me: “Nadzpaa nxen luu. Guieel riigazh gon laa luu guet. iZhaale zha ne guiaannie grëtaa ncuaane beenlo luu í!”

²¹ Zeene blozh bzodiidz Jesús cuent co, rëbchaa me:

—Sca nagon rzac grë zha ne loxaque dien zha gapchen zho zienie guic zho. Ncuuan cose rionie guic zho, íb rioxcod zho guɲ zho ncuaane non nëz lo Dios.

Rsaand Dios zha ne no xnëz me

(Mt. 6:19-21, 25-34)

²² Blozh ga, rëbchaa me lo xpëëdscuel me:

—Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to par gban to, pa gdzielgaa ncuaane gdze xcuerp to. ²³ Mazd golconie guic to dien zha gac xquielmban to, dien pa tsiebannie to xcuerp to.

²⁴ Golwi lo grë nga ganle, led yed ma ran, led yed ma rlaap, led yed ma rgotow pe guielgon, per row ma; sac Dios rdeed ncuaane row ma. iTel to gon, mazdraa non to lo grë mguin co! ²⁵ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zriee lo guɲnool tow? ²⁶ Nanle to ganle led ncuaane grieelod ga. ¿Pe nac dzigo tant tso to zhgab ncuaane mazdraa nroob? ²⁷ Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee dzil ne ganle zëëb dan, zha rrooba, niow rlwu, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow. ²⁸ Gase na ganle golwi, niicxe grë guiee dan co na, zna dze zob nguiaiw, gzhe widz laaw bidzle, laaw tseclé, ni scataa niow rgacwxab Diosa; ¿pe lel to dzigo ygacwxabd me, niicle ne squi gard guien to dib zdoo to gnalo to me?

²⁹ Tsodraa to zhgab sca, guiab to: “¿Pa griee pe dioow ne, pa griee pe dio ne?” ³⁰ Grë miech ne ruɲbeyd Dios, tibaque zhgab co rio zho. Saɲgue to, golsoladz ganle Pxoz to men ne zob gbaa, nanle me pe nac grë xliaadz to. ³¹ Me nac men ne gneedz ncuaane yquiin to, per íb none glo tsoxco to gban to zigne rnabey me.

³² 'Nli zhis to, pale tib dzoon win mēcwxiił yeen, per gdziebde to. Sac niicle zhis to, per rley Pxoꝝ to men ne zob gbaa, laa me rneedz grēse ncuaañe rap me lo to. ³³ Gacxe waa, laa ne tsonie guic to dien zha gacnroob ncuaañe rap to, miñe quianie to gołtow, dzigo gołdeed dimi co yquiiñ zha ne rappaa liaadz; zeena sca nroobraa guiełnzaac ne ygaa to gbaa. Guiełnzaac cosi, led yeda nitlo, led yeda grē, led yeda tsoxtseeb lo ngbaan, tsoxtseebgaa lo mxil.

³⁴ 'Sca gołgun, sac goñ guiełnzaac ne gunlo to, zaatne gunlo tow, ga gdziñ to.

¡Nsin gołso!

(Mt. 5:25-26; 10:34-36; 16:1-4; 24:45-51; Mr. 8:11-13)

³⁵ 'Nsin sca gołso —rēb me lo zho—. ³⁶ Gołgac zig tib ngundziin ne rquiambēz gbire men ne rnabey zho zeene pa rie me tib lo guiełtsieel. Nsin rzo zho, zigne rdziñ me, rxal zho ro yu rzēēb me.

³⁷ 'Dichos zha ne nsin zo zeene laa men ne rnabey zho glanso. Ib tedsod, steed me zho nēz len yu, soob me zho lo mezh, csilo me mezhāl gdziib ncuaañe gow zho. ³⁸ Nligaa dichos zha ne sca nsin so, horne glansotaa me; niicle tel wxiña, ziadyiinigaa liuw. ³⁹ Gołgan ganle, tel niaca miñe gacnañ miech laa ngbaan tsieban lidz zho guieel, per nañd zho dien pa horpaaw, ¿niacxe zaaguies zho? Led sobna zho lēē, nsin nsin so zho parne csaand zho sēēb ngbaan lidz zho. ⁴⁰ Scaque to nagon, none sca nsin so to, sac goñ lega naclew zeene gan to laa Mguı ne pxeel Dios ziaadle.

⁴¹ Zeene blozh sca bnee me, rēbchaa Pedr lo me:

—Maestro, miñe blozh bnee luu i, ¿pe par nose naca, te ye par grēraa miecha ye?

⁴² Pquiab me rēb me:

—Laaw rne naa, par grēse zha ne zienie guic zaacse gun zho miñe rnee men ne rnabey zho. Nligaa nsin none so zho, sac laa zho guiaañnie zha ne nacgrē zho, zig riaañnie tib ngundziin sangundziin zho parne gdeed zho ncuaañe gow zho.

⁴³ 'Dichos zho, telne ine niowse noyũñ zho dziin co zeene laa men ne rnabey zho glanso. ⁴⁴ Zeene gan mew, ib tedsod so me zho, zha gnabey grēse ncuaañe quianie me. ⁴⁵ Per tel tsienie wguıt guic zho guiab zho gbireniobd me, csilo zho tel csacsi zho grē zha ne biaanñnie zho, tso zho loxaque gowcho zho, loxaque gzudz zho, ⁴⁶ tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonēz me zho guey zho zaatne no grēraa zha ne rond diidz. Nroob caxtigw ne cteed me zho.

⁴⁷ 'Sac goñ zha ne sca nañle pe nac miñe racladz men ne rnabey zho, ni tsoxcod zho gun zhow; ible nroob nac caxtigw ne ted zho. ⁴⁸ Mazd lēētaa caxtigw ted zha ne peet nañd, niicle gund zho miñe rnabey me. Grēse zha ne nañle pe nac miñe no gun zho, ib none gun zhow; nac cuent rii zig tib zha ne rcaania pe cos, tel palal miñe pcaania zho, none haxta nroobraaw ctsire zho.

⁴⁹ 'Niina ne laa naa zial, rrieequia zialzobgui naa lo guidzliu. ¡Ni zoot naa gon, tebaa ranle naa laaw quiaayzbel! ¡Tebaa psiaalle naa lo dziin ne zialgun naa! ⁵⁰ Per na naaraa none teed naa tib guiełñ nroob, ni mbanse goñ rac zdoo naa quiambēz naa gdziñ dze co. ⁵¹ ¿Masaque nañ to na lēē, laa naa zial loxaque par cuiñ wense miech? Lēda goñ, ye zial naa zialgunctil naa zho. ⁵² Sac desde len dze rii, yu ne no gaay miech, laa zho ctsolsa. Tel sēēb chop zho xnēz naa, laa ston zha ne guiaan ga, ctsidil zho; tel sēēbgaa tson zho, scaque grop zha ne guiaan ga, gandzed zho zho. ⁵³ Mēēd ne gan laa pxoz zho, laa xniaagaa zho bzēēb xnēz naa, gandzed zho pxoz zho, gandzed zho xniaa zho; scaquegaa zha ne quianie mēēda, zeene gan zho laa xingan zho, laa xindzoopgaa zho bzēēb

xnëz naa, gandzed zho zho. Zha ne nac nguzhizha, zlëënie xniaa tseel zho zho; tel xniaagaa tseel zhow, zlëënie zho me.

⁵⁴ Blozhse sca bnee me, rëbchaa me lo grë miech ne ndxie ga:

—iPe nlipaa rnee to riende to pe nac grë ncuaañe noyac len dze rii! Zha zeene ran to rquia xcow nëz ne rzëëb ngbidz, znuse rien to laa guie guiab.

⁵⁵ Zeene ranгаа to ziaad me nëz ne rzë ngbidz len mëë nal, nanle to laa nëëg gac. ⁵⁶ iGuielwquiaalo i lo to gon! Zha zëëb dzigo runbey to grë señ ne rlu zhan gbaa, rlugaa lo guidzliu, laa grë mine quiayan to len dze rii riende to.

⁵⁷ iNone guien to tozhal cobey dien pe nac mine nonguiel gun to! ⁵⁸ Gzoob ne bdilnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaañ mpas, lëdle tsiezo zho to lo wxtis; sac tel laa to gdziñ lo wxtis, ib znabey wxtis zha ne co to ladzguiib. ⁵⁹ Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

13

Grëse miech, ngoopdol nac zho

¹ Len dze co, bdziñ bla zho lo Jesús bzodiidz zho lo me zha bnabey Pilat gut bla zha Galilé, lëëtse zeene no zho len yadoo noyut zho ma ne nogogon zho lo Dios. ² Dzigo rëbchaa Jesús lo zho:

—Segur na lëë, rëb to mazdraa ngoopdol grë zha co lo grëraa zha ne no nëz Galilé, gane sca bdzieelo zho. ³ iLëda gon! Zigtaa ngoopdol zha co, scaque to ngoopdol nac to; telne csaande to xquielntseeb to gbig to lo Dios, ye to znitlo to. ⁴ Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdol zho lo grëraa zha Jerusalén, gane sca gut zho. ⁵ Per gacnan to ganle, jleda! iZig rne naa ga, ye to miech ngoopdol nac to, ni telne csaande to xquielntseeb to gbig to lo Dios, ye to dzdiñ dze ne nitlo to!

⁶ Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quianie me lbë uv. Cad rdziñ mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, ⁷ dzigo bnabey me zha ne quianap liu co chuggazh zhow, rëb me: “iPchuggazh yag yozh qui, zhlēse zoba i! Nale rac tson iz ziyal naa rguib naa nex low, ni peet nex rneedzda.” ⁸ Dzigo pquiab zha ne quia dziin lo me ga, rëb zho: “Psaan dien guiaaña stibtaa iz rii, na laa naa glë zhana, na laa naa gdziñ beeba. ⁹ Telne yquiadaque nex low iz ne ziaad, maase chug new dzigo.”

Biac tib zhuz ne nosacsi menđox

(Mt. 13:31-33; Mr. 4:30-32)

¹⁰ Tib dze ne rdziiladz zha Israel lo dziina, bdziñ Jesús len yadoo, psilo me noseed me miech.

¹¹ Lad grë zha ne noseed me ga, lad co no tib men wnaa nlengw nac zhits, gocle tsiimtson iz sca nosacsi menđox me, ib gacd gacnli me. ¹² Zeene gon Jesús me, dzigo bredz me me, pxobnia me guic me, rëb me lo me:

—iNiinagazh gon, laa luu guiac!

¹³ iHorcogazh laa zhits me ga gocnli, rley me, psilo me rdeed me xquizh lo Dios! ¹⁴ Laa zha ne rnabey yadoo, zeene gon zho sca beenguiac Jesús me dze co, blëë zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho len dze ne rac dziin, jled tsod zho guiaad zho guiac zho dze nda rii!

¹⁵ Dzigo pquiab Jesús rëb me:

—¡Nazdpaa ntseeb to! Rquiaalo to ib peet dziin runde to dze rii. ¿Pezhe ga waa run to zeene rsilaa to xcon to, rsilaa to xpurr to dze rii rieguie to ma nis? ¹⁶ Zha nac dzigo rzac to, nonguielda nu ben naa beenguiaac naa wnaa rii, dze rii. Gołwi ganle zha xtií Abraham nac me, len tsiimtson iz goc sca nosacsi mendox me.

¹⁷ Zha ne rlëë ga, zeene bin zho sca rëb me, ptoładz zho; laa grëraa zha ne ndxie ga, rley zho ran zho grëtaa milagr ne run me.

¹⁸ Blozh ga, bnee me rëb me:

—¿Zha ganle racnroob lo xtsiin Dios lo guidzliu rii? ¹⁹ Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zaatne racbniw, rrooba, raca tib yag nroob; haxta rie grë mguin riezhixcuaa ma zhiptsieez ma low.

²⁰ 'Ziaadaque gon gaca, zig ncobi. ²¹ Sac tel ncobiw, niipaquew rcots men wnaa tson lmud rin, ni dib nacse ncob co rzibe.

Zha ne ycaania Dios

(Mt. 7:13-14, 21-23)

²² Laa Jesús no nëz zie me nëz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina. ²³ Tib vuelt bnabdiidz tib zho lo me, dien pe zhis nac miech ne ycaania Dios. Dzigo pquiab me rëb me:

²⁴ —Nligaa zhis zho, sac masaque naca zig tib puert niase. Gołtsoxco sca niinasraa golsëëb xnëz me ycaania me to, sac dzin dze ne nzian zho gaładz sëëb, per grielodraaw. ²⁵ Deque laa men ne rnabey csioog ro yu, telne biaan to nëz ley, niicle cuedzraa to me gnab fo siguiel me cxal me ro yu sëëb to, per cxaldras mew. “Runbeyd naa to”, gnë me, “nand naa dien cho zha to.”

²⁶ Niicle guiab to runbey me to, biaadpaa me ladz to pseed me miech, haxta downie to me. ²⁷ “Laa naa nile”, gnë me, “runbeyd naa to. ¡Gunnetraa to naa, ib rdziguend naa grë miech yozh, miech ngoopdol ne nac to!”

²⁸ 'Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biaanse nëz ley. Nligaa mbandox gac to, zoon to, haxta zow lay to lo guielnë co. ²⁹ Ni mazdraaw gon, zeene gan to pa lo guidzliu brie grë miech ne bdzin ga, ine zobnie me zho lo xmezhe me noyownie me zho. ³⁰ Grë zha ne rzac to niina peet nond, lëtse zha co ygaa guielnzaac co; laa grë zha ne rzac non zho niina, peet ygad zho.

Bzeet Jesús zha nac zha Jerusalén

(Mt. 23:37-39)

³¹ Dze coquew, bdzin bla zha farisé rëb zho lo Jesús grieeniob me ga, sac laa Herod racladz gut me. ³² Dzigo rëbchaa me lo zho:

—Gołtsie golguiab lo mëz win co cxeew me spalal, nadzese ni gzhe gunguiaac naa miech nu, zigtaa zha ne rzacnëw, zigtagaa zha ne nosacsi mendoxa; gal widz guield naa nu. ³³ ¡Nligaa nadesew ni gzhe, widz laa naa gdzinle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

³⁴ ¡Aque tow men Jerusalén! ¿Pe nacne squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Błactaa gocładz naa niacnie naa to, nquiianaap naa to zig run nguid rgueedz ma xpëed ma, per bzhiguielde to. ³⁵ Gacnan to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: “¡Zha ndzontaa men qui pxeel Dios lo ne!”

1-2 Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdziñaque tib men bgui, rzacné me, gdipse me no gui. Grëraa zha farisé ne ndxie ga, quialeets zho Jesús quiambëz zho dien pe zunguiac me mgui co. ³ Dzigo rëbchaa Jesús lo zho, ni lo grë maistr ley ne ndxie ga:

—Golné dien, çpe nonguiela zunguiac naa miech dze rii, te nonguielda ye?

⁴ Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui, ⁵ rëbchaa me lo zho:

—çPe nli na peet dziin runde to dze rii? Tel zha tsietsope tib xpëed to, tib xmagaa to tib len guuuu dze rii, çniacxe tsiebeegazhde to xpëed to, tsiebeegazhdgaa to xma to ga?

⁶ Loxaque lo zho rac, ib bdzield zho pe nquiab zho.

⁷ Grëraa miech ne nodziñ ga, no zho rguib zho dien zha yгаа zho zaatne nzhixcuaraa sob zho. Gon Jesús zha rac zho, dzigo bnee me lo zho, rëb me:

⁸—Golguien gon, zeene znu cuedz miech to, zig nac tsie to tib wagw zaatne noyac tib guieltsieel, ib gunde tsiesob to zaatne nzhixcuaraa. Sac gon, nenda glanso tib zha ne nonraa lo to, ⁹ lozh ga, laa zha ne bredz to lo lni guiaadliso to ga, gnë zho: “Guso i dien sob men rii.” Led tib guielto ga par to, race to laa to tsieso ga, tsiesob to zaatne rialle ro beel. ¹⁰ Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaad-xi zho to tsiesobnie zho to zaatne nzhixcuua. Zha ne zoble lo mezh ga, zeene gan zhow, zianzniu to lo zho.

¹¹ Golsoladz ganle: grë zha ne lëëque zha runnon zho, lel riaanwin zho; laa zha ne riaanwin, runnon miech zho.

¹² Blozh ga, rëbchaa me lo men ne nac lidz ga:

—Scaque luu gon, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëgaa zha ne no gax lidz luu zha ne rapchense, zha cose cuedz luu; sac gon ib tedsod zbedaqaque zho luu lo zhilni zho, stsire zho mine been luu ga. ¹³ Mazd bredz grëse miech, zig nac zha ne guiend pe yquuin, zig nac zha ne guiend tib nia, zha ne guiend tib ni, zha ne roldgaa lo; ¹⁴ zeena gal dze ne grieeban grë zha ne bioxco wban zigne racladz Dios, ine gley luu yгаа luu guielnzaac ne tsieguial luu gneedz me lo luu.

¹⁵ Lad zha ne zobgrë me lo mezh ga, pquiab tib zho rëb:

—jDichos grë zha ne sca yгаа tsiesob lo mezh, tsietownie zho Dios zaatne rnabey me!

¹⁶ Pquiab Jesús rëb me:

—Tib men name, nzian zha ne bredz me tsie tib wagw lidz me. ¹⁷ Zeene gol dze ne laa guielwagw co gac, pxeel me tib zhingundziin me ziexi grë zha co. ¹⁸ Per pasë zho nie, zhaase zhaase ncuaane pquiaqui zho. Tib zho rëb: “Grielod së naa, sac laa naa pca tib lê liu, ni lëëtse nadze no gaso naa low; bzhiguiel gudz lo me gun me naa dispensar.” ¹⁹ Stib zho rëb: “Niina wriin pca naa gaay nëz ngon, laa naa no ganie ma dien zha run ma dziin, gudz lo me yquiambëzd me naa.” ²⁰ Laa stib zho rëb: “Grielod së naa, sac niina wriin ptsieelnia naa, bzhiguiel gudz lo me gacd guial naa.”

²¹ Bdziñ ngundziin co bzodiidz zho lo me zha rzë xtiidz grë zha co. Zeene bin mew, wbiñladz guic me, bnabey me zho güey zho dib lad guiedz güeyxi zho grë zha ne guiend pe yquuin, grë zha ne guiend nia, zha ne guiend ni, zha ne rold lo, grëse zho bdziñnie zho ga. ²² Blozh ga, rëbchaa zho lo me: “Laa naa wbirele xmandad luu gon, per scase noraa zaatne cue miech.” ²³ Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nëz

rii, bloo guic zho guiaad zho; ib none tsodzëse miech lidz naa. ²⁴ Sac grë zha ne bredz naa glo ga, ni lalnu racladzdraa naa yгаа zho guielwagw rii.”

Zha ne racladz sëëb xnëz Jesús

(Mt. 10:37-38)

²⁵ Laa Jesús no nëz zie me nëz Jerusalén, miech guizhiu ne naļ zhits me. Tibaque ptsire lo me bui me lo grë miech co, rëb me lo zho:

²⁶ —Lo grë to ne ziaadnal to zhits naa, gacnan to ganle zha ne racladz ygab xnëz naa, ib none gleynie zho mine rnabey naa. Sac zha ne mazdraa rleynie pxoz, mazdraa rleynie xnïaa, mazdragaa rleynie zho tsiel zho, xpëed zho, bets zho, bziangaa zho, xquielmban zhow, rquia zdoos zhow, peet xtsiind grë zha co par sëëb zho xnëz naa. ²⁷ Sac ni tib zha ne sca yquia zdoos cueeladz zho zho guiaadnal zho zhits naa, grielod ygab zho lo naa. ²⁸ Antes ne yquiabladz to sëëb to xnëz naa, none wen wen sob to dien pe zlēb to ted to mine rieguial to. Zig nacse tib zha ne gzaa tib yu glaa ne gac chop tson xcuaa, led rzobgazh zho rbee zho cuent dien pe zgaa xtimi zho tsaalow. ²⁹ Sac gon nenda loxaque cueeze zhow, ni lozh ga grielod gzaalo zhow. Miech ne gana laa zho gzhidznie zho, ³⁰ guiab zho: “Golwi lo zha qui ganle, loxaque bleeze zho lidz zho, na blëbd zho nzaalo zhow.” ³¹ Scaque rey ne no tilnie stib rey, led none sobgazh zho gan zho dien pe zlēëb tsii mil xmenguiib zho tsietilnie gal mil xmenguiib stib rey co. ³² Telne rgobey me lëbd me, laga bii zit ziaad stib rey co, rxeeļ me bla zha ne tsie tsienee dien zha gataa cuëz lo xtil zho.

³³ Scaque to nagon none glo gwi to pe nac grë ncuaane no csaan to, parne grielo ygab to xnëz naa. ³⁴ Sac gon zed ne nzhid, ĩpa dien yquiina? ³⁵ Per ni par gaca beeb peet xtsiinda; mine ractaaw, laaw rziaab. Zha ne no liaadz guien zho pe rnee naa, yquiaadiag zhow.

15

Zha rzac Dios zha ne zozit lo me

(Mt. 18:10-14)

¹ Zeene rseed Jesús miech, nzian grë zha ne rtop dimi ne razh lo zha Roma, ni grë zha ne rzoob miech nac zha yozh, ye zho rbig zho rquiaadiag zho zhiwseed me. ² Nacne grë zha farisë ni grë maistr ley, rneenë zho me, rnee zho lëda ga run me sca rtsieelsa me grë zha co, rownie me zho. ³ Dzigo bnee me lo zho, rëb me:

⁴ —Togase nadien, gzoob ne quianie to tib gayoo mëcwxiił, ni lega naclew rziaab tib ma, ĩzha dien run to? Led rsan to ma ne ndxie lo to ga lëë, laa to rie rieguib to ma ne bziaab ga, haxta rdziel to ma. ⁵ Zeene rdziel ma lo to, lo guielbley co haxta rxobyan to ma rdziñnie to ma ro yu. ⁶ Lëëlëd rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiił to brieequia. ⁷ Gni naa lo to ganle, scadaa nagon rzac Dios, tib guielbley nrooba lo me, zeene ran me laa tib zha ngoopdol rsaan xquielntseeb, laa zho rbig lo me. Ne nligaa tib guielbley rac zha co lo me, lëdle zha ne rzac miech wenle nac zho lo me.

⁸ Zig rzacгаа tib men wnaa, gzoob ne nzhen me tsii gayoo pes, ni lega naclew rsëëb me tib gayoow, ĩzha dien run me? Led hor cogazh lëë rquiaa me biini, rsilo me dzega dzega rloob me leņ lidz me haxta rdziel me dimi co. ⁹ Zeene rdziel mew, rley me rzodiidz mew lo grë zha ne ndzieeldiidz me, lo grë zha ne no gax lidz me. ¹⁰ Zig rne naa ga, scadaa nagon rzac grë xanjł Dios, tib guielbley nrooba lo zho zeene ran zho laa tib zha ngoopdol rsaan xquielntseeb, laa zho rbig lo Dios.

¹¹ Dzigo psilo Jesús bzodiidz me tib cuent lo zho, rëb me:

—Tib meṅ name quianie me chop meëdbgui. ¹² Tib dze, rëb zha ne nac zha niab lo me: “Papá, tel pe nac ncuaaṅe no gneedz luu lo no, bzhiguiel niinaga beengrola, zeena gneedz luu miṅe raguial naa.” Dzigo beengrol me ncuaaṅe rap me, bdeed mew lo zho.

¹³ Zhisaque goca, pto zha niab co grëse ncuaaṅe bial zho, briece zho laa zho zie. Bdziṅ zho stib dan, ga been zho grë guielyozh ne gocladztaa zho, grëse xtimi zho pxin zho ga. ¹⁴ Tibaque zeene laa xtimi zho blozh, mbanse rac zho guiendraa pe gow zho, ni lëëtaque len dze co laa tib gbin psiloque nëz co. ¹⁵ Dzigo racse zho güeyguib zho dziin lad guiedz co, ga briecequia tib meṅ co bree zho, pxeel me zho yquiaanap zho nguts. ¹⁶ Lo gbin ne noded zho ga, rzac zho tbeaa cho gheed maase grë duuzhye dan ne row grë nguts co gow zho, per ni miṅ co choot rdeete lo zho.

¹⁷ Sca no zho ga, tibaque zeene bial zho biini psoladz zho nzian zha ne quia dziin lo pxoz zho, grë ncuaaṅe raclo row grë zha co, haxta riaana, ni laa zho sca noded ga; rëbchaa zho: ¹⁸ “Mazd miṅe naca laa naa guia gdziin naa lo pxoz naa stib, guiep naa lo me gun me naa perdon grëtaa falt ne beṅ naa lo me, falt ne bengaa naa lo Dios. ¹⁹ Maase sacdraa me naa zig xpëed me, siguiel me ycaania me naa gac naa zig tib zha ne quise dziin lo me.” ²⁰ Horco bio zho nëz laa zho zey nëz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

²¹ “Papá”, rëb zho lo me, “rien naa nroob falt ne beṅ naa lo Dios, bengaa naa lo luu. Rieguialdraa sac luu naa zig tib xpëed luu.”

²² Ni blëzd me nlozh nee zho, lëëled bredz me zha ne quia xtsiin me, rëb me: “iNa goltënie tib nëz lar wen nu gacw xpëed naa! iGoltënie tib nil wen tso nia me, tib nëz guielguid cub yquia ni me!” ²³ Bnabey me zho güeyxi zho tib ngon ne mazdraa ndaan, beet zho, rëb me: “ib none gac tib lni, none dioow ne, none dio ne! ²⁴ iSac gon gun naa cuent, brieceban xpëed rii naa! iBnitte me ga, na laa me bdziel!” iLaa lni psilo!

²⁵ Lni co noyac, zeene laa stib xpëed me zha ne nac zha gol ga, wbiere lo dziin dan. Bdziṅ zho gax ro yu, rlu rquia di, haxta wiee rlu noyac; ²⁶ dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac. ²⁷ Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.” ²⁸ Blëë zha gol co bin zhow, lo guielblëë co bzëëbd zho ro yu. Nacne briece pxoz zho, bnee me lo zho sëëb zho ro yu. ²⁹ Dzigo rëbchaa zho lo me: “iLëdraaw i gon papá noyūn luu! Bui ganle blactaa iz ne quia yūn naa dziin lo luu, waltaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndzieeldiiz naa. ³⁰ Cho dzigo nac zha qui, blozhse güeyloozh zho xtimi luu lo grëtaa guielyozh ne been zho, na no luu beet luu ngon ne mazdraa ndaan, noyūn luu zhilni zho.” ³¹ Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuaaṅe quianie naa, luu guiaanniew. ³² Per niina ne laa bets luu blanso, ib nonguiela znu dziuūn ne tib lni gleynie ne me; sac gon bnit me, ni na laa me bdziel. iDziuūn ne cuent brieceban me nu!”

16

Ligier miech par lo guielntseeb

¹ Tib vult bzodiidz Jesús tib cuent lo xpëedsuel me, rëb me:

—Tib men name nroob rapchen me, quanie me tib zha ne zo lo grëtaa ncuaañe rap me; tib dzew, lega nacle bded diag me zhliiaan noxin zha co xtimi me. ² Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quiaayun luu dziin; sac grielodraa so luu lo grë ncuaañe rap naa.”

³ Whire zho ga, rëb zho: “Zha na ganle gun naa, telne guiab ne ga naa dziin dan, lëbdraa naa gun naa dziin co; tel guiaabгаа ne na ga naa gatop naa gon, rtoladz naa gnab naa gon lo miech.” ⁴ Tibaque zeene biab guic zho rëb zho: “iLaa naa bienle zha gun naa, zeena tso zha ne gun xyudar naa zeene laa naa grie lo xtsiin men rii!”

⁵ Dzigo psilo zho bredz zho zha ne quia guielqui lo men ne quia zho xtsiin ga. Bdzin tib zha co bnabdiidz zho lo zho dien palal nzëeb zho lo me. ⁶ Rëb zha co: “Tib gayoo tamb nceit nac mine nzëeb naa lo me.” Dzigo rëbchaa zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuaa stiba, pquiaa lo co, groj tamba zëeb luu.” ⁷ Bdzinaque stib zha co, bnabdiidz zho lo zho dien palal nac xquielqui zho lo men co. Zha co rëb zëeb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan luu; per na zac ctsieez luu min rii, bzhixcuaa stiba, pquiaa lo co tapgalaque saca zëeb luu.”

⁸ Zeene bien men co zha noyun zho, bzee zdo me gon me scataa ndzielguic zho. Ncuaañe ntoladza, per grëse miech ne zienal ncuaañ lo guidzliu rii, ndzielguic zho par gun zho grë guielntseeb. Par min co ndziibraa ndzielguic zho lo zha ne no xnëz Dios. ⁹ Sangue to gzoobladzde to gun to min co, ncuaañe rap to lo guidzliu rii, golquiina per par gun to xyudar samech to. Zeene laa ncuaañ co grë, nenda zacnie zho to, per mine mazdraa non Diosi ible zacnie me to, zneezd me tib lugar ndzon cuëz to, led yedraa ga pe nitlo.

¹⁰ Zha ne ndzinli ruzdzin tel palal yeense ncuaañe riaannie zho, scaque ndzinli gundziin zhow zeene guiaannie zho nrooba. Laa zha ne ndzinlid, mine gun zho zeene guiaannie zho ncuaañ zhis, mincoque gun zho zeene guiaannie zho ncuaañe nroob. ¹¹ Nana zha ne sca gacd ne ndzinlise gundziin zho ncuaañe no lo guidzliu rii, zha dzigo grielo gundziin zho ncuaañ ndzon ne gdeed Dios lo zho zaatne no me? ¹² Stiba, tel sca ndzinlide to lo chen ben, zpe naczhe ncuaañe gun to tib ncuaañe chenpaa to? ¹³ Golgona ganle, grielod gon gleynie to dimi ni gleynieque Dios. Ib none telne Dios rleynie to, me none gleynie to, togo dimigaaw, dimi golleynie.

¹⁴ Grë zha ne nac farisé zeene gon zho sca rnee me, lel rzhidznie zho me, sac tel zhaw rleyniedox zho dimi. ¹⁵ Dzigo rëbchaa me lo zho:

—Masaque rzac to nalë nli miech wen nac to nëz lo Dios, sangue me gon, wen wen nan me zha nac zdo to. Nli miech ne ran to, zha wen rzoob zho to; sangue Dios ni lalnu rzacd zdo me mine run to.

¹⁶ Len dze ne gard guiaad Juan Bautist, niapse xley Moisés ni grë mine bnee zha ne biadteed xtiidz Dios, min co nac mine güeynal to. Per zeene psilo Juan pseed me miech, desde hor co laa miech quiaayacnan stib mod ne grielo yгаа zho zaatne rnabey Dios; gane na nzian zha ne noxco yгаа lugar co. ¹⁷ Per guiabde to togo nondraa ley, sac grëse mine zhobnee lo ley, jib laaw none gac! jzig nac guidzliu, zig nac gbaa zrieelo nitlow, sangue ley nitloda, tibaque naca! ¹⁸ Gaxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelniaгаа tib wnaa ne psëbtsieel, dol ga quiaayun zho; zigtaa dola padzeela, scaque niina dola.

¹⁹ Tib ricw name —rëb Jesús—, niapse grë lar niazh racw me, gzobse dze run me lni lidz me. ²⁰ Zaatne noque me ga, guiedz co no tib zha prob lë Lazh, lala prob me ni rlanaque me guiedz, gdipse lad me noyacnë guiedz co. Riese me riesob me ro lidz zha ricw co, ²¹ rquiambëz me dien pe grielod gow me maase ncuaañe rrieengaale lo xmezñ meñ co; ga zob me haxta rdziñ grë mëcw rzëëludz ma lo guiedz ne rlan me ga.

²² Bdziñ dzew laa Lazh gut, dzigo biet xanjł Dios beynie zho me lo Abraham, zaatne rdziñ grë zha wen. Goc palal dzew, laa meñ ricw co gutaque, blozhse pquianap zho me, laa zho güeyqueets me; ²³ zeene biaa me biini laa me nole gabil. Lëbdraa me no me lo guielnë co, lega naclew blis lo me, zit squi gon me Abraham, laa Lazh zobnie Abraham ga. ²⁴ Horco bñab me lo Abraham siguiel Abraham cxeel me Lazh, maase guic mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga. ²⁵ Dzigo rëbchaa Abraham lo me: “Xin, psoladz ganle zeene wban luu lo guidzliu, ncuaañe gocladztaa luu pquianie luuw; laa Lazh mbanse bded me. Nagaa na, me nac meñ ne nogaa noyan guielbley, laa luu bgaa squi no luu lo guielnë qui. ²⁶ Stiba, zha ne no nëz rii gacd guiaad zho i, niicle zha ne nogaa iw, gacd guiaad zho nëz rii; sac no tib yeedox ne rtse.” ²⁷ “Bzhiguiel sca”, rëb meñ ricw co, “pxeel Lazh tsie me lidz pxoz naa, ²⁸ tsienie me diidz lo zgaay bets naa zha ne biaan, guiab me lo zho ib guñd zho miñe beñ naa, zeena guiaate zho nu yгаа zho lo guielnëdox rii.” ²⁹ Pquiabchaa Abraham, rëb Abraham: “Tel miñcow, tsow glab zho lo grë ley ne psan Moisés, lo grë miñe bnee grë zha ne güeyteed xtiidz Dios, beñque lo co zhobnee zha no gban zho.” ³⁰ “Nliw”, rëb me, “per tel squi tib meñ ne gutle tsie tsienee lo zho, rien naa znuse csaan zho xquielntseeb zho gbig zho lo Dios.” ³¹ Dzigo rëbchaa Abraham: “Telne rond zho miñe rnabey grë ley ne psan Moisés, grë miñe bnee zha ne güeyteed xtiidz Dios, scaque gond zho diidz niicle tsie tib zha ne brieabanle tsienee lo zho.”

17

Zha ne gunctal xtoł stib zho (Mt. 18:6-7, 21-22; Mr. 9:42)

¹ Tib vuelt rëb Jesús lo xpëëdsuel me:

—Nac lo guidzliu rii, ib gunfalte ncuaañe rgogui miech gunctal zho xtoł zho, jper probsaxe zha ne rquiił samiech runctal zho xtoł zho! ² Mazd zhi guielnëw lo zho ygadoo tib quie molin zhobxtil yan zho tsieron zho zho nisdoo, lëdle guielnëdox ne gan zho; sac gon doł nroob ga gun zho yquiił zho zha ndooladz ne no xnëz naa. ³ jGolguien sca ndzinli golgac! Tib bets tow, zeene pe tib falt gun zho lo to, golnee lo zho guñdraa zhow; telne gnab zho perdon, golgun zho perdon. ⁴ Niicle telne nzian vuelt sca gun zho falt lo luu tib dze, beñ zho perdon zeene laa zho rbig rnab zho perdon lo luu.

⁵ Stib dzew, rëb zha ne rzënie me lo me:

—Bneedz guielbiini lo no dib zdooraa no gnalo no Dios.

⁶ Pquiab me rëb me:

—Tel niaca miñe gzoob ne rnalole to Dios siquier lal tib midz moxtaz, niicle ncuaañe mazdraa nğan gnab to lo me, zun mew.

⁷ ‘Pe ran to ganle, zha nac zha ne run xtsiin beñ? Zeene rbire zho dan, yase güey zho gon, güeyгаа zho güeyquianap zho ma, pe liaadz meñ ne quia zho xtsiin ga, guiab me lo zho: “Na bded, bzob, zeena gowxtsee luu.” ⁸ Miñe run me, gloque rnabey me zho gunlo zho ncuaañe gowxtsee me, gdziib zhow lo me; rlozhraa row me, dzigoraa rowxtsee zho. ⁹ Niicle scataa ron zho

mine rnabey me, ni rlozh ga, per ni xquizh rdeete me lo zho. ¹⁰ Scaque to nagon, zeene lozh gun to grē dziin ne pso Dios to gun to, peet yquiambēzde to, golguien tib ngundziinse nac to, mine rieguial to ga, min co been to.

Biac tsii zha ne rlan guiedz lepr

¹¹ Laa Jesús no nēz zie me nēz Jerusalén. Laa me zieded tib guiedz win ne riaan zaatan ndzieel xtan Samar xtan zha Galilé, ¹² zeene brieequia tsii zha ne rlan guiedz lepr. Zit zo zho, ¹³ nguiedz rbedz zho me, rnab zho lo me yquia zdoo me zho. ¹⁴ Zeene gon me zho, rēbchaa me lo zho:

—jGoltsie, goltsielulo lo pxoz, zeena gan zho ganle laa to biacle!

Dzigo laa zho zie. Nēz no zho laa zho biaanmbe lo guiedz co. ¹⁵⁻¹⁶ Lo gza zho, hor co rias tib zho wbiere, nguiedz rnee zho:

—jZha ndzontaa Dios! jGolwi ganle laa me beenguiaclae naa!

Zigne bdziin zho lo Jesús, pquitsgzhīb zho lo me, haxta bdziin lo zho lo liu, rdeed zho xquizh lo me. Tib zha Samara, zha zit nac zho. ¹⁷ Dzigo rēbchaa Jesús:

—¿Yoraazhe grē zha co waa? Conque tsii zho name beenguiaclae naa.

¹⁸ ¿Tibaque zha zit rii dzigo lēē rzac zdoo mine been Dios lo zho?

¹⁹ Dzigo bliso me zha co ga, rēb me lo zho:

—Porne dib zdoo luu gon bnalo luu Dios, gane biac luu. Bzē, peet tsieniedraa guic luu.

Zeene gbiire guiaad Mgui ne pxeel Dios (Mt. 24:23-28, 36-41)

²⁰ Tib dze bnabdiidz zha farisé lo Jesús, rēb zho:

—¿Poc dzigo csilo gnabey Dios lo ne?

Dzigo pquiab me rēb me lo zho:

—Gacnan to ganle, nacd min co ncuaane ganlopa miech. ²¹ Grieelod guiab zho laaw psilo nec, laaw psilolegaa nēz rii; sac gon tel niina laa me quianabeyle nu.

²² Bded ga, rēbchaa me lo xpēēdsuel me:

—Zdziin dze, gacladz to tebaa zha znu so naa lo to maase tibaque dze, per gacdraaw. ²³ Len dze co, zio zha ne gnē lo to: “Goltē ganle laa Mgui ne pxeel Dios bdziin nu”; gnēgaa zho pa stib lugar none tsie to par gan to naa; tsienalde to, gliladzde to xtiidz zho. ²⁴ Sac zeene gbiire guial naa, grēse miech gana. Zig nac tel guiab tib belye nroob ne glu zhan gbaa desde nēz ne rlan ngbidz haxta nēz ne rzēēb ngbidz, ¿niacxe gand grēse miecha? ²⁵ Per ansraa ne gac min co, ible nroob guielnē ne cteed miech rii naa, ni lalnu gandzed zho naa. ²⁶⁻²⁷ Len dze ne guial naa ga, grē miech ne ndxie lo guidzliu gal hor co, zhaa grē ncuaane tsonie guic zho. Rsoladz to ganle zha rac miech len dze ne bиаad Noé, lej lo grē zhilni zho no zho, zha ne notsieelnia, zha ne nobediin xpēēd, tibaque zeene bиаa zho biini laa guiedox co psilole. Laa Noé nole len barcw, laa zho bиаan grēse zho bnitlo lo nis co. Scadaa nagon no miech len dze ne guial naa. ²⁸ Zig racgaa miech Sodom len dze ne brie Lot ga. Scaque, loxaque ncuaan lo guidzliu rii noxco zho, zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz.

²⁹ Lega naclew, zeene laa Lot brie, hor co laa tib guidox biet gbaa, notsa zufr bliaala lad guiedz co, grēse miech co bnitlo lo guidox co. ³⁰ Scapaa nagon rac miech ne ndxie lo guidzliu len dze ne laa naa guial.

³¹ Zha ne lēētaque hor co no glaa guic yu, ib guiabd zho sēēb zho len yu tsiebee zho ncuaane no len lidz zho, zha ne quia gaa lo dziin dana, ib guiabd zho gbi zho guey zho ro yu. ³² jGolsoladz ganle zha bzhaac wnaa ne goc

tsieel Lot! ³³ Grëse miech, zha ne sca rquianë zdoos grë ncuuaane rap zho, ible znitlo zho xquielmban zho; sangue zha ne rquiad zdoos grë ncuuaan co, haxta xquielmban zho rbeeladz zhow, nitlod zho. ³⁴ Gal hor co, zaatne tipse nixguies chop zho, tib zho sēnal zhits naa, laa stib zho guiaan. ³⁵⁻³⁶ Zaatne tipse quiaayof chop wnaa, zaatne tipsegaa quia chop mgui lo dziin dana, tib zho sēnal zhits naa, laa stib zho guiaan.

³⁷ Dzigo rēbchaa xpēēdsuel me lo me:

—¿Pa lo dzigo gdziñ grë zha co?

Pquiab me rēb me:

—Horco bii zlu ganle paw. Zig nac grë pech, zaatne nix magut ga rdziñ ma.

18

Zha ne rnab lo Dios

¹⁻² Stib dzew, bzodiidz Jesús tib cuent lo xpēēdsuel me, par guien zho ib guiaan zdoos zho zeene racniobd miñe quianab zho lo Dios, rēb me:

—Tib guiedz name, no tib meñ co nac me wxtis, ni palal rquiad zdoos me samiech me, per ni Dios rdziebd me. ³ Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlēē lo zhuz. ⁴⁻⁵ Glo ib rquiaadiagd me miñe rnab zhuz co, per zeene goc palal dze gon me tibaque quia meñ co quianab me gac guielwxtis, dzigotaa rēb me: “Ncuuaane lēbdraa guic naa lo meñ rii, tibaque squi quia me. Ni rdziebd naa Dios, niicle nodgaa naa liaadz pe rzac miech, per parne guiadgunneetraa me naa, miñe naca mazd laa naa gun guielwxtis ne rnab me.”

⁶ Blozhsca bzodiidz Jesús cuent co, rēbchaa me lo zho:

—Telne sca bdziñ dze ne pquiaadiagd xtiidz zha ne ngab lo me, tel tibaque gnab zho miñe racladz zho? ⁸ ¡Nligaa, ib tedsod zun me miñe rnab zho! Per segur zhis zho quiambēz gac xquielwxtis me, zeene laa naa guial stib.

⁹ Laa grë zha ne riats, zha ne rzac masaque zha wen nac zho nēz lo Dios, haxta rbix zdoos zho ran zho grēraa miech, bnee Jesús lo zho, rēb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. ¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdol, zig nacse zha ne zo i. Wlaltaa rund naa guielgbaan, rund naa guielntseeb, niicle rquiangoobd naa stib wnaa. ¹² Haxta chop vuelc rcan naa tib len zhmaal, grëse ncuuaane run naa gan, run naaw tsii lal, rnedz naa tib lal miñe rieguial luu.” ¹³ Laa zha ne rtop dimi ne razh Roma ga, gaxaque ga zo zho, per nquiitsrunse zho liu. Mban rac zho, quiaise nia zho zdoos zho, rnee zho lo Dios: “¡Dios, rnab naa lo luu pquia zdoos naa znutaa miech ngoopdol nac naa!”

¹⁴ Gneli naa lo to ganle —rēb Jesús—, mazdraa gon wen biaan recaudador co lo Dios, lēdle zha farisé co. Sac zha ne lēeque zha runnon zho, racnond zho lo Dios, laa zha ne riaanwin, runnon me zho.

Beenlay Jesús mēēdlas

(Mt. 19:13-15; Mr. 10:13-16)

¹⁵ Tib dze, nzian meñ ne bdziñ lo Jesús, bdziñnie zho xpēēdlas zho lo me, parne cxobnia me guic win gunlay me win. Grë zha ne nac xpēēdsuel me, leñ psilo zho ndox zho lo grë zha ne bdziñnie grë mēēdlas co. ¹⁶ Zeene gon me sca quiaayun zho, dzigo bredz me zho, rēb me lo zho:

—¡Ctsirede to grë mēēdlas yeen qui! ¡Golsaan guiaad win lo naa! Sac gon grë mēēdlas yeen qui, ni zha ne nac zig nac win, zha co nac zha ne sēeb ygab lo

Dios. ¹⁷ Nligaa zha ne gacndooladz, zha ne gliladz dib zdo, zigne run grē mēēdas, grieelod gdziṅ zho zaatne rnabey Dios.

Ncuaane run dimi

(Mt. 19:16-30; Mr. 10:17-31)

¹⁸ Tib vuel, wbig tib meṅ ne nac zha non lo meṅguedz Israel, rēb me lo Jesús:

—Nan naa luu nac tib meṅ ne noseed miech, ni tib meṅ wen nac luu, ḷbnē lo naa dien, pe nac miṅe guṅ naa parne grieelo yгаа naa guieḷmban ndzon ne gdziṅd dze lozh?

¹⁹ Pquiab Jesús rēb me:

—Rnee luu lēē tib miech wen nac naa. ṅNligaaw, Diosse gon nac meṅ wen!

²⁰ Teḷne nli racladz luu yгаа luu guieḷmban co, none tsoxco luu gban luu zigne nac Xley Dios. Nanle luu ganle zha naca, rneew:

Tsonied luu zha ne led tsieeld luu,

gute luu samiech luu,

cuand luu samiech luu,

yquiadiidzguizhd luu samiech luu.

Gon pxoz luu, gon xniaa luu, cued luu xquieḷto me.

²¹ Dzigo rēbchaa meṅ co:

—Maestro, grēse miṅe bzeet luu i, ni tiba gard quits naa wlal ne nac naa zha nguieg.

²² Horco rēb Jesús lo me:

—Stibaque miṅe rquiiṅ guṅ luu. Güey, güeyto grēse ncuaane quianie luu, dzigo bdiiz dimi co lo grē zha mban ne guieṅd pe yquiiṅ; sca nroobraa guieḷnzaac ne yгаа luu gbaa. Lozh ga, dē, dēnaḷ zhits naa.

²³ Zeene bin meṅ co sca rēb Jesús, mbanse rac me laa me zey; sac nroob ncuaane quianie me. ²⁴ Dzigo rēbchaa Jesús lo xpēēdsuel me:

—ṅZha ngantaā lēē, rzac zha ne squi rapcheṅ sēeb zho xnēz Dios gnabey me zho! ²⁵ Mazd ngandse rded tib camell guieer guzh.

²⁶ Grē zha ne ndxie ga, zeene bin zho sca rēb me, rneechaa zho:

—Teḷne scataa ngan sēeb miech xnēz Dios, ḷchosedzhe dzigo waa nac zha ne zrieelo sēeb xnēz me?

²⁷ Dzigo rēbchaa Jesús:

—Nligaa par miech, zootle tsod zha ne grieelo sēeb xnēz me; sangue me nan me no zho. Sac teḷ me, tsod ncuaane grieelod guṅ me.

²⁸ Horco pquiab Pedr, rēb Pedr lo me:

—Teḷ no, grē ncuaane rdziaapse no psan now, laa no ziaadnaḷ zhits luu.

²⁹ Pquiab me rēb me:

—Golgacnana ganle, grēse zha ne psan lidz, psan zho tsieel zho, psan zho xpēēd zho, psan zho pxoz zho, psan zho xniaa zho, psan zho bets zho, bziangaa zho, porne bzēeb zho xnēz Dios, ³⁰ na lo guieḷmban riique, mazdraa nroob miṅe gan zho, ni lozh ga ib tedsod zгаа zho guieḷmban ndzon ne gdziṅdraa dze lozh.

Bzeet Jesús stib zha csacsi miech me

(Mt. 20:17-19; Mr. 10:32-34)

³¹ Ne sca no Jesús nēz zie me nēz Jerusalén, tibaque bredz me gza tsiipchop zha ne rzēniepaa me ga, bzeet me lo zho zha guṅ miech me, rēb me:

—Grēse miṅe bzeetle zha ne biadteed xtiidz Dios padzeela teed naa, niina ne laa ne gdziṅ Jerusalén, laaw gac cumplir. ³² Ga gnaaz zho naa, tsielo zho naa ladznia grē zha ne nacdraa zha Israel, xidznie zho naa, squiaago zho

naa, stsuc zho lo naa, ³³ zguin zho naa, ni haxta zut zho naa. Per zeene gac tson ngbidza, zriebaanaa.

³⁴ Per ib biend zho dien zha nacne sca rnee me.

Biac tib zha ne rold lo

(Mt. 20:29-34; Mr. 10:46-52)

³⁵ Laa Jesús bzéëb ro guiedz Jericó, miech guizhiu ne nał zhits me. Ro nêz co zob tib men ne rold lo, rnab me gon. ³⁶ Zeene bien me rlu nzian miech noded ga, dzigo bnabdiidz me dien pe nacne scataa ziaad grê miech co ga. ³⁷ Dzigo rêb zho lo me, Jesús, men Nazaret ziaad ga, zhits me ziaadnał grê miech co.

³⁸ Horco psilo me nguiedz rbedz me, rnee me:

—jJesús, men xtii rey David, pqquia zdoo naa!

³⁹ Grê zha ne ner, psilo zho ndox zho lo me parne guioog ro me, per lel hor cole nguiedzraa rbedz me Jesús, rnab me yquia zdoo Jesús me. ⁴⁰ Nacne zeene bdziñ Jesús gax zaatne zob me, blêz Jesús, bnabey Jesús güeyxi zho me. Bdziñ me lo Jesús, rêbchaa Jesús lo me:

⁴¹ —¿Pe nadien gun luu naa?

Pquiab me rêb me:

—jRacladz naa guiac lo naa!

⁴² Dzigo rêbchaa Jesús:

—jNiinagazh gon laa luu gan stib! Laa luu biac, sacne dib zdoo luu bnalo luu naa.

⁴³ Horcogazh laa men co psilo bui, ine rley me roolnie me Dios, laa me zienal zhits Jesús. Haxta grê miech ne zienal ga, zeene gon zhow, ye zho roolnie zho Dios.

19

Güey Jesús lidz tib men lê Zaquew

¹⁻² Guiedz Jericó, ga no tib men ne rnabey lo grê zha ne rtop dimi ne razh lo rey Roma, lê me Zaquew. Zeene laa Jesús zieded lad guiedz co, ³ brie me, ziewi me, sac racladz me gunbey me Jesús. Bdziñ me, pasêse me gan me Jesús, sac lala miech guizhiu ne nał zhits Jesús, ni lala ndopse me. ⁴ Mine been me, rias me bdedner me güeytsep me tib lo yag guigw zob ro nêz co, par gdeeda diidza gan me Jesús, zeene laa Jesús ted ga. ⁵ Zeene laa Jesús bded ga, blis lo Jesús gon Jesús laa me zob ga, dzigo bredz Jesús me, rêb Jesús lo me:

—Zaquew, na zeena biet i. Sac racladz naa, lidz luu cuêz naa nadze.

⁶ Rley Zaquew gon Zaquew sca rêb Jesús, lêlêd biet me lo yag co, laa me zienie Jesús nêz lidz me.

⁷ Zeene gon grê miech cow, rlêë zho, rnee zho:

—jPe lêëtaa lidz zha ngoopdol qui ziebêz me!

⁸ Laa Zaquew, ine rley zobnie Jesús. Tibaque bzoli Zaquew, rêb Zaquew:

—Gacnañ luu gon, lo grê ncuanea rap naa, laa naa gded groła ygaaz lo grê zha ne guieñd pe yquinn, ni tel nogaa zha ne ndziibraa mine beenquizh naa zho, naa maasê ctsiree naa tap lal mine blan naa zho ga.

⁹ Horco pquiab Jesús, rêb me lo zha ne ndxie ga:

—I nagon rlu laa men qui wbigle lo Dios, parne ycaania Dios me. Nli zha xtii Abraham nac me, per bronziaab me ¹⁰ ni naa ne nac naa Mgui ne pxeel i, ible laa naa zial zialsilaa naa grê zha ne zonziaab.

Zha ne biaanñie dimi

¹¹ Grê miech ne zienal zhits Jesús ga, rzac zho zigne laa me gdziñ Jerusalén, laa me sob gac me zhirey zho; nacne bzodiidz me tib cuent rií, rêb me lo zho:

12 —Tib xpëed zha non name, no me tib guiedz win, nacle diidza laa me no tsie zaatne zob meṇ nroob ne rnabey, parne gzo zho me gac me rey guiedz ne no me ga. 13 Zeene laa dze co bdziṇ, dzigo bredz me tsii zha ne quia xtsiṇ me, nroob dimi ne psan me lo zho tib tib zho, parne gundziṇ zhow, mientras gbire me.

14 'Nzianlaa zha ladz me, rlëe zho ran zho me, dzigo pxeel zho bla zha ne güey lo meṇ ne rnabey ne zie me ga, güey nab zho gdeete meṇ co dziṇ co lo me. 15 Per niicle sca güey grë zha co, peet brieelod niun zho. Blozhse bzo rey co me, laa me bdziṇ ladz me. Zeene bdziṇ me, bredz me gza zha ne biaanne xtimi me ga, par diē palal ziyaca. 16 Bdziṇ tib zho, rëb zho: “Laa xtimi luu nu gon, tsii lal mine psan luu ga naca niina.” 17 Rley me rëb me lo zho: “iZha squi nagon racladz naa! iWen brieequia xtsiṇ luu! Niicle zhis ncuane psan naa lo luu, per bien luu niowse beṇdziṇ luuw. Na nagon, laa naa gzo luu, gnabey luu tsii guiedz.” 18 Bdziṇ stib zho, rëb zho: “Laa xtimi luu nu gon, gaay lal mine psan luu lo naa ga naca niina.” 19 Scaque rley me. Bzo me zho gnabey zho gaay guiedz. 20-21 Zeene bdziṇtaa tib zho, rëb zho: “Nli beṇdziṇ naa xtimi luu, sac nanle naa zha nac luu, niicle paraa niundziṇ naaw, grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu.” 22 Blëe guic me, rëb me lo zho: “iBiche nu, paat rquiind naa miech yozh ne squi nac! Conque nanle luu zha nac naa, 23 çpex nac dzigo waa bioxcod luu maase mbediṇ luu dimi qui, ndziniaaw palal ncaania naaw niina?” 24 Dzigo rëbchaa me lo grë zha ne ndxie ga: “Niinagazh golcob dimi qui nia zha qui, goldeeda lo zha ne ziaadnie tsii lala i.” 25 Pquiab zho rëb zho: “Per pe nacne zha coque ycaaniaw, ni nrooblew beenlo zho.” 26 “Ib sca no gaca”, rëb me, “sac zha ne rien zha gundziṇ zho ncuane rcaania zho, nroobraa ncuane ycaania zho. Laa zha ne squi nac, haxta mine pcaaniale zho, zdioba lo zho. 27 Sangue zha ne sca ptsidiṇ niac naa rey, goltsixi zho, niinaga racladz naa ganlo naa gut to zho.”

Bdziṇ Jesús Jerusalén

(Mt. 21:1-17; Mr. 11:1-11, 15-19; Jn. 2:13-22; 12:12-19)

28 Blozhse bzodiidz Jesús cuent co lo zho, laa zho bio nëz stib, nerse me lo zho. 29 Zeene bdziṇ zho gax Gui Oliv, zaatne ndxie guiedz Befagé ni guiedz Betain, pxeel me chop xpëedscuel me, 30 rëb me lo zho:

—Goltsie guiedz win ne ndxie danse lo ne i. Ga gdziṇ to zaatne quiadoo tib burr yeen ne choot gard sob lad, dzigo golxadz ma, goltënie ma nu. 31 Teṇ cho gnabdiidz lo to pe nacne noxadz to ma, golguiab lo zho: meṇ ne rnabey ne, meṇ co rquiin ma.

32 Laa zho zie. Bdziṇ zho, zaatne quiadoo burr co, 33 nligaa, lëetaque noxadz zho ma, zeene laa bizhuan ma bdziṇ.

—çPe guṇ to xpurr naa? —rëb me lo zho—. çPe nacne noxadz to ma?

34 Dzigo rëbchaa zho:

—Meṇ ne rnabey ne, meṇ co rquiin ma.

35 Bdziṇnie zho ma lo Jesús, pxob zho lar ne rbix zho lad ma, bzob me ma.

36 Zigse zie me, no grë miech guizhiu co rta zho xab zho ro nëz rded burr ne zob me ga. 37 Grëse miech co, rleynie zho me. Laa zho xiuxto dze cho gui Oliv, zeene psilo zho nguedz zëeb tsí zho, rley zho roolnie zho Dios, por grëtaa milagr ne ziyān zho run Jesús; 38 rnee zho:

—iNasi laa Dios pxeel zhirey ne! iZha ndzontaa Dios! iHaxta gbaa noyac guieṇbley dze rii!

³⁹ Blalaa zha farisé ne zienal ga, zeene gon zho zha roolnie grè miech co me, wbig zho lo me, rnab zho gnee me lo zho guioog ro zho. ⁴⁰ Dzigo rëbchaa me:

—iZac guioog ro zho, per hor co dzigo laa grè quie rii csilo goolniew naa!

⁴¹ Zeene bdziñ me zaatne nieenpaa Jerusalén, psilo biab guielnè me, biin me gon me guiedz co, ⁴² rëb me:

—iProb to men Jerusalén! iTebaa ye to nien niunbey to men ne needz guielbley rii lo to! Per na ib biende tow, masaque rzac to zig zha ne nioog lo.

⁴³ Na nagon laa dze co bdedle. Grè zha ne rlèe lo to, ible ziaad zho ziadsoiog corral zho to, ni tib nëz tedlaade to lo zho, ⁴⁴ haxta guiab to ladznia zho, grè xpëed to. Znitlo zho ladz to, nëzrii nëzrec glaal zho grè quie ne niaa grè lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

⁴⁵ Bdziñ me Jerusalén, güey me yadoo, psilo me bleee me grëse zha ne noyun lgui ga, rëb me lo zho:

⁴⁶ —Znu zhubnee lo Xtiidz Dios: “Zaatne nac lidz naa, ga none guiaad miech gzodiidznie zho naa.” Laa to gon, quiayun to lugar rii zig tib zhibliee ngbaan.

⁴⁷ Bded ga, gzobse dze rie me rieseed me miech len yadoo ga. Nacne psilo grè pxoz ne rnabey, grè maistr ley, ni grè zha ne nac zha non lo menguedz, quiaguib zho dien zha gdeeda diidz gut zho me. ⁴⁸ Per rdziidz zho dien zha gun zho, sac tbaaque ndxie miech lo me, grëse zho rquiaadiag zho zhiwseed me.

20

Bnabdiidz zho cho nac Jesús

(Mt. 21:23-27; Mr. 11:27-33)

¹ Len dze ne sca noseed me miech len yadoo, nonee me lo zho zha nac Xtiidz Dios, tib vuelt bdziñ bla zha ne nac pxoz ne rnabey, grè zho bla maistr ley ni zla men ne nac men non lo menguedz, ² rnabdiidz zho lo me dien cho nac me, cho rnabey me, zha nacne sca quiayun me. ³ Dzigo rëbchaa me lo zho:

—Ye naa laa naa gun tib wnabdiidz lo to. ⁴ Golnè dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

⁵ Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnè: “¿Pex nac dzigo waa biladzde to mine bnee Juan?” ⁶ Tel na dzieetsгаа ne, miechse pxeel Juan, grieequiadaque ne; zgoquie menguedz ne, sac grëse zho rliladz Dios pxeel Juan.

⁷ Dzigo mazd lëe gdib mine been zho, rëb zho nand zho dien cho pxeel Juan.

⁸ Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiayun naa grè min rii.

Xcuent zha ne pquianap liu

(Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me grè miech co. Bzodiidz me tib cuent rii lo zho, rëb me:

—Tib men name, nroob lbè uv beenbni me lo liun me. Blozh ga blediin me liu co lo bla zha ne ran liu, dzigo laa me brieeg ga, zey me stib dan.

¹⁰ Zeene gol mëe ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me.

Per le₁ bnaaz zho zha ne pxeel me ga, bdi_n zho zho, blozh ga scase bzonëz zho zho. ¹¹ Wbiire pxeel me stib zho, scaque peet bdeete zho lo zho, le₁ ndox zho lo zho, bdi_n zho zho. ¹² Pxeelaque me stib zho, goc zho tso_n, scasaque been zho, haxta psiwee zho zho. ¹³ Quianie me tib mëed, rleynie me mëed co. Zeene go_n me sca been zha co, rëbchaa me: “Mi_ne naca laa naa cxel xpëed naa, zeene ga_n zho xpëed naaw, peet gu_nd zho me, nend zon zho xtiidz me.”

¹⁴ ‘Pex guie_n zho cho nac xpëed me, zeene go_n zho men co, rëb zho: “iLëë zha qui nago_n guiaannie liu rii! iGolgotsaa dziuut ne zho, zeena guiaana lo ne!” ¹⁵ Bnaaz zho xpëed me, güeynie zho me zaatne nac tib lad lo liu co, ga güeygut zho me.

‘Zha sca dien rzac to gu_n bizhuan liu co gza zha ntseeb co? ¹⁶ Ib tedsod lëë, zeene gbire me, znitlogazh me zho. Lozhse ga, cuediinga me liu_n me lo zla zha ne gu_ndziina.

Zeene bin zho sca rëb me, rneechaa zho:

—i₁b lic Dios qui, dziuunscad no!

¹⁷ Dze bui me lo zho, dzigo rëbchaa me:

—Per led znu lëë, zhobnee lo Xtiidz Dios: “Quie ne psëeb zha ne nozaa yu, ni nand zho lëëpaa quie co nac mi_ne rnazdziits yu.”

¹⁸ ‘Ni quie co go_n, zha ne tsietso_be low, zac zho zig tib ncuaa_ne rac tso_n tap lë; laa tel lëëgaaw tso_be lad zho, zac zho zig tib ncuaa_ne die die rac.

¹⁹ Grë zha ne nac pxoz ne rnabey, ni grë maistr ley, hor co bien zho mi_ne nac zho ga, bzeet me lo cuent co. iGocladz zho gagazh naaz zho me! Per bdzieb zho, niacntseeb grë miech ne ndxie ga. ²⁰ Dzigo mi_ne been zho, pxeel zho bla zha ne zie ziegungüet me par cxin me tib diidz, dzigo mi_n co yquiaaqui zho tsiezo zho me lo zhiwxtis zha Roma. Rquiaa_lo zha co, no zho liaadz dien zha gozobdiag zho xtiidz Dios, ²¹ bdzi_n zho lo me, bnabdiidz zho rëb zho:

—Maestro, ndion no niapse diidzli zienal luu, ni scagaa zeene rseed luu miech, rguibd luu guiaannziuu luu lo zho, sinque niapse mi_ne nac diidzli, mi_ne rlu zha sëeb zho xnëz Dios, mi_n co rnee luu lo zho. ²² Gane niina, racladz no gnë luu dien pe nonguiela ga rdeed no dimi ne razh lo rey Roma, te nonguiel₁da ye.

²³ Bienga me racladz zho gu_ngüet zho me, dzigo rëbchaa me lo zho:

²⁴ —iGolneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—ZCho nu? ZCho lë nu quia lo pes rii?

Pquiab zho rëb zho:

—Lëë rey Roma i, lëë lë me i quia lo qui.

²⁵ Dzigo rëb me lo zho:

—Mi_ne rieguial sca ycaa rey Roma, goldeeda lo rey Roma; scaquegaa mi_ne rieguial ycaa Dios, lo Dios goldeeda.

²⁶ Bzee zdoo zho go_n zho sca ptsire me lo xtiidz zho. Mazd dzese bre zho, sac bdziel₁d zho zha niungüet zho me; gocladz zho squi ndxie miech nxin me pe tib diidz, per brielod niungüet zho me.

ZPe nli zrieeban miech?

(Mt. 22:23-33; Mr. 12:18-27)

²⁷ Blozh ga, güeyaque zla zha saducé lo Jesús. Nac zha saducé riladzd zho dzdi_n dze grieeban miech; bdzi_n zho, rëb zho lo me:

²⁸ —Maestro, znu psan Moisé_s diidz: telne glo mgui guet lo wnaa ne nac tsieel mgui, ni gopd wnaa mëed, dzigo none betsaque zho ctsieel₁nia wnaa co stib, zeena gap wnaa mëed ne guiaa_n xlugar xpëed zha ne gut ga.

²⁹ 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaand xpëed zho. ³⁰ Dzigo ptsieelnia wnaa co stib bets ngutoo co. Blozh ga, gutaque zha co, pa sè zho nsañ mëed. ³¹ Ptsieelniaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelnia me, ³² tibaque zeene yeque me laa me gut. ³³ Mine racladz no gacndion no, ¿chopaa dzigo gac tsiel wnaa co, zeene laa zho grieegan, ne sca gza gadzse zho ptsieelnia me?

³⁴ Pquiab Jesús rëb me:

—Tiba, gacnañ to ganle, lo guielmban riise rtsieelnia miech. ³⁵ Zeene grieegan zho, zig nac zha ne yгаа гуелнзааc gdziñ zho zaatne no Dios, led yedraa ga ctsieelnia zho. ³⁶ Sac laa zho mbanle ga, gdzindraa dze guet zho. Masaque laa zho gac zig nac grë xanjl me, mëed gac zho lo me. ³⁷ Laa stiba, gacnañ to ganle ible zrieegan grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieegan mengut. Rëb Dios lo me: “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Zeene sca rëb me, ga rlu ganle mban zha co. ³⁸ Sac tel me, nacd me xDios mengut, sinque xDios zha mban nac me. ¡Par me, grëse zha ne ngab lo me, zha mban nac zho!

³⁹ Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

⁴⁰ Dzigotaa ni stib zho beendrea pe nabdiidz zho lo me.

¿Cho xpëed nac Crist?

(Mt. 22:41-46; 23:1-36; Mr. 12:35-40; Lc. 11:37-54)

⁴¹ Horco bnabdiidz Jesús lo zho, rëb me:

—¿Zha nac dien ne rnee zho tib xpëedaque rey David gac Men ne nacle diidz cxeel Dios ga? ⁴² Led Davitaque name znu bnee tib lo salm ne pquiaa me:

⁴³ Bnee Dios lo men ne rnabey naa, rëb Dios lo me:

“Cue naa nëz derech, nu bzob,

nieda lozh gnaz naa grëse zha ne rlëe lo luu, csañ naa zho ladznia luu.”

⁴⁴ Gase ganle rlu, led scada; telne nli zha xtii David gac men co, ¿zha nac dzigo ne lëeque David rnee ne me rnabey David?

⁴⁵ Squi ndxie grë miech co noquiaadiag zho, zeene bnee me lo xpëedsuel me, rëb me:

⁴⁶ —Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdziel zho zho ro nëz. Zig nac len yadoow, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëepaaze zha nac zha ne rzob grol mezh zeene laa wagw rac. ⁴⁷ Ni rlozh ga, rio zho rla zho tel pe ncuanea rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, ¡per ib tedsod nroob caxtigw ne yгаа zho!

21

Gon ne bdeed tib wnaa viud

(Mt. 24:1-2; Mr. 12:41-44; 13:1-2)

¹ Laa Jesús no len yadoo ga noseed me miech. Ga no me, gon me zha rdziñ grë zha ricw, nroob dimi rsañ zho len alcanci ne zob ga. ² Tibaque zeene bdziñ tib wnaa viud, tib men proba, ye me laa me psañ chop gaay win len alcanci co. ³ Zeene gon Jesús, rëbchaa me:

—Gneli naa lo to ganle, mazdraa gon non gon ne bdeed wnaa viud qui, lèdle grè gon ne psan grè zha qui. ⁴ Sac tel zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me, mine rnalopaa me gziuu pe yquim me, per laa me bloogona.

⁵ Laa Jesús zieriee ga, zeene psilo bla zha ne nac xpèèdscuel me, rlozhd gwi zho zha niaa yadoo co, rzee zdo zho ran zho grè que ne niaaw, grè ncuane ngalguiee lena. Zeene gon mew, rëbchaa me lo zho:

⁶ —Niicle squitaa gon ran to niaaw niina, per zdziñ dze ne nitlow, dib nacsew. Ni stib quie qui guiaandraa zigne squi zhobxcuaaw i.

¡Nsin golso!

(Mt. 24:3-28; Mr. 13:3-23)

⁷ Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

⁸ Dzigo rëbchaa me lo zho:

—Nsin golso, zeena choot yquidiede to. Sac nzian zha ne greequia, guiab zho laa dze co bdziñle, guiab zho zha nac Men ne zèèble diidz ga cxeel Dios. ¡ib gliladzde tow! ⁹ Zeene gon to pa lo ndxiedil tib guiedz, pa lo noyaccгаа grè dillox, ib gdziebde to. Ib none gac grè ncuaan co, per lega loxaque mine csilosew ga.

¹⁰ Grè guiedz nroob, laaw tilnie saguiedz nrooba; grè zha ne rnabey grè guiedz nroob, laa zho tilnie sazha rnabey zho. ¹¹ Nèzrii nèzrec csilo gni grè zhdodx, nzian zaatne gan miech gbin, zaatne glaangaa zho grè guielguidzdox. Nzian grè ncuane glu zhan gbaa, nzian grè ncuaan co, ncuane ctseb miecha. ¹² Per ansraa gac grè ncuaan co, stsidil miech to, squianal zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnèz naa. ¹³ Ga nagon gdeeda diidz gnee to lo grè zha co, gacnan zho ganle cho nac naa. ¹⁴ Ib gunde to tso to zhgab dien pe guiab to lo zho, zeene laa to ctsire lo mine rquiaqui zho to; ¹⁵ sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdziel zho pe ctsire zho lo to.

¹⁶ Haxta pxoz to, xniaa to, bets to, grè menlidz to, grè zha ne ndzieeldiidz to, stsidil zho to, lèèque zha tsielo to ladznia zha ne csacsi to. Lo grè to, zio zha ne haxta zet ladznia grè zha co. ¹⁷ Grèse miech glèè gan to porne nac to zha ne no xnèz naa. ¹⁸ Nli stiche zho xquielmban to lo guidzliu rii, per; ¡ni tib guits guic to, grielod zho gnitlo zho! ¹⁹ Tiblique sca golgac, sozite to lo naa, zeena ygaa to guielmban ndzon ne gnedz Dios.

²⁰ Zeene gan to igose guiedz Jerusalén ndxienap menguiib, nanle to len dze co laaw nitlo. ²¹ Grè zha ne no guiedz ne ngab Judé, none xoon zho tsie zho nèz yagui, ga tsietsolan zho. Zha ne no Jerusalén nu, none grieniob zho. Grègaa zha ne quia dziin dana, ib guiabd zho gbire zho lad guiedz. ²² Tib guielnèdox ne csiaab Dios gan grè miech rii len dze co, ga gac grè mine raquiet lo Xtiidz me ted zho. ²³ ¡Prob grè men wnaa ne lèètse len dze co zoney xpèèd, men ne quianiegaa meèd ne bii radz! ¡Mbandox ted miech, guielnèdox ne csiaab Dios gan zho guiedz rii! ²⁴ Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grè zha zit co, sèèb gunchen Jerusalén; haxta gdziñ dze ne gnabey Dios griee zho.

*Ziaad Jesús stib**(Mt. 24:29-35, 42-44; Mr. 13:24-37)*

²⁵ Nzian grë ncuaañe glu lo ngbidz, glu lo mää, glu lo mel. Mbanse gac miech, zdiebdox zho zeene gon zho bidox ne tso tsasoli nisdoo. ²⁶ Nzian zha ne haxta scow zho lo dzeb, zeene laa zho gañ grëtaa ncuaañe noyac lo guidzliu len dze co. Grë ncuaañe no zhan gbaa, nözrii nözrec gaca. ²⁷ Horco bii zañ zho ganle zeene laa naa zialzëeb tib lo xcow con grë guielndzon, con grë poder ne rap naa. ²⁸ Zeene gan to laa grë ncuaañ co rsilo noyac, nley golco zdo to; jsac hor co laa Dios ycaania to!

²⁹ Golzoob cuidad ganle zha nac yag guigw, beelzegaa pe stib yag. ³⁰ Led ran to ganle, zeene laa grë zhicwa racnieñ, laa zhiblaga rsilo rdzib, gase runbey to laa mää nëeg ziaadgaxle. ³¹ Scaque nagon zeene gan to laa grë miñe rne naa lo to nu rsilo noyac, dzigo nanle to laa dze ne csilo gnabey Dios ziaadgaxle. ³² Gneli naa lo to ganle, nzian grë miech ne mban niina, bii zañ zho zeene laa grë ncuaañ co gac; sac ible ncuaañe gaca. ³³ Zdzin dze ne nitlo gbaa, nitlo guidzliu, sangue miñe rne naa lo to nu nitloda; ible laaw none gac. ³⁴⁻³⁵ Nsin sca golso, zaacse golgac! ¡Adel gal dze ne laa naa guial, lel lo grë ncuaañe ndzinlid, lel lo guielgonziu, lel lo grë zhgab ne rac lo guidzliu rii no to, zigne gun grëraa miech! Sac gon, lega naclew glanso naa. ³⁶ Nligaa nsin golso. Tibaque golnab lo Dios, gacniñ me to peet gacde to lo grë guielñe co, me peet xtode to zeene laa to gacredz lo naa.

³⁷⁻³⁸ Gzase len dze co pseed me miech. Silgaw, miech guizhiu ne rdzin len yadoo, parne yquiaadiag zho zhiwseed me. Guidze sca rseed me zho, laa pcow liu riebëz me cho Gui Oliv.

22*Bnediizd zho dien zha gnaaz zho Jesús**(Mt. 26:1-5, 14-16; Mr. 14:1-2, 10-11; Jn. 11:45-53)*

¹ Ziaadyoble lni Pascwa, zhiłni nroob meñ Israel, lni ne row zho quietxtil ne rquiad ncobi lad. ² Grë zha ne nac pxoz rnabey ni grë maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menquiedza; sac rdzieb zho gacntseeb menquiedz.

³ Tib dzew, laa mendox bzëeb zdo Judas Iscariot, tib zha ne rzëniepaa me ga, ⁴ rias Judas güey Judas lo grë pxoz rnabey co, lo grë meñ ne zo lo zha ne rquianap yadoo, rëb Judas zha csañ Judas Jesús lадznia zho. ⁵ Zeene bin zhow per nli rley zho, nacne biaan zho diidz quizh zho Judas. ⁶ Dzigo desde hor co psilo Judas noguib Judas dien zha gdeeda diidz guien miech csañ Judas me lадznia zho.

*Dowxtseenie Jesús xpëedsuel me**(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)*

⁷ Mer dze ne rsilo lni Pascwa, len dze ne sca row zho quietxtil ne rquiad ncobi lad, ni rut zho carner yeen ne rowxtsee zho. ⁸ Dze co bnabey Jesús Pedr grop Juan tsiegunlo zho xtsee ne gownie me zho wdze co. ⁹ Dzigo bnabdiidz zho lo me, rëb zho:

—¿Pa lo racladz luu guio no guiodziunlo now?

¹⁰ Rëbchaa me lo zho:

—Goltsie Jerusalén. Zeene sëeb to lad guiedz, ga gan to tib mgui nzobyan tib re nis, goltsienal zhits me. Yu ne gan to sëeb me, ¹¹ golguiab lo bizhuan yu co: “Znu në Maestro, ¿pa len yu me gneedz luu gac zaatne gowxtseenie

me xpëedscuel me wdze rii?" ¹² Ga glu me tib len yu nroob ne riaan glaa, nzhixcuaale lena, dzigo ga golgunlo zhixtsee ne.

¹³ Dzigo laa zho zie. Güey zho zaatne pxeel me zho ga, ga beenlo zho xtsee co.

¹⁴ Wdze co, zeene gol hor xtsee laa Jesús bded lo mezh gza me gza tsiipchop xpëedscuel me. Xtsee co no zho, ¹⁵ zeene rëb me lo zho:

—jBlactaa gon pquiambëz naa gdziñ dze rii, znu gowxtseenie naa to nawdze rii, ansraa csacsi miech naa, gut zho naa! ¹⁶ Lëë lultm vuelt nu gon teed naa lni Pascw rii, haxta gdziñ dze ne laa Dios csilo gnabey, dze ne glupaa ganle zha nac xtsee rii.

¹⁷ Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Golquiin vin rii gza to. ¹⁸ Gnelli naa lo to ganle, lëë lultm vuelt nu guie naa vin rii, haxta gdziñ dze ne laa Dios csilo gnabey.

¹⁹ Ni bzhen me quietxtil, bdeed me xquizh lo Dios, blozh ga beengroļ mew bdiiz mew lo zho, rëb me:

—Golquiina, rriequia gon lëë xcuerp naa i, sac gon znu gun zho xcuerp naa parne csilaa naa to grë to. Zeene gdeedtaaw diidz, golgun min rii parne glu to ganle tibaque rsoladz to naa.

²⁰ Blozhse dowxtseenie me zho, scaque bzhen me stib cop no vin, blozhse bdeed me xquizh, rëb me lo zho:

—Lëë stib trat cub nu gon riaan Dios grë me miech, rriequia xchen naa nu nac vin rii, ren ne gzhiee xcuent to, ren ne tso firm trat co par glu nona.

²¹ Ni gacnañ to ganle, lo mezhaque nu gon zob zha ne tsielo naa ladznia zha ne gut naa. ²² Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialgun naa, jper probsaxe zha ne tsielo naa ladznia zha co!

²³ Horco psilo gza zha ne zobnie me ga, rnabdiidzlsa zho dien cho nac zha ne rzeit me ga; ²⁴ haxta psilo zho nodildiidz zho dien cho gac zha ne gacnon lo zho. ²⁵ Dzigo bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhii zho zho, per zha gunraa miech, lëë gdib rxcw zho, haxta rnee zho nroob quiayun zha co xyudar guiedz. ²⁶ Sangue to gon, zha ne gnabey lo to, none guien zho gac zho zig tib ngundziin lo to; zha ne racladzгаа gacnon, none guien zho guiaanwin zho. ²⁷ Lo guidzliu rii, zha ne rnabey, rzobse zho, zha ne nac ngundziin, zha co rdziib ncuaañe row zho. jSangue lo ne, led scad naca! jGolwi ganle, tib ngundziin nac naa lo to!

²⁸ Tose goc zha ne tibaque gocnie naa lo grëtaa mine bdeed naa len dze rii. ²⁹ Gane niina, laa naa gneedz tib guielnzaac nroob lo to yгаа to gdziñ to zaatne bneedz Pxoз naa gnabey naa; ³⁰ zeena ine znu tipse zioob ne lo xmezha naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

³¹ Horcoque bnee me lo Pedr rëb me:

—Bina ganle Pedr, racladz Satanás gon ycuiib ma to, zigne run zho zhobxtil. ³² Per laa naa bnable lo Dios, gacnien me luu, csaand me sozitpaa luu lo naa. Gacxe waa, zeene guien luu lëda ga been luu, luu gnee lo grëraa zha qui, parne tibaque dib zdoo zho gnalo zho naa.

³³ Pquiab Pedr rëb Pedr:

—Niicxe peraa waa gac, csaand naa luu. Telne co zho luu ladzguiib, ye naa tso ga, jtelne gutгаа zho luu, zaatne guet luu, ga guet naa!

34 —Bina ganle Pedr —rëb Jesús—. ¡Guiel riigazh gon, gardle ycuedz gall, tsonle vuelt rëb luu runbeyd luu naa!

35 Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuane gow to, per ni lab to bide to. ¿Pe beenfalt ncuane nquii to hor co?

Pquiab zho rëb zho:

—Beenfaldedew.

36 Dzigo rëbcha me:

—Horco nagon peet bide to, sangue niina zha ne quanie dimi, zha ne quaniegaa ncuane gow zho, none güey zhow. Niina nagon none laa to yquii spad. Zha ne quianieda, none maase tib xab zho cto zho, si zho tiba. 37 Sac nataa nagon, laa miech cteed naa mine zhobnee lo Xtiidz Dios, zaatne rnee: “Bnabey zho gut me, zigne rut zho grë zha ntseeb.” Grëse mine zhobnee teed naa, ib laaw none gac niina.

38 Pquiab zho rëb zho lo me:

—¡Bui ganle laa chop spad nule!

Dzigo rëbcha me:

—¡Mazd peet gnedraa naa lo to!

Bzodiidnie Jesús Pxoze me Getsemani

(Mt. 26:36-46; Mr. 14:32-42)

39 Blozhse ga, laa me brieze zie me nëz Gui Oliv, zaatne riettaque me; zienalaque gza xpëëdsuel me zhits me. 40 Bdzin zho ga, rëbcha me lo zho:

—Golnab lo Dios gacnieñ me to, zeena yquii mendox to.

41 Bzë me spalal, bdzin me zig zaatne riab tib que ne rchel ne nia ne, dzigo ga pquitsgzhib me, psilo me bnaab me lo Dios, 42 rëb me:

—Papá, laa naa rnab lo luu, telne zala zdoo luu, psilaa naa lo grë guielne rii. Per telne grieloda, mine gnëta luu sca gaca.

43 Horco biet tib anj gbaa bdzin pchoobladz zdoo me. 44 Mban rac me laa me nozodiidnie Pxoze me, per hor cole mazdraa rnab me lo Pxoze me; lo guielne ro co haxta rzonis me, masaque zëbdzuun grë nis co lo me zootle ren.

45 Zeene laa me guso ga, bdzin me zaatne biaan xpëëdsuel me, gon me gzae zho laa zho nixgues. Ye zho mban rac zho, lo guielne co bguudz zho mcaal. 46 Dzigo pcuaan me zho, rëb me lo zho:

—¿Nixgues to ye? Lëda i gon, igolsobna! Golnab lo Dios, gacnieñ me to, zeena yquii mendox to.

Bnaaz zho Jesús

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

47 Laa Jesús quaneeque, zeene laa Judas bdzin bdzinnie Judas tib dzoon miech. Zigne bdzin Judas, wbig Judas lo me, dow Judas bzhid cuas me.

48 —¡Judas! —rëb me—. ¿Con tib bzhid dzigo lëe glu luu naa lo grë zha qui?

49 Zeene bien xpëëdsuel me, me zienaaz grë miech co, rëbcha zho lo me:

—Maestro, ¿zha dziuun ne? ¿Pe zdeed spad no zho?

50 Znuse biet tib zho pchel zho tib nia spad, pchug zho diag tib xmoz men ne nac pxoze nroob. 51 Dzigo bnee Jesús lo zho rëb me:

—Golsaan zho, ndzinli golgac.

Horco wbig me bzhen me diag zha co, beenguiac mew, lëetse min derecha.

52 Lad grë miech co no ndal grë pxoze ne rnabey, grë zha ne zo lo zha ne rquianap yadoo, ni spalal men ne nac zha non lo menguedz; dzigo bnee Jesús lo zho, rëb me:

—¿Pe nacne squitaa ziaad to, nzhen to yag, nzhen to spad ziadnaaz to naa? ¿Niacxe naa cho ngbaan? ⁵³ Blactaa dze name gon to no naa len yadoo, ni bnaazde to naa ga. Per nole guic to nagon nawdze rii gnaaz to naa; grē mine racladz to grē to mendox, niina laaw gac.

⁵⁴ Horco wbig be zho bnaaz zho me, laa zho zienie me nēz lidz men nac pxoz nroob. ⁵⁵ Bdziñ zho lidz men co, bre zho xley me, bzēēg zho gui, laa zho no nodzēē zho. Ye Pedr maase zit zit nał Pedr, laa Pedr bdziñ ga; laa Pedr wbig bzob lo zho ga. ⁵⁶ Zeene gon tib wnaa ne quia xtsiñ men co laa Pedr zob ga, dze rwi me, tibaque rēb me:

—¡Ye mgui qui gon rzēnie men ne blansonie to i!

⁵⁷ —¿Naa ye? —rēb Pedr—, ¡per ni runbeyd naa men qui!

⁵⁸ Wdzeepaaw, laa tib zha ne zo ga, gonaque Pedr, rēb zho lo Pedr:

—¿Segur lēē ye luu nacie men ne bgaa i?

Scasaque bneelid Pedr. ⁵⁹ Wdzeelaaque goca, zeen laa stib zho brieequia, rēb zho:

—Lēē tib zha ne nacie men qui nu gon. ¡Rlu zha galilé nac zho!

⁶⁰ Pquiab Pedr, rēb Pedr:

—¡Riend naa gon, pe nacne squi rnee luu!

Gardle lozh griee diidz co ro Pedr, zeene laa tib gall pcuedz. ⁶¹ Gall co nocuedz, zeene ptsire lo Jesús, dze bui me lo Pedr; dzigoraa psoladz Pedr zeene rēb me lo Pedr: “¡Guiel riigazh gon, gardle ycuedz gall, tsonle vuelte rēb luu runbeyd luu naa!” ⁶² Mbanse rac Pedr. Brieē Pedr ga, psilo Pedr biin Pedr guiēñē co.

⁶³ Grē zha ne zopaa quianap Jesús, nzian grē ncuaañe run zho me, psilo zho noyunnguzee zho me. ⁶⁴ Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed xtiidz Dios, ¿bnē sca dien cho ga bdiñ luu?

⁶⁵ Nzian grē ncuaañe rgoredz zho lo me.

Güeynie zho Jesús lo zhiwxtis zho

(Mt. 26:59-66; Mr. 14:55-64; Jn. 18:19-24)

⁶⁶ Zeene biini liu, pcaalsa grē men ne nac zha non lo menguedz, grē zho pxoz rnabey, ni grē zha ne nac maistr ley, güey zho güeynie zho Jesús lo zhiwxtis zho. Bdziñ me ga, bnabdiidz zho lo me rēb zho:

⁶⁷ —Bnē lo no dien, ¿pe lēē Men ne nacle diidz cxeel Dios lo guidzliu ga i nac luu?

Pquiab me rēb me:

—Niicle telne gni naa lo to nli lēē men co nu nac naa, gliladzde tow, ⁶⁸ tel pe gnabdiidzгаа naa lo to, ctsirede to low; sac gliladzde to mine nac diidzli.

⁶⁹ Naa ne nac naa Mgui ne pxeel Dios, zhile laa dze gdziñ zeene laa naa sob cue Dios nēz derech, men nroob ne rrieelo run grēse ncuaañe racladz me.

⁷⁰ Horco grēse zho pquiab, rēb zho lo me:

—¿Xpēēd Dios dzigo lēē nac luu?

Dzigo rēbchaa me:

—Tozhal name rnee, nli Xpēēd me nac naa.

⁷¹ Horco rēb zho:

—¡Pe mazdraa textigw ne racladz ne! ¡Laa ne bdzionle ganle mezhal rnee Xpēēd Dios nac me!

23

*Güeynie zho Jesús lo Pilat**(Mt. 27:1-2; 11-14; Mr. 15:1-5; Jn. 18:28-38)*

¹ Horcogazh pcaanie zho Jesús nêz, bdzinnie zho me lo Pilat, men ne nac gobernador ne nzoob zha Roma ga. ² Ga psilo zho nzian grê ncuaañe rquiaqui zho me, rëb zho:

—Laa no bnaaz men rii gon ziaadnie no me lo luu, sac bgaa me noquuil me menladz no gacntseeb zho. Rnee me lo zho nonguiel da gdeed zho dimi ne razh lo zhirey ne, men ne zob Roma; haxta rnee me mele nac rey ne gunbey zho, sac Dios pxeel me ziaad me.

³ Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

⁴ Dzigo rëbchaa Pilat lo grê zha ne ne nac pxoz rnabey co, ni grê miech ne ziegrê zho ga:

—¿Ni tib dol rapd men rii!

⁵ —¿Zha gapd me dol? —rëb zho—. Ni zaatne zieetaa me noquuil me miech gacntseeb zho lo zhirey ne. ¿Dible nêz Judé nu güeyted me; desde nêz Galilé brie me ziaad me haxta nu!

⁶ Gon Pilat sca rëb zho, dzigo bnabdiidz me dien pe zha Galilé nac Jesús. ⁷ Zeene gocnañ me zha nêz co nac Jesús, dzigo pxeel me Jesús lo Herod, sac Herod rnabey nêz Galilé; lëëtaque len dze co laa Herod no Jerusalén ga.

⁸ Rley Herod zeene gon Herod me, sac ziyon Herod grëtaa mine run me; quiambêz Herod gdziñ dze ganlo Herod me, ganlo Herod gun me pe tib milagr. ⁹ Psilo Herod nzian grê ncuaañe rnabdiidz Herod lo me, per ni tib lo wnabdiidz co ib ptsired me. ¹⁰ Zeene gon Herod rquiabd me, ni gon Herod noque grê pxoz rnabey co, grê maistr ley co, ib rioogd ro zho rzadraa pe yquiaqui zho me, rnab zho cteed Herod me caxtigw, ¹¹ nacne lel psilo Herod grê xmenguiib Herod rzhidznie zho me, runnguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat. ¹² Glo ib rdzieeld xtiidz Herod grop Pilat, laa dze co laa zho psilo bneewen stib.

*Bnab zho guet Jesús**(Mt. 27:15-26; Mr. 15:6-15; Jn. 18:39-19:16)*

¹³ Dzigo bnabey Pilat pcaalsa grëse pxoz rnabey, grê zha ne nac zhiwxtis zha Israel, ni grëraa menquiedz, ¹⁴ rëb Pilat lo zho:

—Laa zho biad-zoob xdemand men rii lo naa nu, nac diidz noquuil me miech gacntseeb zho lo zhirey ne. Nacne pquiep naa me, ni blalagaa to gona; par naa peet dol rapd me. ¹⁵ Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuaañe guiab ne rieguial guet me. ¹⁶ Mine gaca, laa naa gnabey ted me tib caxtigw, lozh ga dzigo laa naa csilaa me.

¹⁷ Nac costumbr, gzobse lni Pascw rsilaa zho tib zha ne no xcuent lo wxtis.

¹⁸ Per zeene bin grê miech co laa Pilat csilaa Jesús, grëse zho nguiedz roptsie zho, rnee zho:

—¿Csilaad luu men qui, bnabey guetgazh me! ¿Barrabás psilaa!

¹⁹ Barrabás lë tib men co no ladzguiib len dze co, sac bgaa me zo me lo tib dii zha ne noyactseeb lo rey len guiedz Jerusalén ga, ni zëëbaque me tib ngutoo. ²⁰ Bguib Pilat dien zha nrieelo nsilaa me Jesús, ²¹ per psilo grê miech co nguiedz roptsie zho, rnee zho:

—jNone guetgazh men qui! jLo cruz bnabey yquia me!

²² —Per, jpe nacne gnabey naa yquia me lo cruz? —rëb Pilat stib—. jPe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

²³ Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc minë racladz zho. ²⁴ Racse Pilat, laa Pilat bdeed diidz. ²⁵ Blozhse bnabey Pilat psilaa zho Barrabás, zha ntseeb ne no ladzguiib ga, dzigo laa Pilat psan Jesús ladznia zho.

Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

²⁶ Horco laa zho brieenie Jesús laa zho zienie me zaatne yquia me lo cruz. Nëz zienie zho me, bdzieel zho tib men Ciren lë Simón wbiro lo dziin dan, pcuëez zho men co, bnabey zho me bi me zhicruz Jesús; nalse me zhits Jesús, laa zho zienie Jesús. ²⁷ Miech guizhiu ne zie ga, ndal grë men wnaa psilo zho roon zho no zho xquielnë me, ²⁸ dzigo dze bui me lo zho, rëb me:

—Xin, nac to men Jerusalén rii, goonde to xquielnë naa. Mazd golgoon por grëtaa guielnë ne no gan to, por grëtaa guielnë ne no gan xpëed to; ²⁹ sac zeene gal dze co grë men wnaa ne quianie mëed, ziab zho: “Mazd wenaque zie zha ne quianied mëed, zha ne nanđ zha radz mëed, zha ne niaadga gap mëed.”

³⁰ Horco grë miech, laa zho gnab tebaa zha pixche grë gui guiaa zho zhana.

³¹ jGolwi ganle, telne znutaa minë nodeed naa nac naa zig tib yag nguia, pelej to dzigo ne nac to zig tib yag bidz!

³² Ye schop zha ne nac ngbaan, zienie zho ga yquiaagza zho me lo cruz.

³³ Zeene bdziñ zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhicruz zho bzo tib nëz cue zhicruz me. ³⁴ Lo cruz co quia me, zeene nguiedz bnee me rëb me:

—jPapá! Ncuaañe quiayun grë miech rii nu, bzhiguiel gunquizhd luu zhow; sac riend zho pe run zho.

Gza menguiib ne bdziñ ga yquiaanap me, hor co tib tib zho bzhense zho tib lë xab me, laa stiba bio zho rif. ³⁵ Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguiac me, stib miech scataa bla me. jPe rac me na ne riete me i? jGuet me i zho, telne nli me nac Men ne zëëble diidz cxeel Dios, telne nli Dios bzooblo me ziaad me!

³⁶ Wbig menguiib co rdeed zho nziu bla guie me, rzhidznie zho me, rnee zho:

³⁷ —jZhirey zha Israel name nac luu! Psilaa luu lo guielnë qui nazho.

³⁸ Glaa guic zhicruz me quia choplan diidz ne pquiaa zho, rnew: “LËË ZHIREY ZHA ISRAEL NU.”

³⁹ Grop ngbaan ne quianie me lo cruz ga, psilo tib zho ye zho rzhidznie me, rnee zhó lo me:

—jLed rëb luu lëë, luu nac Men ne zëëble diidz ga cxeel Dios! jBlu nazho nli men co nac luu, psilaa ne lo guielnë rii!

⁴⁰ Horco pquiab stib zha co, rëb zho lo zho:

—jPsioog ró luu! jPe niicle niina ne laa luu guetle ib rdzieebd luu Dios?

⁴¹ Bien ganle, jtel ne ible min rii riogual ne grop ne, nu nodizh ne grë guielntseeb ne bdziun ne; sangue men qui, peet dol rapd me!

⁴² Dzigo rëb zho lo me:

—jBzhiguiel zeene guiaad luu gnabey luu, ib csand luu naa tib lad!

⁴³ Pquiab me rëb me lo zho:

—Peet tsienied guic luu, nadzegazh laa luu sê guioo ne zaatne nac lo xquie|bley Pxo z naa.

Gut Jesús

(Mt. 27:45-56; Mr. 15:33-41; Jn. 19:28-30)

⁴⁴⁻⁴⁶ Go| gro| dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biao biini stib. Horco pquiaa Jesús tib redz nroob, rëb me:

—Papá, laa naa rsañ zhiespíritu naa ladznia luu, luu pcaaniaw.

Diidz co brieer me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, gro|taa goca.

⁴⁷ Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been miñ co, rëb zho:

—¡Ne nlipagaa tib men peet xtold goc men qui!

⁴⁸ Scaque grë miech ne goclo ga, zeene gon zho zha blozh me, biabguie|në zho, mbanse rac zho laa zho wbi ga. ⁴⁹ Laa grë zha ne runbey me, zha ne gocnie me, zig nac grë men wnaa ne gocgrë zha ne brieena| zhits me zeene brieer me nêz Galilé, grë zho laa zho ndxiese tib lad rwi zho.

Bgueets Jesús

(Mt. 27:57-61; Mr. 15:42-47; Jn. 19:38-42)

⁵⁰ Lad grë zha ne nac zhiwxtis men Israel ga, no tib men guiedz Arimaté lë me José; lëë guiedz co ndxie xtan Judé. Tib miech wen nac me, noxco me miñe rnabey Dios, ⁵¹ ye me quiambéz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform miñe bnabey zho. ⁵² Nacne hor co güey me lo Pilat, bnab me diidzbey tsielit me xcuerp Jesús lo cruz. ⁵³ Dzigo güey me, blozhse blit me cuerp co lo cruz, pche| me me tib lo lar nroob, güey me güeyqueets me me tib len baa cub ndieen tib cho quie gax ga.

⁵⁴ Lëë bdze dze co no zho xco ne laa dze ne gdziiladz zho lo dziin sëëb.

⁵⁵ Grë men wnaa ne sca nacgza grë zha ne brieena| zhits me zeene brieer me nêz Galilé ga, ye zho güeyna| bgueets me, gon zho pa lo bio me. ⁵⁶ Blozhse bgueets me, laa zho zey. Bdziñ zho bzhixcuuaa zho, tiblo zënex ne tsietëëb zho lad xcuerp me; dzigo laa zho bdziiladz zigne rnabey ley no gun zho.

24

BRIEEBAN JESUS

(Mt. 28:1-10; Mr. 16:1-8; Jn. 20:1-10)

¹ Laa zeene go| dze ne rzobni zhma|, silgaw laa gza men wnaa co brieer, bi zho grë zënex ne bzhixcuuaa zho ga, laa zho zie ro baan Jesús.

² Bdziñ zho, gon zho laa quie ne bioog ro baan me ga bdioble; ³ bzëëb zho len baa gon zho, niicle xcuerp me guiendle ga. ⁴ Laa zho zo ga, riend zho dien pe nacne sca nialse ro baa co, pe nacne niicle xcuerp me guiend len co. Tibaque zeene gon zho laa chop men bgui zole lo zho ga, masaque riaazbel lad xab grop men co. ⁵ Horco per nli bdzieb zho, lo dzeb co miñe been zho laa zho pquiitgzhib haxta bdziñ lo zho lo liu. Dzigo rëb grop men bgui co lo zho:

—¡Pe nacne ziaadguib to men mban zaatne rio mengut? ⁶ ¡Laa me brieer-banle! ¡Guiendle me nu! Go|soladz ganle zha në me lo to len dze ne no me nêz Galilé, ⁷ në me: “Mgui ne pxe| Dios, ible none guiab me ladznia grë

miech ngoopdol, squiaa zho me lo cruz, per zeene gac tson ngbidza, laa me grieaban.”

⁸ Dzigoraa psoladz zho, nligaa sca bnee me, ⁹ hor co lëëläd güeynie zho diidz lo gza tsiiptib zha ne nac xpëëdsuel me, ni lo grëraa zha ne nacgza zho ga. ¹⁰ Nzianlaa nac meñ wnaa co, lad co no Mari Magdal, no Zhuan, ni Mari ne nac nnaa Jacob.

¹¹ Niicle bzodiidz zhow lo xpëëdsuel me, per con rnee zho led ncuuan gacd ga, ni lalnu bliladzd zhow. ¹² Tibaque zeene brieed Pedr, rias Pedr laa Pedr zie nêz ro baa. Bdziñ Pedr bdiixlo Pedr len baa co, gon Pedr nligaa, jloxaque lar ne briel me zhoob len co! Blozh ga, laa Pedr zeyaque, rzee zdoo Pedr gon Pedr nli guiendle xcuerp me ga.

Gon zho Jesús nêz Maús

(Mr. 16:12-13)

¹³ Dze co brieed chop xpëëdsuel me zie zho tib guiedz win lë Maús. Gax Jerusalén riaan guiedz win co, maase chop hor rzë zho rdziñ zho ga. ¹⁴ Nêz no zho nozodiidz zho grë mine pteed miech Jesús ga, ¹⁵ tibaque zeene bien zho laa zho bgaa tib lo meñ co, gocgza me zho laa zho no nêz, per, jib biend zho lëë Jesús ga! ¹⁶ Ranlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuuañ ptse lo zho. ¹⁷ Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guieñe no to?

Dzigo bzodze zho. Mban rac zho, haxta lo zho rlu nroob guieñe no zho. ¹⁸ Pquiab tib zha ne lë Cleof, rëb zho:

—¿Niacxe bind luu ganle zha nactaa ncuuañe goc Jerusalén len dze rii? Grëse zha ne name güey Jerusalén, gocnañ.

¹⁹ —Nligaa —rëb me—, ¿pe dien goc ga?

Rëbcha zho:

—Len dze rii psacsi zho meñ Nazaret ne lë Jesús. Tib meñ ne biadteed xtiidz Dios lo miech nac me, nzian grë milagr nroob ne been me; miech guizhiu ne bley pquiaadiag zhiwseed me. Rlu tib meñ nziuu nac me lo Dios.

²⁰ Per leñ brieed grë pxoz rnabey, grë zho zha ne nac wxtis, bnaaz zho me, bnab zho gut me, pquiaa zho me lo cruz. ²¹ Tibaque rdzieets no, me niac tib meñ ne nsilaa zha ladz ne ladznia zha Roma. Pasëse miñ co niac, nadzele rac tson ngbidz beet zho me. ²² Per riend no dien zha nac cuent co, sac nasil güey bla meñ wnaa ne nacrer no ro baan me, ²³ zeene wbiere zho bzodiidz zho lo no nê zho guiendle xcuerp me len baa, loxaque chop anjñ brieequia lo zho ga, rëb anjñ co mban me. ²⁴ Blozh ga, güeyaque bla zha bguie ne nacgrë no, gon zho nligaa guiendle xcuerp me ga.

²⁵ Dzigo rëbcha zho me lo zho:

—¿Nadzpaan cow nac guic to, nadzpaan ndip nac zdoo to! ¿Riladze to grë mine dzigo lëë bzeet zho padzeela ted Meñ ne nole diidz ga cxeel Dios?

²⁶ Bzeetle zha co name ible no csacsi miech me, antes ne gbire me lo guieñdzon ne no me.

²⁷ Dzigo psilo me bnee me lo zho pa lo zhoobnee grë mine bded me ga, psilo me desde grë mine pquiaa Moisés, haxta grë mine pquiaa grëraa zha ne biadteed xtiidz Dios. ²⁸ Sca no zho nêz laa zho bdziñ Maús. Bdziñ zho ga, rac me zig nac zeene tib ted me, ²⁹ dzigo quia zho rnab zho lo me cuëz me ga, sac laa dze bdzele, zhile laa liu ycow. Nacne blëz me.

³⁰ Laa zho zob lo mezgowntsee zho, bzhen me guietxtil bdeed me xquizh lo Dios, blozh beenrol mew bdeed mew lo zho. ³¹ Dzigoraa zig nac zeene

bzhial lo zho, laa zho beenbey me. Per par nianraa zho me, znuse bnit me lo zho, gondraa zho me. ³² Horco per nli rley zho rnee zho:

—Con razon zeene sca ziaadgza ne me nēz nonee me lo ne zha raquiet lo Xtiidz Dios, masaque tib guieľbley nroob ne biaadnie xcodiidz me zdoo ne.

Sca rnee zho, sac bien zho bdziñ tib guieľbley nroob zdoo zho, zeene sca nonee me lo zho. ³³ Lëëlädaque brieec zho ga, bio zho nēz wbire zho Jerusalén stib. Bdzin zho lo gza tsiiptib zha ne bzēniepaa me ga, ni grēraa zha ne nacgrē zho, ³⁴ rēbchaa zha co lo zho:

—¡Tebaa gan to ganle nli brieecban xmaistr ne! ¡Laa Pedr gonle me!

³⁵ Psiloque zho grop zho bzodiidz zho zha gon zho me no zho nēz, per haxta horne no zho xtsee, zeene laa me beengroľ guietxtil dzigoraa beenbey zho me.

Brieecquia Jesús lo grē xpēēdsuel me
(Mt. 28:16-20; Mr. 16:14-20; Jn. 20:19-23)

³⁶ Lëētaaque sca nozodiidz zho, tibaque zeen gon zho laa Jesús zole lo zho ga, pquiaabdiuzh me zho, rēb me lo zho, peet tsieniedraa guic zho. ³⁷ Leľ rdzieb zho, haxta rzhidz zho lo dzeb co, sac rēb zho bod ndziin ga ran zho.

³⁸ Dzigo bnee me lo zho rēb me:

—¿Pe nacne rdzieb to? ¿Pe nacne rliladzde to naa nu? ³⁹ Golwi len nia naa, golwi zhits ni naa ganle. Golxeen naa, zeena gliladz to ganle nli naaw; sac tel ndziina, mese naca, gacd xen tow.

⁴⁰ Sca quianee me, blu me nia me, blu me ni me lo zho, zaatne biaaz me clav. ⁴¹ Per nli rley zho, rzee zdoo zho, per rliladzdaque zho dien pe nliipaa lēe me ga. Gon me sca rac zho, nacne bnab me ncuaae gow me lo zho. ⁴² Dzigo bdeed zho tib lē mej bguiee lo me, ⁴³ bnaaz me mej co, squi ndxie zho gon zho dow me ma. ⁴⁴ Dzigo rēb me lo zho:

—¿Pe ib rsoladzde to nile naa laa grē min rii no gac? Led ni naa lo to, grēse mine bzeet Moisés, grēse mine bzeet grē zha ne biadteed xtiidz Dios, mine raquietgaa lo Salm teed naa, ible laaw none gac.

⁴⁵ Psilo me clar nonee me lo zho, parne guienpaa zho zha zhobnee lo grē guits co, ⁴⁶ rēb me:

—Ible lo co zhobnee sca teed naa ne nac naa Mgui ne pxeel Dios, rneew ib no gut miech naa, per zeene gac tson ngbidza, laa naa grieecban. ⁴⁷ Rneew, Jerusalén nu, nu csilo gacnan miech ible none csaan zho xquieľntseeb zho, gnalo zho naa, parne gun Dios zho perdon. ⁴⁸ Ni to gon ganle grēse min co, goca. ⁴⁹ Na len dze ne ziaadaque nu, laa naa cxel Espiritu Sant gacnien to, sac ib scale nac xtiidz Pxoaz naa. Per guiabde to niinaga grieec to tsienec to lo miech, Jerusalense nu golcuēz, haxta nieeda yгаа to poder ne gneedz Espiritu Sant lo to.

⁵⁰ Zeene gol dze ne laa me guey gbaa, dzigo güey me güeynie me zho nēz Betain. Bdzin zho ga, blis me nia me, psilo me noyunlay me zho. ⁵¹ Laa me quiaayunlay zho, tibaque zeene laa me bias lo guidzliu, įgonlo zho laa me bzoquia gbaa!

⁵² Horco pquitsgzhib zho liu, beennon zho me, rnee zho grē diidz ndzon lo me; blozh ga ine rley zho laa zho wbi ga, bdziñ zho Jerusalén stib. ⁵³ Psilo zho gzataa dze rie zho yadoo roolnie zho Dios, rdeed zho xquizh lo me.

XTIIDZ NDZON DIOS MINE PQUIAA JUAN

¹⁻² Jesús, men ne nac Diidz Ndzon, nole me zeene bīaa grētaa ncuaaṅe no; lo Dios no me ni Diosaque nac me. Notaque me, tībaque nac me: me ni Dios. ³ Me bzaa grētaa ncuaaṅe no, tsod ncuaaṅe lega scase nīaan; sac me bzaaw grēsew. ⁴ Ladznia me no guieṽmban ne gdziṽd dze lozh, nac guieṽmban co zig tib biini ne rziini lo miech. ⁵ Me nac biini ne quīaziini zaatne nac lo guieṽcow, ni rriielod guieṽcow ctsew lo biini co.

⁶⁻⁷ Bio tib mguī brieelē Juan, Dios pxeel Juan biadnee Juan lo miech cho nac Jesús, zeena grēse zho gliladz Jesús. ⁸ Led Juand nac biini, sinque loxaque bīaad Juan bīaadlu Juan Jesús, men ne nac biini co. ⁹ Bdziṽ dzew laa Jesús bīaad, ni nīina me nac men ne noziini lo grēse miech, sac mepaa nac biini co.

¹⁰ Jesús nac biini, me nac Diidz Ndzon co. Me bzaa guidzliu, per zeene bīaad me lo guidzliu ib biēṽd miech cho nac me. ¹¹ Per ni menladz me, niicle ne lopaa zho bdziṽ me ib gonṽdzed zho me; tib chop zha ne blēzlo me. ¹² Ni grē zha ne sca bleynie me, grē zha ne dib zdoo gliladz cho nac me, grēse zha co laa me bzo zho gac zho xpēēd Dios. ¹³ Grēse zho, rrieequia gol zho stib! Per guiabd ne togo gol zho zigne ral grē miech guidzliu rii, sinque laa zho gol zigne racladz Dios; gane nīina xpēēd me nac zho.

¹⁴ Zeene bdziṽ dze ne laa men ne nac Diidz Ndzon ga goc miech bīaad me lo guidzliu, grop lo no bdziṽ no me, ni bzianie no me. Blu me pa lotaa nquialadz me miech, ni niapse diidzli bnee me. Bdziṽ no xquieṽndzon me ne nac me tibpaa mēēd lo Dios, men ne nac Pxoz ne.

¹⁵ Zeene bzeet Juan Bautist me lo miech, tib vuelt haxta blu Juan me lo zho, rēb Juan: “Lēē men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

¹⁶ Nquialadzdox Jesús ne, grēse ne gzataa dze laa ne nogaa grētaa guieṽnzaac ne rsiab me. ¹⁷ Zeene psan Moisés ley, loxaque bnabeya ne; sangue nīina ne laa Jesús bīaad, laa me bīaadnie mine nacpaa diidzli ni bīaadlu me ganle pa lotaa nquialadz Dios miech.

¹⁸ Wlaltaa ib choot gard gan Dios; sangue nīina ne laa Xpēēd me Jesús bīaad, men co bīaadlu ganle zha nac Dios; sac zaatne no Dios gaque no me.

*Rnee Juan Bautist cho nac Jesús
(Mt. 3:11-12; Mr. 1:7-8; Lc. 3:15-17)*

¹⁹ Tib dze pxeel grē zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dien cho nac Juan.

Bdziṽ zho bnabdiidz zho lo Juan. ²⁰ Dzigo bneeli Juan lo zho, rēb Juan: —Golgacnan ganle, led naad nac Men ne quīambēz to ga cxeel Dios.

²¹ —¿Chox nac luu waa? —rēb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rēb Juan:

—Lēda, led Líd naa.

Biire zho bnabdiidz zho, rēb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rēb Juan:

—Zhaa men co, led naad nac men co.

22 —¿Cho dzigo nac luu? —rëb zho—. Bnë dien cho nac luu; sac gon̄ ib none gdziñnie no tib xtiidz luu lo zha ne pxeel̄ no.

23 Dzigo pquiab Juan, rëb Juan lo zho:

—Naa nac mgui ne bzeet Isá, men̄ ne biadteed xtiidz Dios padzeela, zeene znu bnee me: “Zon to zëëb tsi tib mgui dan rnee me lo miech: ¡Golgun̄ nguudz zdoo to, sac gon̄ ile ziaad men̄ ne rnabey ne!”

24 Horco laa zha ne pxeel̄ zha farisé pquiab, rëb zho lo Juan:

25 —Tel̄ne led luud nac Men̄ ne zëëble diidz ga cxeel̄ Dios, niicle led luud nac Lí, niicle nacdгаа luu cho stib zha ne pxeel̄ Dios ziadteed xtiidz me, ¿zha nac dzigo ne nochoobnis luu miech?

26 Pquiab Juan rëb Juan:

—Tel̄ naa niab nis rchoobnis naa miech, per no tib men̄ ne gard gunbey to.

27 Tib men̄ non nac me, per ni par gac naa tib ngundziin win ne glit lab me ni me raguiald naa; ni merle csilo gun̄ me dziin ne pxeel̄ Dios me gun̄ me.

28 Betain lë tib guiedz ne riaan̄ gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiap zho me.

¿Cho nac Jesús?

29 Biet stib dzew, laa Jesús bdziñ zaatne no Juan ga. Zeene gon̄ Juan me, rëbchaa Juan lo grë miech ne ndxie ga:

—¡Golwi ganle, lëë men̄ qui gon̄ csilaa miech lo grëtaa xtol̄ zho! ¡Me gac zig tib carner yeen ne guet tsoyon lo Dios par guiaañmbe miech lo dol̄! 30 Lëë men̄ rii ga nagon̄ rzet naa lo to zeene rne naa: “Iraa ziaad tib men̄ ne mazdraa non lo naa, sac notaque me; nole me zeene blanso naa lo guidzliu.” 31 Len̄ dze co niicle naa runbey naa me; per laa naa nochoobnis miech sac ible laa naa zial̄ par glu naa me lo grë zha Israel.

32 Dzigo bzodiidz Juan lo zho, zha gonlo Juan biet Espiritu Sant gbaa, rlu me zigne rlu tib palom blëz me guic Jesús.

33 —Ne nligaa runbeyd naa me —rëb Juan—. Per zeene pxeel̄ Dios naa zial̄chobnis naa miech, hor co në me lo naa: “Zeene gan̄ luu guiet Espiritu Sant gbaa cuëz me guic tib mgui ne nochoobnis luu, dzigo gocnañ lëë men̄ co nac men̄ ne rxeel̄ Espiritu Sant zdoo miech.” 34 Gonlo naa blëz Espiritu Sant guic me; gane nañween naa ne nli Xpëed Dios nac me.

Zha ne glopaa goc xpëëdscuel Jesús

35 Biini liu co, laa Juan zoque ga zonie me chop xpëëdscuel me. 36 Ga zo me, gon̄ me laa Jesús zieded ga; dzigo rëbchaa me lo zho:

—¡Golwi ganle! ¡Lëë men̄ qui gon̄ nac Xcarner yeen Dios!

37 Zigne bin zhow, laa zho zienañ zhits Jesús. 38 Zeene ptsire lo me, gon̄ me laa zho nalle zhits me; dzigo rëbchaa me lo zho:

—¿Pe nac ziaadnañ to zhits naa?

—Maestro —rëb zho—, laa no racladz gacndion̄ no dien̄ pa rbëz luu.

39 Dzigo rëbchaa me lo zho:

—Na ganle guio ne, zeena gan̄ to paw.

Nacne güeynañ zho zhits me, gon̄ zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

40 Ndrés lë tib zha ne güeynañ zhits me ga; lëë Ndrés co nac bets Simón Pedr.

41 Dzigo zigne brieer Ndrés ga güey Ndrés güeyguib Ndrés Simón. Bdziñ Ndrés rëb Ndrés lo Simón:

—¡Nasi gon̄ laa no bdzion̄ Men̄ ne nacle diidz ga cxeel̄ Dios!

42 Dzigo güeynie Ndrés Simón zaatne no Jesús ga. Zeene gon̄ Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieelë Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

⁴⁴ Zha Betsaid nac Lip, ni zha coque nac Ndrës grop Simón.

⁴⁵ Dzigo güey Lip güeyguib Lip Natanael; rëb Lip lo Natanael:

—¡Laa no bdzion Men ne nacle diidz ga cxeel Dios! Men ne rzeet Moisés lo libr ley ne psan me, men ne scataa bzeet grë zha ne biadteed xtiidz Dios padzeela. ¡Laa no bdzion me, tib men Nazareta, lëe me ga nac Jesús, xingan José!

⁴⁶ Pquiab Natanael, rëb Natanael:

—¿Nazaret ye? ¡Gard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie. ⁴⁷ Squi ziaad Natanael, zeene gon Jesús Natanael rëbchaa me:

—¡Golwi ganle, lëe zha qui gon nac merpaa zha Israel, sac mesi ib rquidied me!

⁴⁸ —¿Zha nacne runbey luu naa? —rëb Natanael.

Pquiab me rëb me:

—Glole naa beenbey luu, dzigora a bredz Lip luu. Zeene zob luu tib zhan yag guigw, hor co gon naa luu.

⁴⁹ Rzee zdoo Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

⁵⁰ Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuaane mazdraa nroob!

⁵¹ Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhal, z lupaa grë xanj Dios, zha ne ziad-zëeb zha ne ziequia, quiayun zho dziin lo naa, nac naa Mgui ne pxeel me.

2

Güey Jesús tib lo guieltsieel

¹ Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xníaa Jesús lo lni co, ² ni bredz zho me; nacne bional no zhits me grëse no ne nac no xpëedscuel me.

³ Laa lni noyac, tibaque zeene laa vin blozh. Dzigo güey xníaa Jesús rëb me lo Jesús:

—Laa xvín men rii blozh. ¡Guiendraa pe quiiz zho!

⁴ Pquiab Jesús rëb me:

—¿Pe nacne rnee luuw lo naa? Gon ganle naraa gdziñ dze ne gacnan miech cho nac naa.

⁵ Niicle sca rëb Jesús lo me, güey me lo zha ne quiaguiz vin ga rëb me lo zho:

—Míne gnabeytaa me to, golguña.

⁶ Lidz men co ga ndxie xoop guies ne níaa quie; zaatne rio nis ne rquiin zha Israel riar nía zho, zigne nac grë xcostumbr zho. Tib tib guies co, río maase

xoopga re nis lena. ⁷ Dzigo bnabey Jesús zha ne rguiz vin ga pcodzëe zho nis len gza guies co. ⁸ Blozhse guiel guiel pcodzëe zhow, rëbcha me lo zho:

—Golcuee niip nis qui, golt sienew lo men ne zo lo lni.

Zeene laa zho blee niip nis co tsienie zho, laaw nacle vin. ⁹ Ni lalnu ib güeynid guic men co pa brieë vin co (loxaque zha ne nacse ngundziin ga, zha ne blee nis ga, zha cose gon pa brieew), zeene pquiaaro mew, bredz me mgui ne notsieelna ga, rëb me:

¹⁰ —¿Zha nan luu naraa cuee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin ligase. Laa luu gon lel naraa bnabey luu brieë vin niazh.

¹¹ Milagr ne been Jesús guiedz Caná ga, ga glopaa blu me lo miech ganle nli tib men nroob nac me. Grëse no ne nac no xpëedscuel me, zeene bdzion now, hor co bliladz no nli me nac Men ne zëëble diidz ga cxeel Dios.

¹² Zeene blozh guiełtsieel co, laa no wbiere guiedz Capernaum stib grë no me, xniaa me, ni zha bets me ne. Bdziñ no Capernaum, ga bliaaz no blalaa ngbidz.

*Blee Jesús grë zha ne noyun lgui len yadoo
(Mt. 21:12-13; Mr. 11:15-18; Lc. 19:45-46)*

¹³ Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co brieë Jesús zie me nëz Jerusalén.

¹⁴ Bdziñ me Jerusalén, güey me len yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxii, zha ne no wto palom ne, haxta zha ne rtsëë dimi ndxie ga. ¹⁵ Dzigo bzhixcuaa me tib lë doo zig riaa dooguid ne rcaa ma, bzhen me doo co beñcxoon me zho ga grë xma zho; blozh ga, ptiixche me xmez h zha ne notsëë dimi ga, nëzrii nëzrec blaal me xtimi zho.

¹⁶ —¿Ninagazh golcuee grë ncuuan qui nu! —rëb me lo zha ne rto palom—. ¿Golguien ganle lidz Pxoza naa nu! ¿Nacda ya lgui parne tso to wto nu!

¹⁷ Dzigo psoladz no zha ziaad lo Xtiiid Dios, zaatne rnee: “Rbiñladz guic naa, sac ne nligaa racladz naa yquiaanap naa lidz luu.”

¹⁸ Blalaa zha non lo menquiedz Israel, zeene gon zho sca beñcxoon me grë miech co, wbig zho lo me rëb zho:

—¿Cho nac luu ne squitaa noyun luu grë ncuuan qui? ¿Been tib milagr, dzigo zhliladz no men rnabey nac luu!

¹⁹ —Telne racladz to milagr —rëb me—; golt sil yadoo rii, ni gni naa lo to ganle ngbidz tsona laa naa bzaalolew stib.

²⁰ Pquiab zho rëb zho:

—¿Ncuuane gliladzdraa no rnee luu! ¿Len choopxopraa iz name biala yadoo rii! ¿Zhazhe gon luu, tsonaque ngbidz gzaa luuw stib?

²¹ Per zeene sca bnee Jesús lo zho, xcuerp me ga nac yadoo ne bzeet me.

²² Gane zeene brieëban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiiid Dios zaatne scaque rnee.

²³ Len dze lni Pascw co, nzian miech zeene gon zho grëtaa milagr ne run me, bliladz zho ne nli me nac Men ne zëëble diidz ga cxeel Dios. ²⁴ Per ib pxend me lo zho, sacne nanwen me zha nac zho tib tib zho. ²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdo zho.

¹ Ziecowle liuw, bdziñ tib zha farisé lë Nicodem zaatne rbëz Jesús; tib zha non nac me lo mengüedz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne ruñ luu, ga rlu ne Dios nacie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grielod gdziñ zho zaatne rnabey Dios.

⁴ Pquiab Nicodem, rëb Nicodem:

—¿Gal zho stib ye? ¿Zha grieele gal miech stib? Tib zha ne nacle mengol, ¿niacxe zrieele sëëb zho zdoo xniaa zho gbiire gal zho?

⁵ Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espíritu Sant, grielod sëëb zho zaatne rnabey Dios. ⁶ Grëse miech zeene ral zho glo, miechse nac zho; sangue zeene ral zho stib, Espíritu Santle nac men ne rnabey zho. ⁷ Gacxe waa, gzeed zdoo luu znu rne naa: “Grëse miech, ib none gal zho stib.” ⁸ Nac cuent rii zig nac me ne rtop xcow, zeene rriee me, nëzrii nëz rec zie me, ron luu razh zhoob me; per rand luu dien pa nëz zie me dien pa nëz ziaadгаа me. Scaque nagon nac zha ne ral stib, grielod guien miech zha rnabey Espíritu Sant lo xquielmban zho.

⁹ —Riend naa zha rnee luu —rëb Nicodem—. ¿Riend naa dien zha grieele gac grë miñe rnee luu!

¹⁰ Rëbchaa Jesús:

—¿Riend luu ye zha rne naa? ¿Men rseed miech name nac luu lo mengüedz Israel! ¹¹ Miñe rne naa nu ncuaañe rien naaw, ncuaañe gon naaw, ni riende to zha naca. ¹² Telne riend luu zha nac grë miñe rne naa nu zeene rzet naa ncuaañe rac lo guidzliu, ¿zha dzigo guien luu miñe gne naa telne gzet naa grë ncuaañe rac gbaa?

¹³ ‘Waltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëe men co nu nac naa.

¹⁴ Ni zigne pquiangaа Moisés tib meel brons tib guic yag zeene nonie me zha Israel dan zit co; scaque none yquiangaа naa tib lo yag, ¹⁵ zeena grëse miech, zha ne gbig dib zdoo zho gnalo zho naa, zgaa zho tib guielmban ne gdziñd dze lozh. ¹⁶ Sac gon rleyniedox Dios grëse miech ne ndxie lo guidzliu; gane niicle tib naa nac mëed lo me per laa me pxeel naa lo guidzliu; zeena grëse zha ne gnalo naa, zgaa zho tib guielmban ne gdziñd dze lozh; led yed zho nitlo. ¹⁷ Laa Dios pxeel naa lo guidzliu par csilaa naa miech lo dol, ziald naa par gdziñbdol naa miech. ¹⁸ Sac grëse zha ne dib zdoo gnalo naa ne naa csilaa zho lo dol, nitlod zho. Sangue zha ne gnalod naa, laa zho bnitole ga, sac gon Xpëed Dios nac naa ni bliladzd zho naa. ¹⁹ Laa zho bnitole, sac gon biaadpaa biini lo guidzliu ni laa ne nleynie zho biini, lel guielcow bleynie zho, sac guielntseeb nac miñe zienal zho. ²⁰ Grëse zha ne ruñ guielntseeb, rlëe zho ran zho biini. Ib rbigd zho lo biini, sac racladz zho xoobnen grë guielntseeb ne quiaayun zho. ²¹ Sangue zha ne ruñ miñe rnabey Dios, haxta rley zho rbig zho lo biini, zeena glu ganle zienal zho miñe rnabey me.

Rzeet Juan Bautist Jesús stib

²² Ga brieë Jesús güeynie me no nëz xtan zha Judé. Xtselaa bliaaz no ga grë no me, rchoobnis me grë miech co.

²³⁻²⁴ Len dze co gard guiab Juan Bautist ladzguiib; dzigo ye me nochoobnis miech zaatne lë Enón gax Salim; sac ga no naal nis. Nzian miech ne rdziñ lo me ga, rchoobnis me zho.

²⁵ Tib dzew, wbig tib zha Israel lo zla xpëëdsuel Juan, psilo zho nodiidiidz zho dien cho zhiwrobnis nonraa; pe zhiwrobnis Jesúsa, te zhiwrobnis Juana ye. ²⁶ Blozhse bdiidiidz zho, wbig xpëëdsuel Juan lo Juan, rëb zho:

—Maestro, men ne gon bzodiidznie luu ro guiubee Jordán ga, men ne scataa bzeet luu lo miech, ije me laa me quiachoobnis miech niina, ni ndal miech niapse lo me zie zho, ziaatraade zho nëz ri!

²⁷ Pquiab Juan rëb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos. ²⁸ Mine pso Dios naa, laaw ben naa: laa naa biallu ganle cho nac Men ne zëëble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me.

²⁹ Ible lo me none gdzin miech. Nac me niina zig tib mgui ne notsieelnia: Mgui ne notsieelnia, jled zha lëë rzobnie ndzoop ne notsieelnia zho! Ni grë zha ne ndzieeldiidz zho, rley zho ran zho laa xamigw zho notsieelnia, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuaañe run me. ³⁰ Zigse zie dze, laa me gacnonraa; scagaa naa, zigse zie dze laa naa guiaanwinraa.

³¹ Nëz gbaa ziaad me, min co ne mazdraa non me lo grë miech. Teļ naa tib miech guidzliuse nac naa, ni ncuaañe riense tib miech lo guidzliu min co rne naa; ³² sangue me, niapse grë mine bin me, grë mine gon me min co rnee me lo miech; jni choot rliladzda! ³³ Zha ne rliladzse xtiidz me, rien zho ganle niapse diidzli rnee Dios. ³⁴ Xtiidz Dios rnee me lo miech; sac Espiritu Sant rdeed guielbiini lo me, ni Dios nac men ne pxeel me. ³⁵ Rleyniedox Dios me, nac me Xpëed Dios; gane grëtaa ncuaañe no gbaa, no lo guidzliu, ladznia me psan Diosa. ³⁶ Grëse zha ne gnalo me, laa zho bgaale tib guielmban ne ib gdzind dze lozh; sangue zha ne gond xtiidz me, gdzind zho gbaa, zaatne yгаа zho guielmban co. jGrëse zha co, ible zgaa zho guielnëdox ne csaab Dios!

4

Tib wnaa Samar

¹ Zeene bien Jesús laa zha farisé gocnanle ndalraa miech zianal zhiwseed me, ni ndalraa miech ne quiachoobnis me lo Juan ² (niicle ne led medpaa rchoobnis, sinque zha ne nac xpëëdsuel me zha co rchoobnis), ³ nacne briece me xtan zha Judé ga, wbiere me nëz xtan men Galilé stib.

⁴ Par gdzin me Galilé, none ted me xtan men Samar. ⁵ Xtan men Samar zieded me, zig groļ dzew, laa me zie gax guiedz ne lë Sicar, ⁶ dzigo güeyted me zaatne quia guiuu ne rnee zho “Zhibzie Jacob”; lo liu ne psan Jacob lo xpëed me José padzeela. Rdzag me ziaad-zë me lo nëëg co, bdzin me bzob me ro guiuu co; ⁷⁻⁸ ga blëz me, laa no zio lad guiedz Sicar zioxi no ncuaañe dioownie no me.

Ro guiuu co zob me bdzin tib wnaa Samar ziexi nis ga; dzigo rëbchaa me lo wnaa co:

—Bzhiguiel bzoladz niip zhis luu guie naa.

⁹ Bzee zdoo wnaa co gon me bnab Jesús nis lo me, sac rlëëdox zha Judé ran zho zha Samar, per ni rneed zho lo zho.

—jNcuaañe gliladzda naa! —rëb me—. jTi zha Judé gnab nis lo ti zha Samar!

Dzigo rëbchaa Jesús:

¹⁰ —Teļ niaca minde guien luu ganle cho rnab nis lo luu, ni guien luu zha nactaa ncuaañe rloadz Dios lo miech, haxta znab luu nis lo naa. Ni naasi gon, znedz naa nis ne rdeed guielmban.

¹¹ Pquiab wnaa co, rëb me:

—Per ni nzhend luu name pe cuee luu nis, ¿pa dzigo tsiebee luu nis ne rdeed guielmban ga? ¡Gon ganle, guietdox bzie rii! ¹² Stiba, ¿niacxe mazdraa dzigo nac luu que pxozgol ne Jacob, men ne psan bzie rii? Nu name go me nis grē xma me; niicle grē xpēed mew, nuque go zho nis.

¹³ —Grēse zha ne rie nis rii —rēb Jesús—, rbiire rnab zhis zho; ¹⁴ sangue nis ne rded naa, zha ne guiew gdzindraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gded tib guielmban ne gdzin dze lozh lo zho.

¹⁵ Dzigo rēbchaa wnaa co lo Jesús:

—Bzhiguiel bneedz nis co guie naa, zeena gnabdraa zhis naa, zeena guialxidraa naa nis nu.

¹⁶ —Güeygazh —rēb Jesús—, güeyxi tsieel luu, dzigo goltē grop to.

¹⁷ —Guiend tsieel naa —rēb wnaa co—. Gard ctsieelnia naa.

—Nli rnee luu —rēb Jesús—; ¹⁸ sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. ¡Nli miñe rnee luu i!

¹⁹ Zeene bin wnaa co sca rēb Jesús, rēbchaa me:

—Zootne tib zha ne ziadnee xtiidz Dios lo miech nac luu. ²⁰ Tel scaw, bzhiguiel bnē dien, ¿zha nacne rnee grē men Israel ne len yadoo nroob ne zobpaa Jerusalén, gapaa none tsiegan miech Dios? Sac no ne nac no men Samar, rnee no ne ib guic gui ne zob nu, ga none tsiegan miech Dios; sac grē xmengol no ga güeygan zho Dios.

²¹⁻²⁴ Pquiab Jesús rēb me:

—Bina ganle, zdzin dze zeene yquindraa ne goon guic gui riipaa, o Jerusalénpagaa tsie to tsiegan to Dios men ne nac Pxoz ne. ¡Ni laa dze co ziaadgaxle! Gacdraaw ne dien pa lo tsie ne tsiegan ne Dios, sinque zha ne nlijaa racladz gleynie me, none dib zdoo zho gleynie zho me; zigne gdeedse Espiritu Sant guielbiini lo zho.

‘Choot grieelod gan Dios; gacxe waa zha ne gleynie me, none gleynie zho me zigne rdeed Espiritu Sant guielbiini lo zho; ni none dib zdoo zho gleynie zho me. Ni zha ne sca gleynie me, zha co rguib me. Tel to laa to rieganse Dios ni runbeyde to me; sangue no rdziunbey no men ne riogan no, sac gon lo xti meñ Israel ziaad men ne guiaadsilaa miech lo dol.

²⁵ —Nenda —rēb wnaa co—, per nan naa ib ziaad Men ne zēēble diidz ga cxeel Dios, men ne lē Crist; ni zeene laa me guiaad, me gnē diidzli lo no.

²⁶ Pquiab Jesús, rēb me:

—¡Naa gon nac men co! Lēē me nu nonee lo luu.

²⁷ Lēētaaque hor co grēse no ne nac no xpēedscuel me laa no bdzin. Bzee zdoo no bdzion no laa me nozodiidznie wnaa co, per ni tib no bnabdiidz lo me dien pe quianabdiidz me, dien pegaa quiazodiidznie me wnaa co.

²⁸ Laa wnaa co, zoque xche me ga, rias me laa me zie nēz lad guiedz. Bdzin me, rēb me lo grē miech co:

²⁹ —¡Goltē ganle gunbey to ti men co! ¡Bzeet me grēse zha nac lo xquielmban naa! ¿Bay pe lēdle Men ne nole diidz cxeel Dios ga?

³⁰ Horco briea grē miech co lad guiedz, ziaad zho zaatne gon wnaa co Jesús.

³¹ Laa no, quia no rdeed no ncuaane gow me, per nēd me.

³² —Gowd naa —rnee me—. No stib xquielwagw naa miñe runbeyde to.

³³ Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

³⁴ Nēchaa me lo no:

—Lëë xquielwagw naa nac ne gun naa mine rnabey Dios naa, ni csiaal naa dziin ne pxeel me naa zialgun naa. ³⁵ To lëë rnee to: “Len stapraa mëë csilo gac wlaap.” iPer golwi lo grëtaa miech qui ganle, nac zho niina zig grë guielgon ne golle gliap! ³⁶ Gacxe waa, ib none tsie to tsielaap to, tsietop to zho, zeena yгаа zho tib guielmban ne gdzind dze lozh. Ni zigne razh zha ne rie wlaap, scaque zguizh Dios to tsietop to zho. iTi guielbley nrooba, zigtaa par zha ne rana, zigtagaa par zha ne rlaapa! ³⁷ Ible nli diidz ne znu rnee: “Zhaa zha ne rie gon, stible zha ne rie wlaap.” ³⁸ Zig nac niina, laa naa rxel to tsielaap to zaatne ni tib xtsiin to psëebde to; zhaa zha ne güey gon, na tole tsie wlaap.

³⁹ Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuane ziyun me, bliladz zho Jesús. ⁴⁰ Laa zeene blanso zho ga, bnab zho lo me cuëz me ladz zho zhis. Dzigo nacne blëz me lo zho chop ngbidz. ⁴¹ Nzianraa grë miech co bliladz me, zeene bin zho grë zhiwseed me.

⁴² —Nasi nagon laa no riladz me —rnee zho lo wnaa co—, sac nozhal bdzion me, ni bdzion no grë mine rnee me. Nliw, ible me nac men ne ziaadsilaa grëse miech lo xtol zho.

Biac xpëed tib zha ne quia dziin lo rey

⁴³ Zeene goc chop ngbidz co, laa no brieë ga gza no me, laa no bdzio nëz stib zio no nëz Galilé. ⁴⁴ Niicle ne bzeetle me: grëse zha ne ziadteed xtiidz Dios, ib randzed miech zho zaatne nac ladz zho; per ⁴⁵ zeene bzëeb me grë guiedz ne ngab Galilé, wen pcaania grë miech co me. Nzian zho güey lni Pascw co Jerusalén, gon zho grëtaa milagr ne been me ga.

⁴⁶ Nëz no no bdzin no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëëtaque len dze co rzacné xpëed me.

⁴⁷ Bin me laa Jesús brieë xtan men Judé, laa me no gdzin Galilé. Dzigo biaad me biaddzieelo me Jesús ga, bnab me lo Jesús tsienal Jesús zhits me Capernaum, tsiegun guiac Jesús xpëed me; sac nzho rac win. ⁴⁸ Dzigo rëbchaa Jesús lo me:

—iPe haxta gan to dzigo gun naa milagr, dzigoraa gliladz to naa?

⁴⁹ —Been tib guielnzaac gotsaa guioniob ne —rëb men co—, nend znuse lozh xpëed naa.

⁵⁰ Rëbchaa Jesús:

—Bzë, tsod luu guielnë. iLaa xpëed luu biacle!

Dib zdoo men co bliladz me xtiidz Jesús, laa me bio nëz laa me zey. ⁵¹ Zhilew gdzin me lidz me, zeene bdzieelo me bla zha ne quia xtsiin me, rëb zho laa xpëed me biacle. ⁵² Dzigo bnabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brieë zhixlëë win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

⁵⁴ Ga goc brop milagr ne been Jesús lo zha Galilé. Min co been me zeene wbire me nëz Judé.

5

Biac tib men ne gacd grial

¹ Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxiił, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian men rzacnë, no zho rołd lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no len pil co, ⁴ sac nac diidz poc poc riet tib xanj] Dios riesini lo nis co, dzigo zha ne znuse sëeb lo nis co, tel pe guielguuidztaa rzac zho, riac zho].

⁵ Ga nix tib mgui, gocle galptsiipton iz rzacnë me. ⁶ Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—¿Pe racladz luu guiaac luu?

⁷ —Racladz naa —rëb me—, per guiend cho csëeb naa len pil qui zeene laa lo nis rni. Zeene racladz naa sëeb naa, zhaale stib zha ne glo rzëeb.

⁸ Dzigo rëbchaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

⁹ Zigne sca rëb Jesús, laa men co biac. Horcogazh blis me yag co, nzëni me laa me brieeg ga.

Ni ne dze co nac tib dze nda lo zha Israel, ¹⁰ zeene gon zho ney me yag ne bzhoob me, rëbchaa zho lo me:

—¡Pe riend luu nda nadze! ¡Lëda i gon squi yquianlan luu ncuaan qui dze rii!

¹¹ Pquiab me rëb me:

—Men ne beenguiac naa, mezhala në lo naa, güey naaw.

¹² —¿Cho men sca në lo luu? —rëb zho.

¹³ Niicle me riendaque dien chow, sac ndaldox miech ne ndxie ga; hor co laa Jesús bzëeble lad grë miech co. ¹⁴ Haxta len yadooraa bdziel Jesús me, dzigo rëbchaa Jesús lo me:

—Nana gon ne squi laa luu biacle, bien gunctaldraa luu xtol luu. Sac telne gond luu diidz, nend dzigole glaan luu tib guielguidz ne mazdraa ntseeb.

¹⁵ Zeene laa me brieeg ga, güey me lo zha ne rnabey lo zha Israel ga, rëb me lo zho Jesús nac men ne beenguiac me. ¹⁶ Nacne psilo zho quianał zho dien zha gnaaz zho Jesús pe nacne runguiac me miech dze nda. ¹⁷ Blisqui zhow lo me, dzigo rëbchaa me:

—Tel Pxoz naa gzataa dze quiayun me dziin; ni mincoque nac mine quiayun naa.

¹⁸ Zeene gon zho sca rëb me, mazdraa blëe zho lo me rzac zho tebaa zha gutgazh zho me. Rlëe zho, sac zienald me dien pa dze nda; mazdraa zeene rëb me Dios nac Pxoz me, sac ga rlu me ne lalga nac me con Dios.

Men nroob nac Xpëed Dios

¹⁹ Ni rëb me:

—Gneli naa lo to ganle: peet grielod gun Xpëed Dios lega guicse me, sinque ncuane ran me run Pxoz me, min co run me. ²⁰ Nquialadzdox Dios me, grëtaa dziin ne run Dios rlu Diosa lo me; game zun me milagr nroob ne mazdraa gzee zdo to; ncuane palalse i gon to niina ne biac men qui.

²¹ Sac telne gacladz me cueeban me tib menkut, zbeeban me zho, zigne rbeebanaque Pxoz me menkut. ²² Ni bzo Dios me, me gun guielwxtis, ²³ zeena grëse miech guien ganle zigne nonaque Pxoz me, scaque men non nac me, ni sca none gunnon zho me. Sac tel zha ne gunnond me, yele Pxoz me ga (men pxeel me) runnond zho.

Ni rëb me:

24 —Gneli naa lo to ganle: Zha ne gliladz xtidz naa, ni gliladz zho men ne pxeel naa, laa zho bgaale tib guielmban ne gdzind dze lozh. Led yedraa zho yгаа guielnēdox ne yгаа grēraa miech ntseeb; sac laa zho brieele ladznia guielgut ga, bdziñ zho lo guielmban co. 25 Zdziñ dze zeene ye grē mengut, zon zho xtiidz Xpēēd Dios; ni grēse zha ne gzoobdiaga, zban zho. ꞑNi lēē dze co bdziñ niina! 26 Sac gon, zigne rdeed Dios guielmban lo miech, saque zrieelo gded naa guielmban lo miech. 27 Ni bzo me naa, naa guñ guielwxtis, gded naa miñe tsieguial tib tib miech.

28 ꞑGzeed zdoo to! Sac ne nligaa, zdziñ dze, grēse mengut ne no len baa, laa zho grieeban 29 zeene gon zho tsi naa. Grēse zha ne ndzinli wban, hor co laa zho yгаа tib guielmban ndzon; sangue zha ne been guielntseeb, hor co laa zho guey lo guielnēdox ne rieguial zho.

30 Per grieelod guñ naa guielwxtis naase, ib none gacnañ Pxoꝝ naaw. Grēse guielwxtis ne guñ naa, laaw guñ naa zigne gnabey Pxoꝝ naa, laaw guñ naa zigne nonguiela, sac gon guñd naa miñe guiaabtaa guic naa, sinque laa naa guñ miñe racladz Pxoꝝ naa.

31 Telne niaca miñe naase rne cho nac naa, zrieequia zha ne guiab nlida. 32 Per na, no stib men ne rzeet naa lo miech; ni nan naa diidzli rnee me. 33 Haxta Juan Bautist, zeene pxeel to bla zha ne güeynabdiidz lo me, grēse miñe rēb me lo zho ga, diidzliw. 34 Laa naa rzet miñ rii lo to, zeena gliladz to cho nac naa, zeena sca laa to lo xtoꝝ to; sac rquiindpaa dien cho miech guidzliu rii gnee cho nac naa. 35 Zeene biaad Juan, goc me zig tib biini bziini me lo to palal dze zeena guñbey to naa; ni bley to pquiaadiag to miñe bnee me. 36 Nli bnee me cho nac naa; per grē milagr ne run naa miñ co quiaxobnenraa ganle cho nac naa. Pxoꝝ naa rneedz diidz run naaw; ni ga rlu ganle ne me pxeel naa. 37 Haxta ye me mezhal quialu ganle cho nac naa, parga nli gard gan to me, niicle gard gon to tsi me. 38 Ronde to pe rnee me, sac rliladzde to naa; sac gon me pxeel naa zialne naa xtiidz me.

39 Nli rioxco to rseed to grē guits ne ziaad Xtiidz me, sac rien to ga ziaad dien zha yгаа to guielmban ne gdzind dze lozh. Ni niicle ne lo co zhubnee ganle cho nac naa, 40 per nēde to gbig to lo naa, zeena yгаа to guielmban co. 41 Nēde to guñbey to naa, nēde to guien to cho nac naa, per peet nacd miñ co; 42 runbey naa to, ni lalnu rleyniede to Dios. 43 Sac gon, me pxeel naa zial naa lo to, ni rlēē to ran to naa; mazd zha ne lega ziaadse, zha cosi lēēlēd rcaania to zho. 44 ꞑMiñ co gon, ib rliladzde to cho nac naa! Sac laa guic to zienie loxaque dien zha guñnon samiech to to, ib rguibde to zha gacnon to lo Dios. 45 Ni guiabde to togo naapaa gazo to lo Pxoꝝ naa, glisqui naa grē ncuaane run to. Moisés gon nac men ne glisquiw; sac ley ne psan me, miñe rnalo to csilaa to lo xtoꝝ to, lēew glu ganle pe nac grētaa ncuaane quiayun to. 46 Sac gon, telne niaca miñe nlipaa rliladz to grē miñe pquiaa Moisés, zliiladz to dzigo cho nac naa; golgan ganle, lo grē guits ne pquiaa me, ga rzeet me naa. 47 Rlu rliladzde to grē miñe pquiaa Moisés ga, gane rliladzde to miñe rne naa lo to.

6

*Row gaay mil miech
(Mt. 14:13-21; Mr. 6:30-44; Lc. 9:10-17)*

1 Bded ga, tib dzew brieē Jesús bdedquia me nēz dan ro Nisdoo Galilē (lēēque nisdoo co ga rnee zho Nisdoo Tiberias).

² Miech guizhiu ne brieenaḷ zhiṣ me, sac ziyaṅ zho grēṯaa milagr ne ruṅ me, ruṅguiac me grē meṅ rzacnē. ³⁻⁴ Nzian zho nac zha ne zie lni Pascw, lni nroob ne rac Jerusalēn gʒobse iz.

Grēse no ne nac no xpēēdsuel me, laa no naḷ zhiṣ me. Zeene bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grē no me, ⁵ zeene bdzion no miech guizhiu ne ziaadquia cho gui co, laa zho glansole lo no ga. Dzigo rēbchaa me lo Lip:

—Lip, ¿pa guioziu ne ncuane gow grēṯaa miech qui?

⁶ Per lega scase rēb me lo Lip, par diēṅ pe guiab Lip; sac naṅle me pe nac ncuane guṅ me.

⁷ —jNe nligaa pe zhidaa zho! —rēb Lip—. Niicle telne niaca miṅe gziuu nzian gayoo guietxtil, ni ygaad ncuanaṅ cō yгаа zho tiblē wingaw tib tib zho.

⁸ Dzigo pquiab Ndrēs, bets Pedr, stib zha ne nacgza no; rēb Ndrēs:

⁹ —Nu zo tib mēēdbgui win ney gaay guietxtil cebad ni schop mel win. ¿Per pa yгаа ncuanaṅ co lo grēṯaa miech qui?

¹⁰ —Golnee lo zho diēṅ —nē me lo no—. Golguiab lo zho sob zho.

Ndzon zēēb guizh nguia ga, dzigo laa grē miech guizhiu co bzob lo guizh nguia co (zig gaay mil rgaa loxaque zha bguise). ¹¹ Dzigo bnaaz me gza guietxtil co, bdeed me xquizh lo Dios. Blozhse ga, zigse rneedz mew lo no scase scase rguiz now lo grē miech co; scaque been me grop mel co. jGrēse miech co, dow zho zaatne bieltaa zho! ¹² Blozhse dow zho, nēchaa me lo no: —jGoltsetop grēse miṅe bianaṅ i, zeena nitloda!

¹³ Psilo no ptop no grē guietxtil ne bianaṅ ga, zeene blozh bdopa, jlo gaay guietxtil cebad co, biodzē tsiipchop chicuid biow!

¹⁴ Zeene gon grē miech co milagr ro ne been Jesús ga, rneechaa zho:

—jNe nlipagaa, lēē meṅ qui ga quiambiaaz ne! jMe nac Meṅ ne zēēble diidz ga cxeel Dios lo guidzliu guiadteed xtiidz me!

¹⁵ Biēṅa Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

Rzē Jesús lo nis

(Mt. 14:22-27; Mr. 6:45-52)

¹⁶ Rguetsle liuw, bzhiuxto no dan bdziṅ no ro nisdoo co; ga bliiaz no me.

¹⁷ Bdzionse no choot rlansod ni laa liu rcowraa, dzigo mazd laa no bziaab leṅ canó, laa no zio nēz Capernaum.

¹⁸ Laa no zionie canó co lo nis, tibaque zeene psilo rriee me, ntseeb riasoli lo nis co. ¹⁹ Maase gaay kilómetro o xoopgaaw goc zio no, tibaque zeene bdzion no laa me ziaad-zē lo nis co, gaxle lo no ga. Zeene bdzion no sca ziaad-zē me lo nis, bdzieeb no. ²⁰ Dzigo bnee me, nē me lo no: —jGdziebde to! jNaa zial nu!

²¹ Dzigoraa rley no bdzion no laa me bzēēb leṅ barcw; tibaque zeene bien no laa no brieequiale zaatne no gdziṅ no ga.

²² Biini liu co, grē miech ne bianaṅ stib nēz ro nis co, laa zho bdziṅ zaatne nac ro nis ga, quiambēz zho gaṅ zho me. Sac gon zho tibaque barcw zo ga, ni zeene wbiṅ no ga, loxaque nose wbiṅ. ²³ Gax zaatne bguiaaṅ me zho ga, ga bdziṅ bla barcw ne ziaad nēz Tiberias; ²⁴ dzigo gonse zho niicle me niicle no ne nac no xpēēdsuel me, choot guieṅd ga, nacne bzēēbaque zho leṅ barcw ne bdziṅ ga ziaad zho nēz Capernaum.

Jesús nac meṅ ne rdeed guieḷmban

²⁵ Zeene blanso zho Capernaum, laa Jesús zole lo no ga; dzigo rēbchaa zho lo me:

—Maestro, ¿pa horzhe waa blanso luu nu?

²⁶ Dzigo rëbcha me:

—¿Naa lëë ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaañe pquiin to. ²⁷ ¡Golguien, tsienied guic to loxaque ncuaañe gowse to, sac znuse rnitlo grë ncuaañ co! Sinque, goltsoxco golgun miñe racladz Dios, zeena ygaa to tib guielmban ne ib gdzind dze lozh. Ni naa ne nac naa Mgui ne pxeel me, naa gneedz guielmban co lo to; sac ible miñ co pxeel me naa.

²⁸ Dzigo bñabdiidz zho lo me, rëb zho:

—¿Zha dzigo dziuun no miñe racladz Dios? ¿Pe nac ncuaañe dziuun no?

²⁹ Pquiab me rëb me:

—Miñe racladz Dios gun to: gliladz to cho nac men ne pxeel me.

³⁰ —Telne scaw —rëb zho—, none dzianlo no gun luu nzian milagr, zeena gliladz no luu. ¡Nligaa peet milagr nroob gard dzian no gun luu! ³¹ Tel grë pxozgol ne, zeene wban zho grë dan bidz co padzeela, gzobse dze biet tiblo quietxtil zhan gbaa, dow zho; rnee lo Xtiidz Dios: “Moisés rdeed quietxtil co lo zho.”

³² Pquiab me rëb me:

—Golgacnan ganle led Moisésd bdeed quietxtil co, sinque Pxoz naaw. Ni niina gon laa me quianeedz merpaa quietxtil gbaa lo to. ³³ Sac gon, me pxeel men ne biet gbaa ziaddeed guielmban lo grë miech rii; men co nac quietxtil gbaa co.

³⁴ —Been tib guielnzaac sca —rëb zho—, ¡gzataa dze bneedz quietxtil co diow no!

³⁵ Pquiab me rëb me:

—Naa gon nac quietxtil ne rdeed guielmban ga. Grëse zha ne gbig lo naa sëëb zho xnëz naa, gdzindraa dze ne ycaabedz zho; grëse zha ne gliladz cho nac naa, gdzindraa dze ne gnab zhis zho. ³⁶ Laa to gon, zigne bnelegaa naa lo to ga, jniicle ran to naa, per riladzde to cho nac naa! ³⁷ Grëse zha ne rxeel Pxoz naa, rlanso lo naa; ni tib zho ctsireed naa. ³⁸ Sac gon, laa naa bieet gbaa zialgun naa miñe racladz Pxoz naa (men ne pxeel naa); bieete naa par gun naa miñe gacladztaa naa. ³⁹ Ni miñe racladz me, grëse zha ne bneedz me lo naa, ni tib zho nitlo, sinque cueeban naa zho gal dze ne laa guidzliu nitlo. ⁴⁰ Sac racladz me: grëse zha ne gbig lo naa ni gliladz zho naa dib zdoos zho, grëse zho ygaa tib guielmban ne ib gdzind dze lozh, ni cueeban naa zho gal dze ne nitlo guidzliu.

⁴¹ Dzigo psilo grë zha Israel rneenë zho me, loxaque ne rëb me, me nac quietxtil ne biet gbaa; ⁴² rnee zho:

—Men rii ga name rnee zho Jesús, me nac xingan José. Rdziuunbey ne xniaa me, rdziuunbey ne pxoz me. ¿Zha nac dzigo ne rnee me gbaa biet me?

⁴³ Dzigo rëbcha me lo zho:

—Lëëwga na, golsioog ro to. Nodne squitaa gzee zdoos to miñ co. ⁴⁴ Laa Pxoz naa pxeel naa zial naa lo guidzliu, per ni tib miech gon grielod gbig lo naa telne niaca miñe cuedzd me zho; ni zig rnele naa ga, zha ne gbig, naa cueeban zho gal dze ne laa guidzliu nitlo. ⁴⁵ Znu rnee lo Xtiidz Dios, zaatne pquiiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëë miñ co rac niina; gacxe nagon waa, grëse zha ne rquiaadiag miñe rnee Pxoz naa ni rseed zhow, grëse zha co lo naa rlanso zho. ⁴⁶ Zha ne rlanso lo naa, guiabde to togo gonlo zho me; ni tib choot gard gan me, naase nac men ne zian me, sac zaatne no me ga brie naa zial naa lo to. ⁴⁷ Golliladz miñe gni naa lo to nu sca: ¡Grëse zha ne dib zdoos zho gliladz zho cho nac naa, zgaa zho

tib guielmban ne gdzindraa dze lozh! ⁴⁸ Ne nligaa naa nac guietxtil ne rdeed guielmban ga. ⁴⁹ Grë pxozgol to, zeene sca bio zho grë dan bidz co, nli dow zho guietxtil ne biet gbaa ga, per bdeetew guielmban lo zho, sac grëse zho gut. ⁵⁰ Sangue guietxtil ne rne naa lo to, gbaa bieta ni grëse zha ne yquiina zгаа zho tib guielmban ne gdzind dze lozh. ⁵¹ Xcuerp naa nac guietxtil ne biet gbaa, miñe rdeed guielmban ga; grëse zha ne gow guietxtil co, zгаа zho tib guielmban ne gdzind dze lozh. Lëew gded naa zeena grieelo yгаа grëse miech lo guidzliu rii stib guielmban.

⁵² Psilo grë zha Israel co stib, quianeelsa zho, rnee zho:

—¿Zha nacne squi rnee meñ qui? ¡Zootne rnee me none dioow ne xcuerp me!

⁵³ —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co. ⁵⁴ Sangue zha ne gow xcuerp naa, ni guie zho xchen naa, ib zгаа zho guielmban ndzon ne gdzind dze lozh ga, ni naa cueeban zho gal dze ne laa guidzliu nitlo; ⁵⁵ sac xcuerp naa nac miñe mazdraa rquiin gow miech, ni xchen naa nac miñe mazdraa rquiin guie zho. ⁵⁶ Grëse zha ne row xcuerp naa, ni rie zho xchen naa, mbannie zho naa, niiclegaa naaw mbannie naa zho. ⁵⁷ Meñ mban nac Pxoz naa, meñ ne pxeel naa, me nac meñ rneedz guielmban lo naa; ni scaqueгаа zha ne gow xcuerp naa, naa gded guielmban lo zho. ⁵⁸ Naa nac guietxtil ne nlipaa biet gbaa. Grëse zha ne gow guietxtil rii, zгаа zho guielmban; led yed zho guet zig gut grë pxozgol to, zha ne sca dow guietxtil co.

⁵⁹ Lëew grë miñ rii bnee Jesús zeene pseed me miech leñ yadoo win ne zob Capernaum.

Diidz ne rdeed guielmban

⁶⁰ Nzian grë zha ne rzënie Jesús, zeene bin zho grë miñe bnee me ga, rneechaa zho:

—Zha ngandoxtaa nac grë diidz ne rnee me i. ¡Cho gnë dien pe bnee me!

⁶¹ Bien Jesús sca nonee zho, dzigo rëbchaa me lo zho:

—¿Pe rlëe guic to bin to miñe rne naa ga? ⁶² ¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo? ⁶³ Espiritu Sant rneedz guielmban lo to, telne guiend espíritu peet nond xcuerp to, sac bëelse naca. Ni grë diidz ne bne naa lo to, lëew nac Espiritu, ni lëew gneedz tib guielmban ne gdzind dze lozh lo to; ⁶⁴ sinque to, bii no zla to riladz cho nac naa.

Sca rëb me sac desde psilo bzënie zho me, rienle me cho nac zha ne ib riladz me, ni cho nac zha ne tsieto me.

⁶⁵ —Runbey naa to —rëb me—, gane ni naa lo to ni tib miech grieelod gbig lo naa sëeb zho xnëz naa, telne niaca mine cuedzd Pxoz naa zho.

⁶⁶ Nzian zha ne rzënie me, hor co laa zho bzozit lo me, bzënedraa zho me.

⁶⁷ Dzigo bnee me lo no gza tsiipchop no ne nac no xpëedscuel me, nè me:

—To waa, ¿pe led yede to racladz gbiche lo naa?

⁶⁸ Pquiab Simón Pedr, rëb Simón:

—¿Per cho lora nadien guio no? Luuse nac meñ ne rseed miech diidz ndzon ne rdeed guielmban ne gdzind dze lozh. ⁶⁹ Laa no bliladzle cho nac luu, laa no gocndionle ne luu nac Meñ Ndzon ne pxeel Dios.

⁷⁰ —Nliw —rëb me—, ni naa bzooblo to gza tsiipchop to, per na gon laa tib to bzëeble xnëz mendox.

⁷¹ Zeene sca rëb me, lëew Judas ga bzeet me (zhin Simón Iscariot); sac ye Judas nacгаа no lo tsiipchop no ne bzooblo me ga, ni Judas nac zha ne güeyto me.

7

Rliladzd menlidz Jesús cho nac me

¹ Bded ga, loxaque grē guiedz ne ndxie xtan zha Galilé, gase rieted Jesús. Sac grē zha Israel ne no xtan zha Judé, zha ne rlëë lo me, racladz zho gut zho me. ² Laa zeene bdziñ dze ne ruñ zha Israel lni ne rzhixcuuaa zho grē yu guizh, ni rbëz zho leña; ³ rëbchaa zha bets me lo me:

—¿Pe nacne ib rrieded luu nu? Brieed zho, güey dib xtan zha Judé, zeena ye grē zha ne racnie luu ga gan grëtaa ncuuane ruñ luu. ⁴ Sac gon, zha ne racladz gunbeyraa miech zho, grë ncuuane rac zho, ruñd zhow ngeuets zhlian zigne ruñ luu. Rac luu name ruñ luu grē milagr nroob, beena zaatne gan nzian miecha.

⁵⁻⁶ Sca rnee zho lo me, sac niicle zha rliladzd cho nac me; dzigo rëbchaa me:

—Grielod ga naa niina, sac gard gdziñ dze co; zhaa nac to, zac tsie to zeene gacladztaa to. ⁷ Tel to, rlëënie miech to; sangue naa rlëënie zho naa, sac rne naa lo zho pe nac grē guieIntseeb ne ruñ zho. ⁸ Goltsie, tedse lni rii dzigo ga naa; sac gard gdziñ dze ne glu cho nac naa.

⁹ Dzigo laa me biaan ga. ¹⁰ Per loxaque brieed zho zie zho, yeque me brieed zho me; lëëraasi ngeuetsse bdziñ me.

¹¹ Grē zha Israel ne rlëë lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

¹² Grē zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.” ¹³ Per zhlianse rzodiidz zho rzeet zho me, sac rdzieb zho grē zha Israel ne rlëë lo me.

¹⁴ Goc chop tson ngbidz ne noyac lni, tibaque zeene laa me bzëëb len yadoo nroob ne zoblad guiedz ga, psilo me pseed me grē zha Israel ne no len yadoo ga. ¹⁵ Zeene gon zho zha rseed me, rzee zdoo zho rnee zho:

—¿Zha nac squitaa rac men qui, ni laa me pseete me grē zhiwseed yadoo?

¹⁶ Pquiab me rëb me:

—Led naad nobeebey grē mine quiaseed naa miech, sinque laa naa quiaseed zho mine rnabey men ne pxeel naa. ¹⁷ Telne yquiablazd to gun to mine rnabey me, ga guien to dien pe nli xtiidz Dios rseed naa miech, te mine riab guic naaw ye. ¹⁸ Sac grē zha ne rnee grē mine riab guicse zho, laa zho ruña zeena gacnziuu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, ruñd zho ne yquidie zho miech. ¹⁹ Laa Moisés psan ley lo to, per, ini tib to gon zienald mine rnabeya! ¿Pe nac dzigo racladz to gut to naa?

²⁰ Pquiab be grē miech co, rëb zho:

—iMendzable i gon noguitnie guic luu! ¿Chozhe racladz gut luu?

²¹ Rëbchaa me:

—Tib vult, loxaque gon to beenguiaac naa tib men rzacne dze ne rdziiladz to lo dziin, na grëga to squitaa rac lo naa. ²² Ni to gon, no hor par gon to mine rnabey ley ruñ to dziin dze co; zig nac zeene rio tib mëed bey (niicle ne rirole pxozgol to bey co, zeene laa ley biaan). ²³ iGase na ganle golwi! Rquia to rgo to tib mëed bey haxta dze ne rdziiladz to lo dziin, loxaque par quitsde to xley Moisés. ¿Pe nac dzigo ne rlëë to lo naa loxaque ne beenguiaac naa tib miech dze co? ²⁴ Golguien ganle, nonguield ne lega gdziibdoj to tib miech. Goltsioxco goltsiana min nac diidzli.

¿Cho nac Jesús?

²⁵ Blalaa men Jerusalén ndxie ga, dzigo psilo zho r nabdiidzlsa zho rnee zho:

—¿Pe led men riid ga zho scataa quiaguib zho gut zho? ²⁶ Pa zotaa me gon quianee me lo grè miech qui, ni choot peet rund me. ¿Pe goon bliladzle zhiwxtis ne naye ne me nac Men ne zèèble diidz ga guiaad lo guidzliu? ²⁷ Per gacda men qui. Tel men quiw, rdziuunbey ne me, ndion ne cho zha nac me; sangue Men ne zèèble diidz guiaad ga, zeene gal dze ne laa me guiaad, choot gacnand dien cho zha me.

²⁸ Bin Jesús sca nonee zho. Squi ndxie grè zha ne noquiaadiag zhiwseed me len yadoo ga, nguiedz bnee me rëbcha me:

—Ah, conque runbey to naa dzigo, jnañ to pa nöz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli. ²⁹ Sangue naa runbey naa me, sac lo me brie naa, me pxeel naa zial naa lo to.

³⁰ Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

³¹ Grè zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grètaa milagr nroob ne run me. ¡Tsodraa zha ne gun grètaa milagr ne run me!

³² Bin zha farisé nozeet grè miech co Jesús, dzigo bnediidzaque zho grè zho pxoz ne rnabey, pxeel zho bla zhaguuib zie zienaaz me. ³³ Bdziñ grè zhaguuib co, rëbcha me lo zho:

—¡Golxecw zniip! Zhile dze ne cuöz naa lo to; ib laa naa none gbiire guia naa lo men ne pxeel naa. ³⁴ Zguib to naa, per gdzieldraa to naa, ni grielod gdziñ to zaatne guia naa.

³⁵ Grè zha ne ndxie ga, zeene bin zho sca rëb me, rzee zdoo zho.

—¿Pa naczhe zaatne tsie me? —rnee zho—. ¿Zha nacne ib gdziel ne me? Nend grè zha ladz ne tsieseed me, grè zha ne no stib ladz ben. ³⁶ ¿Zha nacne rnee me, zguib ne me per gdziel me lo ne, niicle grielodgaa guio ne zaatne guey me?

Nis ne rdeed guieImban

³⁷ Zeene gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grè miech co, rëb me:

—Grèse zha ne racladz guiaanwen zdoo, rzac zho zig nac zeene rnab zhis zho, guiaad zho lo naa, naa gded nis ne guie zho. ³⁸ Sac grèse zha ne dib zdoo gliladz cho nac naa, rnee lo Xtiidz Dios, masaque rriequia tib nis ndzon ne gdzib zdoo zho, pale tib guiubee nroob; nis co gdeed tib guieImban cub lo zho.

³⁹ Sca bzeet Jesús Espíritu Sant. Ga bzeet me, grèse zha ne gliladz cho nac me zanie Espíritu Sant zho. Gard guiaad Espíritu Sant len dze co, sac gard gbire Jesús lo guieIndzon ne no me gbaa hor co.

⁴⁰ Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lèè men qui ga no guiaad antes ne glanso Men ne nacle diidz cxeel Dios ga.

⁴¹ Rriequia zla zha ne rnee:

—¡Lèda! ¡Lèégazh me i! Men qui nac Men ne zèèble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. ¿Niacxe lo xtii grè zha co grieequia Men ne cxeel Dios ga? ⁴² Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

⁴³ Zhaase zhaase rnee zho; leḷ psilo zho nodiḷdiidz zho dien cho nac me.

⁴⁴ Brieequia bla zho gocladz naaz me, per ni tib zho wbigd nzhen zho me.

⁴⁵ Grè zhaguiib ne zienaaz me ga, scase zho laa zho bdziḷ. Zeene goḷ grè pxoz rnabey co, grè zha farisé co choot bdziḷnied zho, rëbchaa zho:

—¿Pe nac dzigo ne ziaadniede to me?

⁴⁶ Pquiab zho rëb zho:

—¡Wlaltaa gard dzian no tib meḷ ne scataa ndzon rnee!

⁴⁷ Rëbchaa zha farisé:

—¡Pe nlipaa rnee to! ¿Yelaque to dzigo beengüet me? ⁴⁸ ¿Pe rwide to, niicle zhiwxtis new, niicle now, ni tib choot riladzd ne me nac Meḷ ne zëëble diidz cxeel Dios ga? ⁴⁹ Grè zha nxen ne riladz ne nli Dios pxeel me, ¡miech ndziibdeele nac zho, sac goḷ rienḷd zho zha rnee lo ley!

⁵⁰ Ga zob Nicodem, meḷ ne güeyzodiidznie Jesús ga glo, ye me nacgza grè zha rnabey co, dzigo guso me bnee me lo zho, rëb me:

⁵¹ —Golguien ganle nonguielda ne lega pe gnee ne. Sac goḷ, zig nac xley ne, rnabeya none gacndiongazh ne zha nac xtiidz tib miech, dien pe nac miḷne quiaayun zho, dzigora gac guielwxtis.

⁵² Pquiab zho rëb zho:

—¿Zootne ye luu lëe nacgza grè zha Galilé ne rleyne me? ¡Grè zha ne cxeel Dios, ni tib zho grieequiad Galilé! ¡Luuzhal bguiba lo grè guits ne ziaad Xtiidz Dios ganle, zeena gliladz luu!

⁵³ Blozh ga, grëse zho laa zho wbi, tib tib zho zeysel zho lidz zho.

8

Tib wnaa ro nëz

¹ Ga briece Jesús güey me zaatne rnee zho Gui Oliv.

² Zeene biini liu co, silgaw laa me bdziḷ len yadoo co stib. Nzian miech ne goclo lo me ga, nacne bzob me psilo me pseed me zho. ³ Laa me noseed grè miech co, zeene bdziḷ bla maistr ley, ni zla zha farisé, bdziḷnie zho tib wnaa ne nole tsieel ni bgaanie me stib mgui; dzigo bzo zho wnaa co glowtaa lo grè miech ne ndxie ga.

⁴ —Maestro —rëb zho lo Jesús—, laa wnaa rii bгаа nonie me stib mgui. ⁵ ¿Pe gnë luu dien zha gac me? Sac zig nac ley ne psan Moisés, rnabeya gdeedquie no grè wnaa ne squi nac, haxta guet zho.

⁶ Sca rëb zho, sac laa zho quiaguib dien zha cxin me tib diidz, zeena sca grieeo tsiezo zho me lo wxtis. Per zeene bin me sca rëb zho pquiitsrunga me liu, psilo me con mzhugnia me noquiaa me lo liu.

⁷ Ran zho rquiabd me, wbiire zho bnaabdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëëraasi, zha ne rien ni tib doḷ rapd, zha co csilo gdeedquie me!

⁸ Blozh ga biire pquiitsrun me, psilo me stib noquiaa me lo liu. ⁹ Zeene bin zho sca rëb me, mazd miḷne been zho laa zho briece ga, sac bien zho miech ngoopdoḷ nac zho. Zha ne nacpaa zha gol lo zho bner; blozh ga zo to briece zho grè zho; loxaque wnaa cose biaan ga.

¹⁰ Dzigo bzoli me, rëb me lo wnaa co:

—¿Yo grè zha ne scataa biaad-zo luu nu? ¿Ni tib zho lëe beenquizhd luu xtoḷ luu?

¹¹ —Ni tib zho —rëb wnaa co.

—Niicle naa —rëb Jesús—, gunquizhd naa luu xtoḷ luu. Bzë, per bien gbiiiredraa luu gun luu grè ncuaaḷe gunctal xtoḷ luu.

Jesús nac zig tib biini

¹² Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho soriel ni lo ncow, sac naa gziini lo zho zeena ygaa zho tib guielmban ndzon.

¹³ Zeene bin zha farisé sca rëb me, psilo zho nguiedz roptsie zho rnee zho: —¿Cho gliladz xtiidz luu! ¿Lëëque luu rnee cho nac luu!

¹⁴ Pquiab me rëb me:

—Niicle ne naaque rne dien cho nac naa, per diidzli nac mine rne naa. Rien naa pa nëz zial naa, pa nëzga za naa; sangue to gon peet riende to, ¹⁵ gacxe waa, rcaadzdoł to naa ncuaañe ni nacd naa; ncuaañe rcaadzdoł to naa, niapse guic to riaba. Tel naa, zig nac niina noyund naa guielwxtis ¹⁶ per zeene gdziñ dze co, tib tib miech mine been zho miñ co glu dien pe nac mine tsieguial zho; sac Pxož naa men ne nacie naa, me gnë zha guñ naa guielwxtis. ¹⁷ ¿Pe nacie riladzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho. ¹⁸ Zig nac niina, naa nac tib zha ne rne cho nac naa, laa stib zho nac Pxož naa men ne pxeel naa; sac gon ye me rnee ganle cho nac naa.

¹⁹ Pquiab zho rëb zho:

—¿Yo Pxož luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Telne niaca mine runbey to naa, runbeyle to me na.

²⁰ Gax zaatne riesan miech gon len yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

Grieełod gdziñ to zaatne guia naa

²¹ Bded ga, biire Jesús rëb me:

—Laa naa guia nagon. Squiaguib to naa, per lëëque lo xtoł to i nitlo to, sac zaatne guia naa grieełod gdziñ to ga.

²² Grë zha Israel ne ndxie lo me ga, rneechaa zho:

—¿Pe goon lëëque me naye gut me? Zha nacie squi rnee me goon grieełod gdziñ ne zaatne guey me.

²³ —Tel to —rëb me—, zha nëz lo guidzliu nac to; laa naa gon zha nëz gbaa nac naa. Men guidzliu rii nac to, sangue naa nacd naa zha guidzliu rii. ²⁴ Gane ni naa lo to lëëque lo xtoł to i nitlo to. Ne nligaa, telne gliladzde to ne naa nac men ne nac naa, ible lëëque lo xtoł to nitlo to.

²⁵ —¿Cho dzigo nac luu? —rëb zho.

Rëbcha me:

—Blactaale rne naaw lo to. Haxta zeene psilo naa xtsin naa, laa naa rne lo to ganle cho nac naa. ²⁶ Ndal grë ncuaañe zac glisqui naa lo to nu niina, ni ndal ncuaañe racladz naa gne naa lo to, per laa naa noyund mine rnabeyse men ne pxeel naa; ni men co nac men ne rnee diidzli.

²⁷ Per ib riend zho ne Dios ga rzeet me lo zho. ²⁸ Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë mine quiayun naa; sinque mine pseed me naa, miñ co rne naa lo to. ²⁹ Dios pxeel naa ni tibaque nacie me naa, ib rsaand me naa, sac tibaque noxco naa run naa mine rdziladz me.

Zha ne nac xpëd Dios

³⁰ Grë zha Israel ne ndxie ga, zeene bin zho sca rëb me, bliladz zho ne me nac men ne no cxeel Dios ga. ³¹ Dzigo bnee me lo zho, rëb me:

—Telne racladz to gac to xpëëdscuel naa, zha ne nlipaa ygab xnëz naa, none guiaadnal to grëse zhiwseed naa. ³² Sac sca gunbey to mine nacpaa diidzli, ni lëew glu lo to zha laa to ne squi nac to zig tib ngundziin.

³³ Pquiab zho rëb zho:

—iNgundziin ye! iTel no, zha xtiipaa Abraham nac no, waltaa gard gac no ngundziin lo miech! iPe lo dzigo laa no, ne rnee luu laa xtiidz luu csilaa no?

³⁴ Dzigo rëbchaa me:

—Golquiaadiaga ganle: zha ne tibaque noyunctal xtol, rrieequiacxe waa tib ngundziin nac zho lo dol ga, sac lëëlew rnabey zho. ³⁵ Ni zha ne nac ngundziin lëe, zig run miech nëz ri, grielod xoon zho lo men ne rree zho; sangue zha ne nac mëed, choot lo ngadood zho. ³⁶ Gacxe waa, tel csilaa Xpëëd Dios to, dzigosi choot lo ngadoodraa to. ³⁷ Nli lo xtii Abraham ziaad to; per laa to quia gon quiauib to dien zha gut to naa, sac racladzde to yquiaadiag to zhiwseed naa. ³⁸ Laa naa rne grë mine blu Pxoza naa lo naa, zeene no naa lo me; sangue to gon, laa to zienal mine rnabey men ne nac pxoz to.

³⁹ Pquiab zho rëb zho:

—iNi Abraham gon nac pxoz no!

—iNlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me. ⁴⁰ Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. iTel Abraham led squid been Abraham! ⁴¹ Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—iLed-xe mëed ro nëzd no waa! Tibaque men ne nac pxoz no, ni lëe men co nac Dios.

⁴² Dzigo rëbchaa me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne pxeel naa. ⁴³ Ib rioguide to zha nac grë mine rne naa, ib riende tow, sacne ib nëde to yquiaadiag tow. ⁴⁴ Gulgacnañ sca ganle, lëe pxoz to ga gon nac mendox, lo ma ngab to, gacxe waa rdziladz to run to grë ncuaane run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nan ma zha nac diidzli. Ible lëe xtsiin ma ga nac guielwquidie, gacxe waa ma nac pxoz zha ne rquidie. ⁴⁵ iMin co nagon, niicle diidzli nac grë mine rne naa lo to, per ib riladzde tow! ⁴⁶ Ni tib to choot grielod gnë laa naa noquidie, sac niapse diidzli rne naa. iPe nac dzigo riladzde to mine rne naa? ⁴⁷ Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon led xnëzd me ngab to, gacxe waa nëde to yquiaadiag tow.

⁴⁸ Horco pquiab zho rëb zho lo me:

—iPsoog ro luu men Samar ngoopdo! iNlique mine rnee no ga nagon, ne mendox noguitnie luu!

⁴⁹ —Choot mendzab noguitnied naa —rëb Jesús—, sinque laa naa noxco xoobnen ganle pa lotaa men nroob nac Pxoza naa; laa to gon lel rsanwin to naa. ⁵⁰ Noguibd naa dien zha guiaanon naa, per Dios gon racladz me ne sca gaca; ni mesi nan me pe run me. ⁵¹ Gneli naa lo to ganle: iGrëse zha ne gzoob xtidz naa, gdziind dze ne guet zho!

⁵² Pquiab zho rëb zho:

—iPer nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. iZha nac dzigo rnee luu,

zha ne gzoob xtiidz luu, gdzind dze guet zho? ⁵³ ¿Pe mazdraa dzigo nac luu lo pxozgol ne Abraham, lo grêgaa zha ne biadteed xtiidz Dios ga? ¿Cho rzac luu nac luu?

⁵⁴ Rêbchaa me:

—Telne lèêque naa noyunnon naa, nlid mine rne naa dzigo. Per na gon, Pxoze naa, men ne nac Dios ne rnee to riladz to, me rlu ganle ne nli men non nac naa. ⁵⁵ Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, yelee naa ga dzigo noquidie zigne rquidie to. ⁵⁶ Pxoze to Abraham, bley me zeene gocnan me laa naa znu guial lo guidzliu rii. Ni zeene bdeed Dios diidz gon me naa, mazdraa bley me.

⁵⁷ Zeene bin zho sca rêb me, rêbchaa zho:

—¿Gon luu Abraham ye? ¡Ni chooptsiiz iz name rapd luu! ¡Zha dzigo gon luu Abraham!

⁵⁸ —Gnel naa lo to ganle —rêb me—, notaque naa; nolee naa zeene gol Abraham.

⁵⁹ Horco ptop zho quie laa zho gdeedquie me, per znuse bded me lad zho brie me len yadoo, gondraa zho me.

9

Biac tib mgui ne rold lo

¹ Zieded Jesús tib lugar co, gon me tib mgui ne rcow lo, scale nac lo men co zeene gol me. ² Dzigo bnabdiidz xpèédscuel Jesús rêb zho:

—Maestro, ¿bay zha nacne squi golnie men qui guieñe qui? ¿Pe no pe xtol mew, te xtol xmengol mew ye?

³ —Lêda —rêb Jesús—, led por xtold zhow; sinque squi gol me, zeena zeene laa me guiac, ga gan miech ganle zha nactaa grê ncuane run Dios. ⁴ Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grielodraa gun dziin. ⁵ Laga bii no naa lo guidzliu rii, naa nac zig tib biini ne rziini lo grê miech rii.

⁶ Blozhse sca bnee me, ptsuc me lo liu, bzhixcuua me niip ben, dzigo bdëeb mew zhits guidlo mgui ne rcow lo ga; ⁷ blozh ga, rêbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbiere laa me ranle.

⁸ Grê zha ne no gax zaatne no me, ni grê zha ne runbey me; zeene gon zho me, rneechaa zho:

—¿Mgui rii ga lèê rzob gdib i rnab gon?

⁹ No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhâl rêb lo zho:

—Naaw, naa nac mgui co.

¹⁰ Dzigo bnabdiidz zho zha biac lo me. Rêbchaa me:

¹¹ —Men ne rnee zho lê Jesús, men co bzhixcuua niip ben dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbiere laa lo naa biacle.

¹² —¿Yo men co niina na? —rêb zho.

—Dieenda —rêb me—, nand naa dien yo me.

¹³ Dzigo güey zho güeynie zho me lo grê zha ne nac zha farisé; ¹⁴ sac lèetse dze ne rdziiladz zho lo dziin, lèetse dze co sca beenguiac Jesús lo me.

¹⁵ Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëëb Jesús niip beñ lo me, blozh ga güeytiib me lo me, zeene laa me wbiire laaw biacle.

¹⁶ Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrieelo gun me grë milagr qui? Zhaase zhaase rnee zho.

¹⁷ Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac men ne beenguiac lo luu ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

¹⁸ Per ib rliladz grë zha wxtis co ne biac lo me, sac rliladz zho ne rold lo me glo; dzigo bnabey zho gocredz pxoz me, gocredz xniaa me. ¹⁹ Bdzin grop mengol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

²⁰ —Nli xpëed no nac me —rëb grop mengol co—. Ni nli rold lo me zeene gol me; ²¹ per ndiond no dien zha biaca ne laa me ran niina, niicle ndiondgaa no dien pe no cho beenguiaca. Benque zha gol-le nac me, mazd lo me golnabdiidz, mezhal gnë dien zha biac lo me.

²²⁻²³ Sca rëb grop mengol co, sac rdzieb zho grieve zho xyadoo zho. Biaanle grë zha rnabey co diidz: zha ne guiab Jesús nac Men ne zëëble diidz ga cxeel Dios lo guidzliu; csaandraa zho sëëb zho yadoo.

²⁴ Wbiire zho bredz zho men ne biac lo ga, rëb zho:

—Bien ganle Dios zobwi, bnë diidzli lo no; sac tel no ndion no cholze miech ngoopdol nac men co.

²⁵ —Dieenda —rëb me—. Nand naa dien pe miech ngoopdol nac me, te men wena ye. Per me gon beenguiac lo naa, sac rold lo naa glo.

²⁶ Dzigo biire zho bnabdiidz zho stib dien zha beenguiac Jesús lo me.

²⁷ Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëëb xnëz me?

²⁸ Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, min co zional no. ²⁹ Sac tel Moisés, ndion no nli Dios pxeel Moisés, per mgui co ni ndiond no dien pa brie me.

³⁰ Pquiab me rëb me:

—iNcuuane gzeegaa zdoon ne i runbeydaque to cho nac me, ni ron to me beenguiac lo naa! ³¹ Ndion ne ganle rquiaadiagd Dios xtiidz cholze miech ngoopdol, sinque laa me rquiaadiagd xtiidz zha ne rien ne nli men nroob nac me, ni run zho mine rnabey me. ³² Stiba, wlaltaa gard dzion ne cho zha beenguiac lo tib miech ne znu gol rold lo. ³³ Telne niaca mine nacdied Dios men co, nriee lod me niunguiac me lo naa.

³⁴ —iPsiog ro luu! —rëb zho lo me—. jib racladz no guiaad tib ngoopdol nu guiadseed no!

Horco wbig zho, blee zho me ga.

Zha ne rold lo

³⁵ Bin Jesús sca blee zho me ga, dzigo zeene bdzieel Jesús me, rëbchaa Jesús lo me:

—¿Pe rililadz luu meṅ ne nac Xpëéd Dios?

³⁶ Pquiab me rëb me:

—Bzhiguiel bnë lo naa diēṅ cho nac meṅ co, zeena gililadz naa me.

³⁷ —Goṅle luu me —rëb Jesús—. Naa goṅ nac meṅ co, lëë me nu nozodiznie luu niina.

³⁸ Dzigo pquitsgzhìb me lo Jesús, ni rëb me:

—Dib zdoó naa rililadz naa ne nli Xpëéd Dios nac luu.

³⁹ Blozh ga rëbchaa Jesús:

—Laa naa zial lo guidzliu rii, zeena glu diēṅ cho rap doḷ, diēṅ chogaa rapd doḷ; sac zha ne rzac miech peet riēṅ, laa zho tsaab biini; laa zha ne rzoob zho niini, laa xquielrien zho ycow, guiaaṅ zho zig tib zha ne roḷd lo.

⁴⁰ Blalaa zha farisé zo ga, zeene bin zho sca rëb me, rëbchaa zho lo me:

—¿Rzë diidz qui na lëë ye lo no roḷd?

⁴¹ Dzigo pquiab me rëb me lo zho:

—Tel niaca miṅe nlipaa zha ne roḷd lo nac to, grielod gni naa rap to doḷ. Per na, ne masaque rzac to rraa lo to, gane grëse ncuanea quiayun to xtol to noyaca, to zëëba.

10

Mëcwxiił ni zha ne rquianap ma

¹ Ni rëb Jesús:

—Gołquiaadiaga gaṅle: grëse zha rded stib nëz zeene rzëëb zho leṅ lidz mëcwxiił, laa ne ted zho nëz ro puert, gase rlu ngbaan ga nac zho; ² sac tel meṅ ne noyaṅ maw, nëz ro puert nëz co rzëëb me. ³ Zha ne rquianap ro lidz ma, ga rxal zho rded me; niicle magaaw, zeene ron ma tsi me, grëse ma rdziṅ lo me; dzigo rbedz me ma, rneelë me ma tib tib ma, laa me rbee ma ga. ⁴ Rlozhse rbee me grë ma ne nac xma me, laa me rner lo ma; grëse ma laa ma rnał zhits me sacne runbey ma tsi me. ⁵ Rienald ma zhits stib miech, zeene raṅ ma zho znuse rzhooṅ ma; sac runbeyd ma tsi zho.

⁶ Grë zha ne ndxie lo me ga, ib biēṅd zho zha nac godiidz co; ⁷ dzigo wbiire me bnëe me lo zho, rëb me:

—Gołquiaadiaga gaṅle: Naa goṅ nac zig ro Puert, zaatne rded mëcwxiił ga.

⁸ Grëse zha ne biaad glo rnee zho zha nac Meṅ ne nacle diidz cxeel Dios ga, grëse zha co ngbaan ga nac zho, loxaque psacsi zho par grielo cuan zho; ni grëse mëcwxiił ne nacpaa xpëcwxiił naa, güeynałd ma zhits zho. ⁹ Sangua naa, laa naa nile lo to gaṅle: Naa nac zig ro Puert, zaatne rded mëcwxiił ga. Grëse zha ne gbig lo naa, zlaa zho, peet lo tsoxtseebdraa zho; pale grë mëcwxiił ne zozëëb zoriee ro lidz, ni rdziel ma guizh nguia, guizh ndzon row ma. ¹⁰ Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena ygaa to tib guielmban ne mazdraa ndzon, tib guielmban ne gdziṅd dze lozh.

¹¹ Naa nac Baxtor ne nquialadzpaā xpëcwxiił. Sac zha ne nquialadzpaā xpëcwxiił, rquiad zdoó zho xquielmban zho, rsilaa zho ma lo guielxtseeb ne notaa ma. ¹² Per tel noyac-wree zha ne noyaṅ ma, rquiad zdoó zho ma, zigne raṅ zho palo ziaad tib coyot ntseeb, ndxieque mëcwxiił ga laa zho rzhooṅ; sac led cheṅd zho ma, led zhad nac xbaxtor ma. Zeene rdziṅ coyot, nëzrii nëzrec rtsieets coyot ma, nogaa ma rgaa lo coyot. ¹³ Rzhooṅ zho, sac dimise nonie guic zho, peet liaadz nod zho ma. ¹⁴⁻¹⁵ Naa nac Baxtor ne nquialadz xpëcwxiił. Zigne runbey Pxož naa naa ni runbey naa me, sca runbey naa grëse xpëcwxiił naa, niicle magaaw runbey ma naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

¹⁶ No spalal xpēcwxiiil naa, ma ne ngabd leñ corral rii; grēse ma co, ible zon ma tsi naa sac laa naa no gaxi ma, zeena tipse gac ma grē ma yquianaap naa ma.

¹⁷ Men ne nac PxoZ naa, rleynie me naa sac laa naa rbeeladz xquieľmban naa; per ible zriebaan naa. ¹⁸ Naazhal rbeeladz xquieľmban naa, choot grieelod lega ctiche xquieľmban naa. Rap naa poder gded naa xquieľmban naa, ni rap naa poder gbire gban naa stib. Dios bneedz diidzbey co lo naa.

¹⁹ Grē zha Israel ne ndxie ga, zeene bin zho sca rnee me, laa zho goc chop dii stib. ²⁰ No zho rnee:

—Yase mendox noguitnie guic men qui, o rzhinlegaa guic me. ¿Pe nacne rquiaadiag to xtiidz me?

²¹ Rquiab stib zho rnee:

—Niini rzē xtiidz men qui, led squid rac zha ne noguitnie mendox. Stiba, ¿niacxe zrieelo mendox gunguiac ma tib lo zha ne roľd lo?

Rnee Jesús Xpēed Dios nac me

²² Leñ mēe ne rac naľa, leñ dze co noyac tib lni Jerusalén, lni ne ruñ zho rsoladz zho dze ne glopaa psilo quiaquini yadoo. Ye Jesús bdziñ Jerusalén leñ dze co. ²³ Laa me zieded tib leñ nsaap ne quia cho yadoo co, nsaap ne rnee zho zhiNsaap rey Salomón; ²⁴ zeene wbig bla zha ne rnabey Israel, bnabdiidz zho lo me rēb zho:

—¿Poc dzigo gdziñ dze ne gnē luu diidzli lo no? Teľne nli luu nac Men ne zēēble diidz ga cxeel Dios guiaad lo guidzliu, niinagazh bnēw lo no.

²⁵ Pquiab Jesús rēb me:

—Blactaale zine naaw lo to, per rililadzde tow. Stiba, pe zhidaa milagr ne ziyañ to ruñ naa, gase rlu ganle cho nac naa; sac Dios men ne nac PxoZ naa, men co racniēn naa ruñ naaw. ²⁶ Ib rililadzde tow, sacne led yede to ngab lo naa. ²⁷ Teľ zha ne ngab lo naaw, ruñbey zho naa; niicle naagaaw ruñbey naa zho, ni zhits naa rzēnal zho. ²⁸ Grēse zho, rded naa tib guieľmban ne gdziñ dze lozh lo zho, ni gdziñ dze nitlo zho. Choot grieelod ctiche zho lo naa, ²⁹ sac men nroob nac PxoZ naa men ne pxeel zho lo naa; choot grieelod cuee zho ladznia me. ³⁰ Ni tibaque nac no grop no me.

³¹ Zeene bin grē zha rnabey co sca rēb me, psilo zho ptop zho quie nan zho ngoquie zho me. ³² Dzigo rēbchaa me lo zho:

—Lo grētaa milagr ne quiaayacniēn PxoZ naa quiaayun naa lo to. Golñē dien, ¿pa miñ rlisqui to ne laa to racladz gneedzquie to naa?

³³ Pquiab zho rēb zho:

—¿Coquiedaxe no luu waa por grē milagr ne ruñ luu, sinque laa no coquie luu por grē diidz ne rnee luu i, quiaquie luu Dios! ¿Tib miech beñse name nac luu, ni rnee luu laa luu nac Dios!

³⁴ Dzigo rēbchaa me lo zho:

—¿Lo xlibr ley to name zhubnee zha rzac Dios zha ne pcaania xtiidz me, rēb me dios nac zho! ³⁵ Ni ndion ne ganle, grēse miñe rnee lo Xtiidz Dios, diidzliw; gacxe waa teľ sca rēb me lo zha ne pcaania xtiidz me ga, ³⁶ ¿niacxe rguitnie naa me ga, zeene rne naa Xpēed me nac naa, ni mezhal bzooblo naa pxeel me naa lo guidzliu rii? ³⁷ Teľne rund naa milagr ne rlu Dios pxeel naa, ib gliladzde to naa. ³⁸ Per teľne ran to rlu ne me nacnie naa, maase gliladzde to naa totsaque golliladz ne me nacnie naa; tsow guien to ganle ne tibaque nac no grop no me, zigtā nacnie me naa, sacque nacnie naa me.

³⁹ Horco gocladz zho stib naaz zho me, per znuse brieē me nia zho. ⁴⁰ Dzigo brieē me ga güey me ro guiubee Jordán, zaatne bio Juan pchoobnis Juan miech; ga blēz me palal dze. ⁴¹ Nzian miech ne güey lo me ga, rnee zho:

—Nli beend Juan ni tib milagr nroob, per grëse minë bnee me zeene bzeet me men rii, zigne bneese me laaw norieequia niina.

⁴² Nzian grë miech ne güeyquiaadiag zhiwseed me ga, dib zdoos zho biladz zho ne me nac Men ne zëeble diidz ga cxeel Dios.

11

Gut Lazh

¹ Len dze co blanguidz tib mgui ne no guiedz Betain, lë Lazh; no chop bzian Lazh tib zho lë Mart stib zho lë Marí. ² (Lëë Marí rii pchoob tiblo nceit nex ni Jesús, ni pcuiidz mew con guitsguic me.) ³ Dzigo pxeel grop wnaa co diidz lo Jesús, gacnan me laa Lazh rzacné, sac nan zho rleyniedox me Lazh.

⁴ Zeene blanso diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.

⁵ Zigtaa Maríw, zigtaa Marta, zigtagaa Lazha, nquialadz Jesús zho gza zho, ⁶ per ib biobladz me; lel blëz me schop ngbidz zaatne no me ga. ⁷ Dzigoraa në me lo no:

—Laa ne guio nëz xtan men Judé stib.

⁸ Dzigo rdzieets no:

—Maestro, ;racladz luu tsie luu nëz co stib ye? Pense name goc bla ngbidz ga gocladz zho ngoquie zho luu ga.

⁹ Nëchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne; ¹⁰ loxaque pcow liu, noxtseeb pa griel ni ne; sac ncow rna.

¹¹ Blozh ga në me:

—Laa xamigw ne Lazh nixguesle, per na laa ne guio zeena gabee naa zhimcaalo me.

¹²⁻¹³ Tibaque ndion no nli nixgues Lazh, dzigo rdzieets no lo me:

—Telne raaguesle me, zac-wen me sca.

Ib biend no ne gutle Lazh, gane sca rnee me. ¹⁴ Dzigoraa clar bnee me lo no, në me:

—Laa Lazh gutle. ¹⁵ Ni rley naa gon ne guiend naa ga dze co, zeena sca grielo lozh gliladz to ganle cho nac naa. Golgotsaa guio ne nëz lo me ga niina sca.

¹⁶ Laa Mazh, zha ne rnee zho “Mëedgrop”, zeene bin Mazh sca në me, rneechaa Mazh lo no:

—Guiend rson, golgotsaa choob zdoos ne guional ne zhits me dien. Tel gut zho me, maase gut zho ne.

Jesús rbeeban ni me rdeed guielmban

¹⁷⁻¹⁹ Gax Jerusalén riaan Betain. Zha ne rriee Jerusalén, maase groh hor run zho nëz rdziñ zho Betain. Nzian grë zha Jerusalén rdziñ riequiaabdiuzh zho Marí grop Mart, riechoobladz zho zdoos me lo xquienë me ga.

Dze ne rac tap ngbidz bioliu Lazh, dzigoraa laa Jesús bdziñ.

²⁰ Gon Mart pa lo ziaad Jesús, dzigo brieë me biaad-xinëz me Jesús; laa Marí biaan ro yu.

²¹ —Jesús —rëb Mart—, telne niaca minë nu no luu segur niete bzian naa; ²² sac nan naa, grëtaa ncuaañe rnab luu lo Dios, run me minë rnab luu.

²³ —Peet tsienied guic luu —rëb Jesús—, ible zrieeban bzian luu.

²⁴ Pquiab Mart, rëb Mart:

—Nliw, nanpaa naa ible zrieeban me gal dze ne laa guidzliu rii nitlo, zeene grëse mengut, laa zho grieeban.

²⁵ Dzigo rëb Jesús:

—Naa nac men ne rbeeban grë mengut, ni naa nac men ne rdeed guielmban lo grë miech. Grëse zha ne dib zdoo gliladz naa, niicle guet zho zig ret grëraa miech rii, zdziñ dze ne gban zho stib. ²⁶ Sac grëse zha ne dib zdoo rliladz naa, laa zho bgaale tib guielmban ndzon ga, guiaand zho ladznia guielgut. ¿Led rliladz luu lëë Mart, ne sca gaca?

²⁷ —Rliladz naaw —rëb Mart—. Rliladz naa ne luu nac men ne bzooblo Dios ga, luu nac Xpëed Dios, Men ne zëëble diidz ga cxeel me guiaad lo guidzliu.

²⁸ Blozhse ga, wbiere Mart zie Mart zietsedz Mart Marí. Bdziñ Mart zhlianse bredz Mart Marí (sac nzian zha ne ndxie ga ziequiaabdiuzh Marí) rëb Mart:

—Niinapaale blanso Maestro, na laa me rbeedz luu.

²⁹ Zigne bin Marí sca rëb Mart, brieer nguzhooñ Marí laa Marí zie nëz co. ³⁰ (Bdziñ Marí, laa Jesús bii zo zaatne güeydzieel Mart me ga; gase blëz me, bzëëbd me lad guied.) ³¹ Grë men Israel, zha ne ndxie lidz Marí ga ziechoobladz zdoo me, zeene gon zho sca lëëlëd brieer me, nalaque zho zhits me; sac nan zho bod ro xpaabzian me ziegoon me.

³² Zigne bdziñ me zaatne zo Jesús ga, pquiitsgzhib me lo Jesús.

—Jesús, luu ne nac luu men ne rnabey —rëb me—, telne niaca mine nu no luu zeene blanguidz bzian naa, niete me.

³³ Psilo Marí roon Marí. Zeene gon Jesús, niicle Maríw, niicle grë zha Israel ne bdziñ ga, mban rac zho, grëse zho roon, dzigo ye me biab guielnë me.

³⁴ Bnabdiidz me rëb me:

—¿Pa lo pqueets to me?

—Dë ganle —rëb zho—, zeena gan luu pa lo bgueets me.

³⁵ Horco psilo Jesús biin me. ³⁶ Grë zha Israel co, zeene gon zho roon me, rneechaa zho:

—¡Golwi ganle, blactaa nquialadz me Lazh!

³⁷ Laa zla zho rnee:

—Led me name beenguiac lo mgui ne rold lo ga, ¿pe nriee lod zha niun me, zeena niete Lazh?

Brieer Lazh

³⁸ Zeene laa Jesús bdziñ ro baan Lazh, biire biab guielnë me.

Zig nac tib bliee niaa baa co; rna tib quie nroob ntse zaatne rsëeb zho ngutoo; ³⁹ dzigo bnabey Jesús cob zho quie co.

Pquiab Mart, bzian ngutoo co rëb me:

—¡Mazd gdiobda! ¡Nadze rac tap ngbidz gut me, mbanle na rlaa me!

⁴⁰ Dzigo rëbchaa Jesús:

—Led laa naa nile lo luu, telne dib zdoo luu rliladz luu naa, bii zan luu ganle zha nactaa grë ncuaañe ndzon ne run Dios.

⁴¹ Zeene blozh bdoob zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoz naa, xquizh xquielnzaac luu sac rquiaadiag luu mine rne naa. ⁴² Nan naa tibaque rquiaadiag luu mine rnee naa, per laa naa rzeta niina, zeena grëse miech ne ndxie nu gliladz zho ganle ne nli luu pxeel naa.

⁴³ Dzigo nguiedz bredz me, rëb me:

—¡Lazh, brieer i!

⁴⁴ Zigne sca bnee me, laa ngutoo co brieeg ga, scase nriēl lar dib nia me, dib ni me ne, ni nioog stib lē lar lo me. Dzigo rēb Jesús:
—¡Golxadz grē lar ne nriēl me i, zeēna guey me!

Rguib zho dien zha yгаа Jesús
(Mt. 26:1-5; Mr. 14:1-2; Lc. 22:1-2)

⁴⁵ Grē meñ Israel ne güeynał zhits Marí ga, zeēne goñ zho sca bleeban Jesús Lazh, nzian zho bliladz ne nli Dios pxeēl me. ⁴⁶ Nogaa zho leł güey zho güeyzodiidz zho lo grē zha farisé zha bleeban me Lazh. ⁴⁷ Horco lēēlēd pcaalsa grē pxoz ne rnabey, ni grē zha farisé, rēb zho:

—¿Pe gnē to dien zha gaca? ¿Zha dziuun ne mgui ne rnee zho Jesús ga, sac goñ pe zhidaa milagr ne quiayun me? ⁴⁸ Tełne squise csaan ne me, mbe grēse miech seēb xnēz me; lozh ga, zeēne gacnañ meñ rnabey ne zob Romaw, laa me cxeēl grē xmeñguiib me guiaadnitlo zho xyadoo ne, guiaadnitlo zho ladz ne.

⁴⁹ Dzigo pquiab Caifás, meñ ne nac pxoz nroob leñ iz co, rēb me lo zho:
—¡Ni lal nu lēē peet riēde to! ⁵⁰ ¿Pe riēde to mazd wena yгаа tib zha guet zho, zha quizh par gdib guiedz, lēdle grēse zha ladz ne nitlo?

⁵¹ Zeēne sca rēb Caifás meñ ne nac pxoz nroob ga, ga bzeet me ible no guet Jesús par csilaa me grēse miech lo dol; per led guic me biaba, sinque Dios psiaaba guic me. Ga goquiet ne laa Jesús guet, par csilaa me grēse zha Israel, ⁵² ni grēragaa zha ne no dipse lo guidzliu, zeēna tipse gac grēse zha ne nac xpēēd Dios.

⁵³ Dzigo grēse zha ne nac wxtis ga, laa zho biaan diidz ne ible no yгаа Jesús gut zho me. ⁵⁴ Nacne briedraa Jesús ne neñlo niañ zho me; dzigo mazd laa me brieenie no xtan zha Judé, güeynie me no zaatne wzhi no miech, bdziñ no tib guiedz win lē Efraim, ga bliaaz no grē no me.

⁵⁵ Leñ ngbidz co, ziaadyob lni Pascw. Nzian grē miech ne no grē guiedzlas ne ndxie dib ga, laa zho rsilo quiariee zie zho nēz Jerusalén; sac ansraa csilo Pascw nzian zho rie yadoo ruñ zho grēse mine rnabey ley par guiaanmbe zho lo xtoł zho. ⁵⁶ Grēse zha ne rdziñ, leñ yadoo no zho rnabdiidzlsa zho dien pe zdziñ Jesús lo lni; sac grēse zho racladz gañ me.

⁵⁷ Laa grē pxoz ne rnabey, ni grē zha farisé, laa zho bnabeyle, zha ne ganťaa Jesús, tsienie zho diidz parne tsie zha ne tsienaaz me.

12

Pchoob tib wnaa nceit nex guic Jesús
(Mt. 26:6-13; Mr. 14:3-9)

¹ Sxoop ngbidz gdziñ dze lni Pascwa, güey Jesús guiedz Betain, zaatne no Lazh, meñ ne bleeban me ga. ² Sac grēse meñlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuaañe gowxtsee zho lo mezh, ³ tibaque zeēne bzēēb Marí bzēēbnie Marí tib lo nceit nex ne rriee guiee ne lē nard, tib lo nceit niazha, rgaaw maase groł boté. Zigne bdziñ Marí bdēēb Marí nceit co ni Jesús, blozh ga con guitsguic Marí pcuiidz Marí ni me. Dipse leñ yu zēbılaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeēne goñ Judas sca bdēēb Marí nceit co ni Jesús, rneechaa Judas:

⁵ —Mazd tebaa zha ndo nceit qui. Nguizhpaaz zhow maase tson gayoo pes plat, dzigo needz zho dimi co ngaaza lo grē zha mban ne guiēd pe yquiiñ.

⁶ Sca rnee Judas, per nlid ne rquia zdoo Judas zha ne guiend pe yquini, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse racló dimi len bziuud co, zhlianse rbee Judas dimi co.

⁷ Dzigo rëbchaa Jesús:

—Psaan me. Ib laa me bdëeb nceit qui ni naa, zeena nzhixcuaale xcuerp naa gal dze ne laa naa ygueets. ⁸ Telne racladz to gun to xyudar zha ne guiend pe yquini, tibaque ranlsa to grë to zho, zac tsow ygad to lo zho; sangue naa dzin dze gandraa to naa.

⁹ Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men ne bleeban me ga.

¹⁰ Zeene gon grë pxoz rnabey cow, nacne bnediidaque zho ye Lazh none gut zho; ¹¹ sac por Lazh, nzian grë zha non, laa zho rbig nëz lo Jesús, laa zho riladz ne nli me nac Men ne zëeble diidz ga cxeel Dios.

Bzëeb Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Biini liu co, dipse lad guiedz Jerusalén zhoob diidz laa Jesús gdzin ga dze co. Grë miech guizhiu ne bdzin ga zie lni Pascw, ¹³ psilo zho brie zho ziaadinëz zho me; tib tib zho nzhense zho tib lë zin. Lo guielebley co, zeene gon zho me, psilo zho nguiedz roptsie zho, rnee zho:

—jZha men nroobtaa nac Dios! jZha ndzontaa men rii pxeel Dios ziaad lo ne! jLëe men rii gnabey Israel!

¹⁴ Laa Jesús, zobse me lad tib burr yeen, zigne raquiet lo Xtiidz Dios zaatne rnee:

¹⁵ Grëse to men Israel, gdziebde to.

jGolwi ganle, laa men ne rnabey ladz to ziaad i, zobse me lad tib burr yeen!

¹⁶ Grëse no ne nac no xpëedscuel me, ni tib no biend hor co ne grëse ncuane noyac ga, raquietlew lo Xtiidz Dios; sinque haxta zeyle me gbaa, dzigora psoladz no nzian grë ncuane raquiet lo Xtiidz Dios ga, gonlo no goca; ni bien no Jesús raquiet ga.

¹⁷ Lad grë miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grë miech co. ¹⁸ Ni nzian grë miech co, laa zho blanso ga ziaad-xinëz zho me, sac bin zho zha been me milagr nroob co.

¹⁹ Grë zha farisé, zeene gon zho grë miech guizhiu co, rneechaa zho:

—jPe zhidaa grë miech qui racnie men qui! jPeraa nadien dziiuun ne!

Rguib bla zha Gres Jesús

²⁰ Lad grë miech ne bdzin Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, ²¹ dzigo bnee zho lo Lip (zha Betsaid nac Lip) rëb zho:

—Bzhiguiel bnë dien pa lo no Jesús, laa no racladz dzian no me.

²² Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

²³ Dzigo rëbchaa me lo zho:

—Naa ne nac naa Mgui ne pxeel Dios, niinataa nagon laa dze bdzin zeene laa naa gbire guia gbaa stib. ²⁴ Golquiaadiaga ganle: Tib zhobxtil, telne tsoda liu tibaque zhub naca; per zeene laa zhub co rio liu, nzian raca. Scaque naa nagon, none guet naa, none tsoliu naa, zeena ganczian zha ne ygab xnëz naa.

²⁵ Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zгаа zho tib guielmban ndzon ne ib gdzin dze lozh.

26 Zha ne racladz sëëb xnëz naa, none guñ zho miñe rnabey naa; ni zaatne gdziñ naa yeque zho no gdziñ ga. Ni grëse zha ne sëëb xnëz naa ni gon zho xtidz naa, zunnon Pxo z naa zho. 27 Mban rac zdoo naa niina. Per lëda ga guñ naa, telne guiep naa lo Pxo z naa csilaa me zho lo grëtaa guieñe ne no teed naa. ¡Sac par miñcopaa zial naa lo guidzliu rii!

28 'Dios, luu ne nac luu Pxo z naa —rëb me—. Blu lo grë miech rii ganle ne men nroob nac luu.

Dzigo bin zho zëëb tib tsi men co gbaa, rëb me:

—Laaw blule naa, ni niina laa naa gbire gluw stib.

29 Nzian grë miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanj! Dios ga gon bnee lo me.

30 Dzigo rëbcha me lo zho:

—Laa to bin ganle laa Pxo z naa bnee, ni por to gon bnee me, zeena gon to tsi me ni giladz to ne me pxeel naa. 31 Laa dze nagon bdziñ zeene laa Dios gunquizh naa xtol grëse miech guidzliu rii; lëe dze bdziñ zeene laa mendox piche gnabeydraa ma lo guidzliu rii zigne rnabey ma niina. 32 Sac zeene laa naa quia glaa lo cruz, ga cuedz naa grëse miech zeena sëëb zho xnëz naa.

33 Ga bzeet me zha gut miech me. 34 Grë miech ne ndxie ga, zeene bin zho sca rëb me, rëbcha zho:

—¿Guet luu ye? Lo Xtiidz Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

35 Dzigo pquiab me rëb me lo zho:

—Naa nac zig tib biini ne noziini lo miech; ni ngabse dze ne cuëz naa lo to. Laga noziini naa lo to, golsëni zaatne riab biini zeena ygaade to guiecow; sac zha ne rzë lo ncow riend zho palo zie zho. 36 Niina ne rdeeda diidz golliladz cho nac naa, zeena gac to zha ne nlipaa no lo biini.

Blozhse sca rëb me laa me biche ga, blulodraa me lo zho. 37 Niicle gonlo zho nzian milagr ne been me, per ib rliladzd zho ne nli Dios pxeel me. 38 Ni ib scalegaa no gaca, sac ga brieequia miñe bzeet Isá (tib men ne biadteed xtiidz Dios) zeene znu rëb me:

Dios, bui ganle ni tib choot nëd giladz xtiidz luu, niicle ran zho grëtaa milagr ne ran luu.

39 Ni nligaa ib brielod nliladz zho me; sac zeene pquiaa Isá, znu rëb me:

40 Ncaw psan Dios lo zho, ni been dip me zdoo zho;

zeena gand zho me, niicle guieñd gaa zho zha gbig zho lo me csilaa me zho lo xtol zho.

41 Zeene znu bnee Isá, ible Jesús ga bzeet me; sac gon me grëtaa guieñdzon ne rap Jesús. 42 Ndal zho sca ib bliladzd me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel me, per ib pxobneñd zhow; sac rdzieb zho cuee zha farisé zho yadoo. 43 ¡Ni stiba rdziladzraa zho guiaañon zho lo miech, laa ne guiaañon zho lo Dios!

44 Len dze co, tib vuelnt nguiedz bnee Jesús, rëb me:

—¡Grëse zha ne rliladz naa, yele Pxo z naa ga rliladz zho! 45 ¡Ni zeene rwi zho lo naa, yele men ne pxeel naa ga ran zho! 46 Naa nac zig tib biini ne rziini lo miech, ni grëse zha ne dib zdoo giladz cho nac naa, zriee zho lo guiecow ne no zho. 47 Grëse zha ne gon Xtidz naa, ni gband zho zigne rnabeya, led naad gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol. 48 Xtidz naa gac ley ne gunquizh zhow; zigtaa zhaw zigtagaa grë zha ne nëd gunbey naa, grë zha ne nëd yquiaadiag xtidz naa. 49 Sac grëse ncuaane pseed naa miech, led guicd naa biaba, sinque Pxo z

naa men ne pxeel naa, men co rnabey naa pe nac mine cseed naa zho. ⁵⁰ Ni nanpaa naa, grëse diidz ne rnabey PxoZ naa naa rne naa, lëew rlu zha yгаа miech tib guielmban ndzon ne gdziñd dze lozh; gacxe waa, grëse mine rnabey me gne naa, zigne racladz me scase rne naaw lo to.

13

Rguiib Jesús ni xpëëdsuel me

¹ Guieel ne rsilo lni Pascw; wdze co pcaalsanie Jesús no grëse no ne nac no xpëëdsuel me, laa no nodiowxtsee. Rienle me ne gataa laa dze co bdziñ, zeene laa me gbi lo guidzliu rii gbire me lo PxoZ me stib. Grëse zha ne ngab lo me, rleynie me zho; ne nligaa rleynie me zho haxta bdeed me xquielmban me psilaa me zho. ²⁻⁴ Rien me grëtaa ncuaaane no, ladznia me psañ PxoZ mew; lo PxoZ me brieë me ziaad me lo guidzliu, ni lo PxoZ me gdziñ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziñleñ me tib lë lar nool. Par hor co, laa mendox pquiiil-le Judas, zhin Simón Iscariot, parne tsieto Judas me. ⁵ Dzigo blaaf me nis tib len bandej laa me psilo noguiib me ni grë zha ne nacgza no, zigse rlozh rguiib me ni tib zho scase scase rcuuidz mew con lar ne ndxie len me ga. ⁶ Zeene laa me zie quiiib me ni Simón Pedr, rëbchaa Simón lo me:

—jLëda i gon! jPe nacne lelj luu quiiib ni naa?

⁷ Pquiab me rëb me:

—Griee lod guien luu niina, pe nacne quiiib naa ni luu; haxta tedraa nu dzigo ganle guien luuw.

⁸ —jNend scaw! —rëb Pedr—. jPer naasi gon gnedzd naa diidz quiiib luu ni naa!

Dzigo rëbchaa me:

—Griee lod sca ygab luu xnëz naa, telne siguield luu quiiib naa ni luu.

⁹ Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

¹⁰ Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rienle me cho tsieto me.

¹² Blozhse bdiib me ni no, wbiire wbix me xab co me, bzob me lo mezh; dzigo në me lo no:

—jPe bien to na pe nacne znu bdiib naa ni to? ¹³ Golwi ganle: To lëë, Maestro rnee to lo naa, ni rnee to naa nac men rnabey; ni nonguiela gon, sac ne nligaa scaw. ¹⁴ Golgan sca, niicle ne maistr naa, niicle ne naa nac men ne rnabey, per laa naa bdeed zig tib ngundziin win bdiib naa ni to. Nana sca, scaque gogac lo samiech to. ¹⁵ Laa naa blule lo to zha gun to, nana sca goltsenal min co. ¹⁶ Gneli naa lo to ganle, lo grë zha ne nac ngundziin, tsod zha ne nonraa lo zha ne rnabey zho; scaque grë zha ne rie mandad, tsod zha ne nonraa lo zha ne rxeel zho. ¹⁷ Laa to nanlew nasca. Gacxe waa, telne tsienal to wseed rii, zaacse gac lo xquielmban to.

¹⁸ Golquiaadiag ganle, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtuid Dios, rnewe: “Lëëque tib zha ne rownie naa, grieequia tsielo naa ladznia zha ne gut naa.” ¹⁹ Laaw rnegazh naa lo to niina, zeena zeene gaca, gililadz to ganle ne nli naa nac men ne rne naa nac naa. ²⁰ Ni golgona ganle,

grëse zha ne ycaania Espíritu Sant, men ne cxel naa, naale ga nocaania zho; ni zha ne rcaania naa, yele men ne pxeel naa ga rcaania zho.

Rëb Jesús ne Judas nac zha ne tsieto me

(Mt. 26:20-25; Mr. 14:17-21; Lc. 22:21-23)

²¹ Horco psilo rlupaa mban goc zdoo Jesús, dzigo bneeli me lo no në me: —Gneli naa lo to ganle, lëëque tib to gon tsielo naa ladznia zha ne gut naa.

²² Zeene bdzion no sca rnee me, psilo no rwilolsa no, riend no dien cho nac zha ne rzeet me ga.

²³ Cuepaa me, ga zoob naa (rleynie me naa niicle ne raguiald naaw);

²⁴ dzigo blunia Pedr lo naa, gnabdiidz naa lo me dien cho nac zha ne rzeet me ga. ²⁵ Nacne wbig gax naa, bnabdiidz naa lo me.

²⁶ Dzigo nëchaa me:

—Laa naa cobie tib lë guietxtil, ni lo zha ne gan luu gded naa guietxtil co, lëë zho ga.

Dzigo bzheñ me tib lë guietxtil, blozhse bloobie me guietxtil co, laa me bdeeda lo Judas. ²⁷ Zigne bnaaz Judas guietxtil co, laa mendox bzëëb zdoo Judas. Dzigo rëbchaa Jesús lo Judas:

—Mine no guic luu gun luu, na zeen nawdzegazh beëna.

²⁸⁻³⁰ Zigne blozh dow Judas guietxtil co, lëëled brieë Judas ley; pcowle liuw.

Lo grë no ne zioobnie no me lo mezh ga, ni tib no biend pe nacne sca rëb me lo Judas. No zho nan bod no pe ncuaañe rquiin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guiend pe yquiin; sac Judas nac zha ne ngotsow bziuid win ne no dimi.

³¹ Gonse Jesús laa Judas brieë ley, dzigo nëchaa me lo no:

—Niina nagon bdzin dze zeene glu ganle zha nroobtaa guieñdzon ne rap Mgui ne pxeel Dios, ni ga glu ganle pa lotaa nac guieñdzon ne rap Dios. ³² Ni scaque Dios, zlu me ganle pa lotaa nac guieñdzon ne rap Mgui ne pxeel me ga. ³³ Xin yeena, jzhile cuëz naa lo to nu! Squiguib to naa, per zigne rep naa lo grë zha Israel co, laaw rneque naa lo to niina: Grieelod sënal to zaatne ga naa. ³⁴ Gane laa naa rsan tib diidz cub rii, ni laa naa rnabey to gun tow: Tib tib to, golleynie zha ne nacgrë to, golgantsi zho. Zigne rleynie naa to, sca golleynie zho. ³⁵ Zeene gan miech, ne nligaa dib zdoo to rleynie to samiech to, dzigo zien zho xpëëdsuel naa nac to.

Ible ziab Pedr runbeyd Pedr Jesús

(Mt. 26:31-35; Mr. 14:27-31; Lc. 22:31-34)

³⁶ Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu?

Dzigo rëbchaa me:

—Zaatne ga naa, grieelod sënal luu niinagazh; per ib laa luu no guiaadnal.

³⁷ Pquiab Pedr, rëb Pedr:

—¿Per pe nacne grieelod sënal naa zhits luu niina? ¿Sënal naa zhits luu gon, niicxe maase gut zho naa waa!

³⁸ Dzigo rëbchaa me:

—¿Goon csaand luu naa ye Pedr, niicle gut zho luu? Nlid ga gon. Gneli naa lo luu ganle, zeene laa gall ycuedz tsonle vuelte rëb luu runbeyd luu naa.

14

Niapse por Jesús gdzin miech lo Dios

¹ Tsode to zhgab, tsode to guieñë. Tiblique golgun guic to, zigne dib zdoo to rililadz to Dios, scaque dib zdoo to golililadz cho nac naa. ² Golgona ganle:

Zaatne nac lidz Pxoꝝ naa, ndaldoo zaatne cuëz miech no ga, tel̄ niaca miñe guieñd zaatne cuëz to, nile naaw lo to na. Gacxe waa, niina laa naa ga, gazhixcuaa naa zaatne cuëz to ga. ³ Ni zeene lozh gzhixcuaa naa zaatne cuëz to, hor co laa naa gbire guial̄ stib, dzigosi laa to sēnal̄ zhits naa; zeena tibaque zaatne gbiaaz ne. ⁴ Laa to nan̄le nasca pa lo ga naa, ni nan̄legaa to nēz ne.

⁵ Pquiab Mazh rēb Mazh lo me:

—Maestro, pelel̄ nēz na gacndion̄ no, ni per ni zaatne tsie luu ndion̄d no.

⁶ Dzigo rēbchaa Jesús:

—Naa nac nēz co, naa rseed miech miñe nac diidzli, ni naa rded tib guieñmban ndzon ne ib gdziñd dze lozh. Lo grēse miech, zha ne gliladz cho nac naa, zha co gdziñ lo Pxoꝝ naa; guieñdraa stib mod ne gdziñ zho lo me.

⁷ Tel̄ne runbey to naa, dzigo runbeyaꝝ to Pxoꝝ naa. Ni runbeylegaa to me, sac tibaque ran̄ to me.

⁸ Dzigo rēbchaa Lip lo me:

—Bzhiguiel̄ mazd blu Pxoꝝ luu lo no. Totsaque dzian̄ no me, lēëlew ga dzigo.

⁹ Pquiab Jesús, rēb me:

—Blactaale dze ga name Lip no naa lo to, ni gardaque ye guñbey luu naa. ¿Grēse zha ne ran̄ naa, lēëque Pxoꝝ naa ga ran̄ zho! ¿Zha nac dzigo ne racladz luu glu naa me lo to? ¹⁰ ¿Niacxe rliladz luu dzigo ne tibaque nac no grop no Pxoꝝ naa? Grēse miñe rseed naa to, led guicd naa riaba; grēse ncuaañe run naa, me rnabeya, me ruña sac tibaque nac no grop no me. ¹¹ Golliladz sca ne tibaque nac no grop no Pxoꝝ naa. Tel̄ne goon̄ rliladzdgaa tow zigne rnee naa lo to nu, siquier lo grē dziin ne nodziuuñ no, ga golgan̄ gan̄le ne nli tibaque nac no grop no me.

¹² Ne nligaa, gneli naa lo to gan̄le: Grēse zha ne rliladz cho nac naa, ye zho zuñ zho grē milagr ne run̄ naa, ni haxta nroobraa ncuaañe guñ zho; sac tel̄ naa, laa naa no guia zaatne no Pxoꝝ naa. ¹³ Ncuaañe gnabtaa to lo Pxoꝝ naa, totsaque glu to ne nli rliladz to naa, zuñ naaw; zeena ga gan̄ miech gan̄le me nac meñ ne mazdraa nroob, me nac meñ ne mazdraa non. ¹⁴ Ne nligaa, tel̄ne rnalo to naa, ncuaañe gnabtaa to zuñ naaw.

Sxeel̄ Jesús Espiritu Sant

¹⁵ Tel̄ne nli rleynie to naa, golgun̄ grē miñe rnabey naa to sca. ¹⁶ Scagaa naa, laa naa gnab lo Pxoꝝ naa cxeel̄ me tib meñ ne tibaque gacniē to, tibaque cchoobladz zdoo to; ib gdziñd dze ne csaan me to. ¡Lēë meñ co ga nac Espiritu Sant, meñ ne rlu pa miñ nac diidzli; ni ible sxeel̄ Pxoꝝ naa me! ¹⁷ Zha ne ngabd xnēz naa, grieelod ycaania zho me, sac ran̄d zho me niicle runbeyd zho me; san̄gue to, runbey to me sac me quianap to niina, ni zbēzga me zdoo to.

¹⁸ Ib csaanladzd naa to, zbire naa guial̄ naa lo to stib. ¹⁹ Nli zhilew, zeene gandraa grē miech naa, san̄gue to goñ bii zan̄ to naa; sac zrieaban naa, ni scaquegaa to zgaa to tib guieñmban ndzon ne gdziñd dze lozh. ²⁰ Gal̄ dze co, zeene gan̄ to laa naa grieēban, ga gliladz to gan̄le ne nli tibaque nac no grop no Pxoꝝ naa, zigne tibaque nacie naa to ni naciegaa to naa. ²¹ Zha ne runbey zha nac grē miñe rnabey naa, ni rban zhow zigne naca, ga rlu ne nli rleynie zho naa; ni zigne rleynie zho naa, scaque Pxoꝝ naa zleynie me zho; niicle naagaaw zleynie naa zho, ni zlu naa lo zho gan̄le cho nac naa.

²² Dzigo pquiab Judas (zhaa Judas Iscariot), rēb Judas lo me:

—¿Pe nac waa lose no glu luu cho nac luu? ¿Tel̄zhe grēraa miech waa?

²³ Pquiab me rēb me:

—Zha ne run mine rnabey naa, lo zha co glu naa cho nac naa; sac rlu zho ne nli rleynie zho naa. Ni haxta ziaad no grop no Pxoꝝ naa gbannie no zho; sac zigne rleynie zho naa, scaque zleynie me zho. ²⁴ Saꝅgue zha ne rund mine rnabey naa, ¿zha dien glu naa lo zho cho nac naa? Sac rlu rleynie zho naa. Goꝅsoladz ganle: grēse diidz ne ron to rne naa, led guicd naa riaba, xtiidz Pxoꝝ naaw. ²⁵ Laa naa rne grē min rii, laga bii zo naa lo to nu, ²⁶ per zeene laa Pxoꝝ naa cxeel Espiritu Sant men ne guiaad cchoobladz zdoo to (men co guiaad xcuent naa), men co lozh cseed to, ni guꝅsoladz me to grēse mine bne naa lo to.

²⁷ Laa naa guia, per laa naa rsan tib guieꝅbley zdoo to, zeena zigne tibliladz rac zdoo naa, scaque tibliladz gac zdoo to. Sac guieꝅbley ne rnedz naa lo to nu, nacda zig nac guieꝅbley ne runbey grēraa miech guidzliu rii. Tsode to zhgab sca, niicle gdziebde to. ²⁸ Laa to binle ganle, laa naa no guia lo Pxoꝝ naa per zbire naa guial naa lo to stib. Telne nli rleynie to naa ine nley goꝅgac, niina ne ron to laa naa guia lo me, sac gon men nroobraa nac me lo naa. ²⁹ Laa naa rne grē min rii lo to niina, zeena zeene gaca, ga lozh guien to ganle cho nac naa.

³⁰ Led nroobdraa sodiidznie naa to, sac ile ziaad mendox, men ne rnabey lo guidzliu rii. Peet grielod gun mendox naa, ³¹ per ible none gon naa xtiidz Pxoꝝ naa men ne pxeel naa, zeena gan miech ganle ne nli rleynie naa me. ¡Goꝅtsieso nasca, zeena zio ne!

15

Jesús nac zig tib lbë uv

¹ Naa nac zig tib zhan lbë uv, laa to nac zhicwa, laa Pxoꝝ naa nac zig tib zha ne quianapa. ² Grēse zhicw lbë co mine rquiad nex lo, rchug mew; laa grē mine rquia nex lo, ine rsanmbe me low, rbelaan me low zeena yquiaraa nex low.

³ Zig nac to gon, laa Dios psanmbele to sacne zienal to grē xtidz naa mine pseed naa to. ⁴ Gbichede to lo naa sca, sinque tibaque goꝅgacnie naa zigne nacnie naa to. Goꝅgan ganle, zig nac tib zhicw lbë uv, peet nex grielod yquia low telne tibnëzle nixa; scaquegaa to nagon, grielod gun to grē ncuaaꝅe rdziladz naa, telne nacniede to naa. ⁵ Goꝅsoladz ganle: Naa nac zig nac lbë co, laa to nac zhicwa. Zha ne tibaque gacnie naa, grēse ncuaaꝅe gun zho zdziladz Diosa; ⁶ sac tel piche zho lo naa, laa zho nacle zig tib zhicw lbë co mine nixle tib nëz, laaw nixle ga, ga gbidza; lozh ga laaw tsec. ⁷ Telne tibaque gacnie to naa, ni tibaque tsoxco to grē mine pseed naa to, dzigosi ncuaaꝅe gacladztaa to goꝅnaba, ni scagaa scaania tow.

⁸ Gollu sca ne nli xpëedscuel naa nac to, goꝅsannon Pxoꝝ naa, niapse ncuaaꝅe rdziladz me min co goꝅgun.

⁹ Ne nligaa rleynie dox naa to. Goꝅwi ganle, zigne rleynie Pxoꝝ naa naa, scaque rleynie naa to. Goꝅguien sca tibaque goꝅgun mine rnabey naa. ¹⁰ Sac gon, zha ne gun mine rnabey naa, gzataa dze zleynie naa zho; sac sca rleynie Pxoꝝ naa naa ne run naa mine rnabey me. ¹¹ Laa naa rzet min rii lo to, zeena guiaad tib guieꝅbley zdoo to. Ne nligaa, zeena guiaad tib guieꝅbley nroob zdoo to; ni naa gnedz guieꝅbley co lo to.

¹² Laa naa rnabey to, laa naa rnab lo to: ¡Goꝅleynie samiech to, zigne rleynie naa to! Tel naa, goꝅguien ganle pa lotaa rleynie naa to, ¹³ sac led lega gdeedse tib zha xquieꝅmban zho par csilaa zho samiech zho, sinque ga rlu zho ganle pa lotaa rleynie zho zho.

¹⁴ Ni to gon, telne gon to gre mine rne naa lo to, dzigosi nli rleynie to naa. ¹⁵ Led yedraa niina nac to zig tib ngundziin, sac zha ne nac ngundziin nand zho pe run men ne rnabey zho. Ne nligaa rleynie naa to, sac grese mine rnabey Pxoza naa, grese zigne rnee me, laaw bzodiidzle naa lo to. ¹⁶ Golguien ganle, led tod gon bzooblo naa, sinque, jnaa bzooblo to! Ni laa naa bzooblo to zeena gon to niapse ncuuaane rdziladz Dios; dzigosi ncuuaane gnabtaa to lo Pxoza naa, ne nac to zha ne no xnöz naa, zneedz mew. ¹⁷ Laa naa rso diidz lo to: Golleynie samiech to. ¹⁸ Niicle rlée zho ran zho to, golsoladz ganle, desde naa squi rlée zho ran zho. ¹⁹ Rlée zho ran zho to, sac laa naa bleele to lad zho, zienaldraa to ncuuaane rleynie zho; laa telne nagon bii nac to zigne nac zho, dzigosi zéeb gleynie zho to. ²⁰ Golsoladz ganle, zeene znu ni naa lo to: iTsod ngundziin ne ndziibsrara non lo zha ne rnabey zho! Tel naa, pquiana! miech naa, ¿pe lel to dzigo gandze zho? Nana, zigne brieequiagaa palal zha ne bliladz xtudz naa, scaque zrieequia zha ne yquiaadiag mine gnee to.

²¹ Ible squiana! miech to ne nac to zha ne ngab xnöz naa, sac runbeyd zho Dios men ne pxeel naa. ²² Tel niaca mine niald naa, niicle ned naa lo zho, zac guiaa ne peet xtold zho, sac riend zho pe run zho. Per na gon, guiend pe yquiaaqui zho; sac bial naa bne naa lo zho. ²³ Zha ne rlée ran zho naa, yele Pxoza naa ga rléeenie zho. ²⁴ Ne nligaa telne niaca mine niana zho grétaa milagr nroob ne run naa, zac guiép naa peet xtold zho; per na gon, blactaa milagr ne gon zho ben naa, ni laa zho bii rlée ran zho no grop no Pxoza naa. ²⁵ I nagon norieequia mine raquiet lo Xtiidz Dios, zaatne znu rnee: "Peet guielntseeb quiaayund naa lo zho, per rléeenie zho naa."

²⁶ Laa naa nile lo to ganle, ible sxel naa Espiritu Sant gacnie to, niapse diidzli rnee me. Lo Pxoza naa griee me guiaad me, me cchoobladz zdo to, ni me gneedz guielbiini lo to lozh guiép to cho nac naa. ²⁷ Ni scagaa to, ye to laa to none sodiidz lo gréara miech gacnan zho cho nac naa; sac gon tibaque bzéne to naa desde ne psilo naa xtsin naa.

16

¹ Laa naa rne gre min rii lo to zeena peet tsienied guic to, tibaque dib zdo to gnalo to naa. ² Sac gon zunxoon zho to, zbee zho to yadoo; ni zdziñ dze haxta zut zho to, sac masaque sac zho lée mine racladz Dios ga noyun zho. ³ Laa zho gon gre min co, sac niicle Pxoza naaw, niiclegaa naaw, runbeyd zho no.

⁴ Laa naa rzodiidz gre min rii niina, zeena zeene gal dze ne laaw noyac, csoladz to ganle gresew bzodiidzle naaw lo to. Bzodiidz naaw lo to glo, sacne hor co laa naa bii zo lo to. ⁵ Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga. ⁶ Lée gdib mine run to, riab guielnē to ron to gre mine rne naa nu.

⁷ Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuéz naa nu, grieelod guiaad men ne guidchoobladz zdo to ga. Sangue telne guia naa, dzigo naazhal cxel me. ⁸ Ni zeene laa me guiaad, me gunquien miech ganle grese zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guiép zho ne ni zdziñ tib dze zeene laa Dios gun xquielwxtis me. ⁹ ¿Pe nacne nac zho miech ngoopdol? Miech ngoopdol nac zho, sacne riladz zho cho nac naa. ¹⁰ ¿Zha grieelo laa zho lo dol co guiaanwen zho lo Dios? Zrieelow, mincocxe waa nacne bial naa, ni na laa naa guia zaatne zob Pxoza naa, gandraa to naa. ¹¹ ¿Zha

rlu ne nli zun Dios guielwxtis? Nli zun mew, sac gon laa me bnabeyle zha nac grē guielnēdōx ne ygaa mēdōx, meṅ ne quianabey lo guidzliu rii.

¹² 'iNzianraa ncuaaṅe racladz naa sodiidz naa lo to! Per rien naa grielod tsoguc to zha naca niina. ¹³ Zeene guiaad Espiritu Sant, me gneedz guielbiini lo to guien to grēraa ncuaaṅe no gacnaṅ to, ni grēgaa ncuaaṅe naraa gac. Niapse dīdzli gnee me, sac led guicd me guiab grē mine gnee me, sinque miṅe nac xtiidz Pxoṅ naa, miṅ co gnee me. ¹⁴ Ga glu me lo miech gaṅle ne nli meṅ nroob, meṅ non nac naa. ¹⁵ Rne naa ga glu me, sac grētaa ncuaaṅe rnabey Pxoṅ naa, yeque naa rnabeya. ¹⁶ Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gaṅ naa stib.

¹⁷⁻¹⁸ Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dzianṅdraa ne me, per gacdaquew xtse laa ne dzianlaque lo me stib? Ni rneeque me laa me guey lo Pxoṅ me.

¹⁹ Bien me racladz no gnabdiidz no lo me, dzigo nē me lo no:

—¿Racladz to lēē gacnaṅ to zha nacne znu rne naa? ²⁰ Goḷquiaadiaga sca gaṅle: Zeene gdziṅ dze co, laga noyoon to no to guielnē ne laa naa biche lo to, laa grēraa miech haxta zley zho ne laa naa wbiche lo zho. Nli nroob guielnē ne tso to, per zeene laa to gaṅ naa stib, guielbley nroob ne tso to. ²¹ Nac cuent rii zig rzac tib meṅ wnaa ne ral xpēēd. Glo yoob ro, yoobdōx ne rquia me, per deque laa mēēd co ralse, ni rsoladzdraa me yoob co; sac mazdraa nroob nac guielbley ne rio me raṅ me laa xpēēd me blanso lo guidzliu. ²² Scadaa nagon rzac to, nli mban rac to niina, per zeene laa to gaṅ naa stib, dzigosi tib guielbley nroob ne tso to, ni choot grielod ctiche guielbley co lo to.

²³ Zeene gal dze co, yquiindraa to pe gnabdiidz to lo naa. Ncuaaṅe gnabtaa to, lo Pxoṅ naa gnab tow, ni zneedz mew, sac xnēz naa ngab to. ²⁴ Haxta lo nadze peet gard gnab to, niicle ne xnēz naa ngab to; laa niina laa naa rne lo to ncuaaṅe rquiin to goḷnaba lo me, ni ible zneedz mew gon. Nroob guielbley ne tso to hor co. ²⁵ Nzian grē ncuaaṅe zine naa lo to, rned naaw clar; per laa dze bdziṅ zeene grēse ncuaaṅe gne naa, clar gne naaw lo to, zig nac zeene gzet naa Pxoṅ naa. ²⁶ Ni zig nile naa ga, hor cosi ncuaaṅe gnabtaa to lo me, zneedz mew, sac xnēz naa ngab to. Yquiindpaa gne naa lo me gneedz me ncuaaṅe gnab to lo me, ²⁷ sac ye me rleynie me to. Rleynie me to, sac gon rleynie to naa ni riladz to ne nli lo me brie naa bial naa lo guidzliu. ²⁸ Ni nligaa, lo me brie naa bial naa lo guidzliu; ni niina ne laa naa gbi, loque me gdziṅ naa.

²⁹ Dzigo rdzieets no lo me:

—iNasi nagon rien no zha rnee luu! Sac clar rnee luu, rneedraa luu zigne rnee luu glo. ³⁰ Nasi rien no grēse ncuaaṅe naṅ luu, sac zig nac niina pquiindpaa nabdiidz no lo luu. Gacxe waa, nasi nagon riladz no ne nli lo Dios brieṅ luu.

³¹ Pquiab me, nē me:

—iWen ga telne riladz to niina cho nac naa! ³² Per lēē hor co nagon bdziṅ; ni niina, grēse to laa to csaan naa, tib tib to zhaase zhaase nēz ne xēṅ to. Per guiaaṅd naa loxaque naase, sac tibaque nacnie Pxoṅ naa naa. ³³ Grēse ncuaaṅe bne naa lo to nu, laaw bne naa zeena peet tsienied guic to, benque nanle to gaṅle tibaque nacnie naa to. Parga nli, laga no to lo guidzliu rii, nzian grē guielnē ne ted to, per gdziebde to; sac gon naa rnabey, ladznia naa no grētaa ncuaaṅe no lo guidzliu.

17

Rnab Jesús gacniën Dios xpëëdsuel me

¹ Blozhse sca në me lo no, blis lo me lui me nëz gbaa.

—Dios, luu ne nac luu Pxoza naa —rëb me—, niina nagon laa dze co bdziñ. Blu ganle men nroob nac naa ne nac naa Xpëed luu, zeena ga glu naa lo miech ganle pa lotaa men nroob nac luu. ² Zigne psan luu grëse miech ladznia naa, ni gdeed naa tib guielmban ndzon ne gdziñd dze lozh lo grëse zha ne bneedz luu ngab xnëz naa; scaque niina blu ganle men nroob nac naa. ³ Lëë guielmban co ygaa grëse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii. ⁴ Grëse ncuaañe bnabey luu naa, laaw noyun naa; ni ga rlu naa lo grë miech rii ganle pa lotaa men nroob nac luu. ⁵ Scagaa luu ne nac luu Pxoza naa, niina ne laa naa glanso lo luu, blu ganle men nroob nac naa; sac desde mazd glo zeene gard tsa grëta ncuaañe no, tibaque nac lo guielndzon ne bdzio ne haxta dze ne blanso naa lo guidzliu rii.

⁶ Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. ⁷ Zig nac niina, grëse ncuaañe bneedz luu lo naa, nanle zho ne luu bneedza, ⁸ sac pseed naa zho grëse wseed ne bneedz luu lo naa, ni bliladz zhow. Wen wen gocnan zho ne lo luu i brie naa zial naa lo guidzliu rii, ni riladz zho ne luu pxeel naa. ⁹ Laa naa rnab lo luu gacniën luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho, ¹⁰ ni zha glu ganle pa lotaa men nroob nac naa. Grëse zho chen luu zho; sac grëse ncuaañe nacchen naa, chen luuw; ni grësegaa ncuaañe nacchen luu, chen naaw. ¹¹ Rien naa, led nroobdraa cuëz naa lo guidzliu rii, laa naa gbile guial naa lo luu i; per zha, laa zho guiaaane nu. Gane niina, luu ne nac luu Pxoza naa, luu ne nac luu tib men ne guien dxtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne. ¹² Len dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia mine raquiet lo Xtiidz luu.

¹³ Zhilew laa naa glanso zaatne no luu i; per len dze ne blëz naa lo zho nu, nzian grë ncuaañe bne naa lo zho, zeena ye zho tso guielbley nroob ne no naa. ¹⁴ Pseed naa zho mine nac xtiidz luu; per na rlëë grëraa miech ran zho zho, sacne zienaldraa zho grë ncuaañe ndzinlid ne rac lo guidzliu rii. Nac zho zigne nac naa, rleyniend naa grë ncuaañe co. ¹⁵ Per rnabd naa cuee luu zho lo guidzliu rii, sinque laa naa rnab csaand luu gun zho ncuaañe racladz mendox. ¹⁶ Sac niicle zhaw, niicle naaw, choot zionald grë ncuaañe ndzinlid ne rac lo guidzliu rii. ¹⁷ Bzhiguiel sca bdeed guielbiini lo zho guien zho zha nac Xtiidz luu, sac Xtiidz luu nac diidzli; zeena dib zdoo zho tsoxco zho gban zho zigne rnabey luu. ¹⁸ Sac gon, niina laa naa rxel zho lo grëraa miech guidzliu rii, zigne ne pxeelaque luu naa. ¹⁹ Ni niina, dib zdoo naa laa naa gun mine rnabey luu, zeena ye zho guien zho none dib zdoo zho gun zho mine rnabey luu.

Rnab Jesús por grë zha ne yabraa xnëz me

²⁰ Laa naa rnab gacniën luu zho, ni gacniën luu zha ne naraa gliladz naa, zeene laa zho tsieeed zho; ²¹ zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. ²² Laa naa psannon zho zigne psannaaneque luu naa, ni tipse

gac zho zigne tibaque nac ne grop ne. ²³ Zigne nacnie luu naa, scaque nacnie naa zho. Bzhiguiel gocniën zho, tibaque gac zho grëse zho, zeëna gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa. ²⁴ Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeëna gan zho lo grëtaa guieIndzon ne no naa. Lo guieIndzon ne bneedz luu lo naa, sac rleynietaque luu naa haxta zeëne gard tsaá guidzliu.

²⁵ 'Papá, luuse nac men ne rapd ni tib dol, niicle ne runbeyd grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. ²⁶ Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeëna scaque guien zho gleynie zho samiech zho, ni gacnie zho naa.

18

Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

¹ Zeëne blozh bnaab Jesús lo Dios, laa me brieenie no ga bdieedquia no nēz dan ro psē ne rnee zho Psē Cedrón. Ga no tib zaatne zēëb niapse yag nex, dzigo ga bliiaaz no gza no me.

² Judas zha ne pto me ga, wen wen runbey Judas lugar co, sac nzian vult ziyenie me no ga. ³ Dzigo zeëne laa Judas blanso ga, laa Judas blansoniele tib dzoon menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhengaa spad. (Lēë grë zha co pxeel grë pxoz rnabey, ni grë zha farisé.) ⁴ Loxaque blanso zho, laa Jesús brieequiale, rēb me lo zho:

—¿Cho rguib to?

Sca rēb me sac rienle me pe nacne zie zho ga, nanle me pe nac grëtaa ncuaañe ted me.

⁵ Pquiab zho, rēb zho:

—Men Nazaret ne lē Jesús, men co ziaadguib no.

Dzigo rēb me:

—Naa nac men co, tel me ziaadguib to.

⁶ Zeëne bin zho rēb me: “Naa nac men co”, whire rzhitsaque zho, grëse zho biab liu. Ye Judas no lad co. ⁷ Whiire Jesús bnabdiidz me lo zho, rēb me:

—¿Cho zho rguib to?

Pquiab zho rēb zho:

—Men Nazaret ne lē Jesús, men co rguib no.

⁸ —Laa naa nile lo to —rēb me—. Naa nac men co. Telne naa ziaadguib to, golsaan sca guey grë zha ne zo lo naa nu.

⁹ Ga brieequia xtiidz me zeëne rēb me: “Lo grë zha ne bneedz luu lo naa, ni tib zho bnitlod.”

¹⁰ Laa Simón ney tib spad, hor co bdoabaque Simón spad co psilaa me tib niaw, bliengaa me diag derech tib mgui lē Malcw. (Lēë mgui co quia xtsiñ men ne nac pxoz nroob.) ¹¹ Zeëne gon Jesúsaa, rēbchaa me:

—¡Blootsow spad qui Pedr! ¡Bien ganle Pxoaz naa rnabey znu teed naal! ¿Niacxe gond naa miñe rnabey me naa dzigo?

¹² Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³ Sca nzobdoo me, laa zho bdziñnie me lidz men ne lē Anás, pxozdzoop Caifás. Caifás nac pxoz nroob len iz co, ¹⁴ ni me ga rēb lo grë men non lo zha Israel, ne mazd wena tibaque zha ne yгаа guet, quizh zho par dib guiedz.

*Rëb Pedr runbeyd Pedr Jesús**(Mt. 26:69-70; Mr. 14:66-68; Lc. 22:55-57)*

¹⁵ Zhiits co, ga naḷ no grop no Pedr. Ni ne runbey naa Caifás meṇ ne nac pxoz nroob ga, zeene bdziṇ no ro lidz Anás, loxaque naa brieelo bzëëb nêz ley. ¹⁶ Laa Pedr, zaatne nactaa ro yu par gdziṇ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigoraa bdeed wnaa co diidz bzëëb Pedr. ¹⁷ Dzigo rëbchaa me lo Pedr:

—¿Bod ye luu dzigo lëë nac xpëëdscuel meṇ ne bdziṇnie zho i?

—Coo, led yed naa —rëb Pedr.

¹⁸ Grë zha ne quia xtsiṇ meṇ co ni grë menguiib ne ndxie ga, laa zho bzëëgle gui. Grëse zho, laa zho ndxiedzëë lo gui ga, sac rac naḷ. Ye Pedr bdziṇ lo zho ga nodzëë Pedr.

*Rquiep Anás Jesús**(Mt. 26:59-66; Mr. 14:55-64; Lc. 22:66-71)*

¹⁹ Laa nêz leṇ yu, laa Anás psilo noquiep Jesús dien yo grë xpëëdscuel me, ni dien pe nac grë wseed ne nolu me lo miech. ²⁰ Dzigo pquiab Jesús, rëb me: —Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngeets zhliaan nseed naa zho; sinque zaatne rcaalsa nzian miech, ga bne naa lo zho. No hor pseed naa zho leṇ grë yadoo win, nogaa hor pseed naa zho leṇ yadoo nroob ne zob lad guiedz nu. ²¹ Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuane bne naa.

²² Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo meṇ ne nac pxoz nroob!

²³ Dzigo rëbchaa Jesús:

—Telne rzac luu beṇ naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús pxeel Anás me lo Caifás, meṇ ne nac pxoz nroob.

*Rnee Pedr stib runbeyd Pedr Jesús**(Mt. 26:71-75; Mr. 14:69-72; Lc. 22:58-62)*

²⁵ Horco laa Pedr bii zodzëëque lo gui nêz ley. Dzigo wbiire zho bnabdiidz zho lo Pedr, rëb zho:

—¿Bod xpëëdscuel meṇ ne blansonie zho i lëë nac luu?

Laane neeli Pedr, leḷ pquiab Pedr rëb Pedr:

—¡Lëda! ¡Zha gaczhe naa xpëëdscuel meṇ qui!

²⁶ Ye tib zhalidz Malcw, zha ne pchug Pedr diag ga, laa zho zodzëë lo gui ga, sac ye zho quia xtsiṇ pxoz nroob co; dzigo rëbchaa zho:

—Ni gon naa name, ye luu no lad zha ne zonie me leṇ yag oliv ga.

²⁷ Wbiire Pedr rëb Pedr runbeyd Pedr me, ni lëëtaque hor co laa tib gall pcedz.

*Güeynie zho Jesús lo Pilat**(Mt. 27:1-2, 11-14; Mr. 15:1-5; Lc. 23:1-5)*

²⁸ Ziadyiṇile liuw, zeene laa zho brieenie Jesús lidz Caifás, zienie zho me zaatne nac xyulow Pilat, meṇ ne nac gobernador. Zeene bdziṇ zho, ni tib zho bzëëbd leṇ yulow, sac racladzd zho quuits zho miṇe rnabey xley lay zho; parne grieelo yquṇ zho guielwagw ne row zho lni Pascw co. ²⁹ Nacne briece Pilat bnabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

³⁰ Pquiab zho, rëb zho:

—¡Por grëtaa guieIntseeb ne noyun me, gane ziaadnie no me! ¡Telne niac me men ndzinli, niacxe lega guiaad-zo no me lo luu!

³¹ Dzigo rëbchaa Pilat:

—Golsënie me, tose golgunquizh me mine been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grieelod ne nose gnabey guet tib miech.

³² Ga brieequia mine bnee Jesús, zeene bzeet me ible zut miech me. ³³ Dzigo bzëëb Pilat len yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe nli luu nac zhirey men Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

³⁶ Dzigo rëbchaa Jesús:

—Nli rey nac naa, per led lo guidzliu riida, telne niaca mine lo guidzliu riw, dzigosi grëse zha ne nacnie naa niacntseeb zho, nsaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëë?

—Scaw gon —rëb Jesús—, nli rey naa; zigne rnee luu i. Ible min co nacne bial naa gol naa lo guidzliu rii, ni bial naa bialseed naa miech gunbey zho mine nac diidzli. Ni zha ne zienal mine nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brieë Pilat ga güeynee Pilat lo grë zha ne bdziñnie me ga, rëb Pilat lo zho:

—Ni tib dol gon rapd men rii. ³⁹ Per gzobse lni Pascw rii, rnab to rlaa cholze tib zha ne no ladzguib. ¿Pe gnë to sca, mazd csilaa naa men ne nac zhirey to nu?

⁴⁰ Pquiabbe zho, rëb zho:

—¡Csilaa luu me! ¡Mazd psilaa Barrabás!

Ni laa Barrabás tib ngbaan nac Barrabás.

19

¹ Zeene gon Pilat sca rac zho, dzigo bnabey Pilat bla menquiib, bdeed dooguid zho Jesús. ² Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan. ³ Dzigo psilo zho runnguzee zho me, nguiedz roptsie zho rnee zho:

—¡Bley na ganle, laa luu nacle zhirey zha Israel!

Ni rgap zho lo me.

⁴ Wbiire Pilat brieëquia Pilat zaatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gacnan to ganle rieguiald guet me; laa naa pquieple me rlu ni tib guieIntseeb beend me.

⁵ Zeene laa Jesús brieëquia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëe me nu.

⁶ Grë pxoz ne rnabey, ni grë menguiib ne rquianap yadoo, zeene gon zho me, psilo zho nguiedz roptsie zho rnee zho:

—iNone guet me! iBnabey yquia me lo cruz!

Dzigo rëbchaa Pilat:

—iGoltsienie me sca! iTo golquiaa me lo cruz! Sangue naa, grieelod yquia naa me lo cruz; sac laa naa gonle peet guieIntseeb beend me.

⁷ Pquiab zho rëb zho:

—iRdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

⁸ Zeene bin Pilat sca rëb zho, mazdraa bdzieb me. ⁹ Dzigo bzëëbnie me Jesús len yulow stib, bnabdiidz me lo Jesús, rëb me:

—iBnë dien cho menpaa nac luu? iPa nac ladz luu?

Per ib pquiabd Jesús lo xtiidz Pilat. ¹⁰ Dzigo rëb Pilat:

—iPe nacre rquiabd luu? iGon ganle naa rnabey, zrieelo csilaa naa luu, o gnabeygaa naa yquiaa luu lo cruz?

¹¹ Pquiab Jesús, rëb me:

—Ni luu nac zha rnabey niina, per telne niaca mine needzd Dios guieIrnabey qui lo luu, grieelod ne luu gnabey zha gac naa. Mincocke waa, zhi nac xtolu luu, mazdraa nac xtolu zha ne biaadlo naa nia luu.

¹² Dzigo gocladz Pilat nsilaa me Jesús, per bzhiguield grë zha ne güeysan me ga.

—Telne laa luu csilaa mgui qui gon —rëb zho—, rriequia dzigo ye luu rlëenie César. Sac gon, grëse zha ne racladz gac rey, lo César ga racndaan zho.

¹³ Zeene bin Pilat sca rëb grë miech co, bnabey Pilat brieie Jesús nëz ley stib. Dzigo güeyso Pilat lo xcan ne zo ley co, zaatne rzob me run me guieIwxtis. (Dipse ley co, niapse quie lag now; gane rnee zha Israela Gabata.) ¹⁴ Lëe dze vispr lni Pascw co ga nagon, zig grolle dzew noyac grë min co. Dzigo rëb Pilat lo zho:

—Laa zhirey to nu gon. iGolsënie me!

¹⁵ Psilo zho stib, nguiedz roptsie zho, rnee zho:

—iBeetgazh men qui! iBnabey yquia me lo cruz!

Rëbchaa Pilat:

—Zhirey to nac me, i ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—iTibaque men ne nac zhirey no, ni lëe men co nac César!

¹⁶ Dzigotaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44; Mr. 15:21-32; Lc. 23:26-43)

¹⁷ Zeene laa Jesús brieie ga, rna tib cruz nroob ney me; laa zho zienie me. Bdzinne zho me ro guiedz, zaatne rnee zho “Gui Beerguic Ngutoo”; ¹⁸ ga pquiaa zho me lo cruz. Ni pquiaa zho schop zha ntseeb, tibga zhicruz zho bo cue zhicruz me.

¹⁹⁻²⁰ Bnabey Pilat pquia bla lan diidz guic zhicruz me, rneew: “LËË JESUS MEN NAZARÉT NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga.

²¹ Nacre güey grë pxoz rnabey, güeylisqui zhow lo Pilat, rëb zho:

—iPe nacre pquiaa luu guic zhicruz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

²² Pquiab Pilat rëb Pilat:

—Mīne pquia naa, laaw pquiale ga. Ni sca none guiaana.

²³ Laa grē menguiib ne pquiaa Jesús lo cruz ga, zeene blozh pquiaa zho me lo cruz, bzheñ zho xab me been zhow tap lē, tib lēgaw biaannie zho tib tib zho. Laa lar ne rbix me, tibлагаque naca, ndiibda; ²⁴ dzigo rēbchaa zho:

—Minritaa nagon dziuungrold ne. Mīne naca gotsaa dzio new rif, dzigo zha ne grieequia zha co guiaanniew.

Ga brieequia mīne raquiet lo Xtiidz Dios, zaatne rnee: “Xab naa, mīne racw naa nzian lē been zhow bgaaza lo zho; laa mīne rbiix naa, bio zhow rif.” Ni scadaa been gza menguiib co.

²⁵ Gax zaatne zo zhicruz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsieel Cleof, ni Marí Magdal. ²⁶ Gaxaque ga zo naa. Zeene gon Jesús xniaa me, ni gon me naa, rēbchaa me lo xniaa me:

—Been cuent nagon lēē xpēēd luu i zo i.

²⁷ Laa lo naa nē me:

—Been cuent lēē xniaa luu i gon. Bzhiguiel luu gan me.

Dzigo desde dze co, pcaania naa xniaa me biane naa me lidz naa, pteedlo naa me.

Gut Jesús

(Mt. 27:45-56; Mr. 15:33-41; Lc. 23:44-49)

²⁸ Rienle Jesús ne gataa laa me psiaal dziin ne pxeel pxoz me me gun me, ni par grieequia grēse zigne rzeet lo Xtiidz Dios ted me, hor co bredz me rēb me:

—Rnab zhis naa.

²⁹ Gax lo grē menguiib ne quianap me ga, ga zo tib cant win no nziu bla. Zeene bin zho sca rēb me, rias tib zho bgadz zho tib lē zhiil lo nziu co, bzoob zhow guic tib goobgui nool güeyquiaa zhow ro me. ³⁰ Zeene bdziñ nziu co ro me, pquiin me niipa, dzigo rēbchaa me:

—Lēew nagon, nataa laaw bza.

Zeene blozh sca bnee me, znuse pqianrun guic me; laa me blozh.

³¹ Guini liu co nac tib dze ne mazdraa nda lo zha Israel. Nacne güey grē zha ne rnabey lo menguiidz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena quietgazh zho lo cruz dze co; sac racladzd zho scaque quia zho lo cruz zeene laa dze nda co gdziñ.

³² Dzigo pxeel Pilat bla menguiib. Zeene bdziñ zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni stib zho.

³³ Zeene bdziñ zho zaatne zo zhicruz Jesús, gon zho laa me gutle; nacne bdiitsd zho ni me.

³⁴ Horco wbig tib menguiib co, bliz zho xlanz zho ro xcuxti me. Zeene bdoob zho lanz co, nis ne, ren ne brie ga.

³⁵ Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw. ³⁶ Ga brieequia mīne raquiet lo Xtiidz Dios, zaatne rnee: “Ni tib dzit ne no me quiitsd zho.” ³⁷ Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

Bguets Jesús

(Mt. 27:57-61; Mr. 15:42-47; Lc. 23:50-56)

³⁸ Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par grieeo tselit me xcuerp Jesús lo cruz. Ye me xpēēdscuel Jesús nac me, per pxobnend me ne ye me nacgza Jesús; sacne rdzieb me grē men Israel ne rlēē lo Jesús. Dzigo bdeed Pilat diidzbey.

³⁹ Nicodem, men ne güeyzodiidnie Jesús ga tib pcow liu, ye me güeynal zhits José; güeynie me zig galptsiiptap kil tiblo zënex ne riaa yaal ne lë mirr ni yaal ne lë áloe. ⁴⁰ Zeene blozh biet Jesús lo cruz, psilo zho bdëëb zho zënex co xcuerp me; blozh ga, pchel zho me tib lar nquits; sac sca rqueets grë men Israel zhingutoo zho.

⁴¹ Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co; ⁴² dzigo nacne gase güeyqueets zho me, sac zhile runfalt sëëb dze nda co, ni baa cose nac minë riaan gax ga.

20

BRIEEBAN JESUS

(Mt. 28:1-10; Mr. 16:1-8; Lc. 24:1-12)

¹ Goł dze ne rzobni zhmalá, silgaw, scase bii ncow rnaw, brieë Marí Magdal zie me ro baan Jesús. Zeene bdziñ me, gon me laa quie ne nioog ro baa co bdioble, laaw zole tib nëz.

² Horco lëëlëd wbire nguzhoon me, biaad me zaatne no no grop no Pedr, biaadnie me diidz lo no, në me laa zho güeybeele Jesús len baa, dieen palo güeyšan zho me.

³ Dzigo lëëlëd, brieë no grop no Pedr, zioso no ro baa. ⁴⁻⁵ Zeene bdziñ naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëëbd naa. Laa naa blozhdze bdiixlo len baa, zeene laa Pedr blanso.

⁶ Zigne blanso Pedr bzëëb Pedr len baa, gon Pedr nligaa laa lar co zhoob ga, ⁷ nicle lar ne briel guic mew, laaw zhoobaque ga; ndibëdsew, zhooba tib lad.

⁸ Nacne bzëëbaque naa. Zeene gon naa zha zhoob lar co, dzigoraá bliladz naa ne nli brieëban me. ⁹ ¡Sac hor co, bii gard tso guic naa zha rnee lo Xtiiid Dios; sac ga raquiet ne ible zrieëban me!

Gon Marí Magdal Jesús

(Mr. 16:9-11)

¹⁰ Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

¹¹ Ga name zo Marí roon me. Sca roon me, tibaque zeene bui me nëz len baa co, ¹² gon me laa chop anjl zob leen co. Dib nquitsbiese rna xab grop anjl co, tib me zob nëz ne bzhoob guic Jesús, stib me zob nëz ne bio ni me; ¹³ dzigo rëbchaa me lo Marí:

—¿Pe nacne roon luu?

—Roon naa —rëb Marí—, sac laa zho biadbee xcuerp Jesús nu, na dieen pa güeyšan zho me.

¹⁴ Loxaque blozh sca bnee me, zeene ptsire lo me gon me laa tib men co zo gax zhits me. ¡Per ib beenbeyd me ne Jesúsá!

¹⁵ —¿Pe nacne roon luu? —rëb Jesús—. ¿Cho rguib luu?

Leł güeynie guic Marí rëb me bod men ne rquianap gaw, dzigo rëbchaa me:

—Bzhiguiel, telne luu biadbee me nu, bnë dieen pa lo güeyšan luu me; zeena ga naa gaxi naa me.

¹⁶ Horco bneelë Jesús Marí, bredz me me. Zeene bin Marí lë me, lëëlëd biecw me; dzigoraá beenbey me Jesús.

—¡Maestro! —rëb me—. ¡Mod luu i!

Laa me zie gbig me lo Jesús. ¹⁷ Dzigo rëbchaa Jesús:

—¡Xeend luu naa! Sac gard guia naa lo Pxoꝝ naa gbaa. Miñe naca, güey güeynie diidz lo grē zha ne bzēnał zhits naa; gudz lo zho: Laa naa nole nēz guia naa lo meñ ne nac Pxoꝝ ne, meñ ne nac Dios ne rdziuunbey ne.

¹⁸ Horco lēēlēd wbi Marí ga, ziaadnie me diidz lo no. Blanso me bzodiidz me zha goñ me Jesús, ni nē me lo no zigne rēbse Jesús lo me ga.

Brieequia Jesús lo xpēēdsuel me

(Mt. 28:16-20; Mr. 16:14-18; Lc. 24:36-49)

¹⁹ Pcow liu dze dmingw co, grēse no ne nac no xpēēdsuel me laa no pcaalsa; loxaque Mazh runfalt. Dziits nquiaa no yag yu, sac rdzieeb no grē zha Israel ne rlēēnie me. Laa no ndxie ga, tibaque zeene brieequia me bzo me glowtaa lo no; pquiaabdiuzh me no. ²⁰ Blozhse pquiaabdiuzh me no, dzigo blu me leñ nia me lo no, zaatne biaaz clav zeene pquia me lo cruz, ni blu me ro xcuxti me. ¡Grēse no per nli rley no zeene bdzion no ne nli mew! ²¹ Blozh ga, nē me lo no:

—¡Laa naa rnedz tib guiełbley zdoo to, zeena peet tsienied guic to! Zigne pxeel Pxoꝝ naa naa bial naa, scagaa niina laa naa rxel to.

²² Dzigo blub me lo no grēse no.

—Gołcaania Espiritu Sant —nē me—. ²³ Ni zeene goñ guñ to tib miech perdon, scaque Dios zun me zho perdon; laa telne siguielđ zho guñ to zho perdon, laa zho biaanle lo xtoł zho ga.

Goñ Mazh Jesús

²⁴⁻²⁵ Zeene bdzion no Mazh (Mazh ne rnee zho “Mēēdgrop” ga), bzodiidz now lo Mazh, per bliladz Mazha, rnee Mazh:

—Rliladz naa miñe rnee to i goñ. Zliladz naaw, per haxta ganlo naa me, haxta gan naa leñ nia me zaatne biaaz clav, ni cteed-xug naa ga; ni csēēbnia naa ro xcuxti me zaatne biaaz lanz ga.

²⁶ Goc xon ngbidza, laa no pcaalsaque leñ yu co stib; hor cosi yele Mazh ndxiegrē no ga. Scaque dziits nsioog no ro yu, per tibaque zeene bdzion no laa Jesús bzēēb leñ yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no, ²⁷ rēbchaa me lo Mazh:

—Wbig na Mazh, bui leñ nia naa, psēēb mzhughnia luu nu. Dien nia luu nu, psēēbnia ro xcuxti naa. Gacchopdraa guic luu, sinque bliladz ganle ne nli mban naa.

²⁸ Dzigoraa bliladz Mazh ne nli mban me.

—Nasi rliladz naa mban luu —rēb Mazh—. Luu nac meñ ne rnabey naa, luu nac xDios naa.

²⁹ Pquiaab Jesús rēb me:

—Laa luu rliladz niina, lēēcxē laa luu goñle naa waa. ¡Dichos zha ne gliladz ne nli mban naa, niicle rañd zho naa!

¿Pe nacne pquia grē diidz rii?

³⁰ Lo lal ne bzēnie Jesús no, ndaldoo milagr ne bdzion no been me, led grēda raquiet lo guits rii. ³¹ Miñe pquiaase naa nu, laaw pquia naa zeena zeene glab tow, guieñ to ganle ni gliladz to: Jesús nac meñ ne biaadsilaa ne lo xtoł ne, Dios bzooblo me baaad me, ni Xpēēd Dios nac me; sac zha ne dib zdoo gliladz cho nac me, zgaa zho tib guiełmban ndzon ne gdziñd dze lozh.

21

Goñ zho Jesús Galilé

¹ Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

² Tib bdze dzew, tipse ndxie no gza no Simón Pedr; Mazh, Natanael (men ne nac men Caná ga), bets naa Jacob ni schop zha ne nacgza no. ³ Tibaque zeene nê Pedr, laa Pedr tsie gooz mel. Dzigo rdzieets no:

—Yeque no sca zia guio ne.

Dzigo bziaab no tib len barcw win gza no, laa no zio.

Dipse guieel bdzienie no barcw co lo nis, per ni tib mel bgaad. ⁴ Laa liu ziaadle lozh guini, zeene bdzion no laa tib men co zo ro nis, per ni tib no bdziunbeyd me. ⁵ Dzigo bnee men co lo no, nê me:

—Yo to dien xin, ¿pe bga ma?

Pquiaab no rdzieets no lo me:

—Choot ma bgaad.

⁶ Dzigo nêchaa me:

—Golron guiee ne rgaa ma i nêz derech ganle, znaaz to ma.

Dzigo bron no guiee co nêz derech. Zeene laa no cueew lo nis, ib lëbd no glis now; ndaldoo mel ne biodzê lena.

⁷ —¡Pedr! —rep naa—. ¡Bina ganle, xmaistr ne i gon!

Zeene bin Pedra, lëëlëd wbix Pedr xab Pedr, biab Pedr lo nis; psilo Pedr bzhoobnis Pedr briequia Pedr ro nis. ⁸ Laa no biaan len barcw ga; nole bdzinnew zaatne nac ro nis. Maase tapgaltsii metr sca bdiobniu no guiee co lo nis.

⁹ Zeene brie no len barcw, bdzion no laa gui noyecle, laa tib mel zhooble lo gui co, ye guietxil ne. ¹⁰ Dzigo nê Jesús lo no:

—Golténie bla mel ne blozh bnaaz to i nu dien.

¹¹ Dzigo güey Pedr biep me len barcw, güeyxadz me guiee ne no mel ga; dzigo bdoobniu mew bdzinne mew haxta zaatne nacpaa ro nis. Mel tafa, niapse ma mbeew, zeene bgab ma rgaa ma tib gayoo chooptsipton lo grê ma; niicle scataa nzian ma, per blëb guiee co, briezda.

¹² Blozh ga, bredz me no, nê me:

—¡Goltê na, zeena gowxeren to!

Ni tib no bnabdiidzd lo me dien pe nli mew; sac, ¡rienpaa no ne nli mew!

¹³ Dzigo wbig me bdiiz me guietxil co lo no, bzhen me mel ne, bneedz me ma lo no.

¹⁴ Ga bion vuelt briequia me lo no wlal ne brieaban me.

Bzodiidznie Jesús Pedr

¹⁵ Blozhse bdiowxeren no, bredz Jesús Pedr, psilo zho bzê zho grop zho; dzigo rëb me lo Pedr:

—Simón (xingan Jonás), ¿pe nli dzigo rleynieraa luu naa que grê zha qui?

—Nquialadz naa luu —rëb Pedr—, ni nanlegaa luuw ganle.

—Pteedlo grê xpëcwxiil win naa sca —rëb me.

¹⁶ Wbiire me, rëb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rëb Pedr.

Dzigo rëb me:

—Pquianap xpëcwxiil naa sca.

¹⁷ Wbiireque me stib rëb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rëb me, mban gôc zdoo Pedr; sac gale rac tson vuelt zinabdiidz me lo Pedr; dzigo rëb Pedr:

—Luu nac men ne rnabey, luu nana grësew, nan luu ganle nquialadz naa luu.

Dzigo rëb me:

—Têlne nli nquialadz luu naa, yquiaanap luu xpëcwxiil naa sca.

18 'Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztāa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

19 Zeene znu rēb me lo Pedr, ga bzeet me zha nac guielgut ne ygaa Pedr, ni ga glu Pedr ganle pa lotaa men nroob nac Dios. Blozhse ga, rēbchaa me:
—¡Dēnal zhits naa!

20 Dzigo nalaque naa zhits me grop me Pedr. Zeene ptsire lo Pedr, gon Pedr laa mēēdscuel ne scataa rleyne me ga, laa zho nal ga, zha ne zobpaa cue me ga lo xtsee co, zha ne wbigpaa bnabdiidz lo me dien cho nac zha ne tsielo me ladznia zha ne gut me; dzigo rēbchaa Pedr lo me:

21 —Telzhe zha rii waa, ¿pe nac miñe ted zho?

22 Rēbchaa me:

—¿Pe nadien gun luu ne racladz luu gacnan luuw? Telne gacladz naa, zrielo gnabey naa gban mgui haxta len dze ne guiañ naa stib. Led xcuenta luu ga. ¡Na zeen dēnal zhits naa!

23 Zeene gocnan grēraa zha ne rililadz Jesús sca bnee me, grēse zho tibaque güeynie guic zho gdzindraa dze guet naa. Per led scada, sinque znu naca, rēb me: ¡Pe gun Pedr! Telne gacladz me, zrielo gnabey me gban naa haxta gal dze ne guiaad me stib.

24 Grēse miñe pquia naa nu gon, grop lo naa gon naaw, grēse zha ne nacgrē no nanpaa zho ganle ne diidzli rne naa.

25 Ndaldooraa grē ncuane nroob ne been Jesús, tel niaca miñe yquiaw grēsew, ni ygaad dib lo guidzliu tsotsow grē guits ne yquiaw ga.

MINE BEEN ZHA NE PXEEL JESÚS BNEE XTIIDZ ME

¡Diuzh Tiofl!

¹¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grëse mine been Jesús, grëse wseed ne blu me lo miech zeene psilo me xtsiin me ²haxta gol dze ne psan me diidz pe nac ncuane gun grë zha ne bzooblo me tsie tsienee Xtiidz me. Espiritu Sant bdeed guielbiini lo zho bien zho zha racladz me; lëe dze co ga zey me gbaa.

³Nli psacsi miech me, beet zho me, per brieaban me. Ni par glu ganle ne nli brieaban me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴Tib vult ndxie zho grë zho me, dzigo pso me diidz lo zho ible grieed zho lad guiedz Jerusalén, haxta quiet Espiritu Sant gdeed guielbiini lo zho zigne nacle xtiidz Pxoz me; ni biire rëb me lo zho:

⁵—Gol soladz ganle laa naa nile lo to: nli laa Juan pchoobnis, per niab nisa; sangue to zгаа to guielbiini ne gneedz Espiritu Sant, rrieequia Espiritu co chobnis to; ni zhile gdziñ dze ne laa min co gac.

⁶Len ngbidz ne sca nolulo me lo zho, tib vult bnabdiidz zho lo me, rëb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷Dzigo pquiab me rëb me lo zho:

—Dios, men ne nac Pxoz naa, ncuane gun me riegualde to gacnan tow, mese nan dien pa dzew, dien pa horgaaw; sac mese nac men ne grieelo guna.

⁸Singue to, zeene laa Espiritu Sant gneedz guielbiini lo to, hor co laa to yгаа poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

⁹Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gondraa zho me. ¹⁰Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co; ¹¹rëb me lo zho:

—¿Pe nacle squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guaad stib.

¹²Blozh ga dzigo laa zho wbi guic gui co (lëe Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziin.

¹³Bdziñ zho zaatne rbëz zho, biep zho len yu ne riaan glaa; sac len yu glaa co ga no zho. Ga rbëz Pedr, rbëz Ndrës, Jacob, Juan, Lip, Mazh, Bartol, Matew, ni Jacob ne nac xingan Alfë; Simón Zelot, ni Judas menlidz Jacob. ¹⁴Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

Bzo zha ne gun dziin ne psaan Judas

¹⁵Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶—Grëse to bets, grëse to bzian, gol gacnan ganle, mine been Judas zeene sca güeyto me Jesús, nole ne sca gaca. Lo Xtiidz Dios zhobneew, lëe min co

pquiaa rey David zeene psiaab Espíritu Santa guic me. ¹⁷Ye Judas gogcza no, ye me nac diidz niun dziin ne nodziuun no niina.

¹⁸Ni nligaa laa ne niun me dziin co, lel been me guielntseeb pto me Jesús, ni blozh ga léeque lo liu ne bziuu dimi ne bdiizh zho me ga, ga güeytsobe me bzob guic me lo liu, wbilgazh me, nêzrii nêzrec bliaal len me. ¹⁹Min co nacne zeene laa grê zha Jerusalén gocnaa, dzigo bleelê zho liu co “Liu Ren”.

²⁰Zigne rneque naa ga —rêb Pedr—, ible lo Xtuidz Dios sca zhubnee; ni lée min co ga raquiet zaatne znu rnee:

Ible ziaandets lidz zho,

ni stib choot gbandraa zaatne bio zho.

Ni rneequew:

Zhaale zha ne guiaannie dziin ne no niun zho.

²¹⁻²²Min co nagon, ible nonguiela so tib zha ne guiaan xlugar Judas, gacgza zho no guioxobnen no ne nli brieeban Jesús. Nana sca, lo grê zha ne nacgrê no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

²³Dzigo ble zho tib men ne lê José Barsabás (lêeque me ga rnee zho Just), ni stib men ne lê Matí.

²⁴Blozh ga, bnaab zho lo Dios, rêb zho:

—Dios, ndion no luu nac men ne rnabey no; ndion no luuse nac men ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so ²⁵gun dziin ne psaan Judas; sac laa Judas zeyle zaatne rieguial Judas.

²⁶Blozhse bnaab zho lo Dios, laa grop zha co bio rif. Nacne brieequia men ne lê Matí ga, dzigo dze cotaa laa me gogcza stsiptib zha poxtl co.

2

Biaad Espíritu Sant

¹Zeene gog gadz zhmal gut Jesús, léeetaque dze co run grê zha Israel lni ne rnee zho Pentecostés. Dze co grêse zha ne no xnêz Jesús, laa zho pcaalsa. ²Laa zho ndxie grê zho, tibaque zeene bio tib bi nroob zhan gbaa, zig nac zeene rriee tib medox, haxta len yu ne ndxie zho ga pquiab; ³ni brieequia nzian biini, rluw zig nac ludz miech, tibga tibga biini co blêz guic zho grêse zho. ⁴Horco grêse zho pcaania guielbiini ne bdeed Espíritu Sant, psilo zho rnee zho grê xtiidz stib miech mine rsiaabtaa me guic zho.

⁵Len dze co nziandoo grê zha Israel ne no stib ladz ben bdziñ Jerusalén, grê zha ne bii zianal xley Dios. ⁶Laa zeene bio bi co, ye zho no lad grê miech guizhiu ne bdopbe zaatne zob yu co; tib tib zho zeene bin zho laa grê zha ne pcaania guielbiini co nonee xtiidz zho, per nli rzee zdoo zho. ⁷⁻⁸Rlozhd gwi zho rnee zho:

—¡Pe nli diidz rii! ¿Zha rrielo rnee grê zha qui xtiidz ne, ni led zha Galilé nac zho? ¡Tib tib ne ndxie ne nu, zhaase zhaase diidz ne rnee ne! ⁹⁻¹⁰Nu ndxie grê men Part, men Media, men Elam, men Mesopotam, men Judé, men Capadó, men Pont, men Frij, men Panfil, men Egipt, haxta grê men ne ziaad nêz África, delant guiedz Ciren; grê men Cret, men Arab, grê zha Israel ne ziaad nêz Roma, grê men Roma, zha ne zianal zhiwseed zha Israel.

¹¹Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grêtaa milagr nroob ne run Dios.

¹²Grêse zho per nli rzee zdoo zho, rdzieldraa zho zha gun zho, rnabdiidzlsa zho rnee zho:

—¿Bay pe i? ¡Ncuaane gard dzian ne!

¹³ Laa nogaa zho rzhidznie, rnee zho:

—Rzudz grë zha qui, gane squi rzë xtiidz zho.

Bdeed Pedr tib lban

¹⁴ Dzigo bzoli Pedr gza me stsiiptib zha ne nac poxtl ga, psilo me nguedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle. ¹⁵ No bla to quianee rëb to rzuudz no, per led rzuudzd no. Griinpaale name blan ngbidz, niicle niaca zha ne riepaa nziu, niacxe goon nale laa zho gzudz. ¹⁶ Led rzuudzd no, sinque niina nagon noyac grë mine bzeet Joel padzeela (tib men ne biadteed xtiidz Dios), zeene znu rëb me:

¹⁷ Znu rnee Dios:

Zeene wzhile runfalt gal dze co, laa naa cxel zhiEspíritu naa zdoo grëse miech; grë xingan zhow, grë xindzooop zhow, laa zho cteed xtidz naa, grë zha nguieg, nzian grë ncuaane glulo lo zho, grë mengol, nzian grë ncuaane glu mcaal lo me.

¹⁸ Len dze co,

grëse zha ne nguzobdiidz lo naa,

niicle mguiw, niicle wnaaw laa naa cxel zhiEspíritu naa zdoo zho, dzigo grëse zho cteed xtidz naa.

¹⁹ Nzian grë ncuaane gzee zdoo to glu naa zhan gbaa, scaque lo guidzliu, zan to ren, zan to bel, zan to grë goxdoo.

²⁰ Zeene zhile gdzin dze ne guiaad men ne rnabey ne, laa lo ngbidz ycow, laa mëe gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

²¹ Grëse zha ne dib zdoo gnab lo Dios yquia zdoo me zho, grëse zha co scaania me zho.

²² ¡Grëse to, golquiaadiaga sca ganle! Led nanwen to ganle Dios pxeel Jesús, men Nazaret ne biaad lo guidzliu rii, Dios bnabey been me grë milagr nroob, been me grë ncuaane bzee zdoo to; ga blu ganle ne nli Dios nacie me. ²³ Laa zeene laa Dios bdeed diidz biab me ladznia to (sac ible xtiidzle Dios naca, nanle me zha nac ne sca ted Jesús), laa to bnaaz me, bzobdoo to me, bnabey to gut me. Led to gon bloo me ladznia grë zha ntseeb ne sca psacsi me pquiaa zho me lo cruz. ²⁴ Per bleeban Dios me, psilaa Dios me ladznia guielgut; sac lëbd guielgut ne lëew gnabey lo me.

²⁵ Zeene bzeet David Jesús, znu rëb me:

Men ne rnabey naa, ran naa tibaque quianap me naa;

tibaque zo me cue naa nëz derech, ¿pe nac nadien ne lega pe gac naa?

²⁶ Gacxe waa, nley no zdoo naa, niicle ludz naaw, rleya roolnie naa me.

Ni gane tibliladz rac naa;

²⁷ sac nan naa niicle guet naa, ib csaand me guiaan naa len baa, ib gdeete me diidz xin xpëel naa.

Naa nac tib ngundziin lo me, ni rleynie me naa.

²⁸ Me blu lo naa zha grieelo yгаа naa guielmban,

ni tib guielbley nroob ne yгаа naa zeene laa naa gdzin lo me.

²⁹ Bets, bzian, to ne nac to menladz naa, golgona ganle: led mine bdete pxozgol ne David bnee me nu; sac gon, zeene gut me güey zho güeyqueets zho me, ni haxta lo nadze laa xpaа me bii niaa. ³⁰ Sinque mine bded Jesús

ga bzeet me, sac gon tib zha ne biadteed xtiidz Dios goc me. Gocnanle me ne lo xti me grieequia Men ne nacle diidz ga cxeel Dios, ni men co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me. ³¹ Dzigo zig nac zeene ranle me grëtaa mine ted Jesús, nacle bzeet me ne ib zriieban Jesús, rëb me guiaand xcuerp Jesús zaatne rbëz grëraa menqut, niicle xindgaaw.

³² Jesús ga gon bzeet me, sac zig nac Jesús grop lo no bdion no bleeban Dios me, ³³ ni niina gbaa zob me cue Dios nëz derech, sac me nac men rnabey. Ni zigne nacle xtiidz Dios men ne nac PxoZ me, laa me pxeel Espiritu Sant lo no; ni niina grëse ncuaañe noyan tow, grëse ncuaañe noyongaa tow, xtsiin Espiritu Santow. ³⁴ Laa naa rbire rne lo to stib ganle, led mine bdele David ga bzeet David; sac gon, zeene gut David güeysobd David gbaa. Davitaque goc zha ne znu rëb:

Rëb Dios lo men ndzon ne rnabey naa:

“Cue naa nëz derech, nu bzob,

³⁵ nieeda lozh gnaz naa grëse zha ne rlëe lo luu, csañ naa zho lадznia luu.”

³⁶ Grëse to men wladz, golgona sca ganle: Jesús gon, men ne pquiaa to lo cruz ga, lëe men co nac men ne rnabey. Dios bzo me, ni Dios pxeel me biaad me lo guidzliu.

³⁷ Zeene bin grë miech ne ndxie ga sca bnee Pedr, biab guielnë zho, psilo zho rnabdiidz zho lo Pedr ni lo grëraa zha ne nacga Pedr ga, rëb zho:

—Bets, nana, ¿pe nac ncuaañe dziuun zo?

³⁸ Dzigo rëb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena guiaanmbe to lo xtol to; scagaa ible sxeel Dios Espiritu Sant gacnie to. ³⁹ Sac psanle Jesús diidz ne ible sxeel me Espiritu Sant gacnie grëse zha ne cuedz me sëeb xnëz me; zigtaa tow, zigtaa xpëed tow, zigtagaa grëraa menzita.

⁴⁰ Nzianraa grë ncuaañe bzodiidz Pedr lo zho, ni pso me diidz lo zho csaan zho grëtaa guielntseeb ne run miech lo guidzliu rii. ⁴¹ Lo grë zha ne bzoobdiag grë mine pseed me zho dze co, rgaazho maase tson mil; blozh ga, grëse zho brobnis, laa zho gocgrë grë zha ne riladzle Jesús ga.

Niowse mban zho

⁴² Grëse zha ne riladz Jesús ga, dib zdoz zho zienal zho grë mine rseed grë zha poxtl co zho, tibaque rcaalsa zho rzodiidznie zho Dios, ni row zho quietxtil zigne psanse Jesús diidz gun zho. ⁴³ Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

⁴⁴⁻⁴⁵ Tipse rnee zho, rdeedlsa zho ncuaañe rquiin zha ne nacgrë zho; zha ne quianie liu, tel pe grëragaa ncuaañe quianie zho, haxta rto zhow, dzigo rguiz zho dimi co lo grë zha ne guienp pe yquiin.

⁴⁶ Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho quietxtil zigne psan Jesús diidz ga; ine nley, ine ndooladz rbe zho grë zho rquiin zho guielwagw ne run lo zho, ⁴⁷ ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho racnzianraa.

3

Biac tib men ne në ni

¹ Tib dze zig rbixwe ngbidza, brieed Pedr grop Juan zie zho yadoo nroob ne zob Jerusalén, sac lëe hor co nac horne rie zho yadoo riezodiidznie zho Dios.

² Gax ro yadoo co quia tib puert rnee zho Puert Ndzon, ga rzob tib zhey gol ib gacd sê, sac nële ni me zeene gol me. Gzobse dze, rie zha ne riezooob me ga r nab me gon lo grê zha ne rzêêb yadoo. ³ Laa dze co, zeene gon me laa Pedr grop Juan zieded ga ne laa zho sêêb yadoo, zêêb nia me rnab me gon lo zho.

⁴ Dze rwi zho lo me, tibaque rêb Pedr:

—Lo no bui.

⁵ Dzigo blis lo me bui me lo zho, nan me bod no pe dimi ne gdeed zho lo me. ⁶ Wbiire bnee Pedr lo me, rêb Pedr:

—Quianied naa dimi ygad naa lo luu. Ncuuaane grieelese gnedz naa, laaw gnedz naa niina, jniapse por Jesús (men Nazaret), laa naa rnab lo luu, niinagazh guso i zeen bzëni!

⁷ Dzigo bzheñ Pedr nia derech me bliso Pedr me, hor cogazh laa grop ni me ga bdaan, ⁸ laa me psilo bzê. Rley me laa me bzêêb leñ yadoo gza me zho, lo guieļbley co haxta rias me, ni roolnie me Dios.

⁹ Grê miech ne no leñ yadoo, zeene gon zho laa me rzêle, ni scataa rley me roolnie me Dios, ¹⁰ bzee zdoo zho; sac runbey zho me, nanpaa zho rzêd me glo, tibaque ran zho me rzob me zaatne quia Puert Ndzon ga rnab me gon.

¹¹ Zeene laa Pedr grop Juan briele leñ yadoo nroob co, yeque me nal zhits zho ib rsaand me zho, laa zho bdziñ stib nêz cho yadoo co zaatne quia tib nsaap nroob ne rnee zho zhiNsaap Salomón. Nalaque grê miech co, rlozhd gwi zho, rlozhd gzee zdoo zho. ¹² Dzigo rêbchaa Pedr lo zho:

—¿Pe rac to? ¿Pe nacne squitaa rzee zdoo to, squitaa rwi to lo no, zig nac zeene no bdziuuunguiac men rii, zig nac zeene por nguzobdiidz no lo Dios gane brieelo psêê no me? ¹³ Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grêraa xmen gol ne, men co blu lo to niina ne nli men nroob nac Xpêêd me Jesús. Lêê Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz. ¹⁴ Bdeete to diidz nlaa men ne nac men ndzon, men ne peet xtold; leļ b nab to blaa tib zha ntseeb ne nzêêb ngutoo. ¹⁵ Laa me, pquia to haxta beet to me, ni me nac men ne rdeed guieļmban. Per bleeban Dios me, ni mban me niina; sac grop lo no bdzion no me.

¹⁶ Ni niina men ne ran to biac nu, niapse por Jesús biac me; led runbeyle to me nanle to ganle rzêd me glo. Ne dib zdoo no rliladz no Jesús, gane brieelo bnab no beenguiac Jesús me.

¹⁷ Grêse to bets, ne nac to menladz naa, rgobey naa niicle to ni niiclegaa grê zha ne nac zhiwxtis ne, lega laa to bnabey bgaa Jesús beet to me, niicle to biendaque dien pe nacne sca been to. ¹⁸ Laa Dios bneedz diidz been to grê guieļntseeb co, sac sca goc grêse mine bzeet grê zha ne biadteed xtiidz Dios padzeela, zeene bzeet zho zha nac grê guieļnê ne ted Jesús, Men ne nacle diidz cxeel Dios guiaad lo guidzliu.

¹⁹ Dol nroob ga gon been to, gacxe nana gon waa golsaan xquieļntseeb to, golbig lo Dios; zeena csanbe me to lo xtol to. Me gneedz guieļbley lo to stib, ²⁰ ni zbiire cxeel me Jesús lo to stib, guiaadsilaa me to. ²¹ Gbaa no me niina, ni ga cuêz me nieeda gal dze ne laa Dios blozh bnabey goc grêse ncuuaane none gac, zigne bzeetse grê zha ne pxeel me padzeela, biadteed xtiidz me. ²² Zig nac Moisés bzeet me laa Jesús guiaad, rêb me lo grê pxoz gol ne: “Dios men ne rnabey ne, ible znabey me ne lo xtii to grieequia tib men ne gac zig nac naa lo to niina. Zeene laa me guiaad, golgon xtiidz me; ²³ sac zha ne gond xtiidz me, ib tedsod znitlo zho.” ²⁴ Scaque Samuel, ni grêraa zha ne biadteed xtiidz me, grêse zho bzeetle zho grê ncuuaane noyac leñ dze rii.

²⁵Grëse to, xmengol to nac grë zha co, ye to ga rëb Dios gunlay me zeene znu biaan me diidz grop me Abraham, rëb me: “Niapse por tib men ne grieequia lo xtii luu, laa naa gunlay grëse miech ne ndxie gdibdoose lo guidzliu.” ²⁶Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquielntseeb to.

4

Güeyzo zho zho lo wxtis

¹Laa Pedr grop Juan bii noneeque lo grë miech co, zeene laa bla zha ne nac pxoz bdziñ ga, bdziñnie zho tib zha non ne quianap yadoo co ni zla zha ne nacgrë zha saducé. ²⁻³Zigne bdziñ zho bnaaz zho Pedr grop Juan, güeysëeb zho zho ladzguiib; ni ne bdzele dzew, ga biaan zho dipse guieel co. Rlëë grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse mengut, scaque grieeban zho.

⁴Niicle ne scataa rlëë grë zha rnabey co, per nzian zha ne ndxie ga bliladz Jesús; zig gaay mil rga loxaque zha bgui.

⁵Zeene biini liu co, grëse zha non, grëse zha ne rnabey lo menguedz, laa zho pcaalsa. ⁶Ga bdziñ Anás men ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni grë zha ne nac menlidz pxoz ne rnabey ga. ⁷Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golnë nadien, ¿cho rnabey to, cho pxeel to ne squi no to?

⁸Horco laa Espíritu Sant bdeed guielbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menguedz, grëse to ne nac to zha gol ne non xtiidz. ⁹Telne mine rlisqui to nac ne dien zha bdziun no men rii ne laa ni me biac, ¹⁰golsiguel golquiaadiaga ganle, zeena gacnañ tow ni gacnañ grëragaa menguedza. Jesús gon, men Nazaret ne bnabey to gut lo cruz ga, men ne bleeban Dios ga, men co beenguiac men rii; ni laa to rangaa me laa me zo lo ne nu. ¹¹Lëë Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nand zho lëepaa quie co nac mine rnazdziits yu.” Ni scapaa nagon bzhaac to me. ¹²Loxaque me zrieelo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

¹³Zeene gon grë zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzënie zho Jesús.

¹⁴Peet brieelod nlisqui grë zha co, sac nligaa laa men ne biac ga zo lo zho ga. ¹⁵Dzigo mazd bnabey zho brieed Pedr ley grop me Juan; laa zho biaan bzodiidz zho dien zha gun zho zho, ¹⁶sac rien zho tib milagr nroob ga sca biac ni men co; niicle ne racladz zho yqueets zhow, per grële menguedz bina. ¹⁷Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnañ grëraa miech zha biac men co.

¹⁸Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rëb zho—, gbiiredraa to cseed to miech zhiwseed men ne rnee to Jesús ga.

¹⁹Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziuun no mine rnabey Dios, lel mine rnee to i dziuun no? ²⁰Grieelod gon dziuun no mine rnee to i, sac grëse

ncuaane bdzion no, grëse ncuane bdzionaa no ib none gnee now, zeena gacnan grëse miecha.

²¹ Dzigo wbiire grë zha rnabey co, ntseeb rac zho lo zho pso zho diidz csetraade zho miech; bldzhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne been me milagr ²² beenguiac me men co, ni choole iz rac sca gacd së me.

Bnab zho lo Dios

²³ Zeene laa Pedr grop Juan bdzin lo grë zha ne nacgrë zho, bzodiidz zho grëse tel zha rëb grë zha rnabey co, zha rëb pxoz non co. ²⁴ Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac men ro ne rnabey grëtaa ncuane no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuane no. ²⁵ Padzeela zeene bdeed Espiritu Sant guielbiini lo pxozgol no David, men ne been xtiin luu hor co; znu bnee me:

¿Pe nacle squitaa rac grë miech ne nacd zha Israel rlëenie zho Dios?

Racladz zho gun zho ncuane ni grielod lo zho.

²⁶ Grëse zha non ne rnabey grë guiedz, tipse rac zho laa zho racntseeb lo Dios rlëenie zho me, ni rlëenie zho men ne bzooblo me pxeel me lo guidzliu.

²⁷ Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho menladz no ni grë menzit, tipse bnediidz zho psacsi zho Jesús, men ndzon ne bzooblo luu pxeel luu biaadgun xtiin luu lo guidzliu nu. ²⁸ Grëse zigne psanle luu diidz, scase been zho. ²⁹ Ni scaque nina, bui ganle zha racladz zho ctseb zho no parne peet gneedraa no; luu nac men ne gocnien no ne nac no zha ne rdziuuñ xtiin luu, zeena gdzieebd no cseed no miech xtiidz luu. ³⁰ Laa no rnab lo luu, beenguiac grë men rzacné, been grë milagr nroob, blu grë ncuane gzee zdoo miech; zeena gan zho ganle men nroob, men ndzon nac Xpëed luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grëse zho laa zho bgaaraa guielbiini ne bdeed Espiritu Sant lo zho; peet rdziebdraa zho laa zho zieseed miech Xtiidz Dios.

³² Len dze co, grëse zha ne riladzle Jesús ga, tibaque nac zho, tibaque rnee zho, tibaque nac mine zienie guic zho. Nod zha ne guiab lose zho yquini ncuane rap zho; sinque grëse ncuane quianie zho chen grë zho naca. ³³ Grë zha poxtl co, zeene rseed zho miech zha brieegan Jesús, nzian zha ne riladz me; rlupaa ne Dios nacie zho.

³⁴⁻³⁵ Ne nligaa tipse nac zho grë zho, nod zha ne guiab ne guiend pe yquini, sac grëse zha ne quianie liu, zha ne quianie nzian yu, rto zhow dzigo rdeed zho dimi co rguiz grë zha poxtla lo zha ne rquina. ³⁶ Sca been tib men ne nacgrë zho lë José. (Zha xti Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.) ³⁷ Pto me tib lë liun me, dzigo bdeed me dimi co lo zha poxtl, bdiiz zhow.

5

Znu bzhaac Ananí grop Safir

¹⁻² Tib mgui lë Ananí, laa tsieel me lë Safir; ye me pto tib lë liun me. Gonlo tsieel me, tel palal dimi ne bdo liu co, bzhenga me zhisa. Zeene laa me ziesan mine biaan ga, lo poxtl, rëb me lëë grë dimi ne bdo liun me ga. ³ Dzigo rëbchaa Pedr lo me:

—Ananí, ¿pe nacne bdeed luu diidz bzëëb mendox zdo luu? Mendox i gon noquii luu nan luu yquidiee luu Espíritu Sant, rnee luu lëë grë dimi ne bdo liu luu nu. ⁴ Bien ganle chen luu liu co. Dimi ne bdiizh zhow, chen luuw, niac niun luuw zigne niacldazta luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocldaz luu nquidiee luu.

⁵ Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho. ⁶ Dzigo güey bla zha nguieg pchel zho ngutoo co lar, blis zho me ga laa zho ziequeets me.

⁷ Wdzeelaaque goca zeene laa tsieel me bdziñ, ni lalnu güeynied guic me ne laa tsieel me gutle. ⁸ Bnabdiidzaque Pedr lo me, rëb Pedr:

—Bnë dien, ¿pe nli lëë grë dimi ne bdo liu to nu?

Pquiab wnaa co, rëb me:

—Nliw, lalgui pto now.

⁹ —¿Pa briece pensar qui lo to grop tsieel to? —rëb Pedr—. Ne squi tipse bnee to nan to yquidie to Espíritu Sant; dol nroob i gon been to lo Dios. Laa zha ne güeyqueets tsieel luu blansole ro yu nu, ni niina gon laa zho güeyaque luu.

¹⁰ Diidz co blozh briece ro Pedr, znuse biab wnaa co liu, guchedraa me ga. Zeene laa gza zha nguieg co bzëëb len yu, laa me nixle ga; gon zho gutle me, dzigo blis zho me güey zho güeyqueets zho me cue xpa tsieel me. ¹¹ Grëse zha ne gon sca goc men co grop me, zha ne bingaaw, zigta zha ne riladz Jesús a zigtagaa grëraa miecha, per nli bdzieb zho.

¹² Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho.

¹³ Grëse miech ne rcaalsa ga, rleynie zho grë zha poxtl co, nzian zho riladz mine rseed zho, per rbigd zho gacgrë zho zho.

¹⁴ Zigse zie dze, scase racndalraa miech ne rzëëb xnëz Jesús, mguisaque wnaasaque laa zho riladz me dib zdo zho. ¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë men rzacnë, rguix zho me nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë men co zeene laa Pedr ted.

¹⁶ Haxta grë guiedz win ne ndxie gax Jerusalén ga, rriee grë miech rdziñnie zho grë men rzacnë, no grë men co noguitnie mendox; grëse zho runguiac zha poxtl co zho.

Bio grë zha poxtl ladzguiib

¹⁷ Zeene gon men ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho, ¹⁸ bnabey zho bgaa zho psëëb zho zho ladzguiib stib. ¹⁹ Pcow liu co, guieela bdziñ tib xanjl Dios pxal me ro ladzguiib, blëe me zho ga; dzigo rëb me lo zho:

²⁰ —Goltsie len yadoo, grëse miech ne ndxie ga golnee lo zho, zeena gacnan zho zha yгаа zho guielmban ndzon ne nodeed Dios niina.

²¹ Biinigazh liu, silgaw laa zho bdziñle len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa men ne nac pxoz nroob ga, grë me zha ne nacie me, bnabey zho ycaalsa zha ne nac wxtis ni grë zha non lo menguedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib. ²² Bdziñ zho ro ladzguiib, ni tib choot guien leen co; rzhitsaque wbire zho güeynie zho diidz, ²³ rëb zho:

—¡Choot guiend len ladzguiib! Dziits niooga bdziñ no, ga zo zha ne quianap; per zeene bzhial ro ladzguiib bziaab no, bdzion no choot guiend leen co.

²⁴ Grë pxoz ne rnabey, ni men ne zo lo menguiib ne rquianap yadoo, zeene bin zhow, rdzieldraa zho zha gun zho. ²⁵ Lëëtaaque sca no zho, zeene bdziñ tib zho rëb:

—Zha ne gon bloo to ladzguiib ga, laa zho nolaque len yadoo noseed zho miech.

²⁶ Lëëlëd brieen men ne zo lo grë menguiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho. ²⁷ Zeene bdzinnie zho zho lo grë zha wxtis co, dzigo rëb men ne nac pxoz nroob ga lo zho:

²⁸ —¿Pe nacte ronde to diidz? Led pso no diidz lo to cseetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzdo! to no ne no bdziuut me.

²⁹ Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no. ³⁰ Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz. ³¹ Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo dol. Ni Jesús gon, gdeed guielbiini lo grëse men Israel gbiire gbig zho lo Dios stib; zeena gunquizhd me zho xtol zho.

³² Mine rnee no lo to nu diidzliw, nozhal bdziona, ni led loxaque nodsegaa; sinque ye Espiritu Sant men ne rxeel Dios racnieñ grë zha ne ron xtiidz me, ye men co quianee ganle ne nliw.

³³ Zeene bin zho sca rëb Pedr, blëëye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menguiedz; dzigo guso me bnabey me brieen grë zha poxtl co nëz ley, ³⁵ bnee me lo grëraa zha ne ndxie ga, rëb me:

—Grëse to menguiedz, laa naa rso diidz lo to, golcobey gon dien pe gun to zha qui. Golguien ganle, nonguielda ne lega mine gacladzata to gun to zho.

³⁶ Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga. ³⁷ Laa len iz ne nodop lë miech, scaque brieequia tib men Galilé brieelë Judas. Ndal zha ne gocnie me, per zeene laa me gut scaquaque nëzrii, nëzrec bliaal grë zha ne gocnie me; brieelodaque pe niun me. ³⁸ Gane nagon rne naa lo to, mazd peët gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, dzziñ dze ne nitlow. ³⁹ Laa telne nligaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho. ¡Telne guiab to gnitlo tow, nande to nend Dios ga tilnie to!

⁴⁰ Grëse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grë zha poxtl co, bdiñ zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grëtaa mine pteed grë zha non co zho loxaque ne riladz zho Jesús. ⁴² Ib psand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëë Men ne zëëble diidz cxeel Dios lo guidzliu ga nac Jesús.

6

Bzo gadz zha ne gun xyudar poxtl

¹ Ni ne len dze co quaiyac nziandraa miech ne rzëëb xnëz Jesús, dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuaa ne row zho, rgaad zho lal mine rgaaz grë wnaa viud ne nac zha Israel.

² Dzigo nagne bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnan to ganle, grieelodraa ne noque so dzian no dien zha ygaaz ncuaa ne yquün to, sac gon nonguielda csaan no mine nac xtsiin no, ib none guioeedraa no miech Xtüdz Dios. ³ Min co nagon, mazd golzo gadz zha bgui ne gun dziin co, lëëraasi golguien cho gzo to; golguib zha ne ndzinli, zha ne nixbiini, zha ne nacie Espiritu Sant; ⁴ zeena sca guioob lo no gzodiidznie no Dios, gnab no lo me, ni cseed no grëraa miech Xtüdz me.

⁵ Grëse zho rëb, wen sca gaca. Horcogazh psilo zho ble zho zha ne so gun dziin co. Bzo zho tib men lë Lip, tib men lë Prócoro, tib men lë Nicanor, tib men lë Timon, tib men lë Parmen, tib men lë Xteb, rlupaa dib zdo me rliadz me Dios ni nacie Espiritu Sant me; ni tib men Antioqui lë Nic, mazd glo Nic goc tib zha ne bleyniedox grë zhiwseed zha Israel. ⁶ Dzigo güeynie zho gza zha co lo zha ne nac poxtl. Blozhse bnab poxtl lo Dios gacnieu me zho, dzigo pxobnia poxtl guic zho, bnab zho lo Dios gdeed me guieibiini lo zho.

⁷ Zigse zie dze, laa Xtüdz Dios quiaaazraa dib Jerusalén. Nzian grë zha ne rzëëb xnëz Jesús, haxta grë men ne nac pxoz, nzian zho laa zho bliladz me dib zdo zho.

Bnaaz zho Xteb

⁸ Goc palal dzew, nzian grë milagr nroob ne run Xteb, sac tibaque sca dib zdo me rliadz me Jesús, ni nacie Espiritu Sant me.

⁹ Laa tib dze, brieequia bla zha ne rie tib xyadoo win zha Israel, lë “Esclavos Libertados” gocladz zho ndiidiidznie zho Xteb. Brieaque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gocgza zha co rlëë zho lo Xteb. ¹⁰ Gonse zho rlëbd xtiidz zho lo Xteb, sac niapse Espiritu Sant rdeed guieibiini lo me, rien me pe rnee me lo zho; ¹¹ dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹² Zeene bin menguedza, blëë zho; nagne bnabeyaque zha ne rnabey lo menguedz bgaa Xteb güeyzo zho me lo wxtis. ¹³ Ni güeynie zho bla zha ne lega bnexuu, rëb zho:

—Nliw, rtsidil mgui qui xyadoo ne, rtsidil me xley ne. ¹⁴ Bdzionpaa no gon quianee me laa Jesús men Nazaret ne quiazeet zho dib i ctsil yadoo rii, ni ctsë me ley ne psan Moisés lo xmenbol ne.

¹⁵ Horco zeene laa grë zha wxtis co ni grëraa zha ne ndxie ga bui lo Xteb, gon zho tib biini nroob ne riab lo me, masaque rlu me zig rlu tib xanj Dios.

7

¹ Dzigo bnabdiidz men ne nac pxoz nroob ga lo Xteb, rëb me:

—¿Bné dien pe nli quaiyun luu grë ncuaa ne rnee zho i?

² —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë

Mesopotam, briequia Dios ndzon ne no gbaa lo me, rëb Dios ³ greec me ga, csañ me grë menlidz me, tsie me nëz ne glutaa Dios lo me.

⁴ Nacne briece me xtan zha Caldë ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina. ⁵ Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaanniew. ¡Ni laa me quianied mëed len dze co! ⁶ Rëbgazh Dios lo me, ib zieban grë zha xpëed me ga ladz beñ dipse len tap gayoo iz, ga csacsi miech zho guncun zho zho dziin. ⁷ “Per ib tedsod sacsi naa zha ne csacsi zho ga”, rëb Dios, “ni ga greec zho glanso zho nu, nu goolnie zho naa.”

⁸ Ni parne glu ib zac miñe bnee Dios lo Abraham ga, dzigo psañ me diidz grëse mëedbgui ne greequia lo xtií Abraham none tso tib bey lad zho. Min co nagon, zeene laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

⁹ Ziese pxozgol ne ga, blëenie zho bets zho zha ne lë José, pto zho José lo men ne zie wto nëz Egipt. Ni ne nacnie Dios José, ¹⁰ psilaa me José lo grëtaa guielnë ne bded José, ni gocnieñ me José beenbey rey Egipt José. Ib psaand me José, bdeed me guielbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuaañ non ne no lidz rey, me bnabeya. ¹¹ Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grë zha ne goc pxozgol ne ga, guien draa pe gow zho. ¹² Laa zeene bin Jacob laa zhobxtil bií no Egipt, dzigo pxeel me zho güeyxi zho zhob ga.

¹³ Zeene goc chop vuelte ziexi zho zhob Egipt, dzigora gocnañ zho bets zho ga rnabey Egipt; niiclegaa rey cow, hor coraa beenbey me bets José. ¹⁴ Dzigo bnabey José güeyxi zho pxoz me Canaán, güeyxi zho tsiel zho, güeyxi zho xpëed zho. Lo grë zho rga zho tsongal tsiin, laa zho bdziñ Egipt.

¹⁵⁻¹⁶ Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho. ¹⁷ Grë zha ne briequia lo xtií zha gol co, zha ne na guiab ne nac menladz ne, ndal iz ne bio zho Egipt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo, ¹⁸ laa men ne nac rey Egipt len dze co, psilo ptsidiñ zho; sac rsoladzdraa me grëtaa dziin ne been José lo menladz me. ¹⁹ Psacsi me zho, been me zho zigne gocladztaa me, haxta bnabey me grëse mëedbgui ne ral gan draa zho win parne guet win.

²⁰ Len dze copaa nagon gol Moisés, tib mëed niow nac win. Tson mëe bloolan xniia win win, ²¹ laa zeene brieelodraa ngolan me win, dzigo güeysañ me win tib ro guiubee Egipt, ga bdziel tib xindzoo rey win. Wnaa co gon win, biaan win lo me zig tib xpëed me; ²² haxta bioxco me grëse wseed ne rac zha Egipt, pseed win. Zeene laa win broob, tib men nixbiini goc win, niicle ne gnee wina, niicle ncuaañe gungaa wina.

²³ Choo iz rap Moisés, zeene biab guic me güeyted me lo menladz me. ²⁴ Dzigo gon me laa tib zha Egipt quiaguin tib zha Israel; nacne bzëëbaque me bla me zho, beet me zha Egipt co.

²⁵ Sca been Moisés, nañ me niñ grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw. ²⁶ Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladzaque zho. ²⁷ Dzigo biasaque tib

zha ne noquiaaw ga pcheep zho me, ntseeb rac zho rëb zho lo me: “¿Cho bzo luu guiaadnabey luu no, guiaadlisquigaa luu dien pe nodziuuñ no? ²⁸ ¿Te racladz luu ye gutaque luu no zigne beet luu zha Egipt co nieeg?”

²⁹ Zeene bin Moisés sca rëb zha co, hor co bzhooñ me bey me nëz xtan zha Madián. Nëz co ptsieelnia me, ga gop tsiel me chop mëëdbgui.

³⁰ Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anjl zo grołtaa tib lo yag zarz, masaque rso bel lo yag co. ³¹ Bzee zdoo me, lëëtaque laa me zie gbiggax me, zeene bin me tsi Dios rëb Dios lo me: ³² “Naa nac Dios ne bliladz pxozgol luu Abraham, pxozgol luu Isaac, pxozgol luu Jacob.”

Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. ³³ Dzigo bnee Dios stib, rëb me lo me: “Blit lab luu, sac gax lo naa i zo luu. ³⁴ Laa dze nagon bdiñ ne laa naa csilaa grë zha Israel ladznia zha Egipt; sac ran naa zha nactaa grë guiełnë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga.”

³⁵ Dzigo laa Dios pxeel Moisés ziesilaa me zha Israel; niicle ne glo rëb zho lo me: “¿Cho bzo luu guiaadnabey luu no, guiaadlisquigaa luu dien pe nodziuuñ no?” Per me bzo Dios bnabey lo zho, blee me zho Egipt.

³⁶ Nzian grë milagr, nzian grë ncuaane nroob ne gzee zdoo ne beñ Moisés blee me zho ga; zigtaa leñ guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse leñ choo iz ne bzënie me zho ga.

³⁷ Moisés ga bzeet lo pxozgol ne, ne laa Dios gnabey lo xtiique zho griequia tib men ne cxeel me guiadteed xtiidz me, zigne pxeel me Moisés.

³⁸ Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guiełmban. ³⁹ Per ib bind zho xtiidz me, leł gocladz zho mbiire ney zho Egipt stib, ⁴⁰ bnabey zho Aarón rëb zho: “Bzaa tib mdio tedner lo no gacnieñ no laa no guioo Egipt stib; sac loxaque biadbee Moisés no ga, na choot nanñ dien yo Moisés.”

⁴¹ Dzigo bzaa zho tib ngon yeen goc zhimdio zho, haxta beet zho grë ma ne bloogon zho lo mdio co; bleynie zho ncuaane bzaania zho. ⁴² Nacne wbinładz Dios, psaan me zho; psilo zho bleynie zho grë ncuaane ran zho zhan gbaa. Beñ zho zigne bzeetse zha ne biadteed xtiidz me padzeela, zeene rëb zho: Gołsoladz ganle,

laa ne nleynie to naa dipse leñ choo iz ne bio to grë dan bidz co, laa ne niut ma ne ngogon to lo naa,

⁴³ leł grë mdio ne bzaa to, mdio co bleynie to, lo mdio co pquitsgzhib to. Mdio ne rnee to Moloc,

zaatne zieetaa to tibaque ney to lidza,

zhmel mdio ne rnee to Renfán, pa csaan to ma.

Mincoexe waa, laa naa cuee to ladz to,

gzonëz naa to guey to grë dan ne riaan zitraa lo guiedz Babiloin.

⁴⁴ Leñ dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. ⁴⁵ Goc bla iza, zeene blozh bnitlo Dios grë guiedz ne brin nu glu, laa Josue blansonieque yu co. Haxta leñ dze ne goc David rey, bii lëew nac xyadoo zho.

⁴⁶ David goc tib rey ne gocziuu lo Dios, bleynie Dios me, dzigo gocladz me nzaa me tib yadoo nroob zaatne mbëzlo zho Dios. ⁴⁷ Per brielod nzaa mew, Salomónraa goc rey ne bzaaw. ⁴⁸ Nli laa yadoo co biala, per tel Dios, men

nroob nac me, led yed me cuëz len grë yu ne rzaa miech. ⁴⁹ Zigne zho bneeque lo Xtiidz me, zeene znu rëb me:

Gbaa nac zaatne zoob naa,
laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziiladz naa?

⁵⁰ ¿Niace led naad bzaa gbaa?, ¿niace led naad bzaa guidzliu?

⁵¹ 'Golgona sca ganle —rëb Xteb—, zigne beenaque grë pxozgol to ga padzeela, scadaaque gon quiaayun to niina. Miech nad, miech ntseeb zdoonac to; ib ronde to mine rnee Espiritu Sant. ⁵² Tel pxozgol to, nëlthe gondze zho grë zha ne pxeel Dios biadnee xtiidz me; haxta beet zho grë zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidil to me, bnabey to bgaame beet to me. ⁵³ Tibaque squi quia to quiaquiits to Xley Dios; xanjlpaa me biaadsana lo to, ni runde to mine rnabeya.

Beet zho Xteb

⁵⁴ Zeene bin zho sca rëb Xteb, blëeye zho haxta rowye ro zho rwi zho lo me. ⁵⁵ Laa me, ne nacie Espiritu Sant me, zeene blis lo me bui me nëz gbaa, gon me lo guielndzon ne no Dios, gonpaa me laa Jesús zo cue Dios nëz derech.

⁵⁶ Dzigo bnee me, rëb me:

—Ranpaa naa niina gon nzhiale gbaa, laa men ne pxeel Dios biaad lo guidzliu ga, laa me zo cue Dios.

⁵⁷ Mine been zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. ⁵⁸ Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

⁵⁹ Sca nodeedquie zho me, laa me rnab lo Dios rnee me:

—Jesús, luu ne nac luu men ne rnabey, luu pcaania zhiespirtu naa.

⁶⁰ Dzigo pquiitzgzhib me, ni pquiaa me stib redz nroob bnab me lo Dios, rëb me:

—Dios, luu ne nac luu men ne rnabey, dol ne quiaayun miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8

¹⁻² Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquielné me.

Len dze co, psilo zha ne sca rlëenie zha ne riladz Jesús, ptsidil zho grëse zha ne riladz me; dipse len guiedz Jerusalén pquianał zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nace poxtl biaan Jerusalén. ³ Ntseeb rac Saul, rzac me tebaa zha gnitlogazh me grëse zha ne riladz Jesús. Stib yu stib yu zie me, riebezhoon me zho lidz zho, mgui wnaasaque rey me riesëeb me zho ladzguib.

Bdzin Xtiidz Jesús nëz Samar

⁴ Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech. ⁵ Zig nac Lip, zeene bdzin me tib guiedz nëz Samar, psilo me bnee me Xtiidz Jesús lo grë miech co. ⁶ Ndal zho rquiaadiag mine rnee me, rzee zdoon zho ran zho grëtaa milagr ne run me. ⁷ Ndal grë zha ne noguitnie mendox, riac zho, rquiaadan grë mendox co redz zeene laa ma rzhoon; grë

zha ne gutoo, grë zha ne nde ni, runguiac me zho. ⁸ Grëse miech ne no guiedz co, rley zho.

⁹⁻¹¹ Ga no tib men ne rool diidz dox, lë Simón. Ye me rzee zdoo miech grë ncuaañe run me. Nzianle iz sca noquidie me zho, grëse menguedz runbey me, haxta niats rac me rnee me guien draa cho zig me. Grëse zho, haxta grë zha non rbig lo me, rzac zho lëe poder ne rap Dios ga nacie me.

¹² Laa zeene bnee Lip lo grë miech co gocnañ zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis. ¹³ Dzigo yequ meñ ne lë Simón ga bliladz Jesús, ye me laa me brobnis; zaatne zietaa Lip nañ me zhits Lip, rzee zdoo me ran me grëtaa milagr nroob ne run Dios.

¹⁴ Grë zha poxtl ne no Jerusalén, zeene gocnañ zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co. ¹⁵ Laa zho zie gnab zho lo Dios yгаа grë zha ne bliladzle Jesús ga guielbiini chen Espiritu Sant; ¹⁶ sac zeene bliladz zho Jesús, loxaque brobnisse zho, gard yгаа zho guielbiini co. ¹⁷ Bdziñ zho pxobnia zho guic grë men co, bñab zho lo Dios; dzigo grëse men co laa me bgaa guielbiini ne rdeed Espiritu Sant.

¹⁸ Zeene gon men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espiritu Sant, dzigo laa me rdeed dimi, ¹⁹ rëb me:

—Golneedz poder qui lo naa; zeena ye naa zha ne cxobniataa naa guic yгаа zho guielbiini ne rdeed Espiritu Sant.

²⁰ Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grë xtimi luu i! ²¹ Ni lalnu rieguald luu gun luu dziin rii, ni gdziñdгаа dze gun luuw; sac mbed zdoo luu, zienied guic luu gun luu miñe rnabey Dios. ²² Blee zhgab yozh qui guic luu, bñab lo Dios zeena togo squia zdoo me luu, gunquizhd me luu dol ne squi bza zdoo luu i; ²³ sac rlu niapse guielntseeb nonie guic luu, ni lëeque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

—Golgun guielnzaac, golnab lo Dios yquia zdoo me naa, zeena ygaad naa grë guielnëdoh ne rnee to i.

²⁵ Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbiire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

Bzodiidznie Lip tib men Etiopí

²⁶ Laa Lip no Samar ga, tib dze brieequia tib xanjñ Dios lo Lip, rëb me tsie Lip nëz ne rriee Jerusalén zie nëz Gaza.

²⁷ Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí. ²⁸ Zobme tib len carret nroob zie me ga; znu wbiirele me Jerusalén güeygan me Dios. Laa me zob len co quialab me lo Xtiidz Dios miñe pquiiaa Isá, men ne biadteed xtiidz Dios padzeela.

²⁹ Dzigo bñabey Espiritu Sant Lip tsie Lip yгаа carret co lo Lip. ³⁰ Zeene bgaa carret co lo Lip, bin Lip pa lo nolab men co; nacne rëbchaa Lip lo me:

—¿Pe rien luu cho raquiet zaatne nolab luu i?

³¹ —Riend naaw —rëb me—, rquinn tib zha ne gnë lo naa dieñ zha naca.

Dzigo bredz me Lip biepp Lip len carret co, güey sob Lip cue me.

³² Znu rnee zaatne nolab me ga:

Zigne racse mēcwxiil yeen zeene rnaaz zho ma rut zho ma, scadaa ndooladz goc me, peet beend me zeene laa zho zienie me. Ni zigne roptsied ma zeene rtsiib zho ma, scaque ni tib diidz ptsired me lo zho.

³³ Niicle ne gon zho scataa ndooladz me, per psacsi zho me. iPa lotaa bdziñ guielntseeb ne been grē menladz me! Sac gon, ptiche zho xquielmban me lo guidzliu.

³⁴ Dzigo rēbchaa men co lo Lip:

—Bzhiguiel bnē lo naa dien, cho nu znu rzeet Isá lo rii. ¿Pe me bded min rii, te stib zhow ye?

³⁵ Dzigo rēb Lip lo me Jesús raquiet ga, ni bnee Lip grēraa miñe nac zhiwseed Jesús. ³⁶ Laa zho no nēz, tibaque zeene bdziñ zho tib lugar co no nis; rēbchaa me lo Lip:

—iBui ganle laa nis no nu! Mazd bzhiguiel pchoobnisgazh naa.

³⁷ [—Zaca —rēb Lip—, totsaque dib zdoo luu rliladz luu Jesús.

—Rliladz naa me —rēb men co—, rliladz naa ne nli Xpēed Dios nac me.]

³⁸ Dzigo bnabey me blēz carret co ga. Biet me leen co grip me Lip bzēeb zho lo nis co, ga pchoobnis Lip me. ³⁹ Blozhse ga, laa Espiritu Sant blis Lip gondraa me Lip; per rley me laa me bio nēz stib, laa me zie.

⁴⁰ Zeene laa Lip brieequia, laa Lip nole guiedz ne lē Azot. Ga psilo me zigse zie me, guiedz ne rdetaa me rnee me Xtiidz Dios lo grē miech co. Sca bio me nēz, haxta bdziñ me guiedz Cesarea.

9

Gon Saul Jesús

¹ Laa mguí ne lē Saul ga, per nli ntseeb rac me, tibaque ne laa guic me zienie gut me grēse zha ne rliladz Jesús. Güey me lo men ne nac pxoz nroob, ² bdeed pxoz co ti xtiidz me guey lo grē zha ne zo lo xyadoo zho nēz Damasc, parne gacnie zho Saul gnaaz zho grēse zha ne rliladz Jesús; zha ne ygaataa niicle mguíw niicle wnaaw, gzobdoo zho zho tsiesan zho ladzguiib Jerusalén.

³ Laa Saul bio nēz, laa Saul zie. Zhile gdziñ me guiedz Damasc, tibaque zeene brieequia ti biinidoo zhan gbaa biab zaatne zie me ga. Groltaa lo biinidoo co biaan me, biabgazh me liu. ⁴ Liu nix me, bin me zēeb ti tsi men co rnee lo me:

—Saul, Saul, ¿pe nacne quiana luu naa?

⁵ —Been guielnzaac —rēb me—, bnē dien cho luu.

Dzigo pquiab men co, rēb me:

—Naa nac Jesús men ne squi quiatsidil luu. [Lēeque luu gon nosacsi luu i, rzac luu zigne rzac ngon ne rcaanni, ni lēeque lo guiiib lots ne rtseb zho ma riecaanni ma.

⁶ Rdzieb Saul, rzhidz me lo dzeb co rēb me:

—Bzhiguiel bnē dien, ¿pe racladz luu gon naa niina?]

Rēbchaa Jesús lo me:

—Guche i, güey Damasc, ga gnē zho ganle pe nac miñe no gon luu.

⁷ Zha ne ziegza Saul ga per nli bdzieb zho, haxta ni gacdraa gnee zho; loxaque tsi men co ron zho zēeb, per choot ran zho.

⁸ Laa Saul guche ga. Zeene laa me pxal lo me gwi me randraa me, jlaa lo me pcowle! Zha ne ziegzale me ga bzhen nia me bdziñ me Damasc. ⁹ Tson dze sca brieelod nian me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne riladz Jesús lë Ananí; dzigo gon me Jesús, bredz Jesús me. Pquiab me, ¹¹ dzigo rëbchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bñabdiidz meñ Tars ne lë Saul. Zeene quiazodiidznie me naa, ¹² blu naa lo me laa tib zha lë Ananí bdziñ rxobnia guic me, zeena gbiire gan me stib.

¹³ Pquiab Ananí rëb Ananí:

—¿Saul ye? Ziyon naa name zha nac grëtaa ncuaañe noyuy me Jerusalén, notsidil me grë zha ne riladz luu. ¹⁴ Haxta pxoz nroob ne rnabey bdeed diidzbey gnaaz me grëse zha ne no nëz rii.

¹⁵ —Güey —rëb Jesús lo Ananí—, sac laa naa bzooblöle me, ib me tsie grë guiedz zit tsieseed me miech xtidz naa, me gneew lo grë zha rnabey, ni lo grëгаа zha Israel. ¹⁶ Na naa glu lo me ganle zha nac grë guielñe ne gan me, zeene laa me quiaayunle xtsiñ naa.

¹⁷ Dzigoraa güey Ananí zaatne no Saul ga. Bdziñ me, pxobnia me guic Saul, rëb me lo Saul:

—Saul, bina ganle bets, laa Jesús gon, meñ ne rnabey, meñ ne brieequia lo luu zeene ziaad luu nëz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guielñiini ne rneedz Espiritu Sant.

¹⁸ Zigne sca bnee Ananí, laa lo Saul biacgazh; lega zigne nac xmed mel nac grë ncuaañ co brieë lo me. Horcogazh laa me brobnis. ¹⁹ Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grë zha ne riladz Jesús Damasc ga, dzigo brieë me ²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneechaa zho:

—¿Led lëë meñ qui ga name scataa ntseeb rac Jerusalén, notsidil me grë zha ne riladz Jesús? Conque nac diidz min co ziaad me nu, ziadnaaz me zho tsiesañ me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëë meñ ne zëëble diidz cxeel Dios lo guidzliu ga, nac Jesús. Grë zha Israel ne no ga, riendraa zho dien pe giladz zho.

²³ Goc bla dze no me ga, laa grë zha Israel ne no ga blëë lo me; bñediidz zho rëb zho laa zho gut me. ²⁴ Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnañ mew, ²⁵ nacne gol ti pcow liu pcaalsa grë zha ne bliladz mine bnee me, bloo zho me ti len chüicud nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brieë me ga.

Bdziñ Saul Jerusalén

²⁶ Zeene bdziñ Saul Jerusalén gocladz me ndziñ me lo grë zha ne riladz Jesús ga, per lel bdzieb zho zeene gon zho me, sac riladzd zho ne nli yele me bzëëb xnëz Jesús. ²⁷ Dzigo güeynie Bernabé me lo grë zha ne nac poxtl, bzodiidz Bernabé lo zho zha gon me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, len dze ne blëz me Damasc. ²⁸ Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

²⁹ Brieequia bla zha Israel ne rnee xtiidz zha Gres bdilidiidznie zho me. Zhisaque goca, laa zho gocladz niut zho me. ³⁰ Zeene gocnañ grë zha ne riladz Jesús gaw, dzigo güeyañ zho me guiedz Cesarea; ga brieë me laa me zie nëz Tars, zaatne nac ladz me.

³¹ Leñ dze co, grëse miech ne no xnëz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guiełxtseeb nodraa zho; zigse zie dze rioguicraa zho zha nac Xtiidz Dios. Grëse zho rioxco zho mban zho zigne rnabey me, tibaque nacnie Espiritu Sant zho. Ni scagaa, zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne rliladz Jesús

³² Leñ ngbidz coque, zie ziaad Pedr rieted me lo grëse zha ne rliladz Jesús. Nacne güeyted me lo grë zha ne no Lida. ³³ Guiedz co, beenbey me ti mgui lë Ené, gocle xon iz nix mgui co, ib gacd së me sac dipse me gutoo. ³⁴ Dzigo rëbchaa Pedr lo me:

—jEné, niinagazh gon laa Jesús gunguiac luu! Na zeen guche i blis xta luu.

Zigne sca bnee Pedr laa men co biac, laa me guche ga. ³⁵ Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶ Gaxaque Lida riaan ti guiedz lë Jop. Jop ga no ti wnaa ne rliladz Jesús, lë Tabit (laa xtiidz zha Gres nee zho me Dorc). Nquialadz me miech, grë zha ne guieñd pe yquuin, ruñ me xyudar zho. ³⁷ Lega nacle blanguidz me, laa me gut.

Zha ne rliladz Jesús ga, laa zho noxco dieñ zha ygueets me. Bgaz zho me, blozhse ga güeyxob zho me sti leñ yu ne riaan nëz glaa. Xco co no zho, ³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹ Zigne bdziñnie zha co diidz, zienalgazh Pedr zhits zho. Bdziñ zho lidz men co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me. ⁴⁰ Dzigo bnabey Pedr briece zho ley grëse zho, laa me biaan ga, pquuitsgzhib me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhial, zeene gon me laa Pedr zo ga, laa me bzobli. ⁴¹ Bzhen Pedr nia me, bliso Pedr me, dzigo bredz Pedr grë zha ne rliladz Jesús ga, ni grë wnaa viud co; gon zho laa me brieebanle.

⁴² Dipse lad guiedz co bzhoob diidz sca brieeban wnaa co; grë zha ne bina, ndal zho bliladz Jesús dib zdoo zho.

⁴³ Nzianlaa dze biaan Pedr ga, blëz me lidz Simón ti men ne rcuudz grë guid ma.

10

Güeyzodiidznie Pedr Cornel

¹ Guiedz Cesarea, ga no ti men lë Cornel, rnabey me lo ti partid menguiib lë partid Italian. ² Zigtaa mew, zigtaa grë menlidz mew, dib zdoo zho rliladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaañe rgad zho lo grë zha ne guieñd pe yquuin.

³ Tib dze, bdzele dzew tibaque zeene gon me laa ti xanj Dios bdziñ zaatne zo me, bredzlë anjl co me. ⁴ Dze rwi me lo anjl co, rdzieb me laa me pquiab. Dzigo rëbchaa anjl co lo me:

—Gocnañ ganle grëse mine rnab luu lo Dios ron mew, ni ran me grëtaa yudar ne squi quaiyun luu lo grë zha ne guieñd pe yquuin. ⁵ Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men lë Simón Pedr. ⁶ Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.

⁷ Zeene laa anj̄l co zey, dzigo bredz me chop zha ne quia dziin lidz me, ni bredz me ti zhaguiib ne nacgr̄e zhaguiib ne zopaa gax lo me; dib zdoos zhaguiib co r̄iladz zho Dios. ⁸ Blozhse bzodiidz me lo gza zha co zha bzhaac me, dzigo laa me pxeel̄ zho ziexi zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. L̄eētaaque hor co laa Pedr biep n̄ez glaa guic yu ne rb̄ez me ga. Rcaabedz me, dzigo laga noyaclo ncuaane gow me laa me biep guic yu co ziezodiidznie me Dios. ¹¹ Dios nozodiidznie me, tibaque zeene gon̄ me laa ti lar nroob ziad-z̄eēb zhan gbaa, nzhidoo gzatap n̄eza laaw bdziñ lo me. ¹² Gr̄e lose ma no lo lar co, ga no ma ne rz̄e gza tap ni, no gr̄e ma ne rz̄e zigne rz̄e meel, ni no gr̄e ma ne rsiibe. ¹³ Horco bin me ti tsi men̄ co, r̄eb lo me:

—Pedr, ma ne racladztaa luu gow luu zac gut luu ma.

¹⁴ Pquiab me r̄eb me:

—iMin̄ cogaa nagon̄ grielod! Wlaltaa gard gow naa gr̄e ma beed qui.

¹⁵ R̄ebchaa men̄ co lo Pedr:

—Gr̄e ncuaane beenlayle Dios, nodne gnee luuw ncuaan̄ beed.

¹⁶ Blulo lar co tib, bluloquew stib, laa zeene bion̄taa gon̄ mew dzigo laaw biire bzoquia n̄ez gbaa.

¹⁷ L̄eētaaque laa Pedr no zhgab dien̄ pe nacne sca gon̄ me lar co, laa zha ne pxeel̄ Cornel ga bdziñ ro yu ne rb̄ez me ga, ¹⁸ rnabdiidz zho me.

¹⁹ Zhgab co no Pedr, zeene r̄eb Esp̄iritu Sant lo Pedr:

—Laa tson̄ zha bgui gon̄ ziaadguib luu. ²⁰ Biet, bnee lo zho. Ib peet tsienied guic luu ḡueynal̄ zhits zho, sac naa bnabey ziaad-xi zho luu.

²¹ Dzigo laa Pedr biet ga, bdziñ me lo zha ne pxeel̄ Cornel ga, r̄eb me lo zho: —Naa nac Simón Pedr. ¿Pe nac mandad ne ziaad to?

²² Pquiab zho r̄eb zho:

—Laa no ziaad xmandad Cornel, ti men̄ ne rnabey lo menguiib Cesarea. Laa me pxeel̄ no ziaad-xi no luu, sac ti xanj̄l Dios r̄eb lo me cxeel̄ me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoos me r̄iladz me Dios, gr̄ese zha Israel r̄leynie zho me.

²³ Dzigo bredz Pedr zho bded zho n̄ez len̄ yu; ga biaan̄ zho wdze co. Biiniraa liu zienie zho me, ye palal zha Jop, zha ne r̄iladz Jesús zienal̄ zhits me.

²⁴ Dze ne rac chop ngbidz briece zho Jop, laa zho bdziñ Cesarea. Laa Cornel bredzle gr̄e men̄lidz me, gr̄e zha ne ndzieeldiidz me; ndal̄ nac zha ne ndxienie me lidz me, quiamb̄ez me Pedr. ²⁵ Zeene laa Pedr bdziñ, briece me ḡueydzieelo me Pedr, pquiit̄sgzhib me lo Pedr nan̄ me niun̄ me Pedr zigne r̄iegan̄ me Dios.

²⁶ Dzigo bliso Pedr me, r̄eb Pedr lo me:

—iGuso i, nodne yquiit̄sgzhib luu lo naa! Bien̄ gan̄le samiechaque luu nac naa.

²⁷ Dzigo laa menguiib co guso ga. Nozodiidz zho laa zho bz̄eēb len̄ yu. Zeene bdziñ zho zaatne ndxie gr̄e miech co. ²⁸ psilo Pedr bnee me lo zho, r̄eb me:

—Nan̄le to gan̄le zha Israel naa, ni ib lo xley no rnabey nodne ziaab no lidz gr̄e zha zit, per ni tsiieelsad no zho; per laa niina laa Dios blu lo naa, gr̄ese miech ne beenlayle me nod pe nacne gbix zdoos naa gan̄ naa zho. ²⁹ Gacxe waa, zigne gocnan̄ naa laa to rbedz naa, zial̄nal̄gazh naa zhits zha ne pxeel̄ to. Nana sca, goln̄e dien̄ pe nacne bredz to naa.

³⁰ Dzigo bzodiidz Cornel zha bzhaac me, r̄eb me:

—Nadze rac tap ngbidz ga, zig znaw gon̄, no naa lidz naa nu nocuan̄ naa, ni nonab naa lo Dios. Tibaque zeene gon̄ naa laa ti mgui zole lo naa, masaque riaazbel xab me, ³¹ n̄e me: “Gocnan̄ gan̄le gr̄ese min̄e rnab luu lo Dios ron̄ mew, ni ran̄ me gr̄etaa yudar ne squi quiayun̄ luu lo gr̄e zha ne guiend̄ pe

yquuin. ³² Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr. Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.” ³³ Sca nagon në men co lo naa, nacne bnabey naa baaad-xi zho luu; ni xquizhgaa luu ne laa luu ziaad. Dios zobwi ganle, grëse no laa no ndxie nu par yquiaadiag no miñe bnabey me luu gnë luu lo no.

³⁴ Dzigo rëbchaa Pedr:

—iNaraa rien naa, led yed Dios cue miech dien cho nac zha Israel, cho nacgaa zha zit! ³⁵ Sinque grëse miech lo guidzliu, tel pa guiedztaa nac zho, rcaania me zho totsaque ron zho miñe rnabey me, ni rioxco zho zaacse rhan zho. ³⁶⁻³⁷ Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuane no). Zig nac dib Judé, desde ne psilo Juan pseed me miech Galilé, laa zho gocnaña. ³⁸ Ni nanaxe to ganle, bdeed Dios poder lo Jesús, pxeel me Espiritu Sant gocnie Jesús. Zaatne bdedtaa Jesús, pquia zdoo me miech, grë zha ne nosacsi mendox psilaa me zho ladznia ma; sacne ni Dios nacnie me. ³⁹ No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz, ⁴⁰ per zeene goc tson ngbidza laa Dios bleeban me, ni bneedz Dios diidz biire bdzian no me. ⁴¹ Led grëdraa miech gon me, loxaque nose bdzian me; sac ib Dios bzooblo no dzian no grë dzian ne been me. Haxta bdiowonie no me, bdionie no me, ⁴² ni pxeel me no gnee no lo miech gacnan zho ganle laa Dios bzo me, me gon guielwxtis gal dze ne laa Dios cuedz grëse miech, zigtaa zha guta zigtagaa zha mbana. ⁴³ Me ga bzeet grë zha ne biadteed Xtiidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

⁴⁴ Laa Pedr bii quianeeque, zeene laa grë zha ne noquiaadiag ga bgaa guielbiini ne bdeed Espiritu Sant lo zho. ⁴⁵⁻⁴⁶ Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdoo zho gon zho ye grë menzit rgaa guielbiini ne rdeed Espiritu Sant. ⁴⁷ Dzigo rëbchaa Pedr:

—iPeraa nadien gbiaaz ne, ne cchoobnisgazhd ne zha rii? Laa ne bdzianle ganle zigne rdeed Espiritu Sant guielbiini lo zha Israel, scaque bdeed me guielbiini lo zho.

⁴⁸ Dzigo bnabey Pedr brobnis zho, laa zho bzëëb xnëz Jesús.

Blozh ga bnee Cornel lo Pedr cuëz me ga ti bla dze.

11

Bzodiidz Pedr zha güey me lidz Cornel

¹ Grë zha poxtl ne no Jerusalén, ni grëraa zha ne riladzle Jesús zha ne no Judé, bin zho sca bliladz gza menzit co Xtiidz Dios. ² Dzigo zeene laa Pedr bdziñ Jerusalén güey bla zho güeytildiidznie zho Pedr. ³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëëb zhan gbaa, nzhidoo gzatap squina laaw ziaad nëz lo naa. ⁶ Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne

rzë zig rzë meel, ni grë ma ne rsiibe. ⁷ Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.” ⁸ Dzigo pquiab naa rep naa: “Min cogaa nagon grielod, wlaltaa gard gow naa grë ma beed qui.” ⁹ Nëchaa me lo naa: “Grë ncuaañe beenlayle Dios, nodne gnee luuw ncuaañ beed.”

¹⁰ Tson vuel sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹ Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa. ¹² Ni laa Espiritu Sant bneeque lo naa, no ganañ naa zhits zho, niicle ne zhazit nac zho; nacne bianañ naa. Ye gza xoop zha ne zialnie naa nu bzë bio no.

¹³ Bdzin no lidz men co, psilo me bzodiidz me lo no zha bzhaac me, në me len yu no me, zeene gon me ti xanj Dios, rëb anj co lo me cxeel me bla zha ne tsie Jop tsiexi zho naa ¹⁴ zeena gane naa lo me zha grielo csilaa Dios me lo dol grë menlidz me.

¹⁵ Laa naa psilo quiane lo me grë menlidz me, zeene grëse zho laa zho pcaania Espiritu Sant, ni bгаа zho grë guielbiini ne rdeed me zigne bgaaque new. ¹⁶ Ga nagon psoladz naa xtiidz Jesús men ne rnabey ne, zeene znu në me lo ne: “Nli nisse pchoobnis Juan miech, sangue to zгаа to guielbiini ne rneedz Espiritu Sant.” ¹⁷ Sca nagon pcaania zho Espiritu Sant, laa zho bгаа guielbiini ne rdeed me zigne bgaaque new. ¿Cho nac naa nadien ne glisqui naa miñe run Dios?

¹⁸ Zeene blozh bin zho grë miñe bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë menzit zrieelo gbìg zho lo Dios, gdeed me ti guielmban ndzon ne gdzind dze lozh lo zho.

Bliladz zha Antioquí Xtiidz Dios

¹⁹ Zeene sca pquianañ zho grë zha ne rliladz Jesús len dze ne beet zho Xteb ga, nëzrii nëzrec blialañ zho. No zho bdziñ haxta Fenicia, no zho bdziñ Chipr, nogaa zho bdziñ nëz Antioquí. Zaatne bdziñtaa zho bnee zho cho nac Jesús, per loxaque lo grë menladz zho bnee zhow. ²⁰ Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús. ²¹ Ni ne nacie Dios zho, ndal grë miech co bzëeb xnëz Jesús.

²² Grë zha ne no Jerusalén, zeene gocnañ zhow pxeelaque zho Bernabé güey Antioquí. ²³ Zeene bdziñ Bernabé Antioquí, rley me gon me scataa quiyunlay Dios grë miech co; dzigo pso me diidz lo zho ib csaand zho zhiwseed Jesús.

²⁴ Ti men dib zdoos rliladz Dios nac Bernabé, nacie Espiritu Sant me, ti miech wen nac me; gane zeene laa me bdziñ ga nzianraa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdziñnie me Saul Antioquí. ²⁶ Dipse ti len iz blëz zho ga grop zho, blozh pseed zho grë zha ne bliladz Jesús. Ga glopaa psilo ne laa grë zha ne rliladz Jesús brielé CRISTIAN.

²⁷ Len iz co blalaa zha ne noteed xtiidz Dios no Jerusalén. Dzigo brieed zho ga güey zho Antioquí. ²⁸ Lad co no tib men lë Agab, psiaab Espiritu Sant guic me bnee me laa ti gbin dox gan miech nëz Israel. (Ni nligaa scase goca, lëë gbìn co biaad len iz ne zobnabey men ne lë Claud.)

²⁹ Grë zha ne rliladz Jesús Antioquí, zeene bin zho sca rëb Agab, nacie bnediidz zho grë zho, tel palaltaa ncuaañe rgaa lo zho tib tib zho gdeed zhow

gaclo ti gon cxeel zho lo zha Judé. ³⁰ Dzigo ptop zho gon co, zeene laaw goclo, pxeel zho Bernabé grop Saul güeyšana lo grê zha rnabey ne zo lo zha ne rililadz Jesús nêz Judé.

12

Bio Pedr ladzguiib

¹ Len dze co psilo rey Herod notsidil me grê zha ne rililadz Jesús. ² Nnabey me bgaa Jacob bets Juan, beet zho Jacob lo spad.

³ Zeene gon Herod rley grê zha ne rnabey lo menguietz Israel ran zho zha rsacsi me grê zha ne no xnêz Jesús ga, dzigo nnabeyaue me bgaa Pedr bio Pedr ladzguiib; lëëtaue len dze co noyac lni Pascw. ⁴ Laa Pedr no ladzguiib, nnabey me bzo xon nêz menguiib quianap Pedr. Quiambêz me tedse lni co, laa me cuee Pedr gan grê menguietz zha csacsi me Pedr.

⁵ Grê zha ne rililadz Jesús, zeene gocnan zho scataa ndxienap menguiib Pedr no Pedr ladzguiib, psilo zho tibaue quianab zho lo Dios gacnien me Pedr.

⁶ Nacle diidz pa dze cuee Herod Pedr. Wdze ne guini liu co, laa Pedr nixguiesse len ladzguiib; tib ga caden zob ti nia me, tibga menguiib tib nêz cue me, ni zhaaque zo zla zha ne quianap ro ladzguiib. ⁷ Tibaue zeene biab ti biinidoo len ladzguiib, laa ti xanjl Dios bdziñ ga. Bdziñ me, pcaannia me cue Pedr, pcuaan me Pedr, rëb me:

—jNa seen guche i!

Zigne sca bnee anjl co, lega zhal caden ne zob nia Pedr ga bzhiala briew nia Pedr; ⁸ dzigo rëbchaanjl co lo Pedr:

—jPxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaanjl co:

—jWbix xab luu na, zeen dënal zhits naa!

⁹ Nalse Pedr zhits anjl co laa Pedr brieeg ga. Riend Pedr ne nli nosilaa anjl co Pedr, masaque rzac me nonixquieel mew. ¹⁰ Bded zho chop len yu zaatne ndxie menguiib ne quianap, laa zho bdziñ zaatne quia puert guib ne rrieo ro nêz. Zigne bdziñ zho, zhal puert co bzhiala; laa zho brieeg. Bzënie anjl co Pedr spalal, zeene goñ zho zaatne rdedlsa nêz co, dzigo laa anjl co psan Pedr ga.

¹¹ Dzigoraa bien Pedr led nonixquieeld Pedr, nli Dios pxeel xanjl me güeysilaa Pedr ladznia Herod, zeena gleyd zha Israel nian zho grê guielne ne nded Pedr.

¹² Dzigo laa Pedr zie nêz lidz Marí, xniaa Juan Marcw; lëëtaue hor co nzian zho ndxie ga quianab zho lo Dios. ¹³ Zeene bdziñ Pedr pcaannia Pedr ro yu. Brieeg ti ndzooop ne quia dziin ga lë Rode, zieso ndzooop dien chow.

¹⁴ Zeene beenbey ndzooop co tsi Pedr, rley ndzooop. Lo guielbley co niicle pxaldaque ndzooop ro yu, rias ndzooop zienie ndzooop diidz lo grê zha ne ndxie ga; rëb ndzooop laa Pedr bdziñ ro yu ga. ¹⁵ Per bliladzd zhow.

—jDieen pe rool luu! —rëb zho—. jNcuane gliladzd ne rnee luu!

—jCoo, nli lëë mew! —rnee ndzooop—, laa me zo ga.

—jLed meda, —rnee zho—, bod anjl ne quianap mew!

¹⁶ Sca no zho, laa Pedr bii nocaannia ro yu. Zeene güey zho pxal zho ro yu, bzee zdoo zho gon zho nli Pedra, laa Pedr zo ga. ¹⁷ Dzigo blunia Pedr lo zho gnee nguiedzd zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanjl Dios Pedr len ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrê zho. Blozhse ga, laa Pedr brieeg ga.

¹⁸ Zeene biini liu, grê menguiib ne pquianap Pedr len ladzguiib ga, rdziieldraa zho zha gun zho; sac ib biend zho dien yo Pedr. ¹⁹ Zeene laa Herod pxeel

zha ne ziebee Pedr ladtguuib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieë Judë zey me Cesarea.

Dow mziog Herod

²⁰ Len dze co, pcaalsa menüedz Tir ni menüedz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tlniedraa me zho, niicle zhagaaw laa zho gbig lo me; sac grëse ncuane rquiuin zho, grë guiedz ne rnabey me ga rrieew.

²¹ Dzigo bzo Herod ti dze ne tsie zho tsiezodiidznie zho me. Zeene goļ dze co, got me lar niazh ne racw rey; bdziñ me bzob me lo zhixcan me, psilo me bnee me lo grë miech co. ²² Goc palo quianee me, psilo zho rleynie zho me, nguedz roptsie zho rnee zho:

—İLed miechdraa i gon! İTi diosle i nac men qui quianee lo ne!

²³ Laa me bii quianeeque, zeene biet tib xanjł Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey. ²⁴ Laa Xtiidz Dios, zigse zie dze laaw quiagaazraa lo miech; ndal zha cub ne nozëëb xnëz me.

²⁵ Jerusalén ga no Bernabé grop Saul len dze co; zeene bialse xtsiin zho, laa zho brieëque ga laa zho zie nëz Antioquí zienie zho Juan Marcw.

13

¹ Lo grë zha ne riladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mgui lë Simón ne rnee zho “Men Yaas”, no ti men Ciren lë Lus, gaque no Saul, ni ti men lë Manaén, bets pchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espiritu Sant bnee lo zho, rëb me:

—Goļcueextso Bernabé i grop Saul, zeena csilo zho lo dziin ne gded naa gun zho.

³ Blozhse pcuan zho, blozhse bzodiidznie zho Dios, dzigo pxobnia zho guic Bernabé grop Saul, bnab zho lo Dios gacniñ me zho; bnee zho lo zho, laa zho zie.

Güey Saul Chipr grop me Bernabé

⁴ Ga brieë Bernabé grop Saul zienie Espiritu Sant zho bdziñ zho guiedz Seleucia, Seleucia bzëëb zho barcw laa zho zie nëz Chipr (ti guidzliu win ne no lo nisdoo). ⁵ Ye Juan Marcw zienie zho gun xyudar zho.

Bdziñ zho ro guidzliu win co zaatne ndxie guiedz Salamin, biet zho barcw güey zho grë len xyadoo men Israel ne no ga, güeyseed zho miech Xtiidz Dios.

⁶ Ga brieë zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti men Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rooļ me.

⁷ Guiedz co ga no ti men lë Sergio Paul, men co zob rnabey guidzliu co; dzigo lo men co ga no Barjesús. Ti men nixbiini nac men ne lë Sergio ga, no me liaadz gacnañ me zha nac Xtiidz Dios; dzigo bnabey me gocredz Bernabé grop Saul. ⁸ Zeene bdziñ zho psilo Barjesús quiaguib me dien pe yquiaaqui yquiaadiagd men rnabey co Xtiidz Dios.

⁹ Dzigo buitipaque Pabl lo Barjesús (Pabl nac sti lë Saul), ni ne nacnie Espiritu Sant Pabl ¹⁰ rëb Pabl lo me:

—¡Biche nu zhin mendox! Zhin mendox gon nac luu, squitaa noquidiee luu miech, notsidil luu diidzli. ¿Zha rna dze ne csaan luu mine nac luu i, squi notsidil luu Xtiidz Dios? ¹¹ Gon ganle, ¡laa Dios csiabzi luu, niinagazh laa lo luu ycow, ni spalal xbiini ngbidz gandraa luu!

Zigne sca rëb Pabl laa lo men co pcow, nëzrii nëzrec zie me racladz me dien cho gnaaz nia me.

¹² Zeene gon men rnabey co sca pcow lo Barjesús, hor co biladz me Xtiidz Dios, bzee zdoo me gon me scataa poder ne ziaadnie zhiwseed Dios.

Bdizin zho guiedz Antioqui

¹³ Bded ga, laa Pabl gza Bernabé ni Juan bzëeb barcw stib, laa zho zie nëz xtan zha Panfil. Bdizin zho guiedz Perg laa zho brieen len barcw, ga ptso Juan lo zho, laa Juan zey nëz Jerusalén; ¹⁴ laa zho bio nëz zie zho nëz xtan zha Pisid, bdizin zho sti guiedz lë Antioqui.

Zeene gol dze ne rdziiladz miech lo dziin, güey zho xyadoo zha Israel. ¹⁵ Blozhse bded zha ne blab lo guits ne pquiaa Moisés, ni blab zho mine pquiaa grëraa zha ne biadteed xtiidz Dios padzeela, dzigo laa men ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; golquiaadiag chop lan xtidz naa ganle gne naa lo to:

¹⁷ Dios ne rliladz no nac no men Israel, ib me bzooblo grë pxozgol no laa zho bgab lo me. Me gocniën zho zeene bio zho ladz men Egipt, ni me güeysilaa zho ga, blu me ganle ne nli men nroob nac me. ¹⁸ Dipse len choo iz ne bio zho grë dan bidz ne bded zho ga, pxecw me grëtaa xquieIntseeb zho. ¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho. ²⁰ Ni dipse len tap gayoo grol iz, me bzooblo grë zha ne bzo bnabey lo zho; lëe lultn zha ne bzo me ga bnabey lo zho goc profet Samuel. ²¹ Blozh ga, laa zho bnaab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëe pxoz Saúl ga brieelë Cis, men ne ziaad lo xtii pxozgol no Benjamín. ²² Zeene laa Dios ptiche dziin co lo Saúl, dzigo bzo me David goc rey. Lëe David ga rzeet Dios zaatne znu rnee: “Rleynie naa xingan Isaí zha ne lë David, laa naa gonle ib zuñ David mine gnabey naa.” ²³ Ni lo xtii David co nagon brieequia Jesús, men ne pxeel Dios lo guidzliu biaadsilaa miech lo dol, zigne psanle me diidz lo xmenlog no padzeela.

²⁴ Len dze ne merle xoobnen cho nac Jesús, len dze co bnee Juan Bautist lo grë men Israel: csaan zho xquieIntseeb zho gnab zho perdon lo Dios, zeena chobnis zho. ²⁵ Laa zeene zhile gdzin dze ne gut zho Juan, dzigo bnee me lo miech rëb me: “Golgacnan ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguiald naa.”

²⁶ Gulgacnan sca ganle bets: zigtaa tow ne ziaad to lo xtii Abraham, zigtagaa tow ne nac to miech stib guiedz zha ne rliladzle Dios, ib laa Dios pxeel Jesús csilaa me ne lo xtol ne grëse ne. ²⁷ Grë zha Jerusalén ni grë zha ne rnabey lo zho, ib biënd zho cho nac Jesús, niicle ne scataa góbose dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnaab zho gut me zigne bneese grë zha co. ²⁸ Niicle ne gon zho peet xtold

me, niicle ne brieequiad dol ne pquiaqui zho me, per bguib zho bdeeda diidz bnabey Pilat gut me.

²⁹ 'Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me.

³⁰ Per bleeban Dios me. ³¹ Grë zha ne güeynal zhits me zeene brieë me Galilé bdziñ me Jerusalén, nzian zho gon me; ni niina grëse zho laa zho quianee lo miech ganle cho nac me.

³² 'Scauegaa no grop no Bernabé, laa no ziaadnie diidz lo to gacnañ to ganle niina ne laa Dios bleeban Jesús, laa me been miñe bnee me lo pxozgol ne padzeela. ³³ Lëë Jesús ga raquiet lo Salm brop, zaatne rnee: "Xpëed naa nac luu. Desde nadze laa zho gunbey ne Xpëed naa nac luu."

³⁴ Ni bzeetle Dios ne laa me cueeban Jesús, bzeetle Dios xind xcuerp me len baa; miñ co ga raquiet lo Xtiidz me, zaatne rnee: "Zunlay naa luu, zigne bnese naa lo David gun naa." ³⁵ Laa stib lo Salm ne pquiaa David rnee: "Gdeete luu diidz xiñ xcuerp naa len baa." ³⁶ Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me. ³⁷ Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹ 'iGrëse to bets, gulgacnañ sca ganle! iJesús nac men ne rsilaa miech lo dol! Zha ne gliladztaa me dib zdoo zho, tel pe nactaa grë xtol zho, sanmbe me zho. Miñe wlaltaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

⁴⁰ 'iGolguien sca gacnroladzde to! Zeena ygaade to miñe bzeet zha ne biadteed xtiidz Dios padzeela, zeene znu bnee zho:

⁴¹ Grëse to ne rzhidznie to miñe nac diidzli, bii zañ to ganle laa naa gun ti milagr nroob ne gzee zdoo to; per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl griee ga grop Pabl Bernabé bnaab grë miech co lo zho, siguiel zho guiet sti zhmal co biire tsie zho tsieseed zho zho.

⁴³ Zeene brieë zho len yadoo co, nzian grë zha Israel, nzian grë zha stib guiedz zha ne riladzle Dios zienal zhits zho. Nëz no zho bnee zho lo grë miech co tiblique tso guic zho tsienal zho zhiwseed Dios, guien zho ganle pa lotaa noxco me zho.

⁴⁴ Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios. ⁴⁵ Zha ne rnabey lo grë zha Israel ne no ga, zeene gon zho scataa ndal miech ne goclo ga, blëe zho lo Pabl, ndox zho lo me, rëb zho led diidzlid nac miñe rseed me.

⁴⁶ Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo rieguial yquiaadiag Xtiidz Dios ne nac to zha Israel. Per ne squi run to guielntseeb nëde to ycaania tow par yga to guielmban ndzon ne rneedz Dios; na laa no guioseed grë zhazit. ⁴⁷ Ni scalegaa rnabey Dios gaca, sac znu rnee me:

Laa naa bzole luu tsienee luu Xtiidz naa lo grë menzit, luu gac zig ti biini ne gziini lo grë miech ne ndxie lo guidzliu; zeena guien zho zha laa zho lo dol.

⁴⁸ Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole yga guielmban ndzon ne gdeed Dios ga, grëse zho dze cogazh laa zho bliladz Jesús.

⁴⁹ Dipse dan co, gocnañ miech Xtiidz Dios.

⁵⁰ Grë zha Israel ne rlëë lo Pabl ga, psilo zho pquuil zho grë meñ wnaa ne nac diidz noxco Xtiidz Dios, ni güey zho güeynee zho lo grë zha ne nac meñ non lad guiedz co; zeena ctsidil zho Pabl grop Bernabé, guñcxoon zho zho dan co. ⁵¹ Zeene bin Pabla grop Bernabé, par glu ne nonguiel sca been zha co zho, beenmbe zho grë yudie co ni zho laa zho brieeg ga, laa zho zie nëz Icon. ⁵² Grë zha ne bliladz Jesús ga, nguieel rac zho, rdeed Espiritu Sant guielbiini lo zho.

14

Bdzin Pabl Icon grop me Bernabé

¹ Zeene bdzin Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza. ² Laa grë zha Israel ne bliladzda, psilo zho bloo zho diidz lo grëraa miech guiedz co glëënie zho Pabl grop Bernabé. ³ Niicle sca been grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagr ne bdeed me diidz run zho par glu ne nli Xtiidz me nonee zho.

⁴ Dzigo grë miech ne no lad guiedz co goc zho chop dii, groļ zho racnie grë zha Israel ne rlëë ga, zgroļ zho racnie grop zha poxtl co. ⁵ Zha ne rlëë ga, zigtaa zha Israela zigtagaa zha guiedz cow, bnediizd zho grë zho wxtis laa zho tsie tsiedeedquie zho Pabl grop Bernabé. ⁶⁻⁷ Zeene bin Pabla grop Bernabé, mazd laa zho brieeg ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

⁸ Guiedz Listr ga gon zho ti mngui në ni, waltaa lo xquielmban me ib gard së me; sac scale në ni me zeene gol me. ⁹ Zeene gon Pabl dze zob me rquiaadiag me miñe nonee Pabl lo grë miech co, dzigo dzeque bui Pabl lo me, gon Pabl dib zdoo me riladz me nli zrieelo guñguic Dios me; ¹⁰ dzigo nguiedz bnee Pabl lo me, rëb Pabl:

—jBeennli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë.

¹¹ Zeene gon grë miech co sca biac me, psilo zho con xtiidz zho nguiedz rnee zho:

—jDiosle i gon, nasi zig rlu miech rlu me laa me biet gbaa ziaadgan me ne!

¹² jMasaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee. ¹³ Ro guiedz co ga zob xyadoo zhimdio zho Júpiter, dzigo brieeg pxoz ne no yadoo co grë me miech lad guiedz, zienie zho ngon, zienie zho guiee, nan zho gut zho ngon co cogon zho ma lo Pabl grop Bernabé. ¹⁴ Zeene bien Pabla grop Bernabé wbinladz guic zho. Ptsiez zho xab zho, bzëëb zho lad grë miech co, nguiedz rnee zho lo zho:

¹⁵ —jNdzinli golgac! ¿Pe nacne squi rac to? jGolgan ganle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuaane paat rquiind ne run to i, gbiire gbig to lo Dios meñ ne nliipaa mban. Me bzaa gbaa, me psan guidzliu, me psan nisdoo, grëse ncuaane no gbaaw, ncuaane no lo guidzliuw, ncuaane no lo nisdoo, me bzaaw grësew. ¹⁶ Niicle ne glo bdeed me diidz been miech grë ncuaane gocladztaa zho, ¹⁷ per psaanladz me zho. Gocnie me zho zigne racnieque me ne niina, rsiab me nisguie rac xcuaa ne, rneedz me ncuaane rdioow ne gzataa dze, rneedz me guiebley lo ne.

¹⁸ Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

¹⁹ Len dze co, blalaa zha Israel ne ziaad nëz Antioquí ni nëz Icon bdzin Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tiblاد ro guiedz. ²⁰ Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me nëz len guiedz. Biini liu, pcaa me nëz grop me Bernabé laa zho zie nëz Derb.

²¹ Bdzin zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí, ²² güeynee zho lo grë zha ne rliladz Jesús ga, pchoobladz zho zdoo zho, psó zho diidz lo zho, niicle nroob guielnë ne noded zho per none tibaque gac guic zho tsienal zho Xtiidz Dios; sac ible sca nzian ncuane ted zho laga gdzin dze ne gdzin zho zaatne rnabey Dios.

²³ Tib tib guiedz co, bzose zho grë zha ne so gnabey lo grë zha ne rliladz Jesús ga; rlozhse rcuan zho grë zho zho ni rzodiidznie zho Dios, dzigo laa zho rsan zha co ladznia me yquianap me zho.

Bdzin Pabl grop Bernabé nëz Siria stib

²⁴ Nëz no Pabl grop Bernabé bded zho dib xtan zha Pisisid, bzëeb zho xtan zha Panfil, bdzin zho guiedz Perg. ²⁵ Blozhse bnee zho Xtiidz Dios lo grë miech co, dzigo laa zho brieeg ga, bdzin zho guiedz Atalia. ²⁶ Atalia ga bzëeb zho barcw bdzin zho sti guiedz ne lë Antioquí, gataa laa zho psiaal viaj co. Guiedz coque ga brieeg zho grop zho güey zho grë guiedz co güeynee zho Xtiidz Dios lo miech; zeene sca bnab grë zha ne rliladzle Jesús ga lo Dios gacniem me zho tsiegun zho xtsiin me.

²⁷ Zigne bdzin zho Antioquí ga, bnabey zho pcaalsa grëse zha ne rliladz Jesús, bzodiidz zho lo grë miech co grëse zha gocniem Dios zho güeygun zho xtsiin me, ni zha rquia zdoo Dios zha ne nacd zha Israel rbedz me zho ye zho rzëeb xnëz me.

²⁸ Xtselaa bio Pabl ga grop me Bernabé, blëz zho lo grë zha ne rliladz Jesús ga.

15

Pcaalsa zho Jerusalén

¹ Ga no Pabl grop Bernabé zeene bdzin bla zha ne ziaad nëz Judé, psilo zho noseed zho grë zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeena sca csilaa Dios zho lo xtol zho.

² Zeene gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bnediiz grë zha ne rliladz Jesús ga, bzo zho zla zha ne gacza Pabl grop Bernabé tsie zho Jerusalén tsienabdiidz zho lo zha poxtl ni lo grë zha ne rnabey lo zha ne no ga, diem pe guiab zho.

³ Nacne brieeg zho zie zho. Nëz no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiidz zho lo zho grëse zha nobedz Dios grë zha ne nacdrea zha Israel, rsaan zho grë zhiwseed xmengol zho laa zho rliladz Jesús. Rley grë miech co ron zhow. Sca bio zho nëz, laa zho bdzin Jerusalén.

⁴ Zeene bdziñ zho Jerusalén, pcaalsa grë zha poxtl, grë zha ne rliadz Jesús ga, ni grë zha ne rnabey lo zho. Dzigo ga bzodiidz Pabl grop Bernabé grëse zha gocnie Dios zho, zeene güeyted zho grë dan co güeynee zho Xtiidz me lo miech. ⁵ Miñ co quianee zho zeene guso bla zha ne glo goc farisé rëb zho, grë zha ne nacd zha Israel zeene laa zho rliadz Jesús ib none tso zho bey, ni none gun zho grëse mine rnabey Xley Moisés. ⁶ Dzigo nacne bnabey grë zha poxtl co ni grë zha rnabey co, ycaalsa zho stib dien zhapaa gaca, pe nonguiela tso grë zha zit bey co.

⁷ Zeene pcaalsa zho, goc pa lo quianee zho zeene guso Pedr rëb Pedr lo zho: —Grëse to bets, golquiaadiag mine gne naa lo to nu ganle. Led rsoladz to, zeene griinpaas psilo quiaaaz Xtiidz Jesús lo miech, ible Dios bzooblo naa pxeel me naa gaseed naa grë zha ne nacdraa zha Israel gliladz zho me. ⁸ Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espiritu Sant nacie zho, zigne pxeelaque Espiritu Sant nacie ne. ⁹ Gotsaa gwi ne ganle, led yed Dios rbe dien cho nac zha Israel cho nacгаа zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. ¹⁰ ¿Zha nac dzigo ne racladz to gnabey to grë zha co gun zho grë mine nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmengol ne brieelod niuna zigne naca! ¹¹ Golquien ganle, zigtaa zhaw zigtagaa new laa me csilaa ne lo dol grë ne, per nacda por ncuaañe rdziuuñ ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëtaa milagr ne blu Dios lo grë menzit zaatne güeynee zho Xtiidz me lo grë miech co. ¹³ Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to.

¹⁴ Laa Pedr bzodiidzle lo ne ganle zha psilo bredz Dios grë zha zit, bzooblo me zho ye zho gac zha ne sëeb xnëz me. ¹⁵ Ga nagon goca zigne zhozneese lo Xtiidz me, mine pquiaa grë zha ne pxeel me padzeela, rneew:

¹⁶ Tedse nu ganle,

laa naa cuedz grëse miech ne ygab lo naa;

grë zha xtii David zha ne bzozit, laa zho gbigr stib.

¹⁷ Horco grëse zha zit, laa zho gon ganle cho nac naa, zeena grieeo sëeb zho xnëz naa.

¹⁸ Znu nac xtiidz Dios, ni padzeelale bzeet me ne laa me gun miñ co.

¹⁹ Miñ co nagon grë zha zit ne rliadzle Jesús, ib nonguiela ga gnabey ne zho gun zho mine nac xley ne. ²⁰ Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhimdio zho, ib gowd zho bëel co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tsieel zho; niicle wnaagaaw, nodne tsonie zho ngui ne nacd tsieel zho. ²¹ Niicle mazd padzeelaw, tibaque quiaayon miech gun zho miñ co; sac desde hor co tib tib guiedz bzoze Moisés tib zha ne gneew lo miech len xyadoo zho, dze ne rdziiladz zho lo dziin.

²² Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rliadz Jesús ga. ²³ Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne rliadz Jesús nuw, grë no laa no rquiaabdiuzh to grëse to bets

ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

²⁴ Niina ne gocndion no laa bla zha ne nacgrë no nu biaad lo to i, biaadcots zho guic to dien peraa no guñ to. Gacnan to ganle led nod pxeel zho, ²⁵⁻²⁷ gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiayun zho xtsiin Jesús.

²⁸ Lo godiidz ne bdziuun no, laa no bdzianle nonguielda ne dien peraa gnabey no to guñ to, ni niiclegaa Espíritu Sant scaque rnee me. Rquiind ne peraa guñ to, lëëlew ga totsaque tsoxco to ²⁹ gowde to xpëël grë ma ne rgogon miech lo grë zhindio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tsiel zho; niiclegaa wnaaw, nodne tsonie zho mgui ne nacd tsiel zho. Min rii nagon nac mine no tsoxco to.

“Guiaanne Dios to sca.”

³⁰ Gza tap zha co laa zho brie Jerusalén, laa zho zie nëz Antioquí. Zeene bdzin zho ga, bnabey zho pcaalsa grëse zha ne rliladz Jesús, dzigo bdeed zho guits co lo zho. ³¹ Zeene gocnan grë zha co zha rnee low, rley zho sacne pchoobladz zdo zho. ³² Blozhse ga, psilo Judas grop Silas pseed zho grë miech lo Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³ Xtselaa blëz Silas ga grop Judas, laa zeene goł dze ne laa zho gree gbiire zho nëz Jerusalén stib, ine güeyzonëz grë zha co zho, rdeed zho xquizh lo zho.

³⁴ [Laa zho nole nëz, tibaque zeene rëb Silas laa Silas guiaanaque ga spalal zha.] ³⁵ Laa Pabl grop Bernabé ible laa zho biaan ga been zho xyudar grë zha ne noseedle miech ga.

Ptso Pabl grop Bernabé

³⁶ Goc palad dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnan zho dien yo grë zha co. ³⁷ Dzigo gocladz Bernabé ye Juan Marcw nienie zho; ³⁸ per bzhiguield Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynalđ Juan nlozh nsiaal zho lo dziin co.

³⁹ Min co pquiqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëeb zho barcw zie zho nëz lo guidzliu win ne no lo nisdoo lë Chipr; ⁴⁰ laa Pabl goc grop Silas. Blozhse bnab grë zha co lo Dios gacnieñ me Pabl grop Silas, laa zho brie ga ⁴¹ güeyted zho grë guiedz ne ndxie nëz xtan zha Siria, grë guiedz ne ndxie nëz Cilis, güeynee zho lo grë miech ne rliladz Jesús nëz co, güeychoobladz zho zdo zho.

16

Beenbey Pabl Timoté

¹ Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rliladzaque Jesús lë Timoté, ti men Israel ne rliladzle Jesús nac xniaa me, laa pxoz me nac men Gres.

² Grëse zha Listr, zha Icon, zha ne rliladz Jesús tibaque rzeet zho Timoté rnee zho ti miech ndzinñ nac me, nacne bnee Pabl lo me tsienal me zhits Pabl. ³ Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grë zha Israel ne no nëz co.

⁴ Laa me zianaḽ zhits Pabl. Guiedz ne rdedtaa zho rnee zho lo grē zha ne rliadz Jesús ga, tsoxco zho guḽ zho grē miḽe pso zha poxtl ga diidz, grē zho zha rnabey ne no Jerusalén. ⁵ Zeene ron grē zha cow, dib zdooraa zho rnalo zho Dios, zigse zie dze racnzianraa zha ne rliadz Jesús.

⁶ Blozh ga, tibbde zho xtan zha Frij ni xtan zha Galás, sac bdeete Espiritu Sant diidz nienee zho Xtiiidz Dios lo miech grē guiedz ne ndxie nēz Asia ga. ⁷ Zeene bdziḽ zho zaatne rsilo xtan zha Misia gocladz zho nie zho nēz xtan zha Bitin, scaque bdeete Espiritu Sant diidz nie zho nēz co. ⁸ Dzigo tibbde zho dib xtan Misia bdziḽ zho ti guiedz ne ndxie ro nisdoo lē Troas.

⁹ Guieel co blulo ti mgui Macedon lo Pabl, rnab me guḽ Pabl guieḽnzaac tsie Pabl nēz co, tsieguḽ Pabl xyudar grē miech co.

¹⁰ Nacne hor cogazh bzhixcuaa no, sac biēn no ible Dios racladz guio no nēz co guionee no Xtiiidz me lo miech.

¹¹ Dzigo brieē no ga bziaab no ti leḽ barcw bdziḽ no ti lo guidzliu win ne no lo nisdoo lē Samotras. Biini liu brieē no ga bdziḽ no Neápolis, ga bliaaz no wdze co. ¹² Biini sti liu co brieē no Neápolis bziani no bdziḽ no Filip. Lēē guiedz co riaan zaatne rsilo xtan zha Macedon, niapse meḽ Roma no ga; nzianlaa ngbidz bliaaz no ga.

¹³ Laa tib dze ne rdziiladz miech lo dziin, brieē no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziḽ no nzianlaa meḽ wnaa ndxie ga, dzigo psilo no bnee no lo zho cho nac Jesús.

¹⁴ Lad co no ti wnaa Tiatir lē Lidia, rto me grē lar nizhnie nlaan miḽe nac lar niazh; ye me dib zdoo me rliadz me Dios. Laa me noquiaadiag miḽe nonee Pabl ga, zeene psiaab Dios guic me bliladz mew.

¹⁵ Dzigo hor cogazh brobnis me grē meḽlidz me; blozh ga, bredz me no guioziaaz no lidz me, nēchaa me lo no:

—Teḽne rzac to nli dib zdoo naa rleynie naa Dios, goḽtē sca cuēz to lidz naa. Rzoobguic me lo no, nacne biobiaaзаque no lidz me.

Bio Pabl ladzguiib grop Silas

¹⁶ Tib dze, lēētaque zio no zaatne riozodiidznie no Dios, bdzieelo no ti ndzooop nguieg noguitnie meḽdox. Zēēb diidz grēse teḽ pe rnabdiidz miech lo ndzooop, rnee meḽdox cow; nroob dimi ne riab nia zha ne rnabey ndzooop.

¹⁷ Naḽ ndzooop zhits no, nguiedz roptsie ndzooop rnee ndzooop:

—jXtsiiḽ Dios ndzon ne zob gbaa goḽ noyḽ gza mgui rii! jLaa zho ziadseed to zeena gacnaḽ to zha csilaa Dios to lo xtoḽ to!

¹⁸ Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo meḽdox ne noguitnie ndzooop ga, rēb me:

—Jesús nacie naa, ni laa naa rnabey luu goḽ niinagazh psaan ndzooop qui. Zigne sca rēb Pabl laa meḽdox co bzhooḽ.

¹⁹ Gza zha ne rnabey ndzooop ga, zeene goḽ zho rundraa ndzooop guieḽnsin co gdziniaa ndzooop dimi, bnaaзаque zho Pabl grop Silas güeyzo zho zho lo wxtis, rēb zho:

²⁰⁻²¹ —jGoḽwi ganḽe pe nac ncuaane noyḽ grop zha Israel rii lad guiedz nu! jNogodiḽ zho miech, laa zho quiaseed miech ncuaane nonguieḽdraa dziuun ne nac ne zha Roma!

²² Pcaalsa grēse miech co, grēse zho ntseeb rac zho lo Pabl grop Silas. Dzigo bnabey wxtis co brieē xab zho grop zho bdeed bar zho zho, nroob bdiḽ zho zho. ²³ Blozhse bdiḽ zho zho laa zho psēēb zho ladzguiib, bnabey zho meḽ ne quianap ladzguiib ga tibaque yquianap me zho, sac teḽ laa zho xooḽ me

tsietizha. ²⁴ Zeene bin men co sca rëb zho, güeyaque me güeysëeb me zho stib lena mine riaan caanraa, ga psëeb me ni zho lad chop lë yag noorb.

²⁵ Wdze co, zig grol guieela laa Pabl grop Silas biï noyoolnie Dios, ni rnab zho lo me gacniën me zho. Grëse zha ne no ladzguuib ga, ron zho sca no Pabl grop Silas. ²⁶ Tibaque zeene bni ti zhodox, psiniw dib nacle ladzguuib co, grëse ro ladzguuib co bzhial, guuib ne no nia grë zha ne no ga, wbiła.

²⁷ Lëëlëd brieë mcaallo men ne quianap ga, zeene gon me grëse ro ladzguuib co zonial, masaque güeynie guic me bzhoonle grë zha ne no ga, bdobaque me spad ne ney me laa me zie gut me me. ²⁸ Horco broptsie Pabl lo me, rëb Pabl: —¡Gute luu luu! ¡Grë no ndxie no, choot bzhioond!

²⁹ Lëëlëd bnab me biini, bzëeb nguzhoon me len ladzguuib, masaque rzhidz me dzeb pquuitsgzhib me lo Pabl grop Silas. ³⁰ Blee me zho ga, rëb me lo zho: —Golnë lo naa, ¿pe nac mine gun naa zeena csilaa Dios naa lo grëtaa xtol naa?

³¹ —Dib zdoo luu biladz Jesús, men rnabey ne pxeel Dios lo guidzliu —rëb zho—, dzigo silaa me luu lo dol, silaa me menlidz luu ne.

³² Dzigo güeynie me zho lidz me, bnee zho Xtiidz Dios lo me grë menlidz me. ³³ Guieel co no me bdiib me zhits zho, zaatne brëe bar ne bloobar zho zho; blozhse ga, laa me brobnis grë menlidz me. ³⁴ Bnabey me goclo ti guielwagw downie me zho, rley me, niicle grëгаа menlidz mew rley zho ne laa zho biladz Jesús.

³⁵ Biini liu, pxeel wxtis zha ne güeynie diidz lo me cuee me Pabl ladzguuib grop Pabl Silas. ³⁶ Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguuib; zacle nasca greee to, peet tsieniedraa guic to.

³⁷ Dzigo rëbchaa Pabl lo zha ne bdziinne diidz ga:

—¡Zha ndzielguictaa zhiwxtis to gon! Squi ndxie menguedz bdiñ zho no, ni gardle gacnañ zho dien pe nli no pe falt ne rdziaap no. Bnabey zho bio no ladzguuib, ni zha Roma nac no; nana racladz zho zhlianse greee no. ¡Lëda ga gon! ¡Goltzie golguiab lo zho, lëezhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdzieb zho; ³⁹ lëëlëd güey zho ro ladzguuib güeynab zho dispensar lo Pabl grop Silas. Blee zho zho ladzguuib, ni bnab zho lo zho siguiel zho mazd gbi zho guiedz co.

⁴⁰ Ga brieë zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne riladz Jesús, pso zho diidz lo zho tiblrique gac zho tsienal zho xtiidz me. Blozhse ga, dzigo laa zho brieë guiedz co.

17

Güey Pabl Tesalónica grop me Silas

¹ Brieë Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdziñ zho guiedz Tesalónica. Lad guiedz co zob ti xyadoo zha Israel, ² dzigo güey Pabl güeynee me Xtiidz Dios lo grë zha ne rcaalsa ga, zigne runaque me grëraa guiedz ne zieded me.

Blëz zho ga tson zhmal, gzobse dze ne rdziiladz miech lo dziin güey Pabl güeyzodiidznie Pabl grë zha co, ³ bzeet me lo zho grë zaatne raquiet grëtaa ncaaanë ted men ne cxeel Dios lo guidzliu ga, ni zha grieeban me; ni blu me lo zho gacnañ zho ganle lëe men co ga nac Jesús.

⁴⁻⁵ Ndal zha ne pquiaadiag xcodiidz Pabl, bien zho ne nli sca naca, laa zho biladz Jesús, ndal zho nac zha nëz Gres, zha ne noxcole mine rnabey Dios,

ye blalaa meṅ wnaa ne nac meṅ non lad guiedz co. Laa zha Israel ne rnabey yadoo co, zeene goṅ zho scataa ndal zha ne bliladz Jesús, blëë zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeyseëb zho lidz Jasón naṅ zho niebee zho Pabl ga grop Silas, ngo zho zho ladznia grë miech co.

⁶ Zeene goṅ zho bgaad grop zha co lo zho, bnaaзақe zho Jasón ni zla zha ne rliladz Jesús, bdoṅniu zho zho bdziṅnie zho zho lo wxtis, roptsie zho rnee zho:

—¡Golgaṅ ganle laa zha ne sca quianzë nocots guic grë miech, laa zho blansole nu! ⁷ Ni Jasónpaa rdeed zaatne rbëz zho. Racladzdraa zho goṅ zho mine rnabey rey César, sac rnee zho no sti zhirey zho lë Jesús.

⁸ Grë zha wxtis co ni grë meṅguiedz ne pcaalsa ga, zeene bin zho sca rnee grë zha co, riendraa zho zha goṅ zho. ⁹ Mine been zho beenquizh zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxiṅa laa grë zha ne rliladz Jesús ga bleese Pabl ga grop me Silas, pxeel zho zho nëz Beré. Zigne bdziṅ zho Beré, gloque ti xyadoo zha Israel güey zho.

¹¹⁻¹² Grë zha Israel ne no Beré ga, rley zho rquiaadiag zho mine rnee Pabl grop Silas, gzobse dze rlab zho lo Xtiidz Dios rwi zho dien pe nli mine rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa meṅ wnaa co zha non nac zho guiedz co. Tibliladz nac grë miech co, gocntseebd zho zigne gocntseeb zha Tesalónica.

¹³ Laa zeene gocnaṅ zha Israel ne no Tesalónica laa Pabl nolaque guiedz Beré, güeyaque zho güeyquil zho grë miech co glëënie zho Pabl. ¹⁴⁻¹⁵ Dzigo lëëled briece bla zha ne rliladz Jesús ga, zienie zho Pabl nëz ro nis; laa Silas grop Timoté biaan ga. Güey zha co güeysaṅ zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

Leṅ dze ne no Pabl Aten

¹⁶ Laga quiambëz Pabl gdziṅ Silas grop Timoté güey me güeyted me lad guiedz co, wbinladz guic me goṅ me led zhid grë mdio ne riegaṅ grë miech co. ¹⁷ Nacne bioxco me bnee me Xtiidz Dios lo zho, güey me xyadoo grë zha Israel ne no ga, bzodiidznie me zho grë zho zha guiedz co zha ne rliladzle Dios. Gzobse dze rie me leṅ guiedz rienee me lo grë miech ne rdziṅ ga. ¹⁸ Tib dze bdzieelo me bla zha rac ne zienal zhiwseed ti meṅ lë Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha briebean Jesús. Zeene bin zho zha rnee me, no bla zho rzhidznie me, rnee zho:

—¡Dieen pe riab guic meṅ qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl; ¹⁹ dzigo rëb zho lo Pabl:

—Bzhiguiel mazd, së luu guio ne lozh sodiidz luu lo no dien zha nac wseed ne ziaadnie luu, ²⁰ sac waltaa gard dzion no grë ncuaaṅe rnee luu i.

²¹ No zho liaadz gacnaṅ zho pe rnee Pabl, sac sca nac grë zha Aten, niiclegaa grë zha ne quiadziṅ ga, rdziladz zho rded-dze zho rzodiidz zho dien zha nac grë diidz cub ne griiṅ ron zho.

²² Bdziṅ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rëb me:

—Grëse to ne nac to meṅ Aten, raṅ naa ne nligaa rioxco to rleynie to grë meṅ ne rzac to nac Dios; ²³ sac leṅ dze rii biateed naa zaatne zob grë xdios to, haxta no zaatne niaa ti lo pcoog quia chop lan diidz ne znu rnee: “MIN RII

NIAA PAR DIOS NE RDZIUUNBEYD NE.” Golgacnañ sca ganle, Dios ne runbeyde to ga, runbey naa me ni lëe zhiwseed me none naa lo miech len dze rii.

²⁴ Dios co bzaa guidzliu, me bzaa grëtaa ncuaañe no lo guidzliu; gacñ ne guiab miech zha gzaa ti zaatne cuëz me, sac men nroob men rnabey na me, me rnabey gbaa, me rnabey guidzliu. ²⁵ Niicle rquiindgaa me dien zha yquianap zho me, sac grëse ne ne nac ne miech, me rneedz guielmban lo ne, me rneedz grëtaa ncuaañe rquiin ne. ²⁶ Lo tib nëzaque miech ne bzaa me ga, bnabey me briequia grëse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho. ²⁷ Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grë ne, ²⁸ sac gon, niapse por xpoder me laa xcuerp ne niaa zigne naca, laa ne mban, laa ne rriel. Lëew ga bnee bla menladz to, zha rac ne znu rëb: “Xtii Dios nac ne.”

²⁹ Gase na ganle gotsaa gwi ne, conque xtti Dios name nac ne, pe nac dzigo gliladz ne lëe Dios ga nac grë cho mdio or, cho mdio plat, cho mdio quie ne riab guic miech rzaa zho; ³⁰ ni ib sca rliladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuaañe bliladz zho ga gbig zho lo me, mese gleynie zho; ³¹ sac laa me bzole tib dze ne gacredz grëse miech lo me yгаа zho mine tsieguiañ zho tib tib zho, tel zha wban zho. Ni laa me blule ganle cho nac men ne gun guielwxtis co, lëe men co ga gon bleeban me.

³² Zeene bin zho bzeet Pabl no ti men ne brieaban, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³ Gataa pcuëez zho lo xcodiidz Pabl, laa Pabl wbi lo zho ga. ³⁴ Briequia blalaa zha Aten bliladz Jesús, lëe tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

18

Güey Pabl guiedz Corint

¹ Brie Pabl Aten bdziñ me guiedz Corint. ² Ga beenbey me ti men Pont lë Aquil, ti zha xtti zha Israel nac Aquil. Roma no me glo, wriin bdziñ me Corint ga grop tsieel me; sac bnabey rey Claud brie grëse zha Israel ne no Roma. ³ Dzigo güey Pabl blëz Pabl lo zho ga, sac ye zho rzhixcuaa grë lar nroob ne rquia ncal, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús. ⁵ Zeene laa Silas grop Timoté bdziñ Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. ⁶ Laa zeene gontaa me rond zho diidz, lel ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—¡Laa naa bial bialne naa lo to per pquiaadiagde to mine rne naa; xtolle to nasca tel laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men ne no gaxaque zaatne zob yadoo co lë me Just, dib zdoo me rliladz me Dios. ⁸ Len dze co ndal zha Corint bliladz Jesús zeene bin zho mine rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—¡Gdziebdu! ¡Ib ycuëezd luu lo dziin ne noyũ luu i, bnee xtidz naa lo grë miech qui! Ndal grë miech rii no sëëb xnëz naa. ¹⁰ Peet tsienied guic luu, choot grielod lega pe guñ luu sac naa quianaap luu.

¹¹ Nacne blëz Pabl ga stib iz groł, pseed me grë miech co Xtiidz Dios.

¹² Laa zeene bzob men ne lë Galión zobnabey me xtan Acay, grë zha Israel ne no Corint ga bnediidz zho grë zho bnaaz zho Pabl güeyzo zho me lo Galión ¹³ rëb zho:

—Laa no ziaadnie mgui rii lo luu, sac laa me quiaguiits xley no, quiago me guic miech tsiegan zho Dios sti mod mine ni nacdraa ley.

¹⁴ Laa Pabl zie gnee, zeene pquiab Galión rëb me lo grë zha co:

—Telne niaca mine no pe ti falt, pe ti guielntseeb ne quiayũ me, dzigosi naa raguial guñ guielwxtis. ¹⁵ Per telne laa to ziaadnie me nu porne rdziladzde to mine quiaseed me miech, rdziladzde to tel cho rzeet me, sac led scad nac xley to, tsow golgan dien pe guñ to. Nodaque xtil to guic naa.

¹⁶ Bleega Galión zho nëz ley.

¹⁷ Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galión bdiñ zho me, per peet rëbd Galión.

Büre bdziñ Pabl guiedz Antioquí

¹⁸ Goc spalal dze no Pabl Corint ga, dzigo bnee me lo grë zha ne rliladz Jesús ga laa me gbi; ye Aquil ni Priscil wnaa ne nac tsieel Aquil nole guic tsienal zhits me.

Nacne zeene laa me brieë, ye zho bzëëbgza me barcw, laa zho zie nëz Cencré. Lëëtaaque len dze co noxco Pabl guñ me tel pe nac ncuaañe rëb me lo Dios guñ me, dzigo zeene bdziñ zho Cencré bnabey me liu liu ptsiib guic me.

¹⁹ Cencré bzëëb zho barcw stib, zie zho nëz Efés. Bdziñ zho Efés, güey Pabl xyadoo grë zha Israel ne no ga güeynee me Xtiidz Dios lo zho. ²⁰ Dzigo bnaab zho mbëz me lo zho ga ti blalaa dze, per brieelod mbëz me ²¹ sac laa guic me no gdziniob me Jerusalén ygaa me lni ne ziaadyob len dze co, rëb me:

—Na telne zneedz Dios diidz, biñ zialteedaque naa dien yo to.

Gataa biaan Aquil grop Priscil, laa me bzëëb barcw stib zie me nëz Cesarea. ²² Cesarea brieë me barcw, laa me zie nëz Jerusalén. Bdziñ me güeyquiaabdiuzh me grë zha ne rliladz Jesús ga; biireraa me ga bdziñ me Antioquí.

²³ Goc palal dze no me Antioquí, laa me brieëque ga güeyted me grë guiedz ne ndxie dib xtan zha Frij, dib xtan zha Galás, güeynee me lo grë zha ne rliladz Jesús ga dib zdoo zho gleynie zho Dios.

²⁴ Len dze co bdziñ ti men xtii zha Israel guiedz Efés, ti men Alejandríw lë me Ápol. Ti zha rac nac me, rien me zha gnee me Xtiidz Dios lo miech.

²⁵⁻²⁶ Güey me xyadoo zha Israel ne no ga, nguieel rac me, peet zdeb guiend lo me psilo me nonee me lo zho grëse mine bnee Juan Bautist zeene bzeet Juan Jesús; sac loxaque min co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grë zha ne rliladz Jesús ga, zeene gocnan zho laa guic me no tsie me nëz Gres, dzigo ye zho rëb wen tsie me, pquiaa zho ti cart pxeel zho lo zha ne no nëz co zaacse ycaania zho me. Zeene bdziñ me nëz co, pseed me grë zha co. Rley zho blozh gocnan zho cho nac Jesús; ²⁸ sac squi ndxie miech rsioog me ro grë zha Israel, rnee me lo zho lëële men ne quiambëz zho cxeel Dios ga nac Jesús, ni rlu me lo zho pa lo zhobneew lo Xtiidz Dios.

19

Biire güey Pabl Efés

¹ Len dze ne no Apol Corint, laa Pabl bdzin Efés. Blozhse güeyted Pabl grë guiedz ne ndxie nëz xtan zha Galás, laa me bdzin ga. Ga bdzieel me blalaa zha ne riladz Jesús, ² dzigo bnabdiidz me lo zho, rëb me:

—¿Pe bgaa to guielbiini ne rneedz Espíritu Sant, zeene bliladz to Jesús? Pquiab zho rëb zho:

—¿Guiełbiini ye? Gard gon dzion no rdeed Espíritu Sant guiełbiini.

Dzigo rëbchaa Pabl:

³ —¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne biaadnie Juan. Rëb me lo zho nace wrobnis co par glu miech ne laa zho csaan guiełntseeb, laa zho sëeb xnëz Dios; per grëse zha ne bgaa wrobnis co ib none gliladz zho Jesús, men bzeet Juan ga zeene rëb Juan ile ziaad me.

⁵ Min co bin zho nacre brobnis zho stib zigne psan Jesús diidz. ⁶ Zeene laa Pabl pxobnia guic zho bnab me gdeed Espíritu Sant guiełbiini lo zho, hor co psilo zho nzian lo diidz ne rnee zho; ni bnee zho tel pe nac mine racladz Dios gacnan miech. ⁷ Lo gza zho rgaa zho tsiipchop, niapse zha bguiw.

⁸ Tson mëë blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. ⁹ Per zeene gon me no palal zho ib rond diidz, lel psilo zho squi ndxie miech rneenë zho Jesús, nacre bleextsoque me grë zha ne riladzle Jesús, güeynie me zho zaatne nac xyuscuel ti men lë Tiran; ga rcaalsa zho gzobse dze rieeed me zho.

¹⁰ Dipse len chop iz blëz me ga pseed me grë zha co; nacre grëse miech ne no dib nëz Asia ga, zigtaa zha Israela zigtagaa grëraa miech cow, bin zho zha nac Xtiidz Dios. ¹¹ Bdeed Dios diidz been me grë milagr nroob ne rzee zdoz miech; ¹² sac haxta lar ne rzëse nia me, lar ne rbixse me rzhooł lad men ne rzacné laa zho riac, niicle grëгаа menđox ne noguitnie miecha, rzhooł ma.

¹³⁻¹⁴ Ga quianzë gadz xpëed ti zhipxoz zha Israel lë Escev, stib guiedz stib guiedz rie zho riegunđoxooł zho menđox ne noguitnie miech. Ti vuelt, nan zho na ye zho cuedz lë Jesús gacniën me zho gunđoxooł zho menđox; bdzin zho zaatne gunđoxooł zho ma, rëb zho:

—¿Zig zobwi Jesús ne rzeet Pabl, laa no rnabey to golriiegazh i niina!

¹⁵ Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

¹⁶ Znuse bias men ne noguitnie menđox co, bnaaz me gza zha co bdiñ me zho. Ib blëbd zho lo me, masaque dib brëë rna zho, ni xab zho nacwdraa, laa zho bzhoon.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien zho ne nli men non, men rnabey nac Jesús.

¹⁸ Haxta ye grë zha ne riladzle Jesús, hor co laa zho bleero pe nac grë ncuaañe ndzinlid ne bliladz zho glo. ¹⁹ Nzian zha ne biil diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal gocnon grëtaa guits co, biirew zig chooptsi mil pes plat. ²⁰ Ga blu poder ne nacie Xtiidz Dios, sac grë zha ne bina bdzëë lo xquiełmban zho.

²¹ Bded ga, biab guic Pabl tsieted me nēz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén griee me tsie me Roma. ²² Nacne ptedner me Timoté grop Rast (zha ne noyūn xyudar me len dze co) zie zho nēz Macedon, laa me bii biaan nēz Asia ga.

Gocntseeb zha Efés

²³ Len dze co brieequia palal zha Efés ptsidil zho zha ne rililadz Xtiidz Dios. ²⁴ Guidz co no ti men ne rundziin guiib plat lē Demetr; rzaa me grē yadoo yeen zig niaada xyadoo xnaxnazh zho Dian; nroob dimi ne rial me grē me zha ne runnie me dziin co; ²⁵ bnabey me pcaalsa grē zha ne quia dziin lo me, ni grēragaa zha ne runaque dziin co, rēb me lo zho:

²⁶ —Rien naa ziyonle to, ziyangaa to ganle laa mgui ne rnee zho Pabl quianzē lad guiedz nu, rnee me nliid Dios ga nac grē mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnē to zha dziuun ne? ²⁷ Golguien ganle noxtseeb guiabdraa xtsiin ne, ni nanwen to ganle lēē xtimi ne nu. Ni tebaa mincosegaaw, minē mazdraa noxtseeb nend grēse miech csaanladz xyadoo nazhnazh Dian, nend grēse miech ne rleynie me dib Asia, diibgaa lo guidzliuw con guiaanladz zho me.

²⁸ Zeene gon grē zha co sca rēb Demetr; rlēē zho, roptsie zho rgo zho xviv Dian. ²⁹ Wdzeepaaw grēse menquiedz laa zho pcaalsa, güey zho bnaaz zho Gay ni Aristarco chop zha Macedon ne rzēnie Pabl, bdoobniu zho zho bdziinne zho zho ro yulow.

³⁰ Nacne gocladz Pabl nie me nienee me lo grē miech co, per psaaand grē zha ne rililadz Jesús ga. ³¹ Haxta bla zha wxtis ne ndzieeldiiz Pabl, pxeel zho diidz lo me tsied me.

³² Zhaase zhaase rnee grē miech co ndxie zho ro yulow ga, no zho haxta ni rienp pe nacne zie zho ga. ³³ Blalaa zha Israel, zeene gon zho scataa rac grē miech co, bdoob zho zhiw ti men lē Lejandr gocladz zho nee me chop lan xtiidz zho. Laa men co blis nia me parne cuedze zho gnee me; ³⁴ zeene gon zho zha Israel nac me, psilo zho stib grēse zho nguiedz roptsie zho, rgo zho xviv Dian rnee zho:

—¡Men ndzondoo nac Dian! ¡Men ndzon nac xnaxnazh ne!

Zig chop hor bre zho ga sca roptsie zho.

³⁵ Dzigo brie men ne zobnabey ga, blunia me lo zho cuedze zho; zeene laa zho bredze, psilo me bnee me lo zho rēb me:

—Golgona ganle, grēse miech lo guidzliu nan zho guiedz rii zob nazhnazh Dian, nan wen zho gbaa biet me zob me nu; ³⁶ tsod zha ne guiab led scada. ¿Pe nac nadien ne squitaa rac to? Golguien ganle nonguielda i squi lēēlēd dieen pe rzhixcuaa to. ³⁷ Golwi ganle, laa to ziaad-zo grop zha rii nu, ¿pe nadien beēn zho? Nacd zho cho zha ne quiaguitnie yadoo, cho zha ne nozhidzniegaa xnaxnazh ne. ³⁸ Nana, telne racladz Demetr pe glisqui me grē me zha ne rqüanie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. ¡Ga glisqui zho pe run tib, pe rungaa stib! ³⁹ Laa telne noragaa pe racladz zho glisqui zho, dzigo niac niacredz grēse zha ne nac wxtis, zha ngobey dien zha niaca. ⁴⁰ Sac gon ne squi beēn to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nêz Macedon ni nêz Gres

¹ Zeene laa ruid co blêz, dzigo bredz Pabl grêse zha ne riladz Jesús, bnee me lo zho zaacse gac zho. Blozhse bnee me lo zho, laa me brieë ga zie me nêz xtan zha Macedon; ² güeynee me lo grê zha ne riladz Jesús nêz co, pso me diidz lo zho zaacse gac zho. Nêz co brieë me bdziñ me nêz Gres. Ga blêz me tson mëë.

³ Laa zeene laa me ghi ga tsie me nêz Siria, laa me ziele sëëb me barcw zeene gocnañ me laa zha Israel ne no ga bnediidz pa tsietin zho me, nacne güeydaque me barcw, mazd bio me nêz güeyted me nêz Macedon.

⁴ Blalaa zha ne bzënañ biogza no me, bzë ti meñ Beré lë Sópater xingan ti meñ lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nêz Asia, Tiquico ni Trófimo. ⁵ Gol no Filip laa zho bner, per biaan no diidz Troas cuëz zho no; ⁶ laa no bliaaz ga, ga bdieed no lni Pascw. Zeene bded lni co laa no bziaab barcw, laa no brieë ga. Goc gaay ngbidz no lo nis laa no bdziñ lo zho Troas, dzigo bliaaz no Troas ga gadz ngbidz.

⁷ Zeene gol dze dmingw, bio no yu ne rcaalsa zha ne riladz Jesús ga. Ti yu tson xcuaaw, laa no pcaalsa par dziuun no xtsee ne psan Jesús diidz ga gun grê zha ne riladz me. Laa no ndxie grê no, dzigo psilo Pabl pseed me no; nzian ncuaañe nonee me lo zho sac guini liu co laa me griee ga; gol grol güeela rsiaaldaque me. ⁸⁻⁹ Nzian nac biini ne noquia len yu co; zaatne nac ro ventan ga zob ti niib lë Tic. Wdzeelaaw rsiaaldaque Pabl, tibaque bzhen mcaal niib co, wbix niib ga biab niib nêz ley; ni glaaw, len yu ne riaan glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziñ me lo niib bdeedz me niib.

—jGdziebde to! —rëb me—. jZrieëban niib!

jNi nligaaw brieëban niib! ¹¹⁻¹² Grêse zho per nli rley zho. Blozh ga bdzieep no glaa stib bdziñ no len yu co, dzigora a bdiiz Pabl guietxtil pquiin no. Blozhse bdziuun no xtsee co, laa Pabl psilo bnee lo zho stib, quianeeque Pabl laa liu biini.

Bdziñ Pabl Milet

¹³ Lban co psiaal Pabl, laa me wbi ga laa me zie nêz Ason nzëni me; laa no bziaab barcw bdiëdnieer no lo me. Bdziñ no Ason ga bliaaz no me zigne biaan no diidz. ¹⁴ Zeene blanso me lo no, laa no bziaab barcw gza no me bdziñ no guiedz Mitilen. ¹⁵ Biini liu brieë no Mitilen, bdieed no gax Quo, bietraa stib dze co bdziñ no Samos, ga bliaaz no; bzia no lo nis co zig sti dze dzigora a bdziñ no Milet.

¹⁶ Biotieete no Efés, sac laa guic Pabl no gdziñniob me Jerusalén, zeena yгаа me lni Pentecostés. ¹⁷ Nacne zigne bdziñ no Milet pxeel me diidz Efés bredz me grê zha ne zo lo zha ne riladz Jesús ga. ¹⁸ Zeene blanso zho, bnee me lo zho rëb me:

—Wen wen runbey to naa, nanle to ganle zha noxco naa noyuu naa xtsiin Jesús meñ ne rnabey ne. Wlal ne psilo ziyal naa nêz Asia nu, ¹⁹ blactaa biin naa lo grê mine bdeed naa, blactaa lo guie|xtseeb ne ziyo naa, tibaque quianañ grê zha Israel quin zho naa. ²⁰ Per gon to ganle, tibaque bioxco naa bialseed naa to mine nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu. ²¹ Grêse miecha, tibaque mine pseed naa zho, mine bne naa lo zha Israel mincoque bne naa lo miech stib guiedz; grêse zho bnee naa lo zho none csaan zho xquie|ntseeb zho dib zdoo zho gnalo zho Jesús, zeena gbig zho lo Dios.

²² Scaque niina ne laa Espíritu Sant rnabey ga naa Jerusalén, nanđ naa dien peraa nac ncuaane gđzieelo naa ga; ²³ per nanpaa naa ible zgo zho naa ladzguib, ible sacsi zho naa, sac guiedz ne gđziinta naa min co rnee Espíritu Sant teed naa. ²⁴ Lo guiełxtseeb co no naa per rquiad zdoo naa xquiełmban naa; mine nziuraa lo naa laga gdeeda diidz ib laa naa no gne lo mieh pa lotaa rleynie Dios zho, zeena ine gley naa csiaal naa dziin ne bzo Jesús naa nu quiayun naa. ²⁵ Rien naa lo grē to ne nac to zha ne bialseed naa gocnan to zha nac xnēz Dios, gandraa to lo naa lo guidzliu rii. ²⁶⁻²⁷ Laa naa pseedle to grēse mine nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga. ²⁸ Golguien sca, įgolquianap to, ni scagaa golquianap grē zha ne zo to lo! įGolwi ganle xnēz Dios no zho, haxta lo cruz gut Xpēed me bđiizh me xtol zho! Ni stiba, įib Espíritu Sant bzo to yquianap to zho zigne rquianap baxtor xpēcwxiił zho!

²⁹ įNsin golso! Sac rienle naa zeene laa naa gbiche lo to, ib zrieequia grē zha ne guiaad guiaadquidie to, zguib zho zha gnitlo zho to zigne ruņ grē coyot mēcwxiił. ³⁰ Haxta lad to, zrieequia bla zha ntseeb ne ctsēē Xtiidz Dios, squiil zho to tsienal to zhiwseed zho. ³¹ Gacxe waa laa naa rne lo to, įnsin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to. ³² Dios nac men ne gacnieņ to, laa naa rsan to ladznia me grēse to; Xtiidz Ndzon me mine rnee ganle zha nquialadztaa me to, lēew lozh quix biini to dib zdoo to gnalo to me, zeena yгаа to zaatne gneedz me cuēz to grē to zha ne noraa xnēz me.

³³ Wlaltaa ib rzobladz naa dimi, ib rzobladz naa lar, guiep naa tebaa zha yquianie naa grē ncuaan co. ³⁴ Len dze ne blēz naa lo to, gon to ganle niapse nia naa bdziniiaa naa ncuaane pquiiin naa, ncuaane pquiiingaa grē zha ne bzēnie naa. ³⁵ Ga blu naa lo to ganle, ib none dziuun ne dziin zeena grieelo dziuun ne xyudar zha ne guieņd pe yquiiin. Ib riaanladz naa xtiidz Jesús men ne rnabey ne, zeene znu bnee me: “Mazdraa nroob guiełbley ne rgaa zha ne rgad, lēdle zha ne rad.”

³⁶ Zeene blozh bnee Pabl lo zho, laa me pquitsgzhib ga grē me zho bzodiidznie zho Dios. ³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me. ³⁸ Mban rac zho psilo zho roon zho, rsoladz zho rēb me gandraa zho lo me. Blozh ga, güey zho güeyzonēz zho me zaatne sēēb me barcw.

21

Biire güey Pabl Jerusalén

¹ Blozhse bzhieņi no nia grē zha Efēs co, laa no bziaab barcw, laa no zio bdziņ no ti lo guidzliu win ne no lo nisdoo co lē Cos. Biini liu brieē no ga bdziņ no lo sti guidzliu win co lē Rodas. Rodas brieē no bdziņ no guiedz Pátara. ² Guiedz Pátara, ga bziaab no ti barcw ne zie nēz xtan zha Fenicia. ³ Zeene zieded barcw co ngali zaatne riaan guidzliu win ne lē Chipr, bui no nēz revēs rlupaa guidzliu co. Laa no zio haxta bdziņ no guiedz Tir, xtan zha Siria, ga blēz barcw co biet grē zho ne yea.

⁴ Zigne bdziņ no ga bđzieet no barcw bziaab no lad guiedz co, biodziel no grē zha ne rliladz Jesús ga; bliazaaque no lo zho ga ti zhmal. Dzigo psiaab Espíritu Sant guic zho rnee zho lo Pabl, tebaa siguiel me mazd tsied me Jerusalén.

⁵ Zeene laa no brieë ga, grëse zha ne rliadz Jesús grë tseeel zho grë xpëed zho biaad-zonëz zho no ro nis co; dzigo lo yuzh co ga pquitsgzhìb no grë no, bziodiidznìe no Dios. ⁶ Blozhse bzhìeen no nia zho, laa zho wbi ga.

⁷ Brieë no Tir bdziñ no guiedz Tolemaid, ga bio no bioquiaabdiuzh no grë zha ne rliadz Jesús ga, bliiaz no lo zho tib dze. ⁸ Biini liu brieë no ga bdziñ no guiedz Cesarea, ga biobiaaz no lidz ti meñ ne noneeque Xtiidz Dios lo miech, lë Lip. Lëë Lip co ga gogza sxoops zha ne bzo beëñ xyudar zha poxtl. ⁹ Quianie me tap ndzooop ne gard ctsieelnia, gzase zho bdeed Dios guielbiini lo zho rnee zho tel pe nac miñe racladz Dios gacnañ miech.

¹⁰ Nzianle dze goc no no lidz Lip, zeene blanso ti meñ ne ziaad nëz Judë lë Agab, biadquiaabdiuzh me no. (Ye me rnee tel pe nac miñe racladz Dios gacnañ miech.) ¹¹ Zigne blanso me lo no ga, bzheñ me lar ne rbe leñ Pabl, pxidoo mew nia me ni pxidoo mew ni me, në me:

—Znu gon rnee Espiritu Sant gzobdoo zha Israel bizhuan lar rii, co zho me ladznia zha Roma zeene laa me gdziñ Jerusalén.

¹² Grë zha ne rliadz Jesús ga, zeene bin zho sca rëb meñ co, rnab zho lo Pabl tsied me Jerusalén, yeque no sca rnee lo me. Mban rac no rdzioon no.

¹³ Pquiaaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiaab guielnë to naa i gon squi rac to!

¹⁴ Bdzianse no nlid yquiaadiag me xtiidz no, dzigo mazd psaan no, rdzieets no:

—Golgotsoa csaan ne, Diostaa nañ diëñ zha gaca.

¹⁵ Bdedse ga bzhixcuaa no laa no brieë ga, laa no zio nëz Jerusalén; ¹⁶ blalaa zha ne rliadz Jesús Cesarea ga bzënañ zhìts no, bzënie zho ti meñ Chìpr lë Mnason. Izle rliadz me Jesús, lidz me biobiaaz no zeene bdziñ no Jerusalén.

¹⁷ Grë zha ne rliadz Jesús Jerusalén, rley zho zeene gon zho laa no bdziñ, blëzlo zho no.

¹⁸ Biini liu co güeynie Pabl no lidz Jacob bioquiaabdiuzh no me, lëëtaque laa grë zha rnabey ne zo lo grë zha ne rliadz Jesús Jerusalén ga, ndxie ga. ¹⁹ Blozhse pquiaabdiuzh Pabl grë zha co, dzigo psilo me bzodiidz me lo zho grëse zha gocniëñ Dios me güeyseed me grë miech stib guiedz. ²⁰ Zeene bin zhow per nli rley zho, rdeed zho xquìzh lo Dios; dzigo rëbchaa zho lo me:

—Bets, ye zha Israel gon ndaldoo zho zililadz Jesús; per racladz zho tìbaque tsienal zho miñe rnabey Xley Moisés. ²¹ Grë zha ne no nu bin zho laa luu güeyseed grë meñ wladz ne no guiedz zit, nac diidz blu luu lo zho tsienaldraa zho Xley Moisés, codraa zho xpëed zho bey, niicle tsienaldraa zho grë zhiwseed xmengol ne. ²² ¿Zha ganle dziuuñ ne? Sac zeene gon zho laa luu blanso, ible ziaadguib zho luu. ²³ No tap bets ne nu ziaadyoble gun zho miñe bnee zho lo Dios; miñe gaca güey ²⁴ güeynie zho yadoo, golgun grë miñe rnabey ley, bdiizh ctsiib guic to gza to; zeena ga gan grë zha rii ganle nlid grë miñe rnee miech luu ga.

²⁵ Sangue grë miech stib guiedz zha ne rliadz Jesús, laa no pxeelle diidz lo zho zigne bzodiidz ne nu: grë ma ne rut miech rgon zho lo zhìmdio zho, gowd zho bëel co; grë ma ne rxieed ren zeene ret ma, gowd zho ma; ni niicle grëgaa ma ne gut zho, ib gowd zho xchen ma; grë zha bgui, nodne tsonie zho wnaa ne nacd tseeel zho; niicle wnaagaaw, nodne tsonie zho mgui ne nacd tseeel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeygun zho miñe rnabey ley; blozh ga güey zho yadoo güeynie zho diidz pa dze gza miñe quiaayun zho ga, zeena gaļ dze co laa zho tsienie gon ne gdeed zho tib tib zho.

²⁷ Laa zeene merle gza gadz ngbidz ne quiaayun me miñe rnabey ley ga gza me zha co, lega naclew gon bla zha Israel ne ziaad nêz Asia laa me no len yadoo. Nacne wbig zho ²⁸ bzhen zho zhicw me, roptsie zho rnee zho:

—¡Grêse to menquiedz! ¡Golgun xyudar no gnaaz ne men rii! Sac lëe me ga quianzê quiasseed me zha wladz glëenie zho ladz zho, rnee me lo zho gundraa zho grê miñe rnabey ley, gapdraa zho respet yadoo rii; haxta grê zha zit zizëebnie me nu. ¡Noguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lë Tróximo, dzigo rzac zho güeynie me zha co len yadoo.

³⁰ Pe ga bin grê menquiedz, grêse zho bdziñ wbigbe zho lo Pabl bdozni zho me blee zho me len yadoo, zigne blee zho me ga lëelêd psioog zho ro yadoo; psilo zho noguin zho me, nañ zho gut zho me.

³¹ Zeene gocnañ men ne rnabey lo menguiib ne ndxie ga laa ruid co noyac, ³² lëelêd brieenie me grê xmenguiib me ni grêraa zha ne rnabey lo zho. Zeene gon grê zha ne noguin Pabl ga, laa grê menguiib co bdziñ, dzigora a blêz bdin zho me.

³³ Dzigo wbig men rnabey co, bnabey me grê zhaguiib co bzoob zho Pabl chop caden. Bnabdiidz me lo grê miech co dien cho nac Pabl, pe quiaayun me ne scataa rlëenie zho me. ³⁴ Psilo zho nguiedz roptsie zho, zhaase zhaase ncuaañe rcaadzdoļ zho me. Gonse men rnabey co rlud dien pepaa rlisqui zho, nacne bnabey me grê menguiib co ziesañ zho Pabl yu ne rbëzpa a zho.

³⁵ Laa grê menguiib co csilo soquianie Pabl lo scaler ne rdziñ ro yu co, gataa mazd bzoobyañ zho me, sac ntseeb rac grê miech co; ³⁶ nalbe zho, roptsie zho rnee zho:

—¡Golnitlogazh men qui! ¡Niinagazh golgut me!

³⁷ Laa grê menguiib co csëeble me len yu co, zeene bnee me lo men rnabey co, rëb me:

—¿Pe zrieelo gne naa ti xtidz naa lo luu?

Dzigo rëb men rnabey co:

—¿Mod rac luu rnee luu xtiidz zha Gres? ³⁸ ¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacnie zho, laa zho ziese nêz dan.

³⁹ —Led naada —rëb Pabl— men Israel nac naa. Guiedz Tars gol naa, lëe guiedz co nac miñe nroobraa lo grê guiedz ne ngab Cilis. Na laa naa rnab lo luu, been guielnzaac bneedz diidz gne naa chop lan xtidz naa lo grê miech qui.

⁴⁰ —Zaca —rëb men co.

Lo scaler co zo Pabl blunia me lo grê miech co cuedze zho. Zeene laa zho biaczde, dzigo psilo me bnee me xtiitsë me grê me zho, rëb me:

22

1 —Grêse to men wladz, laa naa rzaac to zig ti bets naa zig pxozgaa naa, golquiaadiag miñe gne naa nu ganle zeena gacnañ to quiaayun naa miñe rquiaqui to naa.

² Zeene gon zho xtiidz zho rnee me, grêse zho dzese bre zho; dzigo rëb me:

³ —Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc men ne pseed naa. Pseed me naa grêse zigne nac xley xmengol ne, grêse zigne nac zhiwseed zho; pseed

me naa tibaque noxco naa runnon naa lë Dios zigne noxcoque tow. ⁴ Mine been to nu nadze, ye naa blactaa squi ben naa ptsidil naa grë zha ne riladz Jesús, pquianał naa ygaa zho guet zho; mgui wnaasaque razobdoo naa zho lidz zho rasan naa zho ladzguiib. ⁵ Men ne nac pxoz nroob ni grë mengol ne goc wxtis guiedz rii len iz co, zha co nanpaa ganle nli sca ben naa; sac zha bneedz ti xtiidz zho bi naa ndzinne naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no ga riladz Jesús, nialnie naa zho Jerusalén nu nded zho caxtigw.

⁶ Min copaa nagon brie naa nu za naa nëz co. Zhile gdzin naa Damasc, zig rwe ngbidza tibaque zeene ziaad ti biinidoo nëz zhan gbaa biab lo naa. ⁷ Biabgazh naa liu, ga nix naa bin naa ti tsi men co rnee me lo naa: “Saul, Saul, ¿pe nacne quianał luu naa?” ⁸ “¡Been guielnaac bnë dien cho luu!” rep naa. Dzigo në men co lo naa: “Naa nac Jesús men Nazaret ne squi quiatsidil luu.”

⁹ Grë zha ne zanie naa ga, bdzieb zho gon zho biini co, per biend zho pe rnee men co lo naa. ¹⁰ Dzigo rep naa lo me: “Bzhiguiel bnë dien, ¿pe racladz luu gun naa niina?” Nèchaa me: “Guche i, güey Damasc ga gnë zho ganle pe nac mine no gun luu.”

¹¹ Dzigo bzhen zha ne zanie naa ga nia naa, bdzinne zho naa Damasc; sac lo biinidoo co pcow lo naa. ¹² Ga no ti mgui lë Ananí, zëeb diidz rioxco me grë mine rnabey ley, grëse men wladz ne no ga nanpaa zho ti men wen nac me; ¹³ dzigo biaad me zaatne blëz naa ga, në me lo naa: “Saul, niinagazh gon bets laa luu gbiire gwi tib.” Zigne sca bnee me laa lo naa biac, gongazh naa me. ¹⁴ Dzigo nèchaa me lo naa: “Dios men ne hliladz grë pxozgol ne, ib men co bzooblo luu gacnan luu pe nac mine racladz me gac, me bzooblo luu gungbey luu men ne nacle diidz ga cxeel me lo guidzliu, ni gon luu tsi men co. ¹⁵ Ib laa me bzo luu tsienee luu lo miech mine bzhaac luu ga, mine bin luu ga. ¹⁶ Guso i sca, zeena chobnizgazh luu. Dib zdoo luu bredz Jesús, bnab lo me csanmbe me luu lo xtol luu.”

¹⁷ Zeene laa naa blanso Jerusalén nu, tib dze lëetaque no naa yadoo nozodiidznie naa Dios, ¹⁸ tibaque blulo me lo naa në me: “Na zeena biobladz brie Jerusalén nu, sac ib gliladz grë miech rii mine gnee luu zeene gnee luu xtidz naa lo zho.” ¹⁹ “Per runbey zho naa waa”, rep naa lo me, “nanpaa zho scataa ra naa grë yadoo raxizhoo naa grë miech ne riladz luu, rnabey naa rguin zho zho ni rio zho ladzguiib, ²⁰ niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquianaap naa xab grë zha ne bdeedquie me.” ²¹ Dzigo në me lo naa: “Na zeena pcaaniob nëz brie nu, sac gon laa naa cxel luu tib dan tsienee luu xtidz naa lo grë menzit.”

²² Zeene bin zho sca rëb me bdeetraa zho diidz nee me, psilo zho nguedz roptsie rnee zho:

—¡ib rieguialdraa gban men qui! ¡Golnitlogazh me!

²³ Nguedz zëeb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴ Dzigo psëeb men rnabey co Pabl len yu co, ni bnabey me grë menguiib co quin zho Pabl, zeena cueero Pabl dien pe nac ncuane been Pabl, zha nac ne scataa rac grë miech co lo Pabl. ²⁵ Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nlipaa no xfalt zho?

²⁶ Zeene bin zha co sca rëb Pabl, lëelëd güeynie zho diidz lo men ne rnabey zho ga, rëb zho:

—¿Zha gon̄ gon̄ luu? Sac zha Roma me nac m̄gui co.

²⁷ Dzigo güey meñ rnabey co rēb me lo Pabl:

—Bneeli lo naa, ¿dien̄ pe nli na meñ Roma nac luu?

—Nliw —rēb Pabl—, zha Roma nac naa.

²⁸ Rzedz yan̄ meñ rnabey co rēb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rēbchaa Pabl:

—Sangue naa, desde gol naa bgab naa lo zha Roma.

²⁹ Grē zhaguiib ne bzo nguīñ Pabl ga parne cueero me, lēēlēd whiche zho lo me, niicle meñ rnabey cow bdzieb me zeene gon̄ me nli zha Roma nac Pabl, sac nrooble nac falt ne niuñ me ga lega nabey me nguīñ zho ti zha Roma.

Bnee Pabl lo wxtis Israel

³⁰ Zeene biini liu, bnabey meñ rnabey co pcaalsa grē zhipxoz non zha Israel ni grē meñ ne nac zhiwxtis zho, sac racladz me gacnan̄ me dien̄ pepaa nac ncuuane rquiaqui rlēēnie grē miech co Pabl. Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grē zha wxtis co, dzigo psilo Pabl bnee me rēb me lo zho:

—Laa naa rneli lo to nu gan̄le, mbe zdoo naa, Dios zobwi gan̄le zanałd naa ncuuane rdziguiend me.

² Zeene gon̄ Ananí (meñ ne nac pxoz nroob) sca rēb Pabl, bnabey me zha ne zo gax lo Pabl, rēb me:

—¡Golcap ro zha qui!

³ Dzigo rēbchaa Pabl lo me:

—¡Tebaa squique cap Dios ro luu! ¡Nac luu gon̄ zig ti lidz nguts loxaque nēz zhtssew stib rna! ¿Pa rquīn ne laa luu zob i? Led luu zo par cobey luu tel̄ no pa ti ley ne zaguits naa, na lel̄ luule noguiitsa bnabey luu bdiñ zho naa.

⁴⁻⁵ Pquiabbe zha ne ndxie ga rēb zho:

—¡Biēñ gan̄le lo pxoz nroob i, lo meñ ne quīayun̄ xtsiñ Dios i noquiabro luu!

—Golgun̄ dispensar —rēb Pabl—. Nañd naa lēē pxoz nroob i, tel̄ niaca min̄e nan̄ naaw ne scad naa; sac zhobnee lo Xtiidz Dios: “Gneenēd luu zha ne rnabey ladz luu.”

⁶ Zeene biēñ Pabl groł zha wxtis co zianał zhiwseed zha saducé, zgroł zho zianał zhiwseed zha farisé, dzigo psilo me nguiedz bnee me rēb me lo zho:

—¡Grēse to bets, gologna gan̄le, zha farisé nac naa, niiclegaa pxoz naaw farisé goc me! ¡Ni porne rliladzpa naa gon̄ zrieeban zha ne ret, miñ co gane znu zo naa lo to nu!

⁷ Zeene sca rēb Pabl, psilo zho bdil̄diidz zho. Goc zho chop dii, ⁸ rriee zha saducé rnee nliid grieeban zha ne ret, nliid no anjl, nliid no espíritu; laa zha fariséгаа na rnee zrieeban miech, no anjl ni no espíritu. ⁹ Nguiedz zēēb tsi zho noneelsa zho, dzigo gusoque bla maistr ley ne nacgrē zha farisé, rēb zho:

—Laa ne bdzian̄le gan̄le, ¡ni ti falt rapd m̄gui qui! ¿Pe nadien̄ dziuun̄ ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon̄ meñ ne rnabey lo men̄guiib ga, laa lo xtil̄ zho noyac nroobraa, bdzieb me rēb me nend znuse gzhiih zho Pabl; bnabeyaquo me gocredz men̄guiib güeyxi zho Pabl biire güeysan̄ zho me len̄ yu ne rbēz zho ga.

¹¹ Gol̄ guieel co, blulo Dios lo Pabl rēb me:

—Gdzieebd luu, zigne bnee luu xtidz naa lo miech Jerusalén nu, scaque none tsienee luuw lo grē zha ne no Roma.

Gocladz zho niut zho Pabl

¹²⁻¹³ Zeene biini liu, ndziibsræa choo zha Israel bnediidz rëb zho gowd zho, ni tib ro peet guied zho haxta gut zho Pabl; telne gund zho mine rnee zho maase csaabzi Dios zho. ¹⁴ Dzigo güey zho lo pxoz ne rnabey, lo grë zha ne nac zha non lo menquiedz, bzodiidz zho mine no guic zho ga, ni rëb zho:

¹⁵—Nana gon, golnab lo men ne rnabey lo menguiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle ziobmbiaaz. Zeene laa zho tednie Pabl, ga dziuut no Pabl.

¹⁶ Dieen zha bin ti xingan bzian Pabla, nacne lëëlëd güey win yu ne rbëz menguiib ga güeynie win diidz lo Pabl. ¹⁷ Dzigo bredz Pabl ti zha ne rnabey lo menguiib co, rëb Pabl lo zho:

—Bzhiguiel güeynie mëed rii lo men ne rnabey to, sac laa win no tsienie ti diidz lo me.

¹⁸ Bzhen men rnabey co nia mëed co, güeynie me win lo men nroob ne rnabey zho, rëb me:

—Laa naa zialnie mëed rii nu me, dien pe nac diidz ne ziaadnie win lo luu; Pabl ne no ladzguuib ga bnab lo naa guialnie naa win.

¹⁹ Dzigo bzhen men rnabey co nia win, güeynie me win stib nëz, bnabdiidz me lo win dien pe nac diidz ne zienie win lo me. ²⁰ Dzigo rëbchaa win:

—Laa zha Israel gon bnediidz gnab zho cxeel luu pxey naa Pabl lo zhiwxtis zho gzhe, yquiaalo zho gnë zho noraa pe yquiep zho me. ²¹ Bzhiguiel gliladz luu xtiidz zho, sac ndziibsræa choo zha ne nacgrë zho rëb zho laa zho tsiesoblan nëz gutgazh zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho tel laa zho gund min co maase gdzibdee Dios zho. Ible zun zhow, loxaque quiambëzse zho dien pe guiab luu.

²² Blozhse ga dzigo bzonëz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³ Lëëlëd bredz men rnabey co chop zha ne zo lo menguiib, rëb me:

—Laa zhaguiib gon none griece naguieel tsie zho Cesarea, na zeen golzo zha ne tsie; none tsie chop gayoo zha ne sëni, tsongal tsii zha ne sob guay, schop gayoo zha ne güey lanz. Naguieelgazh, zig rlozh xtsee none griece zho nu; ²⁴ sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziinnie to me lo gobernador Wech Cesarea.

²⁵⁻²⁶ Dzigo pquiaa me ti guits ne güey zho gdziinnie zho lo gobernador, rnew:

“iDiuzh Gobernador Wech!

’Naa nac Claud Lisias, laa naa rxel guits rii lo luu gzodiidz naa ganle zha nacne bnabey naa ziaadsan zho men qui zaatne zob luu i.

²⁷’Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho. ²⁸ Gocladz naa niacnan naa dien zha nacne rlëenie zho me, dzigo bianie naa me lo zhiwxtis zho. ²⁹ Ga gon naa led ncuaañe rñad rlëenie zho me; tel zha nac xley zho ncuaañe co rlisqui zho; nacda ncuaañe guiab ne rieguial guet me, tsogyugaa me ladzguuib. ³⁰ Zeene gocnan naa laa palal zho bnediidz gut zho me, nacne bnabeyaque naa ziaadsan grë menguiib qui me lo luu i. Niiclegaa zha ne rlëenie mew, laa naa rep lo zho guiaad zho lo luu i, zeena i gnë zho dien zha nacne rlëenie zho me.

’Lëed bii gdzieel ne sca dien.”

³¹ Zeene laa liu pcow, zig rlozh xtseew laa grë menguiib co pcaanie Pabl nëz; dib guieel bio zho nëz bdziñnie zho me guiedz Antípatris. ³² Biini liu, loxaque zha ne zob guay ga pcaa nëz zienie zho me Cesarea, laa grëraa menguiib co w bire bdziñ Jerusalén stib.

³³ Zeene bdziñ zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

³⁴ Blozhse blab me lo guits co, dzigo bnabdiidz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

³⁵ —Nasca —rëb me—, zeene laa zha ne rlëënie luu glanso nu, dzigo yquiaadiag naa dien zhapaa nac xtiñ to.

Dzigo bnabey me, pquianap menguiib Pabl zaatne nac len xyulow Herod.

24

Gocredz Pabl lo gobernador Wech

¹ Zeene goc gaay ngbidza, laa Ananí men ne rnabey lo pxoz bdziñ ga, gza me blalaa zha ne nac zha non lo menguiiedz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilñie zho Pabl.

² Dzigo bnabey gobernador gocredz Pabl. Zeene laa Pabl bdziñ, psilo licenciad co bzeet me grë ncuaañe rquiaqui zho Pabl, rëb me:

—Xquizhdoos luu gon gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuaañe yquiin lo no noyuy luu. ³ Rzac zdoo now, tel pa lotaa zo no rsoladz no luu nac luu men ne rnabey no. ⁴ Nli nonguielda dziunneed no luu, per been ti guielñzaac pquiaadiag ganle pe nac ncuaañe rlisqui no quiaayun mgui ne zo lo ne nu.

⁵ 'Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëë me ga zo lo grë zha ne rnee zho nazaren. ⁶ Zeene bgaa me, lëëtaque laa me no len yadoo ro ne zob Jerusalén quiaayunnguzee me xyadoo no. Nacne gocladz no gagazh nguizh me falt co zigne rnabey xley no; ⁷ per biaad Lisias grë xmenguiib me ntseeb rac zho biaadla zho me lo no. ⁸ Na nagon zac luuzhal yquiep me, zeena gan luu ganle nli quiaayun me grë miñe rnee no nu.

⁹ Grë zha Israel ne zianañ ga, pquiabbe zho rëb zho nli quiaayun me grë min co.

¹⁰ Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuaañe rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

¹¹ 'Na rac tsiipchop ngbidz ga bdziñ naa Jerusalén, biagan naa Dios len yadoo noob ne zob ga (niicle tel niaca miñe griee diidz ganle). ¹² Laa naa bia Jerusalén biagan naa Dios, choot biatilñied naa ga; niicle len grëragaa yadoo wina, ro nëzgaaw, wlaltaa noquuild naa miech cho lo gactseeb zho. ¹³ Grëse miñe rquiaqui grë zha qui naa grielod glu zho nliw, sac led ncuaañe godca.

¹⁴ Miñe nac diidzli, niina wriin psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanañ naaw, dib zdoo naa quiaayun naa dziin lo Dios men ne billadz pxozgol no; ni scaquegaa, noxco naa grëse miñe nac ley. Riladz naa grëse miñe bnee grë zha ne biadteed xtiidz me. ¹⁵ Riladz naa zdziñ dze ne cueeban Dios grëse miech, zigtaa zha wena zigtagaa zha ntseeba, ni haxta zha ye zho riladz

min co. ¹⁶ Ni min copaa nagon gane tibaque noxco naa guiaanmbe zdoonaa, guntaldran naa xtol naa zigtaa lo Diosan zigtagaa lo samiech naaw.

¹⁷ Nod naa Jerusalén tibaque, blale iz goc no naa ladz menziti; dze ne bdziñ naa Jerusalén ga, laa naa bia porne zasañ ti gon lo menladz naa ni zanie naa ti gon ne gded naa lo Dios. ¹⁸ Min co nagon nacne no naa len yadoo zeene gon grè zha qui naa. Blozhle ben naa grè mine rnabey xley no rdziuum no zeene sca riosañ no gon, zeene laa bla zha Israel ne no nēz Asia blanso lo naa ga; per choot miech taf ndxienied naa ga, niicle choot noquiiidgaa naa. ¹⁹ Zha co nagon rieguial niaad nu, nlisqui zho tel pe ncuaañe rzac zho nonguielnd noyuu naa ga. ²⁰ Zha ne ndxieгаа nu niina, zac gnè zho telne briequia falt ne rquiaqui zho naa zeene gocredz naa lo wxtis Jerusalén. ²¹ Te goon falt ga naye ben naa, lēè gdib nguiedz bne naa lo zho rep naa: “Laa naa racredz lo to, zig nac zeene falt ga rap naa loxaque ne riladz naa zdziñ dze ne griebeban miech.” Scase nagon naca.

²² Nanle gobernador co led ncuaañe gund zha ne riladz Jesús ga rquiaqui zho Pabl, dzigo bnee me lo zho cuèz zho nieeda gdziñ Lisias, dzigo dien zhapa guiaan xtil zho. ²³ Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grè zha ne ndzieidiidz Pabl tsiegan zho Pabl.

²⁴ Goc blalaa ngbidza, rnabey gobernador co gocredz Pabl lo me grop tseel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. ²⁵ Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdziñ dze ne gund Dios guielwxtis, dzigotaa laa me bdzieb, rēbchaa me lo Pabl: —Jlēlelwa na nadien! Na zeene guioba, dzigo naazhal cuedz luu guiaad luu ziodiidz ne stib.

²⁶ Zhiga zhiga rbedz me Pabl, sac quiambēz me dien pe gdziibd Pabl dimi csilaa me Pabl.

²⁷ Zeene goc chop iz sca no Pabl ladzguiib ga, laa Wech brieie guielgobnador, bzēēb ti men lē Pons Fest. Niicle brieie Wech per psilaad me Pabl, sac racladz me dien zha guiaanziuuraa me lo grè zha Israel.

25

Güeyzo zho Pabl lo gobernador Fest

¹ Zeene goc tson ngbidz bdziñ Fest Cesarea pcaania me guielgobnador, laa me brieie güey me Jerusalén.

² Grè zha pxoz non ni grè zha ne rnabey lo menguiedz Israel, zeene bin zho laa Fest bdziñ Jerusalén lēléd güey zho lo me güeyxob zho xdemand Pabl; ni ³ bnab zho lo me cxeel me Pabl Jerusalén. Laa zho rnab min co sac laa zho bnediidzle, nēz tsiesoblan zho, yquiambēz zho ted Pabl gut zho Pabl. ⁴⁻⁵ Per bdeete Fest diidz, rēb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire guey nēz co dzigo zac tsienal zho zhits me.

⁶ Ndziibsrāa ti zhmāl blēz me Jerusalén ga, dzigo laa me biire zey Cesarea. Zna dze bdziñ me biinigazh liu co güey me yulow, bnabey me gocredz Pabl.

⁷ Laa grè zha Israel ndxiele ga, wbig zho lo Pabl ndal grè falt nroob ne rcaadzdoj zho me, per loxaque diidzsew, guiend zha glu zho ne nliipaa goca.

⁸ Dzigo pquiab Pabl rēb Pabl:

—Grētaa mine rquiaqui zho naa i, ni tiba nliid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

⁹ —¿Pe racladz gaa luu tsie luu Jerusalén? —rëb Fest—. Ga gbiire yquiaa-diag naa xtił to i zeena glu dien chopaa rap dol.

Sca rëb me, sac racladz me dien zha guianzuiuu me lo grë zha Israel.

¹⁰ Dzigo rëbchaa Pabl:

—¡Gad naa! ¡Nod pe nac ga naa ga, to rieguial gun guielwxtis rii! Benque nan wen luu ganle peet falt nzeëbd naa lo zha Israel. ¹¹ Tel niaca mine nli ziyun naa pe guielntseeb ne raguiat naa guet naa, maase guet naa. Per na nanpaa naa ni ti ncuane rquiaqui zho naa i nliid, ¿pe nac dzigo cho co naa ladznia zho gut zho naa? Laa naa racladz, mazd gołneedz diidz tibaque ga naa lo zhiwxtis nroob ne, meñ ne zob Roma.

¹² Dzigo bzodiidz Fest grë me meñ rac ne nacie me dziin; blohse ga rëbchaa me lo Pabl:

—Guiend rson sca. ¡Tel lo César racladz luu tsie luu, na maase tsie luu!

Gocredz Pabl lo Agrip

¹³ Zeene goc bla zhmalaa, laa rey Agrip grop wnaa ne lë Berenis bdzin Cesarea ga güeyquiaabdiuzh me Fest. ¹⁴ Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Leñ dze ne bii nac Wech dziin biab ti mgui ladzguiib nu, ¹⁵ laa leñ dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. ¹⁶ Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nliidgaaw; ¹⁷ nacne biaad zho nu. Zna dze blanso zho, biinigazh liu co bnabey naa gocredz me. ¹⁸ Tibaque ni naa bod no pe ti falt nroob ne rquiaqui zho me, per zeene biaad zho yulow gon naa ¹⁹ lëë gdib tel zha nac grë ncuane riladz zho min co rlisqui zho, ni rlisqui zho pe nacne zienał me zhiwseed ti mgui lë Jesús, gutle meñ co ni laa me rnee mban me.

²⁰ Zeene gon naa grë ncuane co rquiaqui zho me nli riend naa zha gun naa, dzigo rep naa lo me, telne racladz gaa me zac tsie me Jerusalén ga dien zha guiaan lo xtił zho. ²¹ Per bnëd me, leł bñab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nëz co.

²² Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegagh gnabey naa gacredz me.

²³ Biini liu, ti lni nroob ne rac laa Agrip ni Berenis bdzin leñ yu ne rac guielwxtis ga, grë zha non ne rnabey lo menguiib, grë zha non lo menguedz, nal zho zhits me. Dzigo bnabey Fest gocredz Pabl, zeene laa Pabl bdzin ²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, gołwi ganle lëë meñ rii nagon rliëniendox zha Israel, racladz zho guet me; zigtaa Jerusalénaa zigtagaa nuw ziyaadnab zho lo naa gnabey naa guet me. ²⁵ Sangue naa gonle naa rapd me falt, par guiab ne rieguial guet me; per laa me bnab tsie me lo César, na laa naa no cxel me nëz co.

²⁶ Nli riend naa dien pe nac diidz ne cxel naa lo César, ne squi lega ncuane nliid rquiaqui zho me. Min co nagon bnabey naa gocredz me lo to nu, ni laga laa luu ziaad gaa nu rey Agrip, bzhiguiel pquiaadiag ganle zha rëz xtiidz me; zeena togo dzziel naa pe nac diidz ne cxel naa gal dze ne laa me tsie nëz co.

²⁷ ¡Sac nonguiel d ga gun naa telne sobdoo me cxel naa me, ni tel cxel d naa diidz dien pe nac xfalt me!

26

Bnee Pabl lo Agrip

1 Dzigo rëb rey Agrip lo Pabl, mezhal gnee dien zha naca. Nacne blis nia Pabl psilo Pabl bnee Pabl rëb Pabl:

2—Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nlid grë ncuaane rquiaqui grë menladz naa naa. 3 Rley naa sac nan naa nanpaa luu zha nac grë xcostumbr no, grë ncuaane riladz no. jRnab naa lo luu sca, guieete luu yquiaadiag luu grë mine gne naa!

4 Grëse zha Israel nan wen zho ganle zha mban naa, sac mēēdlas naa bdziñ naa Jerusalén, ga broob naa. 5 Nanpaa zho zha farisé goc naa, ni zha farisé nac zha ne rioxcoraa run grëse mine riladz zha Israel. 6 Per mazd gon, laa zho rlëē lo naa porne dib zdoo naa riladz naa laa Dios beenle mine psan me diidz lo grë pxozgol no. 7 Grëse zha Israel, zigne ziaad zho lo gza tsiipchop dii ne psan xmenjol no, grëse zho dze guieel bi quiambëz zho gac min co. jMasaque rzac zho dol ga quiaayun naa riladz naa laaw gogle! 8 Haxta to, zeene rzet naa zrieaban miech, rzhidz to ron tow, zpe rzac to naa grielod Dios gun me min co?

9 Glo nli ptsidil naa grë zha ne riladz Jesús men Nazaret, masaque rzaac naa lëew ga quiaayun naa. 10 Pe zhidaa zha ne blo naa ladzguiib Jerusalén, haxta grë pxoz non bneedz diidz beñ naa grë min co; ni zeene rnabey zho ret grë zha co, ye naa rded diidz ret zho. 11 Nzian grë yadoo win bia naa, biasacsi naa zho haxta gneenë zho Jesús. Blëēniedox naa zho, haxta grë guiedz zit bia naa biaguib naa zho.

12 Min copaa nagon brie naa za naa guiedz Damasc, masaque grë pxoz rnabey bneedz ti xtiidz zho bi naa laa naa za. 13 Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz. 14 Grëse no biab liu, dzigo bin naa ti tsi men co rnee me xtiidz no, bredz me naa në me: “Saul, Saul, zpe nacne quiana luu naa? Lëēque luu gon nosacsi luu i, rzac luu zigne rzac ngon ne rcaanni, ni lëēque lo guuib lots ne rtseb zho ma riecaanni ma.” 15 Dzigo rep naa: “Been guieInzaac bnë dien cho luu.” Nëchaa men co: “Naa nac Jesús, men ne squi quiatsidil luu. 16 jNa zeena guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni grëragaa mine naraa gan luu. 17 Peet tsienied guic luu, naa yquianaap luu, niicle zhaladz luuw niiclegaa zha zita peet grielod gun zho luu. Sac laa naa cxel luu grë guiedz zit 18 tsiene luu lo miech gacnan zho mine nacpaa diidzli, zeena greee zho lo ncow gbig zho nëz lo biini, greee zho ladznia menox ygab zho lo Dios. Dib zdoo zho glladz zho naa zeena gun Dios zho perdon, ni ygaa zho zaatne gdziñ grëse zha ne mbe zdoo.”

19 Min co nagon rey Agrip nacne bioxco naa beñ naa mine në men co lo naa ga. 20 Glose Damasc psilo naa bne naa lo miech, ga brie naa bdziñ naa Jerusalén, bia naa dib Judé ni grë guiedz zit, bne naa lo miech csaan zho grë xquieIntseeb zho gbig zho lo Dios.

21 Min co nagon nacne rlëēnie zha Israel naa, biadnaaz zho naa len yadoo ro ne zob Jerusalén, gocladz zho niutgash zho naa. 22 Gocniēn Dios naa, gane laa naa bi zo nu quiane naa Xtiidz me zigtaa lo grë zha winā zigtagaa lo grë zha nona. Noseete naa miech stib wseed, sinque laa naa rne mine bzeetaque Moisés ni grëragaa zha ne biadteed xtiidz Dios padzeela. 23 Tel zha, bzeette zho ib sacsi miech men ne cxel Dios ga, ni me gac men ne glopaa grieëban,

me gac zig ti biini ne gziini lo grëse miech, zigtaa zha Israela zigtagaa grë menzita.

²⁴ Tibaque nguiedz bnee Fest rëb me lo Pabl:

—jBod rzhinle guic luu gon Pabl! jNe tibaque nagon rio luu wseed gane squi riots xtiids luu!

²⁵ —Coo, gobernador Fest —rëb Pabl—, led rzhind guic naa. Niapse mine nac diidzli min co none naa, ²⁶ laa rey Agrip zob i, me nan ganle nli grë mine rne naa nu. Tibliladz naa none naaw lo me, sac nanpaa naa nan me nli mine rnee naa, nacda ncuane goc nguets zhliian. ²⁷ ¿Led nli lëë rey Agrip rililadz luu mine bzeet grë zha ne biadteed xtiids Dios padzeela? Nanpaa naa rililadz luuw.

²⁸ Pquiab rey Agrip, rëb me lo Pabl:

—jZlalaque nu gon laa luu cole guic naa ye naa sëëb xnëz Jesús!

²⁹ Dzigo rëbchaa Pabl:

—jNend zhilew o nroobragaaw, per rnab naa lo Dios led loxaque luudse sëëb xnëz me, sinque ye grëraa zha ne noquiaadiag mine none naa nu niina; zeena yгаа to mine bgaa naa nu, per led znud sob caden rii nia to!

³⁰ Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brieë ga. ³¹ Grëse zho rnee peet xtold Pabl, rapd me falt ne guiab ne rieguial guet me, rieguialгаа tso me ladzguib.

³² —Niacpaa nsilaa ne me —rnee Agrip lo Fest—, telne nabd me tsiepaa me lo César.

27

Pxeej zho Pabl nëz Roma

¹ Bdzin dzew, laa Fest nbabey tsie Pabl nëz Roma, dzigo laa zho psan Pabl ladznia ti men ne rnabey lo menguib lë Jul, gza Pabl zlalaa zha ne no ladzguib ga. Lëë Jul co rnabey lo tib dii menguib ne rnee zho “Augusto César”.

² Ye no zional zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³ Biini liu co laa no bdzin guiedz Sidón. Zeene bdzin no ga, wen goc Jul lo Pabl bdeed me diidz güey Pabl güeyquiaabdiuzh Pabl grë zha ne runbey Pabl ga, grëse zho rleynie zho me blëzlo zho me.

⁴ Ga brieë no bdieed no tib ro guidzliu win ne lë Chipr, psaac guidzliu co palal, sac psilo rrieë me rtsire me barcw ne zio no ga. ⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdzin no ti guiedz ne ndxie xtan Licia lë Mira; ⁶ ga bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandrí no gree ga tsie nëz Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzigoraab dzin no gax guiedz Gnid; ib rbëzdaque me, nacle bguib zho dien pa nëz zhi rcaan me, dzigo güeynie zho harcw co nëz Cret. Tib ro guidzliu win co zio no bdieed no Salmon; ⁸ nen bdzin no zaatne rnee zho Buenos Puertos, gaxle ga riaan ti guiedz lë Lasé. ⁹ Nrooble dze goc no no lo nis, len dze co laa mëë nal psilole ni zëëb diidz gacd së barcw len mëë co, nacle bnee Pabl lo grë zha ne zienie no ga, ¹⁰ rëb me lo zho:

—Golgonaa ganle, telne laa ne gree nu len dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac mine rëb Pabl ga, lel mazdraa bliladz me xtiidz zha ne rsëë barcw ni men ne nac bizhuana. ¹² Stiba, zaatne nac Buenos

Puertos ga rapda zaatne zaacse cuëz miech len mëë naḷ, nacne nzian zho rëb mazd gdziṅ guiedz Fenice, ga zac gbiaaz no gdipse len mëë naḷ. Ro guidzliu win co riaan Fenice, nligaa zhi rcaan me ga.

¹³ Zeene laa ti me win ne znu ziaadquia psilo brieë lo nis co, zootle na nli griedraa me. Nacne lëëlëd bnabey zho bziaab no barcw, blisglaa zho lar nroob ne rcaan me rzëw, laa no zio, gax gax ro guidzliu co zienie zhow.

¹⁴ Zhisaque goca zeene laa ti me dox ne rnee zho Nordest psilo brieë, laa me co psilo rtsire barcw. ¹⁵ Niicle racladz zho tsienie zhow nëz ne no guio no ga, per rsaand me; gonse zho led ncuane gacda, mazd psaan zho zienie mew nëz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lë Clauda, ga në në brieelo blis zho grë canó win ne naḷ zhits barcw ga bzëëba nëz len barcw; ¹⁷ dzigo blibdoo zho barcw co zeena gbïlda, ni blit zho lar nroob ne rcaan me rzëw, sac rdzieb zho rëb zho telne scaquia lar co nend tsieniezho mew nëz ro nis, pa tsiesobnagwa lo yuzh.

¹⁸ Zeene biini sti liu co mazdraa rrieë me, ni guixoo ne ziaadnie me, nacne blee zho grë yo ne no len barcw blaal zhow lo nis. ¹⁹ Goc bion ngbidz scataa zo guie dox co, bnabeyaque zho blee no grëse ncuane runxtsiin zho len barcw blaal now lo nis.

²⁰ Goc bla ngbidza rbëzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no. ²¹ Niicle wagw choot rsoladzdraa, dzigo bnee Pabl lo grë zha ne zio grë no ga, rëb me:

—Tebaa nion to xtidz naa nagon nzhiguiel to nrieed ne Cret, zeena ndzieelod ne grë ncuane nodziaṅ ne nu, niicle nlaaldgaa ne grë yo co lo nis.

²² Per laa ne znule bzhaaac zha dziuunraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd. ²³ Led nanle to ganle, xnëz Dios no naa ni xtsiin me noyun naa, nieewdze pxeel me ti xanj me ²⁴ në lo naa: “Gdziebd luu gon Pabl, peet gacd luu, sac ib none laa luu gdziṅ lo rey ne zob Roma. Niicle grë zha ne ziadgrëë luu len barcw i peet gacd zho, sac bin me miṅe rnab luu.” ²⁵ Gane rne naa lo to peet tsienied guic to, nanle naa csaand Dios ne, ible zac miṅe në anjl co lo naa. ²⁶ Ib tedsod, no pa ti lo guidzliu win ne no lo nis rii tsiezo me rii ne.

²⁷ Zeene goc tsiida ngbidz sca nëzrii nëzrec zienie me no, laa no no lo Nisdoos Adriático. Wdze co, zig grol guieela, bien grë zha ne rsëë barcw ga gaxle ti ro guidzliu ga nonie barcw no; ²⁸ dzigo ptiix zho dieṅ palal guiet nis ga, gon zho loxaque gaḷ yas guieta. Bzë zho spalal biire ptiix zhow stib, gale guieta loxaque tsiiptib yas. ²⁹ Gataa laa zho bdzieb rëb zho nend pa tsiecaan barcw lo quie, dzigo psilëë zho lo doo ne zob gza tap guiib cruz nroob ne quia nëz zhits barcw, bron zho gza guiib co lo nis, zeena tsowga së barcw; rzac zho tebaa laa liu biinile.

³⁰ Grë zha ne run dziin len barcw, gocladz zho nzhoon zho, psilo zho noxadz zho grë canó win ne ney barcw, rquiaalo zho zig nac zeene guiib cruz nroob ne ney barcw nëz quia w quialit zho csëëb zho len nis. ³¹ Zeene gon Pabla, rëbchaa me lo Jul ni lo grë xmennguiib Jul:

—¡Laa grë zha rii gon racladz xoon! Csaande to, sac telne laa zho xoon nlidraa griequia to lo nis rii.

³² Dzigo pchug grë mennguiib co doo ne zob grë canó win co, bron zhow lo nis.

³³⁻³⁴ Silgaw, bii ncow rnaw laa Pabl bnee lo zho gow zho, rëb Pabl:

—¡None gow to! Goḷwi ganle nale gac tsiin ngbidz ga ni ti lë peet gard gow to, ni squique raguiesde to zaacse. Peet tsienied guic to, ni tib to peet gacd.

³⁵ Blozhse sca bnee Pabl lo zho, bzhen Pabl ti quietxtil, squi ndxie zho grē zho bdeed me xquizh lo Dios, dzigo beengrol me quietxtil co laa me psilo wagw. ³⁶ Dzigoraa peet güeyniedraa guic zho, ye zho laa zho psilo dow. ³⁷ Lo grē no zig zio no len barcw co rgaa no chop gayoo tsongaltsiimtib.

³⁸ Blozhse bdioow no, dzigo laa zho blee grē zho bxtil ne zie len barcw ga blaal zhow lo nis, zeena gnitnē barcw spalal. ³⁹ Zeene laa liu blozh biini, gon grē zha ne rsēe barcw ga laa ti lē ro guidzliu rlu gax ga, per riend zho dien paw. Natlaa nac ro guidzliu co, rlu zac gdziñ barcwa, nacne rēb zho dien pe grieelod gdzinnie zho barcw ga. ⁴⁰ Dzigo pchug zho doo ne zob guiib cruz nroob ne no len nis ga, biaanse guiib co ga. Psilēe zho doo ne naaz yag nlag ne rhug nis rzē barcw, ni blisglaa zho lar nroob ne rcaan me rzēw; zeena csēe mew gdziña gax ro guidzliu co.

⁴¹ Per ziese zho, lēetse lo yuzh ne zobli len nis co güeytsiba, loxaque güeyseēbguica ga laa nēz zhitsa psilo nobilaque, sac grēse nis ne rias riecaan choo co. ⁴² Dzigotaa laa grē menguiib co gocladz niut grē zha ne zie ga guey ladzguiib, rēb zho nend znuse xoobnis zho xoon zho. ⁴³ Per bdeete men ne rnabey lo zho diidz, sac racladz me gut zho Pabl. Mazd bnabey me zha ne rac rzhooobnis, zac ner zho xoobnis zho grieequia zho ro nis co; ⁴⁴ laa grē zha ne gacd xoobnis, zac maase grē yag biats ne nobil barcw xoobnisnie zho. Sca bdeeda diidz brieequia no ro nis grēse no.

28

Blēz zho Malt

¹ Zeene bdziñ no ga, dzigoraa gocndion no lēe guidzliu win ne lē Malt ga. ² Grē miech ne no ga pquiadox zdo zho no, bzēeg zho gui bredz zho no bdzēe no, sac lala rac nal ni scataque bgaa no guie.

³ Ye Pabl güey güeytop chop lē yag ne cuib lo gui. Lēētaaque laa me nodziiba lo gui, tibaque bias ti meel ne zizhoon lo zhindzēe gui co, pquiaalay ma nia me, quiataque ma ga. ⁴ Grē miech ne no ga, zeene gon zhow rneechaa zho: —jise nagon rlu, nzēeb men qui ngutoo! Niicle blaa me lo nisdoo, per no guielwxtis ne quianab guet me.

⁵ Znuse bdzib Pabl nia me bron me meel co lo gui. ⁶ Grēse zho rwi quiambēz zho dien pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib lē liun men ne rnabey lo guidzliu win co lē Publ, dzigo bneedz me zaatne bliaaz no ga tson ngbidz ni bneedz me ncuaañe bdioow no.

⁸ Lēētaaque len dze co laa pxoz me nix rlan xlēe ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac. ⁹ Zeene bin grē miech cow, zha ne rzacnētaa riaadnie zho zho lo Pabl, runguiac Pabl zho. ¹⁰ Dzigo rleyne zho no, nroob grē ncuaañe bgad zho lo no. Zeene goj dze ne laa no wbii ga, scasaque nroob ncuaañe yquini no nēz bneedz zho.

¹¹ Tson mēe bliaaz no lo guidzliu co, dzigo laa no brie ga bziaab no ti len xbarcw zha Alejandrī, ti barcw ne blēz ga dipse len mēe nal co. Guic barcw co quia chop mdio, mdio ne rnee zho Cástor ni mdio ne rnee zho Pólux. ¹² Bdziñ no guiedz Siracús, ga bliaaz no tson ngbidz. ¹³ Siracús brie no, gax gax ro guidzliu zio no bdziñ no guiedz Regio; biini liu ine zhoob ti me ne ziaadquia lo nis co, dzigo laa no brie Regio laa no zio. Biiniraa sti liu bdziñ no guiedz

Puteoli, ¹⁴ ga bdziñ no lo blalaa zha ne riladz Jesús. Bnab zho lo no gbiaaz no, nacne bliazaque no lo zho ga ti zhmal. Garaa brieë no bdziñ no Roma.

¹⁵ Grë zha ne riladzle Jesús Roma, zeene bin zho laa no gdziñ ga, brieë zho biaad-xinëz zho no. Zhis zho biadzieel no zaatne lë Foro de Apio, szhis zho biaad zaatne lë Tres Tabernas. Zeene gon Pabl scataa biaad-xinëz zho no, rley me rdeed me xquizh lo Dios.

Bdziñ Pabl Roma

¹⁶ Zeene bdziñ no lad guiedz Roma, bdeed zho diidz Pablzhal bguib ti yu ne blëz me grop me menguiib ne quianap me, blood zho me ladzguib.

¹⁷ Goc tson ngbidz bdziñ no ga, dzigo bredz Pabl grë zha ne nac zha non lo zha Israel ne no ga. Blozhse pcaalsa zho, rëbchaa me lo zho:

—Laa naa bredz to zho gon bets, gacnan to ganle laa grë zha ladz ne bnaaz naa Jerusalén, güeyzo nu gon lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditsd naa. ¹⁸ Niicle wxtisgaaw, blozhse pquiep zho naa gon zho raapd naa falt, nacd naa zha ne rieguial guet; dzigo gocladz zho nsilaa zho naa.

¹⁹ Per zeene gon naa nëd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne zial naa nu, ziald naa cto naa menladz ne o cteedquiegaa naa zho. ²⁰ Wen ne laa naa beenbey to nagon, ni beenbegaa to naa; gacnan to sca ganle laa caden rii zob nia naa, per nacdä por pe falt ne rap naa, sinque laaw zob nia naa porne riladz naa laa Dios pxeelle men ne quiambëz menladz ne ga.

²¹ Dzigo pquiab zho rëb zho lo Pabl:

—iWlaltaa, ni ti guits ib gard cxeel menladz ne lo no zaatne gzeet zho luu! Niiclegaa grë zha wladz ne zilanso nuw, rneed zho laa luu noyün pe guieIntseeb. ²² Per na laga laa luu ziaad nu, siguiel luu sodiidz luu lo no dien zhapaa nac wseed ne riladz luu i, sac blactaa zidzion no, zaatne notaa zha ne riladza rlëenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rbëz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele men ne nac diidz cxeel Dios ga nac Jesús; blu me lo zho grëse zaatne zhobneew, zigtaa lo grë mine pquiaa Moisésa, zigtagaa lo grë mine pquiaa grëraa zha ne biadteed xtiidz Diosä. Dipse dze sca bzodiidznie me zho grë min co.

²⁴ Brieëquia bla zha ne bliladz grë mine bnee me ga, ni scaquegaa brieëquia zha ne bliladzda. ²⁵ Grë zha ne riold zdoon mine rnee me ga, laa zho psilo norieë, nacne rëb me:

—Ib lëëpaa mine nac to i ga nagon bzeet Espiritu Sant, zeene psiaab me guic profet Isä znu rëb Isä ²⁶ lo grë xmengol to:

Niicle peraa gon to, niicle peraa gan to,
per peet guieñde to;

²⁷ sac gocntseeb zdoon to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcodgaa to gbig to lo naa zeena csilaa naa to lo xtol to.

²⁸ Golgacnan sca ganle, min co gane laa Xtiidz Dios quiagaaz lo grë miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blëë zho, nodiidiidzlsa zho laa zho zey.]

³⁰ Dipse len chop iz blëz Pabl ga, ga bree me ti len yu ne bio me. Ga rdzin grë miech ne zienee lo me, ³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech.

GUILTS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhubnee Xtiidz me. ³ Lëew ga rnee ganle cho nac Jesús (men ne brieequia lo xtií rey David ne laa me goc miech lo guidzliu; ⁴ sangue Espíritu Sant, pxobnen me ganle Xpëed Dios nac me; min co ganle brieeban me).

⁵ Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. ⁶ Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷ Laa naa rxel guits rii lo to, grëse to ne no to guiedz Roma i. Golgacnan ganle rleynie Dios to, gan laa me bredz to ygab to lo me, gban to zigne no gban zha ne ngab lo me. Me ne nac me Pxoz ne, ni Jesús men ne rnabey, tibaque noxco me to, me nac men ne gacniën to zeena peet zhgab ctsebde to.

⁸⁻⁹ Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdoo to rliladz to me. Me zobwi, me nan ganle zeene rnabtaa naa lo me, ib riaanladzd naa to, tibaque rnab naa lo me gacniën me to; ¹⁰ ni tibaque rnab naa telne zneedz me diidz gdziñ tib dze ne grielo guial naa i guialgan naa to.

¹¹ Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espíritu Sant; zeena tiblique gac guic to dzziisraa so to. ¹² Ni scagaa tipse gac ne ziodiidz ne zha nac Xtiidz Ndzon Dios, mine rliladz ne; zeena tipse gac ne sodziits ne low.

¹³ Bets, bzian, tel gan to ganle blactaa vuelte ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. ¹⁴ Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëгаа zha ne peet rienda. ¹⁵ Mincoxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Tel naa, ib rtoladzd naa gne naa Diidz Ndzon rii lo miech, sac ncuaan ro ne run Dios zeene rquiaadique miecha. ¡Grëse miech ne gliladza, ib zlaa zho lo xtol zho! Laa guielnzaac co no niina par grëse miech. Glose lo zha Israel bdziña, laa niina laaw quiadziñ lo grëraa miech, zeena grëse zho gbig sëeb xnëz Dios. ¹⁷ Sac gon, lëe Diidz Ndzon rii rlu zha rbiire rcaania Dios miech, rsanme me zho lo dol rbiire riaanwen zho lo me: totsaque nli dib zdoo zho gliladz zho mine nac Xtiidz me. Sca zhubnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdoo zho rliladz zho mine nac Xtiidz me.”

Xtoł miech

¹⁸ Ndiönle ne ganle no guielnë ro ne csiaab Dios yгаа grëse miech ntseeb, miech ne nëd gac-wen, ni desde gbaa cxeel me guielnë ne yгаа zho; sac por xquielntseeb zho rsaand zho gacnañ grëraa miech minë nac diidzli.

¹⁹ Grë zha ntseeb, nanle zho zha nac Dios, sac mezhallu lo miech zha grieelo gunbey zho me. ²⁰ Niicle ne grielod ganlo ne Dios, per de lo grëtaa ncuaañe bzaa me, grëtaa ncuaañe run me, gase rlu ganle cho nac me. ¡Gase rlu ne nli me nac Dios, ni gdziñd dze ne lozh xpoder me!

Gacxe waa grë zha ntseeb, ib tedlaad zho lo guielnë ne csiaab me ga; ²¹ sac gon niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguañla, niicle xquizh nanñd zho gdeed zho lo me. Laa ne rzac zho na rien zho pe run zho, leñ pcow xquielrien zho; rzac zho na lëew ga, gun zho ncuaañe guiaabtaa guic zho. ²² Niicle ne rzac zho zharieñ zharac nac zho, per zha nac miech ne quialoozhraa lo xquielnñen; ²³ sac gon laa ne gunbey zho guielndzon ne rap meñ ne nacpaa Dios nguiamban, leñ rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; leñ grë ncuaañ co ziegan zho laa ne gleynie zho meñ ne nacpaa Dios.

²⁴ Minçocxe nagon waa, rsaanladz Dios zho laa zho zienañ grë ncuaañe ndzinlid ne rzoobladztaa zho. Grë ncuaañe ntoladzdox ne run zho, lëeque zha runnguzee zho rguitnie zho xcuerp zho. ²⁵ Sac laa ne gleynie zho diidzli minë rnabey Dios, leñ minë rnee zha ne rquidie rleynie zho; leñ grë ncuaañe bzaale Dios, ncuaañe psanle me, ncuaañ co ziegan zho, lo grë ncuaañ co ziequitsgzhib zho; laa ne yquitsgzhib zho, gleynie zho meñ ne nac Dios mban, meñ ndzon ne psan grëtaa ncuaañe no. ¡Diosse rieguañ gunnon miech, meñ co rieguañ tibaque goolnie zho! Sca rieguañla.

²⁶ Ne sca nagon nac zho, gane psaan Dios zho laa zho run grë guilyozh, ncuaañe ngubeeguelto ne rieguañdraa gun miech. Grë wnaa laa ne gdeed zho diidz gnee tsieel zho lo zho, leñ lëeque sawnaa zho rquiangob zho, laa zho zienañ grëraa guilyozh; ²⁷ grëгаа mgui, laa ne gnee zho lo wnaa ne nac tsieel zho zigne biaan no gaca, leñ lëeque sabgui zho rzoobladz zho. Ncuaañe mbixladz run zho, rquiangob zho lëeque sabgui zho; ni ne sca run zho grë ncuaañ co, lëe minë rdziniaa zho nac grë guielguidz yozh ne riaan lad zho; ndzinlidraa rac zho.

²⁸ Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grë zhgab yozh ne no guic zho, no zdoo zho, min co ne scataa nac zho. ²⁹ Nroobdoo nac xtoł zho, sac:

rsacsixuu zho samiech zho,
rzoobladz zho ncuaañe quianied zho,
racsntseeb zho lo samiech zho,
në rac zdoo zho ran zho stib noded samiech zho,
rut zho samiech zho,
rtsidil zho samiech zho,
rquidie zho samiech zho,
rquiadiidzguizh zho samiech zho,
miech yozh nac zho,

³⁰ rneenë zho samiech zho,
rquiabro zho lo samiech zho,
racniats zho lo samiech zho,
rlu zho ncuaañe rapd zho, ncuaañe nacd zho;
rlëenie zho Dios,
rio zho rbeebey zho grë guielntseeb,

rond zho xtiidz pxoz zho,
 rond zho xtiidz xniaa zho,
³¹ racladzd zho gon zho diidz,
 rund zho mine rnee zho,
 rleynied zho samiech zho,
 rund zho samiech zho perdon,
 rquiad zdoo zho samiech zho.

³² Niicle ne nanpaa zho zha rnabey Dios none gban miech, niicle ne nanpaa zho grëse zha ne run guielntseeb, ib tedsod znitlo zho; ni laa zho bii quiayuna, ni haxta rley zho ran zho cho grëraa zha ne run grë mine run zho.

2

Xquielwxtis Dios

¹ Ib tedsod no to gnë: “iZha ntseebtaa miech ne sca run!” iPer gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac rieguaial zha co yгаа zho guielnë ne csaab Dios, ye zho rieguaial min co. ² Ndion ne ganle Diossi zeene laa me gun guielwxtis, grëse zha ne sca zienal guielntseeb, ib tedsod zunquizh me zhow.

³ Zha ne sca rlozhd gzee zdoo pe quiayun stib zho, haxta rllisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa. ⁴ None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa me quiambëz csaan zho xquielntseeb zho, yguudz zdoo zho gban zho zigne rnabey me. ⁵ Telne tibaque squi ndip gac zdoo zho, gond zho mine rnabey me; gacnan zho ganle, quiayunloraa zho grë guielndëdox ne yгаа zho gal dze ne laa me gun guielwxtis. Ni xquielwxtissi me, zigne rieguaial gaca sca gun mew.

⁶ Gal dze co, laa me gdeed mine rieguaial yгаа tib tib miech tel zha wban zho. ⁷ Grëse zha ne güeynal beennon zho lë me, pxobnen zho xquielndzon me, güeynal d zho grë ncuaane rnitlo, lo zha co gdeed me tib guielmban ne gdziñd dze lozh. ⁸ Sañgue grë zha ne güeynal loxaque grë zhixco zho, güeynal zho grë guielntseeb, laa ne nienal zho mine nac diidzli; zha co yгаа grëse zhian ne csaab me.

⁹ Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zгаа zho tib guielndëdox; ¹⁰ sañgue grë zha ne rban zaacse, zigtaa zha Israela, zigtagaa zha stib guiedza, ible zгаа zho lo xquielndzon me, zunnon me zho. Ni led yedraa ga pe zhgab ctseb zho.

¹¹⁻¹⁵ Grëse zha ne gunctal xtol, tel chotaa nac zho zunquizh Dios zhow; sac tel me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdoo zho, guic zho, nanpaa zho pa min nac guielntseeb, pa mingaa nac guielwen. Rrieequiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho grë xtol zho; sac niicle ne runbeypaa zho xley me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

¹⁶ Zdziñ tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngeets zhlian been zho; sac sca rnabey Dios gaca, ni min co noseed naa miech.

Zha Israel ni xley Moisés

¹⁷ To ne nac to zha Israel, rzac to zienalpaa to xley Moisés, niats rac to, rzac to tose non lo Dios. ¹⁸ Nanwen to zha racladz Dios gban to, nanpaa to pa min wen sac pseed to xley me. ¹⁹ Min co masaque rzac to to cseed zha ne no lo ncow, grē zha ngoopdol. ²⁰ Masaque rzac to to rienraa zha cseed to grē zha ne peet gacd, to rienraa zha quixbiini to grē zha ne peet riend; sac rzac to ne nan to ley, tose nac zha ne ndziibraa nixbiini, tose nan mine nacpaa diidzli.

²¹ Nana, tel scataa rien to zha cseed to stib miech, ¿pe nac dzigo rwide to mine run to?

Conque to name rnee lo miech cuand zho, ni rlozh ga toque quiaban.

²² Rseed to miech rnee to, tib zha ne nole tsieel, nodne yquiagob zho stib zha ne led tsieeld zho; ni rlozh ga toque noyun min co. Rnee to, rdzigiende to grē mdio, ni rio to rieban to yadoo ne zob grē mdio co.

²³ Rlozhd gacniats to rzac to quiayunnon to lē Dios ne nan to ley, ni nande to gon, lel quiaguitnie to lē me ga, sac mbande to zigne nac ley. ²⁴ Mine noyunpaa to i ga gon raquiet lo Xtuidz Dios, zaatne rnee: "Por xtol to, grē zha zit laa zho rneenē Dios."

²⁵ Tel to, rzac to porne nacle to zha Israel non to lo Dios, per ne squi mbande to zigne nac xley me, nacaque to zigne nac grē zha zit ne runbeyda.

²⁶ Nana, zha zit ne rioxco rban zigne nac xley me, ¿niacxe rieguiald dzigo guianzuiuu zho lo Dios? Sannzuiuu me zho gon. ²⁷ Golgacnan sca ganle, glole zha zit co gon guianzuiuu lo Dios, lēdle to ne nanpaa to zha racladz Dios gban to, nanpaa to mine psan Dios diidz yгаа to, ni rbande to zigne rnabey me.

²⁸ Golgacnan sca ganle, led porne nacle to zhin zha Israel, porne bio to xbey zho, laa to nziuu lo Dios. ²⁹ Led scada gon, sinque zha ne nli dib zdoorioxco mine rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoor, dib guic, rban zigne racladz me. Grēse zha ne znu nac, nziuu zho lo Dios, niicle telne rzac to peet nond zho.

3

¹ Nana, ¿pa lugar nadien ne riaannon zha Israel lo grēraa zha stib guiedz? ¿Pa rquiin ne scataa rio zho bey? Zootle lēē lalaquew tel niaca mine niacd zho zha Israel. ² Per led scada, no pe nacle non zho. Sac gon, ible lo zho psan Dios xtiidz me mazd padzeela.

³ Nli ndal zho rond xtiidz me, per led mincod ctsēē me xtiidz me, mine bneele me lo zho. ⁴ Niicxe tel zharaa quiayunctal miech xtol zho, sangue Dios ctsēēd me xtiidz me. Zigne zhobneeque lo Xtuidz me, zaatne rnee: "Mine rnee Dios, diidzli naca; niicle zha ne gacladz, guiend pe ncuane glisqui zho lo me."

⁵ Sca nac Dios, gacxe waa rnee me grēse zha ne runctal xtol, rieguial yгаа zho guielnē ne cxeel me. Ga nagon, rlu ne mine nac diidzli, min co run me. Nana, ¿pe ziab ne nonguield mine run me ga? ⁶ Mine nonguiel ga gon run me, sac tel dzigiuen me grē zha ne runctal xtol, ¿zha naczhe guielwxtis ne dzigo gun me?

⁷ Nana, nogaa zho gnē, ¿per pe nacle glisqui Dios dol ne rdziun ne, ni tel por lēēw rlu ne diidzli nac mine run me? ⁸ Per telne sca naca, rrieequia dzigo ib none gunctal ne xtol ne parne yquiaraa zdoor me ne. Ni nzian zha ne nobee xquielto naa, rnee zho ib min co noseed naa miech. Ni zha ne sca rnee, ib tedlaad zho lo guielnēdox ne rieguial zho.

Grēse miech, ngoopdol nac zho

⁹ Nana, ¿pe zdieets ne dzigo ne nac ne zha Israel, nziuuraa ne lo grëraa miech stib guiedz? ¡Led scada gon! Niina blozh bzeet naa lo to, grëse ne ngoopdoł nac ne, zigttaa zha Israela, zigtagua zha stib guiedza. ¹⁰ Zigne zhoobneeque lo Xtiidz Dios, zaatne rnee:

¡Guiend miech ne zienal_{paa} mi_{ne} racladz Dios!

¡Ni tib zho guiend!

¹¹ Guiend zha ne niini guic;

guiend zha ne tsoxco yguib xnëz Dios.

¹² Grëse zho laa zho zie nëz ne nitlo zho;

niapse guiełntseeb zienal zho.

¡Guiend zha ne zienal_{paa} mi_{ne} racladz Dios!

¡Ni tib zho guiend!

¹³ Ro zhow,

masaque been cuent naca zig nac len grë baa ne noyodz ngutoo;

niapse diidz ne rquidie zho zhoob lo ludz zho.

Grë diidz ne rnee zho,

masaque naca zig nac xvenen grë meel dox;

¹⁴ niapse grë diidz dox, niapse grë diidznë rrieche ro zho.

¹⁵ Ni zhow,

masaque zombëzlew dien pa tsiegot zho samiech zho;

¹⁶ loxaque guiełnë, loxaque guiełzi rsañ zho zaatne rded zho.

¹⁷ Ib nañd zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guiełnëdox ne ygaa grë zha ne runbey ley ni mband zho zigne naca, lel run zho grëtaa guiełntseeb zig nac grë mi_{ne} goquiet nu. Ni niicle grëraa miech ne runbeyd ley, scaque ngoopdoł nac zho, ni ro zho guiend pe guiab zho lo Dios. ²⁰ Golgañ sca ganle, grieełod guiaanmbe ne lo Dios, niicle paraa yquia ne gun ne mi_{ne} rnee ley; sinque par guien ne ganle ne ngoopdoł nac ne, gane biaan ley.

Silaa Dios miech zeene gnalo zho me

²¹ Sañgue niina, tib ladle biaan ley, laa Dios bneedz stib mod ne guiaanwen ne lo me. Ni lo grëque guits ne ziaad ley, lo grë guits ne pquiaa zha ne biadteed Xtiidz Dios padzeela, ga raquieta. ²² Grëse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grëse ne miech ngoopdoł nac ne lo Dios, ni palal rdzieeld gdziñ ne lo xquiełndzon me. ²⁴ Per niina laa me blu ganle pa lotaa noxco me ne, gola zdoo me pxeel me Jesús bdiizh grëse xtol ne, laa ne biaanwen lo me. ²⁵ Laa me been miñ co parne glu run me guiełwxtis, sac niicle bdizhd ne xtol ne, per pxeel me tib meñ ne bzhiee xchen bdiizha xcuent ne, lëë meñ co nac Jesús; gane niina grëse zha ne gnalo meñ co, zuñ me zho perdon grëtaa doł ne pxcw me been zho. ²⁶ Ni tib doł rapd me, ni scaque grë zha ne dib zdoo gnalo Jesús, sañmbe me zho lo xtol zho.

²⁷ Sca nagon psilaa Dios ne lo doł. ¿Cho nadien gacniats ga? Ni tib choot gacd gacniats, sac led por mi_{ne} bdziuuñd new, sinque por grëtaa mi_{ne} bded Jesús. ²⁸ Gcondion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho mi_{ne} rnabey ley.

²⁹ Nana, ¿pe zha Israelse sca ycaania me? ¡Lëda gon! Grëse miech, sca ycaania me zho. ³⁰ Sac gon tibeyse ran Dios ne grëse ne; zigttaa zha Israela,

zigtagaa zha stib guiedza, sanmbe me ne lo grë xtoꝫ ne, totsaque dib zdoo ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoo ne riladz ne Jesús, rienraa ne pa rquiina.

4

Dib zdoo Abraham bnalo me Dios

¹ Zig nac pxozgoldoo ne Abraham, ¿pe been me ne laa Dios pcaania me? ² ¿Pe por guielwen ne been mew? ¡Léda! Telne scaw, nrieelo niacniats me (niicle ne nëz lo Dios ni palal rieguiald niacniats me). ³ Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtold.

⁴ Zig nac tib zha ne run dziin, dimi ne razh zho ible rieguial zhow, rate zhow ga. ⁵ Sangué Dios zdoo me ral rcaania me miech, zha ne dib zdoo rnalo me, nacda por pe guielwen ne gun zho par guiab ne laa zho rieguiala. ⁶ Ye rey David bzeet guielbley ro ne rgaa zha ne sca rcaania Dios, ⁷ rëb David:

¡Wen zie zha ne run Dios pardon!

Niicle nroob guielntseeb ne been zho;

tel pe nactaa xtoꝫ zho, glisquidraa mew.

⁸ ¡Wen zie zho sac gunquizhdraa me zho grë xtoꝫ zho!

⁹ Nana, ¿pe loxaque grë zha ne nose bey zrieelo yгаа guielbley co, te ye grë zha ne noda ye? Nacda por bey, laa ne blozh bzeet ganle niapse ne dib zdoo Abraham bnalo me Dios, min co ne pcaania Dios me zig tib zha ne peet xtold;

¹⁰ sac gon gard pe bey ne tso me zeene pcaania Dios me. ¹¹ Pcaaniale Dios me dzigoraa bio me bey. Lega laa me biose bey co, zeena glu ne laa Dios pcaaniale me porne dib zdoo me bnalo me Dios. Mincoxe waa, Abraham nac dad lo grëse zha ne nod bey, ni dib zdoo zho rnalo zho Dios; ni scagaa Dios, rcaania me zho zig tib zha ne peet xtold. ¹² Ni meque nac dad lo grë zha ne no bey ni dib zdoo zho rnalo zho Dios, zigne bnalo me Dios zeene gard tso me bey co.

Zha goc mine bnee Dios lo Abraham

¹³ Psanle Dios diidz lo Abraham ne me guiaannie guidzliu, grë me zha ne grieequiaraa lo xtii me; guiabd ne togo porne been me mine nac xley zha Israela, sinque ne dib zdoo me bnalo me Diosa. ¹⁴ Nana, tel niaca zha ne gunse mine nac ley, zha cose yгаа min co, rrieequia dzigo zhlëse ga bnalo Abraham Dios, niicle diidz ne psan Dios lo me ga, nondaquew. ¹⁵ Sac nac ley gon, zha ne gunda zigne naca, laa Dios csiabzi zho; laa zaatne guiendga ley, gacd guiab zho cho noguiitsa.

¹⁶ Ne scacxe waa nac ley, gane niina lëese mine no gun ne nac dib zdoo ne gnalo ne Dios par yгаа ne mine psanle me diidz ga. Grëse ne yгаа min co, per nacdraaw dien cho zienal ley, cho zienaldgaaw, sac mine nonraa, dib zdoo ne gnalo ne Dios zigne bnalo Abraham me. Mincoxe waa, rrieequia Abraham nac pxoz ne grëse ne, ¹⁷ zigne rëb Dios lo Abraham: “Laa na bzo luu, luu gac dad lo nzian dii miech.” ¡Lëe Dios co nagon bliladz Abraham, me rbeeban grë mengut, ni niicle haxta grë ncuaañe guiend, saa mew!

¹⁸ Ndaldox rëb Dios gac lo xtii Abraham, ni bliladz Abraham mine rëb Dios ga. Niicle ne zootle led ncuaañe gacda, per me dib zdoo me bliladz me ne zaca, ni scagaa bdzin dze ne laaw goc. ¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap mëed. ²⁰ Ib goc chopd guic me niab me bod nlid niac mine bnee Dios

ga, sinque dzigole dib zdooraa me bnalo me Dios; haxta rdeed me xquizh lo Dios, ²¹ sac nanpaa me men nroob nac Dios zun me mine psan me diidz ga. ²² Ne sca nagon dib zdoo me rnalo me Dios, gane pcaania Dios me zig tib zha ne peet xtold.

²³ Zhobnee lo Xtiidz Dios sca pcaania me Abraham, ni laaw zhobnee zeena gacandion ne ²⁴ ye ne scaania me ne zig tib zha ne peet xtold, totsaque dib zdoo ne gnalo ne Jesús, men ndzon ne rnabey ne; ²⁵ men ne gut ga bdiizh me xtold ne, men ne brieaban ga, par glu me nli psanmbe me ne nêz lo Dios.

5

Jesús rsanmbe miech lo dol

¹ Nasi laa ne nacle zig zha ne peet xtold, laa ne biaanwenle lo Dios porne dib zdoo ne rnalo ne Jesús, men ndzon ne rnabey ne. ² Sac por grêtaa mine bded Jesús, laa ne bgaa guielnzaac rii nacie me ne, ni ib csaand ne me. Tib guielbley nrooba lo ne, sac ndionpaa ne ib zgaa ne lo guielndzon ne no me.

³ Ni scaquegaa nagon none gley ne zeene pe guielnê ne nodzian ne; sac ndion ne ganle, ga cseed ne lëb ne dziits so ne lo mine riladz ne. ⁴ Ni zeene sca dziits so ne, ziladzraa ne dib zdoo ne; ni zeene dib zdoo ne riladz ne, zacaanpaa ne ib zgaa ne mine riladz ne. ⁵ Ni ndionpaa ne zgaa new, sac blu Dios rleyne me ne, pxeel me Espiritu Sant nacie ne.

⁶ Lëëtaaque zeene rdzieldraa miech zha gun zho par guiaanmbe zho lo dol, hor co laa Dios pxeel Jesús, baaad me gut me bdiizh me xtold ne nac ne miech ngoopdol.

⁷ Ndion ne ganle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquielmban guet por zha.

⁸ Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpëed me Jesús, men co bleeladz xquielmban gut me xcuent ne.

⁹⁻¹⁰ Gotsaa gwi ne ganle, zha nactaa guielnê ne bded Jesús psanmbe me ne lo xtold ne, psanwen me ne lo Dios; ni scaque nagon, ible me csilaa ne lo grêtaa guielnêdox ne csiaab Dios ygaa grê miech ntseeb. Ne nligaa, csaand me dzian ne guielnê co; sac gon, tel scataa mine been me por ne zeene nac ne tib miech ngoopdol, zeene scataa ntseeb goc ne blëënie ne Dios, ÷pe leļ na dzigo ne laa ne biaanwenle lo Dios, laa ne biaanle zig tib zha ne peet xtold? ¹¹ Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacne biaan dol

¹² Znu gon nacne laa dol biaan: por mine been Adán bind me xtiidz Dios, min co nac ne biaan. Ni por lëw pquiaqui laa guielgut biaanque, blozh ga grêse miech laa zho ret, sac grêse zho, tsod zha ne gunctald xtold. ¹³ Desde hor co biaan runctal miech xtold zho. Grêse miech ne bre lo guidzliu, desde Adán haxta len dze ne laa Moisés pcaania ley, beenctal zho xtold zho, niicle ne guieldpaa tib ley hor co nlu ne dola. ¹⁴ Gacxe waa ye zho, grêse zho gut; niicle ne bdiitsd zho merpaa xtiidz Dios zigne been Adán.

¹⁵ Nli tib guielnê ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grêse ne ne nac ne miech laa ne no guet; per niina ne baaad stib men ne beend ni tib falt, por min co laa Dios rquia zdoo ne grêse ne, laa me rneedz tib guielmban ndzon lo ne; lëë men co nac Jesús. ¹⁶ Tibaque nac dol co been Adán, per grêse miech biabzi; sangue Jesús zeene laa me baaad, grêse ne ne nac ne miech psilaa me ne lo grêtaa xtold ne, psanwen me ne lo Dios. ¹⁷ Dol ne beense Adán ga, min co pquiaqui grêse ne

ne nac ne miech, laa ne biaan ladznia guielgut; sangue niina ne biaad Jesús, zrieelo yгаа ne tib guielmban ndzon. Guielmban ne ral zdoo Dios gdeed me lo grëse zha ne gbig lo me gun me zho perdon. ¹⁸ Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús biaad, pquia zdoo me ne masaque me bdiizh grëse caxtigw ne riogual ne ga, laa me psanwen ne lo Dios parne grieelo yгаа ne tib guielmban ndzon. ¹⁹ Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

²⁰ Ible laa ley biaan, par glu ganle pa lotaa nac grë falt ne noyun miech lo Dios. Per niicle scataa nac grë dol co, per blu Dios ganle mazdraa rquia zdoo me miech. ²¹ Masaque bnabey dol miech, pxeela zho nëz ne nitlo zho; sangue zeene laa Jesús biaad, psanwen me ne lo Dios, gane niina zha ne gnalotaa Jesús zгаа zho tib guielmban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ¿pe zdieets ne dziuunctalraa ne xtol ne zeena tsoxcoraa me ne? ² ¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nëz lo dol.

³ Golgan ganle, zeene laa ne bziaab xnëz Jesús ni brobnis ne, rrieequia gut ne ga zigne gut me. ⁴ Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

⁵ Ni zigne sca rrieequia gut ne zeene gut Jesús, scaquegaa ndionpaa ne zbeeban me ne zigne brieegan me. ⁶ Ndion ne ganle, miech ne goc ne glo zeene scataa bional ne guielntseeb, rrieequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol; ⁷ sac gon, deque bnitlo grë mine goc ne glo, grieelodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieegan Jesús, ni gdzindraa dze guet me. Grieelodraa pe gun guielgut me.

¹⁰ Tibaque vuelte gut me bdiizh me xtol grëse miech, sangue niina mban me ni Dios mbannie me. ¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp ben to i, tso to gun to grë ncuaañe ndzinlid ne racladz xcuerp to. ¹³ Ib gdeete to diidz guiab to lo dol stib, gun to grë guielntseeb; sinque golsan to ladznia Dios, ine golgun grë mine racladz me. Golguien ganle, laa to gutle lo grë dol, Diosle mbannie to niina; ¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne. ¹⁵ Per nana, ¿pe ne rnabeydraa ley ne, pe ne nquialadz Dios ne dzieets ne dziuun ne grëtaa ncuaañe gunctal xtol ne? ¡Lëda ga gon! ¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtol. ¹⁷ Nli glo lo dol ngadoo to, per xquizh Dios zeene laa zho biadseed to Xtiidz me

gocnan to zha laa to lo dol, laa to bliladza ni noxco to mban tow niina. ¹⁸ Ni zeene laa to brieeladznia dol, laa to bgab lo Dios; zeena mine rnabeyle me mincole gun to. ¹⁹ Znu bzet naa gre min rii lo to, zeena guien to zha naca.

Nana sca, zigne scataa bio to ladznia dol been to grëtaa guielyozh, grëtaa guielntseeb, scagaa niina golsan to ladznia Dios, golban zigne rnabey me, zeena lozh guiaanmbe to zigne racladz me. ²⁰ Zeene scataa ngadoo to lo dol, ib wbande to zigne rnabey me.

²¹ ¿Pe nadien needz dol lo to? Lëe gdib mine ngaa to laa to nitlo. Zig nac niina, haxta rtoladz to zeene rsoladz to gre ncuuaane been to hor co. ²² Sangue niina, ne laa to brieeladznia dol laa to ngab lo Dios, ible ziaanmbe to zigne racladz me ni zгаа to tib guielmban ne gdzind dze lozh.

²³ Sac gon, zha ne runctal xtol, lëe gdib mine tsieguial zho laa zho nitlo; sangue zha ne gbig lo Jesús, mine ral zdoo Dios ygad me lo zho nac tib guielmban ne gdzindraa dze lozh.

7

¹ Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

² Zig nac tib mgui ne rtsieelnia, rnabey ley ne mguise gbannie wnaa ne nac tsieel mgui. Per tel gzoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho tsieelnia zho stib mgui, zaca. ³ Nli nonguielda ga gun wnaa ctsieelnia zho stib mgui laga bii zomban tsieel zho; laa zeene gutle tsieel zho, led doldraaw yguib zho stib zha ne ctsieelnia zho.

⁴ Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lëegaaw grieelod gnabeya to. Jesús, men ne brieeban ga, mele nac tsieel cub to niina. Niinasi, zrieelole gban to zigne racladz Dios; ⁵ sac glo (zeene scataa bdziuuñctal ne xtol ne, bdziuuñ ne grëtaa ncuuaane nonguieldraa niicle ne ndionpaa ne pe nac mine zhubnee lo ley no dziuun ne), niapse gre ncuuaane nxeel ne zaatne nitlo ne, ncuuaan co bdziuuñ ne. ⁶ Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espiritu Sant.

Rca dol gac mine rnabey ley

⁷ Nana, ¿pe zdzieets ne dzigo por leypaa rdziuuñctal ne xtol ne? ¿Coo, led scada! Tel naa gon, ib niacnand naa pe nac dol telne guien ley. Niacnand naa ne dol ga gzoobladz ne chen ben, telne niacnand naa ne rnee lo ley: “Gzoobladz luu chen ben.” ⁸ Zeene gocnan naa zha nac ley, dzigoraa bien naa niapse dol nac mine noyun naa; sac zeene guien ley, rlud pe nac dol.

⁹ Glo zeene riend naa zhapaa nac ley, tibaque rzaac naa ib peet dol rapd naa; per zeene gocnan naa zha nac ley, bien naa ne ib raguial naa nitlo naa, sac dol quiayun naa. ¹⁰ Nli laa ley biaan zeena guien ne zha grielo yгаа ne guielmban, per lel bluw ne raguial naa nitlo naa sac ngoopdol nac naa. ¹¹ Ne nligaa bdziitnie dol naa, mine rsopaa ley diidz nod gun miech mincopaa ben naa; ni blozh ga, lëeque ley blu ne ib raguial naa nitlo naa. ¹² Niicle ne scaw, per Dios psana ni rquiin gre mine zhubnee low.

¹³ Nana dzieets ne: conque telne wen nac ley, ¿zha nac dzigo ne lëepaaw rlu ne rioguial ne guet ne? ¿Coo, led scada! Sinque znu naca: dol pteedquie ne ladznia guielgut. Ga rlu ganle zha nactaa dol, sac gon lëeque ley pquiin dol pteedquie ne lo guielgut. Ga blu ley ganle zha ntseebtaa nac dol. ¹⁴ Gotsaa gwi ne ganle wen ley, led leyd rxin sinque ne rxin; sacne rrieequia ngadoo xcuerp ne lo dol.

¹⁵ Teḷ naa, rienḷ naa pe nacne znu rac naa, niicle ne racladzpaa naa gun naa ncuaaḅe nonguiel per nēda, leḷ ncuaaḅe rzoobladzd naa miḅ co ruḅ naa.

¹⁶ Grē ncuaaḅe ruḅ naa, now rienḷpaa naa nonguielda; haxta guic naa, zdoō naa, rienḷ naa wen ley sinque naa quiaguits miḅe rnabeya. ¹⁷ Nana, niicle ne rienḷ naa scaw per gacd pe gun naa, sac ngadoo xcuerp naa lo doḷ, masaque doḷ rcheep naa ruḅ naa ncuaaḅe ndzinlid. ¹⁸ Rienḷ naa miech ngoopdoḷ nac naa, ni palal ncuaaḅe ndzinli gacd gun naa; niicle ne racladz naa gac-wen naa, per rrieeḷoda. ¹⁹ Zeene racladz naa gun naa ncuaaḅe rquiin, per rrieeḷod gun naaw; laa zeene ni naa guḅdraa naa ncuaaḅe ndzinlid, leḷ miḅcole ruḅ naa. ²⁰ Ni ne znu leḷ grē ncuaaḅe racladz naa, miḅ co ruḅ naa, gase rlu ne led naadse quiayuḅ grē ncuaaḅ co; sinque doḷ quianabey xcuerp naa ruḅ naaw. ²¹ Rienḷ naa niicle ne racladzpaa naa gun naa ncuaaḅe wen, per leḷ guielntseeb ruḅ naa. ²² Zdoō naa, guic naa, rleynie naa Xley Dios, racladz naa gban naa zigne rnabey me; ²³ per dzigo rtse doḷ lo naa, rrieeḷod gun naa ncuaaḅe nonguiel. Masaanee doḷ rnabey xcuerp naa, racladzda gun naa ncuaaḅe rnabey Dios; sac ngadoo xcuerp naa lo doḷ.

²⁴ ḷProbsaxe naa, znutaa nac xcuerp ngoopdoḷ naa nu! ¿Cho samiech ne dien grieeḷo csilaa naa low; sac ncuaaḅe gnitlo naa miḅ co mazdraa rdziladza?

²⁵ ḷXquizh Dios pxeel me Jesús biaadsilaa me ne lo doḷ!

ḷJesús nac meḅ ne psilaa naa!

(Znu nagonḅ rzac naa: rienḷ naa nonguiel gun naa miḅe nac Xley Dios, per xcuerp naa leḷ laaw zianel miḅe rnabey doḷ.)

8

None gban miech zigne racladz Espiritu Sant

¹ Laa ne gocndion nasca ganle, zha ne ngab lo Jesús ndziibdoḷdraa zho, ² sac zha ne ngab xnēz me, laa Espiritu Sant psilaale zho lo doḷ, laa me psilaale zho ladznia guielgut, laa me bdeedle tib guielmban cub lo zho.

³ Wlaltaa ib brieelod ley nsilaaw ne lo doḷ, gane mazd laa Dios pxeel Xpēed me biaadsilaa ne. Brieelod ley, sac grēse miech laa ne tsianel zho miḅe rnabey ley, mazdraa zianel zho ncuaaḅe runctal xtoḷ zho. Gane zeene pxeel Dios Xpēed me, goc me miech (lēēraasi ni tib doḷ beeḅ me), meḅ co gut bdiizh grēse xtoḷ ne, dzigo ga laa me psilaa ne ladznia doḷ.

⁴ Gacxe waa, niinasi zrieelo dziuḅḅ ne grē miḅe rnabey ley, per none gdeed ne diidz guional ne miḅe rnabey Espiritu Sant, ni lalnu gdeete ne diidz gac miḅe racladz xcuerp ne nu.

⁵ Grēse zha ne mban zigne racladz xcuerp ngoopdoḷ zho, loxaque grē miḅ co rioxco zho; laa zha ne mban zigne racladz Espiritu Sant, miḅe rnabey Espiritu Sant rioxco zho.

⁶ Zha ne sca rioxco loxaque miḅe racladz xcuerp ngoopdoḷ zho, nēz ne nitlo zho ga zie zho; sanḅue zha ne rioxco miḅe racladz Espiritu Sant, laa zho zie nēz ne yгаа zho tib guielmban; peet dzeb, peet zhgab ctsebdraa zho. ⁷ Ni stiba, zha ne rioxco loxaque miḅe racladz xcuerp ngoopdoḷ zho, rlēēnie zho Dios ga, sac nēd zho gban zho zigne rnabey xley me; ni niicle gacladzгаа zho, grieeḷod zho. ⁸ Miḅcocxe waa, ib rzacd zdoō Dios grē ncuaaḅe ruḅ zho.

⁹ Sanḅue to, mbandraa to zigne racladz xcuerp to, sinque laa to mban zigne racladz Espiritu Sant. Sca mban to, sac Espiritu Sant nacnie to. Nanle to ganle zha ne nacnieḅ Espiritu Sant, nliḅ xnēz Jesús no zho. ¹⁰ Ni to ne nac to zha ne nole xnēz Jesús, ible zгаа to tib guielmban ndzon, sac laa Dios psilaale to lo doḷ. Nli zig nac xcuerp to, ncuaaḅe nitlo naca, sac por doḷ biaan sca no gaca;

sangue zhiEspirituw, nitloda. ¹¹ Dios bleeban Jesús, ni scagaa telne nli nacie to zhiEspiritu me, meque cueeban to.

¹² Bets, bzian, nodne dziuun ne ncuaañe racladz xcuerp ngoopdoł ne, zig nac zeene pe nzëeb ne low. ¹³ Sac telne grë ncuaañ co tsienal to, ible znitlo to; sangue telne gnab to gacniën Espiritu Sant to csaan tow, dzigo ible zгаа to tib guielmban. ¹⁴ Sac grëse zha ne zienal zigne racladz zhiEspiritu Dios, ga rlu ne nlipaa xpëed Dios nac zho.

¹⁵ Golguien ganle, laa Dios bneedz zhiEspiritu me lo to, sac xpëedle me nac to niina. Tsode to sca gdziebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibladz gnee ne lo me guiab ne: "¡Papá yeen!" ¹⁶ Ni Espiritu coque runquiën ne ne nli xpëed me nac ne.

¹⁷ Nana ne laa ne nacle xpëed Dios, scagaa dzigo ye ne ible zгаа ne grëtaa ncuaañe bdeed me lo Jesús.

Nli zгаа ne lo grë guielndzon ne no Jesús ga, per scagaa none dzian ne grë guielnë niina ne laa ne ngab lo me.

Guiełndzon ne naraa guiaad

¹⁸ Guiełnë ne dzian ne lo guidzliu rii, loxaque ne ngab ne lo Jesús, led ncuaañe rnad ga; mazdraa nroobdoo nac lo guiełndzon ne naraa dzian ne.

¹⁹ Zig nac grëtaa ncuaañe bzaa Dios, masaque quiambëznëw gdziñ dze zeene laa grë zha ne nac xpëed Dios yгаа lo guiełndzon co; ²⁰⁻²¹ sac gon, gal dze co laa guidzliu guiaanmbe lo grëtaa ncuaañ paat rquiind, lo grëtaa guiełntseeb ne no low niina. Dios bdeed diidz biaan grë ncuaañ co low, per zeene gal dze co, zeene laa grë zha ne nac xpëed Dios laa lo grëtaa guiełntseeb, yew laaw laa.

²² Laga quiambëz grë ncuaañ co gdziñ dze co, masaque mban raca, rzaca zig rzac tib meñ wnaa ne quiayal xpëed. ²³ Ni ndion ne ganle, haxta ne, ne nac ne zha ne nacie Espiritu Sant (zeena glu ne ible zгаа ne grëtaa ncuaañe gneedz me), mban rac ne quiambiaaz ne gdziñ dze co, zeene laa Dios ctsëe xcuerp rii ne ni ycaania me ne zig xpëedpaa me.

²⁴ Ndion ne ible zbee Dios ne lo grëtaa ncuaañe rac lo guidzliu rii, per nana laa ne quiambiaaz dzianpaa ne gaca. Tib ncuaañe lëe ranle ne noyac, nod pe nacie yquiambëzraa new, ²⁵ per zeene quiambëz ne tib ncuaañe naraa gac, dzigo nodne guieed ne, sinque ine tiblucue gac ne yquiambëz new.

²⁶ Ni scagaa zeene lëbdraa ne, riendraa ne zha guñ ne, Espiritu Sant nac meñ ne gacniën ne. Zig nac zeene gzodiidznie ne Dios, tel nesew nand ne zhapaa nonguiel gnee ne lo Dios, dzigo Espiritu Sant runcnee ne grë diidz ne riend ne zha nac. ²⁷ Ni Dios ne nac me meñ ne nanpaa pe rza zdoo miech, rien me pe rnee Espiritu Sant, sac miñe racladz Dios gac miñ co rnab me.

Tsod ncuaañe yquiaaqui csaanladz Jesús ne

²⁸ Ndion ne ganle, zha ne nli dib zdoo rleynie Dios, zha ne rioxco gac grë miñe racladz me, grëse ncuaañe rded zho, led lega rdete zhow, sinque no zaatne rquina lo zho. ²⁹ Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac meñ nroob. ³⁰ Ni grë zha co, laa me quiabedz zho, quiasilaa me zho lo doł, laa zho noyaanwen lo me; zeena yгаа zho lo guiełndzon ne no me.

³¹ ¡Zha nactaa ncuaañe lëe run Dios! Nana, tel scataa racnie Dios ne, ¿cho nadien grielo lega pe guñ ne? ³² Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, ¿pe lel grë pe stib cos dzigo yquia zdoo me gneedz me lo ne?

³³ Ible Dios bzooblo ne, gacxe waa, ¡choot rieguiald glisqui gnë lëda nodziun ne! Sac gon, Dioszhal psanmbe ne lo dol. ³⁴ ¡choot rieguiald ycaadzol ne! Sac gon laa Jesús gutle bdiizh me xtol ne; per brieeban me, ni na laa me zob cue Dios zaatne rieguial me nac me men non. Ga no me quianab me lo Dios por ne. ³⁵ ¡Tibaque rleynie Jesús ne! Zeene nodzian ne guielnë, zeene mban rac ne, zeene rtsidil miech ne, ib guiabd ne togo bod rleynie me ne. Niicle zeene guieñdga pe gow ne, guieñd pe gacwxab ne, o noxtseebgaa ne guet ne, ib guiabd ne togo psanladz me ne. ¡Tibaque rleynie me ne! ³⁶ Ni zig nac xcuent guielgut, laaw raquietaque lo Xtiidz Dios, zaatne rnee:

Grëse no ne nac no zha ne ngab lo luu,
tibaque noxtseeb no lo guielgut;

masaque rzac miech no zig rzac zho grë mëcwxiil ne golle guet.

³⁷ Niicxe peraa waa dieed ne, zdziun ne gan low ni palal csanwinda ne, sac Jesús nacie ne; ni rleyniedox Jesús ne.

³⁸ Nanween naa tsod ncuane yquiaaqui csanladz Dios ne:

per ni guielgut,

per ni guielmban,

per ni anjl,

per ni mendox,

per ni grë ncuane noyac niina, grëgaa ncuane naraa gaca.

³⁹ Niicle grë ncuane no glaa zhan gbaaw,
niicle grë ncuane no guietraa zhan guidzliuw,
niicle grëragaa ncuane bzaa Diosa.

¡Ni tiba ycada, sac tibaque rleynie Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grëse xtol ne.

9

Ible Dios bzooblo zha Israel

¹⁻³ Bets, bzian, ¡blactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbig zho lo Dios.

⁴ Blactaa quiayacnien Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grë zho me zha mod gunlay me zho. Psan me ley lo zho zeena guien zho zha gban zho, ni psan me diidz lo zho zha gleynie zho me. Nzian grë ncuane bnee me gdeed me lo zho. ⁵ Lëë pxozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig menlidz Jesús. Me nac Dios, me rnabey grëtaa ncuane no, ni me rieguial gacnong zataa dze. Ible sca rieguiala.

⁶ Nana, no zho guiab gocdaque grë mine bnee Dios ga ygaa zha Israel. Per led scada. Sinque lëë min co rgaa zha ne nlipaa rnalo Dios, sac zha co nac zha ne nlipaa nac zha Israel. ⁷ Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëed pquianie Abraham, per rëb Dios loxaque Isaac gac cuent zig xpëed Abraham. ⁸ Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblome zigne bzooblo me Isaac, zha co ngab lo me. ⁹ Sac zig nac Isaac, ible Dios bnee lo Abraham grop Sar, ne laa Isaac gac mëed lo zho.

10-11 Ni scasaque xpëed Isaac. Bdziñ dze, zeene laa Isaac ptsieelnia wnaa ne lë Rebec, dzigo gop Rebec tibnëz mëëdbgui. 12 Bii zoney Rebec grop mëdyeen co, laa Dios bzooblolë win ne brieelë Jacob rëb me, ne ible Jacob gac zha non lo Esaú, win ne glo gal. 13-15 Laaw zhobneeque lo Xtii dz Dios, zaatne znu rëb me: "Ible Jacob bzooblo naa beenlay naa, bzoblod naa Esaú." Gard gal grop mëëd co, per ni gard ganacn win zha nac guieltseeb, zha nacga guielwen, laa me bzooblolë tib win. Ga nagon, blu Dios ne mese nac men ne rieguial rzooblo tel cho zha ne ygab lo me, nacda por pe ncuane noyun zho.

Nana, çpe zdzieets ne guielntseeb ga sca run Dios? ¡Led guielntseebda! Tib vuelt rëb me lo Moisés: "Zha ne gacladz me nacda yquia zdoo naa, squia zdoo naa zho." 16 Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rgaaw, porne me rquia zdoo zho. 17 Gotsaa gwi ne ganle zha beenndip me zdoo rey Egipt. Lo Xtii dz me zhobnee zeene rëb me lo rey co: "Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios."

18 Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho. 19 Nana, no zho gnë: "Telne scaw, çpe nac dzigo rlisqui Dios mine run miech, tel mezhah r nabey zha nac zho tib tib zho?" 20 Per nana, çcho nac ne par glisqui ne mine run Dios? Zig nac tib guies ben, niacxe zlisquiw lo men ne bzaaw, guiaba: "çPe nacne znu bzaa luu naa?" 21 Led zha ne run dziin co, zrieelo gzaa zho tib guies zigne gacladztaa zho; tib lë ben ne xen zho, zac gzaa zhow tib guies niow, o gzaagaa zhow tib guies beelze.

22 Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quaiyap zho paciens nieeda gdziñ dze co. 23-24 Grëgaa zha ne bzooblo me yгаа lo guielndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne. 25 Gol soladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleyniend me zho glo. 26 Laa stib lugar bzeet Osé, zha bnee Dios lo zho, rëb me: "Ngabde to lo naa, per dzziñ dze ne laa to gac xpëed naa, ne nac naa Dios nguamban."

27 Laa Isá stib men ne biadteed xtiidz Dios padzeela, zeene bzeet me zha Israel rëb me: "Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; 28 sac ziaadyoble gun Dios xquielwxtis me lo guidzliu, zigne bneele me." 29 Min co ga bzeet Isá mazd glo, rëb me: "Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr."

Zha ne nacd zha Israel laa zho wbig lo Dios

30 Nana guiab ne: çZha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wлтаа ib bioxcod zho dien zha nsilaa me zho lo dol. 31 Laa zha Israel, niicle ne rioxcod zho run zho grë mine r nabey ley parne csilaa me zho, per ib laad zho lo dol sca. 32 Laad zho, sac zienied guic zho gnalo zho Dios, rzac zho por grë ncuane gunse zho laa zho laa lo dol. Min cocxe waa, zeene laa Jesús biaad, bzhaac zho me zig tib quie ne rriel ni ne riab ne liu. 33 Lëë min co ga zhobnee lo Xtii dz Dios, zaatne rnee:

Sxel naa tib men lo zha Israel,
me gac zig tib quie ne griel ni zho;
sanguë zha ne dib zdoo gnalo me,

tsod dze ne tso zho guieḽnē, guiab zho pe nacne bnalo zho me.

10

¹ Bets, bzian, ne nḽipaa rzaac naa tebaa zha laa grēse zha Israel lo dol, tibuque rnab naa lo Dios guieḽ zho gbig zho lo me, zeena laa zho lo grē xtoḽ zho.

² Parga nḽi raḽ naa noxco zho gbig zho lo me; per rund zho miḽe no guḽ zho. ³ Ib riend zho zdoo Dios ral rsilaa me miech lo dol, laa zho rzac por miḽe guḽ zho laa me csilaa zho. Ib nēd zho guḽ zho miḽe racladz Dios. ⁴ Sac goḽ, laa Dios racladz Jesús gnalo zho zeena guiaaḽmbe zho lo grēse xtoḽ zho; sac Jesúse nac meḽ ne brieelo been grēse miḽe rnabey ley.

⁵ Bzeet Moisés rēb me, zha ne gnalo ley ne lēew csilaa zho, none guḽ zho grēse miḽe rnabeya; ⁶ saḽgue zha ne gnalo Jesús ne me csilaa zho, nacda dien peraa guḽ zho. Nacda ncuaaḽe tso zho guiab zho, tebaa zha tsie zho lo me gbaa, gnab zho csilaa me zho (ncuaaḽe gacda ga, dzigo rriequia racladz zho guieḽ me ga stib); ⁷ o guiaabgaa zho tsie zho zaatne noliu grē ngutoo, tsienab zho lo me csilaa me zho (ncuaaḽe gacdaque ga, ni stiba led gad no me, laa me brieebanle). ⁸ Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambēz me csilaa me zho. Miḽ co nac miḽe noseed no miech, rnee no lo zho: ⁹ Zha ne cuero guiab zho Jesús nac meḽ ne rnabey lo xquieḽmban zho, ni dib zdoo zho gliladz zho nḽi bleeban Dios me, dzigo silaa me zho lo grē xtoḽ zho. ¹⁰ Sac none dib zdoo ne gliladz ne, dzigo saḽmbe Dios ne lo dol; ni none cuero ne pe nac miḽe rḽiladz ne, dzigo scaania me ne. ¹¹ Rnee lo Xtiidz me: “Zha ne dib zdoo gliladz Jesús, qúitnied me zho.”

¹² Grēse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grēse zho, ni grētaa ncuaaḽe rap me, zdeed mew lo zha ne gnaba lo me. ¹³ Rnee lo Xtiidz me: “Grēse zha ne gnab lo Dios csilaa me zho lo dol, ible silaa me zho.”

¹⁴⁻¹⁵ Nana, no zho gnē: ¿Per zha gnab zho lo me, ni ruḽbeyd zho me? Nḽi guḽbeyd zho me, teḽ niaca miḽe gard cho cxeḽ zha ne tsienee Xtiidz me lo zho, parne gon zho cho nac me. Ni miḽ co rzeet Isá, zeene rēb me: “¿Zha wentaa ziaad zha ne ziaadnie Xtiidz Ndzon Dios!”

¹⁶ Rgaaz Xtiidz Dios, per led grēd zho rzoobdiaga, zig rbiireque Isá, rnee me: “Dios, bui gaḽle choot nēd gliladz Xtiidz luu, miḽe rne naa.” ¹⁷ Sac goḽ, parne dib zdoo ne gnalo ne Dios, ib none yquiaadiag ne Xtiidz me gaḽle cho nac Jesús.

¹⁸ Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiayacnaḽ Xtiidz me. ¹⁹ No hor rne naa: ¿Pe ib riend zha Israel, teḽne gbigd zho lo me csilaa me zho, laa me csilaa miech stib guiedz? ¿Per rienle zhow! Sac bzeetle Moisésa padzeela, zeene rēb Dios laa me ycaania miech stib guiedz, zha ne ib peet riend; zeena tednē zdoo zha Israel, togo ziaa zho biini. ²⁰ Miḽcoque ga pquiaa Isá, zeene rēb Dios:

Grē miech ne ni zienied guic yguib zho naa, laa zho beenbey naa.

²¹ Laa zha Israel, blactaa bzēēb nia naa lo zho ni naa niacnie naa zho, per pa nion zho xtidz naa, leḽ gocntseeb zho lo naa.

11

Zha Israel ne wbig lo Dios

¹ Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtií Benjamín, zha xtií Abraham nac naa; ² dzigo led psaanladzd Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios ³ grëtaa ncuane noyūn zha Israel, ptsil zho zaatne riegān grë miech me, beet zho grë zha ne pxeel me noteed xtiidz me, ni laa zho quianałaque gut zho Lí. Rzac Lí guien draa zha ne ron xtiidz me, ⁴ dzigo hor co rëb me lo Lí: “Led tibd luu riaan, no zgadz mil zha ne gard yquitsgzhib lo Baal, naa bzooblo zho ygab zho lo naa.”

⁵ Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me. ⁶ Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nliid dzigo ne rquia zdoo me zho.

⁷ Znu nagon naca: Zha Israel ne bzooblome me, zha cose guiaanwen lo me. Laa los demas zho, lel lozh gacndip zdoo zho, ⁸ zigne zhubneeqe lo Xtiidz me, zaatne rnee: “Beendip Dios zdoo zho, rienđ zho zha gbig zho lo me; niicle ne zob lo zho, per rac zho zig rac zha ne rand; niicle zob diag zho, per rac zho zig rac zha ne peet rond. Ni scataque nac zho haxta lo nadze.”

⁹ Miñcoque bzeet rey David, zeene rëb me:

Lëëque grë zhilni zho, lëëque grë ncuane row zho, gac zig len doo ne, len guix ne tsietsobe zho;

zeena yгаа zho guielnë ne rieguial zho.

¹⁰ Guiaan zho zig tib zha ne rold lo,

guiaan zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdoo, guiabde to togo laa zho bnitlome ga. jLëda! Sinque laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednëgaa zdoo zho gan zho laa me rcaania zha stib guiedz. ¹² Nana, telne scataa guielnzaac ne bgaa miech stib guiedz ne znu racndip zdoo zha Israel, zpe lelque dzigo zeene laa zho gbiire guiaanwen lo Dios stib? jZha nac zhe grëraa guielnzaac ne yгаа miech!

¹³ To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdoo naa rioxco naa run naaw, ¹⁴ zeena togo soobladz palal zha ladz naa ye zho squi gbig lo Dios csilaa me zho lo xtol zho. ¹⁵ jQue talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, jtib guielbley nrooba zeene laa me ycaania zha Israel stib! Sac gon, rriequia grieegan zho ga.

¹⁶ Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low miñe naaza len liu, ndaanaque zhicwa. Scaque nagon, zeene bzooblo Dios xmengol zha Israel, ye zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa. ¹⁷ Bdziñ dze brug palal zhicwa, dzigo ga bguiid zhicw yag oliv dan; lëë yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guielnzaac co. ¹⁸ Lëëraasi, guiabde to togo nonraa to lo zha ne nac zhicwa miñe brug ga. Golguen ganle, por lo yag ndaan zhicwa.

¹⁹ Nana, nend guiab to: “Per rioguiäl now, gacxe waa no biaan xlugar zhicwa, miñe brug ga.”

²⁰ ¡Golgap ciudad gon! Nli lëë biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to. ²¹ Golgan ganle, niicxe zha name zhicwpaay yag co nac zho ni ptiche me zho, ¡pelel to dzigo!

²² Golwi ganle zha wentaa Dios, per scagaa rdziladzd me gats xtiidz me. Mincoxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios! ²⁴ Niicxe to na, nac to zig yag oliv dan, pquia zdoo me to pquiid me to zhicw yag oliv wen co, ¡pelel zha Israel dzigo yquiad zdoo me, gbiire yquiid me zho lo yag ne nacpaa zho!

Scaania Dios zha Israel ne bzozit lo me ga

²⁵ Bets, bzian, laa naa gni lo to ganle zha nac mine no guic Dios gon me. Niicle ne riend miecha niina, per racladz naa gacnañ tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me niina, per zeene laa grë miech stib guiedz blozh wbig lo me, ²⁶ hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Sión, ga griee men ne cuee zha Israel lo xquie!ntseeb zho.

²⁷ Dzigo laa Dios csilaa zho lo grëtaa xtol zho, zigne psanle me diidz lo zho.

²⁸ Len dze rii riëë zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleynie me zho, sac scale rëb me lo grë pxozgol zho. ²⁹ Me bzooblo zho, dzigo ible scaania me zho; sac gon, led yed me ctsëë xtiidz. ³⁰⁻³¹ Glo to nac zha ne ib bind xtiidz Dios, laa niinagaa na zha Israel nëd gon xtiidz me. Per zigne rquia zdoo me to niina, scaquegaa dzdin dze ne yquia zdoo me zho. ³² Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieeo glu me ganle ne lalga rquia zdoo me ne.

³³ ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¿Cho grieeo guien pe nac mine no guic me gon me, pe nacgaa gon mew? ³⁴ Zigne zhubneeque lo Xtiidz me, zaatne rnee: “¡Choot nand pe no guic Dios gon me! ¡Choot grieeod guiab lo me, znu znu bene! ³⁵ Wlaltaa choot gard pe gdeed lo Dios, par guiab ne laa Dios zëëb.” ³⁶ ¡Peet gon nzëëbd Dios lo miech! Sac grëtaa ncuaañe no, me psana, me naaza, ni me rnabeya.

¡Mese nac men ndzon, tibaque gotsaa dziuunnon ne me! Sca rieguiala.

12

Golban zigne rdziladz Dios

¹ Bets, bzian, laa to gocnanle ganle pa lotaa nquialadz Dios to. Nana sca, dib naccse to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienaldraa to grë ncuaañe ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdoo Dios noyuu naa dziin rii, nligaa laa naa rso diidz lo to, ndzinli golgac, ib glude to ncuaañe ni nacdë to, sinque golguien cho nac to, zha rnalo to Dios. ⁴⁻⁵ Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne

ngab lo Jesús, nzian nac ne, per tib tib ne nose zaatne rquuin ne, tsod zha ne yquuind. Grèse ne none gnalolsa ne grè zha ne nacgrè ne.

⁶ Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa,

zha ne pso me cteed ttiidz me, none gnee zhow zigne csiaab mew guic zho;

⁷ zha ne pso me guñ ncuuañe yquuin lo grèraa miech, none guñ zhow.

Zha ne pso me cseed miech, none min co guñ zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

⁹ Dib zdoo to golleynie samiech to. Gandzede to grè ncuuañe ntseeb, niapse ncuuañe rquuin gołtsienal. ¹⁰ Ine niowse golleynie grè zha ne nacgrè to, cacnguizhde to, qutniede to zho.

¹¹ Nguieel golgac, gacmbechde to, dib zdoo to gołtsoxco golgun mine nac xtsiin Dios.

¹² Nley golgac lo guielmban rii, gołsoladz ganle zha nactaa grè ncuuañe no gneedz Dios lo to; gołxecw lo grè guielnè ne gan to; tibaque gołzodiidznie Dios.

¹³ Gołtsoxco xliaadz grè zha ne nacgrè to ngab to lo Dios; zaacse gołcuèzlo zha ne ziaadted lidz to.

¹⁴ Grè zha ne rtsidil to, laa ne gdzibdee to zho, gołnab gunlay Dios zho.

¹⁵ Zha ne no guielbley, golgacnie zho lo xquielbley zho; zha ne nogaa guielnè, golgacnie zho lo xquielnè zho.

¹⁶ Gacniatsde to. Grè zha ne rzac miech peet nond, gołtsieelsa zho; guiabde to to nac zha ne racraa. Niowse gołbannie zha ne nacgrè to.

¹⁷ Zha ne csacsi to, gunde to ne yeque to csacsi zho. Gołtsoxco wen golgac lo grèse miech. ¹⁸ Tilniede to samiech to, gołtsoxco tibaque wen gołbannie zho. ¹⁹ Golguien, zha ne csacsi to, ib guiabde to ne tozhal ctsire guielnè co,

sinque gołsana ladznia Dios, metaa nan zha guñ me xquielwxtis me; zigne ziaad lo Xtiidz me zeene rèb me: "Naa raguiel guñ guielwxtis, naa gunquizh miech tel pe nac dol ne zèèb zho. ²⁰ Gacxe waa, zha ne rlèè lo luu, zeene gan luu mban rac zho rcaabedz zho, mazd bdeed ncuuañe gow zho; gangaa luu mban rac zho rnab zhis zho, bdeed ncuuañe guie zho. Sac zeene sca guñ luu, stoladz zho csoladz zho mine been zho luu; rrieequia gui ga cuib guic zho."

²¹ Golguien sca, niapse guielwen gołtsienal, zeena sca ycuèèz to lo guielntseeb. Gdeete to diidz ne ye to guñ guielntseeb.

13

Golgon mine rnabey wxtis

¹ Grèse to none gon to ttiidz zha ne nacpaa wxtis. Sac grèse zha ne nac wxtis, ible Dios rdeed diidz ne laa zho rac dziin co. ² Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lèèque zha rguib ted zho caxtigw ga. ³ Golgan ganle, ible laa wxtis zo, par zha cobey caxtigw ne tsieguiel zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to. ⁴ Dios psan rzo zho ni zha rteedlo to, ni scagaa, telne pe guielntseeb ne guñ to, zhaque gnabey pe caxtigw ne ygaal to; sac gon, ible laa Dios bzo zho guñ zho guielwxtis.

⁵ Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nèz lo Diosa ine tiblise no guic to.

⁶ Scaque dimi ne no gdeed to lo zho, goldeeda; sac rquiin dimi co parne grieelo gun zho tel pe nac dziin ne no gun zho. ⁷ Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

Golleynie samiech to

⁸ Grè ncuane rieguial to gun to, golgungazha zeena bdedgaw; sangue samiech to, none tibaque gleynie to zho. Zha ne rleynie samiech, grèle mine zhubnee lo Xley Dios ga quiayun zho. ⁹ Sac telne rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzga to grè ncuane quianie zho.

Gacxe waa, zha ne rleynie samiech zigne rleynie zho zho, grèle mine zhubnee lo Xley Dios ga quiayun zho. ¹⁰ Zha ne rleynie samiech, rsacsidraa zho zho; ni min co rnabey Dios. Gacxe waa, grèse ne none gleynie ne samiech ne.

¹¹ Ib none gban ne zigne racladz Dios, golle na tsaa ne biini; sac gon, laa dze ne ycaania Dios ne bii ziaadgaxraa, lèdle zeene psilo rnalo ne me. ¹² Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa dziuun ne. ¹³ None ndzinli gban ne:

dziuund ne guielgonziu,

dziuund ne grè lni yozh,

yquiangobd ne zha ne led tsieeld ne,

dziuund ne grè guielyozh ne racladz xcuerp ne,

dilnied ne samiech,

glèenied ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne grè ncuane ndzinlid ne racladz xcuerp ne.

14

Gzeed zdoo to mine run zha ne nacgrè to

¹ Golcaania zha ne gard tsoquicpaa zha nac Xtiidz Dios. Telne no palal mine riladz to zhaa rzac zho, glisquide tow lo zho. ² Gzooob ne, no to rzac peet nacd gow to grè lose guielwagw, laa zha ne na gard tsoquicpaa Xtiidz Dios, rzacgaa wena telne scuaan guizhyese gow zho; ³ ga nagon, ni stib ni stib nod pe nacne glisqui dien cho pe row, dien cho pe rowdga; sac gon grèse to, Dios bzooblo to ngab to lo me. ⁴ Nana zig nac zho, lo Dios ngab zho, led lode tow; cho nac to dzigo tso to glisqui to dien pe run zho? Dios nac men ne nan telne lèew o lèdgaaw ga quiayun zho; men nroob nac Dios, me gdeed guielbiini lo zho guien zho gban zho zigne racladz me.

⁵ Scaque, no zho zienal dien pa dzepaa none gleynie zho Dios, nogaa zho rnee zac tel pa dzetaa gleynie zho me. Per peet nacd ga, zac tib tib zho gunse zho mine rzac zho rdziladz me. ⁶ Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grèlosew; niicle zha ne ncueregaa ncuane gow, wenaquew, totsaque run zhow par glu zho ne rleynie zho me, ni rdeed zho xquizh lo me.

7-8 Sca nagon naca, per led min cod dzieets ne dziuun ne mine gacladztaa ne. Grëse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeene guetgaa ne, lo me none gdziñ ne. Gacxe waa, niicle niina ne zomban new, niicle zeene gutlegaa new, ladznia me no ne. ⁹ Sac gon, tel Jesús gut me ni brieaban me; gacxe waa, me rnabey ne grëse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguielda glisqui to lo zha ne rund mine run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grëse ne laa ne none gacredz lo me. ¹¹ Zigne raquietaque lo Xtiiidz me, zaatne rnee me:

Naa nac Dios mban, gneli naa lo to ganle:
grëse miech, ible squiitsgzhib zho lo naa,
cueero zho ne nli naa nac Dios.

¹² Sca nagon gaca, tib tib ne ib laa ne no cueero lo me tel zha wban ne.

Csande to zdoo zha ne nacgrë to

¹³ Nana sca, zha ne sca rund grë mine run to, ible glisquidraa tow lo zho. Golguien, gunde to ncuaañe rgobey to yquiaaqui gunctal zho xtol zho, o csaangaa zho Xtiiidz Dios. ¹⁴ Tel naa, nanpaa naa led dolđa gow ne grë lose guielwagw; sac niicle Jesúsca scaque nac xtiidz me. Sangue zha ne rzac dolđa, mazd gowd zhow; sac tel laa zho gowa, xtol zho ga gunctal zho. ¹⁵ Zig rne naa ga led dolđa, per telne xtsiinpaa row to tib ncuaañe rquiaaqui rsan to zdoo stib zho, ga rlu to ne rleyniede to zho. ¡Golguien sca, gowde to ncuaañe yquiaaqui sozit zho lo Dios! Sac gon, blactaa guielnë ne bded Jesús psilaa me zho.

¹⁶ Ib gunde to grë ncuaañe yquiaaqui gneenë miech to, niicle ne nanpaa to led dolđa. ¹⁷ Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espíritu Sant); led tsod zho dien pe zac gow zho, pe zac guie zho, pegaa gacda. ¹⁸ Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

¹⁹ Goltoxico sca, gunde to ncuaañe codil to grë zha ne nacgrë to; zeena tipse gac to lozh tsoguc to zha racladz Dios gban to. ²⁰ Ib gunde to, ne por tib guielwagw codil to grë zha ne ngable lo Dios. Zig rnele naa ga, grëlose guielwagw mbew, peet nacda gow new; sinque mine nonguielda, nacne gow ne mine nanpaa ne yquiaaqui csan ne zdoo stib zho. ²¹ Mincocxe waa, mazd gowde to pe scuaan beël, guiede to nziu, telne min co yquiaaqui gunctal to xtol zho; ni tel pe grëraa ncuaañe nan to tsod zdoo zho, gunde tow.

²² Niicle ncuaañe nanpaa to dolđa gun tow, niiclegaa nëz lo Diosa led dolđa; per mazd gunde tow zeene zo zha ne rzac dolđa. ¡Wen zie zha ne sca niicle nanpaa zho dold nac mine gun zho, per rund zhow, parne gunctald zho xtol zho!

²³ Sangue zha ne racchop guic riend zho dien pe zow zho tib guielwagw, ni lozh ga row zhow, runctal zho xtol zho ga; sac beend zho mine rzac zho rdziladz Dios. Grëse ncuaañe rzactaa zho wend ni gun zhow, xtol zho ga gunctal zho.

15

Golgacnie zha ne nacgrë to

¹⁻² Golguien sca, to ne nac to zha ne dziitsle zo lo Xtiiidz Dios, golgacnie grë zha ne gard sodziits lo Xtiiidz me. Golgun ncuaañe tso zdoo zho, ncuaañe

yquuin lo zho, zeena lozh guien zho zha gnalo zho Dios; led tsode to gun to ncuuane yquuinse lo to.

³ Golgan ganle, niicle Jesusa bguibd me niac ncuuane nquuin lo me. Zigne raquietaque lo Xtiidz Dios, zaatne rnee: “Grëtaa diidznë ne rnee zha ne rliëe lo Dios, grësew pcon zho me.”

⁴ Grëse mine raquiet lo Xtiidz Dios, padzeela pquiw; ni ib laaw pquia zeena gacndion ne zha no gban ne. Lëew rnee none nley gac ne, lëew rnee guieete ne yquiambiaaz ne yгаа ne grë mine bzeetle Dios. ⁵ Dios men ne rneedz guiebley co, men ne racnien ne guieete ne, me gacnien to niowse gbannie to grë zha ne nacgrë to. Golleynie zho zigne rleynie Jesús to, ⁶ zeena grëse ne tipse gac ne dzioolnie ne Dios, Pxož Jesús, men ndzon ne rnabey ne.

Grëse miech noyon Xtiidz Ndzon Jesús

⁷ Golguien sca, grëse zha ne nacgrë to, golcaania zho zigne pcaania Jesús to. Sca golgun, zeena xoobnenraa lë Dios.

⁸ Golsoladz ganle, zeene biaad Jesús nroob ncuuane been me lo zha Israel, me biaadgun grëtaa mine bzeetle Dios padzeela. Ga blu Jesús grëse mine rnee Dios, ib run mew. ⁹ Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pquia zdoo me zho. Min co raquiet lo Xtiidz me, zaatne rnee:

Zoolnie naa luu,

ni zlu naa lo grë zha stib guiedz ne men non nac luu.

¹⁰ Stib lugar rnee:

To ne nac to miech stib guiedz,
jine nley golgac grë to zha Israel!

¹¹ Ni no stib zaatne rnee:

Grëse to ne nac to miech stib guiedz,
jolleynie Dios! jolsanziuu lë me!

¹² Mincoque ga bzeet Isá, zeene znu pquiaa me:

Zrieequia tib men lo xti Isá;
men co gnabey lo grëse miech stib guiedz,
ni me gnalo zho grëse zho.

¹³ Mincoxe waa, to ne nac to miech stib guiedz, rnab naa lo Dios (men ne psanle diidz pe nac grë ncuuane yгаа ne ga) gneedz me guiebley lo to, gacnie me to peet zhgab ctsebde to niina ne laa to rliladzle me. Rnab naa lo me, gacnien Espiritu Sant to ine gley to yquiambëz to gac grë mine psanle me diidz ga.

¹⁴ Bets, bzian, nanle naa zha wen nac to, nacde to zha ne csan zdoo stib zho; rienle to zha racladz Dios gban to, rienle to zha cso to diidz lo grë zha ne nacgrë to; ¹⁵ per lo guits rii gon nzian ncuuane rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow. ¹⁶ Ne nquialadz Dios naa, laa me bzooblo naa noyon naa xtsiin Jesús, none naa Xtiidz Ndzon me lo grë miech stib guiedz, zeena csanmbe Espiritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacnien Jesús naa noyon naa dziin ne pso Dios naa. ¹⁸ Me noyacnien naa none naa Xtiidz me lo grë zha stib guiedz, zeena gban zho zigne racladz me. Ni laa zho nobig lo me, sac ran zho grëse mine rne naa mban naaw zigne naca, ¹⁹ ni ran zho zha racnien Espiritu Sant naa run naa grë milagr grë ncuuane rzee zdoo zho. Sca nagon none naa Xtiidz Jesús lo zho, brie naa Jerusalén brieequia naa haxta nëz xtan zha Ilir. Guiabde to togo rtix naa diidz. ²⁰ Ni laa naa noxco za naa zaatne waltaa gard

gon zho cho nac Jesús, zeena gasëëbd naa zaatne ziyele zha ne güeynee Xtiidz me. ²¹ Laa naa zanaļ zigne zhubnee lo Xtiidz Dios, zaatne rnee: “Grë zha ne wlataa gard gon cho nac me, zeene gan zho grëtaa ncuaaņe ruņ me, laa zho gunbey me.”

Racladz Pabl tsie Pabl Roma

²² Nzian vuelť gocladz naa nialgaņ naa to, per ib bdeetew diidz, sac laa naa bia grë dan co biaseed naa miech. ²³ Izle ga na tibaque sca no guic naa, laa niina ne laa naa psiaal lo xtsiņ naa, nataa nagon ible zial naa. ²⁴ Laa naa no ga Spaņ, dzigo lëe nëzle ga teed naa Roma i guialgaņ naa to. Tib guielbleya lo naa guialquiabdiuuzh naa to, dzigo lozh ga siguiel to gun to xyudar naa grieelo ga naa nëz Spaņ.

²⁵ Laa niina, laa naa no ga Jerusalén gasaņ naa tib gon lo grë zha bets, zha bzian ne no ga; ²⁶ sac grë zha bets, zha bzian, ne no nëz Macedon, ni nëz Acay, laa zho bnediudz beenlo zho palal dimi cxeel zho yquiin grë zha prob ne no nëz co. ²⁷ Niapse zdoo zho gol ptop zho gon co, sac rzac zdoo zho grëtaa miņe been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuaaņe rgaa lo zho yquiin zha Jerusalén.

²⁸ Zigne lozh nagon gasaņ naa gon co Jerusalén, dzigo laa naa teed guialgaņ naa to i zigne nile naa ga. ²⁹ Rien naa nroob guielnzaac ne gneedz Dios lo to zeene laa naa guial.

³⁰ Bets, bzian, golguien ganle Jesús rnabey ne grë ne; ni rleynie ne zha ne nacgrë ne, sac Espiritu Sant nacnie ne. Gane niina, laa naa rnab lo to, golgotsaa gnab ne lo Dios gacnieņ me naa; ³¹ golnab lo me, csilaa me naa ladznia grë zha Israel ne gard guien cho nac Jesús. Golinab lo me, ine gley grë zha bets ne, zha bzian ne, ycaania zho gon ne gasaņ naa lo zho nu; ³² zeena ine nley no zdoo naa glanso naa lo to, ine gdziiladz naa len zha ne cuëz naa lo to i. Sca nagon no guic naa, totsaque gneedz Dios diidz gaca. ³³ Ni me ne nac me meņ ne rbee miech lo grëse zhgab, lo grëse guielxtseeb, me gacnieņ to. Sca gaca.

16

Bdiuzh

¹ Bets, bzian, len dze rii laa Feb, tib wnaa ne ruņ xtsiņ Dios guiedz Cencré, laa me guiaad nëz lo to i. ² Laa naa rso diidz lo to, zeene glanso me i niowse golcaania me, golcaania me zigne rieguial ycaania ne zha ne ngab lo Dios. Golsiguiel goldeed grë ncuaaņe yquiin me; sac gon, tel me ndal grë zha ne ziyacnie me lo xliaadz zho, haxta naa blactaa ziyacnie me naa.

³ Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsiel me Priscil. Blactaa ziyacnie zho naa zidziuun no xtsiņ Jesús, ⁴ haxta bdedlaa zho niet zho psilaa zho naa lo guielgut. Rzadox zdoo naa miņe been zho ga, niicle grëragaa zha zit ne nacgrë new, rzac zdoo zhow.

⁵ Ni scagaa, grë zha ne rcaalsa lidz zho riegoolnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëe me nac zha Asia ne glopaa bzëeb xnëz Jesús.

⁶ Goldeed zhibdiuzh naa lo Marí, blactaa noyuņ me xtsiņ Jesús lo to.

⁷ Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguiib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

⁸ Goldeed zhibdiuzh naa lo Ampliat, lëe stib zha ne rdzieel xtidz naa ga; ⁹ lo Urban, rsoladz naa me, tipse bdziuun no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰ lo Apel, ye me blactaa ncuane bded me blu me ganle ne nli dib zdoe me rnalo me Jesús; lo grë zha ne no lidz Ristob ne.

¹¹ Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne riladzle Jesús; ¹² lo Trifen, lo Trifós, ni lo Pérsida, gza men wnaa rii blactaa noyun zho xtsiin Jesús.

¹³ Goldeed zhibdiuzh naa lo Ruf, zëeb xtiidz me lo grë zha ne nacgrë ne; goldeed zhibdiuzh naa lo xniaa me ne, run naa cuent lëe stib xnia naa ga, blactaa pteedlo me naa. ¹⁴ Goldeed zhibdiuzh naa lo Asintric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

¹⁵ Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

¹⁶ Grëse to bets, grëse to bzian, golcaania zhibdiuzh naa. Grëse zha ne riladz Jesús nëz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho mine ni nacdrea Xtiidz Jesús; yquiaadiagde to zhiwseed zho.

¹⁸ Grë zha co, led xtsiin draa Jesús ga run zho, sinque laa zho noxco ncuane gdeed guxt xcuerp zho. Diidz nex, diidz ndooladz rnee zho; grë miech ne beelze pe riladz, znuse rquidie zho zho. ¹⁹ Sanguet to, zëeb diidz ne ibrsaande to mine nac Xtiidz Dios, zienal to mine rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuane yquiin gun to, ni lalnu tsoode to lo guientseeb. ²⁰ Scagaa Dios men ne rtiche grëse zhgab, grëse dzeb, merle quixdze me Satanás, zeena peet grielodraa gun ma. Jesús, men ndzon ne rnabey ne, me gacnien to.

²¹ Golcaania zhibdiuzh Timoté, men ne quanie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²² (Naa nac Ters, naa noquia guits rii, ye naa laa naa rxeel zhibdiuzh naa lo to i. Rleynie naa to, sac ye to ngab lo Jesús. ²³ Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne riladz Jesús nëz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to. ²⁴ Jesús men ne rnabey ne, me gacnien to grëse to. Sca gaca.)

²⁵ Laa naa rsan to ladznia Dios, me gacnien to lozh sodziits to lo Xtiidz me, mine none naa lo miech. Haxta zeene gard tsaa guidzliu, znu no guic Dios csilaa me grë miech lo xtol zho, per choot goconda, naraa laaw bzhoobnen.

²⁶ Laa niina, nzian zaatne nogaaz Xtiidz me, zeena grëse zho guien Jesús none gnalo zho, ni mine rnabey me min co no gun zho. Grë zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca. ²⁷ ¡Mese nac Dios, mese nac men ne nlipaa rien! ¡Tibaque sca golgotsaa dziuunnon ne me, grëse ne ne nac ne zha ne ngab lo Jesús! Sca rieguiala.

Pabl

GUITS NE GLO PXEEL PABL LO ZHA CORINT

¡Diuzh to grëse to! ¹ Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

² Laaw ziaad lo to i, grëse to ne nac to zha ne ngable xnêz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

³ Dios men ne nac Pxoze ne, ni Jesús men ne rnabey ne, me gacnieñ to, me glu lo to ganle pa lotaa noxco me to; zeena peet tsienied guic to.

⁴ Gzataa zeene rzodiidznie naa Dios, rded naa xquizh lo me por grëtaa ncuanea zineedz me lo to, niina ne laa to rliadz Jesús. ⁵ Sac gon porne rliadz to Jesús, blactaa ziyunlay me lo xquielmban to, noyacnieñ me to quiayoguicraa to zha nac zhiwseed me, rien to zha gnee tow lo miech. ⁶ Rlu zienal to mine nac Xtiidz Jesús, zigne binse tow, ⁷ gacxe waa bneedz Dios grëtaa guielbiini lo to, zeena guien to zha gban to, laga quiambêz to gdziñ dze ne guiaad Jesús men ne rnabey ne. ⁸ Ni Dios nac men ne gacnieñ to tiblque gac to lo Xtiidz Jesús, zeena ni tib falt rapde to gal dze co. ⁹ Sca nac xtiidz me, ni mesi gon ctsëed me miñe rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰ Gacxe waa bets, bzian, laa naa rso diidz lo to niowse golgac, tsodidraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal noso diidz rii lo to. ¹¹ Sac gon në tib zhalidz Cloé lo naa nodillsa to i; ¹² no to dien cho xnêz ngab to. No to rnee: “Xnêz Pabl no naa”; riasaque zha ne rnee xnêz Apol no zho, rrieequiagaa zha ne rnee xnêz Pedr no zho; haxta no zho rzac zhase nac zha ne nliipaa no xnêz Jesús. ¹³ Ne squi rac to, ¿pe rzac to dzigo squi nzian lë nac Jesús? Zha ne rnee xnêz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴ ¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! ¹⁵ Zeena tsod pe nacne guiab to xnêz naa ngab to, sac naa pchoobnis to. ¹⁶ Ah, ni naaque gon pchoobnis grë menlidz Stef. Bod lëese zha ne pchoobnis naa ga, ¹⁷ sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to miñe bialne naa lo to, sac ib zanaal naa pe guielrac, pe diidz ngan ne gne naa; sac nacda gleynie miech zha rnee naa, sinque giladz zho cho nac Jesús, pe nacne gut me lo cruz.

Diosse nac men ne rien

¹⁸ Miñ co nagon noxco naa, maase niicle no grë zha ne rzac ncuanea paat rquiind ga been Jesús gut me lo cruz, per lëe zha co nole nêz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. ¹⁹ Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho, niicle rzac zho mazdraa zhooba guic zho, ni lalnu yquiinda.

²⁰ Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nacse grë guielrac ne no lo guidzliu rii. ²¹ ¡Diosse nac men ne rien! Bien me grieelod gunbey miech me por xquielrac zho, nacne bnabey me zha ne dib zdoe gliladz xtiidz me, zha co csilaa me; niicle ne rzhidznie miecha, rzac zho ncuaañe paat rquiinda.

²² Zig nac grë zha Israel, grë zha Gres ncuaañe paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalгаа gaca zigne nac zhiwseed zho, sac laa zho zienal guielrac ne no lo guidzliu rii. ²³ Gacxe waa zeñe rnee no lo zho Jesús men ne pquia lo cruz, men cose csilaa miech, rlëë zha Israel ron zhow; laa zha Gres, rzhidznie. ²⁴ Sangue ne, ne nac ne zha ne bredzle Dios bzëëb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. ²⁵ Mine rzac miech paat rquiind ga been Dios, ni nand zho ndziibguicraa nac min co lo grë xquielrac zho; zha ne rzacгаа cholze cho men nsis ga sca gut lo cruz, ni nand zho lëë men co mazdraa ndip lo grëse miech guidzliu.

²⁶ Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadгаа lo grë dii ne nziuu lo zho. ²⁷ Per ib laa Dios nobedz grë zha ne rzac miech peet rien, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. ²⁸ Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. ²⁹ Ga rlu me ganle ni tib choot grieelod gacniats lo me. ³⁰ Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús bneedza, ni Jesús nac men ne psilaa ne lo grëtaa xtol ne, men ne psanme ne laa ne bziaab xnëz Dios. Dios bnabey sca goca. ³¹ Gacxe waa choot grieelod gacniats, zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grëtaa ncuaañe run me.”

2

Xtiidz Jesús bnee Pabl

¹ Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to. ² Bend naa dien peraa nseed naa to, sinque mine nac zhiwseed Jesús min co bialne naa, zeña gacnan to cho nac me ni pe nac ne pquia me lo cruz. ³ Lega gzhe gzhe rac naa, haxta rzhidz naa, rdzieeb naa no naa lo to. ⁴ Zeñe laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espíritu Sant ganle nacda beelze pe wseed, ni blu ganle pa lotaa poder ne rap Dios. ⁵ Sca bne naa lo to, sac laa naa racladz zha ne gbig sëëb xnëz Dios, me gnalo zho, gnalod zho grë mine nac xquielrac miech.

⁶ Parga nli no zaatne rnee no grë diidz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë diidz ne rleynie grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuaañe tibrded naca. ⁷ Grë diidz ne rnee no, ndzielguic naca, sac zhiwseed Diosa, lëë xquielrac me ga. Ndzielguica, sac ga rlu me zha no guic me csilaa me miech gdziñ zho lo guielndzon ne no me; gocnand miecha padzeela, per nolew zeñe bzaa me guidzliu. ⁸ Grë miech ne no len dze rii, rioguidc zho

zha nac xquielrac Dios; sac telne nioguic zhow nabeyd zho nquia men ndzon ne nac Jesús ga lo cruz. ⁹ Zigne zhobneeque lo Xtiidz Dios, zaatne rnee: Ncuaaane waltaa gard guien miech, nac grè mine quianiele Dios gdeed me lo grè zha ne nlipaa gbig lo me gleynie zho me.

Ncuaaane choot gard gana, ncuaaane choot gard gona.

¹⁰ Sangue no laa no ndionlew, sac pxeel me zhiEspíritu me blu lo no zha naca, men co nan grèse mine no guic me.

¹¹ Zig nase tib miech, grielod gacnanpaa ne dien pe nac mine no guic zho, pe naggaa mine rza zdoo zho, loxaque zhiespírituse zho nana; scaque Dios, loxaque zhiEspíritu me nan grèse mine no guic me gun me. ¹² Ni tel no, Espiritu co nacie no (nacie no espiritu ne quianzè lo guidzliu rii), ni ible laa Dios pxeel me lo no zeena gacndion no zha nactaa grè ncuaaane nole guic Dios gneedz me lo ne. ¹³ Zeene rzeet no grè guielnzaac co, laa no rneew zigne rneedz zhiEspíritu me guielbiini lo no, rneed now zigne riab guic grè zha rac ne no lo guidzliu rii. Laa no rnee grè min co zigne rlu zhiEspíritu mew, ni ible laaw nac par grè zha ne rioguicle zha racladz Espiritu co.

¹⁴ Grè zha ne nacie zhiEspíritu Dios, cholze miech nac zho, grielod tsoguic zho zha nac grè mine rlu Espiritu co lo no. Rzac zho ncuaaane paat rquiind naca, sac grielod guien zhow ne zhase. ¹⁵ Sangue zha ne rioguicle zha racladz Espiritu co, rien zho pe nac mine rlu me.

¹⁶ Ni nligaa zha guien zhow, zigne zhobneeque lo Xtiidz Dios, zaatne rnee: “Choot grielod gacnan pe nac mine no guic Dios gun me, choot grielod glu lo me pe nac mine no gun me.” Per no, ndion now, sac grè ncuaaane nan Jesús, bneedz me diidz lo no ye no gocndiona.

3

Gnalod zho samiech zho

¹ Bets, bzian, ne nligaa gard grielo gne naa lo to zigne rne naa lo grè zha ne rioguicle zha nac mine racladz zhiEspíritu Dios, sinque tibaque laa naa rne lo to zigne rne naa lo grèraa miech guidzliu, sac rrieequia bii mëdyeen nac to lo zhiwseed Jesús. ² Niapse ncuaaane ligase ziseed naa to, laa ne cseed naa to ncuaaane ndzielguic. Rrieequia nidzse nonedz naa quiaze to, laa ne gow to grè ncuaaane row zha gol. Haxta niinagaa gard tsoguic to zha nac grè mine ndzielguic, ³ sacne laa to bii zienal mine run miech guidzliu, laa ne gun to mine racladz Dios. Golguien ganle zha rac to, no to rlozhd glèèlsa to, rlozhd tillsa to. iLed squid gon no gac zha ne nole xnèz Dios! ⁴ Pe i na rrie bla to rnee: “Tel no xnèz Pabl no no”, rriequegaa zla zha ne rnee: “Tel no xnèz Apol no no.” Gase rlu ganle zienalde to mine racladz Dios, sinque laa to zienal mine no guic to.

⁵ Nana, çcho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuun no mine rnabey me no. ⁶ Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba. ⁷ Golwi sca ganle Diosse nac men non, sac me pchoob bni co, tel no peet ncuaaane nroob bdziuun no, lèè gdib tib bloo bni liu, stib bgaala. ⁸ Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed mine rieguial zho tib tib zho por dziin ne been zho. ⁹ Tib ngundziin winse nac no lo Dios grop no Apol; laa to nac zig tib lè liu ne quiaayan Dios, zig tib yu ne quiazaagaa me.

¹⁰ Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuua zhow, tsienal zho zigne nacse xcimienta ga, ¹¹ sac gon nod pe nacne csëeb zho stib cimient, tibaque cimient no, lëe cimient co nac Jesús.

¹² ¡Laa cimient co nole! Nana no zho gzaa yu co niapse guuib or, niapse guuib plat, no zho gzaaw grë quie niazh, no zho gzaaw yag, nogaa zho gzaaw grë pe guizh, pe yag xiidgaa. ¹³ Zeene gdzin dze ne laa Jesús gun guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa min lëbraa. ¹⁴ Zha ne pquiu ncuaañe rlëb lo gui, ib tedsod zгаа zho mine rieguial zho gdeed Dios lo zho; ¹⁵ laa zha ne pquingaa grë ncuaañe znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶ Golgacnañ ganle xyadoo Dios gon nac to, sacne zdoo to rbëz zhiEspíritu me. ¹⁷ Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. ¹⁸ Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho mine nacpaa guielrac, guielrac ne rneedz Dios. ¹⁹ Sac gon grë guielrac ne no lo guidzliu rii, ncuaañe beelze naca nëz lo Dios. Zigne raquetaque lo Xtiidz me zaatne rnee: “Grë zha rac ne no lo guidzliu rii, lëeque lo grë guielrac ne zienal zho, ga rlu Dios ganle paat rquiinda.” ²⁰ No stib zaatne rnee: “Nanle Dios grë zhgab ne nonie guic grë zha rac, ncuaañe paat rquiinda.” ²¹ Tsode to sca lozhd gacniats to dien cho xnëz miech guidzliu rii no to, golguien ganle grëtaa ncuaañe no, laa Dios psana par yquiina lo to. ²² Zig nac guidzliu, guielmban, guielgut, ladznia to now, niicle ncuaañe no niinaw, ncuaañe naragaa ziaada, cheñ tow; haxta Pabl, Apol, Pedr, ib laa no zo nu par dziuun no xyudar to. ²³ Grëse to tibaque xnëz men ne no to, lëe men co nac Jesús, men ne pxeel Dios.

4

Zha rzac zha ne rienee xtiidz Dios

¹ Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela. ² Ni zha ne gon znu run tib dziin, ible none nguzobdiidz gac zho lo men ne rnabey zho. ³ Gacxe waa tel zha rzac to naa, tel zha rzacgaa grëraa miech naa, peet zienied guic naa. Haxta ni mine rzaac naa nac naa, peet nonda, rieguiald guiep naa znutaa znutaa nac mine noyun naa. ⁴ Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gaguial naa. ⁵ Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë mine rza guic ne, mine no zdoo ne, laaw glu me; grë no ne nodziuun no xtsiin me, dze co laa me gneedz mine rioguiapaa no tib tib no.

⁶ Bets, bzian, niina ne nozet naa no lo to nu grop no Apol, quiaayun nond naa naa, niicle nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tsode to lozhd dien cho non, chogaa nond. ⁷ Stiba, ¿cho nadien në lo to ne gunnon to to? Grë ncuaañe rap to, grë ncuaañe rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquieelliger to bgaa tow? ⁸ Niats rac to, masaque rzac to grële zhiwseed Dios nan to, gaxle zo to lo me, haxta rzac to

tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grē anj dien zha rac no; zig ruñ miech rieso zho lo zha ne rnabey zho ret. ¹⁰Ne znu quiadziuuñ no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no. ¹¹Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziuuñ no dziin rdziniaa no ncuaañe rquiin no. ¹²Ni rlozh ga rrieque miech rsacsi zho no. Rriequia zha ne rdzibdee no, per rdziuuñ no gdzibdeequo no zho, sinque mazd rnab no lo Dios gunlay me zho; zha ne rtsidil no, rdziuuñcasd no zho. ¹³Rriequia zha ne nē rnee lo no, per no, diidz wen rtsire no lo zho. Masaque rzac miech no, zig rzac zho grē ncuaañe paat rquiindraa, zig rzac zho grē ncuaañe nole lo guizh.

¹⁴Laa naa rzet grē min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle rleynie naa to, rzaac naa to zig tib xpēed naa. ¹⁵Niicle niaca mine ndal zha ne guiadseed to i, niicxe guiaad nzian mil zho waa, per led grēd zho tsoxcopaa to zig rioxco tib dad xpēed zho. Zigne rne naa ga, xpēed naa nac to, rriequia pxoz to nac naa, sac gon naa glo bialne xtiidz Dios lo to, laa to bzēeb xnēz Jesús. ¹⁶Goltsoxco sca, golban zigne mban naa. ¹⁷Ni ible mincopaa gon laa naa rxel Timoté ziaad lo to i, lēē stib xpēed naa i, ne nligaa rleynie naa me, tib zha nguzobdiidz nac me lo men ne rnabey me. Laa me ziaad i, me gzodiidz lo to ganle zigne rseed naa miech grēse zaatne ziyateed naa, scagaa noxco naa mban naaw.

¹⁸Rien naa no bla niats ne nac to i, rzac nlidraa gual naa lo to i stib. ¹⁹Gacnañ zho ganle, gneedzse Dios diidz, ible laa naa none gualniob, dzigo bii zdziañ ne dien pe nli na nacnie zho xpoder Dios, te loxaque rnee zho ye. ²⁰Sac gon zha ne ngab xnēz Dios, grē mine rnee zho none glu nacnie zho xpoder me, nacda loxaque diidzse. ²¹¿To nadien zha racladz to? ¿Pe rdziladz to gual naa gualgactox naa lo to i, te mazd wen ye niapse diidz ndooladz, diidz nex gualne naa lo to?

5

Zha ne runctal xto!

¹Zēeb diidz gon, lad to i no tib zha bgui ne quiaayun tib dol nroob; per ni grēraa miech ne gard gliladz Xtiidz Dios rund min co. Bin naa lēēque xniaa pchoob zho quiangob zho. ²¡Yo na ne rzac to grēle zhiwseed Dios nan to, gaxle zo to lo me! ¡Laa ne ctoladz to, laa ne tso to guielnē, cuee to zha qui lad to, lel no to rlozhd gacniats to!

³Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha riegual gac zha co: ⁴Grē to ne nac to zha ne ngab lo Jesús, rnab naa lo to ycaalsa to zigne rnabey me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. ⁵Squi ndxie to grē to, golzonēz zha co, golcueegazh zho lo to i, tsie zho tsietsobe zho ladznia mēdox, ga tednē xcuerp zho guien zho ganle pe noyun zho; nanđ new togo zzhixcuaa zho stib, zeena ycaania Jesús zho gal dze ne laa me gbiire guiaad.

⁶¡xlēse gon squitaa racniats to rzac to zha mbe nac to, ni randze to zha ne quiaayun dōldox qui! ¡Pe riende to telne glisquide to mine quiaayun zho, ib

tedsod zrieequiaraa zha ne squi gunctal xtol! ⁷ Zha ne squi nac, masaque nac zho zig nac grè guielguidzdox ne znuse rded; golcueegazh zho sca, zeena ine mbe gac to nêz lo Dios, tete to guielguidz qui. Golguien ganle laa Jesús psanmbele ne, mincopaa gut me, goc me gon nêz lo Dios zig carner yeen ne rgogon zho lo me lni Pascw. ⁸ Golgotsaa gban ne zigne racladz Dios, grêse tel zha wban ne glo, grêse guielyozh, grêse guielntseeb ne bdziuun ne, none csaan new grêsew. Ndzinli sca golgac, goltsienal mine nac diidzli; none mbe gac to nêz lo Dios, zig guietxtil ne notsd ncobi.

⁹ Lo stib guits ne pxel naa lo to ga, laa naa psoble diidz lo to ganle ctsieelsade to grè miech yozh ne ndzinlid mban. ¹⁰ Zeene sca pso naa diidz lo to, guiabde to togo naca parne ctsieelsadraa to grè zha ne gard gliladz Xtiidz Dios, zha ne rquiangob zha ne led tsieeld, grè zha ne zienal loxaque gunlo dimi, grè zha ne run guielggaan, grêgaa zha ne rnalo grè mdio. Led zha coda, sac laga mban ne lo guidzliu rii, ible zanlsa ne grè ne zho. ¹¹ Sinque zha ne bzet naa ga ctsieelsade to, nac zha ne nacle diidz xnêz Dios no zho, ni noque zho quiayunctal zho xtol zho, no zho rquiangob zha ne led tsieeld zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuuaane rleynieraa zho, no zho rquiadiidzguizh samiech, no zho rzudz, nogaa zho run guielggaan. Ne nligaa zha ne sca nac, per ni tib guielwagw gowniede to zho. ¹² Tel grêraa zha ne gard gliladz Xtiidz Diosa, led ned riogual glisqui mine quiayun zho, Dios nac men ne gunquizh zhow. ¹³ Sangue zha ne nacgrè ne, zeene noyun zho tib ncuuaane ndzinlid, ib riogual glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

6

Zha none gac guielwxtis

¹ Laa to gocnanle ganle, to riogual glisqui tel pe nac ncuuaane nonguield run zha ne nacgrè to. Lèda i gon run to, zeene pe tib dil rap to, lèèlèd zie to lo wxtis laa ne gbig to lo zha ne nacgrè to, zha csiooglo lo xtil to. ² Niacxe nande to zha ne ngab xnêz Dios, zha co cobey zha nac xtol grêraa miech zeene gal dze ne laa Dios gnabeya? ³ Pe nac dzigo grieelod tose csiooglo lo tel pe dil win ne rap to? ³ Haxta grè anjl name, ne gon cobey pe nac grè mine quiayun zho. Gacxe waa, grè dil ne rac lo guielmban rii, ne riogual cobey zha guiooglo low. ⁴ Sca gon gun to, led node to, rnadse pew laa to ziele lo wxtis. ⁵ Pe ni tib lè guielto guien lo to? Lo grè to, niacxe goon guien zha ne grieele gnee lo to, cuèz lo xtil to? ⁶ Nazdpaar rdziladz to dil, ⁶ pe i na lèèque zha ne nacgrè to quiadilnie to, ni rlozh ga zieque to zienie to xtil to lo zha ne rililadz Dios? ⁷ Pe rien de to tib guielto doxle i squi no to lèèque to quiadilnsa. Mazd golxecw tel cho pe run to.

⁸ Mazdraa gon mbana squi no to rsacsi to miech, ni haxta zha ne nacgrè to rsacsi to. ⁹ Nanle to ganle zha ne squi run guielntseeb, grieelod gdziñ zho zaatne rnabey Dios. T sienewguite guic to sca. Golsoladz ganle grêse zha ne run guielyozh:

zig nac zha ne rquiangob zha ne led tsieeld zho,
 zig nac zha ne rquiangob zha ne nole tsieel,
 zig nac zha ne nac mrazh,
 zig nac zha ne rnalo grè mdio laa ne gnalo zho Dios,
 ni tib zho grieelod gdziñ zaatne rnabey Dios. ¹⁰ Scaque:
 zha ne nac ngbaan,
 zha ne zienie guic loxaque dien zha gunlo dimi,

zha ne nac ngonziu,
 zha ne rzhixcuaa diidzguizh,
 zha ne rungüet miech par cuan zho zho;
 ni tib zho ygaad guielnzaac co. ¹¹ Blalaa to bio lo grê dol co glo, sangue niina miech mbele nac to nêz lo Dios, laa Jesús ni Espiritu Sant psanle to zig tib zha ne peet xtold, laa me psanwenle to nêz lo Dios.

Gunctald zho xtol zho

¹² Nli ndal ncuane zac guñ ne, gunctalda xtol ne, niicle choot rcaadgaaw, per led grêda rquiin. Tel naa, niicle no ncuane zrieelo guñ naa, per rund naaw; sac racladzd naa guien naaw, lozh ga lëew gnabey naa. ¹³ Zëeb diidz rnee zho: “Laa guielwagw biaan par gow miecha, scagaa zdoos zho laaw biaan par tsodzëw guielwagw.” Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigtaa zdoos new, zigtagaa guielwagwa, zdziñ dze ne gnitlo Diosa. Guielwagw ga na, sangue grê guelyozh nerun miech rquiangob zho zha ne led tsielld zho, biaan ne par dziuun ne min co, sinque laa ne biaan par gban ne zigne rdziladz Dios, sac me rnabey ne. ¹⁴ Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdziñ.

¹⁵ Golgacnan ganle, rrieequia lëe tiblë xcuerp Jesús nu gon nac ne tib tib ne. Nana, ðpe nonguiela ga dzigo gdziel tib lë xcuerp me ga xcuerp tib wnaa ro nêz? ¡Nonguiela gon! ¹⁶ Sac gon zha ne raanie tib wnaa ro nêz, rrieequia tibaque rac zho ga grop zho wnaa co. Rnee lo Xtiidz Dios, par me: “Zeene laa mgui racgrop tib wnaa, tibaque miech rac zho ga grop zho.” ¹⁷ Scagaa zha ne rzëeb xnêz Jesús, tibaque rac zho grop zho me, zhiEspiritu me racnie zho.

¹⁸ Gacxe waa, gunde to guelyozh yquiangob to zha ne led tsielde to. Lo grê dol ne no, min riise nac mine xcuerppaa miech rguinie zho. Sac gon zha ne run guelyozh co, masaque rsanbeed zho zho ga. ¹⁹ Golguien ganle, zha ne nole xnêz Dios, masaque zha nac zig tib yadoo zaatne rbëz Espiritu Sant, Espiritu ne rdeed Dios rbannie zho. Led nedraa rnabey xcuerp ne, ²⁰ Diosle rnabeya, sac gon bzhiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa yquiin new par cxobnen ne ganle pa lotaa men nroob nac me.

7

Rtsire Pabl lo zhiwnabdiidz zho

¹ Lo guits ne pxeel to lo naa, nzian ncuane rnabdiidz to, nu ganle laa naa ctsire lo wnabdiidz co: nli wena, telne niaca mine grielow ctsieelnia ne. ² Per parne tsod pe yquiaaqui cho guñ guelyozh, tsonie zho zha ne led tsielld zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsielld zho zigne rieguiala.

³ Zha ne ptsieelniale, zig nac mgui none gnee zho lo tsielld zho zeene racladz me, scaquegaa wnaa zeene racladz tsielld zho gnee lo zho none siguiel zho.

⁴ Sac gon wnaa ne rtsieelnia, led zhadraa rnabey xcuerp zho, sinque tsielle zho rnabeya; scaquegaa mgui zeene laa zho rtsieelnia, tsielld zho rnabey xcuerp zho. ⁵ Golguien sca, niicle mguiw niicle wnaaw nodne yca zho xcuerp zho lo tsielld zho. Laa telne rzacgaa zho none yquiind zho tsielld zho tib blalaa dze, sac rquiabladz zho gzodiidznie zho Dios, wena tosaque guiaan zhow diidz grop zho. Per zigne ted ga, gbiireque gnee zho lo tsielld zho, sac gon zha ne grielod cxcw, nend ccheep mendox zho guñ zho guelyozh.

⁶ Ne znu rne naa lo to, guiabde to nagon togo rne naa nopaa ctsieelnia to. ⁷ Teĭ naa, rzac naa wena tebaa grēse to znu ctsieelniad, zigne nac naa; per na ncuaañe gacđ ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho. ⁸ Zig nac grē zha ne bii tib, grēgaa zha ne gutle tseeel, wena tebaa grielo scase guiaan zho, ⁹ per teĭne rien zho lēdb xcuerp zho, dzigo mazd ctsieelnia zho. Mazd wena ctsieelnia zho, lēdle so zho tib zho ni teĭ rec rdzu zho.

¹⁰ Sanguē zha ne ptsieelniale, laa naa rso diidz lo zho csaand zho tseeel zho, ni nacda xtidz naa, sinque ible sca rnabey Dios. ¹¹ Laa teĭ zha ne guiaabgaa csaan zho tseeel zho, zaca, per lēeraasi grielodraa gbiire ctsieelnia zho, mazd miñe naca teĭne zrieelow ycatsieel zho stib, o guiaangaa zho tipse zho.

¹² Nu na ganle laa naa gnegaa chop lan xtidz naa lo zha ne led yed tseeel rliładz Xtiidz Dios; tib diidzse naca gni naaw, nacda miñe rnabeypaa Dios. Zha bgui ne mbannie tib wnaa ne rliładz Xtiidz Dios, per teĭne rio guic wnaa gbannie wnaa zho, nodne csaan zho wnaa. ¹³ Scaquegaa wnaa ne mbannie tib mgui ne rliładz Xtiidz Dios, nod csaan zho mgui co teĭne riopaa guic mgui gbannie mgui zho. ¹⁴ Zigtaa mguiw, zigtagaa wnaaw, zha ne sca mbannie tib zha ne rliładzle xtiidz Dios, ye zho runlay Dios ga, nenda haxta zio dze ne ye zho gliładz xtiidz me. Sac teĭne ctso zho, laa ne gbigraa xpēed zho lo Dios, leĭ znu sozit mēed. ¹⁵ Nana, teĭne zhalgaa zha ne rliładz Xtiidz Dios ga, rnab csaansa zho, peet nacda maase ctso zho, nod pe nacne gzoobguicpaa tseeel zho lo zho cuēz zho. Sac gon zha ne rliładzle Xtiidz Dios, laa me bredz zho parne zaacse gban zho, bredz me zho par tsodil zho; ¹⁶ stiba, nand zho dien pe dzziñ dze ne gliładz tseeel zho Xtiidz Dios.

¹⁷ Miñe naca tib tib to gołtsoxco gon to miñe rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene rliładz zho xtiidz me, none sca guiaan zho niicle teĭne rliładz tseeel zho xtiidz me. Grēse zha ne ngab lo me, diidz rii rso naa lo zho. ¹⁸ Zig nac grē zha ne nole bey xcuerp zeene laa zho rzēeb xnēz me, sca no zho bey co gund zho ne yqueets zhow. Zha ne na nodgaa bey co zeene rzēeb zho xnēz me, scaque nod pe nacne tsopaa zho bey co. ¹⁹ Miñe mazdraa non lo me, gban zho zigne rdziladz me, guieñdraa ne dien cho no bey, chogaa nada.

²⁰ Zigne rneque naa ga, grēse zha ne rzēeb xnēz Dios, teĭ zha nac zho zeene laa me bredz zho, scase none guiaan zho. ²¹ Zig nac zha ne nac ngundziin lo beñ, peet tsienied guic zho guiab zho dien zha griee zho ladznia zha ne rnabey zho; per teĭne gdeeda diidz, zac tsoxco zho dien zha griee zho lo zha co. ²² Zha ne sca nac ngundziin lo beñ zeene bzēeb zho xnēz Dios, guieñ zho ganle rriequia zonlaale zho, sac gon laa Jesús psilaale zho lo grētaa dol ne bio zho. Zha ne nacdgaan ngundziin lo beñ zeene bzēeb zho xnēz Dios, guieñ zho ganle tib ngundziinle nac zho lo Jesús niina, me rnabey zho. ²³ Golguieñ ganle, grēse to laa Dios bzhiile to ni nroob goconon to, gacxe waa mele rnabey to; ni togaa, lo me none gon to dziin, gdeete to diidz lega gnabey miech to. ²⁴ Sca nasca gon bets gaca, tib tib to zigne nacse to zeene bzēeb to xnēz Dios scase no gban to, iñe gleynie to me.

²⁵ Stib wnabdiidz ne run to ga dien zha gac zha ne gard ctsieelnia, gneli naa lo to ganle, guieñ tib xley Dios miñe gnabeypaa dien zha gac zho. Per golquiaadiag miñe gne naa nu ganle zha rzaac naa, nanle to ganle, zha ne znu rquia zdoos Dios rbedz me, miñe rquiin min co rnee zho. ²⁶ Grē ne ne nac ne zha ne rliładz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaan tib zho. ²⁷ Zha bgui ne na ptsieelnialegaa, grielod gni naa guiaan tib zho; sca mbannie zho tseeel

zho; per tel zha ne gard ctsieelniaw, mazd sobd guic zho ctsieelnia zho. ²⁸ Zha ne racladz pagaa ctsieelnia, zigtaa nguiv zigtaa wnaaw, led dold ga gun zho telne laa zho ctsieelnia; per gacnañ zho ganle, zeene laa zho pcatsieel-le, ib tedsod nroob guielnë ne gan zho por grë mine noyac len dze rii.

²⁹ Mine none guien to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole tsieel, mazd sac zho zho zig tib zha ne guien d tsieel. ³⁰ Zha ne quianie dimiw, zha ne no guielbleya, zha ne nogaa guielnëw, gdeete zho diidz yca grë ncuuan co lo zho par gun zho xtsiin me. ³¹ Zha ne bienle runfalte grëtaa ncuuane rquiin zho, gdeete zho diidz ctse grë ncuuan co lo zho, sac zigtaa guidzliuw, zigtaa grë ncuuane no low, zdzin dze ne nitlow.

³² Mine racladz naa peet zhgab ctсед lo to. Golwi ganle, zha bgui ne tib, tiblrique zienie guic zho run zho mine rdziladz Dios, mine nac xtsiin me.

³³ Laa zha ne no tsieel, grielodraa sca gac zho, sac laa guic zho zienie zha gbannie zho tsieel zho, zha grielo gun zho mine rdziladz me, min co rionieraa guic zho. ³⁴ Scaque grë men wnaa, zha ne tib, rioxcoraa zho run zho mine rdziladz Dios, dib nacse zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tsieel zho, dien zha grielo gun zho mine rdziladz tsieel zho, xco co rioraa zho.

³⁵ Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grielo zaacse gac to gun to mine rnabey Dios. ³⁶ Zha ne quianie wnaa nguieg, telne rzac zho nonguielda ga scase ted lo xquielnguieg xpëed zho, sinque none ctsieelnia zho, peet nacda, led dold ga ctsieelnia zho. ³⁷ Laa telne rzacгаа zho, wenraaw ctsieelniad xpëdwanaa zho, ible scale pquiabladz zho guiaan mëed, wenaque ga telne sca rzac zho. ³⁸ Wen ga gun zha ne sca gdeed diidz ctsieelnia xpëdwanaa, per mazdraa wen ga gun zha ne rzac mazd ctsieelniad xpëed.

³⁹ Nana, wnaa ne retгаа tsieel, nli zeene mban tsieel zho rnabey ley ne tsieelse zho gbannie zho; per zeene laa tsieel zho ret, zac ctsieelnia zho tel cho stib mgui ne racladz zho, totsaque zha ne noque xnëz Diosa. ⁴⁰ Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidz dse naaw sac rien naa led tibd naa, Espiritu Sant nacie naa.

8

Bëel ne rgogon zho lo mdio

¹ Stib wnabdiidz ne run to ga, dien zha nac guielwagw ne rgogon zho lo grë mdio, pe zrieelo gdiowa, ze grieloda ye. Zootle na grële to nan min co; per no hor zeene squi rzac ne grëlew nan ne, lel racniats ne, laa ne gacndooladz ne gnee ne lo grë zha ne nacgrë ne dien zha gun zho parne tsoguicraa zho Xtiidz Dios. ² Zha ne rzac grëlew rac zho, ga rlu zho ganle peet rien d zho. ³ Tel Dios runbey me tib tib miech, nanpaa me cho nac zha ne rleynie me.

⁴ Zhapaa dzigo gaca, ÷pe wena diow ne xpëel grë ma ne rgogon zho lo mdio ga, te wenda ye? Ndionle ne ganle grë mdio ne riegan miech led Diosd ga, tibaque men ne nac Dios no. ⁵ No zho rzac nziandox Dios, nziandox men rnabey no, no me no gbaa, nogaa me no lo guidzliu, ⁶ sangue ne ndion ne ganle tibaque Dios no, lëe men co nac Pxoz ne, me psan grëtaa ncuuane no, me psan ne parne dziuunbey ne me. Ni scaqueгаа, tibaque men ne rnabey ne, lëe me ga nac Jesús, me bzaa grëtaa ncuuane no, me nac men ne rneedz xquielmban ne. ⁷ Per no zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiin zho

bëel ne rgogon zho lo mdio racchop guic zho, lëëque zha runctal xtol zho ga sca run zho. ⁸ Golguien sca, tel Dios rwid me dien cho pe row. Guiabd ne togo por gow ne o gowdga ne bëel co laa ne guiannziiu lo me.

⁹ Laa to nanle nasca, peet nacda yquiin to guielwagw co, per scagaa golcobey adel min co yquiaaqui gunctal to xtol tib zha ne squi bii racchop guic. ¹⁰ Sac gon, nenda tibiladz to zob to zaatne riegan grë miech mdio noquiin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho.

¹¹ Zha ne sca gun, niicle ne nli rien zho peet nacd ncuane noyun zho ga, per por zha laa zha co gunctal xtol. Gunscade to, golguien ganle ye zho ga psilaa Jesús zeene gut me lo cruz; ¹² gacxe waa, telne sca gun to por to yquiaaqui gun zho tib ncuane rzac zho nonguield, lole Jesús ga quaiyun to falt. ¹³ Min co nagon, tel naa mazd maase gowd naa bëel co, telne por min co yquiaaqui gunctal naa xtol tib zha ne nole xnëz Dios; sac lëda ga gun naa gac naa zig tib quie ne griel ni zho.

9

Mine rieguial zha ne run xtsiin Dios

¹ Zigne nagon zac gun to grë ncuane wen ne racladz to, scaquegaa naa, zac gnab naa ncuane wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiedz me. Ne squi ptsëe Dios lo xquielmban to zeene bialseed naa to, i rlu ganle me nacie naa.

² No zha ne rzac nlid Dios pxeel naa, sanque to nanwen to ganle me pxeel naa, sac gonlo to mine ben naa, mine blu naa; ni scagaa niina, lo xquielmban to i rlu ganle ne nli xtsiin me quaiyun naa. ³ Grë zha ne sca rzac nlid Dios pxeel naa, rzac zho peet raguiald naa, gacnan zho ganle: ⁴ jRaguial naaw gon! Ni grëragaa zha ne rdziungza no xtsiin Dios, rioguial no gneedz to ncuane yquiin no, gneedz to zaatne gbiaaz no. ⁵ Tel naa, haxta raguial yquianie naa tib men wnaa ne gac tsiel naa, ine sënie naa me zigne run grëraa zha ne rdziungza no dziin rii, zig nac Pedr, zig nacgaa grë zha bets men ne rnabey ne. ⁶ jTe loxaque grop no Bernabé naye znu zhaaque no dziuun no stib dziin, par gdziniaa no ncuane dioow no? ⁷ Golgan ganle, zig nac zha ne rzëeb lo xtsiin menguiib, jniacxe zhaa lo dziin ne rdziniaa zho ncuane row zho rio zho lo xtsiin menguiib? jZha ne rangaa, niacxe rieguiald zho yquiin zho ncuane rac zaatne ran zho? jZha ne na rangaa ma, niacxe rieguiald zho yquiin zho ma zigne racladz zho?

⁸ Guiabde to togo bod guicse naa riab mine rne naa nu, golgan ganle haxta lo ley ne psan Moisés ⁹ no tib zaatne rnee: “Zeene gunçun to xcon to dziin gzeeni ma mzion zhobxtil gacmbew, code to guix ro ma, golsaan gow ma mine ygaa ro ma.” Golwi ganle zha rnee Dios, nana pe nan to ngonse rquia zdoo me. ¹⁰ Lëda gon, grëse ne rquia zdoo me ne. Ga rlu me ganle, zha ne run xtsiin me, ible rieguial zho ycaa zho mine non xtsiin zho. Zig nacaque guielgon, zigta zha ne rana, zigtagaa zha ne runmbe grë guielzaac co, ible rieguial zho yquiin zhow. ¹¹ Tel no, rrieequia nazho tib gon i bdziuun no biadseed no to Xtiedz Dios, jniacxe rioguiald no dzigo gneedz to ncuane yquiin no?

¹² Blalaa zha ne nale griin riaadted lo to i, rnabey zho to rdeed to ncuane rquiin zho, jpe lel no dzigo rioguiald gnaba lo to? Mazdraa gon rioguial no gnab now, per haxta lo nazde gard dziuun no min co, notaa nan zha rdziniaa no ncuane rdioow no; zeena guiaand zdoo to, lozh ga laa to csaan mine nac

Xtiidz Dios. ¹³ Led nanle to ganle, grë zha ne run dziin len xyadoo Dios, psan me diidz grë ncuane nac gon, ga xen zho pe yquiin zho, zig nac zha ne run dziin zaatne nac lo pcoog, lo ncuane rielogon miech ga, ga rdioob ncuane row zho. ¹⁴ Ni scaquegaa psan Jesús diidz, zha ne cseed miech Xtiidz me, ib none lo dziin co gdziniiaa zho pe yquiin zho. ¹⁵ Per tel naa gon, waltaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanaal naa min co, sac rley naa znu quiaayzhd naa quiaayun naa xtsiin Jesús, mazd maase guetgbin naa, ledle ctiche zho guielbley rii lo naa. ¹⁶ Niicle ne znu quiaayzhd naa quiaayun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw! ¹⁷ Noyund naaw par dien pe premio yгаа naa, sac zig rne naa ga Dios bzo naa, me rnabey naa quiaayun naaw, masaque nacse naa zig tib ngundziin. ¹⁸ Par naa, leele premio nu nac guielbley rii ne znu liga quiaaseed naa miech Xtiidz Dios, rnabd naa gneedzpaa zho ncuane yquiin naa niicle ne raguial naa gnab naaw.

Tsoxco zho yгаа zho premio

¹⁹ Stiba mazdragaa wena, znu choot noneedzd ncuane yquiin naa, sac sca grieelod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grëse miech, parne gdeeda diidz tso guic zho sëeb zho xnëz Jesús. ²⁰ Gacxe waa zeene no naa lo grë zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grë zha ne zienal xley zha Israel, niicle ne rnalodraa naa ley, per run naa grë ley ne zienal zho, zeena sca grieeo yquiabladz zho sëeb zho xnëz Jesús. ²¹ Scaquegaa zeene no naa lo grë zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grë ncuane rleyniedraa Dios run naa. Laa naa run min co, zeena ye zho sëeb xnëz Jesús. ²² Grë zha ne pense quiaayacnaa zha nac Xtiidz Dios, zeene no naa lo zho, rund naa gne naa grë ncuane gard guien zho zha nac, rund naa csanwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grieeo gzodiidz naa lo zho cho nac Jesús, zeena gacnaa zho zha sëeb zho xnëz Dios. ²³ Laa naa run min co, parne gdeeda diidz gnee naa Xtiidz Dios grëse lo miech, ni scagaa, gley naa gan naa ye zho yгаа lo guielndzon ne zhobnee lo Xtiidz Dios.

²⁴ Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grëse to goltsoxco xoon to zeena grëse to yгаа tib premio. ²⁵ Grë zha ne sca rio tib lo wguit, par grieeo gun zho gan rioxco zho ran zho xcuerp zho, rund zho ncuane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco yгаа ne tib premio ne gdzind dze nitlo. ²⁶ Gacxe waa, tel naa tibaque noxco naa dien zha xoonraa naa. Nanpaa naa pa gdzin naa, nacd naa zig zha ne riend dien pa gdzin, zha ne lega rquiaagaa puñet, rdeete zhow zaatne no ygaaw. ²⁷ Ni lalnu rdete naa diidz gac mine racladztaa xcuerp naa, tibaque rnabey naaw parne guiena ncuane nonguiel min co none guna, led gunda ncuane racladztaaw. Laa naa run min co zeena gun naa gan, sac gon, guieltodox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

¹ Bets, bzian, golsoladz ganle zha bzhaac grë pxozgol ne zha ne sca bzënie Moisés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie. ² Zigtaa lo xcow cow, zigtaa lo nisdoo cow, masaque rriequia lo co brobnis zho, parne tibaque niac zho niacnie zho Moisés.

³ Grëse zho gon milagr nroob ne been Dios, bnabey me bliaal quietxtil zhan gbaa bdeed me dow zho, ⁴ beencta me nis tib cho quie bdeed me go zho no zho dan bidz co. Lëele Jesús ga bdeed nis co go zho. Lo zho ga zo me, rriequia me ga nac quie ne bda nis go zho, sac mese rzhixcuaa lo grëtaa xliaadz miech. ⁵ Niicle scataa gon Dios zho, per led grëd zho bioxco nion xtiidz me, nacne ndal zho bnitlo bioliuse zho dan co. ⁶ Gase na ganle gotsaa gwi ne zha bzhaac zho, zeëna gzoobladz ne dziuun ne grë ncuane ndzinlid ne been zho. ⁷ Golguien gleyniede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhimdio zho.”

⁸ Gotsaa gwi ne ganle, pe guienë ne bgaa zho zeëne briequia bla zho lega bionie wnaa, tib dzeque bnabey Dios gut galptson mil zho. ¡Ni lanu tsod guic to gun to min co! ⁹ Ib gunglëede to Dios, sac zha, zeëne bengulëe zho me, bnabey me briequia grë meel pquiaa maw zho, ndal zho gut. ¹⁰ Niicle glisquidgaa to tel pe nac mine quiaayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co. ¹¹ Sca nagon bzhaac grë pxoz gol ne ga, gotsaa guien ne sca dziuun ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹² Gacxe waa, zha ne rzac mbanpaa zho zigne racladz Dios, none nsin so zho zeëna gund zho ncuane guntal xtol zho. ¹³ Nli no ncuane rcheep ne guntal ne xtol ne, per nacda ncuane griin rien. Pe zhidaa miech ne zieded lo min co. Tsod mine guiab ne ib lëbd ne grieë ne lo. Mine naca none gnalo ne Dios, sac tel me ib csaand me guiab ne tib lo ncuane glëbd ne grieë ne; sca nac xtiidz me, ni mesi gon ctsëed me mine rnee me. Me nac men ne gacnien ne grieelo grieë ne low.

¹⁴ Bets, bzian, golguien sca ib none csaan to grë mdio, gnalodraa tow. ¹⁵ Miech nixbiini nac to, grë mine rne naa lo to nu, nan to ganle ncuane rquiina. ¹⁶ Golwi ganle, zeëne rdioow ne quietxtil, rdio ne vin, rdziuun ne xtsee ne been Jesús ga, ga rlu tipse nac ne grë ne nacie ne me. ¹⁷ Niicle ne ndal nac ne, per ne tibaque quietxtil ne rdioow ne, min co gane tibaque cuerp nac ne grë ne, ni lëe xcuerp Jesús ga. ¹⁸ Scaque zha Israel, zeëne row zho xpëel ma ne riogon lo Dios, ga rlu zho ne nacie zho me.

¹⁹ Zha ne rnalogaa mdio, zeëne row zho grë ncuane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. ²⁰ Mine racladz naa guien to, zeëne sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëbde to lo grë zha ne quiaayownie mdio, zeëna gacniede to mendox. ²¹ Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieguie to, tsietow to zaatne rownie zho mendox. ²² ¡Gunscaade to, gunglëede to Dios! ¡Golguien ganle, lëbd ne dzian ne xquie!blëe me!

Zha gun zha ne riladzle Jesús

²³ Zig rne naa ga: “Nli zac gun ne ncuane gacladztaa ne, per led grëda nonguiel.” Tel naa, zrieelo gun naa ncuane gacladztaa naa, per led grëda yquiu par gun naa xyudar grëraa zha bets ne, lozh tsoguic zho Xtiidz Dios;

²⁴ sac gon, ib none dzioxco ne grëraa zha ne nacgrë ne. ²⁵ Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend bëel ne biogon lo mdiow, dzigo laa dzeb co tsonie guic to. ²⁶ Golguien ganle, Dios psan guidzliu, scagaa grëtaa ncuane no low chen me naca.

²⁷ Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidz to dien zha naca; zeena peet dzeb tsonied zdo to. ²⁸ Per telne griequia tib zha ne gnë bëel ne biogon lo mdiow, gowde tow; zeena csande to zdo zho. ²⁹ Niicle ne ndionpaa ne led dold ga gun to gow tow, per zha ne gana ga sadol zdo zho.

Nana gnë to: “¿Pe nac dzigo por stib zho grieelod gun naa mine racladz naa? ³⁰ Tel rded naa xquizh lo Dios zeene pe tib guielwagw ne rquiin naa, ¿pe nac dzigo por mine rzacse stib zho, grieelod gow naaw?” ³¹ Golguien ganle, racda por zha cose; sac grëse ncuane dziuun ne, haxta ncuane dioow new, ncuane dio new, none zeene nodziuun new cxobnen ne ganle pa lotaa men nroob nac Dios. ³² Gotsaa guien ne sca ganle dziuun ne ncuane yquiaaqui csan ne zdoos stib miech, zigtaa zha Israela, zha stib guiedza, zha ne nolegaa xnëz Diosa. ³³ Tel naa, zanaid naa ncuane gdziladz naa naase, sinque rioxco naa grëtaa ncuane run naa, run naaw par gacnie naa grëse miech, zeena grielo tso guic zho gnab zho lo Dios csilaa me zho lo xtol zho.

11

¹ Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

² Bets, bzian, rleynie naa to gon sac tibaque rsoladz to naa, ni rioxco to zienal to grë mine pseed naa to. ³ Per golsoladz ganle: grëse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. ⁴ Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. ⁵ Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui. ⁶ Telne racladzdgaa zho gdze lad guic zho, mazd gnabey zho chug guitsguic zho. Laa telne rroladz zho chuga, rroladz zho gacruxa, dzigo mazd cxobguic zho xpay zho.

⁷ Grë zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men nac me; scagaa wnaa, laa wnaa biaan par glu zho ganle non mgui. ⁸ Gotsaa gwi ne ganle, letxe xcuxtid wnaa waa biao mgui, sinque xcuxti mgui briea biao wnaa. ⁹ Stiba, zeene psan Dios wnaa, ib laa me psan zho par gacnie zho mgui. ¹⁰ Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grë anjl ne no gbaa zley zho gan zho min co.

¹¹ Per guiabde to togo peet nond wnaa, golsoladz ganle psanle Dios diidz zigtaa mguiw, zigtaa wnaaw rquiinsa zho; sac telne guiend wnaa guiend mgui, telne guiendgaa mgui guiend wnaa. ¹² Gotsaa gwi ne ganle, zeene biao wnaa cho mgui briea dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho. ¹³ ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguiela ye? ¹⁴ Golwi ganle ib no gdze guic wnaa, biaanle zho rroob guitsguic zho parne ctsew lad guic zho; ¹⁵ tel zha, haxta rleynie zhow zeene scataa noola, sangue ne nac ne zha bgui, guieltow ga guiool guitsguic ne. ¹⁶ Tel nogaa zha ne rzac led scada, maase gnee zho. Per

ible znu gon noseed no miech, ni grëragaa zha ne rliadzle Xtiidz Dios, rien zho ne nli scaw.

Zha none gac xtsee ne psan Jesús

¹⁷ Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, le_l quia_yun_{ct}al to xto_l to. Miñcosi nagon ni lalnu riod zdoo naaw. ¹⁸ Ziyon naa gzobtaa zeene rcaalsa to, pe na tsiegald til_ldiidz to, laa ne tipse gac to le_l rleëlsa to. Ni rgobey naa nli scaw. ¹⁹ Rien naa masaque rzac to ible sca none gac to, parne glupaa cho nac zha ne non xtiidz, zeena guian_nziuu zho lo miech.

²⁰ Led zhixtseedraa Jesús i gon run to. ²¹ Sac ron naa zeene laa to row, masaque lëëlëd rac to row to ncuaa_ne zienie to, ib rwide to no zha ne rdzi_n ga quianied zho nroob ncuaa_ne gow zho. Squi rzob to rowcho to, haxta rzudz to; laa zha mbanse rac zho grieelod gow zho ncuaa_ne row to. ²² ;Mod guie_nd lidz to, ga sob to gow to, guie to haxta zaatne guieltaa to, led node to runctoladz to zha ne squi guie_nd pe yquii_n? I gon rlu to rley_niede to grë zha ne no xnëz Dios. ;Ni palal gon rdziguie_nd naa ncuaa_ne noy_un to i!

²³ Golsoladz ganle zha nac ne laa xtsee rii biaan, Jesús psan diidz gaca, sca gocnan naaw ni scagaa biallu naaw lo to. Wdze ne bnaaz zho Jesús ga, zeene blozh dowxtseenie me xpëëds_cuel me, bzhen me tib guietxtil, bdeed me xquizh lo Dios; ²⁴ blozhse bdeed me xquizh, nzian lë been me guietxtil co, bdeed mew lo zho rëb me: “Golquiina, rrieequia lëë xcuerp naa nu, sac gon znu gun zho xcuerp naa parne csilaa naa to grë to. Golgun xtsee rii, parne glu to ganle tibaque rsoladz to naa.”

²⁵ Blozh ga, scaque bzhen me tib cop no vin, rëb me lo zho: “Lëë stib trat cub nu gon riaan Dios grë me miech, rrieequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz ganle zha naca.”

²⁶ Golguie_n sca, zeene gun_taa to xtsee co zaacse gol_guna, sac gon, ga quiaxobnen to lo miech Jesús nac men ne gut xcuert to, psilaa me to. Tibaque none gun to xtsee co, haxta gdzi_n dze ne laa me guiaad stib.

²⁷ Gacxe waa, zha ne rienewguit guic rquiind zho xtsee co zigne no yquii_n zhow, do_l nroob ga run zho, xcuerp Jesús ga, xchen me ga noguitnie zho.

²⁸ Zeene gun to xtsee co, none wen wen sob to ganle zha naca, pe nacne laaw rac, dzigo lozh ga zac yquii_n tow. ²⁹ Sac gon zha ne lega gow guietxtil co, lega guie zho vin co, sac zhow zig beelze pe xtsee; rrieequia guie_nne ne yгаа zho ga gow zho, guie_nne co ga guie zho. ³⁰ Miñcocxe waa, blactaa zha ne nacgrë to i quia_yaan nsis, nogaa zho rzacnële, haxta nzian zho gutle. ³¹ Telne niaca miñe wen wen gwi ne ganle zha nac xtsee co, tsod pe nacne pe guie_nne ne cxeel Dios dzian ne. ³² Ni zeene scagaa rteed me ne tib caxtigw, laaw run me parne tsaa ne biini gbiire gbig ne lo me, zeena led yed ne nitlo gal dze ne nitlo grëraa miech ne zienal ncuaa_ne lo guidzliu rii. ³³ Bets, bzian, golguie_n sca zeene ycaalsa to gun to xtsee co, golcuëz grëraa zha ne nacgrë to dzigo tipse golsilo golquiina. ³⁴ Tel zha ne riengaa lëbd zho lozh gdzi_n grëraa zha ne nacgrë zho, mazd gowgazh zho lidz zho, zeena yguibd zho yгаа zho guie_nne co.

No spalal miñe racladz naa gacnan to, per naa zeene guial naa nëz qui dzigo gne naaw lo to.

¹ Bets, bzian, nugaa na ganle laa naa gzet zha nac guielbiini ne rneedz Espiritu Sant, sac racladz naa wen wen guien to zha naca. ² Rsoladz to ganle zeene gard gliladz to Xtiidz Dios, nêzrii nêzrec bio to güeygan to stib stib grê mdio, ncuaañe ni tib lan diidz rneed; sangue Dios ne riladz to niina, led scad nac me. ³ Per nsin golso dien cho nac zha ne noteedpaa xtiidz me, sac nzian zha ne rnee xtiidz Espiritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espiritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

⁴ Tib tib zha ne riladz Jesús, zhaase zhaase nac guielbiini ne rga zho, per tibaque men ne rdeeda, lëe men co nac Espiritu Sant. ⁵ Nzian mod zrielo dziuun ne dziin lo Jesús, per grêse ne me rnabey ne. ⁶ Tib tib ne zhaase zhaase mod ne rlu Dios nacie me ne, per grêse ne me nac men ne rlu zha dziuun ne xtsiin me.

⁷ Guielbiini ne rneedz Espiritu Sant lo ne tib tib ne, laaw rneedz me parne dziuunlsa ne xyudar grê zha ne nacgrê ne gacndionraa ne zha racladz Dios.

⁸ No lo zho rdeed me guielbiini rien zho zha cso zho diidz lo miech, no lo zho rdeed me guielbiini rseed zho grê ncuaañe nagan ni rlu zhow lo miech.

⁹ No lo zho rdeed me guielbiini dib zdoo zho rnalo zho Dios, niicle ncuaañe mazdraa nagan rnab zho lo me, raca.

No lo zho rdeed me guielbiini zeene rnab zho lo Dios, riac grê men rzacnê.

¹⁰ No lo zho rdeed me guielbiini rnab zho lo Dios rac grê milagr,

no lo zho rdeed me guielbiini rteed zho xtiidz Dios lo miech,

no lo zho rdeed me guielbiini rien zho cho nac zha ne nlipaa nacie me, cho zhagaa nacie mendox.

No lo zho rdeed me guielbiini rnee zho stib diidz ne gard cseed zho,

no lo zho rdeed me guielbiini rien zho pe rnee zha ne rnee diidz co, dzigo rnee zhow.

¹¹ Grêse guielbiini, Espiritu Sant rdeeda, ni me nan pa mine rneedz me lo ne tib tib ne. ¹² Lo grêse ne ne nac ne zha ne no xnêz Jesús, rrieequia xcuerp me nac ne. Tel cuerp, niicle ne nzian part niaaw, per tibaque naca. ¹³ Ndal miech ne nac xcuerp me, no zho nac zha Israel, no zho nac zha zit, lo grê zho no zho ngadoo lo beñ, nogaa zho zonlaa, per grêse ne tibaque Espiritu ne nacie ne, sac tibaque Espiritu bgaa ne zeene brobnis ne.

¹⁴ Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca. ¹⁵ Gacxe waa telne niaca mine rnee ni ne, grielod guiaba porne nacda nia ne, nacda xcuerp ne. ¹⁶ Scaque diag ne, grielod guiaba porne nacda bziaalo ne led yedraaw nac xcuerp ne. ¹⁷ Sac telne niaca mine gdipse xcuerp ne niaa bziaalo ne, ¿zha nadien gon ne? Telne gdipsegaa xcuerp ne niaa diag ne, ¿zha gzoobzhi ne? ¹⁸ Lëêzhe wen led scad psan Dios xcuerp ne, sinque grêse part ne niaaw bzaa mew zigne gocladz me, psanse mew zaatne rquiina tib tiba. ¹⁹ Sac telne tipse niaa grêse part ne nac xcuerp ne, ¿zhazhe rlu ncuaañ co! ²⁰ Godca sca, sinque zhaase zhaase nac tib tib part co, per grêsew tibaque cuerp naca. ²¹ Gacxe waa grielod guiab bziaalo ne lo nia ne: "Ib rquiind naa luu"; guiabgaa guic ne lo ni ne: "Ni lalnu rquiind naa to." ²² Grêse part ne niaa xcuerp ne nose zaatne rquiina, haxta mine mazdraa nda lëe min co rquinraa.

²³ Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ranraa ne, rioxcora ne rdze; ²⁴ sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non. ²⁵ Sca

niaa xcuerp ne, grëse part ne niaaw rquiinsaw xcompañera; led yeda rtsolsa. ²⁶ Golwi ganle, zeene nē tib part xcuerp ne, grëse part ne niaaraaw zienie nē co; scaquegaa zeene rdioon tib part cō grësew zienie guielbley co.

²⁷ Laa naa rne miñ rii lo to, sac racladz naa guien to sca none tipse gac to. Golguien ganle xcuerp Jesús i nac to grē to, tib tib part ne niaa cuerp co i nac to, rquiinsa to zha ne nacgrē to. ²⁸ Ni zigne sca tib tib part ne niaa cuerp nose zaatne rquiina, scaquegaa grëse zha ne no xnēz me, bzoze Dios zho pe nac dziin ne gun zho:

no zho rienee xtiidz me lo miech,
no zho rteed xtiidz me lo miech,
no zho rseed miech xtiidz me,
no zho rnab lo me rac grē milagr nroob,
no zho rnab lo me riac men rzacnē,
no zho rioxco run xyudar grē miech,
no zho rzo rac zho zha rnabey,
nogaa zho rnee grē diidz ne gard cseed zho.

²⁹ Golgan ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr. ³⁰ Niicle psodgaa me zho grëse zho gnab guiac men rzacnē, grëse zho gnee stib diidz, grësegaa zho gnee zha nac grē diidz co. ³¹ Zhaase zhaase nac guielbiini ne rgaa tib tib zha ne no xnēz me, per goltoxco yгаа to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib miñe mazdraa non lo grē guielbiini rii.

13

Guiełwleynie

¹ Miñe mazdraa rquiin gon nac ne gleynie ne samiech ne. Teł niaca miñe bgaa naa guielbiini rne naa grē lose diidz ne rnee miech, haxta grē diidz ne rnee xanj Dios rne naa, ni teł rleynied naa samiech naa, ĵpa dieñ rquiin rac naa grētaa diidz co? Rrieequia nac naa ga zig tib lē guib ne loxaque rzedz.

² Teł niaca miñe rteed naa xtiidz Dios lo miech, rien naa pe nac miñe naraa cxobnen me, grëse wseed ne no rien naa, ni rleynied naa samiech naa, ĵpaat rquiinda! Teł dib zdoogaa naa rnalo naa Dios, haxta ncuane mazdraa ngan rnab naa run mew, ni rleynied naa samiech naa, ĵpeet nonda!

³ Teł quiizgaa naa grē ncuane quianie naa lo grē zha ne guien pe yquiin, haxta gded naa naa tsec naa, per teł rleynied naa samiech naa, ĵhlēse ga gun naa miñ co!

⁴ Sac gon zha ne nli mban zigne nac guiełwleynie co:

riednied zho samiech zho,
wen rac zho lo samiech zho,
racnēd zdoo zho, niicle ran zho wenraa noded stib miech lo zho,
rund zho ne lēēque zha gunnon zho,
racniatsd zho lo samiech zho,

⁵ rund zho ncuane coguiełnē zho, gunglēēgaa zho samiech zho,
zianałd zho ne tebaa lose zho yquiin grē pe cos,
nacd zho zha ne lega zolēē,
rapguiełnēd zho samiech zho,

⁶ ni lalnu riod zdoo zho miñe run zha ne rsacsi samiech,
miñe rleynie zho nac diidzli.

⁷ Zha ne nli rleynie samiech, ni lalnu peet grieelod yca gleynie zho zho; rquiaadiag zho mine rnee zha co, rzhidznied zho zho; tibaque rquiabladz zho wen grieequia zho, rsaand zho zho, tibaque racnie zho zho.

⁸ Zdzin dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grē guielrac, sangue guielwleynie gdzind dze ne nitlow. ⁹ Niicle ne nogaa ne guielbiini ne rneedz Espiritu Sant, niicle no zha ne rien zha gnee zho Xtiidz Dios lo miech, per palalse nac ncuaa~~ne~~ rien ne niina. ¹⁰ Sangue gal dze ne laa Dios lozh gzhixcuaa ne zigne no gac ne, grēse guielbiini ne rdziaap ne niina, paat yquiindraaw.

¹¹ Masaque nac ne niina zig tib mēēd~~las~~. Tel naa, zeene goc naa mēēd~~las~~ grēse ncuaa~~ne~~ bne naa, grēse ncuaa~~ne~~ bien naa, grēse ncuaa~~ne~~ pseed naa, grēse ncuaa~~ne~~ co ben naaw zigne run grēraa mēēd~~las~~. Per zeene laa naa broob, laa naa b~~iaa~~ biini, grēse ncuaa~~ne~~ co laa naa bienpaa zha naca; laa guielmēēd~~las~~ co bded. ¹² Scadaa nagon rziac ne niina, palalse rien ne zha nac Dios, rrieequia rdzia~~ne~~ ne me niina zigne ran ne zhimlē ne lo beelze pe tib lē vidr; per dzin dze laa ne dzianlo me zigne nacpaa me. Palalse ndion ne niina zha nac me, palalse rsilo rdzia~~ne~~ ne me, per gal dze co laa ne dziunbeypaa me zigne runbey me ne niina, nānpaa me zha nac zdoo ne tib tib ne.

¹³ Golgacna~~ne~~ sca ganle, grē guielbiini co dzin dze ne yquiindraaw, sangue ne znu: dib zdoo ne rnao ne Dios, noniepaa guic ne zac mine rnee me, ni rleynie ne samiech ne, lozhda. Per lo gza tsona nagon, guielwleynie co nac mine gdzind dze ne gdzēē.

14

Zha ne rnee stib diidz

¹ Laa to nanle pa min nac mine mazdraa non, jgolleynie samiech to sca! Per scagaa golnab yгаа to guielbiini ne rneedz Espiritu Sant. Zig nac guielbiini ne rgaa zha ne rteed xtiidz Dios lo miech, golnab yгаа to min co zeena sca grieelo cseed to miech xtiidz me.

² Sac tel zha ne rgaa guielbiini rnee zho stib diidz, zeene rnee zho diidz co choot riend dien pew, sac lo Dios ga rnee zho. Tel pe nac mine rnee zho ga, Espiritu Sant rsiaba guic zho, per choot racnand dien zha naca. ³ Sangue zha ne rgaa guielbiini rteed zho xtiidz Dios lo miech, mine rnee zho ga rquiina par tsoquicraa miech zha racladz me, par guien zho pe nonguiel gun zho, ni rchooblada zdoo zho.

⁴ Tib zha ne sca rnee stib diidz, lose zho rquiin guielbiini co, sac zhase riogicraa zha racladz Dios; sangue zha ne rteed xtiidz me, diidz ne rnee zho rquiina lo grēraa zha ne no xnēz me, grēse zho riogicraa zha racladz me. ⁵ Wena tebaa grēse to yгаа guielbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac min co mazdraa rquin, lēdle gnee to stib diidz. Zaquegaa gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo grēraa zha ne no xnēz Dios. ⁶ Bets, bzian, to gase nadien, tel niaca mine glanso naa lo to i csilo naa gne naa stib diidz, zpa dien yquiina lo to? Per tel glanso naa, ine csilo naa clar gne naa lo to pe nac mine zinee Dios lo naa, pe nac grē mine rien naa, pe nac mine ziaadyob gac, zha nac grē mine zhobnee lo Xtiidz Dios, led grēse min co zien to zha naca, ni squiina lo to grēse to.

⁷ Haxta grē ncuaa~~ne~~ rool miech, zig nac bzie zig nacgaa vihuel, tel csilo zha ne noyoola tel zhataa gool zhow, zha dien guien miech pa di noyool zho? ⁸ Zig nacgaa zha ne rcuedz cornet lo menquiib, telne tel zhataa ycuedz zhow, zha dien gacna~~ne~~ menquiib pe nac vis ne quia~~ne~~ zho? ⁹ Scadaa nagon

run to zeene rnee to stib diidz lo miech, ¿zha nadien guien zho pe nonee to? Rrieequia lo mese ga rnee to. ¹⁰ Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. ¹¹ Telne guiaad tib zho lo naa csilo zho gnee zho, ni rien d naa pe quianee zho, grieelod guien naa pe racladz zho, guien gaa zho zha rzaac naa.

¹² Nana sca, zha ne rquiabladz yгаа guielbiini ne rneedz Espiritu Sant, gnab zho yгаа zho mine grielo yquini lo grëraa zha ne nacgrë zho, zeena grë zho tsoguc zha racladz Dios gban zho. ¹³ Gacxe nagon waa, zha ne rneele stib diidz, none gnab zho gdeed Espiritu Sant guielbiini lo zho guien zho pe nac grë diidz co, parne gnee zhow lo miech; ¹⁴ sac zha ne sca rnee stib diidz, tel so zho gnab zho lo Dios, rien d zho pe nonab zho, loxaque zhiespirituse zho quianee ga. ¹⁵ Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, mine riengaa grëraa miech. ¹⁶ Sac gon tel stib diidz nonee ne noyoolnie ne Dios, nodeed ne xquizh lo me, ¿zha dien yquiab grëraa zha ne ndxie ni rien d zho pe rnee ne? ¹⁷ Niicle ne ndzon sca nodeed ne xquizh lo Dios, per zha ne noquiaadiaga ga, paat yquinda lo zho.

¹⁸ Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i, ¹⁹ per zeene zo naa zaatne ndxie grë zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine guien zho, lëdle so naa gne naa tsii mil diidz, ncuaane ni tib choot guien d.

²⁰ Bets, bzian, golguien sca golsaan guielmëedlas qui. Zacgaa gac to mëedlas per nëz lo guielntseeba, sangue xpensar to golgac zig zha ne bïaa biinile.

²¹ Gotsaa gwi ne ganle zha nac stib diidz. Zhobnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guien d zhow. ²² Gase naganle rlu rquiind stib diidz co par grë zha ne rnalole Dios, sinque laaw rquiin parne grë zha ne nod xnëz me gan zho ganle nli no me. Zha ne nole xnëz me, zha co rquiin gon zho pe nac mine racladz me gacnan zho, pe nac mine zhobnee lo Xtiidz me. ²³ Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëëtaa mine guiab zho rzhinle guic to sca rac to. ²⁴ Laa telne grëse to no noteed to xtiidz me, nonee to mine racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa mine nonee to, haxta zïaa zho biini zien zho ne nli tib miech ngoopdol nac zho. ²⁵ Zigse quianee to laa zdoo zho lozh yguudz, laa zho ted yquitsgzhïb zho gnab zho perdon lo Dios; ga guien zho ganle ne nli nacie me to.

²⁶ Bets, bzian, golguien sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Dios, zha ne gnee stib diidza, zha ne gneegaa zha nac diidz co, none tsienee guic zho mine gun zho ga laaw yquini parne tsogucraa los demas zho zha racladz Dios gban zho. ²⁷ Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co. ²⁸ Laa telne guien d zha ne grielo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho mine nonee zho. Telne lëëtaque nonee tib zho, ni csïaab Dios guic stib zho gnee, dzigo none cuëz zha ne quianelee ga zeena grielo gnee zha co. ³¹ Sca none gaca, none tibga tibga

zho gnee, zeena grëse zha ne ndxie grielo gon zho dien pew, parne cseed zho, ni gacnguieelraa zho lo Xtiidz Dios.

³² Zha ne sca rteed xtiidz Dios, none cseed zho gnabey zho zho, cuëz zho nieeda gdziñ hor ne gnee zho. ³³ Sac tel Dios, rdziladz me guiots gnaaz pe cos, rdziladz me ncuane nzhiitni. Miñe rdziladz me zaacse gac tib cos, ni scagaa run grëraa zha ne no xnëz me.

³⁴ Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho gnee, sac gon mguì rnabey zigne zhubneeque lo Xtiidz Dios. ³⁵ Ncuane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios. ³⁶ Zaacse sca golgac, golguien ganle grielod gun to miñe notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷ Miñe rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guielbiini ne nneedz Espiritu Sant, zha co gunbey ganle nli miñe rnabey mew. ³⁸ Zha ne gliladzgaaw, maase gliladz zhow.

³⁹ Sca nagon naca. ³⁹ Goltsoxco sca yгаа to guielbiini cteed to xtiidz Dios lo miech, zeena gacnan zho zha racladz Dios gban zho; per scagaa, ib ycade to tel cho zha ne rnee stib diidz. ⁴⁰ Per zigne rne naa ga, grëse miñe gun to none zaacse gun tow, tib tiba gacsew hor ne rieguiala.

15

Brieëban Jesús

¹ Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa riladz tow. ² Lëew rlu zha grielo ycaania Dios to, totsaque nli dib zdoo to bliladz tow, ni bii lëëgaaw rnalo to.

³ Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhubneesew lo Xtiidz Dios. ⁴ Gocnan to ganle zeene goc tson ngbidz pqueets zho me laa me brieëban, zigne raquietaquew lo Xtiidz Dios. ⁵ Len dze ne brieëbanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho. ⁶ Güey me güeyted me zaatne ndxie ndziibsrää gaay gayoo zha ne nole xnëz me, grëse zho gon me; ndal zha co bii mban niina. ⁷ Bded ga gonaque Santiagw me, ni biire güey me lo zha ne bzënie me ga stib; ⁸ goc palal tiempa, lega naclew haxta lo naa brieëquia me. Tel naa gon, rrieëquia nac naa zig tib mëëd ne rzamëëd, ⁹ lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grë zha ne gloopaa bzëëb xnëz Dios. ¹⁰ Per xquizh Dios tibaque noxco me naa, bzooblo me naa gane laa naa nac miñe nac naa niina. Ni led zhlëdgaa bzooblo me naa, sac gon nroobraa xtsiin me noyun naa lo miñe noyun grëraa poxtl; per rned naa togo naase quiaayuna, sinque me noyacnie naa rrieelo noyun naaw.

¹¹ Laa naa rzet min rii, per nacda par glu dien cho nroobraa noyun xtsiin me, sac miñe mazdraa non nac ne noseed no miech Xtiidz me; lëew biadseed no to, ni bliladzgaaw tow.

¹² Nana sca, racladz naa gnë to dien zha nacne no bla to i rnee nlid griëëban mengut; led wen wen name gocnan to brieëban Jesús. ¹³ Telne rnee to nlid grielo griëëban mengut, rrieëquia gon rnee to ga nlid brieëban Jesús. ¹⁴ Nana telne brieëband me, paat rquiind miñe dzigo noseed no miech nu,

zhlēse znu noteed-xtse ne rnalo ne Dios. ¹⁵⁻¹⁶ Rrieequia noquidiee no miech, sac gon tibaque rnee no lo zho bleeban Dios Jesús; ni telne nli rrieeband mengut, ye Jesús dzigo bii noliu me niina. ¹⁷ Stiba, telne nliid brieeban me, zhlēse dzigo rnalo to me ycaania me to; telne nliid brieeban me, scase bii zēēb to grē xtoł to. ¹⁸ Grē zha ne bliladz me, zha ne nacle mengut niina, lēē bnitlole zho ga dzigo. ¹⁹ Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰ Per gacnan to sca ganle, ¡brieeban Jesús! Me nac men ne glopaa brieeban lo grēraa miech guizhiu ne grieeban. ²¹ Grēse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús biaad, por mine been me grēse mengut laa zho none grieeban. ²² Zigne grēse miech ret porne ziaad zho lo xtií Adán, scaquegaa grēse zha ne gbig lo Jesús, zгаа zho tib guielmban ndzon. ²³ Ible sca none gaca, ndion ne ganle laa Jesús brieebanle, ni zeene laa me guiaad, grē zha ne no xnēz me laa zho grieeban. ²⁴ Gał dze co laa me lozh gnitlo mendox ni grēraa ma ne nacie ma, dzigo laa me csañ grēse miech ne no xnēz me lадznia Dios men ne nac Pxož me; dze cotaa nagon laa Dios gun guielwxtis. ²⁵⁻²⁶ Sac ible Jesús nonabey haxta gdziñ dze co, zeene laa me gnitlo grēse meyožh ne rlēē lo me; zig nac guielgut, lēēw nac mine lultm gnitlo me. ²⁷ Zigne zhozneque lo Xtiidz Dios, lадznia me biaan grētaa ncuaane no; per guiabd ne togo ye Dios no lадznia me, sac gon Dios nac men ne bdeeda lo me. ²⁸ Gacxe waa, zeene gał dze ne laa me sca lozh gnitlo grē zha ne rlēē lo me, Pxož me nac men ne gnabey lo me; sac gon men co gocnie me been me gan, ni men co nac men ne rnabey.

²⁹ Nana, ne rnee to i nliid rrieeban mengut, ¿pe nac dzigo no zha ne rrobnis xcuent zha ne gutle? ³⁰ Telne niaca mine nliid grieeban mengut, ¿pe nac nadien znu gzataa dze quiabeeladz no no lo grē guielxtseeb? ³¹ Bets, bzian, nligaaw tel naa gon gzataa dze noxtseeb naa lo guielgut; nanle to ganle zeene rne naa rleyne naa to, diidzli rnee naa; scaquegaa niina, mine rnee naa nu diidzliw. ³² Ne nligaa zeene glo bial naa guiedz Efēs nu, ntseeb goc miech rii lo naa, pale grē ma ntseeb. Telne nliid grieeban mengut, zhlēse dzigo nodeed naa grē min co; mazd tel zhataa dzigo gban ne, zigne rēbaque diidz ne rēb: “¡Golgotasaa diow ne, golgotasaa dio ne, benque guielgutse quiambiaaz ne!”

³³ Per lēda ga gon. Zha ne zianał min co, ib yquiaadiagde to xtiidz zho, zeena gacde to zigne nac zho; zigne zēēbaque diidz: “Telne ndzinliid miech ne ctsieelsa luu, zdziñ dze ne gac luu zigne nac zho.” ³⁴ Golquix biini sca, gunctaldras to xtoł to; pe rtoladzde to, gołwi ganle no bla to i gard sēēb xnēz Jesús, haxta ni riend zho zhapaa nac Dios.

Zha grieeban mengut

³⁵ Nana, no to gnē: “¿Per zha grieeban mengut? ¿Zhazhe nac cuerp ne grieebannie zho?” ³⁶ ¡Aque nxen wnaabdiidz co! ¿Pe rande to zig nac grē midz ne rio liu rac bni, rlozhse rnitlo midz co dzigo laa guizh ne naca ga rlan? ³⁷ Tel rnee to zha nac cuerp ne grieebannie zho, gołwi ganle zig nac zhoxtil, zig nac grēragaa midz, ¿pe niacxe zigne nacsaw riow liu, scaaque naca rлана? Led zeene laaw rlan, guizhle naca. ³⁸ Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan. ³⁹ Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. ⁴⁰ Grē anjl ne no gbaa, zhaa nac xcuerp zho lo xcuerp

ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. ⁴¹ Gotsaa gwi ne ganle, zig nac xbiini ngbidz zhaa naca lo xbiini mēē, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palaise rlu, nogaa ma roĭ rna. ⁴² Scadaa nagon, zhaa rlu cuerp ne rap miech niina, ni zhaagaa glu mine yгаа zho zeene laa zho grieeban. Cuerp ne rdziaap ne niina, ncuaane tib rded naca, sangue cuerp ne grieebannie ne gal dze co, led yedraa min co nitlo. ⁴³ Mban nac cuerp rii, sac rzacnēw, reta; sangue cuerp ne grieebannie ne, tib cuerp ne gdzind dze nitlo gaca. Lega zozhidz cuerp rii, sangue cuerp co tib cuerp ndip ndaan gaca. ⁴⁴ Cuerp ne rdziaap ne niina, tib cuerp ngoopdoĭ naca, sangue cuerp ne grieebannie ne, min co gac tib cuerp ne gban zigne racladzpaa Dios. Sac zigne znu no cuerp ne rquiin lo guielmban rii, scaquegaa no mine yquiin stib lo guielmban ne gneedz Dios.

⁴⁵ Golĭsoladz ganle, rnee lo Xtiidz Dios Adán goc miech ne glopaa biaan ni Dios nac men ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech. ⁴⁶ Scaque nagon, glo rгаа ne cuerp ngoopdoĭ ne rdziaap ne niina, dzigoraa yгаа ne cuerp ne gban zigne racladzpaa Dios. ⁴⁷ Gotsaa gwi ne ganle, zeene biaan Adán yudiese bzaa Dios me; sangue Jesús, men gbaa nac me. ⁴⁸ Grēse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gaple tib cuerp zigne nac xcuerp me. ⁴⁹ Masaque nac ne niina zigne goc Adán, ni scaquegaa zdziñ dze ne glu ne zigne rlu Jesús. ⁵⁰ Golgacnañ sca ganle, cuerp ne rdziaap ne lo guidzliu rii, grieeled gdziña zaatne rnabey Dios; sac rdziñ dze ne rnitlow, grieeled gaca tib cuerp ne guete.

⁵¹ Wen wen golzoobdiag mine gne naa lo to nu ganle, waltaa choot gard gacnaña: Grēse ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stseē Dios xcuerp ne. ⁵² Znuse gac min co zig nacse zeene riab tib belye; lēē min co gac lultm vult ne ycuedz xanjĭ Dios zhitrompet zho. Zeene sedz trompet co, hor co grēse zha gut, laa zho grieebannie tib cuerp ne gdzindraa dze nitlo; scagaa grē zha ne bii zomban, hor co laa xcuerp zho gdzēē. ĩGrēse ne dziaap tib cuerp cub! ⁵³ Ible sca none gaca, ĩb none gdzēē xcuerp ne gaca tib cuerp ne xiñd, tib cuerp ne gdzindraa dze nitlo. ⁵⁴ Zeene gac min co, ga grieequia mine raquiet lo Xtiidz Dios zaatne rnee: “Nasi laa guielgut bnitlo, guielmbanle nac mine rnabey. ⁵⁵ Ah guielguta, ĩyoraa na zeene scataa psaci luu? ĩYoraa zeene scataa gonc dip xtiidz luu?” ⁵⁶ Grieeledraa pe gun guielgut ne hor co, sac led yedraa hor co tso doĭ, led yedraa hor co gnabey ley; sac por doĭ gane rrieelo rsaci guielgut ne niina, ni por ley rlu pe nac xtoĭ ne. ⁵⁷ ĩXquizh xquielnzaac Dios pxeel me Jesús, sac gon por Jesús zrieelo griee ne lадznia guielgut!

⁵⁸ Bets, bzian, ne nac to zha ne rleynie naa, golguien sca tibaque dziits golso lo Xtiidz Dios; zig zie dze goltsocoraa golgun xtsiin me, benque nanle to ganle, grēse xtsiin me mine rdziuuñ ne nacda ncuaane zhlēse.

16

Gon ne guey Jerusalén

¹ Laa zig nac gon ne noyaclo guey gac xyudar grēraa zha ne no xnēz Jesús Jerusalén, laa naa rso diidz lo to zigne psoque naa diidz lo zha Galás.

² Teĭ palal run to gan tib leñ zhmal, lo co golcob mine ral zdoo to gdeed to gac gon co; gzobse dze goltsiesana lo zha ne noyunlow. Adeĭ na ganle haxta

glansoraa naa i, dzigoraa no to dien zha topa. ³ Ni golzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; ⁴ ni tel rquiinpagaa ye naa ga, dzigo na maase ga naa ganie naa zho.

⁵ Len dze rii no guic naa gateed naa nêz Macedon, dzigo gale grie naa glanso naa lo to i. ⁶ Nend zbêz naa lo to i palal dze, togo iquegaa teed naa len mēe nal ne ziaad; ni racladz naa zeene gbi naa i, siguiel to gun to xyudar naa tel pa nêz ne no ga naa len dze co. ⁷ Telne zneedz Dios diidz cuêz naa lo to grê len dze co, zbêz naa, sac racladz naa tib gualteed naa lo to i. ⁸⁻⁹ Niina ne no naa Efés nu, len dze riipaa rlu ndal miech ne no liaadz ycaania Xtiidz Dios, gane zbêz naa nu haxta ted lni Pentecostés. Nligaa ndal zha ne no liaadz co, per scagaa ndalogue zha ne rtsidila.

¹⁰ Nacle diidz laa Timoté guiaad i; tel nan d new naraa guiaad me, gol siguiel zeene glanso me zaacse golcaania me, zaacse golcuêzlo me, zeena tsonley zdoo me; golgan ganle, ye me quiayun xtsiin men ne rnabey ne. ¹¹ Golguien csanwinde to me, sinque golgap me respet; zeena zeene glanso me lo naa nêz rii ine nley gac me csoladz me zha biaadted me lo to i. Laa naa quiambêz glanso me nêz rii, gza me zha ne guiaadnalraa zhits me.

¹² Sanguê bets ne Apol, blactaa bnab naa lo me niaadgza me zha ne ziaad i niaadgan me to, per rzac me grieeloda niina. Rien naa zeene gdeedtaaw diidz, ible ziaad me ziaadgan me to.

¹³ Bets, bzian, nsin golso, tibaque golnalo Dios. Ib ctsēede to xtiidz to, tibaque golsoxco tsienal to mine rnabey me. ¹⁴ Ncuaañe guntaa to, golconie guic to gun tow porne rleynie to Dios, porne rleyniegaa to samiech to.

¹⁵⁻¹⁶ Laa naa rso diidz lo to, niowse gon golgac lo grê zha bets ne, zha ne run xyudar to i; zig nac Stef grê menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nêz Gres i grê menlidz me; ni desde dze co laa me pquiabladz tibaque squi quiayun me xyudar grêraa zha ne no xnêz Jesús. ¹⁷ Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grêle lo to ga gon naa. ¹⁸ Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

¹⁹ Grêse zha ne no xnêz Jesús nêz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grêraa zha ne rcaalsa lidz zho rieseed Xtiidz Dios, grê zho laa zho rxeel bdiuzh lo to. ²⁰ Scagaa grê zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzsa, golcaania zhibdiuzh no.

²¹ Nu laa naa cso schop lan xtidz naa lo to, ni golwi ganle naazhal yquiaw: ²² Grêse zha ne gon nêd gleyniepaa Jesús, miech ndziibdeele ga nac zho. ¡Ni ile gon ziaad me! ²³ Mese nac men ne gacnien to, me nac men ne no zhixco to, sac ne nligaa rleynie me to.

²⁴ Niicle naaw rleynie naa to, sac gon tibaque nac ne ngab ne lo me. ¡Lēed bii gdzieel ne sca!

Pabl

BROP GUITTS NE PXEEL PABL LO ZHA CORINT

¡Diuzh to grëse to!

¹ Naa nac Pabl, grop no bets ne Timoté, laa no rquia stib guits rii rxeel no guiedz Corinth. Nanle to ganle Dios bzo naa, pxeel me naa none naa Xtíidz Ndzon Jesús lo miech.

Laa w ziaad lo to i, grëse to ne nac to zha ne ngab xnëz Dios; zigtaa tow, zigtaa grëragaa zha ne no dib nëz Gres iw.

² Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctebde to.

³ Bets, bzian, gologtsaa gwi ne ganle, jzha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne ⁴ lo grëtaa guielnë ne rdieed ne. Ni laa me rchoobladz zdoo ne gon, zeena scagaa grëraa zha ne rdzian ne no guielnë, mban rac zho, guio ne guiochoobladz ne zdoo zho zigne rchoobladzaque me zdoo ne.

⁵ Zig nac niina, nroob guielnë ne nodieed no loxaque ne riladz no Jesús, per scaquegaa ib rsaand me no tibaque nochoobladz me zdoo no. ⁶⁻⁷ Laa no nodzian grë guielnë rii, sacne noxco no nonee no lo miech zha laa zho lo dol, parne scagaa grielo cchoobladz no zdoo to. Lo grë guielnë rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdziñ dze ne laa to gan grë guielnë ne nodzian no nu niina. Ni me gon nac men ne gacniën to glëb to gan tow.

⁸ Bets, bzian, tel niaca mine nian to ganle zha nactaa grë guielnë nroob ne bdieed no zeene no no nëz Asia. Ne nligaa nroob psacsi zho no, ncuuane lëbdraa no lo grë guielnë co, tibaque rdzieets no bod gataa niet no. ⁹ Masaque bzhaac no len dze co zig rzac tib zha ne nole guet, laa zho quiambëzse gal hor ne guet zho. Garaa bdziñ no peet grieelod dziuun no ne nose, sinque Dios none gnalo no, mese zac csilaa no lo grëtaa guielnë; sac tel me, haxta mengut rbeeban me.

¹⁰ Ni nligaa bleee me no lo guielnë co, bla me no lo guielgut co; ni ndion no scaque zla me no lo grëraa guielxtseeb ne dzian no, ¹¹ totsaque gacnie to no tibaque gnab to lo me gacniën me no. Zeena, tibaque gac ne grëse ne gdeed ne xquizh lo me.

¹² Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now, sinque ne nquialadz Dios no gane quiayacniën me no znu mban no. ¹³ Grë mine rnee no lo guits ne zixeel no lo to, niapse diidzliw, ni mine rgobey no grielo guien to min co rquiaa no; gane racladz naa gdziñ dze ne guien tow. ¹⁴ Nli runbeydppaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

¹⁵⁻¹⁶ Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialteedaque naa lo to i stib; zeena niac chop vult ne nionley zdoo to. Lozh ga, ine niowse nzonëz to naa nia naa nëz Judë. ¹⁷ Ni pasëe naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoo zho nanppaa zho gund zhow. ¹⁸ Dios zobwi ganle rdziuunscad no. Mine rnee no, rdziuun now.

¹⁹ Golgaṅ gaṅle, zigtaa naaw, zigtaa Silvana, zigtagaa Timotéw, no biadseed to cho nac Jesús, meṅ ne nac Xpëéd Dios; ni zig nac Jesús, rquidied me. Grëse miṅe rnee me ruṅ mew, ²⁰ ni grëse miṅe psan Dios diidz guṅ me, grësew noyūṅ mew; gane niicle nogaaw rnee no lo miech gaṅle ible ruṅ me miṅe rnee me, ga rlu gaṅle pa lotaa meṅ nroob nac me. ²¹ Ni lëé Dios co goṅ nozhixcuuaa lo xquieṅmban ne, laa ne ngab xnëz Jesús niina; me bzooblo no nonee no Xtiidz me. ²² Haxta pxeel me Espíritu Sant zdoo ne, rrieequia bloobey me ne ga, par glu gaṅle lo me ngab ne, ni ible zгаа ne grëtaa guieṅnzaac ne bneele me gneedz me lo ne.

²³ Me zobwi, me nan gaṅle pe nacne gard guaiṅ naa. Gard goṅ guaiṅ naa, per por tow; sac rquia zdoo naa to, racladzd naa loxaque guaiṅquiago naa to i, lozh ga mban gac to. ²⁴ Guiabde to sca togo bod racladzd no guiaad no. Nli rquiindraa to guiadnee no lo to zha gliladz to Dios, sac dib zdoole to rililadz to me; per laa no racladz iṅe guiaadlonley no zdoo to i. Golguieṅ sca, miṅ co racladz no, racladzd no guiaadloguieṅnë no to.

2

¹ Miṅ co nagon bend naa ne nial naa, ² sac nonguieṅda ga coguieṅnë naa to, ni to nac zha ne rgonley zdoo naa. ³ Ne racladzdaxe naa miṅ co waa, gane pxel naa tib guits co lo to glo, zeena nzhixcuuaale lo guieṅto ne nobee to i, zeene laa naa nlanso. Sac tel lega nlansose naa, laa ne ndzio ne guieṅbley, lel guieṅnë ndzio ne. Ni nan to gaṅle, tipse nac guieṅbley ne rdziaap ne; çniacxe zrieelo nley gac to telne ran to mban rac naa?

⁴ Tel gan to gaṅle zeene pxel naa guits co, iṅe nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxel naaw par noguieṅnë naa to; sinque laaw pxel naa, zeena xixcuuaaniob lo ncuuaṅe ndzinlid ne noyac i; ni laa naa beṅ miṅ co sacne rquia zdoo naa to. ⁵ Zeene bin naa zha nac dol ne noyūṅ zha co i, zig rne naa ga: bio naa guieṅnë; per rien naa mazdraa nroob bio to guieṅnë. ⁶ Nana gon, ne squi laa to pteedle zho tib caxtigw, jlëëlew ga na! ⁷ Golguiaaṅladz miṅe been zho ga, golneewen lo zho stib, golchoobladz zdoo zho zeena gacmband zho. Sac telne csaanladz to zho, nend scase lozh guiuu zho lo xquieṅnë zho. ⁸ Rnab naa lo to, golleynie zho stib, zigne rleynieque to zho glo.

⁹ Ni stiba, laa naa pxel guits co lo to, zeena dien pe zon to diidz guṅ to miṅe rne naa lo to ga. ¹⁰ Golguiaaṅladz miṅe been zha co sca, tel naa laa naa biaanladzlew. Jesús zobwi gaṅle laa naa benle zho perdon, zeena gbiire zaacse gac to; ¹¹ ni scagaa gleyd mendox guṅgüet ma ne. Led nanle to gaṅle, zombëzle ma dien zha gnitnëz ma ne.

Tibaque noxco Pabl cseed miech Xtiidz Dios

¹² Bdëd ga nagon dzigo bia naa guiedz Troas. Zeene bdzin naa ga, ne nligaa bneedz Dios diidz niuṅ naa xtsiin me ga. ¹³ Nac diidz ga ndzieelo naa bets ne Tit, per zeene gon naa bdzin me, biotiblidraa guic naa. Nacne brique naa ga bia naa nëz xtan zha Macedon, biaguib naa me.

¹⁴ Per, jxquizh xquieṅnzaac Dios! Sac zaatne ziotaa no, Jesús ner lo no, me rlu gaṅle rdziuuṅ no gan lo grëtaa ncuuaṅe rca. Tibaque rnee no lo miech gacnan zho gaṅle cho nac me, sca quiaxobneṅ no Xtiidz me, zig rzëbɫlaa tib ncuuaṅe nex rlaa. ¹⁵ Haxta no, masaque nac no lo Dios zig tib ncuuaṅe sca nex rlaa; sca nac no lo me sacne laa no ngable lo Jesús. Nëzrii nëzrec nex zëbɫlaa gox co, zigtaa lo grë zha ne ngable xnëz Diosa, zigtagaa lo grë zha ne zie nëz ne nitlow. ¹⁶ Par grë zha ne nole nëz ne nitlo, masaque rzac zho no zig tib gox

ne nguid rlaa, haxta rsoladz zho pe nac guielgut ne quiambëz zho; sangue grë zha ne nole xnëz Dios, rzac zho no zig tib gox nex ne runcsoladz zho guielmban ndzon ne no yгаа zho. ÿNi led chold zha ne gon grieelo gun dziin rii! ¹⁷ Nu rquiin zha ne dib zdoo rquiabladz gun dziin lo Dios, glu zho ne nli Dios pxeel zho, ne nli Jesús nacie zho. Sac no zha ne, loxaque rquiaalo zho ye zho rseed miech Xtiiid Dios, per laa zho runa par cuee zho dimi.

3

¹ Nana ne znu rne naa, guiab to bod yeque no rdziuun zig run zha ne sca rquidie ga, lëëque zha runnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziuunnon no no, niicle peet diidz rquiindгаа no. ² Led yed no rquiin pe diidz ne dzeey no, to rlu cho nac no. Grëse miech ne gan zha notsëe Dios lo xquielmban to, gase gunbey zho no, ga glu pe nac dziin ne rdziuun no. ³ Gane rrieequia nac to zig tib diidz ne quialu ganle cho nac no. Jesús zhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne nguiamban. Ni pquiindгаа me pe lo guits ne nquiaa mew, sinque laa me pquiaaw zdoo to.

⁴ Ni ndionpaa no nli scaw, sac Dios zhal rluw, ne nac no zha ne ngab lo Jesús. ⁵ Per guiabd ne togo nose rrieele rdziuun grë miñe rdziuun no, led scada, Dios nac men ne racniñ no rdziuun now; ⁶ sac me bdixbiini no zha cseed no miech diidz cub ne psañ me. Gane laa no noseed miech niina, per rseete no zho tsienal zho miñe rnabey ley, sinque laa no noseed zho guien zho tsienal zho miñe rnabey Espiritu Sant. Sac tel leya, lëë gdib rnabeya guet grëse miech ngoopdol; sangue Espiritu Sant, laa me rlu zha yгаа zho tib guielmban ndzon.

⁷ Golsoladz ganle, zha blu Dios biini ne nac xquielndzon me zeene pcaania Moisés ley ne rnabey guet grë zha ngoopdol. Biinidoo ne biaan lo Moisés dze co, haxta lëbd lo zha Israel gwi zho lo me, per dzega dzega biu biini co. ⁸ Scaque nagon nolu Dios xquielndzon me, niina ne laa Espiritu Sant nolu zha yгаа miech guielmban; per, ÿmazdraa gon nroob nac guielndzon rii! ⁹ Sac gon, tel scataa blu xquielndzon Dios zeene biaan guet grë zha ngoopdol; mazdraa dzigo nroob nac guielndzon ne rlu niina. ¹⁰ Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina. ¹¹ Ni stiba, bza dze ne been ley co dziin; sangue xtiidz cub me, gdziñd zha ne gdzëew. Gacxe waa, mazdraa nac biini ne ziaadniew.

¹² Ni ne ndionaxe no waa gdziñd dze ne gdzëew, gane tistique laa no noneew lo miech; ¹³ rdziuun no zig been Moisés. Sac tel Moisés, pquia tib lë lar lo me dzigo gond zha Israel zha bnitlo biini ne biaan lo me ga. ¹⁴ Ni rrieequia ye lo grë zha Israel ga sca bdze, gacxe waa, haxta lo nadze riend zho zha zhonee lo Xtiiid Dios, miñe psañ me padzeela. Ible riend zho ne bdedle dze ne pquiin diidz gol co, Jesúsle none gliladz zho niina. Me nac men ne cxal lo zho. ¹⁵ Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdoo zho.

¹⁶ Per tel zha ne csaan grë guielntseeb, dib zdoo zho guien zho cho nac Jesús, ible zlit me lar co lo zho; ¹⁷ sac gon, miech ne naciele zhiEspiritu me, led yedraa zho ngadoo lo ley gol co. Ni ndion ne ganle, meque ga nac Espiritu. ¹⁸ Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuaa zhiEspiritu me lo xquielmban ne, zigse zie dze noluraa me zha nactaa guielndzon ne rap me.

4

¹ Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

² Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuuaane nacdraa Xtiidz me. Me zobwi ganle niapiee diidzli rnee no, niicle grëгаа zha ne rdziuunbey no, nan zho rquidieed no.

³ No grë zha ne ib nëd tsoguic zha nac zhiwseed Dios mine nonee no; sac lëëque grë xtol zho notse lo zho, laa zho zie nëz ne nitlo zho. ⁴ Nëd zho gliladz zhow, sac ible mendox (ma ne nonabey lo guidzliu rii) noyun ncow xquielrien zho; gane rienđ zho ycaania zho Xtiidz Ndzon Jesús, menđ ndzon ne biaadlu ganle zhapaa nac Dios.

⁵ Laa no quiaaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me.

⁶ Ne nligaa tib ngundziin winse nac no! Gołwi ganle Dioszhal, men ne bnabey biaan biini ne rziini guidzliu, me bdixbiini guic no bien no xquielndzon me ga biaadlu Jesús.

Rsaand Dios zha ne dib zdoo rnalo me

⁷ Ne nlipaa, lega nacre no zig nac tib guies yu ne notsow grëtaa ncuuaane ndzon ne zieneedz Dios lo no. Gase na ganle rlu, Dios naccheņa grësew, peet nond no loxaque nose.

⁸ Me nacie no, niicle nroob zhgab ne rio no, per racmband no; niicle nroob nac guielxtseeb ne rdzian no, per choot rdziebd. ⁹ Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib. ¹⁰ Zaatne ziotaa no, quianał miech gut zho no, zigne beenaque zho Jesús; per me rsilaa no ladznia zho. Ga rlu ganle ne men mban nac me, ni me nacie no. ¹¹ Gzataa dze noxtseeb no gut miech no, loxaque ne rdziuun no xtsiin me; per ga rdeeda diidz rlu no ganle pa lotaa nacie me no, niicle ne tib lëse ben nac no. ¹² Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to. ¹³ Niicle nagon ne znutaa noxtseeb no, per ndionpaa no me quianap no, gane rdzieebd no noseed no miech Xtiidz me; zig zhoobneeque lo Xtiidz me, zaatne rnee: "Bliladz naa mine rnee me, gane rne naaw." ¹⁴ Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdzinnie Jesús ne lo me.

¹⁵ Grëse guielně ne nodzian no, laaw nodzian no sacne nligaa noxco no to; zeena grëse to sëeb xnëz me. Sac telne ndal grë zha ne sëeb xnëz me, scaqueгаа ndal zha ne gdeed xquizh lo me, cxobnen zho pa lotaa men ndzon nac me. ¹⁶ Miñcocxe waa, ib choot riabld. Nli zigse zie dze laa no bii noyoxraa, sangue zhiespíritu no, zigse zie dze laaw rancubraa, laaw riaanmberaa nëz lo Dios. ¹⁷ Ni stiba, niicle ne znutaa nodzian no grë guielně rii, per ncuuaane tib rded naca, led ncuuaane rnada; sac gon, zeene laa no lozh dieed grë min rii, mazdraa nroob nac lo guielndzon ne yгаа no, ni miñcosi gdziindraa dze lozha. ¹⁸ Gacxe waa, choot rdziuuncasd grë ncuuaane quiazian no lo guidzliu rii, sinque laa guic no nonie yгаа no grëtaa guielbley ne no gbaa. Sac grë ncuuaane ran ne niina, ncuuaane tib rded naca; sangue grë ncuuaane gard dzian ne ga, led yedraa min co nitlo.

5

1 Ni ndion ne ganle, zeene laa xcuerp rii ne nitlo, laa Dios gneedz stib miñe gdziñdraa dze nitlo. Masaanse nace xcuerp rii ne zig nac tib yu guizh win ne rběz miech lo wгаа; sangue cuerp ne gneedz me lo ne, rrieequia naca zig tib yu ne gbiaazpaa ne gbaa. 2 ¡Bactaa guielñe ne rdieed ne niina ne rdziaap ne cuerp rii! Gacxe waa, quiambiaazñe ne gdziñ dze ne gneedz me stib cuerp co. 3 Sac gon, led niapdse espíritu gdziñ ga, sinque none gapa cuerp. 4 Ne nligaa, niina ne mbannie ne cuerp rii, zeene ñe nodieed ne, rziaac ne tebaa laa ne mbanniele stib cuerp co. Per par yгаа ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nace ne niina yгаа ne guielmban ndzon co. Sca rziaac ne, sac choot rdziladz guet. 5 Dioszhal bzo ne yгаа ne miñ co, ni ible zaca, sac gon laa me pxeelle Espíritu Sant nacie ne.

6 Teļ ne, miñ co nagon quiambiaaz no; ndionle no laga mbannie no cuerp rii, grieeelod yгаа no miñ co, grieeelod gdziñ no zaatne no Jesús. 7 Nli rdziañd now niina, per dib zdoo no riladz no ib laaw none gac. 8 Gacxe waa, haxta nley rac zdoo no quiambiaaz no gdziñ dze co; rziaac no tebaa laa no brielee leñ cuerp rii, zeena guibannie no Jesús. 9 Miñ co nagon, tibaque noxco no gac no zigne rdziladz me, zigtaa niina ne no no lo guidzliu riw, zigtagaa zeene gdziñ no lo mew. 10 Sac gon, grēse ne zdziñ dze ne laa ne gacredz lo me zaatne gun me guielwxtis. Grēse ne ne nac ne miech, teļ zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne teļ zhataa mbana, ga yгаа ne mine guioquia ne tib tib ne.

11 Miñ rii nagon nonie guic no, gacxe waa noxco no nonee no lo miech zha nac Xtiidz Dios. Ni me nañ ganle dib zdoo no nodziuuñ no dziin rii, ni racladz naa guieñ to ganle sca nac no.

Zaacse golgac lo Dios

12 Grē mine blozh bne naa nu, zig bnele naa ga: nacda par dziuuñnon no no. Laa no rnee grē miñ rii, zeena guieñpaa to ganle cho nac no; ni scagaa, guieñ to zha ctsire to lo xtiidz grē zha ne squi riaad i rlozhd gacniats zho. Teļ zha, laglaase rlu zho miech wen nac zho. 13 Nligaa, dib zdoo no noxco no xtsiñ Dios, laa miech masaque rzac zho riotsle guic no. Nana niicle teļ riotsgaaw, per xtsiñ Dios nodziuuñ no. Sangue no, ndionpaa no riotsd guic no; laa no rdziuuñ grē miñ rii, sacne noxco no cseed to Xtiidz me. 14 Laa no nodziuuñ dziin rii, sacne rleyne no Jesús, maase teļ zhataa rzac miecha.

Ndionpaa no Jesús bgaa guielgut ne nioguial ne; scaquegaa, ndion no niina ne laa no bziaab xněz me, rrieequia gutle no lo grētaa ncuaañe ndzinlid ne bdziuuñ no glo. 15 Gacxe nagon waa, grēse zha ne rzēeb xněz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guieñ zho ganle, me gut bdiizh me xtoļ zho (ni brieēban me), par yгаа zho tib guielmban ndzon ne gdziñd dze lozh.

16 Gotsaa guieñ sca, zha ne nole xněz Dios, ziaacd ne zho zig rzac grēraa miech zho, rzac zho peet nond zho. Teļ naa glo sca bzhaac naa Jesús, masaque bzob naa cholze miech nac me; sangue niina, ndionpaa ne ganle cho nac me. 17 Sac gon, grēse zha ne ne nliipaa dib zdoo riladz Jesús, stible miech nac zho. Grēse teļ zha goc zho glo, laa miñ co bdedle. ¡Ncube nac lo xquielmban zho! 18 Ni loxaque Diosse gon zrieelo sca gunncub miech. Sac gon, me pxeel Xpēed me Jesús biaadtizh grēse xtoļ ne, laa ne biaanwen lo me. Ni scagaa niina, me bzo no znu quiaseed no miech, zeena gacnañ zho zha grieeelo guiaanwen zho lo me. 19 Znu gon naca: Laa Dios nodeed diidz niina guiaanwen miech lo me, gunquizhd me zho teļ pe nactaa xtoļ zho, totsaque

gliladz zho cho nac Jesús. Miñ rii nagon bzo me no nonee no lo miech. ²⁰ Golgan sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguien ganle, rrieequia gon Dioszhal rso diidz rii lo to. ²¹ Sac gon, Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grëse xtol ne, psanwen me ne lo Dios!

6

¹ Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon mine nonee me lo to niina. ² Lo Xtiidz me, no tib zaatne znu zhubnee: Lëetse len dze ne nosilaa naa miech, laa to bnab gacnie naa to. Lëetse len dze ne rdeeda diidz gac mine quiambëz to, laa grë xliaadz to blanso lo naa.

¡Ni lëe dze co nu nagon bdziñ! ¡Nadzegazh quiambëz me gbig miech lo me, zeena csilaa me zho!

³ Dziin rii quiadziun no, choot quiadziun tald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenë zho Dios. ⁴ Zigtaa ncuane rdziun now, zigtaa grëгаа ncuane nodieed now, rlu no ganle ne nli xtsiin me nodziun no. Tel pe nactaa grë guielnë ne nodieed no, tel pe nactaa grë xliaadz no, niicle no zaatne rsacsi miech no, per choot rietede. ⁵ Blactaa zaatne rguin zho no, zaatne rsioogyu zho no, zaatne rriee zho ndal zho racntseeb zho lo no. Blactaa rdib rdzaag no rdziun no dziin, no zaatne rriee zhimcaalo no dipse guieel, no zaatne retgbin no.

⁶ Ne nligaa rdzioxco no ndzinli mban no, choot rietede, wen wen rdziunbey no zha nac Xtiidz Dios, sca ran miech ganle ne nli Dios pxeel no. Dib zdoo no rleynie no samiech no, wen rac no lo zho, zilu no ganle pa lotaa racie Espiritu Sant no.

⁷ Niapse mine nac diidzli min co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziun no dziin. ⁸ Choot rsaand mine pso Dios no nodziun no, maase niicle mine runtaa miech no. No zaatne runnon zho no, nogaa zaatne rzhidznie zho no; no zaatne rneenë zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech. ⁹ Runbeyd miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet. ¹⁰ Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grë guielnzaac ne rgaa miech zeena rnee no lo zho. Rdziaapd no grë ncuane rap grëraa miech, per ncuane rdziaap no, nroob nona.

¹¹ Bets, bzian, ne no to Corint i, laa no rzodiidznie to, laa no rnee lo to grëse zigne rza zdoo no. Ne nligaa rleynie no to. ¹² Telne rzac to gard gacpaa ne tipse, per led nod naca. Tel no rleynie no to, sinque to gon rien no laglaase rleynie no to. ¹³ Ne nligaa peet rqueets naa lo to, laa naa rne lo to zig rnee tib dad lo mëed. ¡Scaquegaa to, golsiguel zaacse golgac!

Zhaa nac biini lo guielcow

¹⁴ Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow. ¹⁵ Sac gon, tel Jesús, ¿niacxe tipse nac me grë me mendox? Scaquegaa grë zha ne nole xnëz mew,

griee lod tipse gac zho grë zha ne no lo dol. ¹⁶ Tel xyadoo Dios, nacda zig nac xyadoo grë mdio. Ni rrieequia gon ne nac xyadoo me, zigne raquiet lo Xtiidz me zaatne rnee:

Na gbannie naa to, ine sënie naa to.

Naa gliladz to, ni scagaa to, lo naa ygab to.

¹⁷ Gacxe waa, rbiire me rnee me:

¡Golriee lad grë zha qui, golbiche lo zho!

Gunde to grë ncuane ndzinlid ne run zho,

golbig lo naa, naa ycaania to.

¹⁸ Naa gac PxoZ to grëse to,

scagaa to, laa to gac xpëed naa.

Lëe xtiidz men ne rnabey to nu.

7

¹ Bets, bzian, gotsaa gwi ne ganle zha nactaa ncuane psan Dios diidz yгаа ne. Gacxe waa, golgotsaa lozh griee ne lo grë zhgab yozh, lo grë ncuane ndzinlid ne runctal xtol ne. None zigue zie dze dzioxcoraa ne gban ne zigne rdziladz me.

² Ne nligaa, zaacse golgac golcaania no stib. Tel pe guielnë ne noded to, tel zha rzac to, to bguiba; zig nac no, choot noquidiede to, choot nosacside to.

³ Guiabde to togo noquiago naa to nu, laa naa nile ganle dib zdoo no rleynie no to. Len ngbidz ne gbantaa no lo guidzliu rii, ib csaand no to. ⁴ Laa naa rne grë min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grë mine nodeed naa, ine riaad tib guielbley zdoo naa; haxta riats naa ne runbey naa to.

⁵ Wlal ne blanso no Macedon nu, ni tib lë notiblid guic no; lala noxtseeb no lo grë zha ne quiana no, lala nonieque to guic no dien yo to. ⁶ Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu, ⁷ blansonie me diidz zaacse pcaania to me. Per nli rley no bdzion ndzinlile mban to, në me bio to guielnë grë len dze ne bded ga, ni në me nonie no guic to, quiambëz to tebaa zha gan niob to lo no stib.

⁸ Zeene pxel naa guits co lo to glo, mban goc zdoo naa sac bien naa ib zgo guielnëw to, sangue niina racmbandraa zdoo naa; sac rien naa niicle ne bio to guielnë tib bla dze, per na laa ncuane co bdedle. ⁹ Gacxe waa rley naa niina, per guiabde to togo rley naa bio to guielnë, sinque rley naa gon naa laa to wbiire wbig lo Dios por guielnë ne bio to ga. Ni sca nagon racladz Dios gon grë zha ne ngab xnëz me zeene runctal zho xtol zho, gane rienpaa naa led psacid no to ga. ¹⁰ Zeene Dios rdeed diidz sca rio miech guielnë, lo guielnë co laa zho rbig lo me rsanmbe me zho lo xtol zho; rsaan zho tel pe nac ncuane ndzinlid ne noyun zho. Zha ne sca rac-wen lo Dios, nodne gacmban zho guiab zho pe nacne bded zho guielnë co. Laa grëraa guielnë ne ran miech, zig nac zha ne nod xnëz Dios, loxaque rlozh runmbana zho, laa zho bi zie nëz ne nitlo zho. ¹¹ Golgan ganle, pa lotaa bzhixcuaa to niina ne bio to guielnë co. Haxta biaa to biini, bioxco to blee to zha co lo dol ne quaiyun zho ga; bien to ganle nonguiela rlisqui naaw. Gacxe waa, zeene gon to pa lotaa nac dol co, güeyniew guic to ni wbinladz to; gon dzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquish to zho mine been zho ga. Wen ne sca been to, ga blu to ganle rdzigiende to dol ne been zho.

¹² Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been dol co no no, zhizhgabpagaa pxoz

zho; sinque laa no pxeela sac tibaque noxco no zaacse gac to. ¹³ Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grëse to zaacse blëzlo to Tit, mazdraa bley no; niicle megaa rley me ne squi niowse gon to me; haxta nguieel rac me niina. ¹⁴ Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to. ¹⁵ Rleynie me to, rzac zdoo me zeene rsoladz me grëse to ndooladz goc to pcaania to me, ni bin to diidz been to mine bnabey me to. ¹⁶ ¡Ne nligaa, rley naa niina bin naa squi zaacse rac to! ¡Nasi, nanpaa naa racnie to naa zigne racnie naa to!

8

Dib zdoo to goldeed gon

¹ Bets, bzian, laa no gzodiidz lo to ganle pa lotaa quiayacnien Dios grë zha ne ngab lo Jesús nëz Macedon nu. ² Nli nroob grë guielnë ne quiayan zho, per nguieel rac zho. Len dze ne bded nu beenlo zho tib gon, niicle ne zhis ncuaañe rap zho, per nroob gon ne beenlo zho. ³ Laa naa rnew lo to, sac naazhal gona. Ne nligaa, dib zdoo zho bleeladz zho grë ncuaañe bloogon zho; ncuaañe rgaataa lo zho laa zho bdeeda. ⁴ Dzigo bnab zho lo no gdeed no diidz ye xgon zho guey lo grë zha ne nacgrë ne, zha ne guien pe yquiiñ. ⁵ Ni lëdsew ga, bzee zdoo no zeene bdzion no blozhse psan zho zho ladznia Dios, laa zho wbig lo no në zho, mine csiaabtaa Dios guic no gnabey no zho, zun zhow. Ni lalnu gon güeyñied guic no gon zho grëtaa min rii.

⁶ Niina ne bdzion no znutaa biabgan zho nëz rii noyunlo zho gon rii, nacne rdzieets no lo Tit siguiel me guiaad me nëz lo to i stib; zeena lozh gunlo to gon ne bnabeyle me to i quiayunlo to. ⁷ Rdziunbey no to: dib zdoo to rnalo to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdoo to goltsoxco golgunlow.

⁸ Laa naa bzet lo to nu zha been zha Macedon, per guiabde to bod nonabey naa to scapaa gon to. Sinque laa naa bzeta lo to, zeena gacnan to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grëraa zha ne nacgrë ne, led loxaque diidzdsew. ⁹ Golwi ganle, zig nac Jesús pa lotaa noxco me ne. Niicle ne me nacchen grëtaa ncuaañe no, per bdeed me diidz goc me zig tib zha ne peet rapd; ga bgaa ne grëtaa guielnzaac ne rap me. Laa me been min co sacne rleynie me ne.

¹⁰ Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclow wdibiz ga, ine nguieel rac to psilo to. ¹¹ Nana sca, zigne psilo to hor co, scaquegaa niina nguieel golgac golsiaal lo dziin co. Golquiabladz tel palaltaa ncuaañe rgaa lo to tib tib to, dib zdoo to goldeeda; ¹² sac zeene dib zdoo miech rquiabladz zho cogon zho, tel palaltaa mine ygaa lo zho, scaania Diosa. Nanle me palal ncuaañe rgaa lo tib tib miech, gnabd me ncuaañe ni quianied zho.

¹³ Sac nacda ne ygad to grëse ncuaañe rap to lo stib zho, lozh ga guiaanmban to; laa zha yquianie grësew. ¹⁴ Led scada. Laa min rii rac, zeena grëse ne lalga ncuaañe yquianie ne. Niina ne rgaaw lo to, goldeed palala yquiiñ grë zha ne rapd nrooba; zdingaa dze na pe gunfalt lo to, dzigo laa zho gneedz tel pe nacgaa ncuaañe quianiede to. Sca none dziunlsa ne xyudar zha ne nacgrë ne, zeena zig rne naa ga: lalga ncuaañe yquianie ne. ¹⁵ Golsoladz ganle, znu rnee lo Xtiidz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

Laa Tit guiaad i stib

¹⁶ Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no. ¹⁷ Zeene bnaab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib. ¹⁸ Nêz rii, no tib bets ne, nroob yudar quiaayun me nogaaz Xtiidz Dios lo miech; zaatne rcaalsataa zha ne no xnêz Dios nu, grêse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i; ¹⁹ ni meque bzooblo zho, sênal zhits no zeene guiosan no gon rii. Nozhal guiosana, sac ne nligaa dib zdoo no noxco no zha gac xyudar grê zha ne guiend pe yquuin. Nu rlu ganle pa lotaa men nroob nac Dios, sac me quiaayacniên ne ne laa dziin rii noyac. ²⁰ Gza no bets co guio, zeena gzadolz zdoo miech guiab zho nend zha lega zhieen no palal gon rii, sac gon nligaa nroob naca. ²¹ Dios zobwi ganle mbe lo no, ni racladz no ye miech gan zho ganle ne nli zha legal nac no. Min co nagon, nacne sca guio no gza no.

²² Rdziunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrê ne.

²³ Tel nannd new cho gnabdiidz lo to dien cho nac Tit, golguiab lo zho tipse nac no grop no me, xyudar naa noyun me quiaaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grê zha ne ne no nêz rii pxeel zho, dib zdoo zho noxco zho mban zho zigne rdziladz Dios.

²⁴ Golguien sca, gza zho zigne ziaad zho lo to i, niowse golcuêzlo zho. Gollu ganle ne nli dib zdoo to rleynie to zho, zigne rleynieque to naa; zeena gacnan grêraa zha ne nacgrê ne nli mine rnee no zeene rzodiidz no lo zho zha nac to.

9

¹ Nanle naa, rquiindpaa gni naa lo to zha gdeed to gon ne gaclo nu gac xyudar grêraa zha ne nacgrê ne, sac laa to noyunlolew. ² Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no nêz Macedon nu, rne naa lo zho: wdibizlaa psilo to nêz Acay i quiaayunlo to gon co. Mincoxe waa, zeene bin zhow, nzian zho pquiabladz laa zho bdeeda. ³ Per laa no rxeel gza bets rii ziaad i, ziaadguncsoladz zho to lozh gunlo niob tow; zeena glu ganle led lega rneed no zha nac to. ⁴ Sac gon guielto ga grieequia naa lo zha rii, tel guialnie naa bla zho i, ni gan zho peet gard gaclo. Nli ziaan naa guielto, per mazdraa gon nac guielto ne guiaan to. ⁵ Min co nagon, ni naa mazd cxel naa zha rii, ziaadnerga zho zeena gun zho xyudar to lozh ycaalsa gon ne pquiabladz to gunlo to ga.

Laa naa rnab lo to, tel pe nac ncuaaane cogon to, dib zdoo to goldeeda. Golguien zha cogon to. ⁶ Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rliis zho. ⁷ Tib tib to sca, golcobey palal ncuaaane gdeed to. Mine gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuaaane rgogon zho, rleynie Dios zho. ⁸ Ni me ne nac me men ne rrieelo rneedz grêse ncuaaane rquuin, me nac men ne gneedz grêtaa ncuaaane yquuin to; ni haxta ziaan mine gdeed to gac xyudar grêraa zha ne nacgrê ne. ⁹ Zigne raquietaque lo Xtiidz me, zaatne rnee: Zha ne nguzobdiidz lo Dios,

dib zdoo zho rgad zho ncuaaane rap zho lo grê zha ne guiend pe yquuin; ni scagaa sëeb diidz ne miech wen nac zho.

¹⁰ Dios gunlay ncuaaane quianie to, ygaaw gdeed to, ni scagaa me gacniên to nroobraa guielnzaac ne yгаа to. Golwi ganle, zha runlay me zha ne ran: Me

psan grëse lo bni ne ran zho, ni meque rchooba; rlozh ga, nroob guieInzaac ne rlis zho, rgaaw row zho.

¹¹ Ne nligaa, Dios nac men ne gunnroob ncuane quanie to, zeena scagaa nrooba cogan to. Golguen ganle, zeene laa no guiosana lo grë zha ne yquiina ga, blactaa gley zho gdeed zho xquizh lo Dios. ¹² Led lega nacdse gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiabladz zho dib zdoo zho gdeed zho xquizh lo Dios.

¹³ Zley zho gan zho grëtaa ncuane cxeel to yquin zho; ni zleynie zho Dios gan zho ron to mine rnabey Xtüidz Jesús. ¹⁴ Haxta dib zdoo zho gnab zho gacnie Dios to, por grëtaa guieInzaac ne gdeed me ga yгаа zho.

¹⁵ ¡Xquizh xquieInzaac Dios, sac gon tel me nroobraa nac guieInzaac ne bneedz me lo ne! ¡Gotsaa gwi ne ganle, haxta Xpëed me bleeladz me!

10

Rieguial gnabey Pabl lo zha Corint

¹ Ziyon naa rnee zho i, zeene zose naa zit nguieex rzë xtidz naa rxel naa; laa zeene zo naa lo to, rdzielad naa pe gne naa. Sangue tel naa, tibaque nac naa, ndooladz rac naa lo to, niice zeen tel pe diidz ne rsogaa naa, ndooladz rne naaw; zig gun Jesús, tel niaca mine mezhah gnee lo to. ² ¡Tebaa gdzind dze pe yquiaaqui glu naa xquieIdox naa lo to! Zha ne squi rzac lalaque nac no grë no grëraa miech, rnee zho mine run miech, mincoque rdziuuñ no, ¡tebaa siguiel zho zaacse gac zho, sac racladz naa tilnie naa zho!

³ Nli miechse nac no, per ib zionald no gacndaan no zigne racndaan grëraa miech guidzliu. ⁴ Sac tel no, choot rnalod grë guieb las ne rnalo zho, sinque laa no rnalo poder ro ne rap Dios; mincosi zrieelo gnitlo grëtaa guieIntseeb ne racladz mendox gac. ⁵ Con poder rii, zrieelo csioog no ro zha ne squitaa lega rnee, zha ne racndaan nëd zho gacnan miech cho nac Dios. Grë zha ne racntseeb lo Dios, con poder rii zrieelo co no guic zho gbiire gbig zho lo me, gac zho tib miech nguzobdiidz lo Jesús. ⁶ Ni poder co yquin no gnee no lo to lozh guien to gban to zigne racladz Jesús; lozh ga, grëragaa zha ne racntseeb, lëëqew yquiin no par gacnan zho ganle zha rieguial gac zho.

⁷ Zha ne rnee i loxaque rzedz yan naa, laglaase ga ran zho, nand zho zhapaa nac naa. Naasi xnëz Jesús no naa; gacxe waa, zha ne rnee xnëz me no zho, none guien zho ganle cho nac naa. ⁸ Nana no to guiab guieIniatle nu, sac rlu naa ne naa rnabey lo to. Per nacda guieIniat, ible Dios bzo naa gnabey naa lo to, ni laa me bzo naa par glu naa zha tsienal to grë mine rnabey me, bzod me naa par yquidiee naa to tsienal to nëz ne nitlo to. ⁹ Golgacnan sca ganle Dios bzo naa, guiabde to togo lega rnese naa par ctseb naa to. ¹⁰ Sac nanle naa no zha ne rnee i: “Gonde to mine rnee men qui. Loxaque lo guits ne rxeel ne squitaa ndox rzë xtiidz me, per loxaque diidza. ¡Zeene zo me lo ne, tib zha yozhsew, per ni rien d me zha gnee me!” ¹¹ Per led scada gon. Niina ne laa naa guial i, laa naa glu lo zho ganle zigne rzë xtidz naa zo naa zit, sca nac naa.

¹² Ib guiabde to, togo ye naa quiayun zigne run zha qui, lëëque lëë zho runniats zho. Tib guieInxen ga, sac gon lëëque zha runnon zho. ¹³ ¡Tel no, choot rdziuuñniatsd no ncuane ni nacd no! Ni zeene rnee no cho nac no, per mine bzo Dios no nodziuuñ no min co rnee no; ni mecxe waa bzo no quiaseed no to.

¹⁴ Ible riogual ne no gnabey lo to, sac gon no glopaa biaad i biadseed no to zha nac Xtüidz Ndzon Jesús; choot noziaabd zaatne rioguald no. ¹⁵ Stiba, rdziladz no gdaannie no xtsiin stib miech. Laa no bii cseed to lozh tsoguic

to zha nac Xtiidz Dios, zeena haxta yele to gun xyudar no ygaazraa Xtiidz me. ¹⁶ Dzigosi nagon laa no guio grëraa guiedz ne ndxie dib nêz qui, guioseed no zho gacnan zho zha laa zho lo dol; per zig rneque naa ga, guiosiaabd no zaatne psilole stib zho, zeena gan miech ganle rdaannied no xtsiin stib zho.

¹⁷ Znu ziaad lo Xtiidz Dios, zaatne rnee: "Zha ne zienie guic xoobnê lê zho por dziin ne run zho, mazd tsoxco zho xoobnê lê Dios." ¹⁸ Sac paat rquiinda ne lêêque ne gunnon ne, miñe mazdraa rquiin nacne Dioszhal glu zha non nac ne.

11

Nlid Dios pxeel zha qui

¹ Laa naa rnab lo to, igolxecw yquiaadiag to miñe gne naa nu, niicle tel no miñe rzac to rquiind! ² Golgacnan ganle, zigne rzac Dios to scaque rzaac naa to, ib racladz naa cho guiaadquidie to. Miñe racladz naa Jesússe gleynie to, zig run wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleynie zho, haxta rdziñ dze ne rtsieelnia zho. ³ Sca none grieequia to lo me; per rdzieeb naa gon nend zha yguib mendox yquuil ma to, gondraa to miñe rnabey Dios, dzigo laa to gac zig rac grëraa miech ndzinlid. Sac gon tel Ev, sca pquuil ma Ev.

⁴ Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetгаа zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo. ⁵ Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrieelo glu naa lo zho ganle peet riend zho. ⁶ Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni ziyanlegaa tow ganle.

⁷ Rzaac naa lêda ga ben naa, zeene bial naa bialseed naa to Xtiidz Dios; sac rsoladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guieInzaac nroob ne rap to niina. ⁸ To rieguial needz ncuuañe nquiin naa, na lel grê zha ne nole xnêz Jesús len dze co, zha co pxeel ncuuañe pquiin naa, rrieequia bla naa xtimi zho ga. ⁹ Niicle bdziñ dze ne peet guiendraa lo naa, per ni tib lo to ib psodziind naa; lêêtaque len dze co biaad bla zha bets ne zha ne ziaad nêz Macedon, zha co biaadnie ncuuañe pquiin naa. Ib peet bnabd naa lo to hor co, ni gdziñdgaa dze ne pe gnab naa. ¹⁰ Ni golgacnan ganle, ib tedsod sodiidz naa grê min rii dib nêz Gres i. Ible zun naaw, led yed naa rquidie, sac gon runbey naa zha nac Xtiidz Jesús. ¹¹ Per guiabde to togo rlëenie naa to, racladz naa csan naa to guielto; sac Dios zobwi ganle rleynie naa to. ¹² Golgacnan sca led scada, sinque laa naa gun min co, zeena csioog naa ro zha ne rlozhd gacniats i, rnee zho ye zho quiayun xtsiin Dios zigne quiazziun now. ¹³ Sangue no, ndion no nlid Dios pxeel zho, lega noquidiese zho to i squi no zho, rquiaalo zho zig nacne nli xtsiin Jesús quiayun zho.

¹⁴ Ni led ncuuañe gzeed zdoos ne ga. Sac ible sca run mendox, no hor rzêeb ma rded naa zig tib xmandad Dios. ¹⁵ Gacxe waa, jzha ne squi run xtsiin ma, mincoque run zho rquiaalo zho rac zho zig cho miech wen, rquidie zho miech! Per dzdiñ dze ne laa zho yгаа guieInêdex ne tsieguial zho, zaatne tsietizh zho grëtaa miñe noyun zho i.

Blactaa ncuuañe zadeed naa

¹⁶ Laa naa rnab lo to nu stib, igolquiaadiag miñe gne naa, niicle tel rzê xtidz naa zig rzê xtiidz zha ne rzhinle guic. Nli lega niats gne naa, per igolxecw gon

tow, sac laa naa gunnon naa zig run grē zha qui. ¹⁷ Led Jesús r nabey znu gne naa, sinque masaque laa naa gun min rii, zig run tib zha ne riotsle guic.

¹⁸ Tel squitaa niats rac zha qui lēēque lēē zho runnon zho, lozhd gool zho lo to dien pe nac ncuane noyun zho; goiquiaadiaggaa mine gne naa nu na ganle:

¹⁹ Conque rzac to name nixbiini to, z zha nac dzigo rdeed to diidz rquiaadiag to ncuane rnee grē zha yozh qui? ²⁰ Pe ib riende to ganle quianabeyzhoole zho to i, quiasacsi zho to, quiaquidie zho to, quiala zho grē ncuane rap to, quiasanwin zho to, ya zig zgap zho lo to? ²¹ Haxta rtoladz naa gon, sac laa ne naa squi nabey to lel zhale squitaa no!

Grē ncuane riats zho i nac zho, ye naa zrieelo sca gunniats naa naa (znu nagon rac zha ne rzhin guic). ²² Telne riats zho rnee zho zha Israel nac zho? Yecxe naa waa zha Israel nac naa. Telne rnee zho lo dii ne bzooblo Dios ga ziaad zho? Ye naa lo dii co zial naa. Telne rnee zho Abraham nac xmengol zho? Men cocxe waa nac xmengol naa. ²³ Telne niats rac zho rnee zho xtsiin Jesús quiaayun zho? Gacnan zho ganle, naasi xtsiinpa me quiaayun naa. Nroob dziin ne ziyun naa, blactaa ncuane zadeed naa, pe zhidaa zigo miech naa ladzguuib, blactaa zineedz dooguid zho naa, blactaa zaatne zadedlaa naa lo guielgut. ²⁴ Gaayle vuelt zisacsi zhiwxtis zha Israel naa, galptsibguieega nia dooguid bneedz zho naa. ²⁵ Tsonle vuelt zineedzyag zho naa, stib vuelt bneedzquie zho naa. Tsonle vuelt zadzieelo naa rdedquie barcw ne no naa len nisdoo; tib vuelt, tib dze tib guieel bzhoobse naa lo nisdoo. ²⁶ Pa lotaa grē dan ne ziya naa. Nzian vuelt ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grē menzit, zaatne bdedlaa naa lo grē menladz naa. Ziyoxtseeb naa lo guielgut, zigtaa zaatne nac len guiedza, zaatne nac dana, zaatne nac lo nisdoo, zigtagaa lo grē zha ne laglaase rquiaalo rliladz Jesús. ²⁷ Blactaa rdib rdzaag naa run naa dziin, blactaa guieel ni niip raaguiesd naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guien d lar ne piix naa. ²⁸ Ni zhaaque tibaque nonie guic naa dien yo to, grēse to ne nac to zha ne nole xnēz Dios, zha no to tib tib guiedz zaatne squi blansole Xtiiidz Dios. ²⁹ Zeene ron naa cho tib to racladz guiaan zdoo, mban rac naa zeene rrieelod gane naa lo zho; zeene rongaa naa cho tib to quiaayunctal xtol stib zho, ni rrieelod galisqui naaw lo zho, scaque mban rac zdoo naa.

³⁰ Grē mine bne naa nu, nacda guielniats; telne rieguialpa gunniats naa naa, mazd gzet naa grē mine rlu ganle peet gacd gun naa naase. ³¹⁻³³ Zig bzhaac naa tib vuelt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenguib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguuib. Per brieelod naaz zho naa, sac grē zha ne nole xnēz Jesús ga, zeene bin zhow dzigo bloo zho naa tib len chicuud pteed zho naa tib ro ventan ne quia cho biedz nroob co. Sca bdeeda diidz briē naa ga, biabd naa ladznia gobernador co.

Ni Dios gon, men ne nac PxoZ Jesús, men ne rieguial dziuunnon ne gzataa dze, me zobwi ganle diidzli rne naa.

12

Racniatsd Pabl

¹ Nanle naa nonguiel da lēēque ne gunniats ne, per laa naa sodiidz lo to ganle zha nac grē ncuane zinabey Dios zilulo lo naa, ni grēgaa mine zinee me lo naa.

²⁻³ Niina rac tsiida iz ga blis Dios naa güeynie me naa gbaa. Nand naa dien pe dib znu naa bia naa, te zhiespírituse naa ye güeynie me; loxaque mese nan dien zha güeynie me naa. Loxaque mine bien naa ne laa naa bia lugar ndzon co, ⁴ ga bin naa grē diidz ndzon ne waltaa gard gon miech, ncuuaane guiend zho zha naca, ni nodgaa diidzbey gne naaw. ⁵ Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grē mine rlu ganle peet gacd gun naa naase. ⁶ Ni tel gacladzga naa gunniats naa naa por mine blozh bzet naa nu, led guiel_{nxend} ga gun naa; sac mine nlipaa goca. Per rund naa min co, sac laa naa racladz tozhal guien cho nac naa, benque ran to ganle zha mban naa, rangaa to zha rne naa.

⁷ Ne nligaa ndzondoo nac grē ncuuaane blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandat mendox psanwin naa, biaan tib yoob xcuerp naa zig nac zeene pe tib guiets nroob ne niaaz naa. ⁸ Tsonle vuelt zinab naa lo Dios ctiche me yoob rii; ⁹ biontaa vuelt në me lo naa: “Bui ganle laa naa nacniele luu, ni min co nac mine rquuinraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacnie zho.” Min co nagon rley naa, sac ne znu nsis rac naa, grēse miech zeene ran zho grētaa ncuuaane rrieelo run naa, rien zho nli Jesús nacnie naa. ¹⁰ Ne nligaa rley naa, sac niicle ne miech gzhe gzhele rac naa, niicle nroob guiel_{ne} ne nodeed naa, niicle rbidzgo miech lo naa, rtsidil zho naa, no hor guiend pe yquuin naa, per rley naa sac laaw nodeed naa porne no naa xnéz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me nacnie naa.

¹¹ jNligaa lega guiel_{nxenle} nu znu rne naa, rac naa zig tib zha ne rzhinle guic! Per to gon rap dol, sac laa ne cxobnen to nli miech wen no, lel zhaa mine noyun to. Nli nacd naa cho zha non, per tsod ncuuaane csanwin grē zha qui naa, niicle ne squitaa rzac zho zha rien nac zho, niicle ne rnee zho Dios pxeel zho. ¹² Golsoladz ganle, zeene bialseed naa to i, blu naa lo to ne nli Dios pxeel naa noteed naa Xtuidz me, blactaa grē ncuuaane bneedz Dios diidz blu naa lo to, blactaa grē milagr, blactaa grē ncuuaane bzee zdoos to gon to. Biod dze ne nieednie naa to. ¹³ Lēese mine bend naa lo to i, nacne nab naa needz to pe nquuin naa; sac grēraa zaatne ziyaseed naa miech, zha rneedz ncuuaane rquuin naa. jGolgun dispensar telne rbinladz guic to min co!

Nonie zha Corint guic Pabl

¹⁴ Laa naa nozhixcuuaale par guialgan naa to stib. Nu gac tson vuelt guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golguien ganle, niicle ne racladzde to, per rrieequia gon mēed nac to lo naa; ni ndion ne ganle, led mēete rieguial gdeed ncuuaane yquuin dad, sinque dad none gdeed ncuuaane yquuin mēed. ¹⁵ Ne nligaa, tib guielbleya lo naa quiateedlo naa to, laa naa noxco guien to zaacse gban to, zeena gdzin to zaatne gneedz Dios cuéz to. Xco co no naa, ib rquiad zdoos naa lozh grē ncuuaane rap naa, o lozhgaa naa lo xco co; maase niicle squi zootne laa ne rleynieraa naa to, lel nozozit to lo naa.

¹⁶ Nanle naa, no bla zha ne rnee i: “Nli peet bnabd me zeene biadseed me ne, per ne squi miech ndzielguic nac me bod no pa stib mod ne riend ne quiaban me ne.” ¹⁷ Nana, zig nac zha ne zixel naa ziyaadgan to i, ¿pe niacxe biaadban zho to? ¿Pe niacxe biaadquidie zho to? ¹⁸ Naa quia bnab naa favor lo Tit biaad me i, ni pxel naa stib zha bets ne biaadgrop me. ¿Pe no pe bnab

zho lo to? Golgacnan ganle nodziuund no min co, sac zigtaa naaw, zigtagaa mew, dib zdoo no nodziuun no dziin rii, choot noquidied miech.

¹⁹ Nana gza zdoo to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grë mine none naa lo to nu, laaw rne naa sacne racladz naa lozh tsoguc to gban to zigne nac Xtiidz Dios. ²⁰ Sac gon, rdziladz naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoo to zeene gan to laa naa glisquiw. Adel gon zeene laa naa glanso i, lel dil no to; zha ne në rac zdoo dien cho stib noded, zha ne nozhixcuaa diidzguizh, zha ne quianeene, zha ne quiayacniats; nend haxta chop tson diile nac to. ²¹ Tel gan naa sca rac to, mbe gon stoldalzne naa to ni haxta siaabguiele në to naa; sac nanle naa ni lalnu rdziladz Dios grë min co. Zig nac grë zha ne squi padzeelale quiayunctal xtol ni rsaand zho grëtaa guielelyozh, grëtaa ncuane ndzinlid ne bii quiayun zho, mbe gon sigoon zho naa.

13

Rso Pabl diidz

¹ Niina nagon ne gac tson vuilt guialgan naa to, tel pe nactaa falt ne cho quiayun i, guiaanda scase. Zigne rnee lo Xtiidz Dios: Tel no chop zho, tson gaa zha ne nanaa zha nac falt co, zha ne beena ga ib none laa zho quizh xfalt zho. Nu rac bion vuilt ne rso naa diidz rii lo to. ² Laaw nile naa lo to lultm vuilt ne bialgan naa to, ni niina laaw rneque naa stib: Grëse zha ne quiayunctal xtol i, zigtaa zha ne padzeelale squi no, zigtagaa zha ne wriin psilow, gacnan zho ganle zeene laa naa glanso i, grëse mine quiayun zho ib tedlaad zho, laa naa gunquizh zhow zigne rieguial zho. ³ Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to. ⁴ Nli nguudz goc me bdeed me diidz pquiaa zho me lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zgaa no tib guielemban ndzon, sacne me nacie no; ni zrieelo gnabey no to sacne rdziaap no xpoder me.

⁵ Nana sca, tozhal golcobey dien zha mban to. Wen wen golcobey dien pe nli dib zdoo to riladz to Jesús. ¿Pe nli mban to zig none gban zha ne riladz me? ¿Pe zig zie dze rienraa to ne me nacie to, me rnabey lo to? ¿Te loxaque diidzse ye nac ne laa to riladz me? ⁶ Sangue no gon, wen wen ndion no zha mban no, ndionpaa no ne lo Jesús ngab no.

⁷ Tibaque rnab no lo Dios cxobnia me guic to zaacse gban to. Ni guiabde to togo par guiannziiu no lo miech gane noxcopaa no zaacse gac to; sinque laa no rdziuuna parne gban to zigne rieguial gban zha ne nli no xnëz Dios. Min co nagon noxco no, niicle tel rzac to lëda nu quiadziuun no. ⁸ Sac tel no, laa no zional gac to miech wen, zha ne zienal mine nac diidzli; choot ziaate par lega gactox no lo to. ⁹ Gacxe waa, tib guielebley nroob ga lo no, telne zhal to znuse xixcuaa to, gac to zha ne nliipaa dib zdoo rleynie Dios; laa ne yquiambëz to guiaadlisqui no grë ncuane noyun to. Laa no racladz gdziin dze ne gac to zigne rdziladz Dios, ni mincogaa quianab no lo me.

¹⁰ Laa naa rso diidz rii lo to lo guits ne rxel naa nu, sacne racladz naa gactox naa lo to zeene laa naa glanso i. Nli Dios bzo naa rnabey naa lo to, ni mine racladzpaa naa nacne lozh tsoguc to zhiwseed me; ib racladz naa yquiaago naa to.

¹¹ Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac,

golchoobladz zdoo zho; ine niowse golban, tipse golgac. Scagaa Dios zley nie me to, ni haxta zacnie me to zeena peet ctsebde to.

¹²⁻¹³ Nana sca, tib tib zha ne nacgrè to golquiaabdiuzh zho, ine golxen nia zho. Grèse zha bets ne, zha bzian ne, zha ne rililadz Jesús nèz rii; laa zho rxeel bdiuzh lo to. Golcaania zhibdiuzh zho.

¹⁴ ¡Dios sca guiaaanne to! Ine nley golgac, golgan ganle pa lotaa rley nie me to. Peet tsienied guic to, Jesús nac men ne noxco grè zhizhgab to; ni scagaa Espiritu Sant gacnie to tibaque tipse gac to.

Pabl

GUTS NE PXEEL PABL LO ZHA GALÁS

¡Diuzh to grëse to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoze me, men ne bleeban me.

² Laa naa rxel tib guts rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grë zha rii laa zho rxeel bdiuzh lo to. ³ Dios men ne nac Pxoze ne, ni Jesús men ndzon ne rnabey, me nac men ne tsoxco grë zhizhgab to, zeena peet tsienied guic to. ⁴ Jesús bdeed xquielmban bdiizh me xtol ne, psilaa me no lo grëtaa guielntseeb ne no lo guidzliu rii, laaw been me zigne gocladzse Dios men ne nac Pxoze me. ⁵ ¡Gotsaa dziuunnon ne Dios sca, ni gdzind dze ne csaan ne dziuunnon ne me! Sca rieguiala.

⁶ Rzee zdoo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne riladz to niina, masaque rzac to na mincogaa csilaa to lo dol. ⁷ Per guienndraa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho ctsëe zho mine nac Xtiidz Ndzon Jesús.

⁸ Grëse zha ne guiaadnie stiblo wseed mine pseete no to, ni gnë zho lëe min co csilaa to lo dol; zha ne sca gon, miech ndziibdeele ga nac zho. Tel chotaa sca gon, niicle tel naazhala, tib anjl ne quietgaa gbaaw, ible zdzibdee Dios zho. ⁹ Bnele naaw lo to, ni na laaw rneque naa stib: Tel cho zha ne guidseed to stiblo wseed mine pseete no to, ni gnë zho lëe min co csilaa to lo dol, ible zdzibdee Dios zho.

¹⁰ Nana gon ne znu rne naa, no to guiab parne guiannziiu naa lo miech gane znu rne naa; per golgacnan ganle, quiguibd naa guiannziiu naa lo miech, sinque laa naa noxco gon naa mine rnabey Dios. ¡Sac telne lelncuaane gleynie miech noxco naa, nlid dzigo xtsiin Jesús ga noyun naa!

Jesús pxeel Pabl gnee Pabl Xtiidz me

¹¹ Bets, bzian, golgacnan sca ganle: Wseed ne nac Xtiidz Ndzon Jesús, mine bialseed naa to, led guicd miech biaba. ¹² Paat biad naa nseed miech naaw, sinque Jesús zhal bneedza lo naa.

¹³ Led nanle to ganle, zha nactaa grë mine ben naa zeene bii no naa lo zhiwseed zha Israel; ptsidil naa grë miech ne no xnëz Jesús, blëenie naa zho, pquiana naa nloozh naa zho. ¹⁴ Bzhoob diidz ne naa nac zha ne pseedraa lo grë menladz naa, zha ne tipse biagrëe naa scuel; naa nac zha ne neer lo zho, sac naa run grëse mine rnabey zhiwseed zha Israel, ni naa rioxcorraa run grëse mine been grë pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzooblola naa gunbey naa Xpëed me; laa me bleextsole naa, niapse porne nquialadz me naa. Zeene bdzin dze co ¹⁶ laa me blu me lo naa, bzo me naa ga naa zaatne ndxie grë miech ne nacdraa zha Israel, gaseed naa zho Xtiidz me mine glu zha laa zho lo dol. Zeene blozh gon naa Xpëed me, biad naa niaguib naa ne goon dien cho nseed naa, ¹⁷ ni niicle biadgaa naa Jerusalén, nianabdiidz naa lo grë zha ne pxeelle me nonee Xtiidz me; sinque laa naa bia nëz Arab, wbirele naa nëz co, dzigora bdziin naa Damasc stib.

¹⁸ Gocle tson iza dzigoraa bia naa Jerusalén, hor coraa beenbey naa Pedr; bléz naa lo me ga tsiin ngbidz. ¹⁹ Gaque beenbey naa Jacob bets Jesús, laa grérraa zha ne pxeel Jesús noyūn xtsiin me, ni tib zho gond naa. ²⁰ Dios zobwi ganle diidzli nac grè miñe rne naa nu, led lega rned naaw.

²¹ Zeene brie naa ga, laa naa bia nêz Siria ni nêz Cilis. ²² Grè zha Judé zha ne nole xnêz Jesús, gard gunbey zho naa len dze co. ²³ Diidz ronse zho rnee zla zha ne nacgrè zho: “Men ne scataa pquianal ne, yele me noseed miech Xtiidz Dios, ni glo scataa gocladz me nitlo mew.” ²⁴ Dzigo rley zho, rdeed zho xquizh lo Dios ne yele naa riladz Jesús.

2

Rcaania zho Pabl

¹ Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. ² Laa naa bia, sac ib Dios blu lo naa ne no ga naa. Dzigo ga pcaalsa no grè no zha ne zo rnabey lo grè zha ne no xnêz Jesús ga, bzodiidz naa lo zho zha noseed naa grè zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquuin dziin ne benle naa, ni miñe quiayungaa naa. ³ Ni nligaa bleiy zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grè zha Israel. ⁴ Per lo zha ne zioobgza no ga, lad co brieequia bla zha ne bnab no Tit bey co, per choot pquiaadiagd xtiidz zho. Nac diidz ye zho riladz Jesús, per nliida; ib blud zho cho nac zho, ngeets bzëeb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuuñ no miñe rnabey ley. ⁵ Per ni palal bdeete no diidz niac miñe rnee zho, laa no racladz guiaannie to Xtiidz Ndzon Jesús miñe rlu zha laa miech lo dol, sac min co nac diidzli.

⁶ Grè zha non ne zo rnabey lo grè zha ne no xnêz Jesús ga (zha non guiab ne, per ndion ne ganle grése ne tibaque nac ne nêz lo Dios) ⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gocnan ganle ne ib Dios bzoo naa gun naa xtsiin me, gaseed naa grè zha ne nacd zha Israel guien zho zha laa zho lo dol; zigne bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lëeque me bzo naa quiaseed naa grè zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grè zha ne riladz Jesús ga, laa zho bien ne ible naa bgaa guieInzaac rii, bneedz Dios dziin rii lo naa. Dzigo rley zho haxta bzhen zho nia no grop no Bernabé, laa no biaan diidz ne zha tsieseed zha Israel, laa no guioseed grè zha ne nacd zha Israel. ¹⁰ Lëese miñe pso zho diidz lo no, dzioxco no dziuuñ no xyudar grè zha ne guieñd pe yquuin; ni nligaa ib nonguiel min co ni laaw noyoxco naa.

Ractox Pabl lo Pedr

¹¹ Laa zeene biaad Pedr Antioquí, dzigo ga nli laa naa goctox lo Pedr; sac ncuane ndzinlidraa quiayun Pedr. ¹² Glo, grése zha ne nacd zha Israel zha ne riladzle Jesús, rzëe Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdzin ga, paséraa Pedr sca tipse niownie zho, laa Pedr bzozit lo zho. Rdzieb Pedr zha ne bdzin ga, sac lëe zha co racladz, grése zha zit ne rzëeb xnêz Jesús ib none tso zho bey ne rio zha Israel. ¹³ Grè zha Israel ne nole xnêz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. ¹⁴ Nacne zeene gon naa sca zianaldraa zho zigne nacpaa wseed ne ziaadnie Xtiidz Dios, squi ndxie grése zha ne rcaalsa ga goctox naa lo Pedr, rep naa: “Luugase name niicle

ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grè zha ne nacd zha Israel, gban zho zigne nac zhiwseed zha Israel?”

Zha rlaa miech lo dol

¹⁵ Golquiaadiaga ganle, tel no desde gol no zha Israel nac no, nacd no zigne nac grèraa miech ngoopdol ne nac stib nacion; ible pseed no grè mine nac xley zha Israel. ¹⁶ Sangue niina laa no ndion ganle, niicle mazdraa gun miech mine nac ley grielod guiaanwen zho lo Dios, sinque zha ne dib zdoo gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoo no, zeena guiaanwen no lo Dios; ni laa no guiaanwen lo me porne dib zdoo no riladz no Jesús, nacda porne dziuun no mine nac ley. Sac gon niicle zha ne tsoxcoraa gun zho grè mine nac ley, grielod guiaanwen zho lo Dios.

¹⁷ Nana ne laa no wbig lo Jesús parne guiaanwen no lo Dios, no zha ne rzac dol ga. Masaque rzac zho xtol no ga rdziuuntal no porne riladz no Jesús, per; led scada gon! ¹⁸ Mazd dol ga gun naa, telne rlozhle rseed naa miech rne naa lo zho ne led leyd nac mine csilaa ne lo dol, ni lozh ga naaque no lozhd tsoxco gun grè mine nac ley. ¹⁹ Sac tel naa, ib brieelod niun naa grè mine rnabey ley, ni zha ne rguiits ley gon ib none guet zho; gane niina masaque rrieequia laa naa gutle. Niina ne laa Jesús gut por grè xtol naa, rrieequia ye naa gutnie me ga, zeena grielo gun naa mine rnabey Dios. ²⁰ Led naadraa nu znu mban, Jesúsle nu mbanie naa, ni guielmban ne mban naa niina, lèè min rii bneedz Dios lo naa porne riladz naa Xpèèd me, meñ ne rquia zdoo naa, meñ ne bleeladz xquielmban ga beet zho me bdiizh me xtol naa. ²¹ Nana, telne niaca mine nli zrieelo guiaanwen ne lo Dios porne gun ne mine nac ley, zhlèse ga dzigo biaadguet Jesús. Golgacnan sca ganle, Jesusse nac meñ ne csañwen ne lo Dios, gacxe waa nonguielda ga csañ ne me tiblad, ni pa lotaa ga pquia zdoo Dios ne.

3

Jesús none gliladz miech

¹ ¡Nadzpaaxnen to nac to zha Galás! ¿Pe goc to, cho biaadgungüet guic to squi rac to? Pe led zeene biadseed no to, wen wen gonañ to cho nac Jesús, ni zha nacne sca beet miech me lo cruz. ² Zhal to golcobe dien, ¿pe ne been to grè mine nac xley zha Israel, laa to bgaa guielbiini chen Espiritu Sant, te ne bliladz to Xtiidz Dios a ye? ³ Pa lotaa gon rdziñ lo xquieln xen to i, conque laa to gonle ganle ne niapse por guielbiini chen Espiritu Sant laa to psilo mban tib guielmban cub, ni na nanaque to tsienal to ley. ⁴ Pe nilipaa rnee to, ¿pe lega scase nazho gon to grè guielné ne pteed miech to, zeene psilo bliladz to Xtiidz Jesús? ⁵ ¡Golzhixcuua guic to! Golguien ganle, laa Dios bneedz zhiEspiritu me lo to, ni laa me noyun grè milagr lo to, per nacda porne run to mine rnabey ley, sinque porne dib zdoo to riladz to Xtiidz mew, mine biadseed no to.

⁶ Zig Abraham, porne dib zdoo me bliladz me xtiidz Dios mine rëb Dios lo me, gane pcaania Dios me zig tib zha ne peet xtol d. ⁷ Golgacnan sca ganle, grèse miech ne dib zdoo gliladz Xtiidz Dios, grèse zha co laa Dios ycaania zho zig xpèèd paa Abraham. ⁸ Ni mine nodziañ ne niina, ib lo Xtiidzle Dios zhozneew, zeene bnee me ne grèse miech ne nacd zha Israel, silaa me zho telne dib zdoo zho gliladz zho me. Lèè min co ga bnee me zeene znu rëb me lo Abraham: “Grèse miech ne ndxie dibdoo lo guidzliu, zha ne dib zdoo gliladz naa zigne riladz luu naa, zunlay naa zho.” ⁹ Gane grèse zha ne dib

zdoos rliiladz Jesús, runlay me zho zigne beenlayaque me Abraham, zeene laa Abraham bliladz me dib zdoos Abraham.

¹⁰ Sangué zha ne rnalo ley ne lëew csilaa zho, laa zho noyac ndziibdeele ga, sac lo Xtiiidz Dios no tib zaatne rnee: “Ndziibdee grë zha ne grieelod guñ grëse zigne nac ley.” ¡Ni tsod zha ne gon grieeo guñ grëse miñe rnabey ley!

¹¹ Gase naganle rlu tsod tib zha ne grieeo guiaanwen lo Dios por guñ zho miñe nac ley; ni laaw zhoneeque lo Xtiiidz Dios zaatne rnee: “Zha ne guiaanwen lo Dios, laa zho guiaanwen porne dib zdoos zho gliladz zho me; ni zha co yгаа tib guielmban ndzon.” ¹² Led yed ley rnab dien cho dib zdoos gliladz; sinque rneew: “Zha ne racladz gban, none guñ zho grëse mine rnabey ley.”

¹³ Miñ co nagon, grëse ne nac ne miech laa ne biabdee, sac brielod mban ne zigne nac ley. Per niina, laa Jesús biaadsilaa ne lo grëtaa dee co, masaque lëe grë dee ne nac ne ga bi me zeene sca pquia me lo cruz; zigne zhoneeque lo Xtiiidz Dios, zaatne rnee: “Miech ndziibdee ga nac grëse zha ne ret rquiangaa zho tib lo yag.” ¹⁴ Ni por miñe sca bded Jesús ga, miñ co niina grëse miech ne nacd zha Israel, zac yгаа zho grëse guielnzaac ne bzeet Dios lo Abraham ga; ni niicle tib tibгаа zha ne ngab lo mew, scaania zho Espiritu Sant, Espiritu ne rëb me cxeel me lo grë zha ne dib zdoos gliladz me.

Zha ne nliipaa nac xpëed Abraham

¹⁵ Bets, bzian, laa naa gzet ncuane rac lo guidzliu rii. Nanle to ganle, zeene laa chop miech run tib trat, rquia miñe rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëe trat co.

¹⁶ Nana gotsaa gwi ne ganle zha been Dios: Psañ me xtiidz me lo Abraham, ni tib lo men ne grieequia lo xtiia Abraham. Raquiete nzian zho, rëbd me: “grë zha xtiia Abraham”, sinque tibaque men ne bzeet me, ni lëe men co ga nac Jesús.

¹⁷ Znu nagon nac miñe quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoos gliladz me; ni ible laa xtiidz co me biaan zig tib trat ne quia lë me lo. Miñ co nagon, grieelod ctsëe ley trat co; zig nac ley, blozhle tap gayoo galptsii iz biaan xtiidz co me zeene laa ley biaad. ¹⁸ Nana, telne por guñ ne mine rnabey ley, laa ne yгаа grë guielnzaac ne bzeet Dios lo zhitrat me gdeed me por tib men ne grieequia lo xtiia Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xtiia Abraham, laa me gneedz guielnzaac co lo ne.

¹⁹ Nana gnë to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho miñe rnabey Dios zho, laaw been dziin laga bdziñ dze ne laa men ne brieequia lo xtiia Abraham ga biaad, men ne bzeet Dios ga zeene psañ me xtiidz me lo Abraham. Ni tel ley, dze ne pcaania zha Israela tib xanjil Dios pxeel me bdeeda lo Moisés, dzigo Moisésle psaña lo menquiedz Israel. ²⁰ Sangué dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anlgaa niaadnie xtiidz me; sinque mezhall biadneew lo Abraham.

¿Pa rquiin ley?

²¹⁻²² Nana gnë to: “¿Zig gocladz dzigo lëe nsiooglo xley Moisés lo trat ne been Dios ga?” ¡Led scada! Sac grieelod yгаа ne guielmban ndzon ne gdziñd dze lozh ga, telne gnalo ne ley; ib grieelod ley csanwena ne nëz lo Dios. Telne niaca miñe nrieeo ley nsilaaw miech lo dol, nod pe nacne dzigo nxeel Dios Xpëed me, biaad me biadbee me miech ladznia dol (sac rnee lo Xtiiidz Dios masaque ngadoo miech lo dol). Jesússe gon zrieeo csilaa miech lo dol, totsaque dib zdoos zho gnalo zho me, mese zrieeo gdeed guielmban ndzon lo zho.

²³ Zeene gard guiaad Jesús ga, laa ley co pquuin pquianapa ne zigne rquianap wxtis zha ne nioogyu, laga bdziñ dze ne laa me biaad. ²⁴ Zig tib ngudziaan ne riaannie mëédwin, sca pquuin ley co lo ne, pseeda ne zha gban ne, ni gacnañ ne cho nac Jesús, men ne csilaa ne lo dol zeene dib zdoo ne giladz ne me. ²⁵ Sangue niina ne laa Jesús biaadle, led ley codraa gnabey ne, ni niicle rquiindragaa pe cseeda ne. ²⁶ Gacxe waa, tel to xpëdle Dios nac to porne dib zdoo to rliladz to Jesús, ²⁷ ni grëse zha ne brobnisle porne no zho xnëz Jesús, laa zho rlu ganle ne Jesúsle nacie zho, ni laa zho zienañ gban zho zig racladz me. ²⁸ Mincoxe nagon waa, grëse ne tibaque nac ne niina, guiendraa ne goon cho nac zha Israel, cho nacгаа zha zit; dien cho nac ngundziin, cho nacгаа zha ne rnabey; goon dien cho nonraa pe nguiv te wnaaw ye; sac grëse zha ne naciele Jesús, tibaque nac zho grë zho. ²⁹ Ga nagon, telne ngable to lo Jesús, dzigosi nli zha xtií Abraham nac to, ni zgaa to grë guielnzaac ne bzeet Dios zeene psañ me xtiidz me lo Abraham.

4

Zha ne nac xpëéd Dios

¹ Golgona ganle, nligaa tib mëédwin lëé, niicle guiaannie win ncuaane rap pxoz win, per lega nace win zig tib ngundziin win ne run xtsiin pxoz win. Niicle chen win grë ncuaan co, per grielod win gnabey wina. ² Laa win riaan ladznia zha ne ran win, zha ne rseed win dien pe nac ncuaane gun win, laga gdziñ dze ne laa win zacle ycaania ncuaane psañ pxoz win.

³ Scadaa nagon bzhiaac ne glo zeene gard guiaad Jesús, rrieequia masaque ngadoo ne lo grë ley co, ni lo grëraa ncuaane rac lo guidzliu rii. ⁴ Laa zeene bdziñ dze ne laa Dios pxeel Xpëéd me Jesús lo guidzliu (tib wnaa bded por xniaa me, bzoob me diidz been me grëse zigne rnabey xley zha Israel), ⁵ laa me biaadsilaa ne, biadbee me ne ladznia ley co, bdiizh me grë xtol ne, zeena ycaania Dios ne gac ne mëéd lo Dios. ⁶ Ni parne glu ganle ne nli xpëédle Dios nac ne, pxeel Dios zhiEspiritu Xpëéd me blëz zdoo ne; gacxe waa niina laa ne rien rnee ne lo me: “¡Papá yeen!” Espiritu co rnee ne Pxoz ne nac me.

⁷ Ga nagon, led yedraa niina nac ne zig cholze cho ngundziin, sinque xpëédle Dios nac ne, ible ye ne ygaa grë guielnzaac ne rap Dios.

Rnee Pabl rnabeydraa ley

⁸ Bets, bzian, gołsoladz ganle, zeene bii gard gunbey to men ne nacpaa Dios, masaque rrieequia ngadoo to lo ncuaane nac zhimdio to hor co, rdib rdzag to run to grë mine rzac to rdziladz grë mdio co. ⁹ Nana, laa to runbeyle Dios, mazd gni naa ganle ledaa Dios runbeyle to, zpe nac dzigo racladz to gbiire tsiegan to, tsiequitsgzhib to lo grë mdio co, gbiire guiab to ladznia grë ncuaane paat rquiind co, gnabeya to? ¹⁰ Rquia to gon run to grë lni, dien pa mëé ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda. ¹¹ ¡Rdziebnie naa to gon! ¡Pe nlipaa zhlëse bialseed naa to, ne squi laa to racladz csaan mine bialne naa lo to!

¹² Bets, bzian, laa naa rnab lo to golban zigne mban naa, tel naa niicle ne zha Israel nac naa per zanałdraa naa mine nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa. ¹³ Led rsoladz to ganle, rzacné naa len dze ne psilo pseed naa to zha laa to lo dol; min co nacie nzianlaa dze blëz naa lo to i. ¹⁴ Niicle ne sca rzacné naa, gondze to naa; laa ne mbix zdoo to nian to xquielguidz naa, znu pquia zdoo to naa, rley to blëzlo to naa pale cho xanjł Dios o Jesúsгаа, tel niica mine mezhala niadseed to. ¹⁵ ¡Ne nlipagaa rleydox

to len dze co! Tel niaca mine niac mbee to bziaalo to, zootle zig mbee tow ngad tow lo naa. ¿Yo grë guielbley co na? ¿Yo ne scataa rleynie to naa len dze co? ¹⁶ Nana, pe rëb to rlëë naa lo to ne znu rne naa mine nacpaa diidzli. ¡Lëda gon!

¹⁷ Golqiaadiaga ganle, grë zha ne gon squi ziadseed to i niina, nli laa zho noxco to per zhaa ncuaañe no guic zho. Laa zho racladz tebaa zha guiaañladz to naa, csaan to grë mine bialseed naa to, zeena gbig to lo zho. ¹⁸ Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i. ¹⁹ ¡Xin, ne nlipagaa gon rdednë naa ran naa squi rac to! Masaque nac guielnë rii lo naa niina, zig tib yooB ne rquia grë men wnaa ne gap mëed. Ni lëë nole naa guielnë rii nu nagon, haxta gdzin dze ne gan naa laa to wbiire wbig lo Jesús stib. ²⁰ Tebaa niaca mine grielo guialzhaal naa lo to i niina, zeena gan naa zha no to, dzigo dien zha gnegaa naa lo to; per na ne znu zit zo naa, nand naa dien pe nacraa ncuaañe noyün to.

²¹ Zha ne racladz gnabey xley zha Israel zho, racladz naa gnë zho dien, ¿pe ib riend zho zha zhoBnee lo guits ne ziaad Xtiidz Dios ²² zaatne raquiet xingan Abraham? Rneew: Chop xingan Abraham, tib mëed co gop wnaa ne nac ngundziin lidz me, laa stib mëed gop wnaa ne nacpaa tsiel me. ²³ Xpëed wnaa ne nac ngundziin ga, laa win goc mëed zig grëraa xpëed miech; sangue mëed ne gop tsiel me ga, laa win gol porne ib Dios rëb ne laa me yquianie win.

²⁴ Lo grop wnaa co, tibga me rlu ganle zha nac grop trat ne been Dios: Mine bzhaac Agar, ga rlu ganle zha nac trat ne been Dios guic gui Sinaí. Grëse zha ne zienal trat co, nac zho zig goc xpëed Agar, ladznia trat co no zho. ²⁵ Gzoob ne Agar nac Gui Sinaí, gui ne riaan nëz Arab; me nac guiedz Jerusalén ne ndxie len dze rii, sac tel grë menguedz Jerusalén, masaque ngundziin nac zho lo ley. ²⁶ Sangue wnaa ne gocpaa tsiel Abraham ga, rrieequia me nac Jerusalén ne no gbaa, zaatne ngab grë zha ne no xnëz Jesús, sac led yedraa grë zha co ngadoo lo ley; ye ne ngab ga, ni gzoob ne lëë xniaa ne ga nac wnaa co. ²⁷ Lëë Jerusalén co ga raquiet lo Xtiidz Dios, zaatne znu rnee: Luu, ne nac luu wnaa ne brieelod niap mëed, bley niina; nguieel goc, nguiedz broptsie lo guielbley qui, luu ne bdzind dze niacnañ luu zha nac yooB mëed. Sac gon ndalraa xpëed wnaa ne brieelod niap mëed, lëdle grë xpëed wnaa ne gop mëed.

²⁸ Bets, bzian, golgacnañ sca ganle, laa ne nacle niina zig Isaac, xpëed tsielpaa Abraham, wnaa ne gacd yquianie mëed ga; sac tel Isaac, ib Dios psan diidz ne laa Isaac gac mëed lo Abraham. ²⁹ Ni zigne sca blëënie xpëed wnaa ngundziin co Isaac, mëed ne Dioszhal psan diidz gal ga; scasaque niina, no zha ne rlëë ran zho zionald ne mine rnabey ley, sinque laa ne zionald dib zdoo ne riladz ne Jesús. ³⁰ Ni nana, led lo Xtiidzaque Dios zhoBnee ganle zha rëb Dios lo Abraham, rëb me: “Wnaa ne nac ngundziin lo luu i, bzonëz me grop xpëed me, nonguield ne ye mëed qui guiaannie ncuaañe csan luu lo xpëed tsiel luu.” ³¹ Gacxe nagon waa, tel ne nacd ne zig xpëed wnaa ngundziin co, sinque laa ne nac zig xpëed tsielpaa Abraham.

5

Dziits golso

¹ Peet lo ngadoodraa ne niina, sac gon laa Jesús biaadsilaale ne, sinque to none dziits so zeena ygadoode to lo xley zha Israel. ² Naa nac Pabl, ni naazhal

rne lo to nu. Golgona sca ganle, telne laa to gdeed diidz tso to xbey zha Israel, nacdiedraa to Jesús ga dzigo. ³ Ni laaw gneque naa lo to nu stib, grése zha bgui ne rio bey co, ib none gun zho grése zigne rnabey ley co. ⁴ Zha ne rzac por gun zho grè mine rnabey xley zha Israel, min co laa Dios csilaa zho lo dol, gacnan zho ganle, lel nozozit zho lo Jesús ga; ygaad zho guielnaac ne yгаа zha ne gnalo Jesús. ⁵ Sangue tel no, ndionpaa no silaa Dios no lo dol, sacne dib zdoo no riladz no Jesús ni nacie Espíritu Sant no. ⁶ Sac zha ne nli nole xnéz Jesús, peet liaadz nodraa zho bey ne rio zha Israel. Mine noxcoraa zho nac ne dib zdoo zho gliladz zho Jesús, ni scagaa grieelo gleynie zho samiech zho.

⁷ ¡Ese tow nli! ¿Pex goc to waa? Zaacse name rac to zeene psilo to bliladz to mine nac diidzli. ¿Cho pquil to ne nédraa to tsienal tow? ⁸ Mine squi nonie guic to i niina, led zhiwseete Dios i, men ne bredz to grieve to lадznia ley. ⁹ Golguien sca, adel ye to sac zig rēb diidz ne rnee: “Niipaxe ncobi waa runcsibe ncob guietxtil.” ¹⁰ Per nanpaa naa, ible men ndzon ne rnabey ne men co gacnie to, zeena csaande to mine nac diidzli; ni zha ne squi racladz gunguet to, tel chotaa nac zho ib tedsod siaabzi Dios zho.

¹¹ Bets, sangue naa tel niaca mine nli ye naa quianabey tso grè zha ne riladz Jesús xbey zha Israel zig quianee zha qui, bod goonzhe ni ctsidildraa zha Israel naa dzigo, glēedraa zho zig rlēētaa zho niina zeene ron zho rne naa zha nacne biaadguet Jesús lo cruz. ¹² Zha ne squi ziaadnabey tsopaa to bey ne rio zha bgui nēz Israel, itebaa mazd ladaque zho yga zho, niicxe gdib nacse zho waa cueniaal zho, led tsod zho noyunneed zho to! ¹³ Bets, golguien ganle ne ygadoodraaxe to lo ley waa, min co nacne biaadsilaa Jesús to. Per guiabde to togo ne laa me psilaale to, laa to gun ncuaane guiaabtaa guic to. Gunscade to, sinque tib tib to golleynie samiech to, ine golgun ncuaane rquuin grè zha ne nacgrè to; ¹⁴ sac niina totsaque gban to zigne rnabey Dios nu: “Bleynie samiech luu zigne rleynieque luu luu”; lēēle grè mine nac ley ga gun to. ¹⁵ Per tel laa ne gleynie to zha ne nacgrè to, lel dil no to, zig run grè ma ne lēēque ma noquiaalaylsa, lēēque ma noyowlsa; dzigo lēēque to gnitlo to ga. ¡Gunscade to!

Zha ne lega mbanse

¹⁶ Gacxe, laa naa rnab lo to: Goltsoxco golban zigne racladz Espíritu Sant, ni me gacniēn to; led tsode to dien zha gun to grè ncuaane ndzinlid ne racladz xcuerp to. ¹⁷ Sac gon grése ncuaan co, rleynied Espíritu Santa. Laa xcuerp ne run ncuaane racladz Espíritu Sant, ni ncuaane racladzgaa Espíritu Sant nēd xcuerp ne gac min co. Gunde to mine racladz xcuerp to sca. ¹⁸ Telne gban to zigne rnabey Espíritu Sant, dzigosi nodraa pe nacne ygadoo to lo xley zha Israel.

¹⁹ Ni miech ne sca run grè ncuaane ndzinlid, ib paat nguetsd zho: rionie zho zha ne led tsieeld zho,

run zho grè ncuaane ndzinlid ne racladztaa xcuerp zho,

²⁰ riegān zho grè mdio,
rnab zho pe sac samiech zho,

rlēēnie zho samiech zho,

rdilnie zho samiech zho,

rzac zho adel cho gale tsieel zho,

rnadse pew laa zho rlēēle,

runctil zho miech,

rguib zho rtso miech,

rbeextso zho dien cho zha ne gacnie zho,

²¹ nē rac zdoo zho ran zho ncuaane quianie stib miech,

rzudz zho,

rcaalsa zho zaatne loxaque rowcho zho, ni run zho grë guilyozh.

Grë ncuuan co run zho ni grëragaa ncuuañe ndzinlid ne sca nac. Laa naa rbire rso diidz lo to, gunde to grë ncuuan co; sac gon grëse miech ngoopdol ne sca rban, grieelod gdziñ zho zaatne rnabey Dios.

²² Sañgue zha ne zienal miñe racladz Espiritu Sant, znu nac zha co:

rleynie zho samiech zho,
tibaque nguieel rac zho,
peet dzeb nonied guic zho,
rxecw zho, rievedniobd zho,
niowse rnee zho lo samiech zho,
niapse ncuuan wen run zho lo samiech zho,
run zho miñe rnee zho gun zho,
²³ miech ndooladz nac zho,
zha rnabey xcuerp zho.

Ni telne gban ne zigne nac grëse miñ rii, ni tib ley noguiitsd ne ga. ²⁴ Grëse miech ne nli xnëzle Jesús no, zieniedraa guic zho gun zho grë ncuuañe ndzinlid ne bzoobladz zho padzeela, grë ncuuañe ndzinlid ne racladznë xcuerp zho, sac rien zho paat rquiind ncuuan co lo zho. ²⁵ Gacxe nagon waa, telne nli mbannie ne guielmban ne rneedz Espiritu Sant, golgotsaa dzion ne miñe rnabey me. ²⁶ Dzigosi gacniatsdraa ne lo samiech ne, tsienaldraa ne dien cho glaaraa guiaan, tso ne në gac zdoo ne gan ne grë ncuuañe rap zho, ncuuañe racgaa zho.

6

None gacnie ne samiech ne

¹ Bets, bzian, telne gan to laa cho tib zha ne nacgrë to noyup pe tib dol, dzigo to ne nac to zha ne nlipaa zienal miñe rnabey Espiritu Sant, to golnee lo zho. Diidz wen, diidz ndooladz golco zdoo zho gbiire xixcuaa guic zho; ni scagaa tib tib to none nsin so to, sac gon adel nenda yeque to sca sac. ² Zeene ran to zha ne mban noded, golgun xyudar zho, golchoobladz zdoo zho, sac gon sca rnabey Jesús gban miech.

³ Tel zha ne rzac zha non nac zho, ni laa zho peet nond zho; lëëque zha noguitnie zho ga. ⁴ Tib tib to, wen wen golguien dien pe quiayun to, telne ncuuañe ndzinliw ine golley, per tsode to glëë zdoo to gan to miñe run stib zho. ⁵ Sac tib tib ne, psode Dios ne pe nac xtiiñ me miñe gun ne.

⁶ Grë zha ne noseed Xtiidz Dios, ib none ncuuañe rgaataa lo zho gdeed zhow yquiiñ zha ne noluw lo zho.

⁷ Tsienie wguite guic to sca, sac gon led yed Dios guiab ne quitnie ne. Tib tib ne, tel pe nac miñe run ne mincoque ctsire me lo ne. ⁸ Zha ne run grë ncuuañe ndzinlid, lëë miñe cueequia zho ga laa zho nitlo. Laa zha ne gun grë miñe rnabey Espiritu Sant, lëë miñe ygaa zho ga nac tib guielmban ndzon ne gdziñd dze lozh. ⁹ Gacxe nagon waa, tibaque gotsaa dzioxco ne dziuun ne ncuuañe ndzinli, ncuuañe rquiin, guieete ne; sac telne sca tibaque dzioxco new, zeene gal dze co laa ne ygaa miñe guioguañe. ¹⁰ Zeene gdeedtaaw diidz sca, golgotsaa dzioxco ne dziuun ne xyudar grëse samiech ne, ni nana zeene zha ne noque xnëz Dios nac zho, mazdraa rieguial dziuun ne xyudar zho.

Rso Pabl diidz

¹¹ ¡Golwi ganle, naazhal pquia nu! ¡Golwi ganle mbee mbee nac letr rii pquia naa rso naa diidz lo to! ¹² Grë zha ne gon squi racladz tsopaa to bey ne rio

zha Israel, laa zho ruṇa zeṇa glëēnied miech zho, zigne rlëēnie zho grë zha ne rseed miech ne ib laa Jesús gut lo cruz, psilaa me grëse miech lo dol.

¹³ Nana, niicxe grë zha ne nole bey co, rundaque zho grë mine rnabey ley; sinque laa zha qui nagon quiaguib tebaa gdeed to diidz tso to bey, zeṇa sca lozhd guiats zho ne zha bnabey to bio to bey. ¹⁴ Sangué tel naa, ib quiaguibd naa ne dien zha gacniats naa, sinque laa naa quiaguib gacnaṇ miech ganle zha nac ne laa Jesús gut lo cruz. Sac tel naa, por grë miṇe bded Jesús ga, grëtaa ncuaaṇe no lo guidzliu laaw psan naa tib lad; ni niicle naagaa, sca rzac grë miech guidzliu naa. ¹⁵ Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque miṇe non nacne ctsëē Dios lo xquieṇmban zho.

¹⁶ Grëse to ne nac to zha ne zianaṇ diidz ne rso naa nu, Dios yquia zdoo to, ni me gacniṇ to ctsebd grë zhgab to; niicle tow ni niicle grëragaa zha ne ngable lo mew.

¹⁷ Bets, bzian, golgacnaṇ sca ganle, ib racladzdraa naa gon pe yquiaaqui gbiire gaquiet miṇe bnele naa lo to nu; sac tel naa, grëtaa mdel ne no xcuerp naa nu, léëlew nac bey ne rlu ganle ne nli lo Jesús ngab naa, ni xtsiin me noyun naa.

¹⁸ Jesús men ndzon ne rnabey ne, me tsoxco grë zhizhgab to. Sca gaca. Pabl

GUILTS NE PXEEL PABL LO ZHA EFÉS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblique laa to rliiladz Jesús.

² Dios men ne nac PxoZ ne, ni Jesús men ndzon ne rnabey, me glu lo to guien to ganle pa lotaa noxco me to, ni me gacnien to ctsebd grë pe zhgab to.

³ ¡Gotsaa dzioolnie ne Dios, PxoZ Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espiritu Sant lo ne niina ne laa ne ngab xnëz Jesús. ⁴ Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtoId, zha ne gban zigne racladz me. ⁵ Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoó me.

⁶ Mincoxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, biaadgunlay me ne. ⁷ Ne nligaa nquialadzdox Dios ne, gane pxeel me Xpëed me bzhiee xchen psilaa me ne lo grë dol ne ngadoo ne, been me ne perdon grë dol co. ⁸ Ni led loxaque mincodse, sinque haxta bneedz me guielrien lo ne, bdixbiini me ne, ⁹ ni bneedz me diidz gocndion ne pe nac mine no zdoó me, mine mese nan, mine nole me gun me. ¹⁰ Sac niina laa ne ndionle: Grëse ncuaañe no gbaa, ncuaañe no guidzliu, tibaque gaca grëw ni Jesús gnabeya grësew; sca gaca zeene laa dze co gdziñ.

¹¹ Grëse ncuaañe bnabeyle Dios no gac, run mew zigne racladz me. Gotsaa gwi ne ganle, glole bzooblo me ne yгаа ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús. ¹² Ni laa me bzooblo ne, zeena ne ne nac ne zha ne glopaa psilo bnalo Jesús, cxobnen ne lo miech ganle pa lotaa men nroob nac me.

¹³ Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo dol, ni bliladz to cho nac Jesús, laa Dios pxeel Espiritu Sant lo to zig tib bey, bey ne rlu lole me ngab to; zigne bneele me glo. ¹⁴ Ne znu pxeel me Espiritu Sant nacie ne, ga rlu ganle ib nli zgaa ne grë mine bneele me gdeed me lo grë zha ne ngab lo me, ni lëe min co yгаа ne zeene gal dze ne laa me blozh psilaa grë zha ne ygab lo me; zeena grë ne gleyinie ne me por squitaa men nroob nac me.

Rnab Pabl guielbiini lo Dios

¹⁵ Zeene goncañ naa ne nlipaa dib zdoó to rliiladz to Jesús, ni ne nli nquialadz to grëraa miech ne no xnëz Dios, ¹⁶⁻¹⁷ rded naa xquizh lo me. Zeene rzodiidznietaa naa me, rsoladz naa to, rnab naa lo me gneedz Espiritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac PxoZ ndzon ne. ¹⁸ Rnab naa lo me quixbiini me guien to ganle zha nactaa grë ncuaañe yгаа to ne laa me bredz to, guien to ganle zha ndzontaa, zha nontaa ncuaañe gdeed me lo grëse miech ne ngab lo me, ¹⁹ ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co ga

blu me ²⁰ zeene bleeban me Jesús bzoob me me cue me gbaa, zaatne rieguial sob me ne nac me men rnabey, ²¹ bzo me me, me rnabey lo grése zha ne rnabey, lo grése zha ne non, ni lo gréragea ncuane no; niicle niinaw, niicle len dze ne naragea guiaada. ²² Grése ncuane notaa, laa Dios psana ladznia me, ni bzo Dios me me rnabey lo grése zha ne no xnéz me. ²³ Sac grése zha ne no xnéz me rriequia xcuerp me ga nac zho, gaxe waa grése zha ne nac cuerp co, zha none cxobnen ganle pa lotaa men nroob nac me. Tel pe lotaaw me nacie zho, sac grétaa ncuane no ladznia me now.

2

Ne noxco Dios miech gane psilaa me zho

¹ Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtol zho, masaque nac to lo Dios hor co zig tib zha ne gutle, ² laa to güeynal niapse gré ncuane ndzinlid ne rac lo guidzliu rii, been to gré mine rnabey ma ne rnabey lo mendox, ma ne rcheep gré zha ne ib néd gon xtiidz Dios.

³ Grése ne sca wban ne glo, bional ne ncuane ndzinlid ne bzoobladztaa ne, bziuuu ne ncuane bdeedtaa guxt xcuerp ngoopdol ne, ncuane biaabtaa guic ne. Ni ne scataa nac ne, ib bioguial ngaa ne lo guielnédox ne cxeel Dios, lo guielné ne noxtseeb gréaa miech niina. ⁴ Per ne nquialadz Dios ne nac ne miech, gane pquia zdoo me ne, ⁵ ni niicle ne rriequia mengutle nac ne ne scataa quiazdiuuu ne gré dol co, per bleeban me ne; lée min co ga been me zeene bleeban me Jesús. Laa me psilaa ne lo guielgut co, niapse por mezhall noxco ne! ⁶ Laa me bleeban ne, zeena ygaa ne guiosiobnie ne Jesús zaatne gnabey Jesús. ⁷ Zigtaa len dze riw, zigtagaa len dze ne ziaadraaw, ga gan miech ganle pa lotaa nquialadz me ne, pa lotaa wen me lo ne, sac pxeel me Jesús biaadsilaa ne. ⁸ Golgan ganle, ne wen me mezhall noxco guiaanwen miech lo me, gane rsilaa me ne lo dol zeene laa ne rliiladz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech, ⁹ racda ne por pe guielwen ne gun zho; zeena gdaannied zho guielwen ne run zho. ¹⁰ Dios nac men ne psan ne, ni niina ne laa ne bziaab xnéz Jesús, laa me bredz ne dziuuu ne gré guielwen ne racladz me, mine bzooblote me ne dziuuu ne.

Grése zha ne ngab lo Jesús, tipse nac zho

¹¹ Golsoladz ganle miech ngoopdol, miech ne ngabd lo Dios, miech beed, sca lè to lo gré zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpa lo Dios). ¹² Len dze co gard ygab to lo Jesús, gard gac to tipse gré to zha Israel, led yede to no lo trat ne biaan Dios gré me zha Israel, nande to gré diidz ne psan me lo zho. Lega laa to mbanse, runbeyde to Dios, ni tib guielnzaac quiambéзде to ygaa to. ¹³ Sangue niina ne laa to bzéeb xnéz Jesús porne bzhiee xchen me psanmbe me to, laa to ngable lo Dios.

¹⁴ Jesús nac men ne psanwen ne gré ne, ptiche me grétaa ncuane pca zaacse ndzianlsa ne; zigtaa zha Israela, zigtagaa zha zita, tubaque been me ne lo me niina. ¹⁵⁻¹⁶ Zeene pquia me lo cruz, gataa ptiche me gré ley ne zianal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho gré zho, ni psanwen me zho néz lo Dios.

¹⁷ Jesús nac men ne biaadnie Xtiidz Ndzon me lo ne grése ne, gocndion ne zha guiaanwen ne néz lo Dios, zigtaa tow ne nac to zha ne zit zo lo Dios glo,

zigtagaa zha Israela ne nac zho zha ne gax zo lo me. ¹⁸ Gane niina, niicle zha Israela, niicle zha zita, zrieelo ygab zho lo Dios men ne nac Pxoze, zeene laa Espiritu Sant gunquien zho none gbig zho lo me. ¹⁹ Gacxe waa, tel to nacdraa to menzit niina, lole Dios ngab to, lal non to, lal nac to grē to grēraa zha ne ngab lo me. ²⁰ Golguien ganle, grēse ne niina gzoob ne nac ne zig tib yu ne noyaa, yu ne psilo grē zha ne pxeel Dios nonee xtiidz me lo miech niina, grē zha ne pxeelga me pteed xtiidz me lo miech padzeela, ni Jesús nac quie ne naaz yu co. ²¹ Grēse zha ne zienal mine rnabey me, rrieequia nosoquiaraa zho yu co ga, haxta guirew gaca tib yadoo ne nlipaa mbe nēz lo Dios. ²² Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbēz Espiritu chen Dios.

3

Pabl nac zha ne güeyseed zha zit

¹ Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, min co gane znu nioogyu naa nu. ² Nanlaxe to ganle ne wen Dios, laa me bzo naa gun naa dziin rii cseed naa grē menzit. ³ Laa me blu lo naa zha nac grē ncuaa ne no guic me gun me, mese nana per laa me blu lo naa zha naca, ni laa palala psilo bzetle naa lo to lo guits rii. ⁴ Zeene glab tow i, dzigo guien to ganle ne nli nan naa zha nac grē mine gun Jesús, mine mese nan. ⁵ Wlaltaa choot miech gocnanda, laa niina laa Dios pxeel zhiEspiritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa grē zha ne pxeel me noteed xtiidz me. ⁶ Ni znu naca: grēse zha zit, zгаа zho guielnzaac ne rēb Dios gdeed me lo grē zha ne ngab lo me, tibaque nac guielnzaac ne yгаа zho grē zho zha Israel. Niicle zha Israela, niicle zha zita, laa Dios quiambēz gdeed me guielnzaac co lo zho, totsaque gliladz zho Xtiidz Ndzon Jesús.

⁷ Niicle ne tib miech peet nond nac naa, per laa Dios bzooblo naa gne naa lo miech gacnan zho mine blozh bzet naa nu, me nacie naa, me nreedz grētaa poder ne rap me parne grielo gun naa dziin rii. ⁸ Ncuaa ne gzee zdoo new! Golwi ganle, naa nac tib zha ne mazdraa peet nond lo grē zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grē zha zit, zeena gacnan zho ganle pe zhistaa grē guielnzaac ne gdeed Jesús lo zho. ⁹ Gne naa lo zho gacnan zho ganle zha nactaa grē mine no guic Dios gun me, mine wlaltaa choot gard gacnan; Dios, men ne bzaa grēse ncuaa ne no. ¹⁰ Nana gnē to: “¿Pe nacie sca been me?” Laa me beena zeena grēse zha non, zha rnabey ne no gbaa, zeene gan zho tipse nac zha Israel grē zho zha zit ngab zho lo me, ga guien grē zha gbaa co ganle zha ndzielguictaa Dios. ¹¹ Sca nac mine no guic me padzeela, ni zeene laa me pxeel Jesús laaw goc. ¹² Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho. ¹³ Laa naa rso diidz lo to sca, niicle ne znutaa quiadeed naa loxaque ne bialseed naa to, gunde to ne minriise laa zdoo to guiaan, sinque golley golwi ganle nu rlu zha nziuu, zha non nac to lo naa.

Nquialadz Jesús miech

¹⁴⁻¹⁵ Zeene rsoladz naa grētaa mine no guic Dios gun me, ni mine beenlegaa me (me ne nac me Dad lo grēse zha ne ngab lo me, niicle lo guidzliu nuw, niicle gbaagaaw); rded naa xquizh lo me. ¹⁶ Ni ne squitaa ndzon, ne squitaa ncuaa ne lozhd nac grētaa guielnzaac ne rap me, laa naa rnab lo me cxeel me zhiEspiritu me gneedz xfuers to dziits so to. ¹⁷ Ni rnab naa lo me tibaque dib

zdoo to gliladz to Jesús, zeena scagaa tibaque gbannie to me, parne guien to ganle pa lotaa nquialadz me to. ¹⁸ Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuuaane grielo ctiix ne, guiab ne lalnuw. ¹⁹ Niicle ne znu nacda ncuuaane grielo guiab ne znu znu naca, per laa naa rnab lo me zig zie dze guienraa to pa lotaa rleynie Jesús to; zeena glu ganle ne nli nacie Dios to.

²⁰ Ni Diossi gon ne nac me men ne ndzon, mazdraa ncuuaane grielo gneedz me lo ne, lëdle mine riab guic ne rnab ne lo me; ni ncuuaane gaca gon, sac me nacie ne. ²¹ Grëse ne ne nac ne zha ne no xnëz Jesús, jtibaque golgotsaa gleynie ne me sca, ne squitaa ndzon me! Sca rieguiala.

4

None tipse gac zha ne rliladz Jesús

¹ Zigne rne naa ga, laa naa nioogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to.

² Golgac tib miech ndooladz, tib miech wen, tib miech nlëëguicd, tib miech ne guieednied samiech sinque ine gleynie to zho. ³ Wenle na ndxie to nina, ni Espiritu Sant nac men ne gacniën to; zeena tibaque squi tipse gac to. ⁴ Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne. ⁵ Tibaque men ndzon ne rnabey ne, tibaque men ne rliladz ne, tibaque wrobnis ne no par grë ne ne dib zdoo ne rliladz ne me; ⁶ tibaque Dios no, me nac Pxoz ne grëse ne, me nac men nroob ne zo lo ne, me racniën ne grëse ne, ni me nacie ne.

⁷ Tipse nac ne, per tib tib ne psoe Jesús ne pe nac dziin ne grielo dziuun ne lo me, zigne gola zdoo me. ⁸ Min rii ga raquiet zaatne znu zhoobnee lo guits ne ziaad Xtüidz Dios:

Blozhse psanwin me grëse zha ne rlëë ran me,
laa me biire zey gbaa stib;

ni psoe me tib tib miech pe nac dziin ne grielo gon zho lo me.

⁹ Golgotsaa gwi ne ganle, Jesús raquiet nu, rneew “biire zey me gbaa stib”, ga rlu ganle tib men ne biet gbaaw biaad me lo guidzliu. ¹⁰ Sac me biet gbaa, ni biire zey me gbaa stib, zeena glu ganle tel pa lotaa zrieelo gdziñ me. ¹¹ Ni mezhal rzo ne tib tib ne pe nac dziin ne dziuun ne; me rzo:

zha ne rxeeł me gnee xtiidz me,

zha ne rxeeł me cteed xtiidz me,

zha ne rienee Xtüidz Ndzon me tib tib lo miech zha laa zho lo dol,

zha ne rteedlo grë zha ne ngab lo me, ni

zha ne rseed zho zha nac Xtüidz Ndzon me.

¹² Laa me run min co, sac laa me racladz grëse zha ne ngab lo me lozh xixcuua lo xquielmban zho, zeena guien zho zha gon zho xtsiin me; ¹³ haxta gdziñ dze ne tibaque mine gliladz ne grë ne, grëse ne dziuunbeyppaa ne men ne nac Xpëed Dios. Laa ne lozh sodziits, haxta gac ne zig me.

¹⁴ Gacdraa ne zig choł cho mëedlas ne beelze pe rliladz; niicxe guiaad grë zha ne guiaadnie stib wseed, zha ndzinlid ne zombëz loxaque dieñ zha gdeeda diidz yquidie zho miech; yquidied zho ne. ¹⁵ Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rrieequia xcuerp me nac ne, me nac guic cuerp co). ¹⁶ Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne

laa ne nodziuun dziin ne pso me ne, zeena xixcuaaraa lo xquielmban ne, ni lozh guien ne zha gleynieraa ne samiech ne.

Guielmban cub ne rneedz Jesús

¹⁷ Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic; ¹⁸ sac tel zha, ncow nac guic zho. Gard yгаа zho guielmban ndzon ne rdeed Dios, nand zho zha nac guielmban co sacne ndip zdoo zho. ¹⁹ Laa zho gocnadle, niapse lo grë ncuaañe ndzinlid no zho, ib rgobeyd zho run zho grëtaa guielyozh ne no. ²⁰ Sangue to gon, ne nac to zha ne no xnëz Jesús niina, led mincod noseed to; ²¹ telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

²² Miech yozh ne goc to glo, grëtaa ncuaañe ndzinlid, grëtaa guielyozh ne gocladztaa xcuerp to been to, igolsaana! ²³ None gdzëe lo xquielmban to, zigtaa grë mine no zdoo to, zigtagaa grë mine rza guic to, ²⁴ golgac tib miech cub, zaace golban, ndzinli golgac; zeena glu ganle ne nli beenncuble me to zigne racladz me.

²⁵ Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

²⁶ Telne glëe to, code to guielblëe co zdoo to dib dze, sac gon dolga. ²⁷ Gunde to mine racladz mendox.

²⁸ Zha ne goc ngbaan lëe, cuandraa zho, sinque gun zho dziin gdziniaa zho ncuaañe yquiuin zho, zeena scagaa grieelo gun zho xyudar zha ne guieñd pe yquiuin.

²⁹ Gneede to diidznë, sinque diidz ne ndzinli, diidz ne yquiuin golnee, zeena zha ne gona ine cchoobladza zdoo zho, ine yquiuina lo zho. ³⁰ Golguien, gunde to ncuaañe coguieñe to Espiritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaa csilaa grë zha ne ngab lo me. ³¹ None csaan to:

guieñialadz, tso to gow gzhiizh zdoo to;
glëëdraa to,
sobzhiandraa to,
coredzdraa to,
gacntseebdraa to, ni
grërագaa guieñtseeb ne no, gunde tow.

³² Sinque none:

wen gac to lo samiech to,
golquia zdoo samiech to,
golgun samiech to perdon, zigne beenaque Dios to perdon zeene laa to
beenbey Jesús.

5

None glu cho nac zha ne ngab lo Dios

¹ To ne laa to nacle xpëed Dios ni nquialadz me to, gołtsoxco gac to zig me.

² Zaace golban, golleynie samiech to zigne rleynie Jesús to, sac gon tel me, haxta bleeladz me me gut me xcuent ne, gut me biogon me lo Dios psanmbe me ne lo tołne, me goc tib gon ne pcaania Dios.

³ Golguien sca, none glu to ne nli xnëz Dios no to;

gunde to grë guielyozh ne run grë zha ne zienald zigne nacpaa guiełtsieel,
gunde to grë ncuaañe yozh ne run miech ndzinlid,
gunde to grë ncuaañe run grë zha ne zienal loxaque dieñ zha gunlo dimi.

Gunde to grē ncuaañ co, per ni gzodiidzde tow.

⁴ Gneede to grē diidzguidz, gneede to grē diidz ne paat rquiind, gneede to grē diidz ro nēz; sac gon rdzieeldraa gnee to grē ncuaañ co; sinque Dios golgoolnie, goldeed xquizh lo me.

⁵ Nanle to ganle, grēse: zha ne zienaldraa zigne nac guieltsieel, zha ndzinlid ne run grēraa guielyozh, zha ne mbidz (zha ne rleynieraa dimi, laa ne gleynie zho Dios); ni tib zho grielod gdziñ zaatne rnabey Jesús grop me Dios.

⁶ Gdeete to diidz lo zha ne gacladz yquidie to gnē zho peet nacd grē min co, sac gon, grēcxe min co waa run grē zha ne nēd gon xtiidz Dios, lozh ga, lēē miñe tsieguial zho laa zho yгаа lo guielzi ne csaab me. ⁷ Golguien sca, yquiaadiagde to xtiidz grē zha ne sca rnee, per ni ctsieelsade to zho.

⁸ Nli, ¿lēē?, ndzinlid wban to glo, rriequia lo ncow ga bio to, gocnie to menox; sangue niina ne laa to nacie Jesús men ne nac biini, rriequia lo biinile no to. Golguiena sca, zaacse golban, ⁹ sac niina ne laa to nole lo biini, none gac to:

tib miech wen,
tib miech ne zienal gac miñe nac diidzli,
tib miech ne rnee diidzli.

¹⁰ Goltsoxco guien to zha racladz Dios gban to. ¹¹ Gandzede to grē ncuaañe ndzinlid ne run grē zha ne no lo ncow, sinque gollisquiw; ¹² sac grē ncuaañe run zho ngeuets zhliana, haxta ncuaañe ctoladz ne gnee new. ¹³ Grēse zha ne bgib lo biini co, zien zho ganle zha nactaa grē ncuaañe yozh ne noyun zho; sac gon telne biiniw, tsod ncuaañe guianguuets low. ¹⁴ No tib zaatne znu zhobnee lo Xtiidz Dios, rneew:

Luu ne tibaque guieel no luu, blee mcaal lo luu;
briee lad grē zha ne squi nole lадznia guielgut,
zeña gban luu lo biini ne nac Jesús.

¹⁵ Golguien sca:

Miech nixbiini golgac, ndzinli golban; gbande to zig choł cho grē miech nxen ne run miñe notaa guic.

¹⁶ Cteed zhlēde to xtse to lo ncuaañe paat rquiind, niicle ne niapse grē min co zienal grēraa miech len dze rii.

¹⁷ Gunde to ncuaañe paat rquiind ne rza guic to, sinque golguien dien pa minpaa racladz Dios guñ to, dzigo goltsoxco min co golgun.

¹⁸ Gzudzde to, sac gon lo guielgonziu run miech ncuaañe nonguieldraa; sinque mazd golnab gneedzraa Espiritu Sant guielbiini lo to, zeña ine:

¹⁹ gool to grē salm, grē himno, grē cant ne csaab Espiritu Sant guic to; dib zdoo to golgoolnie men ndzon ne rnabey.

²⁰ Goldeed xquizh lo Dios men ne nac Pxoze ne, por grētaa ncuaañe ran to, ncuaañe rded to; golguien ganle lo Jesús ngab to.

Zha none gban zha ne rliladz Jesús

²¹ To ne nac to zha ne ngable lo Jesús, tib tib to golgon miñe rnee zha ne nacgrē to, zeña glu ganle ne nac men non lo to.

²² To ne nac to men wnaa ne ptsieelniale, golgon xtiidz tsieel to, zigne rioxcoque to ron to miñe nac xtiidz men ndzon ne rnabey. ²³ Sac ible tsieel to nac men ne no gnabey lo to, zigne Jesús rnabey lo grē zha ne no xnēz me

(ni me psilaa zho lo dol, laa zho nac zig xcuerp me). ²⁴ Ni zigne sca ron zho xtiidz me, scaque none gon to mine rnabey tsiel to to.

²⁵ Togaa ne nac to zha bgui ne ptsieelniale, golleynie tsiel to, zigne rleynie Jesús zha ne no xnëz me. Tel me haxta bleeladz me xquielmban me, ²⁶ blee me zho lo dol, ni biaanmbe zho zeene laa zho pquiaadiag xtiidz me, wban zhow ni brobnis zho; ²⁷ zeena gal dze ne laa me ycaania zho, laa zho nacle miech ne rieguial gdzin lo guielndzon ne no me, ni tib dol rapdraa zho, miech mbele nac zho, zig tib lë lar nquitsbie ne ni tib pxud neyd. ²⁸ Sca nagon none gun mgui, none ranzi zho tsiel zho zigne ranzi zho xcuerp zho. Mgui ne ranzi tsiel, rriequia xcuerp zho ga ranzi zho; ²⁹ sac gon, tsod tib zha ne lëeque zha csacsi xcuerp zho, sinque ran zhow. Ni scadaa nagon rzac Jesús grëse miech ne ngab lo me, ³⁰ sac nac zho zig xcuerp me. Ni lëe tib lë cuerp co nu nac ne.

³¹ Zha ne pcatsieel-le, ible tibaque cuerp nac zho grop zho, laaw zhobneeque lo Xtiidz Dios zaatne rnee: “Ib none greezhaa mgui lo pxoz zho, lo xniaa zho, zeena gbannie zho tsiel zho gac zho zig tibaque miech grop zho.”

³² Rgobey naa ngan tsoguic to zha nacne chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lëe xcuerp Jesús ga.

³³ Mine racladzpaa naa csoladz to nu: to ne nac to men bgui, none gleynie to tsiel to zigne rleynieque to xcuerp to; ni niicle togaa ne nac to men wnaa, none gon to xtiidz tsiel to, cueede to xquielto zho.

6

¹ To ne nac to mëed, golgon xtiidz pxoz to, xtiidz xniaa to, sac sca nonguiela, ni scagaa glu ne nli rleynie to Dios. ² Golgan ganle, lo grë xley Dios no tib mine znu rnee: “Bin xtiidz pxoz luu, xtiidz xniaa luu, zeena ine niowse gac lo xquielmban luu, ni nroob dze ne gban luu lo guidzliu rii.” Ni lëew glopaa rnee ganle pe nac mine ygaa zha ne gun mine rnabeya, ³ sac rneew, niowse gac lo xquielmban zho, ni nroob dze ne gban zho lo guidzliu rii.

⁴ Togaa ne nac to men nguzan, gunde to ncuane yquiaaguieñe to xpëed to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

⁵ To ne nac to zha ne ngadoo ladznia ben, golgon xtiidz men ne rnabey to. Golguien zha rnabey to, dib zdoo to, goltsoxco golgun xtsiin zho, zig nac zeene xtsiin Jesús ga noyun to. ⁶⁻⁷ Gunde to ne loxaque zeene zose zho lo to, dzigose yquiaalo to gun to dziin zeena guianziuu to lo zho, sinque ine nguieel golgac golgun xtsiin zho, zig nac zeene xtsiin Jesús ga quia to, ine dib zdoo to quiayun to mine racladz Dios. ⁸ Benque nanle to, zigtaa zha ne ngadoo ladznia bena, zigtagaa zha ne rnabeya, zdeedse Dios mine tsieguial zho tib tib zho tel pe nac ncuane wen ne noyun zho.

⁹ Togaa ne nac to zha ne rnabey, niowse golgac lo zha ne quia xtsiin to, gactseebe to lo zho. Golguien ganle, zigne rzacaque zho, scaque rzac to, no tib men ne rnabey to grë to, lëe me ga zob gbaa; ni tel me gon led yed me guiab dien cho rnabey, chogaa run dziin.

None nsin so zha ne rliiladz Jesús

¹⁰ Bets, bzian, nu ne laa naa csiaalle, laa naa rnab lo to gon tibaque golnalo Dios; golgan ganle, con grëtaa guielrnabey ne rap me, me needz grë lose fuerz lo to. ¹¹ Zig nac grë menguib, ible no grë ncuane rquin zho zeene laa zho rie lo dil, scaque to niina nagon, golquien grë lose fuerz ne bneedz Dios lo to, zeena glëbd mendox gungüet ma to. ¹² Golgan ganle, led-xe miech guidzliud

waa nodilnie ne, sinque laa ne nodilnie grë me yozh ne quianzë zhan gbaa, ma ne quianabey grëtaa guielntseeb ne rac lo guidzliu rii. ¹³ Gane nagon none yquuin to grëse lo fuerz ne zineedzle Dios lo to, zeena guiablude to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

¹⁴ Dziits sca golso:

Dziits golso lo mine nac diidzli, zigne dziits dziits rzhidoo len menguiib zeene laa zho tsie lo dil.

Golgun mine nonguiel zeena ctse to lo mendox, zigne rtse ncuuane racw menguiib lo grë ncuuane gnitlo zho.

¹⁵ Nsin golso zeene laa to tsienee Xtiidz Dios lo miech gacnan zho zha guiaanwen zho lo me, zigne nsinle zo menguiib zeene laa zho no tsie lo dil.

¹⁶ Guiaanladzde to, gonallo Dios, zeena peet grielod gun grë me yozh co to, zigne rnalö menguiib guiblag ne rsaac zho lo zha ne nodilnie zho.

¹⁷ Golsoladz ganle laa Dios psilaale to lo guielgut, golsaca zigne rzac menguiib pchog guiib ne rzob guic zho, rsilaaw zho lo guielgut. Ni golsac Xtiidz Dios mine rneedz Espiritu Sant lo to, zigne rzac menguiib xquuib zho.

¹⁸ Nsin sca golso, guiablude to. Tibaque golzodiidznie Dios. Golinab lo me mine rsiaab Espiritu Sant guic to, golinab gacniën me grëse zha ne ngab lo me; ni ¹⁹ golinab lo me gacniën me naa, csiaab me guic naa pe nac mine gne naa, peet dzeb tsod lo naa gne naaw lo miech; zeena gacnan zho ganle, zha nac Diidz Ndzon ne rnee zha laa miech lo dol, mine choot gocnand glo.

²⁰ Ib me bzo naa cteed naa xtiidz rii me lo grë zha zit, ni mincocxe waa rquiaqui znu no grë guiib rii nia naa, ngoguiu zho naa nu. Golinab lo me gacniën me naa, gdzieebd naa gne naa ganle cho nac me. ¡Nsin sca golso!

²¹ Laa naa rxel Tic lo to, me nac tib men nziuu lo naa, dib zdoo me laa me quiayun xyudar naa lo xtsiin men ndzon ne rnabey ne. Me guiaadnie diidz lo to ganle zha rac naa, zha no naa nu. ²² Mincopaa ziaad me i, ziaadnie me diidz zha no no nëz rii, zeena ine gley to tsoxcoraä to mine riladz to.

²³ Rnab naa lo Dios men ne nac PxoZ ne, ni lo Jesús men ndzon ne rnabey, me gacniën to peet zhgab ctsebd to, ine tibaqué gliladz to me, ine gleynie to samiech to. ²⁴ Me gunlay to, grëse to ne nac to zha ne nlipaa dib zdoo rleynie Jesús.

Pabl

GUILTS NE PXEEL PABL LO ZHA FILIP

¡Diuzh to grëse to!

¹ Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne ruñ xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

² Dios men ne nac Pxoze, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

³ Zeene rsoladztaa naa to, rded naa xquizh lo Dios; ⁴ ni zeene rzodiidnie naa me, rley naa gon r nab naa lo me gacnieñ me to; ⁵ sac desde dze ne laa to psilo bliladz Jesús haxta lo nadze, tibaque laa to quiyacnie naa, quiyun to xyudar naa noseed naa miech Xtiidz Ndzon me. ⁶ Ni nanaa naa, zigne squi psilo Dios nozhixcuaa me lo xquielmban to, zige zie dze laa me gzhixcuaaraa to, zeena nsinle zo to gal dze ne laa Jesús guiaad stib.

⁷ Min co racladz naa, ni ib rieguiala sac ne nligaa rleyne naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne rapcaa rne naa ni rlu naa ganle ne nli diidzli nac Xtiidz Jesús. ⁸ Dios nan ganle pa lotaa nonie to guic naa, rquiané zdoon naa to, zigne rzacaque Jesús ne.

⁹ Rnab naa lo Dios gacnieñ me to, zig zie dze gleynieraa to samiech to, tsabiiniraa to, ¹⁰ zeena guien to cue to niapse grëncuaane ndzinli gun to. Sca ine ndzinli nac lo xquielmban to, ni tib xto to guien gal dze ne guiaad Jesús; ¹¹ zaacse gban to. Ga glu to ganle lëe min co blu Jesús lo to, zeena sca csanglaa to Dios.

¹² Bets, bzian, racladz naa gacnan to ganle niicle tel pe nactaa ncuane nodeed naa, per led mincod gon cuéz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga. ¹³ Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. ¹⁴ Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guien draa lo zho, masaque Dios rnalo zho.

¹⁵ Parga nli no stib dii zha ne psilo noyun dziin co, per laa zho noyuna loxaque par dien zha guianzuiuu zho, sac nē rac zdoon zho ran zho zha none naa Xtiidz me. Per zigne no zha ne sca nac, noque zha ne nli dib zdoon zho quiaseed zho miech. ¹⁶⁻¹⁷ Lëe zha co nagon rlu ne nli rleyne zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianzuiuu zho, rzac zho na tel mazdraa glaa guiaan zho lo naa, mazdraa lozh coguieñ zho naa ne laa naa znule no ladzguiib. ¹⁸ Per par naa, pex gun naa zho. Tel zha ne zie dib zdoow, zha ne ziedgaa dib zdoow, totsaque ne Xtiidz Jesús quiaseed zho miech; min co nac mine mazdraa rley naa.

¹⁹ Ni zleyragaa naa, sac nan naa ib zrie naa zaatne niogyu naa nu; sac lala quianab to lo Dios por naa, ni lala nacie zhiEspíritu Jesús naa. ²⁰ Dib zdoon naa racladz naa, tiblique gac naa lëeb naa gan naa mine tedtaa naa, gdzind dze ne gun naa ncuane cuee xquielto naa. Racladz naa cxobnen naa ganle zha men rotaa nac Jesús; niicle tel niaca por min co yquiaaqui gut miech

naa. ²¹ Sac gon, par naa laa naa mban par gon naa mine rnabey Jesús, ni zeene guetgaa naa, nanpaa naa tib guieibley nroob ne yгаа naa. ²² Per tel laga mban naa, nzianraa ncuane grieelo gon naa lo me; dzigo nagon riendaque naa dien pa min wenraa. iPe wena gbanraa naa, te wena ye prontga ghi naa lo guidzliu rii! ²³ No hor rzaac naa gbanraa naa, nogaa hor rzaac naa tebaa laa naa while lo guidzliu rii; zeena ziagaa naa lo Jesús, sac nligaa zoot naa laa naa bdzinle lo me. iMin co mazdraa wen, ledle cuéz naa lo guidzliu rii! ²⁴ Per rien naa ible none cuéz naa, sac rquiinpaa to naa. ²⁵ Mincocxe nagon waa, rgobey naa zbanraa naa, zeena lozh cseed naa to choobraa to lo Xtiedz Jesús, ine nley gac to laa to rliadza; ²⁶ ni zeene laa naa gbire guial lo to i, rien naa nroob gley to, zdeed to xquizh lo Jesús porne racnién me naa.

²⁷ Per mine rsopaa naa diidz lo to gon: Goltsoxco golban zigne no gban zha ne ngab xnéz Jesús, zeena niicle telne grieelod guial naa, racladz naa gon naa tipse nac to grè to, tiblrique dziits zo to lo Xtiedz Dios; ni noxco to dien zha gliladz grèraa miech Jesús, ²⁸ ni lalnu rdziebde to grè zha ne rlèè ran to. Ga guien zho ganle néz ne nitlo zho zie zho, sangue to ga rlu ne laa Dios psilaale to lo xtol to, ni nacie me to. ²⁹ Sac gon, ible none gan to guieinè porne no to xnéz me, bzoblod Jesús to loxaque par yгаа to guieinzaac qui gnalo to me. ³⁰ Niicle tow, niicle naagaaw none dzian ne min co. Gonle to ganle zha nactaa grè ncuane bdeed naa, ni ziyongaa to grè mine nodeed naa niina.

2

Goc Jesús tib men ndooladz

¹ Nanle to ganle Jesús rchoobladz zdoo to, me rlu zha gleynie to samiech to, tipse nac to ni Espíritu Sant nacie to; nanle to ganle none yquia zdoo to samiech to. ² Gacxe nana sca, golconley zdoo naa, ine tipse golgac, golleynie grè zha ne nacgrè to, tipse golnee, ni tipse golgac tel pa lo dziin ne gnediidz to gon to. ³ Ncuane gon to, guiabde to ne laa to guna par dien zha csanwin to stib miech, zeen dien zha guianzuiu to; sinque ine ndooladz golgac, masaque golt sienie guic ne nonraa stib miech lo to. ⁴ Ib yguibde to ne lose to yquiin ncuane gun to, sinque golguib dien zha gon to xyudar grèraa miech.

⁵ Golsoladz ganle pa lotaa ndooladz goc Jesús len dze ne biaadted me lo guidzliu, scaquegaa nasca ndooladz golgac. ⁶ Sac tel me:

Niicle ne Dios nac me,

per led mincod niab me nrieded me lo guieindzon ne no me,

⁷ sinque grèse zigne nac me, laa me psana tib lad,

laa me goc zig tib ngundziin win,

biaad me gol me lo guidzliu rii goc me miech.

Nacle me miech,

⁸ ni bii psanwin me me lo miech,

haxta bdeed me diidz pquiaa zho me lo cruz,

zig run zho cho grè zha yozh.

⁹ Mincocxe waa, psanglaaraa Dios me,

biaan me men ne mazdraa non, men ne mazdraa nroob;

¹⁰ zeena zeene laa me gaquiet,

grèse zha ne no gbaa, grèse zha ne no lo guidzliu,

ni grèse zha ne no néz len guidzliu, laa zho yquitsgzhib,

¹¹ ni grèse zho laa zho cueero, guiab zho ganle ne nli me nac men ne rnabey.

Ga laa zho cxobnen ganle, zha men nroobtaa nac Dios, men ne nac PxoZ me.

Zha ne nac biini lo guidzliu rii

¹² Bets, bzian, ne nligaa rleyne naa to. Laa naa rnab lo to (zigne bioxco to bin to xtudz naa zeene blēz naa lo to i, scaquegaa niina niicle ne zit zo naa, golgon mine rne naa nu), ib gdeete to diidz guiab to ladznia dol stib, niina ne laa Dios psilaale to; golguien tsieniewguite guic to. ¹³ Benque Dioszhal rsiaab guic to rquiabladz to gun to mine racladz me, ni scagaa me racnien to rrieelo run tow.

¹⁴ Ni ncuaañe rieguial to gun to, ine nguieel golgac golguna, peet glisquide to, ni niicle tilidiidzgae to; ¹⁵ zeena tsod pe nacne cho glisqui guiab zho laa to pe falt, pe dol ne quiaayun. Gollu ganle nli xpēedle Dios nac to; zaacse golban, niicle ne ladaque grē miech ntseeb, miech ncow ne ndxie lo guidzliu rii no to. Golgac zig tib biini lo zho, zigne rziini mel gbaa lo ncow ne nac guieel. ¹⁶ Ib csaande to Xtiidz Ndzon Jesús, diidz ne rdeed guielmban, lēew golconie guic to. Sca golgac, zeena gal dze ne laa Jesús guiaad stib, per nli gley naa gan naa led zhlēd brie naa bial naa, bialseed naa to. ¹⁷ Zig nac niina, tel niaca mine no gded naa xquielmban naa gaca zig tib gon, parne dib zdoora to gliladz to Dios, haxta zley naa gded naa xquielmban naa; sac racladz naa ye to ygaa guielbley. ¹⁸ ¡Golley sca! Zigne no guielbley rii zdoo naa, scaquegaa to golco nley zdoo to, zeena grē ne gley.

Timoté ni Epafrodit

¹⁹ Telne gneedz men ndzon ne rnabey ne diidz, racladz naa cxeelnioab naa Timoté guiaadwi dien zha no to, zeena haxta stibgac zdoo naa zeene laa Timoté glansonie diidz lo naa. ²⁰ Me cxel naa, sac guien stib zha ne zienie guic zig zienie guic naa, tel led med; sac tel me nonie to guic me. ²¹ Grēraa zho, ncuaañe yquini lo zho rioxco zho, laa ne tsoxco zho mine nac xtsiin Jesús. ²² Laa Timoté, led nanle to ganle zha ndzinli nac me, tel niina ine tib mēed nac me lo naa, nroob yudar ne quiaayun me noseed no miech Xtiidz Ndzon Jesús. ²³ Ible laa guic naa no cxel naa me lo to i, loxaque gacnanse naa dien zha csañ wxtis rii xcuent naa nu. ²⁴ Ni ye naa nend pronaque guialso naa i dien yo to, sac rien naa ible zneedz Dios diidz guial naa.

²⁵⁻²⁶ Ni rgobey naa nonguielaquew cxel naa bets ne Epafrodit guiaad me nēz qui, sac laa me rbanle to, ni no me zhgab bin me laa to gocnan ne laa me bzhaacñē. Nli laa to pxeel me lo naa nu, ni blactagaa noyun me xyudar naa ne znu mban nodeed naa, blactaa noyacie me naa lo dziin ne nodziun no. ²⁷ Ni nligaa bzhaacñē me, nzho goc me zootle laa me nietle; per pquia zdoo Dios me ni pquiaagaa zdoo Dios naa peet god me, sac gon nōle naa guielñē, ni tel pe niacaque me mazdraa niac nroob xquielñē naa. ²⁸ Min co nagon laa naa cxelgash me, zeena gley to gan to lo me stib, ni scagaa niicle naaw zley naa. ²⁹ Golley sca gon golcaania me, golguien ganle bets to nac me, bets new grē ne ne nac ne zha ne ngab lo Dios; ni grēragaa zha ne nac zig nac me, golleyne zho. ³⁰ Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoo me me, bleeladz me xquielmban me biaadgun me xyudar naa, porne brielod niaad-zhal to.

3

Ncuaañe mazdraa non

¹ Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuaañe yquingaa lo tow: ² ¡Ib cxende to lo grē mēcw dox qui! Grē miech ndzinlid ne squi quianzē, racladz zho tsopaa zha bgui bey, sac rzac zho zha ne sca tso bey, ga rlu xnēzle Dios no zho. ³ Sangue ne, ndionle ne zha nac diidzli, zha ne

rleynie Dios zigne rsiaab Espíritu Sant guic zho, ni dib zdoos zho run zhow, zha co nac zha ne nlipaa no xnéz me. Ne ne nac ne zha ne no xnéz me, Jesús nac men ne rdziunnon ne, sac ndion ne por me laa Dios ycaania ne; rnalod ne grè ncuaañe laglaase, ⁴ sac telne scaw; zig nac naa pe zhistaa ncuaañe dzigo zrieelo gnalo naa. Tel no zha ne rzac por ncuaañe been zho min co laa Dios csilaa zho; tel scaw, nroobraa ncuaañe ziyun naa lo zho: ⁵ Xon ngbidz raap naa laa naa biole bey co, zha Israel nac naa, lo xtií Benjamín zial naa, merpaa zha Israel nac naa; sac niicle pxoz naaw, niicle xníaa naaw zha Israel nac me. Niicle xleygaa zha Israela, nroob pseed naaw, zha farisé goc naa; ⁶ bleyniedox naa grè mine zienal zha Israel, gacxe waa pquiñal naa grè miech ne no xnéz Jesús; zig nac mine raquiet lo ley, grè sew ben naaw zigne naca, ib biod dze ne cho zha pe nlisqui lo naa.

⁷ Lèe grè ncuaañ co rnalo naa len dze co, sangue niina Jesús rnalo naa, grè se ncuaañ co laaw psanle naa tib lad. ⁸ Ni led loxaque psandse naaw tiblad, sinque grè sew peet nondraaw lo naa, mine non lo naa niina nacne beenbey naa cho nac Jesús, men ndzon ne rnabey naa. Niina ne laa naa runbey me, grè se ncuaañ co rzaac naaw zig rzac ne grè pe guizh beed, sac laa naa racladz gbigráa naa lo me, ni gacniera naa me. ⁹ Zanaidraa naa gun naa mine rnabey ley par guiaañmbe naa lo dol, sinque laa naa zanañ dib zdoos naa gliladz naa cho nac Jesús; sac zha ne dib zdoos rnalo me, sanmbe Dios zho lo dol. ¹⁰ Racladz naa guienraa naa zha nac Jesús, ni gaap naa poder ne pquiñ Dios zeene blische me me len baa, ye naa teed grè mine bded me, ni cueeladz naa xquielmban naa zigne bleeladz me xquielmban me; ¹¹ ni scagaa, nañpaa naa ye naa grieeban gal dze ne guiadbeeban me grè zha ne no xnéz me.

Stsëe Jesús xcuerp zha ne ngab lo me

¹² Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nañpaa naa zac naa zigne no guic me gac naa zeene psilaa me naa. ¹³ Bets, bzian, gard gun naa gan; per xco co no naa; grè se ncuaañe bded laaw biaanladzle naa, laa guic naa zienie ncuaañe naraa ziaad. ¹⁴ Masaque rzaac naa niina zig rzac zha ne rie prueb lo corr, rded naa fuerz gdziñ naa zaatne gneedz Dios zhipremio naa, guielnaac ne rbedz Dios ne ygaa ne zeene laa ne riladz Jesús.

¹⁵ Ni ib znu none tsonie guic grè zha ne nlipaa dziits zo lo Xtiidz Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca. ¹⁶ Ni negaa, grè mine rienle ne zha nac, none gban new.

¹⁷ Bets, bzian, golwi ganle zha mban naa, ni zha mbangaa grè zha ne zienal mine blu no lo to grè to; dzigo sca golban. ¹⁸ Sac gon nzian zha ne nacgrè to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladztaa zho, rlèe zho ron zho pe nac gut Jesús lo cruz; ¹⁹ ni nèz ne nitlo zho ga zie zho. Laa ne tsienal zho mine rnabey Dios, laa zho zienal grè ncuaañe gdeed guixt zdoos zho, ncuaañe gdeed guixt xcuerp zho. Loxaque grè ncuaañe mbee guielto zienal zho, per zha rlozhd gleynie zhow; niapse grè ncuaañ lo guidzliu rii nonie guic zho. ²⁰ Sangue ne, laa ne zional ncuaañe ygaa ne gbaa, sac gbaa nac zaatne ngab ne, ni laa ne quiambiaaz guiet Jesús gbaa guiaad me stib (me nac men ne psilaa miech lo dol, me nac men ndzon ne rnabey); ²¹ zeena ctsëe me xcuerp ben wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grèta ncuaañe no.

4

Rnab Pabl nley gac zha Filip

¹ Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquieley naa, to nac zig tib premio lo naa por grëtaa xtsiin Jesús miñe beñ naa lo to. Laa naa rso diidz lo to, tibaque squi dziits golso, ib csaande to zhiwseed Jesús.

² Rnab naa lo bzian ne Evodia, ni lo bzian ne Síntique glëëlsadraa zho, none tipse gnee zho; sac gon bel zho, xnëz Dios no zho grop zho. ³ Ni luu gon bets, ne nac luu zha ne tibaque quiaacnie naa lo dziin ne quiaadziun ne, laa naa rnab lo luu bnee lo grop wnaa qui gneewen zho stib, sac gon ye zho blactaa miñe bded zho zeene bzënal zho zhits naa biotiiz no Xtiidz Jesús, ni zeene güeynalгаа zho zhits Clement, ni zla zha ne rdziuungza no dziin. Laa lê zho zhoohe len libr ne quia lê grëse miech ne bgaale guielmban ne gdziindraa dze lozh.

⁴ ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley! ⁵ Golguien zaacse golbannie grëse samiech to, zeena haxta gzëëb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

⁶ Tel pe nac grë ncuaañe quiaed to, tsode to zhgab, gdziebde to, sinque golzodiidznie Dios, golšan grësew ladznia me; per led loxaque gnabdse to, sinque golşoladz goldeed xquizh lo me. ⁷ Ni zeene sca cšan to grë xliaadz to ladznia me, haxta tibliladz guiaan zdo to, peet dzeb tsoniedraa zdo to, peet zhgab tsoniedraa guic to, masaque Jesús nac men ne nacie to; grëraa miech ib guieñd zho zha nac ne scataa tibliladz rac to.

⁸ Bets, bzian, nu ne laa naa csiaalle guits rii laa naa rnab lo to, miñ rii golconie guic to:

niapse miñe nac diidzli,
niapse grë ncuaañe nonguiel gac,
niapse grë ncuaañe rac zigne nac diidzli,
niapse grë ncuaañe mbe,
niapse grë ncuaañe gleynie miech,
niapse grë ncuaañe gley miech gon zho,
niapse grë ncuaañe yquiin,
niapse grë ncuaañe gzee zdo miech ni gleynie zho.
Grë miñ rii golconie guic to, ni lëew goltsoxco gun to.

⁹ Ni golguien gon, grë miñe pseed naa to, miñe psan naa diidz lo to gun to, grë miñe bin to bne naa lo to, miñe gon to beñ naa, grë miñ co goltşianal; zeena scagaa zacnie Dios to ib peet zhgab ctsebdraa to.

Gon ne bdeed zha Filip

¹⁰ Ne nlipaa rded naa xquizh lo men ndzon ne rnabey ne, ni rley naa ne laa to pxeel grë ncuaañe yquiin naa stib. Nan naa ne led biaanladzde to naa, sac tibaque noxco to dien zha gun to xyudar naa; sinque bdeedniobda diidz. ¹¹ Rley naa ne laa to psoladz naa, maase niicle nodpaa naa zhgab co dien pa gree pe yquiin naa, sac pseedle naa peet zienied guic naa niicle tel zhataa nodeed naa. ¹² Nan naa zha nac guielprob, ni nanquegaa naa zha nac zeene quanie ne nroob ncuaañe yquiin ne. Pseedle naa rzac zdo naa miñe noodeetaa naa, niicle zeene biodzë zdo naaw, zeene rcaabedzгаа naaw; niicle zeene nroob ncuaañe yquiin naa no, zeene peet guieñdгаа. ¹³ ¡Grësew rrieelo naa, sacne nacie Jesús naa, me rneedz xfuers naa! ¹⁴ Per wen ga been to, pxeel to ncuaañe pquiin naa lëëtaque len dze ne peet guieñd lo naa.

¹⁵ Zeene brie naa nēz xtan zha Macedon i, len dze ne wriin psilo noseed naa miech Xtiidz Ndzon Jesús ga, tosaque nac zha ne been xyudar naa, beenlo to gon pxeel to lo naa, porne rleynie to dziin rii. ¹⁶ Scaaque len dze ne no naa Tesalónica, blalaa vuelt pxeel to pe pquiin naa.

¹⁷ Guiabde to togo bod ne dien zha ygadraa miech lo naa gane rzetpaa naaw; lēda, sinque rley naa ne squi rala zdo to rgad to, sac squi nroobraa guielnzaac ne ygaa to. ¹⁸ Tel na gon, grēle ncuaane yquiin naa no, haxta nrooblew nu. Ni ne pxeelaque to Epafrodit biaadsan stib nēza, haxta bde sole goclow lo naa nu. Grētaa ncuaane bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdo me ycaania me. ¹⁹ Scagaa niina nagon, grēse ncuaane yquiintaa to, Dios men ndzon ne rliladz ne, me gneedza lo to, porne nligaa dib zdo to rliladz to Jesús; sac gon, nroobdo grē guielndzon, grē guielnzaac ne rap Dios. ²⁰ ¡Lēē xDios ne ga, me nac PxoZ ne grēse ne! ¡Gotsaa dziuunnon ne me sca, mesi gdzind dze ne nitlo xquielndzon me! Sca rieguiala.

²¹ Goldeed tib zhibdiuzh naa lo grēse zha ne no xnēz Jesús i, grē zha ne squi noxco mban zigne racladz Dios. Scagaa golcaania zhibdiuzh grē zha bets ne, zha ne no lo naa nu. ²² Golcaania zhibdiuzh grēse zha ne no nu, zha ne rliladz Jesús; haxta ye grē zha ne rquia dziin lo rey Roma nu, laa zho rxeel zhibdiuzh zho lo to.

²³ Jesús, men ndzon ne rnabey ne; me noxco to, me nonie grē zhizhgab to. ¡Me gunlay to grēse to!
Pabl

GUILTS NE PXEEL PABL LO ZHA COLÓS

¡Diuzh to grêse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca. ² Grop no Timoté laa no rxeel guits rii Colós i, laaw ziaad lo to grêse to ne nac to zha ne noxco mban zigne racladz Dios, ni dib zdoo to rleynie to Jesús.

Dios meñ ne nac Pxoze ne, me glu ganle pa lotaa noxco me to, zeena peet dzeb tsonied guic to.

³ Gzobtaa zeene rzodiidznie no Dios, Pxoze Jesús meñ ndzon ne rnabey ne, rnab no gacnieñ me to, ni rdeed no xquizh lo me ne squitaa rneedz me guielbiini lo to; ⁴ sac zidzion no ne nlipaa dib zdoo to riladz to cho nac Jesús, ni rleynie to grêse zha ne no xnêz Dios. ⁵ Min co nonie guic to, sac desde dze ne psilo pquiaadiag to Xtiidz Ndzon Jesús miñe nac diidzli, laa to gocnan ganle no tib guielnzaac nroob ne yгаа to gbaa.

⁶ Golgacnan sca ganle, Xtiidz Ndzon Jesús, wseed ne riladz to, nzianraa zaatne quiaaгаа, ni lëew notsëe lo xquielmban miech, zigne bdzëëque lo xquielmban to zeene pquiaadiag tow, laa to bien ganle ne nligaa pa lotaa noxco Dios to. ⁷ Lëe min co ga biadseed Epaftr to; tib meñ ne nziuu lo no, ye me rquiagza no dziin; ranaxe to ganle zha rioxcotaa me xtsiin Jesús. ⁸ Me bzodiidz lo no ne squitaa rneedz Espiritu Sant guielbiini lo to, rleynie to samiech to.

⁹ Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grê miñe racladz Dios gun to; ¹⁰ zeena grielo gban to zigne no gban zha ne no xnêz Jesús, tibaque gun to ncuaañe conley to zdoo me; dzigosi grêse ncuaañe ndzinli ne gun to, zlpaa ncuaañe rquiina, ni zioguicraa to zha nac Dios. ¹¹ Ni rnab no lo me, niapse por poder ne rap me gunndip me zdoo to, gunndip me guic to; zeena niicle tel pe nactaa guielnë ne gan to, ib peet tsienied guic to, ib sacxuude to, ¹² ine gley to gdeed to xquizh lo me nac me Pxoze ne, ne squi laa me bzooblo to, psanmbe me to; zeena gdzin to lo biini zaatne yгаа to miñe no gdeed me lo grêse miech ne no xnêz me. ¹³ Sac me nac meñ ne blee ne lадznia menox, ma ne rnabey lo guielcow, psan me ne lадznia Xpëed me Jesús, meñ ne rleynie me ga. ¹⁴ Jesús nac meñ ne bdiizh grêse xtol ne zeene sca gut me lo cruz, me nac meñ ne psanmbe me ne nêz lo Dios.

Grê ncuaañe been Xpëed Dios

¹⁵ Niicle ne gard dzian ne Dios, per laa Xpëed me bиаad bиаadlu lo ne ganle zha nac me, sac zigne nacle me scaque nac Xpëed me; ni lадznia Xpëed me no grëtaa ncuaañe no. ¹⁶ Zeene bnabey me tsaa grëtaa ncuaañe no gbaa, grëtaa ncuaañe no lo guidzliu; Xpëed me bzaaw grësew, zigtaa grê ncuaañe rdzian new, zigtagaa grê ncuaañe grieelod dzian new, zig nac grê “me mban” ne rap guielrnabey, rap poder. Jesús bzaaw grësew, ni ible par me bиаaw. ¹⁷ Nole Jesús zeene bиаa grê ncuaañe co, me naaza, gane tib tiba nosew zaatne rieguiala. ¹⁸ Ni grêse zha ne no xnêz me, me nac meñ nroob ne rnabey lo zho; grêse zho laa zho nac zig tib cuerp, dzigo me nac guic cuerp co. Me nac meñ ne nole glo, ni me nac meñ ne glopaa brieegan; zeena glu ganle me nac meñ ne mazdraa

nroob, me nac men ne mazdraa non; ¹⁹ sac ib Dios bnabey zigne nacse Dios scaque nac me.

²⁰ Niapse por Jesús grëse ncuane no zigtaa lo guidzliuw, zigtagaa gbaaw, laaw biaanwen lo Dios, ni lëe min co goc zeene sca bzhiee xchen Jesús lo cruz. ²¹ Zig nac to, glo zit to lo Dios, rrieequia rlëenie to me, sac niapse grë ncuane ndzinlid güeynie guic to been to; ²² sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena ine mbele to, ni tib dol rapdraa to gdzin to zaatne no me. ²³ Per parne grieelo gdzin to ga, none tiblque golgun guic to, goltsienal Xtiidz Ndzon me mine rliladz to, ib guiaanladze to guielnzaac ne no yгаа to, zigne raquiet lo Diidz Ndzon ne pquiaadiag to ga. Lëe Diidz Ndzon co quiagaaz dipse lo guidzliu niina, ni ye naa nac tib zha ne quia quianeew lo miech.

Dios bzo Pabl tsoxco me zha ne ngab lo Dios

²⁴ Grë guielnë ne noyan naa porne rleynie naa to, rley naa noyan naaw. Laa Jesús gonle grë guielnë co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me. ²⁵ Ni ible Diosgaa bzo naa noyan naa dziin lo grë miech ne no xnëz me, zig nac to, gocniën me to bzo me naa bne naa grëse zigne nac Xtiidz Ndzon me lo to. ²⁶ Diidz ndzon ne gocnand grëtaa zha gol ne ziyaadmban wlal ne bre guidzliu, laaw gocnan grë zha ne no xnëz me niina. ²⁷ Ible zha gocladz me gacnan grëtaa guielnzaac ne yгаа zho zeene laa zho gacnan diidz co; haxta to ne nac to zha zit. Ni lëe diidz ndzon co nu: Zha ne nacie Jesús, me gdzinne zho zaatne nac lo guielndzon ne no me.

²⁸ Gacxe waa, zaatne ziotaa no, Jesús nac men ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me. ²⁹ Min co nac dziin ne noxco naa, per led dziin ligada, gane dib nacse guielndaan, dib nacse fuerz ne rneedz me lo naa, noxco naa noyan naaw.

2

¹ Racladz naa gacnan to ganle ne nlijaa tibaque no to guic naa, zigtaa tow, zigtagaa zha Laodicéw, ni grëragaa zha ne gard ganlo naaw. ² Rnab naa lo Dios ib guiaannd zdo to, tipse gac to ine gleynie to grë zha ne nacgrë to, lozhraa tsaa biini xquielrien to guien to ganle zhapaa nac Jesús, sac gon naraa bdeed Dios diidz gunbey miech me. ³ Me nac men ne rap grëse guielrac, grëse guielbiini nroob chen Dios. ⁴ Laa naa rne min rii lo to, zeena choot yquidiede to, niicle paraa ndzielguic rzë xtiidz zho. ⁵ Niicle ne nli zozhaald naa lo to i, per zhiéspiritu naa nacie naa to, ni rley naa ran naa squi zaacse mban to, tiblque nac guic to dib zdo to rliladz to Jesús.

Tib guielmban cub

⁶ Nana sca, zigne bzëeb to xnëz Jesús gnabey me to, scagaa goltsienal mine rnabey me, ⁷ masaque lадznia me golsan xquielmban to, me gollnalo, gollu ganle ne nli dib zdo to rliladz to me, zigne pseed no to, ni tibaque goldeed xquizh lo Dios.

⁸ Nsin golso: ib gac-wete to lo grë zha ne guiaadne wseed lo guidzliu rii, grë godiizd ne paat rquiind, sac laa zho gacladz yquidie zho to. Tel zha, ib rzeete zho lo miech dien cho nac Jesús, sinque lel grë ncuane run grë xmengol zho, grë wseed ne rleynie grë miech lo guidzliu, min co rseed zho miech. ⁹ Sangue ne, ndion ne ganle zigne nac Dios scapaa nac Jesús. ¹⁰ Gacxe waa, to ne nacie

to Jesús, peet rquiindraa to. Me nac men ne rnabey lo grëse zha ne rap poder, lo grëse zha ne rnabey.

¹¹ Zeene bnalo to Jesús rrieequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grë dol ne been to glo; ni Jesús nac men ne bloo to bey co. ¹² Ni zeene brobnis to, rrieequia bgueetsnie to me ga ni brieebannie to me, sacne biladz to poder ro ne rap Dios men ne blische me len baa. ¹³ Glo zha gutle nac to nëz lo Dios, lala por grëtaa xtol to ni porne gard co Jesús to bey co; laa zeene bleeban Dios Jesús, men ne pxeel me biaadsilaa ne lo dol, laa to wbiire bgaa guielmban stib. ¹⁴ Ptiche Dios grëse mine rioguaal ne, sac bdiits ne mine nac xley me; grëse dol co pcaadz me Jesús zeene laa Jesús pquia lo cruz. ¹⁵ Ni zeene sca bded Jesús, ga psiaablo me mendox; grë me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli ladzniale me no ma.

Grë wseed ne paat rquiind

¹⁶ Gacxe waa, ib guncasde to zha ne rlisqui dien pe nacne pe row to, pe nacne pe rie to, pe nacne runde to grë zhilni zha Israel, runndade to dze ne rquia mëe yeen, runndade to dze ne rdziiladz zha Israel lo dziin. ¹⁷ Grë min co bioxco miech zeene gard guiaad Jesús, per lega gosc ncuaan co zig tib zhimlë guielbiini ne biaadnie Jesús. ¹⁸ Ib gliladzde to xtiidz grë zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleynie zho grë anjl, rnee zho goon dieen pe ncuaaane gbaa ne zielulo lo zho, lëëque lëë zho rlozhd gunniats zho por grë zhiwseed zho. ¹⁹ Led yed zho ngab lo Jesús, men ne rnabey lo ne grëse ne ne nac ne zha ne ngab lo me. Tel ne, me racnie ne, tipse noyun me ne, laa ne noyabiiniraa zigne racladz Dios.

²⁰ Zeene sca gut Jesús, gataa bnitlo me grëtaa mine nac to glo, gane niina ngadoodraa to lo grë ncuaaane zienal grëraa miech guidzliu. ¿Pe nac dzigo ne bii zienal to grë min co? ²¹ Zig nac grë mine rnabey zho to, rnee zho: “Nod gon yquiin to ncuaan rii, nod gow to min rii, gacd ygaal to ncuaan rii.” ²² Ncuaaane tib rded nac grë ncuaaane qui, zig nac guielwagw led ncuaaane gdiid ga, grëse wseed qui miechse bleebeya. ²³ Parga nli na zootle nixbiini nac grë wseed co, sac rioxco zho dien zha tsiegan zho grë anjl, rac ndooladz zho lo miech, ni rsacsi zho xcuerp zho; per rriee lod grë ncuaan co ctsëw xpensar zho, zdoz zho, parne gnabey zho xcuerp zho.

3

¹ Golguien ganle, stible guielmban rap to niina, lëë guielmban co bgaa to zeene brieeban Jesús; gacxe waa, goltsoxco ygaa to grë guielnzaac ne no bgaa, zaatne zob Jesús cue Dios nëz derech. ² Grë guielnzaac ne no bgaa min co golconie guic to, led grëd ncuaaane no lo guidzliu rii; ³ sac gon, rrieequia gutle to lo grë ncuaaane no lo guidzliu rii, laa to mbanniele Jesús, zigne racladz Dios. ⁴ Laa ne rdziaap tib guielmban cub niina, sacne nacnie ne Jesús; gal dze ne laa me guiaad stib, laa ne no gdziin lo me gban ne zaatne nac lo xquielndzon me.

Zha gban zha ne rliladz Jesús

⁵ Gacxe nana sca, golsaan grëtaa guielntseeb ne run miech lo guidzliu rii: tsoniede to zha ne led tsieelde to, gunde to grë ncuaaane mbeeguielto, gdeete to diidz gnabey xcuerp to to, gunde to ncuaaane ndzinlid ne racladz to, ni gacblëde to lo dimi (sac tel scaw, dzigo dimi rsan to xlgar Dios).

6 Grë dol rii run grë zha ne nêd gon xtiidz Dios, lozh ga lëe mine tsieguial zho laa zho yгаа lo guielzi ne csaab Dios. 7 Zig nac to, grë min co been to glo; 8 sangue niina, none csaan tow, ni lalnu:

glëëniëdraa to samiech to,
sobzhiandraa to,
gundraa to guielntseeb,
gneeëndraa to samiech to,
gneedraa to diidzguidz,

9 yquidiedraa to samiech to.

Sac gon, nacdraa to zigne nac to glo, laa to brieële lo grëtaa mine been to. 10 Stible nac lo xquielmban to niina: tib miech cuble nac to, ni laa to bii nodzëë haxta que ne gac to zigne racladz Dios men ne psan miech, zeena scagaa lozh gunbey to zha nac me. 11 Zha ne bgaale guielmban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaad guiedz nroob, dien cho ziaadgaa guiedz win; dien cho rac, cho gacdgaa; dien cho run xtsiin ben, dien chogaa nac zha rnabey. Mine rquiinraa niina, nacre grëse zho guien ganle Jesús nac men ne mazdraa non, me none gnalo zho.

12 Golgan ganle, zha nquialadztaa Dios to, ib laa me ble to gac to miech ne ygab xnëz me. Zaacse sca golban, ne nlipaa dib zdo to:

golquia zdo samiech to,
niowse golgac lo samiech to,
ndooladz golgac lo samiech to,
nguudzladz golgac lo samiech to,
guieedniede to samiech to.

13 Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon. 14 Ni mine mazdraa none tsoxco to, golleynie zha ne nacgrë to zigne racladz Dios, zeena tipse gac to; ni scagaa gleynie to grëraa samiech to. 15 Jesús nac men ne ctiche grëtaa ncuaaë ndzinlid ne no zdo to, zeena niowse gbannie to samiech to. Lëe tib guielnzaac co no yгаа to ne laa Dios bredz to, ni scagaa none gban to, zeena tipse gac to grë to. Golsoladz goldeed xquizh lo me.

16 Niapse mine nac Xtiidz Jesús golconie guic to, golco zdo to. Golquien grë guielbiini ne rneedz me lo to, golseed grë zha ne nacgrë to, ni zha ne rxin, golnee lo zho zaacse gac zho. Dib zdo to goldeed xquizh lo Dios por grëtaa mine run me, ine golgoolnie me grë salm, golgoolnie me grë cant ne rdziolnie ne me. 17 Ncuaaë guntaa to, niicle zeene gnee tow, zeene gungaa to tib dziina, golguna zigne rdziladz Jesús, men ne rnabey ne; ni tibaque goldeed xquizh lo Dios men ne nac Pxoz to, niina ne laa to ngable lo Jesús.

18 To ne nac to men wnaa ne ptsieelniale, golgon xtiidz tsieel to, sac ible sca nonguie gban miech ne no xnëz Jesús.

19 To ne nac to men bgui ne ptsieelniale, golleynie tsieel to; gacnchogde to lo me.

20 To ne nac to mëëd, golgon mine rnee pxoz to, mine rnee xniaa to, sac sca rdziladz Dios.

21 Togaa ne nac to men nguzan, gunde to ncuaaë gunglëë to xpëëd to, zeena csande to zdo zho.

22 To ne nac to zha ne lega run xtsiin ben lo guidzliu rii, golgun grëse mine rnabey zho to; gunde to zeene zose zho lo to dzigose yquiaalo to gun to dziin, zeena guianzuiu to lo zho; sinque dib zdo to golgun xtsiin zho, golguien

ganle Dios zobwi ran me pe run to. ²³ Grëse dziin ne gun to, ine nguieel golgac golguna, zig nac zeene xtsiinzhali Dios noyun to. ²⁴ Benque nanle to, zгаа to mine gdeed Dios lo grë zha ne ngab lo me, telne gon to diidz; sac gon Jesús nac men ne nlpaa rnabey to, ni lo me quia to dziin. ²⁵ Golgon diidz sca, sac zha ne gonda, ib tedsod zdeed Jesús mine tsieguial zho; sac gon, tel me led yed lo me ncuue miech.

4

¹ Togaa ne nac to zha ne quia miech xtsiin, zaacse golgac lo zho, csacside to zho. Golsoladz ganle, ye to tib ngundziin nac to lo men rnabey ne zob gbaa, ni me zobwi ganle pe run to.

Gnab zho gacniën Dios Pabl

² Bets, bzian, tel petaa rzac to tibaque golzodiidznie Dios, nsin golso, goldeed xquizh lo me. ³ Golnab lo me gacniën me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por min co znu nioogyu naa nu. ⁴ Golnab lo me gneedzraa me guielbiini lo naa, zeene cseed naa miech xtiidz me, guien zho mine rne naa; gun naa dziin co zigne no gun naaw.

⁵ Golquiin guielbiini ne rneedz Dios lo to, zeena guien to zha gnee to, zha gac to lo zha ne gard gliladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me. ⁶ Golguien tib godiidz ndzinli, tib godiidz niowse, min co golzodiidznie zho, ni none guien to zha ctsire to lo xtiidz zho tib tib zho.

⁷ Laa bets ne Tic guiaad i, me guiaadnie diidz lo to ganle zha no naa nu. Rleynie no me, tibaque laa me noxco quiadziuungza no me xtsiin men ndzon ne rnabey ne. ⁸ Ga nagon laa naa rxel me, me gnë lo to ganle zha no no nëz rii, ni gnee me lo to zeena cchoobladz me zdo to. ⁹ Ye menladz to Onésimo guiaadgrop me. Rleynie no Onésimo, ye me tibaque noxco me xtsiin men ndzon ne rnabey ne. Grop zho guiaadnie diidz i ganle zha nac grë ncuane quiyac nëz rii.

¹⁰ Golcaania zhibdiuzh Ristarc, men ne nioogyunie naa nu, zhibdiuzh Marcw betsyen Bernabé (laa naa nile lo to ganle, telne laa Marcw guiaadgan to i, niowse golcuëzlo me); ¹¹ ni zhibdiuzh Jesús, tib men ne rneeque zho Just. Lo grë zha Israel ne riladz Jesús, lëëse gza zha rii nac zha ne quiyun xyudar naa quiaseed no miech zha sëëb zho xnëz Dios, ni blactaa zichoobladz zho zdo naa.

¹² Golcaania zhibdiuzh menladz to Epaftr, ye me quiyun xtsiin Jesús nëz rii; tibaque rzodiidznie me Dios rnab me dziits so to lo Xtiidz Jesús, ni tiblique gac guic to tsoxco to gban to zigne rnabey Dios. ¹³ Nanpaa naa ganle pa lotaa nonie to guic me, grë to zha Laodicé ni zha Hierápolis.

¹⁴ Golcaania zhibdiuzh Demas ne, ni zhibdiuzh Luc men ne run rmed, lëë stib men ne nziuu lo no nu.

¹⁵ Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninf, ni lo grëraa zha ne rcaalsa lidz me i, riegoalnie zho Dios.

¹⁶ Zeene gon lozh glab lo lo guits rii, dzigo golxeela lo zha Laodicé, zeena ye zho glaba; ni scagaa to, gollab mine cxel naa lo zho. ¹⁷ Ni golguiab lo Arquip, tsoxco me zaacse gun me dziin ne bdeed Dios lo me i.

¹⁸ Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac men ne gunlay to, me glu lo to ganle pa lotaa noxco me to.

Pabl

GUILTS NE GLO PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté, laa no rxeeļ guits rii Tesalónica i; laaw ziaad lo to grëse to ne nac to zha ne ngable lo Jesús, meņ ndzon ne rnabey, ni lo Dios meņ ne nac Pxož ne.

Dios ni Jesús, me glu ganle pa lotaa noxco me to, zeena peet zhgab ctsebde to.

² Tibaque rdeed no xquizh lo Dios meņ ne nac Pxož ne, squitaa rneedz me guielbiini lo to; gzobtaa zeene rzodiidznie no me rzeet no to lo me. ³ Ni zeene rzeet no to lo me, rsoladz no grëtaa dziin ne ruņ to niina ne dib zdoo to rleynie to me, ni zha quialëb to lo grëtaa guielnë ne noyan to, tibaque nonie guic to ne ible zdziņ dze ne laa Jesús guiaad stib.

⁴ Bets, bzian, rleyniedox Dios to, ni ndioņ ne ganle me bzooblo to ygab to lo me. ⁵ Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espiritu Sant to bien to ganle niapse diidzli nac grë diidz ne nonee no lo to; scagaa no, goņ to ganle zha mban no, ga blu ne nli diidzli nac grë miņe noseed no miech. Ni golsoladz ganle zha biaadbannie no to i, bdzioxco no bdziuņ no xyudar to, sac ne nligaa rleynie no to.

⁶ Scagaa to, pseed to wban to zigne mban no, ni zigne wban meņ ndzon ne rnabey ne. Laa to pcaania xtiidz me, blozh ga, niicle nroob guielnë ne bded to, per bneedz Espiritu Sant guielbley lo to, ib peet güeynied guic to. ⁷ Grëse zha ne rliladz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to. ⁸ Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziotaa no, zhoob diidz ne squitaa dib zdoo to rliladz to Dios, rquiindraa ne no gzodiidza lo zho. ⁹ Zhale rzodiidz grëse zha biaad no lo to i, zha scataa niow blëzlo to no leņ dze co, ni zha psaan to grë zhiwseed xmengol to, grë ncuaaņe nac mdio lo to, laa to bliladz meņ ne nacpaa Dios ne nguamban, ni laa to zianaļ miņe rnabey me. ¹⁰ Ni rzodiidz zho zha zienie guic to ne ible zdziņ dze guiet Jesús gbaa guiaad me stib, ni quiambëz to gdziņ dze co. Xpëed Dios nac Jesús, Dios bleeaban me lo guielgut, ni me psilaa ne lo guielnëdox ne ziaadyob guiaad.

2

Zha güeyseed Pabl zho

¹ Bets, bzian, nanle to ganle zeene biaad no lo to i biaad-zhlëd no, brieelo pseed no to. ² Niicle ne wriiņ psacsi zho no guiedz Filip hor co, per laa no bii biaad ladz to i, ni niicle iġaaw bioxtseebaque no, per ib bdziebd no laa no pseed to Xtiidz Ndzon Jesús; sac ndioņ no Dios nacie no. ³ Ni diidzli nac miņe pseed no to, choot biaate par nquidiee no to, niicle biaategaa no par dien pe niaadla no lo to. ⁴ Xtiidz Dios bnee no, me bzo no gnee no lo miech zha laa zho lo doļ, ni miņ co nac dziin ne quiadziuņ no. Nli nzian zha ne rlëeniew, per laa no bii rdziuņ dziin co; sac zionaļd no gac miņe rdziladz miech, sinque laa no zionaļ gac miņe rdziladz Dios, meņ ne nan ganle pe rza zdoo ne.

⁵ Goņ to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi

rdziuund no min co. ⁶ Wlaltaa ib bguibd no dien zha niacnon no lo miech, niicle lo tow, niicle lo stibгаа miecha. ⁷ Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleynie men wnaa xpëdyeen me, nda nda ran me win; scadaa bleynie no to, ⁸ bio no bdzioxco no pseed no to Xtiidz Dios. Ne nlipaa bleynie no to, telne niaca mine niedziina haxta mbeeladz no no niet no por to.

⁹ Bets, bzian, rsoladzaxe to ganle ni lalnu ib psodziind no to; blactaa, dze guieel bdziuun no dziin, nozhal bdziniaa ncuane pquiin no len dze ne biadseed no to. ¹⁰ Dios zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuun no ncuane mbee no diidz ro miech, sinque laa no bdziuun mine rdziladz Dios. ¹¹ Masaque rziaac no to zig rzac tib dad xpëed zho, blactaa pchoobladz no zdoo to, bloonley no zdoo to tib tib to; ¹² pso no diidz lo to zaacse gac to, gban to zigne no gban zha ne no xnëz Dios, men ne bredz to gdzin to lo xquielndzon me, zaatne rnabey me.

¹³ Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nacda ncuane bleebey miech. Ni nligaa Xtiidz Diosa, gacxe waa zha ne rliladza zigne rzac tow niina, rzhixcuaa lo xquielmban zho. ¹⁴ Per zeene laa to bliladza, laa menladz to psacsi to; bded to zigne bdedaque grë zha Israel ne rliladz Jesús, sac tel zhaw psacsi menladz zho zho. ¹⁵ Ni lëëque zha ne psacsi zho ga, zha co bnab psacsi zho Jesús men ndzon ne rnabey, zigne beetaque zho grë zha ne pxeel Dios biadteed Xtiidz me; ni lëëque zho benxoon no. Ncuane rbinladz Dios run zho, rlëënie zho grëse miech, ¹⁶ rtsidil zho pe nacte nonee no lo grë zhazit zha laa zho lo dol. Loxaque quiayuntalraa zho xtol zho, per, jprobsaxe zho, sac guielnëdox ne ziaadyob cxeel Dios yгаа zho!

Racladz Pabl tsiegan Pabl zho stib

¹⁷ Bets, bzian, nli gard dzianlolsa ne wlal ne wbii no i, per tibaque rsoladz no to; blactaa rnee no telpaa zha guiaaddzian no to. ¹⁸ Tel naa blactaa gocladz naa nial naa, nialgan naa to. Laa no niaadle, per ptse mendox lo no gon, pca ma xnëz no pasëe no niaad. ¹⁹ Guiabde to togo quiayaanladz no to, sac gon to rnalo no conley zdoo no gal dze ne laa Jesús guiaad stib. To glu nli bdziuun no xtsiin me, to glu ne nli rioguijal no yгаа no premio ne gneedz me. ²⁰ Ne nligaa rley no rdzian no zha mban to, haxta riats no zeene raquiet to; sac to rlu ganle ne nli xtsiin Dios nodziuun no.

3

¹⁻² Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaan guiedz Aten. (Nanaxe to ganle ye Timoté nacgza no quiadziuun no xtsiin Dios, quiaseed no miech Xtiidz Ndzon Jesús.) Laa no pxeel me biaadgan me to, biadchoobladz me zdoo to, biadnee me lo to lozh sodziits to lo Xtiidz Dios; ³ zeena niicle tel pe guielnë ne noyantaa to, ib guiaand zdoo to. Nanle to ganle grëse ne ne rliladz ne Jesús, ib laa ne no dzian guielnë. ⁴ Led rsoladz to zeene biaad no i, bneegazh no ne ib laa ne no dzian guielnë; ni gon to ganle scase goca.

⁵ Ne nligaa tibaque bionie to guic naa, nacte mazd pxeelaque no Timoté, biaadso me dien pe bii zienal to mine nac Xtiidz Dios; sac ni naa nend pquill mendox to biire zienal to ncuane rnabey ma, dzigo zhlëse biadseed no to.

⁶ Laa niina ne laa Timoté blanso nu stib, blansonie me diidz, në me niowse mban to, rleynie to grë zha ne nacgrë to, dib zdoo to rliladz to Dios. Ni në me rleynie to no, ye to racladz tebaa zha gan to lo no, zigne rziaacaque no.

⁷ Min co nagon, bets, bzian, niicle ne nroob zhgab, nroob guiel^{ne} ne nodieed no nu, haxta biaanladz no grē ncuuañ co zeene gocndion no dziits zo to lo Xtiidz Dios, miñe rliladz ne. ⁸ Haxta stib goc zdoo no bdzion no squi tiblque laa to rleynie men ndzon ne rnabey ne; ⁹ ni rdzieldraa no diidz ne gnee no gdeed no xquizh lo Dios por to. Ni ne znutaa bloonley to zdoo no, haxta Dios ran ganle pa lotaa rley no. ¹⁰ Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grēraa miñe no gacnañ to lo Xtiidz me.

¹¹ Dios men ne nac Pxo^z ne, ni Jesús men ndzon ne rnabey ne, me gacniñ no griello guiaaddian no to. ¹² Jesús gacniñ to tsaraa to biini, zeena gleynieraa to grē zha ne nacgrē to ni grēraa samiech to, zigne rleynie no to. ¹³ Ni rnab no lo me, gacniñ me to tiblque gac to lo Xtiidz me, zeena in^e mbe zdoo to, ni tib dol rapde to zeene laa me gzo to lo Dios men ne nac Pxo^z ne, gal dze ne laa me guiaad stib con grē zha ne nacie me.

4

Guieľmban ne rdziladz Dios

¹ Zig zobwi Jesús men ndzon ne rnabey, laa no rso diidz lo to: zigse zie dze goltsoxcoraa gban to zigne rdziladz Dios, ² benque nanle to zhaw, sac lēe min co bnabey Jesús no biadseed no to gun to. ³ Sac gon, laa Dios racladz mbe guiaaⁿ to lo me, gunde to guieľyozh yquiangob to zha ne led tsielde to.

⁴ Grē zha bgui, zeene laa zho gnee lo tsiel zho, none niowse ndzinli gac zho; ⁵ gund zho zigne run grēraa miech ne nan^d zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquiin wnaa. ⁶ Niicle yquiangobde to tsiel sabgui to; sac zha ne sca run, sabgui zho ga rguinie zho; ni dol co ible tedsod zunquizh Dios zhow. Golsoladz ganle psole no diidz rii lo to glo, ni na laa no rneequew stib. ⁷ Golguien ganle, bredzdaxe Dios ne waa parne dziuun ne grē guieľyozh, sinque laa me bredz ne gban ne zigne racladz me. ⁸ Gacxe waa, zha ne zienald wseed rii, gacnañ zho ganle xtiidz Dios ga (men ne rdeed Espíritu Sant lo zha ne ngab lo me) noguiits zho, led xtiidzd cholze samiech zhow.

⁹ Laa zig nac guieľwleynie, nanle to zha no gleynie to grē zha ne nacgrē to. Rquiind cso no diidz lo to dien zha gun to, sac Dioszhal pseed to zha gleynie to zigtaa zha ne nacgrē tow, zigtagaa grē samiech tow. ¹⁰ Zig nac grē zha bets ne, zha bzian ne, zha ne no xtan zha Macedon, zēeb diidz rleynie to grē zha co. Goltsoxco sca, golleynieraa samiech to.

¹¹ Ni stib miñe rso no diidz lo to: niowse golbannie samiech to. Miñe nac xtsiin to tib tib to, min co goltsoxco, tozhal goldziniaa ncuuañe yquiin to; ¹² zeena peet gunfalte lo to, ni scagaa grē zha ne gard gliladz Xtiidz Dios, haxta gzee zdoo zho gan zho zha mban to. Golsoladz ganle psole no diidz rii lo to glo.

Ib ziaad Jesús tib

¹³ Bets, bzian, nu na ganle laa naa gzodiidz lo to zha gac grē zha ne ret, zha ne ngable lo Dios; zeena tsode to guieľ^{ne} zig rzac grē miech ne gard guien gnalo Jesús.

¹⁴ Ne, ne dib zdoo ne rliladz ne nli gut Jesús ni bleeban Dios me; scaquegaa none gliladz ne ible zbeeban Dios grēse zha ne dib zdoo rliladz Jesús, zeene laa Dios cxeel me guiaad me stib. ¹⁵ Gulgacnañ sca ganle, znu gon nac xtiidz me: Grēse zha ne ngab lo me, zha ne bii zomban gal dze co (gal dze ne guiaad Jesús) tednerd zho lo grē zha ne gutle. ¹⁶ Zeene laa me quiet gbaa, redz ro ne yquia, zlu zēeb tsi tib zha ne quianabey, tsi tib anj^l ne nonraa, ni tsi

zhitrompet Dios; hor co laa me guiet gbaa, laa grè zha ne ngab lo me, zha ne gutle, laa zho grieeban. ¹⁷ Dzigo tipse gac zho grè zho zha ne bii zomban ga, laa zho soquia laglaa lo xcow tsiedzieelo zho me; dzigosi gdzindraa dze ne gbiche zho lo me.

¹⁸ Nana sca minè rne naa nu, golsodiidza lo grèse zha ne nacgrè to; zeena conley to zdoo zho.

5

¹ Bets, bzian, nana par gni naa lo to dien pe guidze te guieel guiaad me, choot ndionda. ² Golgacnan ganle, lega nacle zeene gan miech laa me ziaadle, zig nac zeene rzèèb ngbaan yu guieel, zcho dien nanpaa pa hor sèèb ngbaan? ³ Zeene laa grè miech guiab: “Nasi wen ndxie ne, peet guielxtseeb nodraa”, tibaque zeene guien zho laa dze ne nitlo zho bdzinle, ni gasi grieelodraa cho csilaa zho. Sac zig znuse rnaaz yoob men wnaa ne bdzinle dze gap xpèed; scadaa gdziñ dze co.

⁴ Sangue to, bets, bzian, nacdraa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdziñ. ⁵ Miech ne nole lo xbiini Dios nac to, niini zo to; nacdraa to zha ne no glowtaa guieel, zha ne no lo ncow; ⁶ gacxe nagon waa, niini golso, tsienalde to minè run zha ne zienal guielntseeb; sac nac grè zha co zig nac zha ne nixgues, tibaque guieel no zho. ⁷ Sac tel guieela, guieel raaguies miech, niicle zha ne rzuudzgaaw guieel rzudz zho. ⁸ Sangue ne ne nac ne zha ne niini zo, none guien ne pe nac ncuaañe noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuaañe racw menguiib lo grè ncuaañe gnitlo zho; ni csoladz ne ganle laa Dios psilaale ne lo guielgut, gotsaa ziaac new zig rzac menguiib pchog ne rzob guic zho rsilaaw zho lo guielgut. ⁹ Sac gon bredzdaxe Dios ne waa yгаа ne guielnèdox ne no guiaad, sinque laa me bredz ne csilaa me ne lo guielnè co. Ni lèè min co rac zeene laa ne riladz Jesús. ¹⁰ Zeene gut Jesús, ga bdiizh me xtol ne; zeena yase mban ne o gutlegaa ne gal dze ne guiaad me, per me gbannie ne.

¹¹ Nana sca, tib tib to goldeed xfuers zha ne nacgrè to, niapse diidz ne gun xyudar zho choobraa zho lo Xtiiidz Dios, min co golnee lo zho; zigne quiaayunaque to niina.

Rso Pabl diidz

¹² Bets, bzian, laa no rso diidz lo to: Niowse golgac, niowse golnee lo grè zha ne pso Dios noyun xtsiin me lo to, zig nac zha ne zo lo to, zha ne rnee lo to zha no gban to. ¹³ Golguien ganle cho nac zho, golleynie zho, sac gon led lega nacd dziin ne quiaayun zho lo to. Golsoladz sca: ¡Zaacse golban, tilniede to samiech to!

¹⁴ Tel cho zha ne nacgrè to i, rsilo quiaayacgbech, golgactox lo zho, zeena guien zho gun zho dziin. Grè zha ne quiasaan Xtiiidz Dios, golnee lo zho zeena gleynie zhow stib; grègaa zha ne gard tsoguicpaa zha naca, golgun xyudar zho tsoguic zhow; niicle grèragaa zha ne nacgrè tow, ib guieedniede to zho.

¹⁵ Golguien tel pe guielntseeb ne run miech lo to, guiabde to ne scaque gun to zho; sinque mazd goltsoxco tibaque niowse golgac lo grèse miech, niicle lo zha ne nacgrè tow, niicle lo grèragaa miecha.

¹⁶ Tibaque nley golco zdoo to.

¹⁷ Tibaque golzodiidznie Dios.

¹⁸ Goldeed xquizh lo Dios, niicle zeene noyan to guielnèw, zeena nogaa to guielbleya, sac sca racladz me gun grèse zha ne no xnèz Jesús.

¹⁹ Golquiaadiag miñe rnee Espíritu Sant lo to, ni golguna.

²⁰ Golquiaadiag miñe rnee grë zha ne rnee grë diidz ne rsiaab Dios guic zho;

²¹ wen wen golwi dien pe nac miñe rnee zho, dzigo miñe rzac to rquinraa lo to, miñ co golseed.

²² Golbiche lo grëse guielntseeb ne no.

²³ Dios, men ne rtiche grëse dzeb, grëse zhgab, mezhah csañmbe to lo grëtaa guielntseeb; dib nacse to (zhiespíritu tow, xalm tow, xcuerp tow) zeeña ni tib dol rapde to gal dze ne laa Jesús men ndzon ne rnabey ne gbiire guiaad stib.

²⁴ Me bredz to, ni mesi run me miñe rnee me, gane ndion no ne ib zun me min rii.

²⁵ Grëse to bets, grëse to bzian, laa naa rnab lo to golsiguieł golnab lo Dios gacniñ me no.

²⁶ Golcaania zhibdiuzh no i, ine golxen nia grë zha ne nacgrë to, gollu ne nli rleynie to zho.

²⁷ Men ndzon ne rnabey, me rnabey naa laa naa rso diidz lo to, glab to guits rii lo grëse zha ne nacgrë to i.

²⁸ Jesús, men ndzon ne rnabey ne, me glu lo to ganle pa lotaa noxco me to. Pabl

BROP GUITS NE PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté; laa no rxeeļ stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, meņ ne nac Pxož ne, ni Jesús meņ ndzon ne rnabey.

² Dios meņ ne nac Pxož ne, ni Jesús meņ ne rnabey, me glu ganle pa lotaa noxco me to, zeena peet zhgab ctsebde to.

³ Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to rliładz to Xtiiđz me, ni rleynieraa to samiech to. ⁴ Zaatne rdziņtaa no lo grë zha ne nole xnëz me, ne nligaa rley no rzodiidz no lo zho zha squitaa dziiņs zo to, tibaque dib zdoos to rliładz to me niicle maase rtsidiļ miech to, niicle maase nroob guielnë ne quiaaded to. ⁵⁻⁶ Nli nroob guielnë noyan to, per scagaa laaw noyan to zeena tsieguial to gdziņ to zaatne rnabey me. Nu rlu ganle, Diosi zeene ruņ me guielwxtis, zigne no gaca sca ruņ mew. Zig nac niina, grë zha ne squi nosacsi to i, ib zгаа zho guielnëdox ne csiaab me.

⁷ To ne nac to zha ne quiaaded grë guielnë qui, golgona ganle, gal dze ne guiet Jesús gbaa guiaad me stib, ible zгаа ne descans ne gneedz me. Gal dze co, laa me guietnie grë xanļ me, zha ne rapraa poder; ⁸ masaque tib beldox ne guietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtiiđz Ndzon me. ⁹ Grëse zho laa me gnabey guey zho lo guielnëdox, zaatne gdziņdraa dze griece zho. Lëë bichele zho lo me ga, ib gdziņd dze gan zho lo xquielndzon me, gangaa zho grëtaa poder ne rap me. ¹⁰ Dze co, grëse zha ne no xnëz me laa zho goolnie me, gunnon zho me. Grëse zho see zdoos zho gan zho me; ye to gacgrë zho, sacne bliładz to Xtiiđz me mine biadseed no to.

¹¹ Gacxe waa, tibaque laa no quianab lo Dios gacniņ me to grieelo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xpoder me lo to, zeena grieelo guņ to grëse ncuaaņe rquiabladz to, zeena grieequia grëse dziin ne quiaayun to porne rliładz to me. ¹² Zeena sca cxobņeņ to ganle pa lotaa meņ nroob nac Jesús, meņ ndzon ne rnabey ne; ni niicle megaaw, zuņnon me to. Sac zigtāa mew, zigtāgaa Diosa, noxco me to.

2

Ziaad Jesús stib

¹ Bets, bzian, ib laa Jesús meņ ndzon ne rnabey ne no guiaad, ni laa ne gbannie me. ² Zeene gon to laa miech gnë laa dze co bdziņle, niicle gnë zho Espíritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliładz tow. Laa no rso diidz lo to, peet tsienied guic to, gdziebde to. ³ Ib gdeete to diidz yquidie zho to. Sac gon ansraa ne gdziņ dze co, ib nonee grieequia grë miech ne gacntseeb lo Dios; lozh ga, laa tib mgui ne nacie meņdox grieequiaque, zacntseeb me lo Dios, per gabil ga nitlo me.

⁴ Lëë zha co ctsidiļ grëse zhiwseed Dios, grëse ncuaaņe naclay lo miech; ni haxta zie zho ziesob zho zaatne nac leņ xyadoo Dios, guiab zho zha nac Dios. ⁵⁻⁶ Per no tib meņ ne notse lo zho niina, laga gdziņ dze ne laa zho guiaad.

Gol̄soladz gan̄le, blactaa bzeet naa min̄ rii lo to len̄ dze ne bl̄ez naa i. ⁷ Gr̄ese ncuaañe no guic zha ntseeb co gun̄ zho, laaw rsilole; loxaque run̄falt gdeed meñ ne notse lo zho ga diidz guiaad zho. ⁸ Zeene laa zho guiaad, hor co laa Jesús guiaadaque con gr̄e xquiēl̄ndzon me, dzigo me ne grieeese ro me gloozh me zho, gnitlo me zho.

⁹ Masaque men̄dox gnabey zha ntseeb co, niapse xpoder ma gap zho, nzian ncuaañe glu zho; zun̄ zho gr̄e ncuaañe gzee zdoo miech, per led ncuaañe nlida. ¹⁰ Zun̄ zho gr̄e ncuaañe lozh yquidie zho gr̄e zha ne nole n̄ez ne nitlo, zha ne ib bzhiguiel̄d n̄iladz min̄e nac diidzli. Tel̄ niaca min̄e n̄iladz zhow, n̄leynie zhow, nsilaa Dios zho. ¹¹ Saan Dios tsienal̄ zho gr̄e ncuaañe co, ni z̄iladz zhow zig nac zeene diidzliw; ¹² per ib siaabzi Dios zho, sac laa ne gliladz zho min̄e nac diidzli, lel̄ mazdraa gleynie zho gr̄e guiēl̄ntseeb.

Zha ne bdedlaale lo dol

¹³ Bets, bzian, gol̄guien̄ sca tibaque gol̄gotsaa gdeed ne xquizh lo Dios; sac gon̄ tel̄ to padzeelale bzooblo me to csilaa me to lo dol̄. Nacle diidz zeene laa to gliladz Xtiidz me, min̄e nac diidzli, laa Esp̄ritu Sant̄ csañmbe to lo me. ¹⁴ Min̄ co nagon̄ nacne pxeel̄ me no biadseed no to xtiidz me, guien̄ to zha laa to lo dol̄; zeena gdziñ to zaatne nac lo xquiēl̄ndzon Jesús, meñ ndzon ne rnabey ne. Gacxe waa, zha nziuu nac to lo me.

¹⁵ Gol̄guien̄ sca, dziits gol̄so, ib csaande to gr̄e min̄e pseed no to len̄ dze ne biaad no i, niicle min̄e rneegaa no lo to lo guits ne rxeel̄ no. ¹⁶⁻¹⁷ Ni Jesúsaque, meñ ndzon ne rnabey ne, ni Dios meñ ne nac Pxoze ne, me gneedz xfuers to dziits so to; zeena gr̄ese min̄e gnee tow, min̄e gun̄ tow, wen grieequiaw. Me blu gan̄le pa lotaa r̄leynie me ne, laa me bneedz tib guiēl̄bley ne gdziñd dze lozh lo ne, ni psan̄ me diidz pe nac min̄e naraa no yгаа ne. Ga rlu gan̄le pa lotaa noxco me ne, niicle ne riogual̄d new.

3

¹ Bets, bzian, nu ne laa no csiaalle, laa naa rnab lo to gol̄nab lo Dios gacnīen̄ me no, zeena znuse znuse diiz no Xtiidz Ndzon meñ ne rnabey ne; ni zha ne gontaaw, guien̄ zho ycaania zhow zigne pcaania tow. ² Ni gol̄nab lo me csilaa me no lадznia gr̄e zha ntseeb, zha ne run̄ min̄e notaa guic; sac gon̄ led gr̄ed miech r̄iladz Xtiidz Dios.

³ Dios meñ ndzon ne rnabey, min̄e rnee me run̄ mew; gacxe waa, ible zacnīen̄ me to dziits so to lo Xtiidz me, ni squianap me to tsobede to lадznia men̄dox. ⁴ Ndion̄ no ne me noyacnīen̄ to noyuuñ to gr̄e min̄e pso no diidz lo to, ni scagaa me gacnīen̄ to bii gun̄ tow. ⁵ Me gacnīen̄ to grieeelo gleynie to samiech to zigne r̄leynie Dios ne, ni guiuude to lo guiēl̄n̄e, sinque gol̄gac zigne b̄een̄ Jesús.

None gun̄ zho dziin

⁶ Bets zig zobwi Jesús, laa no rso diidz lo to: Tel̄ cho zha ne nacgr̄e to i, n̄edraa yquia dziin̄ gdziniaa zho ncuaañe gow zho, ib ctsieelsade to zho; sac gon̄ pseeete no to min̄ co. ⁷ Tel̄ no, gon̄ to gan̄le zha wban no zeene bliiaaz no lo to i; ni sca gon̄ none gban to. Ib bdeddzed no, ⁸ biod dze ne lega ndioow zhl̄e no xcuun̄ miech, blactaa haxta guiēel̄ bdziuuñ no dziin̄ bdziniaa no pe pquiiñ no; ib psodziind no lo to. ⁹ Niicle ne ib riogual̄ nab no lo to needz to ncuaañe nquiiñ no, per choot peet bnabd. Min̄e bdziuuñ no pquiaa no dziin̄ bdziniaa no pe pquiiñ no, par gan̄ to gan̄le zha nonguiel̄ gban to. ¹⁰ Led rsoladz to len̄ dze ne bliiaaz no i, pso no diidz rii lo to: Zha ne n̄ed gun̄ dziin̄, scagaa nodne gow zho. ¹¹ Laa niina laaw rzetaque naa stib, sac zidzion no no

bla zha ne nacgrë to i, mbe rundraa zho dziin scase quiaded dze zho; loxaque nëzrii nëzrec no zho rzëëb zho lo grë ncuaañe rieguiald zho. ¹² Zig zobwi Jesús meñ ne rnabey ne, laa no rso diidz lo zha ne sca run: none guñ zho dziin gdziniiaa zho ncuaañe yquiiñ zho.

¹³ Bets, bzian, ib guieete to, tibaque goltsoxco golgun niapse grë ncuaañe yquiiñ lo samiech to.

¹⁴ Tel cho zha ne nacgrë to i nëd gon diidz gban zho zigne rso no diidz nu, golwi dien chow, dzigo ctsieelsadraa to zho; zeena sca ctoladz zho. ¹⁵ Per gunde to zho zig run zha ne rlëënie samiech, sinque golnee lo zho gac-wen zho; golguien ganle bets to grë to.

¹⁶ Jesús nac meñ ne rtiche grëse zhgab, grëse guielxtseeb, me cuee to lo grëse zhizhgab to, lo grëse guielxtseeb gzataa dze. Me gacniën to grëse to.

¹⁷ Naa gon nac Pabl, naazhal pquia bdiuzh rii rxel naa lo to; naazhal pquia lë naa nu. Golgan ganle lëë xletr naa nu.

¹⁸ Jesús meñ ndzon ne rnabey ne, me gacniën to, me glu lo to ganle pa lotaa noxco me to.

Pabl

GUILTS NE GLO PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnalo ne, me bnabey quiayun naa dziin rii.

² Laa naa rxel guits rii lo luu, rzaac naa luu zig tib xpëed naa ne squi dib zdoo luu riladz luu Jesús. Dios men ne nac Pxoze ne, ni Jesús men ndzon ne rnabey ne, me yquia zdoo luu, me tsoxco grë zhizhgab luu zeena peet tsienied guic luu. Min co racladz naa, ni min co rnab naa lo Dios.

³ Zigne psoque naa diidz lo luu len dze ne laa naa za nëz xtan zha Macedon ga, laa luu biaan Efës i; scagaa niina laaw rneque naa lo luu stib: Sca no luu i, bnee lo bla zha ne squi no i, csetraade zho miech grë zhiwseed zho, sac ncuaaane paat rquiinda. ⁴ Bnee lo zho, csaan zho grë cuent gox qui, zhale noyunroobraa goon dien zharaa, peraa been grë xmengol ne. Ncuaaane paat rquiind ga, loxaque runctildiidza miech; mazd lo lal ne nodildiidz zho, tsoxco zho cseed zho miech ganle pe nactaa grë guiele nzaac ne rgaa grë zha ne rquiabladz dib zdoo riladz Jesús.

⁵ Laa naa rso diidz rii lo luu, sac racladz naa guiaanmbe zdoo grëse miech qui, guiaanmbe xquiele rien zho ni dib zdoo zho glladz zho Dios; zeena scagaa grieelo gleynie zho samiech zho. ⁶ Sac gon, no bla zha ne quiasaanle Xtiidz Ndzon Jesús mine nac diidzli, lel lo grë cuent ncuaaane paat rquiind co no zho. ⁷ Racladz zho zha cseed miech zha nac xley Dios, ni niicle zha riend zha naca; zeene rseed zho miech ni zha riendaque dien pe rnee zho.

⁸ Ndiönle ne ganle nli wen ley ne psan Dios, per tel niaca mine yquini miecha zigne psan me yquina. ⁹⁻¹⁰ Golguien ganle, biaan ley par gnabeya grë miech ne nole xnëz Dios, sinque laaw biaan par gnabeya grë:

zha ne racndaan lo Dios,
zha ne rond xtiidz Dios,

zha ntseeb,

zha ngoopdol,

zha ne rzacdraa ne men nroob nac Dios,

zha ne rguinie lë Dios,

zha ne rut pxoz,

zha ne rut xniaa,

zha ne rut samiech,

zha ne rionie zha ne led tsieeld,

zha ne nac mrazh,

zha ne rban samiech rieta zho zho stib nëz,

zha ne rquidie,

zha ne rzeet lë Dios par glladz miech xtiidz zho, ni nanpaa zho led diidzlid rnee zho.

Par grë zha rii nagon biaan ley; grë zha ne mband zigne nac Xtiidz Ndzon Dios; ¹¹ wseed ne rlu ganle zha laa miech lo dol. Ni lëe wseed co gon pso Dios naa none naa lo miech.

Pquia zdoo Dios Pabl

¹² Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyacnie me naa ne laaw quiayun naa. ¹³ Ne

nligaa rded naa xquizh lo me, sac glo ntseeb goc naa, bneenē naa me, ptsidil naa grē zha ne no xnēz me, ntseeb goc naa lo zho. Ni niicle ne scataa nac grē ncuaañe beñ naa, per pquia zdoo me naa; sac leñ dze co gard gliladz naa cho nac Jesús, lega lo xquie|n xen naa ga sca beñ naa.

¹⁴ ¡Pa lotaa pquia zdoo Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoo naa rleynie naa me. ¹⁵ Miñe rne naa nu niina, diidzliw, ni racladz naa grēse miech gliladz zho ganle, ible laa Jesús biaad lo guidzliu, biaadsilaa me grēse miech lo xtol zho; ni naapaa gon goc tib zha ne mazdraa ngoopdol. ¹⁶ Gacxe waa pquia zdoo Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grēaa miech ganle, zha ne gliladz me, zgaa zho tib guie|mban ne gdziñd dze lozh. ¹⁷ ¡Tibaque sca golgotsaa dziuunnon ne me, golgotsaa gnee ne grē diidz ndzon lo me, zigtaa niinaw zigtagaa leñ grēaa izdoo ne ziaada! Sac gon, me nac men nroob ne rnabey, men ne gdziñd dze ne nitlo. Sca rieguia|a.

¹⁸ Timoté, xin, laa naa rso diidz lo luu gon: Tibaque dziits bzo, ib guiaand zdoo luu; psoladz ganle scaque nac diidz ne bnee grē zha bets ne zeñe psiaab Dios guic zho bzeet zho pe nac grē miñe pso Dios luu gun luu. ¹⁹ Bien tibaque dib zdoo luu bliladz Jesús, ib gund luu ncuaañe nañ luu ndzinlid, zeena ine mbe xquie|rien luu; sac gon no zha ne niicle rienpaa zho pa miñ nac ncuaañe ndzinlid, ni laa zho ruña. ¡Miñ cocxe waa, grē zha ne sca nac, rsaanga zho miñe bliladz zho! ²⁰ Zig nac Himené grop Lejandr, sca beñ zho; per laa zho bzonēzle naa sca tsie zho xnēz mendox telne sca racladz zho; zeena guien zho ganle nodne gneenē zho Dios.

2

Gac-wnab lo Dios por grē miech

¹ Laa naa rso diidz lo to: Golguien none gnab to lo Dios por grēse miech ne ndxie lo guidzliu, golnab lo me gunlay me zho, gacnien me zho; ni goldeed xquizh lo me por grētaa ncuaañe run me. ² None gnab to lo me gacnien me grēse zha ne nac wxtis, grēse zha ne rnabey, gdeed me guie|bini lo zho zaacse gun zho guie|wxtis, zaacse gnabey zho; zeena tibiladz cue miech, ine gban ne zigne racladz me, sin choot peet glisquid lo ne.

³ Sca nagon nonguie| dziuun ne, ni scagaa rdziladz Dios, men ne pxeel Jesús biaadsilaa grēse miech lo dol; ⁴ men ne racladz grēse miech seēb xnēz Jesús, gacnañ zho miñe nac diidzli. ⁵ Guien zho ganle ne tibaque Dios no, ni tibaque men ne zac gdziñnie grēse miech lo me: lēē men co nac Jesús, men ne goc miech biaad lo guidzliu; ⁶ sac gon Jesús nac men ne bdeed xquie|mban, beet zho me, bdiizh me xtol miech. Miñ rii nagon racladz Dios gacnañ miech leñ dze rii. ⁷ Ni laa me pxeel naa none naaw lo grēse zha ne nacd zha Israel, noseed naa zho grēse miñe nac diidzli, zeena guien zho dib zdoo zho gliladz zho Dios. (Miñe rne naa nu diidzliw, rquidieed naa.)

⁸ Laa naa racladz sca, zaatne notaa zha ne dib zdoo rliladz Dios, grēse zha bgui none gzodiidznie zho Dios. Ni zeñe gzodiidznie zho me, none ine mbe zdoo zho, choot lo zha rlēēd zho, choot zha nodilnied zho. ⁹ Laa grē men wnaa, racladz naa tsoxco zho zaacse gacwxab zho, niowse, tibiladzse gac zho. Sac grē men wnaa ne rliladz Dios, par gluniow zho rquiind ne goon dien paraa xixcuaa guitsguic zho, dien pe que rbební, pe or gac xnil zho, gac zhibguiaa zho, pe lar niazh ne gacwgaa zho. ¹⁰ Par gluniow zho, rquiin zaacse gbannie zho samiech zho, zig none gban zha ne nole xnēz Dios. ¹¹ Zig nac leñ yadoo, none tibiladzse gac zho, dzese sob zho yquiaadiag zho tel pe

nac wseed ne noyac; ¹² gnedzd naa diidz ne zha so cseed miech, o zhagaa gnabey lo mgui. None dzese sob zho, ¹³ sac gon zeene psan Dios miech lo guidzliu, glose bzaa me Adán, dzigora bzaa me Ev. ¹⁴ Ni stiba, pquidied mendox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios. ¹⁵ Per silaa Dios wnaa lo xtolj zho, telne dib zdoo zho gliladz zho me, tsoxco zho gban zho zigne racladz me, guien zho gun zho mine rieguial wnaa, gap zho xpëed zho ni cchoob zho win.

3

Zha ne so lo grë zha ne ngab xnëz Dios

¹ Zha ne racladz so gnabey zho lo grë zha ne no xnëz Dios, tib dziin wen ga rquiabladz zho gun zho. Sca zëeb diidz rnee miech; ni nligaaw. ²⁻⁴ Per ga nagon rquiin:

tib zha ne zaacse mban,
zha ne mbannie loxaque wnaa ne nacse tsieel zho,
zha ne tibliladz,
zha ne nixbiini, rien pe run,
zha ne mbe lo, choot lega gzhidznied zho,
zha ne ine nley rac, rbëzlo zho miech lidz zho;
zha ne rien zha rseed miech,
zha ne rquiad lo nziu,
zha ne rleynied dil,
zha ne wen zdoo,
zha ne zaacse mbannie samiech,
zha ne rzonald dimi,
zha ne zaacse mban lidz,
zha ne rrieelo rnabey lidz, rnabey xpëed,
zha ne nguzobdiidz nac xpëed, rbeed mëed xquielto zho.

⁵ Sac tel zha ne rrieelod gnabey lidz, gnabey xpëed; ÷pe lel ne so zho gnabey zho lo grë zha ne no xnëz Dios dzigo grielo zhó?

⁶ Niicle tib zha ne griinpaa psilo bliladz Xtiidz Dios grielod gac zho dziin co; sac nend lëeque lëe zho gunnon zho, lozh ga lëeque zha yguib guiabdee zho. Golsoladz ganle zha bzhaac mendox. ⁷ Ni ye rquiin tib zha ne zëeb xtiidz ne miech ndzinli nac zho, haxta lo zha ne nod xnëz Dios; zeena tsod lega pe glisqui miech lo zho, sca gleyd mendox gac mine racladz ma.

Zha ne gun yudar len yadoo

⁸⁻¹² Scaquegaa zha ne so gun xyudar zha ne gnabey ga, ga rquiin:

tib zha ne zaacse mban,
zha ne rnee niapse diidzli,
zha ne rleynied guielgonziu,
zha ne zienald dimi,
zha ne dib zdoo rliladz grëse mine zhubnee lo Xtiidz Dios (mine rliladz ne,
mine nac diidzli),
zha ne mbe lo,
zha ne mbannie wnaa ne nacse tsieel zho,
zha ne rrieelo rnabey lidz,
zha ne rrieelo rnabey xpëed.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsieel zhow, none gac me:

tib wnaa ne zaacse mban,
wnaa ne rleynied diidzguizh,
wnaa ne rleynied nziu,

wnaa ne rquidied.

¹³ Sac zha ne zaacse guṅ dziin co, ziaṅṅziuuraa zho lo grē zha ne ngab lo Dios, ni scagaa ine mbe lo zho haxta no rō zho gnee zho lo miech zha nac ne laa zho rliładz Jesús.

Minē rliładz zha ne ngab lo Dios

¹⁴ Ib laa guic naa no guialniob naa i, guialgaṅ naa luu; per laa naa rxel diidz rii lo luu, ¹⁵ zeena telne grieelod guialniob naa, per laa luu nanle naganle cho goz luu yquiaanap grēraa zha ne ngab xnēz Dios nguiamban; zha ne ruṅbey miṅe nac diidzli, ni rlu zho gaṅle ne nli diidzliw. ¹⁶ Ne nligaa nroobdoo nac wseed ne ziaad lo Xtiidz Dios, miṅe rliładz ne, ngaṅ guieṅ miech zha naca. Nu raquiet miṅe been me:

Goc Jesús miech biaad me lo guidzliu,

ni blu Espiritu Sant gaṅle ne nli Xpēēdpaa Dios nac me;

ni goṅ grē anjl me.

Brieets bliaal Xtiidz me grē guiedz,

ndaldoo miech ne bliladz gaṅle cho nac me,

blozh ga biire zey me lo guieṅdzon ne no me gbaa.

4

Zha ne rsaan Xtiidz Dios

¹ Ib laa Espiritu Sant rneele ne len dze ne ziaadyob guiaad Jesús stib, ndal grē zha ne rliładzle Xtiidz me, laa zho csaana laa zho tsienal grē miṅe rnee zha ne rquidie, grē miṅe nac zhiwseed menḁox. ² Grē zha ne guiaadne wseed co, ni lalnu yquiad zdoo zho zeene laa zho yquidie miech. ³ Haxta stsidil zho ctsieelnia miech, znabey zho ycuee ncuaaṅe gow miech; zig nac zeene led Diosd psan ctsieelnia miech, zig nac zeene led med psan grē ncuaaṅe gow zho. Me psana grēsew, zeena grēse zha ne ngab xnēz me (zha ne beenbey diidzli), zeene laa zho yquiina gdeed zho xquizh lo me. ⁴ Sac grēse ncuaaṅe psan Dios, wena; zig nac grē ncuaaṅe rac wagw, peet nacda yquiin new, totsaque gdeed ne xquizh lo me zeene laa ne yquiina, ⁵ ni gnab ne guṅlay mew; sac zeene rdeed ne xquizh lo me ni rnab ne guṅlay mew, rsaṅmbe mew.

None guṅ Timoté xtsiin Jesús

⁶ Zeene cseed luu grē zha bets ne, zha bzian ne i, pseed zho grē miṅe rne naa lo luu nu, tibaque miṅe nac zhiwseed Dios güeynal; sac sca no guṅ zha ne squi zo quianap grē zha ne ngab lo Dios. ⁷ Ib yquiaadiagd luu grē cuent gox, grē cuent nxen ne paat rquiind; sinque Xtiidz Dios bioxco, miṅ co bloonie guic luu. ⁸ Gzooḁ ne zha ne rguit, wguit ne ruṅ zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxc new; sac miṅcosi squiina lo ne zigtaa lo guieṅmban riiw, zigtagaa lo guieṅmban ne naraa dziaṅ new. ⁹ Ne nligaa sca rieguial guṅ miech, ni grēse zho none tsoxc zhow! ¹⁰ Ni gacxe waa, laa ne quia dien zha gliladz zhow, niicle ne nroob grē guieṅne ne quiazian ne; sac ible Dios nac men ne rnalo ne, men nguiamban ne rsilaa grēse miech lo dol; sac grēse zha ne dib zdoo rliładz me, rsilaa me zho. ¹¹ Bioxco sca pseed zho grē miṅe rne naa lo luu nu, ni bnee lo zho guṅ zhow.

¹² Nli lēē tib zha nguiegse nac luu, per blu lo zho gaṅle zha none gban zho: Zeene gnee luu, niowse bguib diidz ne gnee luu, zaacse goc, ine bleynie samiech luu, tibaque dib zdoo luu bliladz Xtiidz Dios, ine ndzinli wban; zeena gaṅ zho gaṅle niicle ne zha nguieg luu, per nixbiini luu.

¹³ Laga gaḷ dze ne glanso naa i, bioxco blab Xtiidz Dios lo grēse zha bets ne, zha bzian ne i, bnee lo zho zha naca, bnee diidz ne conley zdoō zho; zeēna ine nguieel gac zho. ¹⁴ Ib csaand luu grē guielḃiini ne bneedz Dios lo luu i (guielḃiini ne bgaa luu zeēne psiaab me guic grē zha ne rnabey lo grē zha ne no xnēz me, pxobnia zho guic luu). ¹⁵ Grēse mine rne naa lo luu nu, bioxcow; zeēna gaḅ grēraa miech gaḅle zigse zie dze laa luu quiyabiiniraa lo Xtiidz Dios. ¹⁶ Biēn zaacse goc, biēn mine nac Xtiidz Dios, miḅ co pseed miech, ib csaand luuw; zeēna tedlaa luu lo grētaa guielḃne ne no guiaad, ni scagaa haxta grē zha ne rquiaadiag wseed ne rlu luu ni rban zhow, ye zho zlaa zho lo guielḃne co.

5

Men wnaa ne gutle tsiel

¹ Grē zha bgui gol ne nac bets ne i, zeēne zha rxin zho, biēn gactoxd luu lo zho, sinque zaacse bnee lo zho zig nac zeēne lo pxoz luu nonee luu; niiclegaa zha nguiega, zaacse goc lo zho, beēn zho cuent zig tib bets luu. ² Scaque grē men wnaa ne nac zhagol, ndooladz bnee lo me, beēn cuent lo xniaa luu ga zo luu; lo grē wnaa nguiega, ndzinli goc, niowse bnee lo zho, biēn gaḅle rrieequia tib bzian luu ga.

³⁻⁶ Grē men wnaa ne gutle tsiel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigse notaa guic zho, laa zho zienal loxaque grē ncuane gdeed guxt xcuerp zho; zha ne sca run, rrieequia gutle zho ga. Laa tel men wnaa ne scaque gutle tsiel, ni no xpēed me, no xiag me, dzigo zha none cteedlo me; none cseed zho gaḅ zho menlidz zho, gaḅ zho pxoz zho, gaḅ zho xniaa zho, sac goḅ me pchoob zho. Sca nonguiela, ni scagaa rdziladz Dios.

⁷ Pso diidz rii lo grē zha ne nacgrē to i, zeēna cseed zho sca gban zho, ni scagaa tsod pe nacle gneenē miech zho. ⁸ Sac zha ne tosoxcd gaḅ zha ne nacgrē zho, ni mine mazdraa telne niicle menlidz zho tosoxcd zho gaḅ zho, rdzieeld dzigo guiab zho laa zho rliladz Dios, haxta mazdraa nac xtol zho que tib zha ne gard gliladz me.

⁹⁻¹⁰ Ni stiba, grē men wnaa viud qui zha ne rquiabladz guḅ pe xtsiin Dios, biēn zha ne psale tsongal iz zha co psēeb lo list. Ni wen wen gočan telne:

bionied me stib mgui zeēne bii zomban tsiel me,
zaacse mban me,

zaacse pchoob me xpēed me,
dib zdoō me rbēzlo me miech lidz me,

ndooladz rac me lo grē zha ne no xnēz Jesús,
run me xyudar grē zha ne no lo tib guielḃne;

ni run me niapse ncuane wen ne rquiin lo samiech me.

¹¹⁻¹² Laa grē zha ne bii nguieg, ib yquiaad luu lē zho lo list co; sac nac wnaa nguieg, zeēne sob guic zho ctsieelnia zho, laa zho ctsieelnia stib. Loxaque guḅctal zho xtol zho ga, telne glo rquiabladz zho guḅ zho xtsiin Dios ni lozh ga laa zho csaanaquew. ¹³ Ni ye nac wnaa nguieg, rdziladz zho rquianzē zho; ni telne peet dziin guḅnd zho, racgbech zho; ni stiba, zeēne sca guieḅd pe guḅ zho dzigo laa zho rzhixcuuaa diidzguizh, laa zho rzēeb lo grē cuent ne rieguialdraa zho. ¹⁴ Gacxe waa, racladz naa grēse wnaa nguieg ne sca ret tsiel, mazd ctsieelnia zho stib; zeēna yquiaanap zho xpēed zho, yquiaanap zho ro lidz zho. Sca yguibd zho tso grē zha ne rlēeniele Xtiidz Jesús, gneenēraa zho zha ne rliladza. ¹⁵ Sac goḅ, blale wnaa ne sca gut tsiel zieriee xnēz Dios, lel laa zho zienal grē mine rnabey menḅox.

¹⁶ Psoladza ganle, tel cho tib zha bets ne, tib zha bzian ne i raclidz tib men wnaa ne gutle tsieel, none zha gan me, laa ne gnalo zho ne to yguib dien zha gdioun me; zeena gre ncuane runlo to i, zgaaw yquiin gre men ne nlipaa guieñd cho gan.

Mine rieguial zha ne zo lo zho

¹⁷ Gre zha ne zo rnabey lo gre zha ne ngab xnëz Dios, zha ne zaacse noyun dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel palal ncuane rcaa zho, ible rieguial ycaa zho chop lalgaw. ¹⁸ Gotsaa gwi ne ganle zha quia lo Xtiidz Dios, rneew: "Code to guix ro xma to, zeene no ma ye noguiits ma zhobxtil; igolsaan gow ma!" Laa stib lugar rnee: "Zha ne run dziin, ib none ycaa zho mine non xtsiin zho."

¹⁹ Bien gon Timoté, zeene guiaad zho lo luo, guiaad-zo zho tib men ne rnabey lo to, ib yquiaadiagd luo mine rnee zho, telne gzod zho chop tson zha ne gon ne nli been me mine rquiaqui zho me. ²⁰ Telne bind me diidz, bii noyun me dol co, dzigo squi ndxie gre zha ne nacgre to, goctox lo me; zeena sca gdieb greera zho gunscad zho. ²¹ Zig zobwi Dios, zig zobwi Jesús gre xanj me, laa naa rso diidz lo luo, been mine rne naa lo luo nu. Gdzieebd luo, yquiad zdoo luo, bnee lo zho tel chotaa nac zho.

²² Zeene gzo luo zha ne gun xtsiin Dios, gund luo ne lega tel chotaa gzo luo; sac gon, nend lëetse zha ne rap pe tib falt gzooblo luo, dzigo laa miech guiab nanpaa luo zha nac zho ni rliisquid luuw lo zho. Ible gdeete luo diidz gun luo ncuane gunctal xtol luo. ²³ (Gnid naa togo ible grielodraa guie luo vin, zac guie luo niipyeena maase poc poc, laa ne guie luo niab nis; zeena glunëdraa zdoo luo.) ²⁴ Sac gre zha ne no lo dol, no dol co znuse rzhoooben; nogaaw, haxta gal dze ne laa zho gacredz lo Dios, dzigora xoobenea. ²⁵ Scaquegaa zha ne run guielwen, no ncuaan co znuse glu; nogaaw, niicle ne rluda niina per ible dzin dze ne laaw glu.

6

Zha ne quiazhoo xtsiin ben

¹ Gre zha bets ne, zha bzian ne, zha ne lega run xtsiin ben, none gon zho xtiidz men ne quia zho xtsiin; zeena yguibd zho gneenë miech Dios, gneenë zho Xtiidz me mine noseed ne miech.

² Scaquegaa gre zha ne run xtsiin men ne riladzle Xtiidz Dios, none gon zho mine rnabey me zho; led guiabd zho por bets zhow, gun zho mine racladztaa zho. Ni gale none tsienie guic zho wenraa grieequia gre dziin ne noyun zho; sac gon lo tib men ne no xnëz Dios ga, lo tib men ne rleynie zho ga yquiin xtsiin zho.

Grese mine none naa lo luo nu, pseed gre miech quiw, ni pso diidz lo zho gun zhow. ³ Zriequia zha ne guiaadnie stib wseed, mine ni nacdrea Xtiidz Jesús; sac zhiwseed Jesús rlu zha gban gre zha ne no xnëz Dios. ⁴⁻⁵ Zha ne sca rlu stib wseed, lega:

tib miech niats ga nac zho,

ible peet riend zho,

runbeyd zho mine nac diidzli,

rdziladz zho rdildiidznie zho miech; ga rlan,

laa miech rdillsa,

laa miech rlëëlsa,

laa miech rbidzgsa; rlozh ga,

rliladzdraa zho pe rnee samiech zho.

Masaque nan zho telne sëeb zho xnëz Dios, nroob dimi ne gunlo zho.

¡Bien ib ctsieelsad luu zha co! ⁶ Parga nli zha ne rzëëb xnëz Dios, zeene rzac zdoo zho mine rzoladztaa Dios lo zho, tib guielnzaac nroob ga rgaa zho. ⁷ Ni sca nonguieła, sac gon zeene rlanso ne lo guidzliu, peet rlansonied ne; ni scaquegaa zeene laa ne gbi, peet grieelod güey ne. ⁸ Gacxe waa, none sac zdoo ne ni gley ne totsaque gneedz Dios ncuaañe gow ne, ni ncuaañe gacwxab ne. ⁹ Sac grë zha ne rzoobladz xen nroob dimi, no zho rquuil mendox zho run zho ncuaañe ndzinlidraa par gdziniiaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzobni ne laa zho run grë guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielnë ne ziedzin lo zho.

Dib zdoo Timoté gliladz Timoté Dios

¹¹ Sangue luu gon, bien ganle xnëz Dios no luu, gund luu grë ncuaañ co. Bioxco zaacse wban, tibaque bioxco gban luu zigne racladz Dios, dib zdoo luu bliladz me, bleyne me ni bleyne samiech luu, ndooladz goc lo zho, ni lalnu ib guiaand zdoo luu.

¹² Bleeladz luu been grë dziin ne run zha ne dib zdoo riladz Dios, zigne run zha ne rie lo dil, rbeeladz zho zho. Gon ganle, laa luu nole nëz ne ygaa luu guielmban ne gdzind dze lozh, ib csaand luu nëz co; sac niicle Dios ible min co bzooblo me luu. Psoladz ganle, squi ndxie miech bleero luu ne dib zdoo luu riladz luu Xtiidz Jesús. ¹³ Dios (men ne rdeed xquielmban grëtaa ncuaañe no), ni Jesús (men ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganle ¹⁴ laa naa rso grë diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesús, men ndzon ne rnabey ne. ¹⁵ ¡Ib laa me no guiaad! Ni Dios cxeel me zeene laa dze co gdzin. Dios men nroob ne rnabey, men ne rnabey lo grëtaa zha ne nac rey, lo grëtaa zha ne rnabey. ¹⁶ Mesi ib gdzind dze guet me, lo biini ne no mew, tsod zha ne glëb gdzin ga; ni tib miech lo guidzliu rii gard gan me, ni grieelodgaa gan zho me. ¡Gacxe waa, ible me none dziuunnon ne, sac gon men non, men rnabey nac me! Min co nagon no dziuun ne.

¹⁷ Grë zha ne rapchen, bnee lo zho cseed zho gdaannied zho grë ncuaañe rap zho, ib gnalod zho grë ncuaañ co; sac gon ncuaañe tib rded ga. Dios none gnalo zho, ni mesi rneedz me grëtaa ncuaañe wen ne rquiin ne. ¹⁸ Gudz lo zho gacmbidzd zho, none gun zho grë ncuaañe yquiin lo samiech zho, ycad zho ncuaañe quianie zho, ine gun zho xyudar zha ne peet quianied. ¹⁹ Zha ne sca gun, tib guielnzaac nroob ne ygaa zho; lëë guielnzaac co gan zho len dze ne ziaadraa. ¡Ni haxta zgaa zho tib guielmban ne gdzind dze lozh!

²⁰ Timoté, laa naa rbire rso diidz lo luu no gon: ib csaand luu dziin ne bneedz Dios lo luu i. Yquiaadiagd luu grë wseed yozh ne ziaadnie stib miech, wseed ne rneenë Xtiidz Dios, niicle ne rnee zha ne ziaadniew zha rac nac zho, per nliid ne diidzli rnee zho. ²¹ Sac gon, blale zha ne ziesaan mine nac diidzli, laa zho zienal wseed co; per rienđ zho lel znu rziaabnëz zho ga.

Dios men ndzon ne rnabey, me noxco luu, me gzhixcuaa lo grë zhizhgab luu. Me gacniën luu peet tsienied guic luu.

Pabl

BROP GUITS NE PXEEL PABL LO TIMOTÉ

¡Diuzh Timoté!

¹Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëëb xnëz Jesús.

²Laa naa rxeel stib guits rii lo luu i gon xin; xin rne naa lo luu sac rzaac naa luu zig tib xpëëd naa. Mine racladz naa ni rnab naa lo Dios men ne nac Pxoze, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

³¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacniën me luu! Dib zdoo naa noxco naa zana naa mine rnabey me, zigne bioxcoque grë xmengoldoo naa güeynal zhow.

⁴Zeene rsoladz naa blactaa roon luu zeene wbi naa i, zoot naa tebaa zha ganmiob naa luu stib; zeena tsonley zdoo naa. ⁵Ni rsoladz naa scataa dib zdoo luu rliadz luu Dios; léëdaaque xnanit luu Loid, ni xniala luu Eunis, ni nanpaa naa scataque dib zdoo luu rliadz luu me.

⁶Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡Ib csaand luuw! ⁷Sac gon, laa Dios rneedz zhiEspíritu me lo ne, parne sodziebdraa ne, parne dziaapraa ne xfuers me, gleynieraa ne samiech ne, ni tsabiinraa ne.

⁸Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu nioogyu naa nu, loxaque ne rliadz naa me. Sinque bloo zdoo luu ne ib laa luu no gan grë guielnë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne. ⁹Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuu ne, sac haxta zeene gard cue guidzliu, laa me psan diidz ne laa me glu ganle pa lotaa rleynie me ne.

¹⁰Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne yгаа miech tib guielmban ne gdziind dze lozh, none gliladz zho Xtiidz Ndzon me. ¹¹Ible min co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca; ¹²mincoxe waa znutaa grë ncuaa ne nodeed naa. Per ni lalnu ib rtoladz naa, sac wen wen nan naa cho nac men ne rliadz naa, ni nan naa mesi zrieelo yquiaanap me naa nitnéz naa haxta gal dze ne laa me guiaad.

¹³Bien, güeynal grë mine pseed naa luu, sac gon min co nac mine rquiin. Tiblique bliladz Dios, ine bleynie samiech luu zigne no dziuu ne ne nac ne zha ne no xnëz Jesús. ¹⁴Espíritu Sant men ne nacnie ne, me yquiaanap luu, me gacniën luu ib csaand luu zhiwseed Dios, ib csaand luu dziin ne bzó Dios luu gun luu.

¹⁵Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa. ¹⁶Sangue Onesifr, rnab naa lo Dios yquia zdoo Dios me grë menlidz me, sac blactaa biadchoobladz me zdoo naa. Niicle ne znu nioogyu naa nu, per ib beend me ne ntoladz me niaadgan me

naa; ¹⁷ sinque zigne blanso me lad guiedz Roma nu, pquiaguib me naa haxta bdiel naa lo me. ¹⁸ Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdoos Dios me gal dze ne laa grése miech gacredz lo Dios.

2

Dziits so Timoté lo Xtiidz Dios

¹ Xin, sangue luu gon tibaque squi dziits bzo lo Xtiidz Dios, gon ganle Jesús noxco grése zhizhgab luu.

² Grése mine gon luu pseed naa miech, scagaa niina bioxco bneew lo zha ne rgobey luu grieelo tsie tsieneew lo stib miech. ³ Ib gacmband luu zeene noyan luu gré pe guielné, sinque bioxco been xtsiin Jesús zigne no gon luuw, masaque been cuent xmenguiib me nac luu. ⁴ Sac gon, tib zha ne nac menguiib, grielod sêéb zho pe stib lo cuent ne nacd xtsiin menguiib, sac none nsin so zho gon zho tel pe nac mine rnee men ne rnabey zho. ⁵ Bioxco been mine rnee men ne rnabey ne, zig run zha ne rie tib lo wguite; sac zha co telne tsoxcd zho quit zho zigne nacpaa lo wguite, ycaaniad zho premio. ⁶ Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zaatne ran zho. ⁷ Mine blozh bzet naa nu, blonieuw guic luu, ni Jesús nac men ne gneedz guielbiini lo luu guien luu zha naca.

⁸ Tibaque psoladz ganle cho nac Jesús, zha brieequia me lo xtii rey David, ni zha brieegan me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho. ⁹ Ni ne nonecxe naa Diidz Ndzon rii waa, gane nroob guielné ne noyan naa; zig nac niina, laa naa ngadoo zaatne niogyu naa nu zootne cho zha dox. Ni niicle ne znu niogyu naa nu, sangue Xtiidz Dios led yeda niogyu. ¹⁰ Laa naa quiaxew mine quiaadeetaa naa, zeena grése zha ne bzooblolo Dios gliladz Jesús, grielo yquiaadiag zho zha laa zho lo dol, ni zha yгаа zho tib guielmban ndzon ne gdziind dze lozh.

¹¹ Ni znu gon naca:

Telne znézle me no ne zeene laa ne guet,
ib zгаа ne guiobannie ne me.

¹² Niicle nroob guielné dzian ne porne riladz ne me,
scagaa ible zdziin ne zaatne gnabeynie me ne;
telne guiab ne runbeyd ne me,
scaquegaa me ziab me runbeyd me ne.

¹³ Niicle telne riaanladz ne me,
sangue me riaanladz me ne;

mine rnee me run mew, sac mesi rtsëed me xtiidz me.

Tsoxco Timoté grieequia xtsiin Timoté

¹⁴ Bien, beencsoladz gré zha bets ne i, zha bzian ne i gré min rii. Zig zobwi Dios ganle laa naa rso diidz lo luu, gudz lo zho tildiidzniedraa zho miech gré godiidz ne paat rquiind; led ncuaane ndzinlida, loxaque rungüeta guic zha ne rquiaadiaga.

¹⁵ Tibaque bioxco zaacse grieequia xtsiin Dios, mine noyun luu, zeena wen grieequia luu zeene laa luu gdziin lo me. Zigne nacse Xtiidz me, sca pseed miecha. ¹⁶ Yquiaadiagd luu gré wseed yozh, ncuaane ni lalnu paat rquiind; zha ne zienal wseed co, zig zie dze laa zho rzoziitraa lo Dios. ¹⁷ Lega nac zhiwseed zho zig nac gré guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co

rleynie zho, ¹⁸ sac tel zha zienaldraa zho mine nac diidzli; rnee zho bleebanle Dios grē mengut. No palal zha ne riladzle Xtīdz Dios, zeene ron zho min co, riendraa zho dien pa mine gliladz zho. ¹⁹ Sangue zha ne nlipaa no xnēz Dios, tsod pe nacne gree zho xnēz me sac lole me ngab zho; zigne zho bneeque lo Xtīdz me zaatne rnee: “Runbey Dios cho nac zha ne nlipaa no xnēz me”; ni rneequew: “Grē zha ne nlipaa ngab xnēz Jesús, none csaan zho grēse guielntseeb.”

²⁰ Zaatne nac lidz tib zha ricw lēē, no grē xtsiin rotie zho mine niaa or, mine niaa plat, ni noquegaa mine niaa yag, mine niaa ben. Mine mazdraa niazh, min co rquiin zho rio ncuaane row miech; laa mine beelze niaa, ga rgo zho ncuaane row ma. ²¹ Scaquegaa miech, zeene csaan zho grēse ncuaane paat rquind, ible squiin zho lo Dios gun zho xtsiin me mine mazdraa nroob, zigne rquiin grē trast niazh co.

²² Nac lo guielnguieg, ndal grē ncuaane ndzinlid rio guic miech run zho, sangue luu gon tsienied grē ncuaan co guic luu, bioxco zaacse wban, dib zdoo luu bnalo Dios, ine bleynie grēse samiech luu, tilnied luu zho; grē zha ne squi nli mbe zdoo, rbedz zho Dios, zaacse wbannie zho. ²³ Ib yquiaadiagd luu grē godiidz ne paat rquind, sac gon loxaque runctila miech.

²⁴ Zha ne squi run xtsiin Dios, nodne tso zho dien pe tildiiz zho; sinque none wen gac zho lo grēse miech. None guien zho zha cseed zho miech; ib guieednied zho miech, ²⁵ ndooladz gac zho gnee zho lo zha ne rlēēnie Xtīdz Dios. Ni scagaa Dios cxobnia guic grē zha co, yguudz zdoo zho csaan zho grē xquielntseeb zho, gacnan zho mine nac diidzli; ²⁶ zeena tsaa zho biini gree zho ladznia mendox, zaatne ngadoo zho.

3

Len dze ne ziaadyob nitlo guidzliu

¹ Ni none gacnan luu ganle, zeene laa dze ziaadyobpaa nitlo guidzliu, nroob nac guielnē ne gan grē zha ne no xnēz Dios. ² Zrieequia grē zha ne: gacladz tebaa lose zho yquiin grētaa ncuaane no, loxaque dimi gleynie zho,

niats gac zho,
zdaannie zho ncuaane ni rapd zho,
zneenē zho Dios,

gond zho xtiidz pxoz zho, xtiidz xnīaa zho;

sacd zdoo zho mine gun miech lo zho,

laa zho gban zigne notaa guic zho, ib yquiaadiagd zho Xtīdz Dios.

³ Gacnandraa zho pe nac guielwleynie, ib yquiad zdoo zho,

loxaque diidz gzhixcuaa zho,

lēbd zho gnabey zho xcuerp zho,

sacsi zho samiech zho,

stsidil zho grēse ncuaane rquiin,

⁴ zgo zho zha ne ndzieeldiidz zho nia zha ne quin zho,

ni lalnu guielto tsod lo zho,

loxaque dien zha gdeed guxt xcuerp zho tso zho, laa ne yguib zho xnēz Dios.

⁵ Squiaaloo zho ye zho riladz Dios, per lo grē ncuaane gun zho, ga glu ne riladzd zho me.

Bien, ib ctsieelsad luu grē miech ne sca nac. ⁶ Sac lēē zha ne nacgrē zho ga, rzēēb yu rietsitnie grē wnaa yozh ne zienal ncuaane gdeedtaa guxt xcuerp. ⁷ Tibaque no zho dieen peraa rseed zho, per ib rioguicd zho mine nac diidzli. ⁸ Zigne been chop zha ne bil diidz dox padzeela, Janes grop

Jambres, gocndaan zho lo Moisés; scaque run zha co niina, rlëeniedox zho mine nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios; ⁹ per gacdaquew xtse, zeene laa diidz guien ganle pe clas miech nac zho, dzigo lëëque grë ncuane yozh ne run zho cuee xquielto zho; zigne bzaaacaque zha ne sca blëenie Moisés.

Csaand Timoté mine pseed me

¹⁰ Sangue luu, nanle luu ganle zha nac grë mine pseed naa luu. Wen wen nan luu ganle zha mban naa, pe no guic naa gun naa, zha dib zdoo naa rililadz naa Dios, zha dib zdoo naa rleynie naa samiech naa, riednied naa zho.

¹¹ Nanle luu ganle zha rneedz Dios xfuers naa, rlëeb naa grëtaa mine rteed miech naa, zig been zho naa guiedz Antioquí, guiedz Icon ni Listr; blactaa pquianał zho naa; per tibaque gocnie Dios naa, psilaa me naa lo grëtaa guielxtseeb co. ¹² Ni scagaa naca, grë zha ne rquiabladz gban zigne rnabey Jesús, ible squianał miech zho. ¹³ Per probsaxe grë zha ne sca quiaayunctal xtol, zha ne sca noquidie miech, zig zie dze laa zho noteedquie zho nëz ne nitlo zho. Quiaguitnie zho miech, ni quiaguitniegaa menox zho.

¹⁴ Sangue luu gon, csaand luu grë mine pseed luu. Nanween luu ganle diidzliw, ni runbeygaa luu cho nac grë zha ne bneew lo luu. ¹⁵ Ni stiba, zigne ziadroob luu psilo quiaaseed luu Xtiidz Dios, ni lëew hdixbiini guic luu gocnan luu ne Jesús none gliladz miech parne laa zho lo dol. ¹⁶ Dib nacse Xtiidz Dios, Espiritu Sant psiaaba guic zha ne pquiaaw, laaw biaan:

rseeda ne mine nac diidzli,
rsow diidz lo ne guien ne pa lo quiaxin ne,
rseeda ne zaacse gban ne.

¹⁷ Zeena sca grëse zha ne no xnëz Dios, grielo wen wen cseed zho, ni guien zho zha gun zho grëse dziin ne rquiin, dziin ne rieguial zho gun zho.

4

None gnee Timoté Xtiidz Dios

¹⁻² Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men gunquizh miech grëtaa ncuane been zho, zigtaa zha ne mbana zigtagaa zha ne gutlew, zeene gdziñ dze ne laa me guiaad gnabey me.) Bioxco tel pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan luu pe falt ne noyun zho, ni scagaa bloonley zdoo zho. Bioxco tibaque pseed zho, ib guieednied luu zho. ³ Sac gon, dzdin dze ne siguieldraa miech yquiaadiag zho mine nac diidzli; sinque laa zho yquiauib zhaase zhaase dien cho cseed zho tel pe nac ncuane rdziladzse zho yquiaadiag zho. ⁴ Gleyndied zho Xtiidz Dios, laa ne yquiaadiag zho mine nac xtiidz me, lel laa zho tsoxco yquiaadiag zho grë mine nac zhiwseed miech guidzliu. ⁵ Sangue luu gon, nsin bzo gdeete luu diidz gunguet zho luu. Zaacse been grë mine pso Dios luu gun luu, bnee lo miech zha laa zho lo dol; niicle tel pe nactaa guielne ne noded luu, gacmband luu.

⁶ Rien naa ziaadyoble ne laa naa gbi lo guidzliu rii, zhile gdziñ dze ne laa zho gut naa. ⁷ Len ngbidz ne wban naa, tibaque dib zdoo naa bliladz naa Dios; xtsiin mew, laaw ben naa zigne bnabey me naa, ni laaw psiaalgaa naa niina. Zigne runda grë menguiib ne rie lo dil, sca bleeladz naa naa ben naa xtsiin me; ⁸ laa na nagon, mine quiambëzse naa nac premio ne no gneez me lo naa. Lëë premio co gneedz me gal dze ne guiaad me guiaadgun me guielwxtis; ni led loxaque naadse ygaaw, sinque grëse zha ne rleynie me, grë

zha ne dib zdoos quiambëz gdziñ dze ne guiaad me stib, grëse zha co yгаа premio co.

Tsieniob Timoté

⁹ Bzhiguiel guiaadniob luu guiaadgan luu naa nu; ¹⁰ sac zig nac Demas, laa me bichele lo naa. Psañaque me naa nu laa me zie nëz Tesalónica; sac mazdraa nonie grë ncuaañe lo guidzliu rii guic me. Bay zig nac Crescent, laa me brieë zie me nëz Galás; Tit na, zieegaa nëz Dalmás; laa zho zie zaatne nacle diidz tsie zho. ¹¹⁻¹² Niicle Tic guiend nu, sac laa me pxel naa zie me Efés. Loxaque Lucse biaan lo naa nu.

Psoladz gon tsieguib luu Marcw, zeene laa luu guiaad nëz rii bzhiguiel guiaadnie luu me; sac rquini me nu gun me xyudar naa lo xtsiin Dios. ¹³ Ni psoladzpaa guiaadnie luu lar ne rbiix naa, miñe psañ naa guiedz Troas lidz Carp; ni guiaadnie luu grë xquits naa. Ib guiaañladz luu miñe nac grë guits nroob ga.

¹⁴ Tel gan luu ganle nzian ncuaañe nonguieldraa been Lejandr naa, men ne nac wncadzguiib ga; per Diostaa nañ zha gunquizh me Lejandr grë miñe been Lejandr ga. ¹⁵ Ni niicle luugaa gon, nsinaque bzo lo me; sac ne nlipaa rlëenie me wseed ne nolu ne lo miech nu.

¹⁶ Zeene glopaa gocredz naa lo wxtis, choot bzëd nriee xfavor naa, grëse zho biche lo naa; rnab naa lo Dios gunquizhd me zho miñe been zho, sca psaan zho naa. ¹⁷ Sanguë men ndzon ne rnabey ne psand me naa, me pchoobladz zdoos naa, haxta bdeeda diidz bnee naa Xtiiidz me lo grë zha zit rii. Sca gocniën me naa, gun naa cuent role meedz psilaa me naa; ¹⁸ ni niicle niinagaa, nañle naa ne lb silaa me naa lo grëtaa ncuaañe racladz miech cteed zho naa, ni me yquiaanap naa haxta gal dze ne laa me gdziñnie naa zaatne rnabey me gbaa. ¡Me rieguiäl guiaañnon gzataa dze, niicle nadzew, gzhew, ni grëragaa len izdoos ne ziaada!

¹⁹ Bzhiguiel bdeed tib zhibdiuzh naa lo Aquil i grop Priscil, ni lo grë zha ne no lidz Onesifr. ²⁰ Gacnañ to ganle, laa bets ne Rast biaan Corint, laa Trófimo biaan guiedz Milet, sac rzacñe me. ²¹ Bioxco gon guiaadniob luu, zeena blansole luu nëz rii zeene laa mëë nal sëëb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grëragaa zha bets ne, zha bzian ne, zha ne no nëz rii, laa zho rxeeł bdiuzh lo luu.

²² Jesús men ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grëse to!

Pabl

GUTS NE PXEEL PABL LO TIT

¡Diuzh Tit!

¹ Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblöle Dios, gliladz zho me, gacnan zho zhapaa nac wseed ne zional ne (wseed ne rnee zha none gbannie miech Dios), ² wseed ne rlu ganle ible laa ne quiambiaaz ygaa ne tib guielmban ne gdziindraa dze lozh. Ansraa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie. ³ Ni niina ne laa dze co bdzin, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

⁴ Laa naa rxel guts rii lo luu gon Tit. Rzaac naa luu zig tib xpëed naa, sac nan naa nli dib zdoo luu rliladz luu Dios zigne rliladz naa me.

Rnab naa lo Dios men ne nac Pxoz ne, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵ Rsoladzaxe luu ganle, zeene psan naa luu lo guidzliu win ne lë Cret i, laa naa psan luu zeena lozh gon grëraa dziin ne no gac i, ni psan naa diidz lo luu zha gzo luu zha ne so gnabey lo grë zha ne rliladz Jesús, tib tib guiedz qui. ⁶ Bien sca, zeene gzo luu zha co, ga rquini:

tib zha ne zaace mban, zeena peet glisquid miech lo zho;

tibaque wnaa ne mbannie zho, men ne nace tsieel zho,

zaace quiachoob zho xpëed zho, rliladz mëed Dios (zëëbd diidz pe guielntseeb ne noyun mëed, o rondgaa mëed diidz).

⁷ Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gon zho. Nodne gac zho:

zha nlëëguic,

zha ngonziu,

zha nad ron diidz,

zha nguibdil,

zha ne rzonali dimi.

⁸ Sinque none gac zho tib zha ne:

ndzinli nac guic,

ine niowse rdeed zho zaatne rbëz miech ne rdzintaa lidz zho,

rioxco zho run zho niapse ncuane rquini lo samiech zho,

zional zho gac niapse mine nac diidzi,

rioxco zho run zho niapse mine rnabey Dios,

rrieelo zho rnabey zho guic zho, rnabey zho xcuerp zho.

⁹ Ni none tibaque tsional zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguic zha naca, ni grieeelo zho glu zho lo grë zha ne rlëenie Xtiidz Jesús, guien zha co nonguiel da ga glëenie zhow. ¹⁰ Sac no ndal grë zha ne nëd gon Xtiidz Jesús niina, ncuane paat rquiind rseed zho miech, rquidie zho; ni lëepaa zha ne sca run nac zha Israel.

¹¹ Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuane paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon, ¹² tib menladzaque zho, tib men rac lo zho bzeet ganle zha nac zho zeene znu bnee me: “Nandraaque zha Cret, loxaque noquidielsa zho samiech zho. Masaque mban zho zigne

mhan grë ma ntseeb ne no guix; loxaque gowse zho zienie guic zho, rbech zho guñ zho dziin.” ¹³ Ni nligaa sca nac zho. Gacxe waa, biën gdziguiend luu grë miñe ruñ zho, goctox lo zho zeena sodziits zho lo Xtiidz Ndzon Jesús miñe no gliladz zho. ¹⁴ Bnee lo zho yquiaadiagdraa zho beelze pe grë godiidz ne rbeebey zha Israel, ni niice yquiaadiagdga zho grë miñe rnabey zha ne rlënie Xtiidz Ndzon Jesús.

¹⁵ Golgan ganle, grë miech ne ndzinli nac guic, zha ne mbe xquielrien, ncuane notaa, mbe naca lo zho; sangue zha ne riladzd Xtiidz Dios, zha ne ndzinlid nac guic, tsod tib ncuane mbe glulo lo zho; sac desde zdo zho, desde xquielrien zho mbed. ¹⁶ Rnee zho ruñbey zho Dios, per rlu nlida sac ndzinlid mhan zho. Zha yozha, xquielndaan yozh zho zienie zho, led zha ne guiabd ne guñ ncuane yquina.

2

Znu nac Xtiidz Ndzon Jesús

¹ Sangue luu gon, none gnee luu lo grë miech qui zigne nase Xtiidz Jesús.

² Grë men bgui ne nac zha gol lo to i, bnee lo zho:

tibiladz gac zho,

gund zho ncuane cuee xquielto zho,

quix zho biini, ncuane ndzinli tsienal zho guñ zho;

tiblique gac zho lo Xtiidz Jesús,

gleynie zho samiech zho, ni

dziits so zho tel pe nactaa grë guielne ne noyan zho.

³ Scaquegaa grë men wnaa ne nac zhagol, bnee lo zho:

ghan zho zigne no ghan zha ne nole xnëz Dios,

gzhixcuad zho diidzguizh,

gzuzdz zho.

None zaacse gac zho, ⁴ zeena zha glu lo grë wnaa nguieg zha ghan zho. Cseed

zho grë wnaa nguieg:

gan zho tseel zho,

gan zho xpëed zho,

⁵ gac zho tib wnaa nix biini,

quitnied zho tseel zho;

zaacse guñ zho xtsiin zho,

niowse gac zho, niowse gnee zho,

gon zho xtiidz tseel zho; zeena tsod pe nacne gneenë miech Xtiidz Dios.

⁶ Ni scaquegaa bnee lo grë zha bgui nguieg, gac zho zha nix biini. ⁷ Luuzhal zaacse been grëse ncuane no guñ luu, zeena ga gwi zho ganle zha none ghan zho. Zeene cseed luu zho, ine tibiladz goc, gund luu ne quitnie luu zho.

⁸ Bguib diidz ne gnee luu, zeena choot peet glisquid lo luu; ni scagaa, grë zha ne rlënie Xtiidz Jesús, stoladz zho zeene gan zho guiend pe glisqui zho lo ne.

⁹ Grë zha ne lega ruñ xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. ¹⁰ Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmhan zha ne zienal Xtiidz Dios, men ne psilaa ne lo dol.

¹¹ Grë diidz rii nagon pso lo zho. Gotsaa gwi ne ganle zha noxcotaa Dios miech, gacxe psilaa me ne lo dol waa; ¹² sac laa me racladz csaan ne grëse guielntseeb, csaan ne grëtaa ncuane rleynie zha ne nod xnëz me, guien ne ndzinli ghan ne, tibaque gwi ne dien pa min wen, pa mingaa wend, ine dzioxco ne ghan ne zigne racladz me. ¹³ Sca none ghan ne, haxta dzianlo ne gdziñ dze ne laa Jesús guiaad stib, zigne psanle Dios diidz; gal dze co, laa

me guiaad con grë xquielndzon me. Me nac Dios ro ne riladz ne, me psilaa ne lo dol. ¹⁴ Sac gon, me bgaadz guielgut ne nioguial ne, me bdiizh grëtaa guielntseeb ne bdziuun ne, psanmbe me ne lo grëtaa ncuaane bdziuun ne; gane niina, lo me ngab ne, ni none dzioxco ne gban ne zigne rnabey me.

¹⁵ Grë min rii nagon pseed grë miech qui, bnee lo zho gban zhow. Zeene riigala gdziebd luu goctox lo zho, sac gon luu rieguial gnee lo zho. Sca been, zeena choot quitnied luu!

3

Znu rieguial gban zha ne no xnëz Dios

¹ Beencsoladz zho ganle none gon zho mine rnee grë zha ne nac wxtis, gac zho tib zha nguzobdiidz, ni ib soliaadzd zho gun zho grë tel pe ncuaane yquiin lo samiech zho. ² Guien zho gneened zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

³ Sac gon haxta ne, ib peet riend ne glo, ntseeb goc ne, bdiits ne grë mine rnabey Dios; laa ne ziole nëz ne nitlo ne hor co, masaque bgadoo ne lo grëtaa ncuaane racladz xcuerp ne, lo grëtaa ncuaane ndzinlid ne bley ne bdziuun ne. Niapse guielntseeb bional ne, në rac zdoe ne rdzian ne ncuaane quianie, ncuaane run stib miech; zigtaa row rziizh zdoe zho gon zho ne, scaque ne, zha ne rdziantaa ne, row rziizh zdoe ne bdzian ne zho. ⁴ Per bdzin dze, zeene laa Dios (men ne psilaa ne lo dol) blu ganle pa lotaa nac xquielwen me, pa lotaa nquialadz me miech, ⁵ laa me psilaa ne; per guiabd ne togo por pe ncuaane wen ne bdziuun new, sinque porne pquia zdoe me new. Psanmbe me ne lo grëtaa xtol ne, rrieequia gol ne ga stib, ni bzhixcuaa Espiritu Sant lo xquielmban ne. ⁶ Niapse por Jesús men ne psilaa ne ga, laa Dios pxeel Espiritu Sant rneedz me grëse guielbiini ne rquiin lo ne. ⁷ Por mine been Jesús ni mine been Espiritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zgaa ne tib guielmban ne gdzind dze lozh, sac ib sca nac xtiidz me.

⁸ Mine rne naa lo luu nu, diidzliw. Racladz naa tibaque gnee luuw lo grë zha qui, zeena grëse zho ne nac zho zha ne riladz Dios, tsoxco zho gun zho niapse grë ncuaane ndzinli; sac gon, min co nac mine nonguiel, ni mincogaa rquiin lo grëse miech.

⁹ Biche lo zha ne racladz tildiidznie luu grë ncuuan paat rquind, zig nac grë godiidz dien pe been grë mengol padzeela, dien pe nonguiel tsienal ne ley, te nonguielda ye. Ncuuaane paat rquind ga, loxaque runctila miech; ni lalnu rieguiald gaquieta.

¹⁰ Tel cho zha ne rsilo rgodil grë zha ne riladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonëz zho gan zho dien pa nëz tsie zho. ¹¹ Zha ne sca run, gase rlu ne zieniedraa guic zho gon zho mine rnabey Dios; sac nanpaa zho dol ga, ni laa zho runa.

¹² Laa naa no cxel tib zha ne guiaad i, yase cxel naa Artem o cxeelgaa naa Tic. Zeene glansho zho i, siguiel luu guiaad luu Nicópolis ga gdzieel ne; sac ib ga ni naa cuëz naa len mëe nal ne ziaad nu. ¹³ Laga no luu i, bioxco zaatne grielotaaw been xyudar Apol prop me licenciad Zenas. Bdeed grë tel pe ncuaane yquiin zho nëz; zeena peet gunfalte lo zho, grielo gdzin zho zaatne no tsie zho. ¹⁴ Grëse zha ne nacgrë ne ne riladz ne Jesús, none cseed zho gun zho xyudar zha ne no liaadz; glu zho ganle rquiin zho, led zhlëd mban zho.

¹⁵ Grëse zha ne no lo naa nu, laa zho rxeel bdiuzh lo luu i. Bzhiguiel bdeed tib zhibdiuzh no lo grëse zha ne rleynie no i; sac ye zho rliladz Jesús.

Guiaa^unie Dios to sca dien. Peet tsienied guic to, me gacnien to; sac gon me noxco grëse zhizhgab to.

Pabl

GUTS NE PXEEL PABL LO FILEMÓN

¡Diuzh Filemón!

¹ Naa nac Pabl, laa naa no ladzguib nu loxaque ne quiayun naa xtsiin Jesús; grop no Timoté laa no rquia guts rii.

Laa no rxeela lo luu gon Filemón, ne nligaa rleyne no luu squi ye luu noyun xtsiin Jesús. ² Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni grëraa zha bets, zha bzian ne rcaalsa lidz luu i.

³ Dios, men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebde to.

⁴ Ib riaanladzd naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu. ⁵ Sac ziyonle naa squitaa dib zdoo luu riladz luu Jesús, rleyne luu me, ni scaque rleyne luu grë zha ne ngab lo me. ⁶ Rnab naa lo Dios, grëse mine noseed luu grë zha ne no i, tsoguc zhow, zeena yгаа zho grëse guelz naac ne rdeed Jesús lo grë zha ne ngab lo me. ⁷ Rley naa gon bets, sac zigtaa naa zigtagaa grëraa zha ne ngab lo Diosa, blactaa ziechoobladz luu, zigonley luu zdoo no, rlu luu ganle nli rleyne luu no.

⁸ Niicle ne rieguiala gnabey naa luu mine racladz naa gun luu, sac gon Jesús bzo naa none naa Xtiidz me, ⁹ per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleyne naa luu, scaque luu rleyne luu naa. (Gon ganle, mengol ne nac Pabl nu nonee lo luu, laa naa niogyu nu loxaque ne quiayun naa xtsiin Jesús.) ¹⁰ Niina gon ne laa Onésimo glanso lidz luu i stib, bzhiguiel zaacse pcaania me, gon ganle rrieequia meed nac me lo naa niina, sac nu len ladzguib nu bne naa Xtiidz Dios lo me, xquizhгаа Dios bliladz mew.

¹¹ Nli glo tib zha peet xtsiind nac me lo luu, sangue niina gon, zigtaa lo luuw zigtagaa lo naaw nroob yudar ne gun me. ¹² Laa me biire ziaad lo luu i, niowse pcaania me; masaque been cuent naa i zial i. ¹³ Gocladz naa mbëz me lo naa nëz rii, zeena me niun dziin lo naa nu xcuent luu, ne znu niogyu naa nu loxaque ne noseed naa miech Xtiidz Ndzon Jesús. ¹⁴ Per gocladzd naa niunga naa mine no guic naa, ni nand naa dien pe gnë luu; gane ni naa mazd telne zrieelow, per zdoo luu gala.

¹⁵ Nli laa Onésimo biche lo luu palal dze; per niina ne laa me glanso lo luu stib, lëë guiaanle me lo luu i. ¹⁶ Per bien gon, sacdraa luu me niina zig tib zha ne runse xtsiin luu, gon ganle rrieequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleynie luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon ye me ngab lo Dios.

¹⁷ Telne nlipaa rzac luu naa zig tib bets luu, porne tibaque men ne riladz ne, nana sca been cuent naa i zial i, pcaania me zig nac zeene naa glanso lidz luu. ¹⁸ Ni tel no pe guielqui ne been me lidz luu, tel pe zëëbgaa me lo luu, lo naa bnaba. ¹⁹ Wi ganle, naazhal pquia diidz rii nu: Naa quizha. ¡zig nac luu, gon ganle zëëble luu lo naa, ni haxta nroobraa zëëb luu! Sac gon, naa bnee Xtiidz Dios lo luu laa luu bгаа guielmban ndzon ne gdzind dze lozh.

²⁰ Sca gon bets gaca, bzhiguiel been guielz naac co; bloonley zdoo naa, bien ganle tibaque lo men ne ngab ne.

²¹ Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa. ²² Lëë nëzle nu rnabaque naa lo luu, siguiel luu gneedz luu lidz luu cuëz naa zeene laa naa guial i; sac rien naa ib zun Dios mine quianab to lo me, zneedz me diidz guial naa guialgan naa to.

²³ ¡Dios guiaan nie luu sca! Pcaania zhibdiuzh Epafri; men ne nioogyunie naa len ladzguiib nu loxaque ne rdziuun no xtsiin Jesús. ²⁴ Scaquegaa zla zha ne quiadziungza no dziin, zig nac Marcw, Ristarc, Demas ni Luc, gza zho laa zho rxeel bdiuzh lo luu.

²⁵ Jesús men ne rnabey ne, me glu ganle pa lotaa noxco me luu. ¡Me gunlay luu!

Pabl

GUTS NE BEY LO GRË ZHA ISRAËL

¹ Padzeela, ndal vuela bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho. ² Sangue niina, Xpëëdpaa me Jesús pxeel me biadnee xtiidz me lo ne. Jesús men ne bzaagrop me grëtaa ncuaane no, ni men ne bzo me gnabeya grësew. ³ Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grëtaa ncuaane no, ni por xtiidz me laaw quiayun dziin. Ni zeene blozh bdiizh me xtol ne, dzigo laa me biire zey gbaa bzob me cue Dios, zaatne rieguial me ne nac me men ne rnabey.

⁴ Ga rlu ganle men nroob nac Jesús, led lega led me Xpëed Dios; men nroob nac me lo grë anjl. ⁵ Ni tib lo anjl bneed Dios zigne bnee me lo Jesús, zeene rëb me: "Xpëed naa nac luu. Desde nadze laa zho gunbey ne Xpëed naa nac luu." Stib vuela zeene bzeet me Jesús, rëb me: "Xpëed naa nac me, naa nac Pxo me." ⁶ Ni zeene biaad Jesús lo guidzliu; men ne nac Xpëëdpaa me ga, rëb me: "Grëse xanj naa, none yquitsgzhib zho lo me."

⁷ Zaatne raquiet anjl, rneew:
Tib mandadsé nac zho lo Dios,
pale zigne rzhoon me sca rzhoon zho rie zho zaatne rnabey me zho;
me rnabey rlu zho zigne rlu bel.

⁸ Sangue zaatne raquiet Xpëed me, rneew:
Dios, luu nac men ne zobnabey,
ni gdziind dze ne griee luu;
zeene run luu guielwxtis, zigne rieguiala sca run luuw.

⁹ Ni palal rdziguiend luu grë guielntseeb,
niapse ncuaane ndziinli, ncuaane nonguiel, min co rleynie luu;
min co gane bzooblo Dios luu, nac luu men ne rnabey,
luu nac men ne mazdraa nroob guielbley gbaa.

¹⁰ Laa stib lugar rnee:
Men rnabey nac luu, luu bzaa guidzliu, luu bzaa gbaa dib nacsew.
¹¹ Nli zdziin dze nitlo grë ncuaan co, grësew zlozha zigne riozh grë lar,
¹² dzigo laa luu ctibëda, zig rdibëd grë lar, laa luu cuee stib min cub; zigne run
zha ne rtsëëxab.
Sangue luu, tibaque nac luu,
nacd luu men ne nitlo, nacd luu men ne lozh xquielmban.

¹³ Haxta rëb Dios lo me:
Cue naa nëz derech, nu bzob,
nieeda lozh gnaz naa zha ne rlëë lo luu, csan naa zho ladsnia luu.
Nligaa men nroob nac me lo grë anjl, sac ni tib lo anjl bneescad Dios. ¹⁴ Lo
me ga sca bnee Dios, sac gon grë anjl, mese nac zho run zho dziin lo Dios,
rxeel me zho rquianap zho zha ne nacle diidz laa lo grëtaa guielnë ne csiaab
me.

2

¹ Gacxe nagon waa, gotsaa guien ne ganle ib none dzioxcu ne wen wen gwi ne zha nac Xtiidz Ndzon Jesús mine zidzion ne; zeena gnitnëzd ne. ² Sac gon, niicle zeene xanjse Dios biadteed xtiidz me lo miech padzeela, ni gocnana; grëse zha ne güeynalda, pteed Dios zho caxtigw ne rieguial zho. ³ ¿Pe lelgue niina dzigo ne Jesús zhal biadnee zha laa ne lo dol? ¿Zha dien tedlaa ne lo

caxtigw, telne dzioxcod ne mine rnee me? Nli zha ne binlew zha co biadneew lo ne, per me nac men ne psilo bneew; ⁴ niicle Diosgaa, blactaa grè ncuane quialu me, blactaa grè milagr ne ruñ me, rlu me ganle ne nli diidzli biadseed zho ne; ni zhaagaa grè guielbiini ne ral zdoo me rdeed Espíritu Sant lo grè zha ne dib zdoo rnalo Jesús.

Jesús nac men ne grieelo gdzinnie miech lo Dios

⁵ Zig nac lo guidzliu cub ne ndion ne naraa gneedz Dios, psand me ne anjl gnabey low. ⁶ Lo Xtiiidz me zhobnee ganle zeene znu rëb David lo me:

¿Cho nac miech ne squitaa noxco luu zho?

Zig nac tib men qui, ¿pe nacne squitaa runnon luu me?

⁷ Tib blase dze psanwin luu me palal lo grè anjl; na laa luu psanglaa me stib, beennon luu me, bzo luu me mele gnabey.

⁸ Grëtaa ncuane no, laa luu psana ladznia me.

Nli gard gac grè mine bnee David ga, ⁹ per ndionle ne ganle zha psanwin Dios Jesús lo grè anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grëse xtol ne.

¹⁰ Ible sca gocladz Dios, men nroob ne bzaa grëtaa ncuane no, ible me bdeed diidz scataa grè guielnë ne gon Jesús; gane niina, Jesússe nac men ne grieelo ner lo grëtaa miech guizhiu ne no ygab lo me, gdzinnie Jesús zho lo guielndzon ne no me.

¹¹ Grëse ne ne nac ne zha ne psambe Jesús ngab ne lo Dios, yele ne nac mëed lo Dios. Gacxe waa, rley Jesús rnee me bets me nac ne; ¹² no tib lugar lo Xtiiidz Dios zaatne raquiet zeene znu rëb me:

Zne naa lo grè bets naa, gacnan zho ganle cho nac luu;

ni zeene ycaalsa zho grè zho, tipse dzioolnie no luu.

¹³ Stib vuelte rëb me:

Dios nac men ne rnalo naa.

Ni rëb me:

Laa naa nu, quiayacnie naa grè zha ne nac xpëed Dios.

¹⁴ Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me mendox, sac glo masaque ladznia ma no miech par gnitlo ma zho. ¹⁵ Sca psilaa me grè miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

¹⁶ Ni wen wen ndion ne ganle, zeene biaad Jesús, biaate me par gacnie me grè anjl, sinque laa me biaad par gacnie me grè zha ne no ygab lo Dios.

¹⁷ Gacxe waa, goc me zig nac miech, zigne nac ne ne nac ne bets me; ni parne scagaa grieelo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne; ¹⁸ nroob nac grè guielnë ne bded me, pquiana menox nquil ma me niab me lo dol. Ni ne mezhal bded grè min co, nanpaa me zha rzac zha ne nodeda, gane ible zacnieñ me zho.

3

Gunndipde to zdoo to

¹ Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

² Tib men nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grè zha Israel. ³ Per Jesús nac men ne non, sac gon lo me ngab grè miech co, laa Moisés loxaque pquianap me zho. ⁴ Zig nac zha ne rzhixcuua tib yu, nli non zho, per mazdraa non men ne bzaa grètaa ncuane no; ni lèe men co nac Dios. ⁵ Nli bin Moisés diidz been me xtsiin Dios, per laa me gocse zig tib ngundziin pquianap me grè zha Israel co, ni pteed me xtiidz Dios lo zho. ⁶ Sangue Jesús, Xpèed Dios nac me, ni me rnabey grèse zha ne ngab lo Dios. Ni grèse ne, ne nac ne zha ne no xnèz me, lo Dios ngab ne; totsaque ine nley gac ne dib zdoo ne yquiambiaaz ne gac grè mine nacle diidz gneedz me lo ne.

⁷ Ndioule ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espiritu Sant lo ne, rnee me:

Telne gon to gnee me lo to nadze,

⁸ gunndipde to zdoo to,

gunde to zigne been grè pxozgol to, gocntseeb zho lo Dios, zeene sca mban noded zho, no zho grè dan ngan co.

⁹ Ga raquiet ganle zeene znu rèb Dios:

Ncuane lèbdraa guic naa been zho,

per dipse len choo iz, blactaa ncuane gon zho ben naa.

¹⁰ Zeene gon naa scataa nac zho,

laa ne gon zho diidz tsie zho nèz ne rlu naa lo zho, lel zhaa ncuane run zho; nacne nli benngulèe zho guic naa.

¹¹ Lo guielblèe co, bdete naa diidz ndziin zho zaatne nded naa ndziiladz zho.

¹² Bets, bzian, golguien sca ganle ib gunndipde to zdoo to, zeena sozite to lo me ne nac me Dios nguiamban. ¹³ Gzataa dze, golnee lo grè zha ne nacgrè to (nasraa laga rdeeda diidz), zeena ni tib tsienald grè ncuane runctal xtol miech, lozh ga lèew yquiaaqui gacntseeb to lo Dios. ¹⁴ Sac gon, par gdziin ne zaatne no Jesús, ib none tiblique gac ne, tibaque gnalo ne Dios zigne bnalo ne me zeene psilo bdziunbey ne me. ¹⁵ Ni nadzegazh none dzioxco ne min co. Golsoladz ganle zha rnee lo Xtiidz me:

Telne gon to gnee me lo to nadze,

gunndipde to zdoo to,

gunde to zigne been grè zha ne sca gocntseeb lo me ga.

¹⁶ Ni lèe min co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me, ¹⁷ beenctal zho xtol zho. Dipse len choo iz ne sca bio zho dan co, bieednie me zho. ¹⁸ Zeene gon me rond zho xtiidz me, nacne bnee me lo zho rèb me gdziind dze ne gdziin zho zaatne ndeed me ndziiladz zho. ¹⁹ Ni nligaaw bdzind zho, grèse zho gut dan co; sac sca beenndip zho zdoo zho, ib bliladz zho mine rnee me.

4

¹ Sca nagon bzhaac grè miech co. Gacxe nagon waa, zig nac niina ne laa me rnee ganle laa me gneedz lugar ne gdziiladzga ne, none ndzinli gac ne, zeena ni tib choot sacd zig bzhaac grè zha co. ² Sac zigne nagon nonee Dios lo ne niina dien zha gdziin ne zaatne gneedz me ga, znuque bnee me lo zho; per zhlèse bin zhow, ib bliladz zhow dib zdoo zho. ³ Sac loxaque zha ne dib zdoose rliiladz xtiidz Dios, zha cose zrieelo gdziin zaatne nacle diidz ga gdeed me gdziiladz zho. Mincoxe waa, zeene gon me bliladz zha co xtiidz me, bdeete me diidz ndziin zho ga.

Niaale zaatne gdziiladz zho ga, nolew zeene blozh bzaa Dios grètaa ncuane no. ⁴ Sac gon rnee lo Xtiidz me: "Xoop ngbidz bzaa me grètaa

ncuaane no, laa zeene goḷ ngbidz gadz laa me bdziiladz.”⁵ Niaalew nagon, sinque ne gocntseeb zho lo me gane bdeete me diidz ndziñ zho.

⁶ Grè zha ne glo gocnan xtiidz me ga, brielod ndziñ zho; per zig nac niina, laa me bii quiambèz sèèb grèraa zha ne no sèèb. ⁷ Gacxe waa, laa me biire pso stib dze ne ygaa zho guielnzaac co. Lèè min co ga znu bzeet David, zeene rèb me: “Telne gon to gnee me lo to nadze, gunndipde to zdoo to.” Ndaldoole iz sca bzhaac grè zhagol co, dzigora znu bzeet David; ⁸ ga nagon rlu no stib lugar ne gdziiladz miech. Nacdraaw zaatne bdzinnie Josué grè zha ne biaan zeene blozh gut grè zha ne gocntseeb ga; sac telne lèele lugar co ga, nsodraa Dios stib dze ne ygaa miech guielnzaac co. ⁹ Min co nagon, ndion ne ible no stib lugar co, ni ga gdziñ grèse zha ne ngab lo Dios. ¹⁰ Grèse zha ne gdziñ ga, gasi laa zho gdziiladz lo grèta xtsiin zho, zigne bdziiladzaque Dios zeene blozh bzaa me grèta ncuane no.

¹¹ Gacxe nana sca, gogotsaa dzioxco ne dziuun ne mine rnabey Dios, zeena gdziñ ne ga; dziuund ne zigne been grè zha wladz ne sca bind xtiidz me. ¹² Sac Diosi gon, diidz ne rnee me, nona. Zeene rnee me, rien ne grèse mine nac ne. Nan me pe no guic ne, pe rza zdoo ne; niicle ncuane rzac ne mazdraa nguetsa, nan mew. ¹³ Tsod ncuane tsonguets lo me. Grèse ncuane rac, me rana; ni tib tib ne, lo me cueero ne grèse tel zha mban ne.

Lèè pxoz nroob ga nac Jesús

¹⁴ Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lèè me ga nac Jesús, men ne nac Xpèèd Dios, me none gnalo ne; none tiblique gac ne. ¹⁵ Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grèta mod ne rquiil mendox ne par gunctal ne xtol ne. Bzhaac me zigne rziaaque ne niina, lèeraasi biabd me lo dol. ¹⁶ Gacxe nagon waa, ine tibliiladz gogotsaa gbig ne lo Dios, ndion ne ganle ible squia zdoo me ne, ni ible zacnièn me ne zeene rquinpaa ne gun me xyudar ne, sac ne nligaa noxco me ne.

5

¹⁻³ Ible Jesús nac zhipxoz nroob ne niina. Gotsaa gwi ne ganle, men ne rgaa rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grè gon ne rgogon miech lo Dios, xchen ma ne rut zho par guiooglo lo xtol zho, me riesana lo pcoog; ni scaquegaa riesan me mine guiooglo lo xtol me; sac gon, miech guidzliuque nac me. Ye me rzac zigne rzac grèraa miech, gane rien me rquia zdoo me grè zha ne peet riend, grè zha ne mazdraa ngoopdol.

⁴ Ni zha ne sca rac pxoz nroob, led zhald zho rzèèb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob. ⁵ Zig nac Jesús, Dioszhal bzooblo me ne laa me nac zhipxoz nroob ne; men ne znu rèb lo me: “Xpèèd naa nac luu. Desde nadze laa zho gunbey ne Xpèèd naa nac luu.” ⁶ Ni rèb me: Luu nac pxoz nroob, gdziñd dze ne gdzèè luu, luu gac zig pxoz Melquisedec.

⁷ Zeene bii zo Jesús lo guidzliu rii, tib vuelt mban rac me zig zet me lo guielnè, haxta roon me, nguedz bnee me bnab me lo Dios csilaa Dios me lo guielgut co; scagaa Dios psilaa Dios me, sac tib men nguzobdiidz nac me. ⁸ Niicle ne Xpèèd Dios nac me, per tib men nguzobdiidz goc me, maase mincopaa pquiaqui nroob guielnè ne bded me. ⁹ Ni ne sca bin me diidz been me grèse mine bnabey Dios me, gacxe waa grèse miech ne gban zigne nac

xtiidz me, me gdeed tib guielmban ne gdzindraa dze lozh lo zho; ¹⁰ ni bzo Dios me nac me pxoz nroob niina, zigne gocaque Melquisedec pxoz nroob.

Gacde to zig cho mëdyeen

¹¹ Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, ngañ gne naa lo to zha naca. ¹² Lo lal dze ne psilo rnalo to Jesús, haxta none tole cseed miech niina, per na gon lej rquini to dien cho gbiire csilo cseed to stib. Rac mëdyeen to i gon, laa ne gow to ncuaañe row zha brooble lej racladz to tibaque nidz guie to. ¹³ Sac gon, mëdyeen rie nidz, ni riend win dien pe nac ncuaañe ntseeb, pegaa nac ncuaañe wen. ¹⁴ Sangue grëloraa guielwagw, miñ co rquini grë zha gol, ni zha co niinile zho, rien zho pe nac ncuaañe wen, pegaa nac ncuaañe ntseeb.

6

¹ Gacxe waa, none tsoxco to gac to tib zha gol. Gunde to ne miñe pseedse to glo zeene psilo bnalo to Jesús, lo miñ co ib grieede to. Laa to pseedle ganle: zha none csaan to guielntseeb gbig to lo Dios, zha none gnalo to Dios,

² zha cxobnia to guic stib zho, gnab to lo Dios por zha, zha nac wrobnis, zha cueeban Dios grë mengut,

zha gun Dios guielwxtis ne gloozh grëtaa guielntseeb.

³ Grële miñ rii nañ to. Laa niina telne zneedz Dios diidz, laa to cseed miñe nora gacnañ to.

⁴ Sac gon, no ncuaañe grielod gac telne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdoo Dios psilaa me zho, bdeed Espíritu Sant guielbiini lo zho, ⁵ bien zho zha wentaa nac xtiidz me, zha grielo sëeb zho zaatne ziaadyob gdziñ zho (zeene glu Dios grë poder ne rap me), ⁶ ni lozh ga csaan zhow, tsienal zho guielntseeb stib; grielod nose co guic zho gbiire sëeb zho xnëz Dios. Ni zha ne gon sca run, rrieequia noquiaa zho Jesús lo cruz ga stib, gbiire gzhidznie miech me. ⁷ Zig nac tib lë liu ne rgaa grëse nisguie ne riab, zeene rrieequia grë ncuaañe ran zho low, runlay Dios; ⁸ laa telne niapse yag guiets, niapse grë guizh guiets rroob low, paat rquiinda; ib tedsod zdzibdee Dios, ni lozh ga znabey me tseca. Scaque nagon nac miech ne runbey Xtiidz me.

⁹ Bets, bzian, laa naa rne miñ rii lo to, per guiabde to togo miñe run to rzet naa. Tel to, rien naa brieete to lo grë guielntseeb, lole Dios ngab to niina. ¹⁰ Nanle to ganle, Diossi ncuaañe rieguañ tib tib miech, miñ co rdeed me lo zho. Grëtaa ncuaañe noyup to niina ne rleynie to me, grë tel zha rquia zdoo to been to xyudar grëraa zha ne no xnëz me, ni noyungaa tow niina; grësew ible guiaanladzd mew. ¹¹ Miñe rzoobladz naa, tibaque squi nguieel gac to, zeena scagaa zgaa to grë ncuaañe nacle diidz gneedz Dios lo to. ¹² Sac dzigosi guieete to, ib gbechde to; masaque laa guic to tsienie ycaania to grëtaa miñe bneele me gneedz me lo ne; zigne been grë zha ne nliipaa bnalo me.

Miñe rnee Dios run mew

¹³⁻¹⁴ Golsoladz ganle, zeene psañ Dios xtiidz me lo Abraham been mew zigne bneese mew. Lëe hor co rëb me laa me gunlay Abraham, ni ndal gun me lo xti Abraham. Ni lëeque lë me bzeet me, par glu ne ible zun me miñe bnee me. ¹⁵ Scagaa Abraham, tiblique bliladz me ne laaw gac; lëe gdib pquiambëz me bdziñ dze co.

¹⁶ Zig nac miech, par glu ne zun zho miñe rnee zho, dzigo rzeet zho lë tib men ne mazdraa non lo zho; ni deque sca run zho ga rlu ne gdzëdraa xtiidz

zho. ¹⁷ Scagaa Dios, laa me bzeet lë me sac guiëndraa stib men ne mazdraa non lo me. Ga blu me ne ible zuñ me mine bnee me ga.

¹⁸ Zeene sca rsan Dios diidz, ni rzeet me lë me, choot grielodraa ctsëë mine rnee me, ni niicle megaaw nacd me men ne rquidie. Gacxe waa, grëse ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psan me diidz yгаа ne. ¹⁹ Min co nagon, none tiblague gac ne zig tib barcw ne dziits zob lo nis, sac no ncuane naaza len nis; ndion ne ganle, ible dzin ne len yadoo nroob ne zob Jesús. ²⁰ Laa me bner bdzin me ga nonab me lo Dios por ne. Me nac pxoz nroob niina, ni gdzindraa dze ne gdzëë me; laa me nac zig goc pxoz Melquisedec.

7

Pxoz nroob ne lë Melquisedec

¹ Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golsoladz ganle, zeene znu wbirele Abraham güeyguncxoön me zha ne no grë guiedz ne rlëë lo me, Melquisedec goc pxoz ne güeydzieelo me, beenlay Melquisedec me. ² Dzigo lo grëse ncuane bla me lo grë zha co, been mew tsii lal, bdeed me tib lalgaw lo Melquisedec.

Melquisedec nac zig nacne rnee ne “guielwxtis”, min co nac ne rnee zho me “rey ne run guielwxtis”; ni rneque zho me “rey ne rcuëëz lo dil”, sac Salem (guiedz ne goc me rey ga) nac diidz co zig nac ne rnee ne “zaatne guiënd dil”. ³ Ib raquiete dien cho goc pxoz me, dien cho goc xniaa me, dien cho gocгаа xmengol me; niicle raquietegaa dien zha blanso me lo guidzliu, dien pe gutгаа me. Ziaad gac me zig Xpëëd Dios, men ne nac zhipxoz nroob ne, men ne gdzind dze gdzëë.

⁴ Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuane bla me ga, lo Melquisedec. ⁵ Nana, telne niac Melquisedec zha xtií Leví guiab ne por min co pcaa mew, sac zeene laa ley biaad rnabeya ne grëse zha Israel, tel pe nactaa ncuane quianie zho run zhow tsii lal rdeed zho tib lala lo zha xtií Leví, sac zha co nac pxoz; ni tibaque dii ne nac zho. ⁶ Laa Melquisedec, niicle ne led zha xtiid Leví nac me, per bñab me bdeed Abraham tib lal grë ncuane co lo me.

b) Me beenlay Abraham; ni laa Abraham biaanniele diidz pe nac mine gdeed Dios lo Abraham. ⁷ Ni ndion ne ganle men nroob nac zha ne runlay.

⁸ c) Grë pxoz ne sca rcaania gon co, rdzin dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

⁹ d) Rrieequia ye grë pxoz ne brieequia lo zha xtií Leví ye zho ga bdeed gon lo Melquisedec, zeene sca bdeed Abraham gon co lo me. ¹⁰ Sac niicle ne gard gal Leví hor co, per racle Leví cuent ga, sac xpëëdaque Abraham goc Leví.

¹¹ e) Grë pxoz ne brieequia lo xtií Leví ga, zig nac Aarón; zha co nac zha ne blu ley lo menquiedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtií Aarón, mazd pxeel me tib pxoz zig pxoz Melquisedec.

¹² Zeene sca ptsëë Dios lo dii ne ziaad pxoz, hor co nacne bdzëëque grë xley pxoz. ¹³⁻¹⁴ Ndion ne ganle, Jesús men ne nac pxoz cub niina, lo xtií Judá brieequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz. ¹⁵ Ga nagon rlu ne nli grëw bdzëë. Sac gon, Jesús men ne nac pxoz niina, men ne nac zig pxoz Melquisedec, ¹⁶ nacd mew porne ziaad me lo xtií Leví, sinque porne nac me tib men ne gdzind dze lozh xquielmban. ¹⁷ Zigne raquetaque me, zaatne rnee:

Luu nac pxoz nroob, gdzind dze ne gdzëë luu,
luu gac zig pxoz Melquisedec.

¹⁸ Gataa laa grë xley pxoz biaan tib lad, sac grëse mine bnabey pxoz hor co run miech, paat pquiinda. ¹⁹ Ni lalnu brieelod nsañwena miech lo Dios; sangue niina, mazdraa wen zio ne, sac ndionpaa ne Jesús nac men ne csañwen ne lo Dios, sac me nac men nroob ne rnaló ne.

²⁰ Dioszhal rëb Jesús gac tib pxoz ne gdzind dze gdzëë, ni haxta bzeet me lë me parne glu ne ctsëed me xtiidz me; ²¹ laa grëraa pxoz ne ziezo, ib beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdzind dze ne gdzëë luu,
luu gac pxoz nroob zig Melquisedec.

Naa nnew, ni naasi ctsëed naa xtiidz naa.

²² Mincoxe waa ndion ne, diidz ne biaan nie Dios miech ga gdzind dze ne gdzëew; sac gon, por Jesús laaw noyac. ²³ Glo, ndaldoo zha ne goc pxoz, sac grëse zho miech nac zho, rdziñ dze ne laa zho ret, zeene laa tib zho ret laa stib zho rzo. ²⁴ Sangue Jesús, led yed me gree par dien cho stib so, sac mesi gdzind dze ne guet me. ²⁵ Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lëë blaale zho ga. Tibaque laa me gnab lo Dios por zha, sac gdzind dze ne guet me.

²⁶ Jesús nac tib men ne nliipaa mbe, ni tib dol rapd me, ib rdzigiend me guelntseeb; gacxe waa, beennon Dios me, ni lëepaa pxoz nroob co nagon rquiin ne. ²⁷ Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csañmbe me zho lo xtol zho; ni rutaque zho ma ne riogon lo Dios parne guiaanmbe grëraa menguedz; sangue Jesús, tibaque vuelt bdeed me gon co, ni mezhac goc gon co. ²⁸ Stiba, glo, zha ne rgaa rac pxoz nroob zigne rnabey ley, ye zho runcial zho xtol zho; sangue niina ne laa Dios psan stib xtiidz me, laa me bzo Jesús nac me zhipxoz nroob ne, mesi tib men mbe nac me, ni gdzind dze ne gdzëë me.

8

Jesúsle nac men ne rteed xtiidz ne

¹ Lo grë mine quiane naa nu, mine racladzpa naa gacnañ to nac min rii: Jesús nac zhipxoz nroob ne, ni zaatne zob Dios, men nroob ne rnabey, ga zob me. ² Gbaa no me, ga quiayun me dziin zaatne nacpaa yadoo, Dios bzaa yadoo co, led yedraa min co bzaa miech.

³ Ndion ne ganle, zha ne rac pxoz nroob, laa zho rzo, zeena grë ma, grëgaa ncuanae rgogon miech, zha rdeeda lo Dios; scaquegaa Jesús, ye me bdeed me gon lo Dios. ⁴ Tel niaca mine bii no me lo guidzliu niina, grielod gac me pxoz nroob, sacne nole pxoz nroob ne rdeed grë gon co lo Dios, zigne rnabey ley.

⁵ Grë dziin ne run grë zha ne rac pxoz nroob lo guidzliu rii, lega nacsew zig zhimlë grë mine rac gbaa; yadoo ne rio zho lo guidzliu riiw, lega nacsew zig zhimlë yadoo ro ne zob gbaa. Golsoladz ganle, zeene laa Moisés gzaa yadoo, rëb Dios lo me: "Zigne gon bluse naa lo luu guic gui ga, sca none gzaa luuw."

⁶ Gacxe waa, tel Jesús men ne nac zhipxoz nroob ne niina, mazdraa non dziin ne quiayun me; sac gon, zeene pso Dios me gac me pxoz nroob, psan Dios diidz stib zha grielod ygaa ne grë guelInzaac nroob ne gneedz Dios lo ne, ni me gunctsiñ ne lo Dios.

⁷ Wenraa nac diidz ne psan Dios ga, sac telne niaca nlëb diidz ne biaan glo ga zeene rëb me zha guiaanwen miech lo me, dzigo nod pe nacne mbiire nsañ me stib xtiidz me. ⁸ Ni bzeetlegaa me ne laa me csañ stib xtiidz me, sac

grë zha ne biaan^{ne} xtiidz me glo, loxaque beenctal zho xto^l zho. Min co ga raquiet lo Xtiidz me, zaatne znu rnee:

Rnee men ndzon ne rnabey: Zdziñ dze ne gbiire guiaan no diidz grë no zha Israel, ni zha Judá.

⁹ Per gacdraaw zig diidz ne biaan no grë no xmengol zho, zeene rrieequia bzheen naa nia grë zha gol co, blee naa zho lo caxtigw ne noded zho Egipt;

sac ni lalnu güeynal^d zho diidz ne biaan no ga, nacne niicle naagaaw, psaanladz naa zho.

¹⁰ Zeene gdziñ dze co,

znu nac diidz ne guiaan no grë no zha Israel:

Grëse xley naa, nis nis gacnañ zhow,

zig nac zeene haxta len zdoo zho, len guic zho zhubneew.

Dzigosi laa zho gunbey naa ne naa nac xDios zho,

ni niicle naagaaw, laa naa gunbey zho ne lo naa ngab zho.

¹¹ Dzigosi yquiindraa tso zho gnee zho lo menlidz zho, lo menladz zho: “None gunbey luu Dios gon.”

Sac len dze co, grëse zho runbeyle zho naa,

niicle zha ne mazdraa wina, niicle zha ne mazdragaa nona.

¹² Tel pe nactaa xquie^lntseeb zho, zuñ naa zhow perdon;

gdziñdraa dze csoladz naa grë falt ne been zho lo naa.

¹³ Zeene sca bzeet me ne laa me csañ stib xtiidz me, ga rlu ne rquiindraa miñe biaan glo ga; sac nac grë ncuaañ gox rquiindraaw, laaw nole par nitlow.

9

Yadoo ne no gbaa

¹ Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaayadoo ne gac zaatne tsiegan zho me. ² Dzigo bzaa zho tib yu mantiad ne goc yadoo co, groltaa len yu co pquiaancaan zho tib lar nroob, goc len yu co chop len. Tib lena, miñe riaan nêz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib quietxtil ne naclayle. ³ Laa stib lena, miñe riaan nêz zhits lar co, ga nac zaatne Ndadoo; ⁴ ga rzo tib yag ndiaab niapse or lada, dzigo lo co rec yaal; leen coque zhoob tib guin scaque niapse or ndiaab lada. Len guin co no grop lë quie lag ne pquia ley ne pcaania Moisés, ga no bar ne bzhen Aarón, bar ne bdzib ben ga; leen coque no tib guies win niaa niapse or, len guies co no palal maná, quietxtil ne bguiaan Dios grë mengol co. Lëë guin co biaan par csoladz zho zha nac diidz ne bianne Dios zho. ⁵ Zhits guin co zoli chop anj^l ne bzaa zho, masaque rbebel grop anj^l co rtsiig me xiil me rtse me zhits guin co, zaatne rliaa^l xchen grë ma ne riogon lo Dios, par guiooglo lo xto^l menguedz. Par gne naa zha nacraa grë ncuaañ co, rneedzraaw diidz nu niina.

⁶ Sca nagon biaa yadoo co, dzigo grë zha ne rac pxoz tibaque rzëeb zho zaatne Nda ga; ga riegun zho dziin ne rnabey ley zho gun zho. ⁷ Laa stib lena, zaatne Ndadoo ga, loxaque men ne nacse pxoz nroob rrieelo rzëeb ga, ni tibaque vuelt tib len iz rzëeb zho. Zeene rzëeb zho, rienie zho xchen ma ne rgogon zho par guiooglo lo xto^l zho, ni guioogloogaa lo grë xto^l menguedz, do^l ne biend zho been zho. ⁸ Gase na ganle rlu Espíritu Sant lo ne, gacd sëeb grëraa miech zaatne Ndadoo ga, laga bii sca chop len nac yadoo.

⁹ Golgotsaa gwi ne niina na ganle zha naca: Glo, niicle ne scataa riesañ zho gon, scataa rut zho ma ne rgogon zho, per brielod grë ncuaañ co nsanmbew zdoo zho; ¹⁰ sac hor co, laa zho güeynal grë ncuaañe laglaase, rio zho dien pe

zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been min co, sac hor co gard gacncub diidz ne biaanmie Dios zho ga. ¹¹ Sanguie niina ne laa Jesús baaad, niina ne mele nac pxoz nroob, por me laa miech yгаа grē guieInzaac ne bneele Dios ga. Bdzin dze laa me bzēeb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech), ¹² zeene bzēeb me, bzēebnied me pe xchen chiv yeen, pe xchen ngon yeen, zigne been grēraa pxoz nroob; sinque xchenpaa me bzēebnie me zaatne Ndadoo ga; tibaque vuelt bzēeb me, ni lēe psanmbele me ne lo grētaa xtol ne ga. ¹³ Nana, telne scataa pquiin zho xchen ngon yeen, xchen chiv yeen, rio zho rzēeg zho tib vac yeen rliaal xquidie co lad zha ne rap falt, par gbiche dol co guiaanmbe zho lo Dios. ¹⁴ iPe lel xchen Jesús dzigo? Mazdraa gon nac xchen me, ible sanmbew ne lo grētaa ncuaaane paat rquiind ne bdziun ne glo, niinasi zrieelo dziiun ne mine rnabey Dios nguiamban. Sac gon, tel Jesús ni tib dol rapd me, ni Espiritu Sant bloo zdoo me bdeed me me goc me tib gon mbe. ¹⁵ Gacxe waa, Jesúsle nac men ne gdzinnie ne lo Dios, niina ne laa Dios psan stib xtiidz me. Zeene gut me, ga bdiizh me grētaa xtol miech, zigtaa zha ne biaanmie diidz glo cow, zigtagaa zha ne nobedz me len dze riiv; niinasi grēse zho zrieelo yгаа zho guielmban ne gdzind dze lozh ga, zigne nacle xtiidz me.

¹⁶ Gotsaa gwi ne ganle, xtiidz miech, mine rsan zho par dien zha gac grē ncuaaane rap zho zeene laa zho guet, laga bii mban zho grielod gacnon diidz co; ¹⁷ sinque haxta ret zho, dzigo laa diidz co racnon. ¹⁸ Scaque nagon, zeene psan Dios xtiidz me glo, gutgazh ma ne brieen ren bzhiee dzigoraa laa diidz co psilo gocnon. ¹⁹ Golgotsaa csoladz ganle, zeene blozh bnee Moisés lo menguidz zha nac diidz ne psan Dios ga, laa xchen ngon yeen, xchen chiv yeen ndxiembēzle notsa nis; dzigo bzoob me tib lē guits mēcwxiil rna nizhnie tib guic bar, blozh ga, psēeb mew lo ren co blaal me ren co lo guits ne quia grē diidz co, ni blaal mew lad grēse miech co, ²⁰ ni rēb me lo zho: “Laa ren rii bzhiee, zeena gacnan to desde nadzetaa laa diidz ne psan Dios lo to nu csilo gacnon, none gun to mine rnabeya.” ²¹ Blozh ga, blaalque me ren co gdiipse len yadoo, ni blaal mew grēse lad ncuaaane racdziin len yadoo.

²² Sca nagon nac ley co, grēse ncuaaane no guiaanmbe, ib ren rsanmbew; scaque miech, haxta rzhiee xchen ma ne riogon dzigoraa riooglo lo xtol zho. ²³ Mincoxe waa, sca pxiee Moisés xchen ma biaanmbe yadoo co ni grē ncuaaane racdziin lena (nacse yadoo co zig zhimlē yadoo gbaa); sanguie yadoo gbaa, ga pquiin ren ne mazdraa non lo xchen ma, ni lēe ren co goc xchen Jesús. ²⁴ Zeene bzēeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlē mine no gbaa. ²⁵ Grē pxoz nroob, gzob iz rie zho zaatne Ndadoo rienie zho xchen ma; sanguie Jesús, xchenpaa me güeynie me, ni tibaque vuelt güeylogon me me. ²⁶ Telne ye me niun zig run grēraa pxoz co, pe zhiastale vuelt na ziyet me wla ne bre guidzliu, iper na, led yed me! Zeene laa dze bdzin, laa me baaad, xchenpaa me bzhiee, ni tibaque vuelt bzhieew psanmbew ne lo dol grēse ne ne nac ne miech. ²⁷ Zigne biaan tibaque vuelt ret miech, lozh ga zeene laa Dios gun guielwxtis, laa zho none gacredz lo me; ²⁸ scaquegaa tibaque vuelt gut Jesús bdiizh me xtol grēse miech; ni dzin ne guiaad me stib, per guiaatraa me par biire quizh me xtol miech, sinque laa me guiaadsilaa grē zha ne quiambēzlo me, zeena gand zho grētaa guielne ne csiaab Dios.

Tibaque vuelt goc Jesús gon

¹ Grè mine rnabey ley run pxoz, lega nacsew zig tib zhimlë grëtaa mine been Jesús por ne. Horco niicle gzobse iz rienie grë miech co gon zigne rnabey ley, per brieloda nsanmbew zho lo dol. ² Tel niaca mine gon cose nsanmbe zho, dzigo tibtaa vuelt ne niansan zhow lëë niaanmbele zho ga; niicle zhagaaw, nienpaa zho ne laa zho mbele. ³ Per na, gzobse iz zeene laa zho riesan gon co rsoladz zho ne bii no zho lo dol, ⁴ sac gon, grielod ne xchense ngon yeen, xchense chiv yeen guiaanmbe miech lo dol.

⁵ Mincoxe waa, zeene laa Jesús biaad lo guidzliu, pe led znu rëb me lo Dios: Grè xchen ma, grè ncuaañe riaadlogon zho lo luu, racladzdraa luuw; gane bnabey luu goc naa miech, zial naa lo guidzliu.

⁶ Grè ncuaañe rzëëg zho, grë ren ne rxiee zho, par guiaanmbe zho lo dol; racladzdraa luu gan luuw.

⁷ Gane niina, laa naa zial nu Dios, zeena gun naa mine gnabeytaa luu; zigne zhoobnee lo Xtiidz luu gac naa.

⁸ Gotsaa gwi ne ganle, blozhse rëb me racladzdraa Dios tso zho pe ncuaañe tsielogon zho lo me, tso zho cxiee zho xchen ma, gzëëg zho ma par guiaanmbe zho (niicle ne lo ley sca rnabey gun zho); ⁹ dzigo rëb me: “Dios, laa naa zial nu zeena gun naa mine gnabeytaa luu.” Gase nagon rlu ptiche me diidz ne psan Dios ga glo, laa stib diidz cub ne biaanñie Dios miech ga psilo noquinn. ¹⁰ Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psanmbe me ne lo dol. Tibaque vuelt sca goc me gon co, ni lëë psanmbele me ne ga.

¹¹ Grè pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieloda nsanmbew miech lo dol; ¹² sangue Jesús gon, tibaque vuelt bzhiiee xchen me goc me gon psanmbe me miech lo dol. Laa niina, cue Dios nëz derech ga zob me, ¹³ quiambëz me gdziñ dze zeene grëse zha ne rlëë ran me, laa zho guiaanwin lo me. ¹⁴ Tibaque gon ne bdeed me ga, psanmbegazh me grëse zha ne nodziñnie me lo Dios. ¹⁵⁻¹⁶ Ni nligaa scaw, haxta Espiritu Sant, zeene blozh bzeet me zha rëb Dios guiaanñie me zha Israel diidz stib, zha nis nis gacnan zho xley Dios, zig nac zeene haxta len zdoo zho, haxta len guic zho zhoobneew; ¹⁷ dzigo bzeet me zeene znu rëb Dios: “Tel pe nactaa xquieñtseeb zho, tel pe nactaa xtol zho, gdziñdraa dze ne csoladz naaw.”

¹⁸ Golgotsaa gwi ne sca ganle, rsoladzdraa Dios xtol ne sac laa Jesús bdiizhlew; gacxe waa, nodraa dzio ne dien pe gon ne gdeed ne par csanmbe me ne.

None gbig ne lo Dios

¹⁹ Bets, bzian, glo loxaque men ne nacse pxoz nroob rzëëb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziñ ne, sac xquizh xquieñzaac Jesús, bdeed me me bzhiiee xchen me psanmbe me ne. ²⁰ Zeene sca gut Jesús, rriequia tib nëz cub ga pxal me par gdziñ ne zaatne ygaa ne guieñmban; lëë nëz co ga bzhiial zeene sca briez lar ne quia len yadoo ga. ²¹ Ni ne me nac zhipxoz nroob ne no me yadoo gbaa, ²² niinasi zacle gdziñ ne haxta lo Dios. Nana sca, dib zdoo ne golgotsaa gbig ne lo Dios, dib zdoo ne golgotsaa gnalo ne me, benque laa me psanmbele ne lo grëtaa ncuaañe yozh ne rza zdoo ne, rza guic ne; rriequia bgaz me ne tib nis mbe. ²³ Tibilique sca golgotsaa gac ne, benque ndion ne ganle ible zdziñ dze ne gac mine riladz ne; sac Dios psan diidz co, ni ndion ne rquidied me.

²⁴ Golsaa dzioxc ne cseedlsa ne gleynie ne zha ne nacgrë ne, ni dziuun ne ncuaañe yquuin lo ne grë ne. ²⁵ Dze ne nacle diidz ycaalsa ne dzioolnie ne Dios, ible none ycaalsa ne grëse ne, guionald ne mine run grë zha ne rzozit. None cso ne diidz lo grë zha ne nacgrë ne, conley ne zdoo zho dziits so zho lo mine riladz ne; xco co none dzio ne niina ne laa dze ne guiaad Jesús ziaadgaxle.

²⁶ Zha ne beenbeyle zha nac diidzli, ni lozh ga xtsiinpaagunçtal zho xtol zho, tsodraa gon ne csañmbe zho lo dol co; ²⁷ lëëtaa mine tsieguial zho nac guielnëdöx ne yгаа zho zeene laa Dios gun guielwxtis; dze co laa me cxeel zho lo guidox, zaatne nitlo grëraa zha ntseeb ne gocdaan lo me. ²⁸ Gotsaa gwi ne ganle, niicxe ley ne na pcaania Moisés padzeela ga, zha ne rguits mine rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho. ²⁹ Nana, çpe lelgue zha ne dzigo quiits mine rnabey Jesús? Mazdraa gon nac guielnë ne yгаа zho, sac noguitnie zho xchen Jesús ga, rzhidznie zho Espiritu Sant ga sca gun zho. Noguitnie zho ren co, ni lëëw bzhiie biaañmbe zho lo dol, lëëw bzhiie zeene psañ Dios stib ttiidz me zha gbig miech lo me; rzhidznie zho Espiritu Sant, ni men co no zhixco zho.

³⁰ Zha ne sca gun, ible nroob guielnë ne yгаа zho; sac ndion ne ganle zha nac xDios ne, me znu rnee: "Naa raguiäl gun guielwxtis; naa gded mine rieguial tib tib miech." Ni zhobneeqe lo Xtiidz me: "Grëse miech, lo me cueero zho grë ncuaañe been zho." ³¹ iNe nligaa ncuaañe gdzieb ne ted grë zha ntseeb ne sca guiab ladznia Dios, men nguiamban!

³² Sangue to, golsoladz ganle zha bded to zeene griinpaap silo bnalo to Jesús, niicle ne scataa nroob guielnë ne gon to, per beençtalde to xtol to. ³³ Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to. ³⁴ Grë zha ne biab ladzguiib, mbanse rac zdoo to ran to zha rac zho; niicle zeene biaad zha ne biaadla grë ncuaañe nacchen to, psaan to ptiche zhow, peet güeyniedaque guic to; sac nanle to mazdraa nac guielnzaac ne yгаа to gbaa, ni minçosi gdziind dze ne nitlow. ³⁵ Nana sca, scaque dziits golso; sac telne tibaque gnalo to Dios, ible zгаа to guielnzaac ne gneedz me. ³⁶ Ible guiaand zdoo to, tibaque dziits golso golgun mine rnabey me; zeena yгаа to grë ncuaañe bneele me gneedz me lo to.

³⁷ Golsoladz ganle, znu zhobnee lo Xtiidz me: Ible ile ziaad men ne nacle diidz guiaad ga, led nroobdraaw, laa me glansole.

³⁸ Grë zha ne zienäl mine nac diidzli, ible zban zho sac rnalo zho naa; laa telne guiaan zdoo zho sozit zho lo naa, ni lanu gleynied naa zho.

³⁹ Sangue ne gon, nozozite ne lo Dios, sinque dib zdoo ne rnalo ne me. Grë zha ne sca rzozit lo me, nëz ne nitlo zho ga zie zho; laa ne gon, ible zгаа ne tib guielmban ne gdziind dze lozh, sacne znu dib zdoo ne rnalo ne me.

11

Zhapaa nac ne dib zdoo ne gnalo ne Dios

¹ Znu nac ne dib zdoo ne gnalo ne Dios. Zha ne dib zdoo rnalo Dios, tiblique zienie guic zho ne ible zгаа zho mine quiambëz zho gdeed me lo zho; niicle ncuaañe gard gan zhow, per rzac zho zig nac zeene ranle zhow. ² Zig nac grë xmengol ne, ne scacxe waa bnalo zho Dios gane bleynie me zho.

³ Scagaa niina, ne dib zdoo ne rnalo ne Dios, gane riladz ne me bzaa guidzliu ni grëragaa ncuaañe no, zeene bnabey me biaaw, niicle ne peet guieñd hor co.

⁴ Gotsaa gwi ne ganle lëë bla zhagol ne dib zdoo bnalo Dios nu:

Zig nac Abel, ne dib zdoos me bnalo me Dios, gane bleynie Dios gon ne bdeed me, lëdle gon ne bdeed bets me Caïn. Ne sca bnalo me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoos me bnalo me Dios.

⁵ Scaque Enoc, ne dib zdoos me bnalo me Dios, gane gute me, zomban me zeynie Dios me gbaa, choot gondraa me. Zeene bii zomban me lo guidzliu, blu Dios ne rdziladz Dios zha mban me. ⁶ Sac zha ne rnalod Dios dib zdoos, grieelod gban zho zigne rdziladz Dios. Zha ne racladz gbig zho lo Dios, none dib zdoos zho gliladz zho ne nli no me, ni gliladz zho ne nli rcaania me zha ne nli pa rio liaadz rbig lo me.

⁷ Zig nac Noé, ne dib zdoos me bnalo me Dios, gane bliladz me xtiidz Dios zeene rëb Dios lo me pe nac ncuanea ziaadyob gac; bin me diidz bzaa me tib barcw nroob, ni len barcw co bio me gza xpëed me ni tsiel me, blaa zho lo guielne co. Ni ne sca bnalo me Dios, gane ible zгаа me grë mine gdeed Dios lo grë zha ne biaanmbele lo Dios; laa grë zha ntseeb co, ib bnalod zho Dios, gane sca bnitlo zho.

⁸ Zig nac Abraham, ne dib zdoos me bnalo me Dios, gane zeene bredz Dios me ycaania me zaatne gdeed Dios lo me, binga me diidz brie me zie me, niicle ne nand me zha nac dan co. ⁹ Ni ne sca rnalod me Dios, gane niicle bdzin me lo liu co, laa me wbanse ga zig tib menzit. Lega nacsse len grë yu mantiad bio me grop me Isaac, scaquegaa Jacob; sac ye grop zha co biaan diidz nacchen liu co. ¹⁰ Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdzin me.

¹¹ Scaque Sar, wnaa ne goc tsiel Abraham, ne dib zdoos me bnalo me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdoos me bliladz me ible zun Dios mine bnee me ga. ¹² Ye Abraham, mengol-le me, men ne yquianiedraa mëed nac me, ni zeene laa Sar gop mëed co, mieh guizhiu ne brieequia lo dii co; pale mel ne ndziib gbaa, yuzh ne ndxiega ro nisdoos.

¹³ Gza zha ne blozh goquiet nu, gardaque yгаа zho grë mine bnee Dios gdeed me lo zho, laa zho gut; zeene bii zomban zho lo guidzliu rii, dib zdoos zho bnalo zho me gane bliladz zho ne ible zгаа zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nacsse zho zig tib menzit. ¹⁴ Ni ne sca bien zho tib ziaadtedse zho lo guidzliu rii, ga rlu ne dzigoraa gdzin zho zaatne gacpaa ladz zho. ¹⁵ Sac telne niend zho ne scaw, znuse mbire zho ney zho zaatne brie zho ga. ¹⁶ Tibaque laa guic zho güeynie ne ib zdzin zho zaatne gacpaa ladz zho gbaa; gacxe waa, rtoladzd Dios ne nac me Dios ne riladz zho, laa me bzhixcuaale guiedz ne gac ladz zho ga.

¹⁷ Zeene been Dios Abraham prueb dien pe nli rnalod Abraham me, rëb me cogon Abraham xpëed Abraham Isaac; ne dib zdoos Abraham rnalod me Dios gane niicle tibaque mëed ga lo me, per bleeladz me mëed co, laa me niutle win niac win gon. ¹⁸ Ni laa xtiidz Dios nac ne win gunctal lo xti me! ¹⁹ Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieequia gut win ga ni biire brieeban win stib.

²⁰ Niiclegaa Isaac, ne dib zdoos me bnalo me Dios, gane zeene bnaab me gunlay Dios grop xpëed me, Jacob ni Esaú, bzeet me zha gac lo xquielmban zho.

²¹ Scaque Jacob, ne dib zdoos me bnalo me Dios, gane niicle laa me nole guet me bnaab me gunlay Dios grop xpëedbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

²² Scaque José, ne dib zdo me bnalo me Dios, gane zeene laa me merle guet bzeet me ne ib zdin dze griece zha Israel Egipt; haxta psan me diidz güey zho xtsit me zeene laa zho griece ga.

²³ Zig nac pxoz Moisés, xniia Moisés, ne dib zdo me bnalo me Dios, gane bloolan me mëed niow yeen co lidz me tson mëe; ib bdziebd me mine bnabey rey Egipt.

²⁴ Niiclegaa Moisés, ne dib zdo me bnalo me Dios, gane zeene laa me broob bdeetraa me diidz niunbey zho me zig xpëedmiag rey; ²⁵ laa ne niaan me lidz rey nleynie me grë ncuane niunctal xtol me, mazd bleeladz me me psaci zho me grë menladz me. ²⁶ Bien me ne nonguielraaw ted me guielnë zig pteed zho Jesús, lëdle niaannie me grë ncuane non ne no Egipt; sacne mine mazdraa nonie guic me nac guielnzaac ne gdeed Dios lo me.

²⁷ Ne sca rnalo me Dios, gane bdziebd me xquieldox rey, tiblrique been me guic me briece me Egipt; sac nanpaa me niicle rand me Dios, per Dios nacie me. ²⁸ Ne scaque rnalo me Dios, gane bnabey me been zha Israel lni Pascw, ni bnabey me bdiaab xchen carner yeen grëse ro lidz zho, zeena guete xpëed glo zho wdze co.

²⁹ Grë zha Israel co, ne dib zdo zho bnalo zho Dios gane wbiig lo Nisdoo Nizhnie, bzhal tib nëz mbidz bded zho; laa zeene gocladz grë xmenguiib rey Egipt nded zho, znuse bdzieel lo nisdoo co stib, grëse zho gut. ³⁰ Ne scaque dib zdo zho bnalo zho Dios, gane bliaal biedz nroob ne ndze igo guiedz Jericó, zeene bza gadz ngbidz noyecw zho igo biedz co.

³¹ Zig nac Rahab, wnaa ro nëz ne bio guiedz Jericó, ne dib zdo me bnalo me Dios, gane peet gocd me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glole pxeel zha Israel güey wleets ga.

³² Ni noragaa zha ne sca dib zdo bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David, zig nac Samuel, ni grëragaa zha ne biadteed xtiidz Dios lo miech. ³³ Ne sca dib zdo zho bnalo zho Dios, no zho beenchen grë guiedz nroob, no zho bnabey grë guiedz zigne nonguiela, no zho gonlo grë mine bzeet Dios gdeed me lo zho, no zho role meedz bdedlaa zho; ³⁴ no zho lo beldox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho biablote lo dil ni biire pcaa zho fuerz stib, haxta benccoön zho zha zit ne nodilnie zho. ³⁵ Grë men wnaa, no zho gonlo brieegan menlidz zho.

Nzian grë zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmбан ne yгаа zho zeene laa zho grieegan. ³⁶ Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguiib; ³⁷ no zho bdeedque miech zho haxta gut zho, no zho bgaa bloosierr miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nëzrii nëzrec zie zho, mbanse rac zho guiend pe gow zho, guiend xab zho, tib lëse guid mëcwxiil, tib lëse guid chiv nriel zho. ³⁸ Miech wen nac zho, ni rieguiald grë miech guidzliu rii guiaadban zha co lo zho, per scataa bded zho. Niapse grë dan bidz, grë dan gui, bio zho; zaatne blëz zho grë len blë, zaatne blëz zho grë len bliee.

³⁹ Ni golgacnan ganle, niicle nli bianzuiu zho lo Dios ne sca dib zdo zho bnalo zho me, per gardaque yгаа zho guielnzaac ne psan me diidz ga yгаа zho; ⁴⁰ sacne laa Dios racladz tipse ygaanie ne zho guielnzaac ne psanle me diidz gnedz me lo ne niina, sac min co nac mine mazdraa nroob.

12

Choot gbiched lo Jesús

¹Nzianodox grê zha ne sca dib zdoo bnalo Dios. Ni niina, grêse zha co laa zho ndxiwî lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grê ncuaañe runctal xtol ne, zeena ycadraaw parne grielo tiblîque dzio ne nêz gdziñ ne zaatne no gdziñ ne. ²Tibaque golgotsaa guionie guic ne laa ne gdziñ lo Jesús ga, men ne zo lo ne grêse ne ne rnalo ne Dios, ni me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuaañe mbeeguiełto ga zeene sca quia me lo cruz, per ptoladz me.

Ni nligaa, zig nac niina cue Dios nêz derech ga zob me gbaa.

³Golguieñ sca, zeene racmban zdoo to, zeene racladz guiaan zdoo to, ib gdeete to diidz; golsoladz ganle, zha pxcw Jesús bded me grêtaa miñe pteed grê miech ngoopdol co me. ⁴Parga nli, nê noded to noxco to gunctalde to xtol to, per gard guiab ne ygaa to ne gut miech to. ⁵Golsoladz ganle zha rnee Dios lo grê zha ne nac xpêed me. Znu raquiet lo Xtîidz me, zaatne rnee: Xin, zeene rso Dios diidz lo luu gundraa luu grê ncuaañe nonguield, none sac zdoo luuw;

niicle zeene gactoxgaa me lo luu, gacmband luu.

⁶Sac gon zha ne sca rso me diidz lo, ga rlu ne rleynie me zho; zha ne ractoxgaa me lo, ga rlu ne nli xpêed me nac zho.

⁷Golguieñ sca, gacmbande to tel pe caxtigw ne cteed Dios to. Golgan ganle, niicxe miech na, ractox zho lo xpêed zho zeene rond win diidz. ⁸Nana, tel ib peet glisquidgaa me lo to, gase dzigo rlu ne led xpêete me nac to; sac gon, zha ne nac xpêed me, rlisqui me zeene rond zho xtiidz me. ⁹Golsoladz ganle, zeene rac ne mēēdlas rlisqui pxoz ne zeene rdziuun ne ncuaañe nonguield; scagaa ne, rien ne ne me rnabey lo ne. Nana, ¿pe lel Pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena ygaa ne guielmban. ¹⁰Gotsaa gwi ne ganle, zig nac pxoz ne, rquia me rlisqui me zeene rdziuun ne ncuaañe nonguield, sac racladz me zaacse gban ne, ni chop tsonaque dze nac lo guielmban ri; sangue Dios gon, laa me noseed ne par gac ne tib miech mbe zdoo, zig me; ni lēē min co nonraa. ¹¹Parga nli, tsod zha ne gley zeene noded zho caxtigw, sinque nê rzac zhow; per zeene rded ga, zha ne rienppaa rquiina haxta wen riaan zdoo zho, sac rseed zho zaacse rban zho.

Nodne gbiche miech lo Dios

¹²Nana sca, telne bdzagle to, golgun ndip nia to, golgun ndip ni to stib, ¹³zaacse golsē, tib nêz goltso zeena gziabnêzde to; dzigo scagaa zrieelo gacnie to zha ne lega noyobe.

¹⁴Goltsoxco niowse golbannie samiech to, ib gunctalde to xtol to; sac zha ne mbed zdoo, grielod gdziñ zho lo Dios. ¹⁵Tibaque golteedlolsa zha ne nacgrê to, golguieñ ganle racladz Dios gacnie me to, napaa na lel nozozit to lo me. Sac zha ne rzozit lo Dios, zeene laa miñe nac zho rzhoobnen, nzian zdoo zha ne rsañ zho, rlozh ga grêse zha co runctal xtol. ¹⁶Ib gunde to grê ncuaañe tsod zdoo Dios, ib quitniede to guielnzaac ne bneedz Dios lo to; gunde to zigne been Esaú, tel Esaú, por tib plat nis scuaan psaan me guielnzaac ne bgaa me ne nac me mēēdglo; ¹⁷ni nanwen to ganle, zeene laa me gocladz nab pxoz me niunlay Dios me zig mēēdglo, brieelodraaw. Dzigoraa rquia zdoo me, haxta roon me rnab me ygaa me guielnzaac co stib, per pe xtsiinraaw.

¹⁸ ¡Golguien sca ganle, nroob nac guielnzaac ne bneedz Dios lo to niina! Led yede to ndzin pa tib cho gui, zig bdzin xmengol to cho Gui Sinai padzeela. Grè xmengol to, zeene ndxie zho zhan Gui Sinai, beldox ne gon zho rso guic gui co, ni goc tib ncow, lala rio bi ratsie nguzi ni rree me; ¹⁹ ni lala nguiedz rruedz trompet, ni nguiedz zëeb tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnab zho lo me gneedraa me. ²⁰ Bdzieb zho bin zho rëb me, zha ne tsep cho gui co none gdeedquie zho zho, gliz lanzгаа zho zho haxta guet zho; scaque grè ma. ²¹ Ncuane gdziebdoe ne gon zho ga; haxta Moisés rzhidz lo dzeb co.

²² Sangue to, rreequia haxta Jerusalén, zaatne no Dios nguiamban gbaa bdzin to, zaatne ndxie grè anjl guizhiu ne roolnie Dios; ²³ zaatne ndxie grè zha ne glopaa bzëeb xnëz me, grè zha ne zhooble lë gbaa ga. Laa to bdzinle lo Dios, men ne run guielwxtis; zaatne ndxie grè zha ne psanmbe Dios biaan zho zig tib zha ne peet xtold. ²⁴ Laa to bdzinle lo Jesús, men ne rdzinnie miech lo Dios niina ne laa Dios psan stib xtiidz me; laa to bdzinle zaatne rreequia bliaal xchen Jesús len yadoo gbaa, lëe ren co mazdraa non lëdle xchen Abel.

²⁵ Min co nagon, golguien golgun mine rnabey Dios to. Golsoladz ganle, zha bnitlo grè zhagol ne sca ib bind xtiidz me, ni tib miechse pteed xtiidz me lo zho. ¿Pe lel na dzigo ne mezhal quianee lo ne? Ib diedlaad ne gon telne dziond ne mine rnabey me. ²⁶ Zeene bnee me lo grè zhagol co, haxta beencxidz me guidzliu, ni rnee me: “Zbire naa gunxcidz naa guidzliu stib, haxta ye gbaa gunxcidz naa.” ²⁷ Gase na ganle rlu, lo grëe ncuane bzaa me zdzin ne laa me csiniw, dzigo laaw nitlo; lozh ga, guiaane mine gdzindraa dze nitlo; ²⁸ ni ga nagon gneedz me gbiaaz ne. Gacxe waa, golgotsaa dziun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me. ²⁹ Golguien ganle, tel me ne nac me Dios ne riladz ne, nac me zig nac tib beldox ne peet rdedlaad lo.

13

Golban zigne racladz Dios

¹ Bets, bzian, golleynie grè zha ne nacgrè to, golguien ganle tibaque men ne nac Pxoaz to. ² Goldeed zaatne cuëz grè menzit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanjl Dios blëz lidz zho. ³ Goltsigan grè zha ne niogyu ladzguiib, goltsa xliaadz zho zig nac zeene ye to nogrè zho ga. Gologacie grè zha ne nosacsi miech, nanle to ganle zha rzac ne zeene no ne tib lo guielnë.

⁴ To ne nac to zha ne ptsieelniale, sacde to guieltsieel zig beelze pe wguit, ib yquidiede to tsieel to; sac zha ne yquiangob tib zha ne nonguield tsonie zho o yquiangobгаа zho tib zha ne nole tsieel, ib tedsod zunquizh Dios zho dol co.

⁵ Tsienalde to loxaque dien zha gunlo to dimi; sinque golley totsaque no mine yquiin to. Golsoladz ganle, led znu rnee Dios lo ne: “Tibaque gacnie naa to, ib csaand naa to.” ⁶ Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacie naa, ¿pe nac nadien gdzieeb naa?

¡Peet grielod gun miech naa!

⁷ Golsoladz zha goc men ne bzo lo to pseed to Xtiidz Dios, ni dib zdoe to gonalo Dios zigne bnalo me Dios.

⁸ Golguien ganle, gdzind dze ne gdzëe Jesús, zigne goc me padzeela, scaque nac me niina, ni scaqueгаа gac me grëtaa len iz ne guiaadraa. ⁹ Ib gliladzde to grè wseed ne ziaadnie stib miech sca, wseed ne ni nacdraa Xtiidz Jesús.

Diosse nac men ne lozh gzodziits ne lo mine rliadz ne; nacda por tsienal to dien pe gow to, pegaa gowde to; sac zha ne zienal min co, paat yquiinda lo zho. ¹⁰ Grëse zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rrieequia no tib lo pcoog, ni nese zrieelo yquiin gon ne ndziib lo co; laa grë pxoz ne zienal mine rnabey ley, grielod yquiin zho gon co.

¹¹ Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtol mengüiedz, dzigo rienie zho xcuerp ma ro guiedz, ga rzëëg zhow. ¹² Scaque Jesús, zeene bzhiee xchen me psanmbe me miech lo dol; ro guiedz ga güeysacsi zho me gut me. ¹³ Scagaa ne niina, golgotsaa griee ne lo grë ncuaaane lo guidzliu rii, golgotsaa cueeladz ne ne guional ne zhits Jesús dzian ne grë guielnë, telne no dzian new. ¹⁴ Benque ndion ne ganle, nacd lo guidzliu rii zaatne gbiaazpaa ne, sinque laa ne zional yгаа ne zaatne naraa gneedz Dios gbiaaz ne.

¹⁵ Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleynie ne Dios, golgotsaa gdeed ne xquizh lo me. Lëë min co gac zig tib gon ne gdeed ne lo me. ¹⁶ Goltsoxco golgun grë ncuaaane yquiin lo samiech to, ncuaaane rgaa lo to, goldeed palala lo grë zha ne guiend pe yquiin; sac rrieequia lëë stib gon ga gdeed to lo Dios, ni mincogaa rleynie me.

¹⁷ Golgon xtiidz zha ne zo lo to noseod to Xtiidz Dios, golguien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, telne lel nogoguielnë to zho, lëda ga gun to.

¹⁸ Golnab lo Dios gacnieñ me no tibaque znu dzioxco no dziuun no mine racladz me, me nan ganle mbe zdoon, mbe xquielrien no. ¹⁹ Ni mine rsopaa naa diidz lo to, golsoladz golnab lo Dios gneedz me diidz gbiire guialniob naa i, gualgan naa to.

²⁰ Jesús nac men ne quianappaa ne, zig rquianap baxtor xpëcwxiil zho; me gut bzhiee xchen me zeene psan Dios diidz stib zha gdziñ miech lo me; ni diidz cosi gdziñdraa dze ne gdzëëw.

Dios men ne bleeban Jesús, men ne racnieñ miech peet zhgab rtsebd zho, ²¹ me gneedz guielbiini lo to grielo to gun to mine rnabey me. Jesús sca golnalo, zeena grielo gban to zigne rdziladz Dios. Dios nac men ne rieguial dziuunnon ne, zigtaa niinaw, zigtagaa grëraa len izdoo ne guiaada. Scaw nagon.

²² Bets, bzian, laa naa rnab lo to ib glëëd guic to, golcaania palalse diidz ne pso naa lo to nu.

²³ Racladz naa gacnan to ganle, laa bets ne Timoté brielee ladzguuib; telne zlansoniob me lo naa nu, grop no me guiaad lo to i.

²⁴ Golsiguel goldeed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeel zhibdiuzh zho lo to.

²⁵ Guiaannie Dios to sca. Me glu ganle pa lotaa noxco me to.

GUITS NE PQUIAA SANTIAGW

¡Diuzh to grëse to!

¹ Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

² Bets, bzian, ndal ncuuaane rded ne parne glu dien pe nli dib zdoo ne rnalo ne Dios. Tel pe nactaa ncuuaane noded to i, ib gacmbande to, sinque golley.

³ Sac gon, zeene squi ran ne grë pe guielnë, ga rseed ne tibliladz rac ne tel petaa noded ne. ⁴ Golseed sca tibliladz golgac. ¡ib guiaan zdoo to tel petaa nac guielnë ne gan to! Sac zeene sca cseed to gan to guielnë, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

⁵ Zha ne racladz ygaa guielbiini co, zac gnab zhow lo Dios, ni mesi gon zdeed mew; sac guielbiini ne gnabtae ne lo me zneedz mew. Led yed me yca, led yed me glisqui pe nacne pe gnab ne lo me. ⁶⁻⁸ Lëëraasi dib zdoo ne none gnab new, nodne gacchop guic ne; sac zha ne racchop guic, gdzind dze ygaa zho mine rnab zho. Nac zho, tib dze dib zdoo zho rliladz zho zgaa zho mine rnab zho, stibgaa dze na rliladzdraa zhow, ib ractiblid guic zho; masaque nac zho zig nac grë mtsiin ne rbib lo nisdoo, sac tel mtsiin co loxaque nëzrii nëzrec zienie mew.

⁹ No zha bets ne, zha bzian ne, quianied zho ncuuaane yquiin zho, par miech peet nond zho; per none gon ine gley zho sac nroob non zho lo Dios. ¹⁰⁻¹¹ Scagaa zha ne rapchen, none ine gley zho niina ne biaanwin zho, sac nëz lo Dios grë ncuuaane rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaan grë ncuuaane rap zho. Masaanac nacse zho zig nac guieen grë guizh ye, tel guiee cow, zhixtsëese ngbidz rcuidz guizh ne zoba lo, rlozh ga rliaalgaw, gataa rnitlo xquielniowa.

¹² Dichos zha ne ib rrozite lo Dios niicle no nzian ncuuaane rcheep zho guncal zho xtol zho, per rund zhow; sac zha cosi zgaa zho tib guielmban ne gdzind dze lozh, guielmban ne bneele Dios gdeed me lo grëse zha ne rleynie me. ¹³ Zeene sca no ncuuaane rcheep ne guncal ne xtol ne, guiabd ne togo Dios noquuil ne gun new; sac gon led yed Dios rzoobladz ncuuaane ndzinlid, ni niicle rquildgaa me miech gun zhow. ¹⁴⁻¹⁵ Grë ncuuaane ndzinlid ne rzoobladz ne, grë ncuuaan yozh ne rionie guic ne, min co nac mine rquuil ne. Lëew nac mine rcheep ne runcal ne xtol ne, ni ndionle ne ganle, lëë gdib mine gdeed dol lo miech nac guielnëdox ne ygaa zho.

¹⁶ Bets, bzian, gac-wete to sca. ¹⁷ Golguien ganle, ncuuaane rquiin, ncuuaane ndzinli, min co nac mine rneedz Dios. Tibaque nac me, led yed me rdzëe par guiab ne meque rnabey rac guielntseeb. Me nac tib biini ne gdzind dze guiuu, ni tib lë guielcow guieend zaatne no me. ¹⁸ Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mëëdglo lo me.

Nacda yquiaadiagse miech Xtiidz Dios

¹⁹ Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcora ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëële. ²⁰ Sac gon, zeene riëë ne, grielod gun ne ncuuaane rdziladz Dios. ²¹ Golguien sca, golsaan grëtaa ncuuaane ndzinlid ne ziyun to, golbiche lo grë guielntseeb ne

znutaa quaiyac niina. Ine ndooladz golgac, golleynie Xtii dz Dios, diidz ndzon ne pseedle to; sac gon læew rlu zha laa to lo dol.

²² Per guiabde to togo loxaque yquiaadiagse to Xtii dz Dios læew ga; sinque ib none gban to mine rquiaadiag to, sac tel ib gbande tow læew que to noquidie to ga. ²³ Sac zha ne rquiaadiag Xtii dz Dios, ni rband zhow, rzac zho zig rzac ne zeene rwi ne lo ne lo quiewan: ²⁴ Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. ²⁵ Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuaane gun zho.

²⁶ Gacxe waa, zha ne rnee xnëz Dios no zho ni rgobeyd zho pe rnee zho, læew que zha noquidie zho ga, ga rlu nlid zienal zho mine rnabey Dios.

²⁷ Sac gon, par Dios men ne nac Pxo z ne, zha ne no xnëz me none tsie zho tsiegun zho xyudar grë mëëdbziab, tsiegun zho xyudar grë wnaa ne ret tsiel, ni toxco zho zaacse gban zho, ib tsienald zho ncuaane ndzinlid ne run grëraa miech.

2

Lëda ga run zha ne rbe

¹ Bets, bzian, gunde to ne ncueese lo miech ne gnee to, sac zha ne sca run, zha dien guiab zho xnëz Jesús no zho. ²⁻³ Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lælëd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: "Ise bzo, telne racladzga luu sob luu, lo liuse i bzob." ⁴ ¿Pe sca na rac zha ne no xnëz Jesús? Zha ne gon sca run, ga rlu zho niapse guie!ntseeb no guic zho.

⁵ Lëda ga gon bets, lëda ga gon bzian. Golgacan ganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena yгаа zho zaatne bneele me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; ⁶ laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riezho zho to lo wxtis; ⁷ haxta rdzibdee zho Jesús, men ndzon ne nacie to niina.

⁸ Ib none gban ne zigne rnabey Xley Dios, lo xley me zhonee: "Bleynie samiech luu, zigne rleynie luu luu." ⁹ Golguien gon, dol i noyun to squi rbe to dien cho nac zha ricw, chogaa nac zha mban; sac Xley Dios i quiaaguiis to. ¹⁰ Golgacan ganle, zha ne rguuiss tibaque xley Dios, niicle maase zienal zho grëraaw, laa zho beenctal-le xtol zho ga, rzacaque zho zig zha ne noguiis grëw. ¹¹ Sac tibaque men ne psana grësew. Gacxe waa, tel zha ne zienal mine rnee: "Gute luu samiech luu", per rguuiss zho mine rnee: "Yquiangobd luu zha ne led tsiel luu", laa zho beenctal-le xtol zho ga. ¹² Niowse sca golgac, niicle zeene gneegaa tow, niowse golnee; sac gon, dzin dze cxobdol ne dien pe wban ne zigne rnabey Jesús, te wband new ye. ¹³ Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guie!nëd ox ne cxeel me.

Zha ne rnal o Dios none glu zhow

¹⁴ Bets, bzian, ¿pa dien rquiin guiab ne dib zdoo ne rnal o ne Dios, xnëz me no ne, ni tel rund ne xyudar samiech ne? ¿Niacle scase laa Dios csilaale ne? ¹⁵ Gzoob ne no zha ne nacgrë to i, yase tib bets tow, tib bziangaa tow, ranlo to guie!nd xab zho, niicle quianied zho ncuaane gow zho; ¹⁶ ni guiab to lo zho: "Csacsid luu luu, got xabnal luu, dow ncuaane racladz luu", per loxaque diidz

sca guiab to, ni gdeete to ncuuaane run falt lo zho. ¿Pa dien yquiin diidz co? ¹⁷ Scadaa nagon paat rquiinda guiab ne rnalo ne Dios, ni tel rund ne mine rieguial ne gun ne. ¹⁸ Gacxe waa, zha ne rnalo Dios ni run zho mine rieguial zho, no zho gnè lèda i run zha ne rnee lèlew ga totsaque gnalo ne Dios. Ni rap zho rson, sac grielod glu ne rnalo ne me, telne rund ne mine rieguial ne.

¹⁹ Nli wena run zha ne riladz tibaque Dios no, per grielod guiab zho lèlew ga, sac gon zig nac mendox ye ma riladz tibaque Dios no, per led por mincod laa ma lo guielnè ne cxeel me, sinque haxta rdzieb ma me. ²⁰ Nadzpaan xen zha ne sca rzac, pe ni lalnu riend zho paat rquiinda guiab zho riladz zho Dios ni telne rund zho mine rieguial zho. ²¹ Golgan ganle, zig nac pxozgol ne Abraham, porne been me mine rieguial me gane pcaania Dios me zig tib zha ne peet xtol. Led rsoladz to ganle, zeene rëb Dios lo me tsielogon me xpëed me, güey me zaatne pxeel Dios me. ²² Gotsaa gwi ne ganle, zeene been Abraham mine bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. ²³ Lo Xtiidz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xtol; zëeb diidz, tib zha ndzieeldiidz Dios goc me.

²⁴ Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli riladz zho me, gun zho mine rnabey me zho. ²⁵ Golsoladz ganle, scaque wnaa ro nëz ne brieelë Rahab, por been me xyudar samiech me, gane pcaania Dios me zig tib zha ne peet xtol; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nëz ne wbire zho, bgaad zho. ²⁶ Gase na ganle rlu, paat rquiinda guiab ne riladz ne Dios ni tel rund ne mine rieguial ne, nacse ne dzigo zig tib xcuerp ngutoo, tel cuerp cow, ¿pa dien yquina?

3

Ncuuaane run ludz miech

¹ Bets, bzian, guiabde to lega tso to glisqui to ncuuaane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuuaane tsasqui lo zho gal dze ne laa zho gacredz lo Dios.

² Grëse ne nzian mod ne rxin ne lo samiech ne. Tel niaca mine no tib zha ne grielo ycuëez ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. ³ Gotsaa gwi ne ganle zig nac guay, con tib lè win guiib ne rgo miech ro ma rrieelo rnabey zho ma, rienie zho ma nëz ne racladztaa zho. ⁴ Scaque barcw, niicle ne nrooba, no hor rrieemedox lo nis rcheepa, per con tib lè yag lag win ne rsëe miecha, rrieelo rienie zhow nëz ne racladztaa zho. ⁵ Scapaa nagon nac ludz ne; niicle ne winsew, per nroob guielqui ne runa. ¡Ran to ganle tib bzhil yeense name rzobgui dan! ⁶ Ni tel ludz ne gon, rrieequia tib bel ga naca. Tib lè win xcuerp ne naca, per guielqui nroob ne runa, runctala xtol miech. Gun ne cuent tib lè gui ne brieegabil naca; ni dipse lo xquielmban miech noxtseeb zho low.

⁷ Golwi ganle, rrieelo miech runndoo zho grë ma ne rsiibe, grë ma ne rzëlen liu, haxta grë ma ntseeb, haxta grë ma ne no nisdoo, rnabey zho ma. ⁸ Per guieend zha ne gon grielo gnabey ludz; ncuuaane ntseeb naca, choot grielod gnabeya; masaque laaw no par gnitlow miech, zigne run grë guizh ncuuaan. ⁹ Lèew name rquini ne roolnie ne Dios men ne nac Pxoz ne, ni rlozh ga lèëquew rdzibdee ne samiech ne, ni lalnu riend ne me bzaa zho, biaan zho zigne rlu me. ¹⁰ ¿Pe ga nadien, ro ne roolnie ne Dios, ni roque ne rgodee ne samiech ne?

¹¹ Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed? ¹² Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbé uv? Nanle to ganle racd min co.

Zha ne nixbiini

¹³ Lo grè zha ne nacgrè to i, tel no zha ne rzac zha nixbiini nac zho, none glu zhow ine zaacse gbannie zho samiech zho, gac zho tib miech ndooladz zig none gac tib zha nixbiini. ¹⁴ Per tel tibaque nè rac zdoos zho ran zho zha ne stib noded, tibaque noguib zho csanwin zho samiech zho; gacnan zho ganle, led scad rac zha nixbiini. Ni lalnu rieguiald tso zho csannziuu zho zho. ¹⁵ Led scad nac guielbiini ne rdeed Dios, sinque lèe zhiwseed mendox ga, lèe min co zienal grèraa miech guidzliu. ¹⁶ Zeene sca nè rac zdoos miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grè guielntseeb rzobni zho ga. ¹⁷ Zha ne nli rap guielbiini ne rdeed Dios, rund zho min co, laa zho zienal:

ndzinlise gban zho,
rleynied zho dil,
rguib zho zaacse rnee zho lo miech,
wen rac zho lo grèse miech,
rquia zdoos zho samiech zho,
rund zho cue zho zha ne mazdraa gacnie zho,
ncuaane run zho dib zdoos zho run zhow,
niapse ncuaane ndzinli rioxco zho.

¹⁸ Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeene laa grè miech co rac tib miech wen.

4

Zha ne rleynie guielntseeb

¹ Ne squi tibaque rlèëlsa to, tibaque quiadil to, lèe min qui gon riegat por grè guielntseeb ne rio guic to. ² Rio to riogui to ncuaane grieelod yquianie to, rlozh ga, haxta rut to samiech to parne yquianie tow. Nè rac zdoos ran to cho zha quianie ncuaane quianiede to, zeene ran to rriee lod yquianie tow laa to rlèënie zho, haxta rdilnie to zho. Rriee lod yquianie to ncuaane racladz to, sacne rnabde tow lo Dios. ³ Niicle tel rnabgaa tow lo me, rneedzd mew, sacne laa guic to zienie yquianie tow loxaque par gdeedguxt zdoos to, gdeedguxt xcuerp to.

⁴ ¿Que tal ntseeb to! ¿Pe ib riende to, Dios gon rlèënie to zeene squi rio to rleynie to grè guielntseeb? Sac miech ne squitaa rleynie guielntseeb, lo Dios ga racntseeb zho. ⁵ Golgan ganle, zha rnee lo Xtiedz Dios: “Espiritu Sant, men ne pxeel Dios nacie ne, rleynie me ne, ni racladz me zhaa ncuaane gleynie ne laa ne gleynie ne me.”

⁶ Ni tel Dios gon, noxco me ne, ib zacie me ne gree ne lo guielntseeb; sca rnee lo Xtiedz me, zaatne rnee: “Zacnie Dios grè zha ndooladz, sangue grè zha niats, rdziguiend me zho.”

⁷ Golguien sca, ine ndooladz golgac, golgon mine rnabey Dios. Gdeetraa to diidz yquiel mendox to, sca golgun zeena zhal ma gbiche ma lo to. ⁸ Dib zdoos to golsëeb xnèz Dios, zeena scagaa me zacie me to. Goltsoxco guiaanmbe to lo grètaa xtol to, golnab lo me csanmbe me zdoos to, mese gnalo to, gacchopdraa guic to. ⁹ ¿Golguien ganle, ndzinlid i squi mban to! ¿Mban golgac, goltso guielnè, golgoon, laa ne tso to gzhidz to, laa ne tso to gley to! ¹⁰ ¿Ndooladz golgac lo Dios, zeena cue me to lo grè ncuaane nac to, csanglaa me to!

¹¹ Bets, bzian, ib gneenēde to zha ne nacgrē to. Zha ne rneenē bets zho, bzian zho, bej zho, ni rdziibdoj zho zho, Xley Dios ga rguuits zho. Laa ne so zho gacladz zho zha guñ guielwxtis, mazd tsoxco zho gban zho zigne rnabey ley. ¹² Golguieñ ganle, Dios psañ ley, ni mese rieguial guñ guielwxtis, me nan zho cuibdoj, chogaa csilaa me; per to nadien, zcho nac to par gdziibdoj to samiech to?

¹³ Togaa ne nac to zha ne rnee: “Na gzhe widz dien pa tib guiedz ne guioo ne, guiobiaaz ne ga tib iz, ga dziuun ne wzi dziuun ne wto, dziuunlo ne dimi”, golquiaadiag mine gne naa lo to ganle. ¹⁴ Ne sca rnee to, ipe wen wen nan to dien yo to gzhe widz co! zPe rande to lega nacse xquielmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow. ¹⁵ Mazd golguiab: “Telne zneedz Dios diidz gbanraa ne, miñ rii, miñ rii dziuun ne.” ¹⁶ Led tsođe tibaque guielniats qui zienie guic to, golguieñ guielntseeb ga run zha ne rac niats. ¹⁷ Ni golsoladza ganle: Grēse zha ne nanpaa pe nac ncuaañe ndzinli ne no guñ zho ni rund zhow, xtol zho ga runctal zho.

5

Zha ricw ne zienal guielntseeb

¹ jGrē zha ne rapchen, zha ne zienal loxaque guielntseeb, golquiaadiaga ganle! Golgoon, golquiaadan redz niina, sac gon nroob nac guielnē ne gan to. ² Grē ncuaañe beenlo to i, peet nonda, lega naca zig nac grē ncuaañe biodzle; grē xab to i, rrieequia ncuaañe dowle mxila. ³ Grē guuib or, grē guuib plat ne squitaa quianiē to, rrieequia noloozhle bioochena; ni scadaa gon nitlo to, masaque gac to zig tib ncuaañe riab lo gui.

Laa to beenlo grētaa dimi qui, rzac to lēew yquiin to len dze ne ziaad, ni nande to gon laa dze ne nitlo to ziaadyoble. ⁴ Lēē grē dimi qui gon zēeb to lo grē zha ne quia xtsiin to, noquidie to zho rguizhde to xtse zho. Per golgacnana ganle, grēse redz ne rquiaa zho zeene mban rac zho squi rsacsi to zho, laa Dios binlew. ⁵ Lo grētaa iz ne mban to lo guidzliu rii, loxaque grē ncuaañe gdeed guxt zdoō to, grē ncuaañe gdeed guxt xcuerp to noxco to, ncuaañe yozh ne riabtaa guic to laa to ruña, ib riende to laa dze ne nitlo to ziaadgaxle. jLēē to noyun xcuent ma ne noro par guet ma! ⁶ Pe zhistaa guielntseeb ne quiaayun to, haxta zha ne peet xtold, zha ne nand glis nia lo miech, rquiaqui to zho ncuaañe rund zho, rnabey to ret zho.

Nodne guieed zha ne rnalo Dios

⁷ Bets, bzian, sanque to gon tiblrique golgac haxta gan to gdzin dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblrique rac zho gdipse len mēē guie, rquiambēz zho haxta rdzin dze ne rlaap zho. ⁸ Tiblrique sca golgac. jib guiaand zdoō to, sac gon zhile gdzin dze ne laa men ndzon ne rnabey ne guiaad stib!

⁹ Ib tsođe to guieednie to grē zha ne nacgrē to, zeena gunctalde to xtol to; sac zhile gdzin dze ne laa men ne no guñ guielwxtis guiaad. ¹⁰ Golsoladz ganle, grē zha ne biadteed xtiidz Dios padzeela, niicle nroob guielnē gon zho, per tiblrique goc zho. ¹¹ Zig nac Job, nanaxe to ganle zha nactaa guielnē ne gon Job, per ib bieete me, ni blozhse gon me guielnē co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnē, led lega rand zhow; sac nquialadz me miech, rquia zdoō me zho. Dichos grē zha ne sca nac.

¹² Bets, bzian, zeene tsiegala glu to diidzli rnee to, tsode to gzeet to gbaa, gzeetgaa to guidzliu par gliladz miech xtiidz to; guiab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nlidgaaw, golguiab: “Nlida”, zeena gunc̄talde to xtol̄ to; sac gon̄ zha ne runctal xtol̄, ible zgaa zho guiel̄nē ne csiaab Dios.

¹³ Lo grē to, zha ne no pe tib lo guiel̄nēw, gnab zho lo Dios gacnien̄ me zho. Zha ne no pe tib guiel̄bleya, gool̄nie zho me. ¹⁴ Zha ne rzacnēgaaw, gnabey zho gacredz bla zha ne zo lo to, zha co quēēb nceit guic zho gnab zho lo Dios guiac zho. ¹⁵ Tel̄ne dib zdoos zha co gnab zhow lo Dios, zunguiac Dios zha rzacnē co. Zlische me zho lo xquiel̄guidz zho, ni tel̄ por pe falt ne beengaa zho lo me sca rzacnē zho, zun̄ me zhow perdon.

¹⁶ Gacxe waa, tib tib to zeene run̄ to pe tib falt, yqueetsde tow, golzodiidza lo zha ne nacgrē to, lozhse ga gol̄nab lo Dios gun̄ me to perdon, zeena guiaan̄mbe to lo me. Sac tib zha ne biaan̄wenle nēz lo Dios, zeene sca pe rnab zho lo me run̄ mew, niicle ncuaañe mazdraa ngana. ¹⁷ Golsoladz Lí gan̄le, men̄ ne biadteed xtiidz Dios lo miech padzeela, samiechaque new, per dib zdoos me bnalo me Dios. Tib dze bnab me lo Dios csiaabd Dios nisguie, ni scase goca, dipse len̄ tson̄ iz grōl̄ ni tib lab nis guie biabd; ¹⁸ haxta bnabraa me lo Dios guiaaba stib, dzigoraā biaba, laa guidzliu biire bdeed guiel̄nzaac.

¹⁹ Bets, bzian, tel̄ cho tib zha ne nacgrē to i sozit lo Xtiidz Dios, ni grieelo cho tib to ctsire zho nēz yozh ne zie zho ga; ²⁰ gol̄gacnañ gan̄le, ladzniale guiel̄gut ga rsilaa zho zho, grēse xtol̄ zha co zun̄ Dios zhow perdon.

Santiago

GUTS NE GLO PQUIAA PEDR

Bets, bzian, jdiuzh to grëse to!

¹ Naa nac Pedr, tib zha ne rxeel Jesús nonee Xtiidz Ndzon me lo miech. Laa naa rxel tib guts rii ziaad lo to grëse to ne nac to zha Israel, no to stib ladz ben: zig nac nëz Pont, nëz Galás, nëz Capadóós, nëz Asia ni nëz Bitin.

² Dios men ne nac Pxož ne, ible me bzooblo to mazd padzeela, sac nanle me laa to gac xpëed me. Bdžin dze, zeene laa me pxeel Espiritu Sant bleextso to laa to ngab xnëz me, zeena gban to zigne rnabey me, ni lozh csanmbe Jesús to; sac ible min co nacre bzhiee xchen me. Dios glu ganle pa lotaa noxco me to, zeena peet zhgab ctsebbe to.

³ Xquizh xquielnzaac Dios, Pxož Jesús men ndzon ne rnabey ne, sac gon pquia zdoo me ne ptsëe me lo xquielmban ne, rrieequia gol ne stib. Xquizh me bleeban me Jesús, sac gon ga rlu ib zgaa ne guielnzaac nroob ne no diidz gneedz me lo ne, ⁴ guielnzaac cosi ncuane mbe naca, nacda ncuane nitlo, nacda ncuane gdžëelo, ni gbaa ga quianie mew.

⁵ Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guielnzaac co. Zeene laa dze co gdžin, zanlo to ganle zeene laa me ycaania to.

⁶ Gacxe waa ine nley golgac. Nli zan to grë pe guielnë, per ncuane tib rded ga. ⁷ Ib none gan to grë guielnë, parne ga glu dien pe nli dib zdoo to rnalo to Dios. Zig nac guuib or, parne glu dien pe nli ora, none teda lo gui; scaquegaa to, none gan to guielnë parne glu to nli dib zdoo to rnalo to Dios; ni zig nac or, ncuane rnitlo ga. Grëse zha ne tibaque gnalo me, niicle mazdraa guielnë ne gan zho, gal dze ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me. ⁸ Me i squitaa rleynie to, me i squitaa rnalo to, niicle ne gonde to me, niicle ne rande to me. Tib guielbley nrooba lo to, tib guielbley ndzona, nacda ncuane grieelo gnee to zha naca; ⁹ sac gon, ne squi dib zdoo to rnalo to me, ib scaania me to.

¹⁰ Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapa gun me. ¹¹ Zeene bdeed zhiEspiritu Jesús guielbiini lo zho bzeet zho ne ib laa Dios cxeel me, pe nac guielnë ne ted me, ni pe nac guielndzon ne guiaadnie me; gocladz zho niacnan zho dien cho nac men co, pa hor gac min co. ¹² Nacne blu Dios lo zho gocnan zho nacda ncuane gac len dze co, sinque haxta nele ygaa dziana. Saŋue niina, nanwen to ganle laa grë min co gogle, lëe diidz cub co i gocnan to niina, gbaa biet Espiritu Sant bdeed me guielbiini lo zha ne biadneew lo to. jNcuane ndzona, haxta grë anjl racladz tebaa zha gacnanraa zho dien zha naca!

None gban ne zigne racladz Dios

¹³ Golquix biini xquielrien to sca. Tiblique golgun guic to ne laa to ygaa grëtaa mine ral zdoo Dios gneedz me lo to, zeene laa Jesús guiaad stib. ¹⁴ Zig grë nëed ne ron xtiidz pxož, sca nguzobdiidz golgac lo Dios; gundraa to grë ncuane ndzinlid ne been to zeene gard gunbey to me ga. ¹⁵ Goltsoxco golban zigne racladz me, zeena ine mbe guiaan to lo dol; sac gon tel me, men mbe nac me, nacd me men ne rdziguien dol. ¹⁶ Zigne zhobneeque lo Xtiidz me, zaatne rnee: "None guiaanmbe to lo dol, sac gon men mbe nac naa." ¹⁷ Pxož

to nac me, me rnalo to, nanle to zeene laa me gun guielwxtis, led yed me cue; mine been tib tib miech, zunquizh me zhow. Golguien sca, golgon xtiidz me gzataa dze ne gbanse to lo guidzliu rii.

¹⁸ Golsoladz me blee to lo gre wseed ndzinlid ne psan gre xmenkol to; nanwen to gozh brieet to ga; per pquiind me ncuane rnitlo zig nac pe dimi or; pe dimi plat; ¹⁹ sinque laa me pquiin xchen ndzon Jesus. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo Dios. ²⁰ Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdzin laa me biaad, biaadsanwen me to lo Dios; laa Dios been min co sacne rleynie me to. ²¹ Gacxe waa, zrieelo dib zdoo to gnalo to Dios, mese none gliladz to. Me nac men ne bleeban Jesus, blu me ne men non nac Jesus.

²² Ni niina ne laa to mban zigne nac Xtiidz Dios, mine nac diidzli, laa zdoo to biaanmbele lo dol; nasi zrieelo gleynie to zha ne nacgre to. Dib zdoo to sca golleynie zho, ²³ golguien ganle, tib guielmban cuble rap to niina, rrieequia gol to stib; per nacdraaw zigne gol to glo, sinque lee guielmban qui bgaa to zeene biladz to Xtiidz Dios, diidz ne rneedz guielmban, diidz ne gdzind dze nitlo.

²⁴ Zigne zhobneeque low, zaatne rnee:

Grese ne nac ne miech, dzin dze ne lozh ne,
lega nacse ne zig nac gre guizhye,

gre xquielndaan ne, lega nacsaw zig nac guieen guizh co.

Sac tel guizhyew, zeene laaw rbidz, laa guieena rliaa laque;

²⁵ sangue Xtiidz Dios, gdzind dze ne nitlow.

Ni lee diidz co ga gon biadseed zho to, leew rlu zha laa miech lo gre xtol zho.

2

¹ Nana sca:

gundraa to gre guielntseeb,

yquidiedraa to samiech to,

gundraa to ne laglaase glu to guielwen,

gacned zdoo to gan to cho zha stib noded,

gzhixcuaadraa to diidzguizh.

² Sinque Xtiidz Dios goltsoxco, zeena lozh tsotibli guic to dziits so to low. Zig rzac medyeen ne wriin ral, nidzpaar rdziladz win guie win; scadaa golsac Xtiidz me, zeena ygaade to gre guielnedox ne csiaab me. ³ Laa to gonle ganle zha wentaa zdoo me, Xtiidz me sca goltsoxco.

Jesus nac zig tib quie mban

⁴ Golbig lo Jesus, golgan ganle lee me nac zig tib quie ne rio squin yu, per tib quie mban. Ib bleynied miech me, sangue Dios, men non, men nziuu nac me lo me. ⁵ Golbig lo me sca, zeena ye to gac quie mban ne taa xyadoo me. To gac gre pxoz ne nlipaa mbe zdoo, gun to dziin len yadoo co; golban zigne rdziladz Dios, zeena guielmban co gac zig tib gon ne gdeed to lo me, ne nac to zha ne ngab lo Jesus. ⁶ Zigne zhobneeque lo Xtiidz Dios, zaatne znu rnee:

Men ne bzo naa cxel naa Jerusalen,

me gac zig tib quie nroob ne gnaaz dziits xyadoo naa,

ni lee yadoo co nac gre zha ne ngab lo naa.

Men non nac me, ni grese zha ne gnalo me, ible csaand naa zho.

⁷ Ne nligaa tib men non nac me lo ne, sangue gre zha ne rililadz me cholze miech rzoob zho me; zigne zhobneeque lo Xtiidz Dios, zaatne rnee: Quie ne sca bron zho tib lad zeene quiazaa zho yu,

laaw bron zho sac rzac zho paat rquiinda,
ni niina lëëpaaw nac quie ne nlibdziits xcox yu.

⁸ Ni ziaad stib zaatne znu rnee:

Quie co griel ni miech, quie co gron zho.

Grëse zha ne nêd giladz Xtiidz me zaatne rnee cho nac me, scapaa sac zho me, ni ib zho bneele ne min co yгаа zho.

⁹ Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiayun xtsiin me; miech ne mbele lo dol nac to lo me, mele rnabey to sac me bredz to laa to brieel lo guielcow bzëëb to lo xbiini ndzon me; zeena gnee to lo miech ganle zha nactaa grëb ncuane run me. ¹⁰ Glo peet nonde to, sangue niina non to sac gon lo me ngab to; glo nande to pa lotaa rquia zdoo me to, sangue niina rley to ran to ganle squitaa rquia zdoo me to.

Tibaque golgun mine racladz Dios

¹¹ Bets, bzian, rleynie naa to. Ndion ne ganle, nacse xquielmban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to grë ncuane ndzinlid ne racladz xcuerp to; sac min co rsacsi xalm miech. ¹² Golguien zaacse golgac lo grëraa zha ne gard gunbey Dios; niicle ne gneenê zho to niina, sac zho to zig cho grë zha ntseeb, per zeene gan zho ne ndzinli nac grë ncuane run to, haxta zleynie zho Dios gal dze ne laa Jesús guiaadgun guielwxtis.

¹³ Golgon xtiidz grëse men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa, ¹⁴ zigtagaa grë zha ne nacie me dziina, sac zha run guielwxtis, rdeed zho caxtigw ne rieguial grë zha ntseeb, ni scagaa runnon zho grë miech ne run ncuane rquiin. ¹⁵ Ible laa Dios racladz zaacse gag to, zeena grë zha nxen, grë zha yozh ne riend pe rnee, haxta ni ro zho tsod pe gneenê zho to.

¹⁶ Gollu ne peet lo ngadoodraa to, per guiabde to ne peet lo ngadoodraa to laa to gun grë ncuane ndzinlid ne gacladztaa to. Led scada gon, mine racladz Dios min co golgun, gollu mele rnabey to niina.

¹⁷ Zaacse golgac lo grë samiech to, golguien cho lo zo to. Golleynie grë zha ne nacgrë to, ndooladz golgac lo Dios, golguien ne men ro nac me; ni scagaa golgon xtiidz grë zha ne nac wxtis nroob.

¹⁸ Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba. ¹⁹ jNley golgac, goldeed xquizh lo Dios, tel porne noyun to mine rnabey me, laa zho rsacsi to! ²⁰ Sac gon, telne nosacsi zho to por xquielntseeb to, niicle paraa xcexw to paat yquiinda; sangue tel rxecw to nosacsi miech to porne noyun to ncuane rdziladz Dios, dzigosi zleynie me to. ²¹ Golgacnan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielne ne bded me bdiizh me xtol ne. Glo me sca bded, nana negaa ible none sca dieed ne. ²² Tel me ni tib dol beend me, ni tib miech pquidied me. ²³ Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grësew psan me ladznia Dios, men co gun guielwxtis zigne no gaca.

²⁴ Masaque Jesús bgaadz grëse xtol ne, blactaa psacsi zho me pquia me lo cruz bdiizh mew; laa me been min co, zeena grieeo griee ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grëse xquielne ne. ²⁵ Glo lega nac to zig nac grë mëcwxiil ne zonziaab, sangue niina mele quianap to. Me nac tib baxtor ne rleyniepaa to.

3

Zha gban zha ne ptsieelniale

¹⁻² Bzian, to ne nac to men wnaa ne ptsieelniale, golgon xtiidz tsieel to. Niicle tel ned zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gneew lo zho. ³ Golguien sca, tsode to ne goon dien pa xixcuaraa to par gluniow to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe gre guuib or tso yan to, tso nia to, dieen pe lar niazh ne gacwraa to. Tsienalde to gre guielniow co, sac gon ncuuan laglaase ga; ⁴ sinque none xixcuua zdo to, gac to tib zha tibililadz, tib zha ne ndooladz. Lee guielniow co nac mine niowraa nez lo Dios, ni min co gdzind dze nitlo. ⁵ Lee guielniow co bioxco gre men wnaa ne biaadban padzeela, zha ne brie lo dol wban zho zigne racladz Dios; tel zha, dib zdo zho bnalo zho Dios, ni bin zho xtiidz tsieel zho. ⁶ Zig nac Sar, sca goc me, bin me xtiidz tsieel me Abraham, haxta reb me masaque Abraham nac men ne rnabey me. Ni scagaa to, telne tsoxco to xixcuua to, zac to zig goc Sar, dzigosi laa to gac zig xpeed me; haxta ni tsoxtseebe to pe glisqui tsieel to lo to.

⁷ Scaquegaa to bets, ne nac to zha ne ptsieelniale, goltsoxco tsoquic to zha nac tsieel to. Golgan me zigne nonguie la gan to me, golguien ganle nda men wnaa; ni lala, non me lo Dios, sac gon ye me ygaa guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

⁸ Nana sca, tipse golgac gre to. Ine niowse golleynie zha ne nacgre to, miech wen, miech ndooladz golgac. ⁹ Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to. ¹⁰ Zigne zhobneeque lo Xtiidz me, zaatne rnee: Zha ne racladz ine gley zho ne laa zho mban, wen ted zho len ngbidz ne gban zho,

none tsoxco zho ycuëez zho ro zho, gneenedraa zho, yquidiedraa zho;

¹¹ none csaan zho greeta guielntseeb, niapse ncuuan wen tsoxco zho gun zho, yguib zho cweuen miech, niicle zhagaa wen gac zho lo grese miech.

¹² Sac gre zha ne sca wen rac nez lo Dios, tibaque quianap me zho, ni rquiaadiag me xtiidz zho tel pe rnab zho lo me; sangue gre zha ntseeb, ni lalnu rdziguiend me ncuuane run zho.

Dichos zha ne mban rded lo samiech

¹³ Golguien sca, ncuuane yquini golgun; scagaa tsod pe nacne ctsidil miech to. ¹⁴ Laa telne ncuuane yquiinaquegaa noyun to, ni laa miech rtsidil to, jdichos to ga! Ib gdziebde to gre miech guidzliu, niicle peraa gne zho gun zho to. ¹⁵ Tibililadz golgac, tibaque golgunnon Jesus men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesus; ine niowse golgac, diidz ndooladz golnee lo zho.

¹⁶ Zaacse sca golban, zeena gre zha ne rneene to porne nac to zha ne no xnëz Jesus, zdziñ tib dze ne ctoladz zho, zeene guien zho lega bnexuu zho to.

¹⁷ Wen zie zha ne ran guielne, telne Dios rnabey gan zhow zeene noyun zho ncuuan wen; ledle gan zhow por xquielntseeb zho.

¹⁸ Golgan ganle niicxe Jesus, zha nactaa gre guielne ne gon me. Niicle ne ni tib dol beend me, per haxta beet miech me bdiizh me grese xtol ne nac

ne miech ntseeb, psanwen me ne lo Dios. Nli gut xcuerp me, per zhiespíritu me gutew; ¹⁹ gane güeyted me zaatne nioogyu zhiespíritu grē zha ne wban padzeela, güeynee me lo zho. ²⁰ Lēē grē zha co ib bzhiguielđ nlliladz Xtíidz Dios, niicle ne dipse leñ dze ne nozaa Noé barcw nroob co pquiambēz Dios niac-wen zho. Nanlaxe to ganle, xonaque nac zha ne bdedlaa lo nis co. ²¹ (Lega rrieequia goc nis co zig nis ne rrobnis ne. Zeene rrobnis ne, ga rlu ne laa ne brieela ladznia dol, ygaadraa ne guielñēdox ne tsieguial zha ngoopdol, sac gon por mincopaa gut Jesús ni brieegan me; ni guiabd ne togo nis co rsanmbe ne lo xtol ne, sinque ga rxobnen ne ne laa ne rnab lo Dios ctsēē me lo xquielmban ne.) ²² Sangue niina gbaa ga no Jesús, ga zob me cue Dios nēz derech, grēse anjl non, grēse zha non ne no gbaa, rquitsgzhīb zho lo me ni run zho miñe rnabey me zho.

4

¹ Golguien ganle, zha nactaa grē guielñē ne bded Jesús bdiizh me xtol ne; nana sca, scaque to gdziebde to golcueladz to gan to guielñē. Ib rquini guielñē, sac zha ne no tib lo guielñē, rioguid zho grē ncuaañe guncal xtol zho, ² zēēb rguib zho gban zho zigne racladz Dios. ³ Grētaa ncuaañe ndzinlid ne run grēraa miech, golguiaañladza. Golguiaañladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grē lni, bleynie to grē mdio.

⁴ Grē zha co, rien naa rlēē zho ran zho rtsieelsadraa to zho lo grē ncuaañe ndzinlid co, gane haxta rneenē zho to. ⁵ Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me miñe tsieguial tib tib miech, zigtaa zha mbana, zigtagaa zha ne gutlew. ⁶ Sac niicle zha ne gutlew, no zho gocnanpaa zho zha nac Xtíidz Dios zeene bzomban zho. Ible rquiniipaa Xtíidz me, sac zha ne rquiaadiaga, niicle ne zetaque zho, per nēz lo Dios mban zhiespíritu zho.

Golgacnie zha ne nacgrē to

⁷ Zhile gdziñ gdze ne laa grē ncuaañe rac lo guidzliu rii nitlo; golquix biini zaacse golban, tibaque golzodiidznie Dios. ⁸ Ine golleynie grē zha ne nacgrē to, sac zeene nliipaa rleynie ne samiech ne, tel pe falt ne guntaa zho zrieelo cteed new zdoo ne. ⁹ Zha ne guiaad lidz to, goldeed zaatne cuēz zho; ine golcuēzlo zho, guieedniede to zho.

¹⁰ Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrē to! Ib ga rquini guielbiini co bneedz mew lo to.

¹¹ Zha ne rseed miech Xtíidz Dios, none gnee zhow zigne racladz me. Zha ne runгаа pe stib xtsiin Dios, ib yquiad zdoo zho none gun zhow dib nacse guielndaan ne rdeed Dios lo zho. Ncuaañe guntaa to, goltsienie guic to ne laaw gun to par csannon to lē Dios. Ga glu ne xtsiin Jesús quiaayun to, men ndzon ne rnabey, men ne gdzind dze gdzēē. Sca rieguiala.

¹² Bets, bzian, ne nligaa rleynie naa to. Golsoladz sca, tel pe guielnētaa gan to porne no to xnēz Jesús, peet tsienied guic to, sac ib scale no gaca. ¹³ Mazd ine golley; sac gon ye Jesús sca gon guielñē, ni scagaa nroob guielbley ne tso to gal dze ne glu ganle zha nactaa guielndzon ne rap me. ¹⁴ Zeene rgodee miech to, rquiaago zho to loxaque ne no to xnēz Jesús, nley golgac; wen zie to ga, sac gon zhiEspíritu Dios nacie to.

¹⁵ Guiełtow sca csacsi miech to, telne bгаа to laa to beet, laa to wban, laa to bzēēb lo cuent ne rieguialdraa to, pe stib guielntseeb ne noyunragaa to.

¹⁶ Sangue telne rsacsi zho to loxaque ne no to xnēz Jesús, led guiełtod ga. Laa

ne ctoladz to, igoldeed xquizh lo Dios, sac gon tib guielnzaac nroob bgaa to ngab to lo me! ¹⁷ Golgacnan ganle, grëse ne ne nac ne zha ne ngab lo Dios, len dze rii laa ne csilo dzian guielnë. Nana, telne ye zha ne ngab lo me ted guielnë, çzha naczhe mine ted greëraa zha ne nëd gliladz Xtiidz me, gal dze ne laa me gun guielwxtis? ¹⁸ Zigne zhoobneeque lo Xtiidz me, zaatne rnee: “Niicle zha ne wenle nëz lo Diosa, nroobaque nac guielnë ne ran zho haxta gdzin dze ne ycaania me zho, çpe lëlgue grë zha ne dzigo racntseeb lo me?” ¹⁹ Gacxe nagon waa, niicle tel pe nactaa guielnë ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac men ne rneedz xquielmban to, ni mesi ib csaand me to.

5

Golgon xtiidz zha ne rnabey lo to

¹ Laa niina nagon, laa naa cso choplan diidz lo to, ne nac to zha ne rnabey lo grë zha ne no xnëz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zgaa naa lo guielndzon ne no me, zaatne rnabey me, gal dze ne laa me guiaad.

² Rso naa diidz lo to gon, zaacse golquianap grë zha ne bgaa to noquianap to. Dib zdoo to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho. ³ Gundë to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. ⁴ Scagaa, zeene laa men nroob ne quianap ne guiaad, zgaa to lo guielndzon ne gneedz me, lugar co gac tib premio ne gdzind dze lozh lo to.

⁵ To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: “Grë zha niats, rdziguiend Dios zho, sangue grë zha ndooladz, racniën me zho.” ⁶ Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdzin. ⁷ Tel pe nactaa grë zhizhgab to, grë xliaadz to, ladznia me golsana, sac gon me quianap to, noxco me to.

⁸ Nsin golso lo mendox, sac gon tibaque quiana ma gnitlo ma ne! Masaque rac ma zig rac grë meedz ne rgobeedz quiaguib ma ne gow. ⁹ Dziits golso gdeete to diidz yquiiil ma to. Tibaque dib zdoo to gólnalo Dios. Nanle to ganle dipse lo guidzliu, zha ne notaa xnëz me, scaque quiaded zho. ¹⁰ Tel pe nactaa guielnë ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaaraa lo xquielmban to, gzodziits me to, guntibli me guic to. Me nac men ne bredz ne yгаа ne lo guielndzon ne no me grop me Jesús, guielndzon ne gdzind dze nitlo. ¹¹ Mese nac men ne rnabey grëtaa ncuaa ne no, ni gdzind dze ne gdzëe me. Nligaa sca nac me.

¹² Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tiblque gac to gbichede to lo me.

¹³ Grëse zha ne riladz Jesús Babiloin nu, zha ne bzooblo Dios gac xpëed me zigne bzoobloque me to, laa zho rxel bdiuzh lo to; scaque Marcw, men ne rzaac naa nu zig tib xpëed naa, ye me laa me rquiaabdiuzh to. ¹⁴ Laa naa rnab lo to, golquiaabdiuzh grëse zha ne nacgrë to, ine golxen nia zho.

Dios gacniën to peet zhgab ctsebde to, nac to zha ne no xnëz Jesús.

Pedr

BROP GUITS NE PQUIAA PEDR

Bets, bzian, jdiuzh to grëse to!

¹ Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnaló meñ nroob ne zob gbaa, zigne rnaloque no me. Xquizh Jesús meñ ne rsilaa miech, meñ ne nac Dios ne riladz ne, sac gon me gocniē to squi rnaló to me niina; sac mesi miñe nonguiel gac, miñ co run me.

² Zigse zie dze, goltsoxco lozh gunbey to zha nac Dios, zha nac Jesús meñ ne rnabey ne, zeēna scagaa zig zie dze zunlayraa me to, zacniēraa me to, parne peet zhgab ctsebde to. ³ Sac zeēne gunbey to zha nacraa me, con grētaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. jGotsaa gwi ne ganle zha nactaa ncuaane ro, ncuaane gzee zdoo ne beēn me parne gbig ne lo me! ⁴ Ni psan me diidz pe nac grē ncuaane ndzon ne gneedz me lo ne. Psan me diidz, ib laa me cuee ne lo grētaa guielyozh ne rac lo guidzliu rii, parne gac ne tib miech mbe zigne nac me.

⁵⁻⁷ Nli laa to rnalole Dios, per parne ygaa to miñ co, none tsoxco to:

zaacse golban,
goltsoxco guien to zha nac Dios,
golseed gnabey to xcuerp to,
guieete to,
tibaque goltsoxco golgun miñe racladz Dios,
iñe niowse golbannie grē zha ne nacgrē to, golsac zho zig tib menlidz to;
golleynie samiech to.

⁸ Nana, telne tsoxco to znu gban to, dzigosi mazdraa tsoguc to miñe racladz Dios, dzigosi zlu run to miñe rnabey Jesús meñ ndzon ne rnabey ne, led loxaque runbeydse to me. ⁹ Sac zha ne tsoxcoda, rrieequia rchool lo zho ga, rrieequia rcowle guic zho ga, sac gon rsoladzd zho zha nactaa lo grē dol ne blee Dios zho.

¹⁰ Bets, bzian, golguien sca, niina ne laa Dios bzooblóle to, laa me bredzle to ngab to lo me, goltsoxco sca golban, parne guiabde to lo dol stib. ¹¹ Niicle par gdzingaa to zaatne rnabey Jesús, meñ ne psilaa ne lo dol, meñ ne rnabey ne, tsod pe yca lo to, iñe nzhiäl nēz zaatne ted to gdziñ to ga.

¹² Nli nanle to grē miñe rne naa nu, nli dziitsle zo to lo Xtiidz Dios, per ib none guncsoladz naa tow. ¹³⁻¹⁴ Laa Jesús meñ ndzon ne rnabey ne, blule lo naa zhile gdziñ dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to; ¹⁵ zeēna niicle wbile naa lo guidzliuw, tibaque csoladz tow.

Gonpaa Pedr Jesús

¹⁶ Grëse miñe bnee no lo to zeēne pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me ¹⁷⁻¹⁸ guic gui ne scataa pxobnen Dios ne meñ non, meñ ro nac me. Binpaa naa zēeb tsi Dios gbaa hor co, nē me: “Lēē Xpēēd naa i gon, rleyinie naa me, nziuu me lo naa.”

¹⁹ Ga nagon rlu ne diidzli nac grē miñe bzeet grē zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lēew quiaziini lo to niina, zig rziini tib biini guieel, haxta

riini liu zeene laa Mel Ngol rlan; ni lëe Mel Ngol co nac Jesús. ²⁰ Per scagaa, racladz naa gacnan to ganle, grieelod ne lega tel zha guiaabtaa guic miech, guiab zho sca nac mine bzeet zha ne biadteed Xtiidz Dios, ²¹ sac gon tel zha co, bneed zho ncuane biaabtaa guic zho; sinque laa zho bnee mine bnabey Dios psiaab Espiritu Sant guic zho.

2

Zha ne rquidie (Judas 4-13)

¹ Grè zha ne biadteed Xtiidz Dios padzeela, mine bnabey me zho min co bnee zho; per breequiaque zha ne pquidie rëb zho Dios pxeel zho, ni nlida. Ni scaquegaa niina, grè zha ne rseed to, zrieequia zha ne yquidie lad co. Dzega dzega csilo zho glu zho grè zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nanð zho zha nactaa guielnedox ne ygaa zho, tibaque zeene guien zho laa zho nole lo caxtigw co.

² Ndal miech ne grieequia tsienal grè ncuane yozh ne gun zho, niapse por zha laa grëraa miech csilo gneenë Xtiidz Dios. ³ Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho min co, sac bzeetle Dios ganle zha nactaa lo guielnedox ne ygaa zho; ⁴ sac Diossi gon, mine run grè zha ntseeb, csand mew scase. Golgan ganle, niicxe grè anjl ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga niogyu zho nieeda gal dze ne laa me gunquizh zho mine been zho. ⁵ Padzeela zeene wban Noé, grè miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me. ⁶ Scaque len dze ne wban Lot, bdziguiend me grè miech yozh ne bio guiedz Sodòm ni guiedz Gomorr; blaal me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac mine tsieguial zho telne csaand zho xquielntseeb zho.

⁷⁻⁸ Lotse psilaa me, sac bioxco Lot mine rnabey me. Gapaa no Lot, ranpaa me zha run grè miech co; haxta mban rac zdoo me, ran me gzataa dze loxaque grè guielyozh noyun zho. ⁹ Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grè zha ne rsaand guielntseeb, ib tedsod zho lo guielnedox ne cteed me zho gal dze ne laa me gun guielwxtis.

¹⁰ ¡Zig nac zha ne guiaadquidie to ga, mincopaa ygaa zho! Ni lalnu gandzed Dios zho; sac gon, laa zho zienal loxaque grè guielyozh ne gdeed guxt xcuerp zho. Miech nad, miech niats nac zho, rzhidznie zho mine rnabey Dios, ni lalnu dzeb guiend lo zho rdzibdee zho grè men non ne no gbaa. ¹¹ Per ni grè anjl, niicle ne zha nroob nac anjl, niicle ne rap anjl poder, per rdzind anjl lo Dios gdzibdee anjl zho. ¹² Per zha, lo xquielyozh zho ga, haxta ncuane riend zho zha nac, rdzibdee zho. Lëëdaa grè ma nac zho, tel ma laa ma ralse par ygaa ma nitlo ma; guien draa xquielrien zho, ncuane racladzttaa zho run zho. Per zdzin dze ne nitlo zho, zigne rnitlodaque grè ma, ¹³ por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeeguieltow, rquiaalose zho miech wen nac zho zeene riaadsobnie zho to lo zhilni to. ¹⁴ Wnaa ne gantaa zho, pe na gzoobladz zho tsonie zho wnaa co, tibaque quaiyunctal zho xtol zho. Rio zho rquuil zho grè zha ne gard sodziits lo Xtiidz Dios; rienle zho zha gla zho ncuane rquini lo zho. Miech ndziibdeele nac zho, ¹⁵ sac laa zho psaanle xnëz Dios, nëz ne nitlole zho no zho; lëe zho run xcuent Balam, xpëed men ne lë

Beor. Tel Balam, haxta minē nonguiel draa been me par guñ me gan dimi; ¹⁶ per bdziñ tib dze zeene laa Dios blisqui lo me grētaa ncuaañe quiayun me ga. (Bnabey Dios lēēque xpurr Balam bnee, dzigoraā bien Balam psaan me xquiel yozh me ga.)

¹⁷ Maaque nac zho zig nac grē bzie ne bidzle nis, zig nacgaa xcow bidz ne nēzrii nēzrec zienie me; ni lalnu paat rquiind zho. jLaa zho nole guey zho lo guiel cowdoo ne rieguial zho, zaatne gdziñ draa dze grieē zho!

¹⁸ Niats rzē xtiidz zho, per ncuaañe paat rquiind rnee zho. Minē mazdraa mban ruñ zho, rio zho lēēque lo grē guiel yozh ne rdeed guxt xcuerp zho rquiil zho grē zha ne pense brieē lo doļ, rlozh ga rbiire riab zha co lo grē doļ co stib. ¹⁹ Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni rienđ zho doļ quianabey lo zho; sac grēse zha ne gacdraa csaan tel pe grē guiel yozh ne ruñ zho, lēēle grē ncuaañ co rnabey lo zho. ²⁰ Tib zha ne sca brieēle lo grētaa ncuaañe ndzinlid ne no lo guidzliu rii (porne bliladz zho Jesús, men ndzon ne rnabey, men ne rsilaa miech lo doļ), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaa zho. ²¹ Lēda ga gon, telne gocnañle zho zha racladz Dios gban zho, ni lozh ga csañ zho xtiidz me tib lad, gbiire zho tso zho lo grē ncuaañ yozh ne been zho glo. Nroobdox caxtigw ne gañ zha co, mazd zhi minē yгаа zha ne gocnañd zha nac xtiidz me. ²² Zha copaa nagon ruñ minē rnee diidz ne znu rēb: “Nandraaque mēcw, ncuaañe bdzible ma rbiire ma row maw”; ni stib minē znu rnee: “Ngutzshe, rlozhle raz ma nis mbe, ni rlozh ga rieгааque ma lo nis ben.”

3

¿Zha nacne gard guiaad Jesús?

¹ Bets, bzian, golgan ganle lēēle guits rii raca chop zixel naa. Gropse low, rso naa diidz lo to tsoxo to zaacse gban to, ine niini gac guic to. ² Golsoladz ganle, zha nac grēse minē bnee grē zha ne biadteed xtiidz Dios padzeela; golsoladz zha nac grē minē rnabey Jesús, minē biadseed no to. (Jesús, men ndzon ne rnabey ne, men ne psilaa ne lo grētaa xtoļ ne.)

³ Racladz naa gacnañ to ganle, len dze ne ziaadyob guiaad Jesús, zrieequia zha ne gzhidznie xtiidz me, csilo zho guñ zho grētaa guiel yozh ne gzoobladz zho; ⁴ guiab zho: “jPe gliladz ne nazho guiaad Jesús! Telne nli rēb me laa me guiaad, ¿yo me na? Grē xmenğol ne, zha ne scataa pquiambēz me, laa zho gutle, ¿cho na zho guiaad? Znutaque nac lo guidzliu wlal ne brew.”

⁵⁻⁶ Squiaalo zho rsoladzd zho zha bnitlole guidzliu tib vuilt, ni zhagaa nitlo minē no niina. Wen wen nañ zho ganle zha bnabey Dios bīaa guidzliu, me bnabey brieew lo nis, ni masaque lo nis now; mincocxe waa nis bnitlow glo. ⁷ Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon yгаа grēse zha ne ruñ guiel ntseeb ted zho caxtigw.

⁸⁻⁹ Zha ne rzac quiayaanladz Jesús diidz ne psañ me ga, per led quiayaanladz mew; sinque laa me quiambēz tebaa grēse miech gac-wen lo me. Laa me racladz, grēse zho csaan xquiel ntseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuaañe guñ ne tib milraa iz, tib dzeque guñ mew; nroob rzac ne tib mil iz, per par me rzacse mew, lal ne rzac ne tib dze. ¹⁰ Ib laa me no guiaad, per choot nañ dien pa horpaa guiaad me; laa me guiaad zig rzēēbse tib ngbaan yu, tibaque zeene gañ miech laa me ziaadle. Grēse ncuaañe no, hor co laaw lozh; bidox

ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacsew laaw tsec.

¹¹ Scataa nagon nitlo guidzliu rii, ni grëraa ncuaañe rdziañ ne niina, igolguieñ sca golban zigne racladz men ndzon ne rnabey ne, gunctaldraa to xtol to! ¹² Tibaque golconie guic to ne ib laa me no guiaad; tibaque ndzinli golban, gollu ne quiambëz to gdziñniob dze ne sca gazbel grë ncuaañe ran ne gbaa, dze ne sca tib guiaalse grë ncuaañe niaaw. ¹³ Horco nagon laa ne dziañ tib gbaa cub, laa ne dziañ tib guidzliu cub ne psanle me diidz yгаа ne; zaatne tsodraa guieñtseeb.

¹⁴ Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleyne me to gan me mban to zigne racladz me. ¹⁵ Goltsoxadz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guieñbiini ne rdeed Dios lo me rquiaa me grë guits ne zixeel me, zineele me lo to grë mine none naa nu. ¹⁶ Parga nli no mine rnee me ga, ngan guieñ ne zha naca; grë zha ne rdziinpaa racladz ctsëë Xtiidz Dios, zeene laa zho rneew, laa zho rneew zigne racladz zho; zigne runaque zho grëraa mine zhobnee lo Xtiidz Dios. Zha ne sca run, lëëque zha noguib nitlo zho ga.

¹⁷ Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to mine nac diidzli, csaan to nëz ne ziele to i. ¹⁸ Goltsoxco zig zie dze guieñraa to pa lotaa rleyne Dios to, ni guieñraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me riegual gunnon miech, zigtaa niinaw, zigtagaa grë izdoo ne ziaadraaw. Sca rieguala.

Pedr

GUITS NE GLO PQUIAA JUAN

iDiuzh to!

Laa naa gzodiidznie to ganle cho nac Jesús.

¹ Jesús nac Diidz Ndzon ne rdeed guielmban. Notaque me, nole me zeene bre guidzliu. Bdzin dze biaad me lo guidzliu; grop diag no bdzion no grè mine bnee me, grop lo no bdzion no grè mine been me; sac bdzionpaa no zha rac me, zha rnee me, haxta bzhiéen no nia me. ² Ni niina laa no quianee lo miech ganle cho nac me; golgacnañ ganle, me rneedz tib guielmban ne gdzind dze lozh. Zaatne no Dios men ne nac Pxoze, ga no me; zeene biaad me lo guidzliu dzigo bdziunbey no me. ³ Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gag ne grè ne, gacnie to no zigne nacie Dios no (men ne nac Pxoze), zigne nacie Jesús no, men ne nac Xpèed me. ⁴ Laa naa rnee grè min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

⁵ Znu nac mine bdzion no pseed Jesús miech, rëb me: Nac Dios zig nac tib biini, ni tib lè guielcow guien d zaatne no me; laa grè dol, masaque naca zig nac guielcow. Ni mincoque gon rnee no lo to. ⁶ Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo. ⁷ Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grè ne; ni scagaa, xchen Jesús nac mine csaambe ne lo grètaa xtol ne.

⁸ Nana tel guiab ne: Tel naa ib peet dol rapd naa. Lëëque ne noquidie ne ga, rneelid ne ga zha nac ne. ⁹ Sangue telne cxobdol ne grèse xtol ne lo Dios, ible tedsod silaa me ne lo grètaa dol co, saambe me ne lo grètaa guielntseeb ne dziziuon ne; sac ible laa Jesús gut par csaambe me ne. ¹⁰ Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grèse ne miech ngoopdol nac ne.

2

¹ Xin yeena, laa naa rso diidz lo to: Gunctaldraa to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze ne yquia zdoo me ne, lëë men co nac Jesús, lo me golbig (tel me ni tib dol rapd me). ² Sac me bded grètaa guielnë ne rioguaial ne ndieed ne por grètaa xtol ne, psanwen me ne lo Dios; me goc zig tib gon ne pcaania Dios gozh grèse xtol ne, ni xtol grèraa miech ne ndxie dibdoose lo guidzliu.

Golleynie samiech to

³ Golgona ganle: Telne run ne grèse mine rnabey Dios, gase rien ne ne nli xnèz me no ne. ⁴ Laa tel zha ne rnee: "Xnèz me no naa", ni rlozh ga rund zho grè mine rnabey me, rquidie zho ga. ⁵ Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnèz me no ne. ⁶ Gacxe nagon waa, zha ne rnee xnèz me no zho, ib none zaacse gban zho, zigne wban Jesús zeene biaad me lo guidzliu.

⁷ Bets, bzian, golgacnañ ganle, none gleynie to samiech to. Guiabde to togo ncub mine rne naa lo to nu gun to, laa naa rzet mine binle to glo zeene psilo pquiadiag to Xtiidz Dios. Niicle ne padzeelale zhozneew, niicle ne pquiadiagle tow, ⁸ per rrieequia ncuba niina; sac gon zeene biaad Jesús, me

blu ganle zha none gleynie ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozëeb nëz lo xbiini Dios.

⁹ Ga nagon, tel zha ne rnee lo biini co mban zho ni rlëenie zho samiech zho, rquidie zho ga; bii lo guielcow ga mban zho. ¹⁰ Zha ne rleynie samiech, zha cosi nli lo biini co mban zho, noxtseebd lega tsobe zho, sac ranpaa zho pa lo zie zho; ¹¹ sangue zha ne rlëenie samiech, lo guielcow ga no zho. Masaque nac zho zig zha ne rold lo, niicle zha riend dien pa nëz tsie zho, sac guielcow co quiantse lo zho.

¹² Xin yeena, laa naa rne grë min rii lo to, sac gon, tel to laa Jesús bdiizhle tel pe nactaa grë xtol to. ¹³ To ne nac to dad, laa naa rxel diidz rii lo to, porne nac to zha ne riladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rrieeodraa menox yquuil ma to. To ne nac to mëedlas, xin yeena laa naa rxel diidz rii lo to, porne nac to zha ne nole xnëz Dios men ne nac Pxoz ne.

¹⁴ Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdo to, ne nac to zha ne lëbdraa menox yquuil, ¹⁵ golguien, gleyniede to grë ncuaaane rap to, gleyniede to grë ncuaaan ndzinlid ne rac lo guidzliu rii. Zha ne rleynie grë ncuaaan co, nlid rleynie zho Dios men ne nac Pxoz ne; ¹⁶ sac grëse ncuaaane rac lo guidzliu rii (zig nac zha ne zienal ncuaaane gdeedguxt xcuerp, zha ne rzoobladz yquianie ncuaaane rdziladztaa, zha ne racniats lo samiech), grëse ncuaaan co led Diosd rnabeya, sinque lëe mine rzonal grëraa miech lo guidzliu ga. ¹⁷ Ni na tel zig nac guidzliu, zig zie dze laaw quialozh grëw grë ncuaaane rleynie miech low; sangue zha ne mban zigne rnabey Dios, laa zho bgaale tib guielmban ne gdzind dze lozh.

Zha ne rlëenie Jesús

¹⁸ Xin yeena, zhile gdzin dze ne laa guidzliu nitlo. Led binle to ganle ib zrieequia tib zha ne glëenie zhiwseed Jesús, ni nligaa niina len dze rii ndal-le zaatne norieequia grë zha ne rsilo quiatsidil Xtiidz me; gane ndion no ne laa dze co ziaadgaxle. ¹⁹ Nli ladaque zha ne nacgrë ne briece grë zha co, per nlid naciepaa zho ne; sac tel niaca mine nlipaa nacie zho ne, nrieextsod zho. Ga nagon blu zho ne nlid nacgrë zho ne.

²⁰ Sangue to, nacle to zig nac grë zha co, sac nacie Espiritu Sant to, bneedz me guielbiini lo to runbey to mine nac diidzli. ²¹ Guits ne rxel naa lo to nu, nacda par cseed naa to mine nac diidzli, sac runbeyle tow ni haxta rien to pa min nac guielwquidie; sinque laaw ziaad lo to par gacnan to ganle zha nac zha ne noquidie i.

²² Grë zha ne rnee i nlid lëe Men ne zëëble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëenie zho me ga; ni ne sca riladzdz zho cho nac me, yele Pxoz me ga riladzdz zho. ²³ Sac zha ne rlëenie men ne nac Xpëed Dios, ga rlu ne nlid riladz zho cho nac Dios; sangue zha ne rxobnen cho nac Xpëed me, zha cosi nli riladz zho cho nac me. ²⁴ Laa naa rso diidz lo to sca: Golsienal grë mine pseed to zeene glopaa psilo biladz to Xtiidz Dios, zeena zigtaa Dios, zigtagaa Xpëed mew, tibaque gbannie to me. ²⁵ Golsoladz ganle, laa Jesús psanle diidz ne ib zgaa ne tib guielmban ne gdzind dze lozh; lëe guielmban co yгаа grëse zha ne nacie me.

²⁶ Laa naa rzet min rii lo to, sac ne squi no grë zha ne ziaad racladz yquidie to. ²⁷ Sangue to laa Jesús pxeelle Espiritu Sant nacie to, rquiind ne goon chora cseed to; sac Espiritu Santzhal rneedz guielbiini lo to rien to zha nac

grëraa ncuuaane no gacnañ to, ni mesi goñ miñe nac diidzli min co rseed me to, led yed me rquidie. Golguien sca, Jesús golbannie, golbannie me zigne noseed Espiritu Sant to.

Zha ne nac xpëed Dios

²⁸ Xin yeena, nanle to sca sozite to lo Jesús, sinque tibaque golgacnie me; zeena ine tibiladz gac to gal dze ne laa me guiaad. Sac zha ne sozit lo me gban zho zigne gacladzttaa zho, zeene laa me guiaad mban gac zho; sac guiefto ne guiaan zho lo me. ²⁹ Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëed me ible zdeed me miñe rieguial zho.

3

¹ Golwi ganle pa lotaa rleynie Dios ne, laa me rneedz diidz laa ne gac mëed lo me. ¡Ni nligaa tel ne, xpëedle me nac ne! Grëraa miech riladzd zhow, sacne runbeyd zho cho nac me.

² Bets, bzian, ne nligaa xpëedle Dios nac ne. Nli ndiond ne niina dien zha glu ne gal dze ne laa Jesús guiaad, per miñe ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne. ³ Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuuaane runctal xtol zho, sac tel Jesús randzed me dol.

⁴ Grë zha ne runctal xtol, xley Dios ga rguits zho, sac grëse dol ne runtaa miech ga rlu ganle ne rond zho miñe rnabey me. ⁵ Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me. ⁶ Gacxe waa, zha ne nlipaa nacie me, zienaldraa zho ncuuaane gunctal xtol zho; laa grë zha ne tibaque noyunctal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladzde to miñe rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdo, zigne men mbe nac Dios; ⁸ sangue grë zha ne tibaque quiayunctal xtol, xnëz mendox ga ngab zho; sac tel mendox, desde padzeela tibaque guielntseeb quiayun ma. Ni min co nagon nacne biaadpaa Xpëed Dios lo guidzliu, biaadnitlo me grëtaa ncuuaane run ma. ⁹ Zha ne nac xpëed Dios, rdeetraa zho diidz gunctal zho xtol zho, sacne laa guic zha ne zienie gban zho zigne racladz Espiritu Sant, men ne nacie zho; rienle zho nodne gunctal zho xtol zho, sac laa zho nacle xpëed Dios.

¹⁰ Nienenpaa cho nac xpëed Dios, chogaa nac xpëed mendox, sac grëse zha ne run guielntseeb, grëse zha ne rleynie samiech, led xpëete Dios nac zho; ¹¹ sac gon, desde dze ne psilo biladz to Xtiiidz Dios, bingazh to ib none gleynie ne samiech ne. ¹² Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guielntseeb run me. Ib gunde to miñe been Caín. ¹³ Gacxe waa, bets, bzian, zeene gan to laa grëraa miech rlëenie to, ib tsode to zhgab guiab to pe nacne sca run zho. ¹⁴ Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdzindraa dze lozh; sac zha ne rleynie samiech, nëz ne nitlo zho ga zie zho. ¹⁵ Grë zha ne sca rlëenie samiech, rrieequia rut zho ga, ni nanle to ganle zha ne rut samiech, gard yгаа zho guielmban ndzon ne gdzind dze lozh ga. ¹⁶ Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleynie samiech, none cueeladz zho zho, cueeladz zho ncuuaane rap zho, gacnie zho samiech zho. ¹⁷ Gzoob ne, tib zha ne rnee xnëz Dios no zho, nroob rapchen zho, ranlo zho rcaalsad pe yquuin tib zha ne

nacgrë zho, per ib rdeete zho palal pe yquuin zha co. ¿Niacle na nli rleynie zha co samiech zho ga? ¹⁸ Xin yeena, golgacnan sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

¹⁹ Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsoed pe nacne pe dzeb tsonie zdoo ne zeene laa ne gbig lo me. ²⁰ Tel zha ne rdzieb zdoo, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nan me. ²¹ Xin yeena, laa zha ne desde zdoo zho nan zho noguiitsd zho mine rnabey me, scagaa tibliladzse gbig zho lo me; ²² hor cosi ncuuane gnabtaa zho lo me squiaadiag mew, sacne mban zho zigne rnabey me, ni noxco zho noyuu ne ncuuane rdziladz me. ²³ Ni lëe min rii rnabey me: Grëse miech, none dib zdoo zho gliladz zho Jesús men ne nac Xpëed me, ni gleynie zho samiech zho zigne psanle me diidz ga. ²⁴ Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacnie ne.

4

¹ Bets, bzian, zha ne gnë zhiEspiritu Dios nacnie zho, goon ye zho quianee Xtiidz me lo miech; ib gunde to ne lëelëd gliladz to xtiidz zho, sinque golwigazh dien pe nli zhiEspiritu Dios nacnie zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho. ² Parne guien to dien pe nli zhiEspiritu Dios nacnie zho, golwi dien zha rzac zho Jesús: Tel zha ne riladz ne nli zig tib miech goc me biaad me lo guidzliu, ga rlu ne nli zhiEspiritu Dios nacnie zho. ³ Laa tel riladz zho ne nli sca biaad me, nli dzigo zhiEspiritu Dios nacnie zho; sinque lëele espiritu ne rtsidil Jesús ga nacnie zho. Laa to binle ganle ib laa espiritu co guiaad; ni lëele espiritu ntseeb co nacnie grë zha ne squi quianzë lo guidzliu niina.

⁴ Xin yeena, sangue to xnëze Dios ngab to, yquidiedraa zha co to, sac gon mazdraa nroob poder rap men ne nacnie to, lëdle espiritu ne nacnie grë zha ne sca zienal grë wseed yozh ne no lo guidzliu. ⁵ Grë zha co, ncuuane rac lo guidzliu rii nonie guic zho; gacxe waa, niapse lëew rnee zho, ni gagaa grëque zha ne rleynie grë ncuuan co, zha co riladz zhiwseed zho. ⁶ Sangue ne xnëz Dios no ne. Ni scagaa zha ne runbey Dios, zha co rquiaadiag mine rnee ne; laa grë zha ne runbeyd me, rquiaadiagd zhow. Gase na ganle rlu cho zha nacnie zhiEspiritu Dios, ni cho zhagaa nacnie espiritu ne ziaadquidie miech.

Rleynie Dios miech

⁷ Bets, bzian, golgotsaa gleynie ne samiech ne, sac gon, tel Dios grëse ne rleynie me ne. Gacxe waa, zha ne rlu nli rleynie zho samiech zho, gase rlu ne nli xpëed Dios nac zho, nli runbey zho me. ⁸ Laa grë zha ne rleynie samiech, runbeyd zho Dios ga gane sca run zho; sac gon ib Dios nreedz guielbiini lo ne gleynie ne samiech ne. ⁹ Gotsaa gwi ne ganle, pa lotaa rleynie me ne: Tibpaa Xpëed me, ni pxeel me me biaadtizh me xtol ne, zeena yгаа ne tib guielmban ndzon ne gdzind dze lozh. ¹⁰ Led guiabd ne togo glo miech bleynie Dios gane rleynie me zho niina; led scada, sinque ible zdoo me gola rleynie me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleynie Dios ne.

¹¹ Bets, bzian, zigne scataa rleynie Dios ne, scaquegaa ne nagon none gleynie ne samiech ne. ¹² Gard tso tib zha ne gan Dios, per zha ne rleynie

samiech, me ga nacnie zho; ni zigse zie dze dib zdooraa zho rleynie zho samiech zho.

¹³ Me nac meñ ne pxeel zhiEspíritu me nacnie no, parne glu nacnie me no, ni scagaa no nacnie no me. ¹⁴ Ni stiba, grop lo no bdziõn no bиаad Xpëed me bиаadsilaa me miech lo dol; ni miñ co nonee no lo miech niina. ¹⁵ Grëse zha ne rliladz Xpëed Dios nac Jesús, ni rnee zhow lo miech, ga rlu ne nacnie Dios zho, ni scagaa zha nacnie zho me.

¹⁶ Ndion ne ganle nli rleyniedox Dios ne, sac rienpaa ne rleynie me ne, ni rliladz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacnie zho Dios, ni scagaa me nacnie me zho. ¹⁷ Zig nac ne, niina ne laa ne nacniele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacne ctoladz ne, pe nacne gdzieb ne gdziñ dze ne laa me guñ xquielwxtis me; sinque haxta gley ne dzian ne me gal dze co. ¹⁸ Nod pe nacne gdzieb ne me, sac gon ndion ne pa lotaa rleynie me ne. Led yedraa niina pe dzeb ne dzio ne, sac grëse dzeb rbiche zeene rien ne rleynie me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien zho ne rleynie me zho, ni gardgaa guien zho gleynie zho me.

¹⁹ Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne. ²⁰ Tel zha ne rnee, rleynie zho Dios, ni rlozh ga rlëenie zho samiech zho, rquidie zho ga. Sac gon, tel nand zho gleynie zho samiech zho, zha ne ranlopaa zho, ¿pe lel Dios dzigo gliladz ne nli rleynie zho, ni nac me meñ ne ran zho? ²¹ Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni miñ rii rnabey me dziuun ne.

5

Zac csaan ne ncuaañe runctal xtoļ ne

¹⁻² Grëse zha ne dib zdoo rliladz ne ible lëe Meñ ne zëeble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne miñe rnabey me. Nac cuent rii, zig nac tib yu miech, zha ne rleynie pxoz mëed, scaquegaa rleynie zho mëed. ³ Sac zeene rleynie ne Dios, zuñ ne grëse miñe rnabey me. Ni grë miñe rnabey Dios, nacda ncuaañe guiab ne grieelod guñ ne; ⁴ sac grëse zha ne nacle xpëed Dios, totsaque rnalo zho ne Jesús guñ xyudar zho, gac-wetraade zho lo grë ncuaañe guñctal xtoļ zho. ⁵ Golgacnan sca: zha ne dib zdoo rliladz Xpëed Dios nac Jesús, zrieelo zho csaan zho grëtaa ncuaañe runctal xtoļ zho.

⁶ Tel ne, ndion ne ni rliladz ne ganle nli Xpëed Dios nac Jesús, sac zeene bиаad me horne norobnis me, horne nolozh me, ga blu ganle cho nac me. Ni ye Espiritu Sant nolu ganle ne scaw, ni miñe rnee me diidzliw.

⁷⁻⁸ Gotsaa gwi sca ganle, tson mod rlu cho nac Jesús: Tiba por miñe nolu Espiritu Sant, stiba por miñe blu zeene norobnis me, ni stiba por miñe blu zeene nolozh me. Zigtaa miñe nolu Espiritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me. ⁹ Miñe rnee Dios, none gliladz new. Xtiidz samiech ne name rliladz ne, ¿pe lel miñe rnee Dios dzigo gliladz ne? ¹⁰ Zha ne gliladz miñe rnee Dios, rrieequia rzoob zho me ga zig tib zha ne rquidie; sañgue zha ne gliladz miñe rnee me, zien zho ganle nli Xpëed me nac Jesús. ¹¹ Laa me bneelee ganle: zha ne gnalo Xpëed me, zгаа zho tib guielmban ndzon ne gdziñd dze lozh; sac Xpëedse me rdeed guielmban

co. ¹² Gacxe waa, zha ne rnalole Xpëed me, laa zho bgaale guielmban ndzon co; sangue zha ne rnalod Xpëed me, gard yгаа zhow.

Bgaale to guielmban ne gdzind dze lozh

¹³ To ne nac to zha ne rnalole Xpëed Dios, laa naa rzet min rii lo to zeena gacnan to ganle laa to bgaale guielmban ne gdzindraa dze lozh ga. ¹⁴ Ni scagaa, ndionpaa ne rquiaadiag Dios xtiidz ne, zeene ncuaane rio zdoo me rnab ne lo me; ¹⁵ ni zigne ndion ne rquiaadiag me xtiidz ne, scaquegaa none gliladz ne ib zneedz me ncuaane rnab ne.

¹⁶ Zig nac zeene gan to cho tib zha ne nacgre to been pe tib dol, ni rlu nacda dol ne gnitlo zho, zac gnab to lo Dios gun me zho perdon; ni gacnan to ganle, ible zun me zho perdon. Sac gon no dol ne rnitlo, ni zha ne gun dol co, nodne gnab to lo Dios gun me zho perdon. ¹⁷ Nli grese guielntseeb dol naca, per no mine rnitlod miech. ¹⁸ Ni ndion ne ganle, zha ne nacle xpëed Dios rundraa zho ne lega guntal zho xtol zho; sac Jesús men ne nac Xpëed Dios, men co quianap zho, grieelodraa lega pe gun mendox zho.

¹⁹ Zig nac ne, ndionpaa ne xnëz Dios no ne. Nli ndalraa zha ne zienal ncuaane rnabey mendox, ²⁰ sangue ne, laa Xpëed Dios biaad bdixbiini me xquielrien ne bdziuunbey ne men ne nacpaa Dios. Niinasi laa ne ngable lo men ne nacpaa Dios ga, ni lëe me ga nac Jesús. Me nac Dios nguiamban, ni me nac men ne rdeed guielmban ndzon ne gdzind dze lozh.

²¹ Xin yeena, golguien Diosse nac men ne gleynie to; gunde to ne lel gre ncuaane no lo guidzliu rii gleynie to, laa ne gleynie to Dios.

Juan

BROP GUITTS NE PQUIAA JUAN

¡Diuzh to grëse to!

¹ Laa tib zhagol rii rxeel tib guits rii ziaad lo to i, ne nac to zha ne no xnëz Jesús. Dios bzooblo to, bredz me to ne laa to ngab xnëz me.

Ne nlipaa rleynie naa to gon, ni led naadsegaa, sinque ye grëraa zha ne runbey diidzli ne nac Xtiidz Dios. ² Rleynie no to sacne tibaque nac diidzli ne rliladz ne, ni tsod dze ne csaan new.

³ Dios ni Jesús men ne nac Xpëed me, me glu ganle pa lotaa noxco me to, zeena peet tsienied guic to, ni yquia zdoo me to; ni zunpaa mew, sac rleyniedox me to.

⁴ Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoaz ne.

⁵ Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gun to; sac gon, lëëquew ga bdzion ne zeene psilo bliladz ne Xtiidz Dios. ⁶ Telne nli rleynie ne Dios, dzigo none gban ne zigne rnabey me; gacxe waa, none niowse gban ne, ine gleynie ne samiech ne, sac gon min co rnabey me.

⁷ Ndal zha ne quianzë lo guidzliu niina, noquidie zho miech, rnee zho nlid goc Jesús zig tib miech zeene biaad me lo guidzliu. Nsin golso lo zho, sac gon notsidil zho mine nac diidzli ga, rlëenie zho Jesús ga sca run zho. ⁸ Golguien, ib gdeete to diidz guiaadquidie zho to, zeena dziin ne quiayun to i gacda zhlëse. Goltsoxco tiblique golgac, zeena yгаа to grëtaa guielnzaac ne no gneedz Dios lo to. ⁹ Sac gon, zha ne csaan mine nacpaa zhiwseed Jesús, led xnëzdraa Dios ga no zho; ni scagaa, zha ne zienalpaaw zigne naca, zha cosi xnëz Dios ga, xnëz Xpëed me Jesús ga no zho. ¹⁰ Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsode to gnee to pe diidz ne csannziuu to zho; ¹¹ sac telne sca gun to, rrieequia yele to rleynie grë zhiwseed yozh zho ga.

¹² Ndal grë ncuane no gne naa lo to, per racladzd naa gzet naaw lo guits rii. Laa guic naa no guialgan naa to i, dzigo mazd hor co naazhal gnaw lo to; zeena nroob guielbley ne dzio ne grë ne.

¹³ Grë zha rii, zha ne bzooblo Dios bredz me zigne bredzaque me to bzëeb to xnëz me, laa zho rxeel bdiuzh lo to grëse to.

Juan

BION GUILTS NE PQUIAA JUAN

¡Diuzh bets!

¹Laa zha gon rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

²Bets, rnab naa lo Dios zigne squi wen mban luu nêz lo me, scaque zaacse grieequia grêtaa ncuaane gun luu, ni gneedz me guielndaan lo luu. ³Ne nlipaa bley naa, zeene biaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu mine nac diidzli. ⁴Ne nligaa, nodraa pe stib conley zdoo naa zigne rleytaa naa zeene ron naa ine niowse mban grê zha ne biane naa xtiidz Dios lo, zienal zho mine nac diidzli.

⁵Bets, ziyon naa squitaa tibaque noxco luu run luu xyudar grê zha ne nacgrê ne, ni mazdraa zeene nac zho zha ne ziaad stib guiedz. ¡Wen ga! ⁶Squi ndxie grêraa zha ne rliladz Jesús, rzodiidz zho squitaa nquialadz luu zho. Bzhiguiel sca, bioxco tibaque squi been xyudar zho zeena grieele gdziñ zho zaatne no tsie zho. Sca rdziladz Dios. ⁷Sac gon, niapse porne rleynie zho Dios, laa zho brieë ziegun zho xtsiin Jesús, ni ib rziguiel zho ycaania zho ncuaane rdeed grê miech ne rliladz Xtiidz Dios. ⁸Min co nagon, ib none ne yquiambiaazlo zho, ne none gdeed ncuaane yquiin zho, zeena dziuuñ ne xyudar zho ygaaz Xtiidz Dios.

⁹Pxelle naa tib guits lo grêse zha ne no xnêz Dios i, per zig nac Diótrfes gon, men ne racladz so gnabey lo to i, rond me mine rnee no. ¹⁰Gacxe na, telne laa naa guial i, dzigo laa naa glisqui lo me dien pe nacne quiaaneñe me no.

Ni tebaa mincose, na haxta run me ib rbêzlod me grê zha bets, zha bzian ne rlanso i; niicle rdeetegaa me diidz cho gdeed zaatne cuêz zho. Zha ne rund mine racladz me, rbee me zho lad grê zha ne nacgrê zho.

¹¹Bets, sangue luu gon ib tsienald luu mine run grê zha ne sca run guielntseeb, sinque bioxco güeynal ncuaane ndzinli. Sac gon, zha ne run niapse ncuaane ndzinli, xnêz Dios no zho; laa grê zha ne run ncuaane ntseeb, gard sëeb zho xnêz Dios.

¹²Zig nac Demetr, grêse miech rnee ganle zaacse mban Demetr. Ni rlugaa nliw, sac gon tibaque zienal me mine nac diidzli. Niicle nogaaw, mincoque rnee no, ni nan luu ganle led yed no rquidie.

¹³Ndalraa ncuaane no gne naa lo luu, per racladz naa gzodiidz naaw lo luu lo guits rii; ¹⁴sac laa guic naa no guialgan niob naa luu i, dzigo hor co ziodiidz ne grop ne.

¹⁵Guiaannie Dios luu sca; peet tsienied guic luu. Grêse xamigw luu zha ne runbey luu nu, laa zho rxêel bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne nêz qui.

Juan

GUILTS NE PQUIAA JUDAS

¹ Naa nac Judas, bets Santiagw; xtsiin Jesús quiayun naa.

Laa naa rxel guits rii lo to, grëse to ne nac to zha ne bredz Dios bzëeb xnëz me. Ne nligaa nquialadz me to, ni haxta quianap Jesús to.

² Dios glu ganle pa lotaa rquia zdo me to, pa lotaa rleynie me to, ni pa lotaa noxco me to zeena peet tsienied guic to.

³ Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguelraaw cso naa diidz lo to, ib gandzede to grë zha ne rtsidil mine riladz ne. Dios bneedz diidz gocndion new, ne nac ne zha ne briece lo dol bziaab ne xnëz me. ⁴ Sac gon, blalaa zha ne rquiaalo riladz Dios, ngeets zhliaan laa zho bzëeb lad to i. Miech yozha, niapse lo dol no zho, rnee zho zac gun ne ncuane guiaabtaa guic ne, sac nquialadz Dios ne; ib riladzd zho Jesús, Men ro, Men nroob ne rnabey ne. Padzeelale goquiet, ne grëse miech ne sca nac, lëëque lo xtol zho nitlo zho.

⁵ Gosoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grëse menladz ne lo guielne ne noded zho Egipt ga, zha ne briecequia ib bnëd niunbey me, ib gondzed me zho, bnitlo me zho. ⁶ Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiaadoo zho haxta gdziñ dze ne laa me gun guielwxtis. ⁷ Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeynal mine nacdrea guieltsieel, tel chotaa pquiangob zho, bionie zho haxta grë mrarz; grëse zho, lo gui ga bnitlo zho. Ga rlu ganle, grëse zha ne csaand xquielntseeb, no tib lo guidox ne gdziñd dze guiuu, ni ga nitlo zho. ⁸ Ni zha ne gon blanso lo to i, scadaa run zho; sac tel zha, niapse guielyozh zienal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa. ⁹ Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee me mendox; lëë gdib rëb me: "¡Dios nac men ne gunquizh luu mine run luu!" ¹⁰ Laa grë zha qui, haxta grë ncuane run Dios, ncuane ni rioguidz zho zha nac, laa zho rdzibdeew; masaque mban zho zigne mban grë ma, laa zho run ncuane rdeedtaa guix xcuerp zho; lëëque zha nonitlo zho ga. ¹¹ ¡Probsaxe zho! Sac gon, nëz ne zey Caín ga zienal zho. Lo guielblë dimi, laa zho briece xnëz Dios zigne briece Balam; ni zigne gut Coré zeene gocntseeb me lo Moisés, scaque nitlo zho.

¹² Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora naa go; ni lalnu guielto guend lo zho. Nëzrii nëzrec quianzë zho, masaque nac zho zig nac xcowa ne ziaadnied nisguie, loxaque nëzrii nëzrec rienie mëw; zig nac tib yag bgool ne guieñd nex lo, len dze ne no yquia nex low. Laa zho bnitlole ga, masaque nac zho zig tib yag bidz ne bliadzle dib lo; sac tel yag bidza, gdzindraa dze ne yguiaaw. ¹³ Zigne nëzrii nëzrec rchoon nisdoo grë mtsiin beed ne ndziib low, scadaa nëzrii nëzrec nolu grë ncuane mbeeguelt to ne quiayun zho. Laa zho ziele nëz lo guielcowdoo ne rieguial zho, zaatne

gdziṅdraa dze griee zho; zig tib mel gbaa ne bnitnēzle, laa ma nonziaabse lo guielcow.

¹⁴ Lēēle zha qui ga bzeet Enoc (men ne brieequia lo dii ne rac xoop xti Adán), zeene psiaab Dios guic me, rēb me: “Gołwi ganle laa Dios ziaad, pe zhidaa grē anjł ne ziaadnie me, ¹⁵ ziaadgun me guielwxtis. Grēse miech ntseeb, laa me gunquizh zho grētaa doł ne been zho, grētaa diidz dox ne brieer zho bneenē zho me.” ¹⁶ Ni nligaa sca nac grē zha qui, ib nod ncuaaṅe tso zho conform, tibaque wlisqui no zho; laa zho zienal grētaa guielyozh, ncuaaṅe racladztaa xcuerp zho. Rto zho guieldzin, rlozhd dieen pa rac zho, rio zho pe diidz wen ne rnee zho lo miech, loxaque ne dien zha yquidie zho miech, gun zho miṅe racladz zho.

Laa naa rso diidz lo to

¹⁷ Sangue to bets, bzian, gołsoladz miṅe bnee grē zha ne pxeel Jesús bnee Xtiidz me, zeene biadseed zho to; ¹⁸ led znu rnee zho: “Zeene zhile gdziṅ dze ne laa guidzliu rii nitlo, zrieequia grē miech ntseeb ne gzhidznie zhiwseed Jesús, laa zho gban zigne nactaa grē zhgab yozh ne guiab guic zho.” ¹⁹ Ni nligaa ran to niina ganle sca quiaayaca, lēē grē zha co i squi nogodil grē zha ne no xnēz Jesús. Nacnied zho Espiritu Sant, gane niapse grē ncuaaṅe doł ne racladz xcuerp zho, miṅ co run zho.

²⁰ Bets, bzian, gołguien sca tibaque dziits gołso lo Xtiidz Dios miṅe riladz to. Gołzodiidznie Dios, zigne csiaab Espiritu Sant zdoo to. ²¹ Sozite to lo Dios, gołguien ganle zha rleynietaa me to; gołquiambēz dzian ne gal dze ne yгаа ne guielmban ne gdziṅd dze lozh, miṅe ndionpaa ne gneedz Jesús men ne rnabey ne, porne rquia zdoo me ne.

²² Tel cho zha ne racchop guic lo Xtiidz Dios, gołnee lo zho biire sodziits zho stib. ²³ Zha ne bii no lo doł, gołnee lo zho guien zho csaan zhow; gołcuee zho lo gui ne noxtseeb zho yгаа zho ga; scagaa grēraa miech, gołquia zdoo zho, per ib cxende to lo zho. Ni lalnu gdziguiende to grē doł ne run zho, gołsaca zig rzac to tib ncuaaṅe rbixnē zdoo to ran to.

²⁴⁻²⁵ Tibaque Dios no, me psilaa ne lo doł, ni megaa csilaa grēraa miech. Men nroob nac me, ni zrieelo gacniēn me to guiabde to ladznia doł stib; zeena iṅe mbe to, iṅe rley to laa me gdzinnie to zaatne nac lo guielndzondoo ne no me. Niina ne laa ne rdziuunbeyle Jesús, zrieelo dzioolnie ne me, mese nac men nroob, men ndzon, men ne rap guielrnabey. Tibaque nac me, niicle mazd glow, niicle niinaw, ni gdziṅd dze ne gdzēē me.

Judas

MINE BDEED DIOS DIIDZ GON JUAN

¹ Nu raquiet grë ncuane ziaadyoble gac. Dios bnabey Jesús glu mew lo grë zha ne no xnëz me. Nacne pxeel Jesús tib xanj me biaad biaadluw lo ngundziin win ne nac naa nu, parne sca gacnañ zhow. ² Grëse miñe gon naa, grëse miñe bin naa ga, laaw gne naa zigne gonse naaw, zigne binse naaw. ¡Diidzliw! ³ Dichos grë zha ne glab lo guits rii, ni dichos grë zha ne yquiaadiag grë miñe zhubnee low nu, ycaania zhow ni gliladz zhow; sac gon xtiidz Diosa, ni laa dze ne gac grë miñe rzeeta nu, ziaadgaxle.

⁴ Naa nac Juan, laa naa rquia guits rii rxel naa ziaad lo to i, ne nac to zha ne ngab xnëz Jesús, zigne nose to gza gadz guiedz ne ndxie nëz Asia i.

Dios men ne no padzeela, men ne no niina, men ne nacle diidz guiaad, me gacniën to lo grë zhizhgab to, me cchoobladz zdo to peet tsienied guic to; me ni Espiritu ne zo lo me zaatne nac lo xcan ndzon ne zob me; Espiritu ne rlu zha nac gadz guielbiini ne rap me; ⁵ ni Jesús men ne rnee niapse diidzli, men ne glopaa brieëban lo guielgut, men ne rnabey lo grëse zha non ne rnabey lo guidzliu.

¡Gotsaa dziuunnon ne Jesús! Sac gon pa lotaa rleynie me ne, bleeladz me me bzhiëe xchen me psanmbe me ne lo grëtaa xtol ne, ⁶ tibaque been me ne, psannon me ne; bzoooblo me ne gac ne pxoz ne gun dziin lo Dios men ne nac Pxoz me. ¡Mese nac men ne rap guielndzon, mese rap grëtaa guielrnabey! ¡Tsoad cho stib zig me, ni gdziind dze ne nitlo xquielrnabey me! Sca nac me.

⁷ ¡Bii zanaque to ganle zeene laa Jesús ziad-zëëb lo xcw! Grëse miech zan zho me, zig nac zha ne sca bdiñ me, zha ne sca bliz lanz cue me, zanlo zho me; dibdoo guidzliu, hor co mbanse gac miech, haxta zoon zho, haxta zdieb zho. Ible sca none gaca.

⁸ Znu rnee Dios, men nroob ne rap grëse guielrnabey: “Grëse ncuane notaa, naa psilow ni naa csiaala; naa nac zigne nac letr “a” ni letr “z” lo grëse letr, “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa guaial stib.”

Gon Juan Jesús

⁹ Naa nac bets to Juan, tibaque nac ne niina grë ne, sac ye naa no xnëz Jesús; ye naa nodeed grë guielnë ne noded to. Zigne rneedz me paciens lo to lëb to lo grëtaa guielnë ne no gan to, scaque racniën me naa; ni ye naa gdziin lo me, zaatne no gdziin to.

Sodiidz naa lo to ganle zha bzhaac naa. Lëëtaaue no naa lo guidzliu win ne lë Patmos, ga ngoguiu zho naa loxaque ne noseed naa miech Xtiidz Dios, miñe biaadlu Jesús zeene biaad me lo guidzliu. ¹⁰ Tib dze, lëëtaque nacie Espiritu Sant naa nozodiidznie naa Dios, tibaque zeene nguiedz zëëb tib tsi men co, pale tsi tib trompet; ¹¹ në me lo naa:

—Grëtaa ncuane ran luu nu niina, pquiaaw tib lo guits pxeela lo grëse zha ne ngab lo naa, grë zha ne no gza gadz guiedz rii nëz Asia: Efés, Smirn, Pérغامo, Tiatir, Sardis, Filadelf, ni Laodicé.

¹² Ptsire lo naa ni naa gwi naa dien cho ga sca rnee lo naa. Zeene bui naa, gon naa gadz candeler niaa niapse guiib or. ¹³ Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdzina haxta yan ni me, ni ndxie tib cinch niaa niapse guiib or ngali ro zdo me. ¹⁴ Ine bie

rna guitsguic me, zootle zhiil nquits, zootgaa luu guieg, masaque riaazbel bziaalo me. ¹⁵ Ni mew, masaque rquiabniw zigne rquiabni guiib brons zeene rlozh riaanmbew, zeene rrieehēzgaaw lo gui; tsi mew, masaque rio bi rnee me zig rio bi grē guiibee nroob ne zhoob naal nis. ¹⁶ Nia me miñe nēz derech, nzhēn me gadz mel gbaa; ni zob tib spad ro me, zigtaa nēz zhits spad cow zigtaa nēz low, gropse nēza ndox. Masaque biinidoo ne rriee lo me, zigne rlu lo ngbidz zeene lega recye lo ngbidz.

¹⁷ Zeene goñ naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, nē me lo naa:

—jGdziebd luu! Naa psilo ni naa csiaal, naa psan grētaa ncuaane no, ni naa gnitlow; ¹⁸ ni mban naa. Nli gut naa per brieabaan naa, mban naa niina, ni gdziñdraa dze ne guet naa; lадznia naa no guielgut. jGdziebd luu sca! ¹⁹ Grēse ncuaane noyan luu nu niina, pquiaaw lo guits grēsew, niicle miñe noyaclew, miñe naragaa gaca. ²⁰ Znu goñ nac miñe blozh goñ luu ga: gadz mel gbaa ne goñ luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candler co, nac tib tib yadoo co.

2

Diidz ne bnee Jesús lo zha Efés

¹ Blozh ga nē me lo naa:

—Miñe gni naa lo luu nu niina, pquiaaw pxeela Efés, lo zha ne quianap grē zha ne ngab xnēz naa ga, gudz lo zho: “Znu nac xtiidz meñ ne nzhen gza gadz mel gbaa co, meñ ne zodeed vuelt lo zga gadz candler ne niaa niapse guiib or ga, rnee me:

² Nan naa zha mban to, nan naa pa lotaa noxco to run to xtsin naa, ni nacle to zha ne lega znuse guiaan zdo; siba, ib randzede to grē zha ntseeb. Grē zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnan to rquidie zho. ³ Nan naa zha nactaa guielnē ne noded to loxaque ne riladz to naa; per niicle scaw tibaque dziits zo to, ib riaan d zdo to.

⁴ Loxaque naca no tib ncuaane glisqui naa lo to: jRleyniedraa to naa niina, zigne rleynietaa to naa glo, zeene glopaa bliladz to xtidz naa! ⁵ Golsoladz pa lo pxin to. Golsbiire golgac stib zigne nac to glo zeene psilo bliladz to xtidz naa; sac goñ, telne gac-wende to, ible zial naa i zialtichee naa xcandler to zaatne zow.

⁶ Nli rleyniedraa to naa scataa, per rley naa ran naa ib rdziguiende to grē ncuaane ndzinlid ne run zha Nicolaít, sac tel naa, ni lalnu ib rdziguiend naa ncuaane run zho.

⁷ Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Grēse zha ne gdeete diidz gac-wet zho lo ncuaane gunctal xtol zho, zha co yгаа gow xnex yag ne rdeed guielmban ga, miñe zob len huert ndzon ne rap Dios ga.”

Diidz ne bnee Jesús lo zha Smirn

⁸ Blozh ga nē me lo naa:

—Pquiaa miñe gni naa lo luu nu, pxeela Smirn, lo zha ne quianap grē zha ne ngab xnēz naa ga, gudz lo zho: “Znu nac xtiidz meñ ne psilo grētaa ncuaane no, meñ ne csiaal, meñ ne gut ga ni brieabaan me, rnee me:

⁹ Ran naa zha nactaa grē guielnē ne noded to. Ran naa mban rac to guieñd grē ncuaane yquiin to (nligaa peet rapde to lo guidzliu, per guielnzaac ne bgaa to i ngab to lo Dios, nroob nona). Ran naa, grē zha ne rnee i xpēd Dios zho

sac zhasi zha Israel nac zho, no zho rneenē zho to; per nliid gon xpēed Dios nac zho, sac zhiwseed menḁox zienal zho.

¹⁰ Nroob grē guielnē ne ziaadyob gan to, per gdziebde to. Squiil menḁox miech, gnab zho tso to ladzguuib; ga nagon glu to dien pe nli dib zdoo to riladz to naa. Nli nzianlaa to guiab ladzguuib, per tib tsiise ngbidz sca yquiaanal zho to. Laga mban to lo guidzliu sca, ible csaande to zhiwseed naa, zeena ycaania to guielmban ndzon ne gnedz naa lo to.

¹¹ Zha ne rioguicle godiidz rii, yquiaadiag zho ganle zha rnee Espiritu Sant lo zha ne no xnēz naa, rnee me: Zha ne tiblrique tsoxco gun mine rnabey Dios, led yedraa zha co tsoxtseeb guey gabil.”

Diidz ne bnee Jesús lo zha Pérgamo

¹² Blozh ga, nēque me lo naa:

—Mīne gun naa lo luu nu, pquiaaw pxeela Pérgamo, lo zha ne quianap grē zha ne ngab xnēz naa ga, gudz lo zho: “Znu nac xtiidz men ne nzobro tib spad lots ne ndox gropse nēz, rnee me:

¹³ Nanpaa naa masaque menḁox rnabey lad guedz ne no to i, per ran naa tiblrique dib zdoo to rnalō to naa, niicle gon to zha psacsi zho Antip, beet zho me i, men ne scataa bioxco bnee xtidz naa lo miech.

¹⁴ Per no chop ncuaaḁe gon glisqui naa lo to: Lēda i run to randze to grē zha ne squi run zigne been Balam, men ne pquuil Balac bloo Balac guic grē zha Israel beenctal zho xtol zho, dow zho xpēel grē ma ne biogon lo mdio, ni pquiangob zho zha ne led tsiield zho. ¹⁵ Lēē tiba ga, laa stiba, randze to zha ne bii zienal zhiwseed yozh zha nicolaít; tel naa, ni lalnu rdziguiend naa wseed co.

¹⁶ Laa naa rso diidz lo to: golnab perdon, ni golnee lo grē zha co csaan zho grē ncuaaḁe ndzinlid ne run zho; sac gon, telne gond zho diidz, ible zial naa zialtīlnie naa zho con spad ne zob ro naa nu.

¹⁷ Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Zha ne gdeete diidz lo grē ncuaaḁe gunctal xtol zho, zded naa guielwagw ne rap naa gbaa yquuin zho; ni zded naa tibga quie nquits lo zho, lo quie co quia lē cub zho, ni zhase gacnan zha nac lē co zho.”

Diidz ne bnee Jesús lo zha Tiatir

¹⁸ Blozh min co, nē me:

—Ye lo zha ne quianap zha ne no xnēz naa guedz Tiatir, pxeel diidz rii, gudz lo zho: “Znu nac xtiidz Xpēed Dios, men ne masaque riaazbel bzialo, men ne masaque rquiabni ni zigne rquiabni guuib brons ne tibaque riar; rnee me:

¹⁹ Nan naa grēse zha mban to; ran naa pa lotaa rleyne to naa, dib zdoo to riladz to cho nac naa, noxco to quiayun to xtsin naa, tiblrique rac to dziits zo to lo xtidz naa; ran naa noxcoraa to quiayun to xtsin naa niina.

²⁰ Per no tib ncuaaḁe no glisqui naa lo to: lēda i gon run to randze to wnaa ne lē Jezabel i, rnee me Dios rsiaab guic me grē ncuaaḁe rnee me, per nliida; sac gon, loxaque noquidie me grē zha ne no xnēz naa, noquuil me zho rquiangob zho grē zha ne led tsiield zho, ni row zho xpēel grē ma ne riogon lo mdio. ²¹ Blactaale pquiambēz naa nab me perdon, ntsēē me lo xquielmban me; per nēd me csaan me grē guielyozh ne run me i.

²² Gacnan to sca ganle, laa naa gnabey glan me tib guielguidzdox, tsiechedraa me lo caxtigw co; scaque grēse zha ne zienal zhiwseed me, nroob guielnē ne gnabey naa ted zho, tel laa zho csaand grē guielyozh co. ²³ Ni haxta zut naa zho, zeena sca gan grēse miech ne no xnēz naa ganle, naasi nan naa pe

rza guic miech, pe rza zdoo zho; gacxe waa, tel pe ncuuaane run zho, zdedse naa mine rieguial zho tib tib zho.

²⁴ Sangué to grè to zha ne zienald guielyozh ne rlu wnaa qui (wseed ne rnee zho i rdeed nroob guielbiini, per nand zho gon zhiwseed mendoxa), peet glisquidraa naa lo to. ²⁵ Per none gon tiblrique golgac, zeena ine dib zdoo to rnal to naa gal dze ne laa naa guial stib. ²⁶⁻²⁸ Sac gon, grèse zha ne gdeete diidz lo grè ncuuaane gunctal xtol zho, sinque tibaque tsoxco zho gban zho zigne rnabey naa, haxta gdziñ dze ne nitlo guidzliu, zded naa tib mel gbaa lo zho, mel ne rlan ral sil, ni so naa zho gnabey zho grè guiedz. Naa gded guielrnabey co lo zho, zigne bneedz Pxoaz naaw lo naa; ni lalnu yquiad zdoo zho, grèse miech ntseeb, zunquizh zho zho grètaa guielntseeb ne been zho.

²⁹ Grèse zha ne rioguicle godiidz rii, yquiaadiag zho ganle zha rnee Espiritu Sant lo grè zha ne no xnèz naa!”

3

Diidz ne bnee Jesús lo zha Sardis

¹ Blozh ga, nè me:

—Mine gni naa lo luu nu, pquiaaw pxeela guiedz Sardis, lo zha ne quianap grè zha ne ngab xnèz naa, gudz lo zho: “Znu nac xtiidz men ne nzhen gadz mel gbaa, men ne nacie zhiEspiritu Dios, Espiritu ne rdeed gadz guielbiini, rnee me:

‘Nan naa gon pe nac grè ncuuaane run to, niicle zèeb diidz mban to, per par naa miech gutle nac to. ² Golcuae zhimcaalo to sca! Golsodziits lo spalalse xtiidz naa mine rsoladz to, sac gon zhile laa to lozh guiaanladza. Ne nligaa, ran naa quiaayunde to xtsiin Dios zig none gaca. ³ Golsoladz ganle zha nac grè wseed ne gocnan to, grè wseed ne bin to; dzigo goltsienala, ni golnab lo Dios gon me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzèeb ngbaan lidz.

⁴ Sca nac to, per lo to i gon no bla zha ne bii mbe zdoo, sac zienald zho grè ncuuaane run to; rrieequia rdeete zho diidz guiacbeed xab nquits zho ga. Ni zha co nagon rieguial sènal zhits naa, sac gop zho xab zho cuidad.

⁵ Golgona ganle, grèse zha ne gdeete diidz lo grè ncuuaane gunctal xtol zho, scaania zho tib lar nquitsbie gacw zho; lè zhow, lèe quialew lo guits ne quia lè grè zha ne yga tib guielmban ndzon ga; haxta zanie naa zho lo Pxoaz naa ni lo grè xanj me, guiep naa: Lèè zha rii gon no xnèz naa.

⁶ Zha ne rioguicle grè godiidz rii, yquiaadiag zho ganle zha rnee Espiritu Sant lo grè zha ne ngab xnèz naa.”

Diidz ne bnee Jesús lo zha Filadelf

⁷ Blozh ga nè me:

—Mine gni naa niina, pquiaaw pxeela guiedz Filadelf, lo zha ne quianap grè zha ne ngab xnèz naa, gudz lo zho: “Men mbe ne rapd ni tib dol, men ne rnee niapse diidzli, men ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

⁸ Nan naa grèse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rliladz to naa. Gacxe waa, rrieequia laa naa rxal tib puert ted to, ni choot grielod csioog puert co. ⁹ Bii zan to ganle, zeene laa naa cxel gza zha ne ngab lo mendox i, guiaad zho guiadquitsgzhib zho lo to, zha ne noquidie i rnee zho xnèz naa no zho. Ga gan zho ganle nli rleyne naa to. ¹⁰ Ne squi tiblrique rac to ron to xtidz naa, peet güeynied guic to

niicle pquianaḷ miech to, ible squianaap naa to, gaḅde to guieḷnēdox ne gaḅ grē miech ne ndxie lo guidzliu.

¹¹ 'Golsoladza gaḅle, merle guaḷ naa. Golguieḅ csaande to xtidz naa miḅe naḅle to, zeḅa tsodet stib zha ne ctiche miḅe rieguaḷ to gnedz naa lo to. ¹² Grēse zha ne gdeete diidz lo grē ncuaaḅe guḅctal xtoḷ zho, so naa zho gac zho zig grē pilar nroob ne zo leḅ xyadoo ro Dios, ni gdziḅdraa dze ne griece zho ga; cho pilar co, ga yquia naa lē Dios, ga yquia naa tib lē cub naa. Laa zho ngable guiedz ne rnabey Dios ga; lēḅ guiedz co nac Jerusalén cub ne gnabey me gueit gbaa.

¹³ 'Zha ne rioguicle godiidz rii, yquiaadiag zho gaḅle zha rnee Espiritu Sant lo grē zha ne no xnēz naa."

Diidz ne bnee Jesús lo zha Laodicé

¹⁴ Ni nē me:

—Miḅe gni naa niina, pquiaaw pxeela guiedz Laodicé, lo zha ne quianaḅ grē zha ne ngab xnēz naa ga, gudz lo zho: "Meḅ ne rnee niapse diidzli, meḅ ne ruḅ grēse miḅe rnabey Dios, meḅ ne bzo Dios psan grēse ncuaaḅe no, znu nac xtiidz me, rnee me lo to:

¹⁵ 'Naḅ naa grēse zha mban to. Raḅ naa noxcodet to grē miḅe rnabey naa to, ni niicle rsaandgaaw tow; nac to zig nac tib ncuaaḅe loxaque ndzēyopse, niicle niagda ni niicle nlēēdgaaw. ¡Tebaa nac to zig tib nis yag, zig tib nis lēēga! ¹⁶ Per naa goḅ ne squi nac to zig tib nis ndzēyopse, ni lalnu rdzigiuid naa ncuaaḅe ruḅ to. ¡Zhile goḅ laa to guḅctsiḅ naa!

¹⁷ 'Rnee to grēse ncuaaḅe rquiiḅ to laaw quianiele to, ible peet liaadz racdraa lo to, ¡ni riende to goḅ ni lalnu peet nonde to! To nac miech ne mazdraa mban, peet rapde to, ni lar ne ctse lad to guieḅ, rriequia haxta ni lo to roḷdraa. ¹⁸ Laa naa rso diidz lo to: Teḅe racladz to nḷipaa gapcheḅ to, goḷtē lo naa, naa cto guiḷ or ne mazdraa wen lo to; xab tow, naa cto lar ne mazdraa nquits gacw to, zeḅa ctoḷadzniedraa to to ne squi guieḅ pe ctse lad to; haxta nis rmed ne tso bziaalo to, naa gnedza, zeḅa gbiire gaḅ to stib.

¹⁹ 'Grē zha ne rleynie naa, rḷisqui naa grē ncuaaḅe nonguield ne ruḅ zho, rteed naa zho tib caxtigw parne cseed zho ndzinḷi gbaḅ zho; gacxe waa goḷgac ndzinḷi stib, goḷtsoxco miḅe rnabey naa. ²⁰ Laa naa quiambēz to goḅ gbiire gbiḅ to lo naa. Rriequia ro lidz to zo naa, quiaḅedz naa to. Zha ne yquiabladz cxal ro lidz sēēb naa, zdeed naa, ni haxta sobnie naa zho diowxtsee no grop no. ²¹ Grēse zha ne gdeete diidz lo grē ncuaaḅe guḅctal xtoḷ zho, zded naa diidz sob zho cue naa, zaatne sob naa gnabey naa; zigne zoob naa cue Pxoz naa niina nonabey no; sac teḷ naa, bdete naa diidz niuḅ naa miḅe rnabey meḅdox.

²² 'Zha ne rioguicle godiidz rii, yquiaadiag zho gaḅle zha rnee Espiritu Sant lo grē zha ne no xnēz naa."

4

Rooḷnie zho Dios gbaa

¹ Zeḅe bui naa stib, goḅ naa laa tib puert quia zhan gbaa, nzhialse puert co. Horco biire bin naa tsi meḅ ne bnee lo naa ga glo, meḅ ne nac tsi ga zig tsi tib trompet, nē me:

—Bieḅ, dē nu gaḅle, zeḅa glu naa lo luu zha nac grē ncuaaḅe ziaadyob gac.

² Zigne sca nē me, hor co blu Espiritu Sant lo naa, goḅ naa laa tib xcan zo gbaa, tib xcan ne rzob meḅ ne rnabeya. Lo xcan co, ga zob tib meḅ co, ³ masaque rbebni me zigne rbebni quie ne rnee zho jasp, quie ne rneegaa zho cornalin. Igose xcan co quia tib guitye, rbebniw zigne rbebni quie ne

rnee zho smerald; ⁴ ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me. ⁵⁻⁶ Masaque riab belye, ratsie rnee nguuzi, ni zëëb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbebela zig rbebel quie zed; ni noquia gadz biini nroob ga, lëë gadz biini co nac gadz guielbiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhitsaquew zob bziaalow. ⁷ Tiba rlu zig rlu meedz, stiba rlu zig rlu tib ngon yeen; laa schop mine riaan ga, tiba rac lo zig rac lo miech, laa stiba rlu zig rlu tib msi nroob ne quiasibe. ⁸ Tib tiba zob xoopga xiila, ndziib bziaalow zhits xiila, len xiila ne; tibaque nguiedz zëëb tsiw, rneew:
 ¡Meñ ndzondoo nac Dios!

¡Meñ rnabey nac me, nroob poder ne rap me!

Notaque me, me ga no padzeela, me no niina, ni lëëque me ga no guiaad.

⁹ Gza tap bult mban co, roolniew men ne zob lo xcan co, (men ne gdzind dze guet) rsannona me, ni rdeeda xquizh lo me. Zigse sca run gza bult co, ¹⁰ scasaque gza galptap mengol ne zob ga, rquitsgzhib me lo men ne zob lo xcan ro co, gzase me, rgob me xcoron me rguix mew nëz lo men ne zob lo xcan co, ni rnee me:

¹¹ Luu nac xDios no, luu nac men ne rnabey no.

Luuse nac men ne rieguial dziuunnon no,

ni gnee no grë diidz ndzon lo luu.

Nroob poder ne rap luu, sac grëtaa ncuaane no, luu bzaaw;

laaw biaa sac ible sca gocladz luu, ni laaw niaagaa niina, sac ible sca racladz luu.

5

Tib guits ne nzhidoo gadz lë cint

¹ Zeene bui naa stib, gonpaa naa men ne zob lo xcan ro co, nose tib guits nroob nia derech me. Groipse nëz guits co quia, ndibëdsew, nzhidoo gaw gadz lë cint. ² Ni gon naa tib anjl, tib men macis rlu me, nguiedz zëëb tsi me, bnabdiidz me rëb me:

—¿Cho rieguial cchug cint ne nzhidoo guits qui, cxal zho low?

³ Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

⁴ Mban goc naa, psilo naa nguiedz roon naa, gon naa sca brieequiad tib zha ne rieguial nxl lo guits co, nlab zho low. ⁵ Dzigo bnee tib mengol ne zo gax lo xcan co, në me lo naa:

—Goond luu. Lëz ganle, men ne brieequia lo xtii Judá, lo xtii rey David, me cchug gza gadz cint ne nzhidoo guits qui, me cxal low. Ible me rieguiala, sac gon psiaablo me grëse zha ne rlëë lo me; rrieequia nac me zig tib meedz.

⁶ Horco bui naa zaatne nac lo xcan ro co, gon naa glowtaa lo gza bult mban co ni lo gza mengol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guielbiini ne rdeed zhiEspíritu Dios.

⁷ Dzigo wbig men ne nac Carner yeen co, bnaaz me guits ne no nia derech men ne zob lo xcan ro co. ⁸ Zigne bnaaz me guits co, laa gza bult mban co, ni gza galptap mengol co pquitsgzhib lo me. Tib tib mengol co nzhen se me tib arp ni tib ptsigui or, rso tib gox ndzon len ptsigui co (rrieequia gox co nac grë diidz ndzon ne rnee grë zha ne no xnëz Dios zeene rzodiidznie zho me).

⁹ Dzigo psilo gza mengol co biil me tib cant cub. Znu rnee lo cant co:

¡ble luu rieguial ycaania guits qui, luu rieguial cchug gza cint ne nzhidoow
i!

Sac luu bded grëtaa guielnë co psacsi zho luu, haxta bzhiee xchen luu;
sca psilaa luu grëlose dii miech,
teḷ pa guiedztaa nac zho, teḷ pa diidztaa rnee zho, teḷ pa naciontaa ngab zho.

¹⁰ Laa luu bzhii no grë no gac no tib guiedz cub,
guiedz ne gnabey Dios;

no gac pxoz ne guḅ dziin lo me,
masaque tipse gban no zeene gnabey me lo guidzliu.

¹¹ Zeene bui naa, goḅ naa anḷ guizhiu ne ndxie zaatne zo xcan ro co, led
zha ne grielod glab new. ¹² Nguiedz zëëb tsi zho grë zho gza bult mban co,
ni grë mengol co, rnee zho:

¡Meḅ non nac meḅ ne nac Carner yeen ne squi rlu beet zho!

Me rieguial gnabey, meḅ ro nac me, choot grielod csiaablo me.

Ladznia me no grëse guielnzaac, me rap grëtaa guielrien,

Meḅ ndzon nac me, me none dziuunnon ne, me none dziooḷnie ne.

¹³ Horco grëse miech, grëse ma, grëse ncuaaḅe bzaa Dios, zigtaa gbaaw,
zigtagaa lo guidzliuw; zigtaa zhan guidzliuw, zigtagaa lo nidoow; nguiedz
zëëb tsi zho, rnee zho:

¡Nliw, meḅ ne zob lo xcan ro qui, ni meḅ ne nac Carner yeen qui,

ible rieguial dziuunnon ne grop me!

¡Me rnabey, lo me none gnee ne grëtaa diidz ndzon;

nadzew, gzhew, ni grëragaa izdoow ne ziaadraaw!

¹⁴ Pquiab gza tap bult co, rëb zho:

—¡Scaw, sca no gaca!

Dzigo gzase mengol co, laa zho pquitsgzhib lo meḅ ne zob lo xcan ro co;
psilo zho rnee zho grë diidz ndzon lo me.

6

Gza gadz sell co

¹ Blozh ga, goḅpaa naa zeene laa meḅ ne nac Carner yeen co pchug primer
cint ne nzhidoo guits co. Horco laa tib bult mban co bnee; masaque nac tsiw
zig rio bi rnee nguzi, nëw lo naa:

—¡Dë ganle gwi luu!

² Dzigo wbig naa, goḅ naa tib guay nquits. Zhits guay co zob tib meḅ co
nzhen me tib yag arcw ne rquiaa zho flech; blozhse pcaania me tib coron ne
rzob guic zha rnabey, dzigo laa me brieë. Ine zob nze me lad guay co, laa me
zie ziegun me gan lo grë zha ne rlëë lo me.

³ Blozh ga, laa meḅ ne nac Carner yeen co pchug stib cint ne nzhidoo guits
co. Dzigo bredz stib bult co naa.

⁴ Dzigo bia naa, goḅ naa laa stib guay nizhnie brieë, zob stib meḅ co lad ma.
Blozhse pcaania me tib spad nroob, ni pcaa me diidzhey tsielodiḷ me miech
lo guidzliu, zeena gutlsa zho; laa me brieë ga, laa me zie.

⁵ Zeene laa meḅ ne nac Carner yeen co pchug bion cint ne nzhidoo guits
co, dzigo bredz stib bult co naa, nëw lo naa:

—¡Dë ganle gwi luu!

Dzigo goḅ naa tib guay ngas, scasaque zob stib meḅ co lad ma, nzhen me
tib zhiguiib. ⁶ Ni groḷtaa zaatne zo gza bult mban co, zëëb tsi tib meḅ co, rnee
me:

—Tib kiltaa zhobxtil goḅ ycaa zha ne guḅ dziin tib dze; teḷ zhobgaaw,
tsontaa kila ycaa zho; saḅgue nceit ni vin ib ygaald luuw.

⁷ Laa zeene goc cint co tap ziechug men ne nac Carner yeen co, dzigo laa stib bult mban co bredz naa.

⁸ Horco, zeene bui naa, gon naa tib guay nguets; lad guay co zob tib zha co le Guielgut; zhiits co nal stib zho le Gabil. Lo tap lal ne nle miech ne ndxie lo guidzliu, pcaa grop zha co diidzbey tsiegut zho tib lal gre miech co; zha ne guet lo dil, zha ne guet lo gbin, zha ne guet lo guielguidz, zha ne guetga lo gre ma ntseeb.

⁹ Dzigo pchug men ne nac Carner yeen co stib cint co, goca gaay. Horco, zaatne nac zhan mezh ne nac mezh lo pcoog, ga gon naa grese zha ne psacsi miech, beet miech zho loxaque ne bnee zho Xtuidz Dios, ni dib zdoo zho bliladz zhow. ¹⁰ Nguiedz zeeb tsi zho rnee zho:

—Luu ne nac luu men nroob ne rnabey, luu ne nac luu men ne rnee niapse diidzli, ¿pa hor dzigo cuedz luu gre miech ne ndxie lo guidzliu, zha ne scataa psacsi no? ¿Pa hor gunquizh luu zho gretaa mine been zho ga?

¹¹ Dzigo bdeed me lar nquits got zho; reb me lo zho no cuez zho zniip, sac greeraa zha ne nacgre zho ngab zho lo Jesus, no spalal zha ne naraa csacsi miech zigne psacsi miech zho; haxta gza zho dzigo laa me gun guielwxtis.

¹² Blozhse ga, laa Carner yeen co pchug stib cint co, goca xoop; hor co laa tib zhodox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mee zig rludaa ren, sca nizhnie rlu lo mee; ¹³ gre mel ne ndziib gbaa, masaque bliaal ma lo guidzliu zig rliaal gre guigw yeen zeene rree medox. ¹⁴ Znuse bdibed gbaa, goca zigne racse gre guits ne rdibed; gre gui, gre guidzliu win ne no lo nisdoo, nezrii nezrec biaana. ¹⁵ Dzigo grese zha ne nac zha rnabey lo guidzliu, gre zha ne nac zha non, gre zha ne rapchen, gre zha nroob ne rnabey lo menguiib, gre zha nroob ne non xtiidz, ni gre ragaa miech, niicle gre zha ne run xtsiin bena, niicle gre gaa zha ne run xtsiin zhala, grese zho biolan, zha ne biolan len gre bliee, zha ne biolangaa len greeraa quie ne no dan; ¹⁶ nguiedz roptsie zho rnee zho lo gre gui co, lo gre quie co:

—¡Golliaal lad no, golcolan no, zeena gandraa men ne zob lo xcan ro co no! ¡Golcolan no, zeena dzian no gretaa guielne ne cxeel men ne nac Carner yeen co! ¹⁷ ¡Sac nasi laa dze ro co bdzin! ¡Laa guielnedox co nagon ziaadle! ¡Ncuuane leebd no low!

7

Zha ne pcuee lo grese zha Israel

¹ Bded ga, gon naa tap anjl. Lo gza tap lad guidzliu, tibga anjl co zo tib lad nocueez me me. Wdzeepaaw, per ni tib zhiblag yag rnidraa, niicle lo nisdoo dzese biaca; sac ni palal rriedraa me lo guidzliu.

² Tibaque zeene brieequia stib anjl nez ne rlan ngbidz, neyse me xsell Dios; nguiedz bnee me lo gza tap anjl co (anjl ne pcaa diidzbey ga gun guielqui lo guidzliu ni lo nisdoo) reb me:

³ —¡Golcuéz zniip! Gunde to guielqui lo guidzliu niina, niicle lo nisdoo, niiclegaa gre yaga; sac naraa lozh guioquiaa no xsell xDios ne quia gre zha ne run xtsiin me.

⁴⁻⁸ Zeene blozh pquia sell co quia gre miech co, bin naa lo gre zha ne ziaad lo xtii zha Israel, rgaa zho tib gayoo chooptap mil:

Tsiipchop mil zha xtii Judá,
tsiipchop mil zha xtii Rubén,
tsiipchop mil zha xtii Gad,
tsiipchop mil zha xtii Aser,
tsiipchop mil zha xtii Neftalí,
tsiipchop mil zha xtii Manasés,

tsiipchop mil zha xtii Simeón,
 tsiipchop mil zha xtii Leví,
 tsiipchop mil zha xtii Isacar,
 tsiipchop mil zha xtii José,
 stsiipchop mil zha xtii Benjamín.

⁹ Zeene bui naa zaatne zo xcan ro co, zaatne zo meñ ne nac Carner yeen co, miech guizhiu ne goñ naa ndxie ga; grè lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse zho niapse lar nquits nacw zho, ni no tiblëga zin nguia nia zho; ¹⁰ nguiedz zëeb tsi zho, rnee zho:

Dios, meñ ne rdziuunbey ne, meñ ne zob lo xcan ro qui,
 me nac meñ ne psilaa ne lo grëtaa xtol ne;
 me ni meñ ne nac Carner yeen qui.

¹¹ Horco grëse anjl ne ndxie igo xcan ro co, igo zaatne zob grë mengol co, ni zo gza tap bult mban co; grëse zho laa zho pquitsgzhib nëz lo xcan co, haxta bzooblo zho lo liu, rdeed zho xquizh lo Dios ¹² rnee zho:

¡Scaw! Luu none dzioolnie no,
 none tibaque gneedz no xquizh lo luu,
 luu rieguiäl dziuunnon no; sac luu nac xDios no.
 Luu nac nac meñ ne rienraa, meñ ne rap poder;
 gacxe waa luu none ycaania grëse diidz ndzon,
 gzataa dze, niicle nadzew, gzhew, ni grëragaa izdoo ne ziaada. ¡Sca none gaca!

¹³ Dzigo bnabdiidz tib mengol co, në me lo naa:

—¿Pe nan luu sca cho nac grë zha ne nacw lar nquits qui? ¿Pe nan luu pa nëz ziaad zho?

¹⁴ Dzigo rep naa lo me:

—Nand naaw. Bzhiguiel bnëw lo naa.

Nëchaa me:

—Lëë grë zha qui goñ bded grëtaa guielnëdoh ne goc lo guidzliu. Laa zho nacw lar nquits qui, sac wbig zho lo Jesús psanmbe xchen me zho lo dol.
¹⁵ Gacxe waa squitaa ndzon ndxie zho gax lo zhixcan ro Dios, dze guieel quiayoolnie zho me len xyadoo ro me. Me nac meñ ne quianap zho grëse zho; ¹⁶ led yedraa niina guet gbin zho, guet nisgaa zho; led yedraa niina ctsuu ngbidz zho, sonëëggaa zho. ¹⁷ Meñ ne nac Carner yeen ne zo delant lo xcan ro qui, me gdeed ncuaañe gow zho, ni zigne rienie baxtor xpëcwxiiil zho ro guiuu, sca zienie me zho zaatne quiada nis ne rdeed guielmban. Led yedraa niina goon zho.

8

¹ Laa zeene laa meñ ne nac Carner yeen co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

² Blozh ga, goñ naa zeene pcaania gadz anjl ne rzo lo Dios, tibga trompet.

³ Ni brieecquia stib anjl nzhen tib ptsigui niaa niapse guiib or. Zigne bdziñ me, bzo me delant lo xcan ro co, zaatne zo mezh or ne nac lo pcoog: ga pcaania me nroob yaal parne ctsieel mew grë diidz ne rnee grë miech ne no xnëz Dios zeene rzodiidznie zho Dios. ⁴ Dzigo bzëëg anjl co yaal co, tipse goc gox co grëw xtiidz grë zha ne no xnëz Dios, laaw bdziñ lo Dios. ⁵ Blozh ga, ptop me grë gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguzi, rio bi, riab belye ne, ni bni tib zhodox.

Pcuedz gadz anjl trompet

⁶ Horco laa gza gadz anjl ne pcaania gza gadz trompet co, laa zho nsinle nzheṇa, parne ycuedz zhow.

⁷ Zeene laa tib anjl co pcuedz zhitrompet zho, hor co psilo bliaal guiequie lo guidzliu ni bliaal guileé notsa ren. Gzoob ne telne glē guidzliu tson lal, dzigo masaque tib lala bnitlo, bnitlo grēse yag, grēse lo guizh nguia ne no low.

⁸ Blozh ga, zeene laa stib anjl co pcuedz xquiib, hor co biab tib ncuaan co nisdoo, masaque rluw zig rlu tib gui nroob ne quiayazbel. Gzoob ne tel glē nisdoo tson lal, bnitlo tib lala, biallow niapse ren zeene laa ncuaan co biab low. ⁹ Bnitlo grēse ma, grēse guizh ne no lo tib lalga nis co, haxta grē barcw ne no low bnitlo.

¹⁰ Loxaque blozh goc miṇ co, laa stib anjl co pcuedzaque xquiib zho, hor co laa tib mel nroob bringaa gbaa, masaque rso ma bel zig razbel tib lē guier, biab ma lo guidzliu. Lo grē guibee, lo grē zhlian ne no lo guidzliu, lo tson lal ne gzoob ne naca, pxin ma tib lala. ¹¹ Grēse nis co goc nlayag, ndal miech ne gut low. Nacne bleelē zho mel co Nlayag.

¹² Zeene laa stib anjl co pcuedz xquiib goc zho tap, hor co zigtaa lo ngbidza, zigtagaa lo mēew, biuu tib niaza, schop niazaquew biaan rziini; grē mel ne ndziib gbaa, gzoob ne lo tson lal ne nac ma, hor co biuu tib lal ma. Rlupaa lega net net rquiaa ngbidz; zaatne nacгаа guieel, ni palal peet rlud.

¹³ Laa naa nowi, tibuque zeene gon naa laa tib anjl bded groltaa zhan gbaa, haxta rlupaa rio bi zie me lo me, nguiedz zēeb tsi me rnee me:

—jProbsaxe grē miech ne ndxie lo guidzliu! Sac ncuaane ntseebraa gac, zeene laa stson anjl qui ycuedz xquiib me.

9

¹⁻² Zeene laa anjl ne nac zho gaay ga pcuedz xquiib, hor co gon naa laa anjl ne briece gbaa padzeela ga pcaania tib liow, pxal zho ro tib guierdoo ro. Zeene laa ro guieer co bzhiäl, per nli goxdoo ne briece ga, tib psioogsew zhan gbaa, per ni palal rludraa lo ngbidz. ³ Lo gox co, ga briece tiblo metso bliaal, bioogse ma gdipse lo guidzliu, grēse ma zob xcots ma, zig zob xcots meegu. ⁴ Nacle diidz, peet guṇd ma grē guizh nguia, grē yag ne zēeb lo guidzliu, sinque laa ma tsie tsiesacsi ma grēse miech ne quiad xbey Dios quia. ⁵ Yoobdox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csacsi ma zho dipse len ga mēē. ⁶ Len dze co, haxta zhal miech yguib zho dien zha guet zho, per grieeelod guet zho; soobladznē zho, tebaa zha gdziṇ guielgut lo zho, per lej sozita.

⁷ Masaque rac grē metso co zig rac grē guay ne tsienie zho lo diḷ. Rac lo ma zig rac lo miech, ni zob tib ncuaan co guic ma, rluw zig rlu tib coron or; ⁸ zēeb guitsguic ma zig zēeb guitsguic men wnaa, ni zēeb lay ma zig zēeb lay grē meedz. ⁹ Dipse lad ma ntse tib ncuaan co, rluw zig rlu guib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo diḷ.

¹⁰ Lēēdaa meegu, sca zob xcots grē metso co lo xcol ma, miṇe yquiaaxcots ma miech dipse len gaay mēē co. ¹¹ Lēē grē metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiisē ne: Zha ne rnitlo.)

¹² Lēē tib guielnē ne gaṇ miech ga, per bii ziaad schopa.

¹³ Gon naa zeene laa anjl ne nac zho xoop ga pcuedz xquiib, hor co bin naa zēeb tsi tib men co lo mezh or ne nac lo pcoog ne zo lo Dios ga. ¹⁴ Zēeb tsi men co rnee me lo anjl ne blozh pcuedz xquiib ga:

—Güey, güeyxadz gza tap anjl dox ne quiadoo ro guibee nroob ne nac guibee Eufates.

¹⁵ Ible bzole gza tap anjl dox co par gun ma guielqui zeene laa dze co, laa hor co gdzin; dzigo nac ne hor co laa ma blaa, parne tsiegut ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo ma. ¹⁶ Bin naa chop gayoo millon zhaguiib ne gacnie ma, niapse guay sob grē zhaguiib co; masaque ma gnabey lo zho.

¹⁷ Gonpaa naa zha rlu grē zhaguiib co zob zho lad grē guay co. Grēse zho quiantse tib lē guuib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grē guay co, niaa guic ma zig niaa guic meedz, masaque rriee bel, rriee gox, rriee zufr ro ma; ¹⁸ lo gza ncuaan ne sca rriee ro ma, min co beet lalga miech co.

¹⁹ Lala rap grē guay co xquielntseeb ma ga nēz ro ma, ni rapaque maw nēz lo xcol ma; masaque nac xcol ma zig nac grē meel dox, rias xcol ma rquiaa maw lad miech.

²⁰ Niicle scataa nzian miech ne gut, zha ne biaan ib bdziebd zho. Tibaque laa zho no ziegan zho mendox, ziegan zho grē zhimdio zho, mdio ne niaa guuib or, mdio ne niaa guuib plat, mdio ne niaa guuib brons, mdio ne niaa quie, mdio ne niaagaa yag; ncuaaane randa, ncuaaane ronda, ncuaaane rzēda, per laa zho no tibaque ziegan zhow. ²¹ Laa zho no quiyut zho samiech zho, quianab zho pe sac samiech zho, quiangob zho zha ne led tsiield zho, tibaque quiaban zho, ini palal zienied guic zho csaan zho grē guielntseeb co gbig zho lo Dios!

10

Anjl ne nzhen tib libr win

¹ Blozh ga, gon naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rriee lo me, lēēdaa lo ngbidz; scasaque ni me, masaque riaazbela. ² Nzhen me tib libr win, nzhialse lo libr co.

Bdzin me lo guidzliu, bzo me ni derech me lo nisdoo, laa min revés bzo me lo guidzliu. ³ Ga zo me pquiaa me tib redz nroob, lēēdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiaab lo redz ne pquiaa me ga.

⁴ Laa naa zale yquia naa mine bnee gza nguzi co, tibaque bin naa tsi tib men co gbaa, nē me lo naa:

—iCoo, yquiaad luu mine bnee gza nguzi qui! Sac nodne gacnan miecha.

⁵ Dzigo gon naa blis anjl co nia derech me nēz gbaa, ⁶ bzeet me Dios (men ne gdzind dze guet, men ne bzaa gbaa, bzaa guidzliu, bzaa nisdoo, ni grētaa ncuaaane no low), rēb me:

—Dios zobwi ganle, nasi gon laa dze co bdzin. ⁷ Grēse mine bnee me lo zha ne biadteed xtiidz me, laaw gac niina zeene laa stib anjl qui ycuudz xquuib zho. Grēse mine no guic me gun me ni gocnand miecha, niina laa zho gāna.

⁸ Dzigo wbiire bnee men ne zēeb tsi gbaa ga, nē me lo naa:

—Gūey, bnaaz libr win ne nzhen anjl ne squi zo i.

⁹ Nacne bia naa lo anjl co, rep naa lo me gneedz me libr win co, dzigo nēchaa me lo naa:

—Ledaaw nu, per lēēraasi none gow luuw. Zeene laa luu noyowa, nex sac luuw; per zeene gdzina zdoo luu, laaw gacnla.

¹⁰ Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdzin zdoo naa, beennēw. ¹¹ Blozh ga, nēchaa men ne bin naa tsi glo ga:

—Naraa gon none gnee luu ganle zha nac ncuaaane ted grēraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11

¹ Dzigo biaad tib meñ co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegāñ zho Dios. Pso me diidz lo naa, nē me:

² —Lēēraasi ctiixd luu nēz ley, sac laa lugar co nole lадznia zha zit; zha gnabeya, zha gnabey guiedz ndzon ne nacchen Dios i; dipse leñ tson iz grol ne ziaad nu, guñ zhow zigne gacladztaa zho. ³ Gane leñ dze riique laa naa cxel chop zha ne runbeypaa cho nac naa, tib lar beelze gacw zho, zig racwxab zha ne no guielnē; dipse leñ tson iz grol co gnee zho ganle pe nac grē ncuaañe ziaadyob gan miech.

⁴ Lēē zha co nac grop zhan yag oliv ni grop biini ne raquietle lo Xtiaidz Dios ga zo lo Dios (meñ ne nac bizhuan guidzliu). ⁵ Zeene laa grop zha co bdziñ, choot brielod lega nsacsi zho, sac grēse zha ne wbig gocntseeb lo zho, tib bieese zha co lo bel ne brieer ro zho. ⁶ Bdeed Dios poder lo zho ycuēēz zho nisguie, zrieelo gnabey zho guiabda dipse leñ dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladztaa zho, zrieelo ndalraa grē guielzi ne gnabey zho gan miech.

⁷ Zeene bzase dze ne bnee zho lo miech ga, hor co laa tib madzabdoob brieer leñ guierdoo co; ntseeb rac ma lo zho. Mbe blēbd zho lo ma, beet ma zho. ⁸⁻⁹ Tson ngbidz grol goot xcuerp zho grol leñ guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech meñ ne rnabey zho lo cruz. Ib bdeete miech diidz nguetsi zho, grēse miech ne no dib lo guidzliu gon sca nix zho ga; ¹⁰ dipse lo guidzliu, masaque tib guielbleydoob ne bio miech gza dze co, gon zho laa grop zha co gut, sac nroob benneed zho miech. Lo guielbley co, haxta bioxco miech pe ncuaañe bgadlsa zho lo samiech zho.

¹¹ Zeene blozh tson ngbidz grol co, tibaque zeene laa zhiEspiritu Dios bdeed guielmban lo grop zha co stib, laa zho guche ga; grēse miech ne ndxie lo guidzliu, zeene gon zhow, per nli bdzieb zho, rdzieldraa zho zha guñ zho.

¹² Horco nguiedz zēēb tib tsi meñ co gbaa, bredz me grop zha co. Gonlo grē miech ne rlēē ran zho ga, masaque no zho tib lo xcow, laa zho bzoquia gbaa;

¹³ loxaque laa zho bzoquia gbaa, zeene laa tib zhodox bni. Gzoob ne telne nlē guiedz ro co tsi tant, tib tanta bnitlo lo zho co; gut gadz mil miech. Grēraa zha ne biaan, mazdraa bdzieb zho, lo dzeb co laa zho psilo roolnie zho Dios.

¹⁴ Sca gan miech stib guielnē co. Lēē bropa ga, per znusaque guiaad stiba.

¹⁵ Sac loxaque blozh ga, zeene gon naa laa stib anjl ne nac zho gadz ga, pcuedzlaque xquiib; hor co nzian tsi meñ co zēēb gbaa, nguiedz rnee me:

Nasi nagon,

laa Dios gnabey grēse guiedz ne ndxie lo guidzliu, grop me Meñ ne pxeel me ga.

Mele gnabeya, grēta leñ izdoo ne ziaad.

¹⁶ Psiloque gza galptap mengol ne zob lo xcan ne zo lo Dios ga, pquitsgzhib zho lo me, haxta bzooblo zho lo liu, rdeed zho xquizh lo me, ¹⁷ rnee zho:

Xquizh xquielnzaa luu,

sac nasi laa luu glu meñ nroob nac luu, laa luu csilo gnabey.

Luutaque nac meñ ne mazdraa nroob.

¹⁸ Grēse guiedz, brieequia zha ne gocntseeb lo luu;

per nasi laa dze bdziñ, laa luu glugaa xquielblēē luu lo zho.

Grēse zha ne gutle,

niina laa luu gdeed miñe rieguial zho tib tib zho.

Grē zha ne been xtsiin luu, pteed zho xtiidz luu lo miech,

grë zha ne ngab lo luu, zha ne runnon lë luu,
zigtaa zha gola, zigtagaa zha wina, niina laa luu gdeed zhipremio zho;
zha ne na loxaquegaa guieIntseeb been,
niinataa laa luu gnitlo zho.

¹⁹Loxaque blozh sca bnee gza mengol co, zeene laa yadoo ne no Dios gbaa
bzhial, nieenpaa guin ne notsow quie lag ne pquia diidz ne psan me lo miech.
Horco psilo bliaal tib guiequiedox, loxaque nëzrii nëzrec riab belye, ni rio bi
ratsie nguzi; guiequiedox co nolial, zeene laa tib zhodox bnique.

12

¹Horco gon naa blu tib ncuaane gzee zdoo ne zhan gbaa. Ga brieequia tib
wnaa, masaque igose me riab tib biini, zig riab xbiini ngbidz, ni zob tib coron
guic me, quia tsiipchop mel cho coron co; ngali ni me zob mëë. ²Rlupaa
zoney me mëëd, rquiaadan me redz, laa me rquiale yoob ne gap me xpëëd
me.

³Tibaque brieequia tib ma ngol, dipse ma rna nizhnie, niaa ma zigne niaa
ngutsiets; zob gadz guic ma, ni tsi zhoz ma, tibga coron zob tib tib guic ma.

⁴Znuse bzieecw ma xcol ma, blaal ma palal mel gbaa lo guidzliu; gzoob ne
nlël mel tson tant, masaque tib tant mel co blaal ma. Wbig ma lo wnaa co,
quiambëz ma gal xpëëd me, parne gow ma win.

⁵Per zigne gal mëëd co, znuse bdziñ win nëz lo Dios, zaatne zob me rnabey
me; tib mëëdbguiw, nacle diidz tib men ndip xtiidz gac win, win gac men ne
gnabey grëse guiedz ne ndxie lo guidzliu. ⁶Horcogazhaquew bzhoon wnaa
co ga, laa me zie tib dan zit, zaatne psanle Dios diidz gan zho me dipse len
tson iz grol.

⁷Nacne bio tib dil gbaa. Psilo anjl Miguel, grë me grëraa anjl ne nacie me,
bdilnie me ma ngol co grë ma xanjl dox ma; ⁸per blëbd ma, benxoon zho ma
gbaa. ⁹Lëë ma ngol co ga nac meel dox ne notaque padzeela, lëë mendox ga,
lëë Satanás ga, ma ne scataa tibaque noquidie miech; hor co laa zho bzonëz
ma nëz lo guidzliu, grë xanjl dox ma.

¹⁰Dzigo bin naa, nguiedz zëëb tib tsi men co gbaa, rnee me:
¡Lëëw nagon!

¡Nasi laa dze ne ycaaniapaa Dios zha ne ngab lo me, laa dze co bdziñ!

Nasi laa me blu poder ne rap me,

nasi laa Men ne pxeel me lo guidzliu ga gnabey lo grëse zha ne ngab lo me.

¡Laa me benxoonle mendox!

Ma ne scataa dze guieel nolisqui dien pe run zho,

nac zho zha ne nacgrë ne.

¹¹Peet brieelod ma niun ma zho,

sac niapse men ne nac Carner yeen ne gut lo cruz ga bnalo zho;

ni lalnu ib bdziebd zho, bnee zho lo miech cho nac me,

bleeladz zho xquielmban zho, no zho haxta beet miech zho.

¹²¡Gacxe waa tib guiebley nroob ne rac gbaa niina!

¡Grëse to ne nac to zha ne no gbaa, golley!

¡Per probsaxe grë zha ne no lo guidzliu, sac laa mendox co tsiesacsi zho!

Ntseeb rac ma laa ma zie nëz co,

rien ma riaanndraa nroob dze ne sonlaa ma.

¹³Zeene gon ma sca bzonëz zho ma lo guidzliu, dzigo ptsidil ma wnaa ne
gop mëëdbgui co. ¹⁴Nacne bzoob zho chop xiil me, lëëdaa xiil msidoo; par
grieelo xoon me lo ma, guey me dan zit ne nole diidz gan zho me dipse len
tson iz grol co. ¹⁵Gocladz ma niloow ma me, blee ma tib nis naal ro ma, pale

tib guiubee ro, ¹⁶ per psaaand guidzliu me, znuse bzhial low psi grëse nis naal co.

¹⁷ Horco mazdraa blëënie ma me, psilo ma noguib ma zha csacsi ma grëraa zha ne ziaad lo xtii me. Lëë grë zha co zienal minë rnabey Dios, ni rdziebd zho rlu zho xnëz Jesús no zho. ¹⁸ Nacne güey ma, bzo ma ro nisdoo.

13

Brieequia chop ma ntseeb

¹ Tibaque zeene gon naa laa tib ma nroob brieequia lo nisdoo co, ntseeb niaa ma. Ncuaañe gdzieb ne rlu ma, gadzraa guic ma zob ni zob tsii zhoz ma; tibga coron zob tib tib zhoz ma. Gzase guic ma quia diidznë ne rneenë ma Dios. ² Rna ma zig rna grë meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaan ma xlugar ma co, male gnabey.

³ No tib guic ma no tib mdel nroob, rlu mer niet ma zeene sca goc guic co ma. Min co gon miech, grëse zho psilo zho rleynie zho ma, minë rnabeytaa ma zho, run zhow. ⁴ Horco grëse zho rleynie zho ma nizhnie co, rquiitsgzhib zho lo ma, rdeed zho xquizh lo ma bzo ma ma ntseeb co; scasaque rquiitsgzhib zho lo ma ntseeb co, rnee zho:

—¡Tsodraa stib zha zig luu! ¿Cho dien grieeo tilnie luu?

⁵ Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse len tson iz grol.

⁶ Nacne psilo ma rneenë ma Dios, rdzibdee ma me, rdzibdee ma grë zha no gbaa ne. ⁷ Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu. ⁸ Laa grëraa miech, güey zho güeygan zho ma, lëë grë zha co quiad lë lo xlibr men ne nac Carner yeen ne gut ga. Haxta zeene baa guidzliu no libr co, lo co quia lë grëse zha ne yгаа guielmban ne gdziñdze lozh.

⁹ Lo grë to ne nac to zha ne rnalo Dios, zha ne no liaadz minë none naa nu, golquiaadiag minë gne naa nu ganle: ¹⁰ Zha ne gnaaz to co zho to ladzguuib, yeque zho zio zho ladzguuib; zha ne csacsigaa to, tel zha gut zho to, scaque gut miech zho. Gacmbande to sca, sac gon ga glu to nli rnalo to Dios, nli zlëb to tel pe nactaa guielnë ne gan to.

¹¹ Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuaañe gdzieb ne zeene laa ma roptsie. ¹² Ye ma rap ma poder, squi zo ma ne no mdel nroob co guic rnabey ma tel zha raclad ma; bnabey ma yquiitsgzhib grëse miech lo ma co. ¹³ Ncuaañe gzee zdoo miech run ma, haxta brieelo bnabey ma biet gui gbaa bliaala lo guidzliu. ¹⁴ Ne scataa grë ncuaan ro ne rrieelo ma run ma, pquidie ma miech, bnabey ma zho bzaa zho tib mdio zig niada ma ne bdedlaa lo guielgut ga, ma ne scataa nat guic ga bga.

¹⁵ Blozh ga, bdeed ma xquielmban mdio co, parne grieeo gneew. Bnabey ma guet grëse zha ne soliaadz yquiitsgzhib low, ¹⁶ ni bnabey ma grëse miech güey zho tib bey, yase yquiw nia derech zho, yquiaagaaw quia zho; grëse zho zigtaa zha gola, zigtagaa zha lasa, zigtaa zha ne rapchena, zigtagaa zha ne peet rapda, zigtaa zha ne run xtsiin beña, zigtagaa zha ne choot rnabeyda. ¹⁷ Zha ne tsod bey co, grieelod gon zho wzi niicle grieelodгаа cto zho; sac bey co rlu cho nac zha ne ngab lo ma, lëë lë ma ga, lëë número co rlu zha lë ma. ¹⁸ Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

14

Biil tib gayoo chooptap mil zho

¹ Tibaque zeene gon naa laa men ne nac Xcarner yeen Dios ga zo guic Gui Sión, miech guizhiu ne zonie me ga; lëë grë zha co nac tib gayoo chooptap mil zha ne quia lë me guic ga, grop me PxoZ me. ² Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grë nguzidox, ni bin naa ndal tsi zha co zëëb noyool zho tib cant, rlu niapse arp noyoolnie zho cant co. ³ Tib cant cuba, laa zho noyoolä lo men ne zob lo xcan ro co, zaatne zo gza tap bult mban co, zaatne zob grë mengol co. Loxaque tib gayoo chooptap mil zha ne pcuee lad grë miech guidzliu ga, zha cose brieelo pquiab lo cant co. ⁴ Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne ziaetaa me. Masaque nac zho lo Dios, ni lo men ne nac Carner co, zig tib nex ne glopaa riet riogon lo me. ⁵ Biod dze ne nquidie zho, mbe zdoo zho, mbe lo zho nëz lo me.

⁶ Horco brieequia tib anj l nosiibe zhan gbaa, ney me Diidz Ndzon ne rdeed gielmban, diidz ne gdzind dze nitlo ga; laa me ziaad par gnee mew lo grëse miech ne ndxie dipse lo guidzliu. ⁷ Nguiedz zëëb tsi me, rnee me:

—¡Golguien golgon mine rnabey Dios, ine golleynie me, sac gon laa dze ne gun me guielwxtis bdzinle! Ine golquitsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grëse zaatne rlan nis.

⁸ Zhits anj co nal stib anj l, nguiedz rnee me:

—¡Nasi laa guiedz Babiloin nitlo! ¡Guedz nroob ne scataa pquiil grëraa guiedz, been grë menguiedz co ncuaan ndzab ne beena, pxina guic zho!

⁹ Zhiits co nalaque stib anj l, scaque nguiedz zëëb tsi me, rnee me:

—¡Grëse zha ne yquitsgzhib lo ma ntseeb ne brieequia lo nisdoo ga, yquitsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho, ¹⁰ ib tedsod ye zho yгаа lo grëtaa guielnëdox ne csiaab Dios! Squi zobwi grë xanj l me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quiazabel tiblo ncuaane rtsuu lë zufr. ¹¹ Dze guieel cso laan ne tsec guidox co, ni palal gapd zho descans ga; sac sca pquitsgzhib zho lo ma ntseeb co, pquitsgzhib zho lo mdio ne niaa zig niaa ma ga, ni pquia zho xbey ma. ¹² ¡Ga naganle gan grë zha ne ngab lo Dios, zha ne mban zigne rnabey me, zha ne tiblque zienal zhiwseed Jesús, zeena gacmband zho niicle tel pe nactaa grë guielnë ne noyan zho!

¹³ Dzigo bin naa zëëb tib tsi men co gbaa, në me:

—Pquiaa mine gni naa nu.

Nëchaa me:

—Dichos grëse zha ne rnalo Jesús, niicle niinaga guet zho.

Pquiabaque Espíritu Sant, rnee me:

—Nligaa dichos zho, sac grë guielnë ne bded zho, nataa laaw blozh; nasi laa zho yгаа guielnzaac nroob ne gdeed Dios lo zho, porne wban zho zigne rnabey me.

¹⁴ Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

¹⁵ Dzigo brieet tib anj l yadoo ro ne zob gbaa, nguiedz bnee me rëb me lo men ne zob lo xcow co:

—¡Niinaga blooyaguiits grë zhob ne squitaa zëëb lo guidzliu! ¡Sac gon gollew, laa dze ne tsasa bdzinle!

16 Dzigo pteed meṇ co yaguiits dipse lo guidzliu, ptop me grēse zhub co.

17 Blozh ga, brieē stib anjl leṇ yadoo ro co nzheṇ me tib guiiḅ hoz, rlupaa per nli ndox low.

18 Loxaque brieē anjl co, laa anjl ne quianap gui ne ndziib lo pcoog brieēque; nguiedz bnee me rēb me lo anjl ne nzheṇ hoz ga:

—iNiinaga pchug grēse mzhiiḡ uv ne squitaa zēēb lo guidzliu, sac goṇ laaw gule!

19-20 Horco znuse pteed anjl co hoz lo guidzliu, pchug me grēse mzhiiḡ uv co, güeycodzēē mew tib leṇ pil nroob ne zob tib lad ro guiedz. Ga güeyzēēni zho grē uv co, ptaadz zhow; dzigo ren naaldox ne brieē zhan pil co, masaque lal ne rzēni miech xoop ngbidz, lal ga wbiig lo ren co igo pil co; teḷ niaca miṇe sēēb tib guay low, dzđina haxta zhan cho ro ma. Rrieēquia sca nagon gac miṇe gnabey Dios ted grē zha ntseeb.

15

1 Tibaque zeēne goṇ naa, ncuaaṇe ro, ncuaaṇe gzee zdoo ne goc gbaa. Brieēquia gadz anjl, tib tib anjl co tibga guielṇē guiaadnie me ted grē miech ne ndxie lo guidzliu; guielṇē co lozh cueezhian Dios miech.

2 Dzigo gax lo naa goṇ naa tib dzoon miech, masaque rquiabni, masaque rna gui zaatne zo zho, nēzrii nēzrec rac lo co, pale lo nisdo. Lēē grē zha co beēṇ gan, pquitsgzhibd zho lo ma ntseeb co, pquitsgzhibd zho lo zhimdio ma, niicle biodgaa zho xbey ma. Grēse zho tibga xarp Dios nzheṇ zho, 3 quaiyool zho zig biil grē zha ne psilaa Moisés Egipt. Rley zho, sac niina laa Xcarner yeēṇ Dios psilaa zho lo ma ntseeb co; rnee zho:

Dios, luu ne nac luu meṇ ne grēsew rrieelo ruṇ, ncuaaṇe nroob, ncuaaṇe gzee zdoo miech, nac grē ncuaaṇe ruṇ luu.

Luu nac meṇ ne rnabey, lo grēse zha ne ngab lo luu, niapse diidzli rnee luu, niapse miṇe nonguiel rnabey luu.

4 ¿Zha rna zha ne diēṇ gdzieebd luu?

¿Zha rna zha ne gleyd goolnie luu?

Sac luuse nac meṇ mbe zdoo, meṇ ne ni tib doḷ rapd.

Grēse guiedz ne ndxie lo guidzliu, zrieē miech guiaad zho yquitsgzhib zho lo luu; sac nasi laa luu blu zha ruṇ luu guielṇēwxtis.

Gadz anjl ne pxeel guielṇē lo guidzliu

5 Horco goṇ naa bzhal zaatne nac Lugar Nda leṇ xyadoo Dios gbaa, 6 ga brieē gza gadz anjl ne guiaadnie guielṇē ne no guiaad lo guidzliu ga. Ine nquitsbie rna xab gza anjl co, haxta rzēēg lada, ndxiega tib cinch or haxta ncaan leṇ zhiw me.

7 Dzigo wbig tib bult mban co, bdeeda tibga cop nroob niaa niapse guiiḅ or lo tib tib anjl co; leṇ cop co ga nodzē grēse guielṇē ne nac xquielḅlēē Dios, meṇ ne gdziṇd dze guet. 8 Horco grēse xquielḅndzon Dios, grēse poder ne rap me, biodzē leṇ yadoo co, rluw zig rlu tib gox; choot brieēlodraa nzēēb leṇ yadoo co, haxta blozh goṇ miech gza gadz guielṇē ne güeynie gza anjl co.

16

1 Dzigo bin naa nguiedz zēēb tib tsi meṇ co leṇ yadoo ro co, bnee me lo gza gadz anjl co, rēb me:

—Goḷtsie, goḷtsie xiee gza guielṇē ne nac xian Dios i lo guidzliu.

² Dzigo brieë tib anjl co, güey me, güeylaat me xcop me lo guidzliu, hor co grëse zha ne noquitsgzhìb lo zhimdìo ma ntseeb co, zha ne quia xbey ma ga, psilo bial dipse lad zo, yoobdox ne rquia zho.

³ Güeyaqué stib anjl co, bdziñ me blaas me xcop me lo nisdoo, zeene laa ncuaañ co bzhiee lo nisdoo, grëse nis co bialo ren ctoo; ni stib ma ne no low biaanndraa.

⁴ Laa miñ co bded, zeene laa stib anjl ne rac zho bion ga güey, güeylaat me xcop me grëse guiubee, grëse zaatne rda nis; nacne grëse nis co bialo ren.

⁵ Dzigo bin naa tsi anjl ne rnabey nis, rëb me lo Dios:

—Dios, ible rieguial miñe been luu i; luu ne nac luu men mbe ne ni tib dol rapd, men ne tibaque nac, men ne gdzind dze gdzëë. Lëëw i been luu, squi beenquizh luu grë miech qui miñe zëëb zho, ⁶ sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxiee zho xchen grë zha co. Miñ qui rquiin zho, guie zho grë ren qui na.

⁷ Zëëbaque tsi stib men co zaatne nac lo pcoog len yadoo co, rnee me:

—iDios, luu ne nac luu men ne nroob ne grësew rrieelo run, nligaa ible rieguiala squi beenquizh luu grë zha qui miñe been zho!

⁸ Blozh ga, brieë stib anjl ne rac zho tap ga, güey me güeylaat me xcop me lo ngbidz, hor co gocnlëëraa xbiini ngbidz, ptsuuw miech. ⁹ Niicle scale nodzu grë miech co, per ib biablod zho, laa ne nsaan zho xquieñtseeb zho, nleynie zho Dios, leñ psilo zho rneenë zho me, pe nacne noxeeñ me grë guieñe co.

¹⁰ Zeene brieë stib anjl co, güey me güeylaat me xcop me zaatne zobnabey ma ntseeb ne brieëquia lo nisdoo ga, dzigo znuse goc tib ncowdoo grëse guiedz ne rnabey ma. Lo yoobdox ne rquia grë miech co, haxta rowye zho ludz zho; ¹¹ per niicle scaw, ib psaand zho xquieñtseeb zho, leñ psilo zho rneenë zho Dios, pe nacne scataa rquia zho yoob, pe nacne scataa quiayaal gdib lad zho.

¹² Zeene laa anjl ne rac zho xoop ga güey, güeylaat me xcop me len guiubee Eufrates, hor cogazh wbidz nis naal ne zhoob guiubee ro co. Nacne bio nëz ted grë men ne zobnabey grë guiedz ne ndxie nëz ne rlan ngbidz.

¹³ Horco gon naa tson me yozh, niaaw zig niaa mbiich, tiba brieë ro ma ngol nizhnie co, tiba brieë ro ma ntseeb ne brieëquia lo nisdoo ga, laa stiba brieë ro zha ne noteed xtiidz ma ntseeb co. ¹⁴ Chen mendox nac gza me co, runa grë ncuaañe nroob ne rzee zdoo miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac Dios, gal dze ro ne gdeed me miñe rieguial tib tib miech.

¹⁵ Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golso, sac zigne racnand bizhuan yu pa hor sëëb ngbaan yu, scaque gacnande to pa horpaa guial naa. Dichos zha ne yquiambëz naa, ine mbe xab zho nacw zhow; sac gon mban tsie zho telne scase zo zho zeene laa naa glanso, ni lala tib guieñtodox ga grieëquia zho.

¹⁶ Dzigo pcaalsa grë zha rnabey co grë xmenñuuii zho, zaatne rnee zha Israel Armagedón.

¹⁷ Horco güey anjl ne nac zho gadz ga güeylaat me xcop me lo me ne rrieë lo guidzliu; dzigo bnee tib men co zaatne nac lo zhixcan Dios len yadoo gbaa ga, nguiedz zëëb tsi me rnee me:

—iNasi nagon ledaaw blozh bza!

¹⁸ Dzigo psilo nëzrii nëzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; wlaata ne ndxie miech lo guidzliu, gard gni tib zhodox zig miñ co. ¹⁹ Grë guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta

tson lë goca. Horco beenquizh Dios zha Babiloin, grëtaa guieIntseeb ne zëëb zho; psiaabzi me zho por grëtaa zhian ne pquiaa zho me. ²⁰ Grëse guidzliu win ne no lo nisdoo, rludraa dien yow; grë gui glaa, loxaque nëzrii nëzrec bliaa. ²¹ Min co blozh, zeene psilo bliaa tib guiequiedox lad grë miech co, tib tib guiequie co nëw maase choo kil. Goñ zho scataa noyab guiequie co, laa zho noque rdzibdee zho Dios.

17

Zob tib wnaa yozh lad tib ma ntseeb

¹ Lo gza gadz anjl ne sca blaas grë guieInë co lo guidzliu, lad co brieet tib me biaad, në me lo naa:

—Dë ganle, zeena glu naa lo luu zha nactaa caxtigw ne ygaa wnaa yozh ne ran luu squi zob lo grëse nis ne no lo guidzliu. ² Lëë wnaa qui pxin guic grëse miech ne no lo guidzliu güeynal zho grëtaa guieIyozh ne been me; haxta grë zha rnabay, güeynal min co.

³ Sca nolu Espiritu Sant grë ncuuan co lo naa, dzigo güeynie anjl co naa tib dan zit. Ga goñ naa laa wnaa co zoble lad tib ma ntseeb, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia grë diidz ntseeb ne rneenë ma Dios.

⁴ Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grë guib or, grë quie rbebni, grë quie perl, ngalgiee lad lar co. No tib cop nroob niaa me, niaaw niapse guib or, rriequia leen co nodzë grëtaa guieIntseeb, grëtaa guieIyozh ne run me. ⁵ Ni quia bla lan diidz quia me, rneew: “Lëë guiedz nroob ne nac Babiloin nu, guiedz ne nac xniaa grëse wnaa yozh, guiedz ne nac xniaa grëse zha ne run ncuane mbixladz.” Lëë lë me ga, hor coraa bzhoobnen zha nac lë me. ⁶ Dze rwi naa lo me, dzigo goñ naa rac me zig rac zha ne rzudz. Nziandox zha ne no xnëz Jesús beet me, rriequia grëtaa ren ne pxiee me ga sca noyun me. Bzee zdoo naa, ni bdzieeb naa goñ naa zha rac wnaa co. ⁷ Dzigo nëchaa anjl co lo naa:

—¿Pe nacne rdzieeb luu? Na ganle gni naa lo luu cho nac wnaa co, cho nac ma ne sca zob me lad ga. ⁸ Padzeela no ma ntseeb co, guieInd ma niinapaa, per zhile laa ma griee len guierdoo ne niioogyu ma, laa ma griee ga parne diunavez nitlo ma; grë zha ne quiad lë lo libr ne zhoobnee cho nac zha ne ygaa guieImban ga, seedox zdoo zho zeene gan zho laa ma grieequia stib, sac tibaque nan zho gutle ma. ⁹ Wen wen pquiaadiaga ganle: gza gadz guic ma ga, rriequia lëëw nac gza gadz gui win ne zob wnaa co zobnabay me. ¹⁰ Ni rriequiaque lëë gadz zha ne rnabay ga: gaay zho bnabeyle, tib zho quianabey niina, laa stib zho naraa gnabay; per zeene laa zha co guiaad, zhits dze ne gnabay zho. ¹¹ Lozhse gnabay zha co, laa ma gnabeyaque, ma gac zha rnabay co xon, niicle ne yelee ma ga goc zha co gadz; gataa laa ma nitlo.

¹² Zhoz ma, rriequia lëë stii zha ne gnabay ga, gzase zha co naraa gnabay zho, tipse ycaania zho guieInabay gza zho ma. Zhisaque dze sca gnabay zho, ¹³ dzigo laa gza tsii zha co guiaan diidz gzo zho ma, ma gac zha nroob lo zho. ¹⁴ Zacnie zho ma, grëse zho tsie tsietilnie zho Xcarner yeen Dios, per znuse gun men ne nac Carner yeen co gan lo zho; sac me nac men ne rnabay lo grëse zha ne rnabay, lo grëse zha ne non. Grëse zha ne tsienal zhits me, tsietilnie zho ma co, lëë grë zha co nac zha ne bzooblo Dios bredz me zho bgab zho xnëz me, ni ib psaad zho me.

¹⁵ Blozh ga, nëchaa anjl co lo naa:

—Lo grëtaa nis ne gon luu sca zob wnaa yozh co, rriequia lëe nis co nac grëse guiedz, grëse dii miech ne ndxie lo guidzliu. ¹⁶ Per zdziñ dze lëeque ma ntseeb co, tlnie wnaa co, grë ma gza tsii zha ne rriequia nac zhoz ma ga; zlëenedox zho wnaa co, sanwin zho me, haxta xab me cuee zho, znitlo zho me, sëëg zho me lo gui. ¹⁷ Ib Dios csaab guic zho gnitlo zho wnaa co, ni meque csaab guic zho gzo zho ma co gac ma zha ne gnabey lo zho; laa me gun min co, parne griequia grëse mine bneelee me no gac. ¹⁸ Laa wnaa co, rriequia me nac guiedz ro ne rnabey lo grëse guiedz ne ndxie lo guidzliu.

18

¹ Blozh ga, gon naa laa stib anjl ziad-zëeb gbaa, rlu tib anjl nona, dipse lo guidzliu biab biinidoo ne ziaadnie me, ² nguiedz zëeb tsi me rnee me:

—¡Nasi laa guiedz nroob ne nac Babiloin ga nitlo! ¡Loxaque mendox yquianzë ga, loxaque grë ma guix, loxaque grë ma mbixladz cuew! ³ Laaw nitlo, sac noquiila grëse miech ne ndxie lo guidzliu, grëse zha ne rnabey, quiayun zho grëtaa guielyozh ne runa. Lo grëtaa guielyozh co quiayun ricwa grëse zha ne run wto; quiaxin grë ncuuan co zho, masaque quiayuna zho zig run nziu.

⁴ Dzigo zëeb stib tsi men co gbaa, rnee me:

—¡Grëse to ne nac to miech ne ngab xnëz naa, golgon diidz, go!ree guiedz qui! Ib gunde to dol ne quiayuna; zeena ygaade to grëtaa guielnë ne ygaaw, ⁵ sac nroobdox nac grë dol ne quiayuna, telne niaca ncuane cue monton, rriequia haxta gbaale rdziñ guic monton co; gane ib tedsod zunquizh Diosa grëtaa guielntseeb co.

⁶ Gacxe na grëse mine beena miech, mincoque saca. Grëse tel zha psacsiw miech, chop lalga mine teda. ⁷ Zigne squitaa now lo grëtaa ncuane racladza; scagaa na guielnedox ne gana, haxta goona lo grëtaa guielnë co. Niats raca rneew: “Naa rnabey. Nacd naa cho zha ne zotib, zig rzac grë wnaa viud; naasi gdziñd dze ne tso naa guielnë.”

⁸ Nli squitaa niats raca, per zeene guiaba lадznia guielgut, lадznia gbin, lадznia grëraa guielnë ne gana, tib dzeque lozha. Ni lozh ga, haxta zeca lo gui; min co gnabey Dios teda. ¡Me nac men ro ne gunquizha grëtaa mine beena! ⁹ Grë zha ne rnabey grë guiedz, zha ne scataa bley been grë guielyozh ne runa; zeene gan zho goxdoo ne rso noyeca, mban gac zho, zoon zho zio zho xquielnëw. ¹⁰ Dzdieb zho gan zho grëtaa guielnë ne nodeda ga, lo dzeb co, ni lalnu gbigd zho. Lëe gdib so zho goptsie zho, guiab zho: “¡Probsaxe luu Babiloin, guiedz nroob, guiedz non nac luu! ¡Pa brieë guielnë qui squi znuse nitlo luu!”

¹¹ Grë zha ne run wto dipse lo guidzliu, ye zho zio zho xquielnëw, mban gac zho guienndraa cho si lo zho. ¹² Sac masaque lëew rzi:

guiib or,
guiib plat,
grë quie non,
grë perl,
grë lar niazh,
grë lar sed,
grë lar nizhnie nlaan,
grë yag ne nex rlaa,
grë ncuane niaa marfil,
grë ncuane niaa grë yag wen,
grë ncuane niaa guiib,
grë ncuane niaa brons,

grë ncuaañe niaa quie mármol,
¹³grë blad canel,
 grë guizh scuaan,
 grë yaal ne ndzon rlaa,
 grë guizh, grë nceit ne nex rlaa,
 grë nziu,
 grë nceit,
 grë zhobxtil,
 grë rin niazh,
 grë ma ne rey yo,
 grë mēcwxiiil,
 grë carret,
 haxta grë miech ne runzhoo dziin lo samiech.

¹⁴ Zrieequia zha ne guiab lo guiedz co: “¡Bdzinaque dze ne blozh luu, pa sēraa scataa yquianie luu grë ncuaañe rdziladz luu! ¡Grētaa ncuaañ niazh, grētaa ncuaañe rap luu, gdzindraa dze ne gbiire gañ luuw!”

¹⁵ Grē zha ne run wto ga, zha ne scataa gocricw lo grē wto ne beñ zho guiedz co, zdzieb zho, zit so zho gañ zho grētaa guielñe ne nodeda. Zio zho xquielñew, haxta zoon zho ¹⁶⁻¹⁷ guiab zho: “¡Probsaxe guiedz ro qui, squi znuse bnitlow! Biopaa dze gocnona, masaque goca zig tib wnaa ne racw grē lar niazh, grē lar nizhnie nlaan; wnaa ne rna grē guib or, grē quie non, grē quie perl, rio yañ, rio yañ nia.”

Grē zha ne rnabey barcw, grē zha ne rsēew, zha ne no lena, ni grēragaa zha ne run dziin lo nisdoo, zit so zho gañ zho tsec guiedz co; ¹⁸ zeene gañ zho goxdoo ne rso noyeca, ziab zho: “¿Zha rnaraa dze ne dziañ ne stib guiedz nroob zig guiedz qui?” ¹⁹ Mban gac zho, zio zho xquielñew, zoon zho, squiaadan zho redz, guiab zho: “¡Probsaxe guiedz ro qui squi znuse bnitlow! Lo grētaa dimi ne pquianiew, blactaa beenricwa ne grē ne grēraa zha ne run dziin rii.”

²⁰ Sca nagon nitlo guiedz co. Grēse to ne nac to zha ne no gbaa, grēse to ne nac to zha ne ngab lo naa, grēse to ne nac to zha ne pxel naa güeynee xtidz naa, zha ne güeyteed xtidz naa, zeene gañ to laa guiedz co nonitlo, golley, sac gon ga gunquizh Dios miech ne no ga grētaa mine beñ zho to.

²¹ Zeene blozh bnee meñ co, dzigo gon naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil dipse gan bron mew lo nisdoo; blozhse bron mew, nēchaa me:

—Squi nagon nitlo guiedz ro ne nac Babiloin ga, gdzindraa dze ne gbiire gañ miecha. ²² Masaque nroobladzdoe ne raca niina, loxaque di noyac grē ro xnēza, zaatne noyool zho vihuel, zaatne noyool zho bzie, zaatne nocuedzгаа zho trompet, nēzrii nēzrec rac miech zie zho lo xtsiñ zho, loxaque lo grē quie molin rzedz nozoo zho zhub; per gañ dze co grēsew lozh. ²³ Squitaa biini ne rquiaw niina, squitaa tibaque quiayac guieltsieela, per gañ dze co ncowse gnaw, pa sēraa gac lniw. Laaw nitlo, sac blactaa noyungueta miech ne no grēraa guiedz ne ndxie lo guidzliu lo grē zhiwseed mēdox; pe zhidaa noyunicwa grē zha ne run wto por grē wseed co; ²⁴ pe zhidaa miech zēēba. Nzian zha ne ngab lo Dios, nzian zha ne riadteed xtiidz me, rnabeya ret zho.

19

¹ Zeene blozh ga, bin naa zēēb ndal tsi meñ co nēz gbaa, rlu miech guizhiuw, nguiedz rnee zho:

¡Zha ndzontaa xDios ne! Me nac meñ ne rsilaa miech, parne ygaad zho lo caxtigw.

Me nac meñ ne rap poder,

me nac men ne rieguial dziuunnon ne;

² sac gon mesi run me guielwxtis zigne no gaca.

Gacxe waa, sca gunquish me guiedz qui grëtaa guielyozh ne noyuna, grëtaa xchen zha ne ngab lo me, zha ne bnabeya gut;

rriequia naca zig tib wnaa yozh,

quaiyungüeta miech quaiyunctal zho xtol zho.

³ Blozh ga, biire bin naa tsi zho, rnee zho:

¡Zha ndzontaa Dios! ¡Min qui nagon rieguiala, gdzind dze ne lozh csow gox!

⁴ Horco laa gza galptap mengol co, ni gza tap bult mban co pquitsgzhib lo Dios lo xcan ne zob me ga, haxta bzooblo zho lo liu, beennon zho me, rnee zho: “¡Nliw! ¡Luuse nac men ne ndzon!”

⁵ Zëëbaque stib tsi men co zaatne nac lo xcan co, rnee me:

¡Grëse to ne nac to zha ne quaiyund dziin lo me,

zha ne rien men non nac me,

zigtaa zha wina, zigtagaa zha nona, golgoolnie me!

⁶ Dzigo wbiire bin naa tsi grë miech guizhiu co nëz gbaa, rio bi zëëb tsi zho, pale zeene rio bi nisdoo, zeene riogaa bi rnee grë nguzidox, rnee zho:

¡Golgotsaa dzioolnie ne me!

¡Me nac xDios ne, me nac men nroob ne rnabey!

⁷ Golgotsaa gley ne, golgotsaa dziuunnon ne me,

sac gon laa dze bdziñ laa Carner yeen ne nac Xpëed me ga ctsieelnia;

grë zha ne ngab lo me,

zha ne rriequia nac ndzooop ne ctsieelnia Carner yeen co, laa zho nacw-xable.

⁸ Masaque rlu zho zig tib ndzooop ne ctsieelnia,

ine nquitsbie, ine rbebni lar niazh ne nacw zho;

me bdeed diidz got zho lar co,

ga rlu ganle mban zho zigne racladz me.

⁹ Dzigo rneechaa anjl ne sca bron quie co lo nis:

—Wen zie grë zha ne bredz Dios tsie lo xquieltsieel men ne nac Carner yeen co.

Bnabey me naa pquia naa diidz co, blozhse ga, nëchaa me lo naa:

—Xtiidz Dios ga gon, me rneew.

¹⁰ Horco pquitsgzhib naa lo anjl co ni naa gunnon naa me, per bzhiguield me.

—¡Cool! —në me lo naa—. ¡Guso i! Gocnan ganle ye naa tib ngundziinse nac naa lo Dios, nac naa zigne nacaque luu grë luu grëraa zha ne squi noxco zienal mine nac zhiwseed Jesús. Dios none gunnon luu, sac gon tib ngundziinse nac naa bzet naa min co, lëë gdib bne naa ganle zha nac xtiidz Jesús.

¹¹ Dzigo hor co gon naa bzhial zhan gbaa, ga briequia tib men co zob me lad tib guay nquits, zëëb diidz niapse diidzli rnee me, sac run me guielwxtis zigne no gaca, ni rdilnie me zha ne rieguial tilnie me. ¹² Masaque rbebel bziaalo me, nzian xcuaa coron zob guic me, ni quia stib lë më quia me, loxaque mese nan dien zha nac lë co me. ¹³ Rnadraa xab me di ren, lëë me ga rnee zho: Xtiidz Dios. ¹⁴ Ndal grë menguiib ne no gbaa nal zhits me, ye zho niapse guay nquits zob zho; niapse lar niazh nacw zho, ine nquitsbie rna grë lar co. ¹⁵ Rlu choot grielod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gacntseeb lo me. Masaque me gnabey grëse guiedz, ndip gac xtiidz me, ni tib choot quitsd mine gnabey me; zeene laa me gunquish miech grë xquielntseeb zho, cxeel me zhian ne csiaab Dios yгаа zho, zun me zho zigne run miech uv zeene rzëëni

zhov. ¹⁶ Lad lar ne nacw me ga, ni tib cho cor me, ga quia cho nac me, rneew: “LĒĒ MEN RII NONRAA LO GRĒSE ZHA NON, ME RNABEY LO GRĒSE ZHA NE RNABEY.”

¹⁷ Blozh ga goṅ naa zo tib anjl lo ngbidz, nguiedz zĕĕb tsi me rbedz me grĕse maxiil ne row grĕ magut, rnee me:

—iLigier goṅcaalsa! iGoltĕ zeṅa yquii to guielwagw ne gneedz Dios lo to niina! ¹⁸ Goltĕ zeṅa gow to grĕ zha ne rnabey grĕ guiedz, grĕ zha ne rnabey lo menguiib, grĕ zhaguiib ne zĕĕb diidz nac zha valor; goltĕ gow to grĕ guay, gow to grĕ zha ne rzob lad ma. Goltĕ gow to grĕse miech, zigtaa zha ne ruṅcunzhoo miech dziina, zigtagaa zha ne choot rnabeyda, zigtaa grĕ zha ne nac zha nona, zigtagaa grĕ zha wina.

¹⁹ Dzigo goṅ naa ma nroob ne brieequia lo nisdoo ga, ma ne scataa ntseeb rlu ga, psilo ma ptop ma grĕse zha ne rnabey grĕ guiedz ne ndxie lo guidzliu. Pcaalsa zho grĕ xmenguiib zho, zha guizhiuw, laa zho brie zietilnie zho men ne zob lad guay nquits co grĕ xmenguiib me. ²⁰ Lo diṅ co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grĕ milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zaatne noyoc zufr. ²¹ Laa grĕraa zha ne scataa gocnie ma ga, grĕse zho gut lo spad ne nzobro men ne zĕb lad guay nquits co, hor co bdziṅbe grĕse maxiil ne row magut, güeytow ma grĕse ngutoo co haxta biel ma.

20

Bnabey Jesús tib mil iz

¹ Blozh ga, tibaque zeṅe goṅ naa laa tib anjl biet gbaa, nzhen me tib liow, ni nzhen me tib caden. ² Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co; ³ con liow ne nzhen me ga pxal me tib ro guierdoo, psĕĕb me ma len guierdoo co. Blozh ga dziits dziits psioog mew, zeṅa grielod griee ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no griee ga, sonlaa ma zniip.

⁴ Horco goṅ naa laa grĕ zha ne bzo Dios cobey pe nac xtoṅ tib tib miech, laa zho bzob lo xcan ne rieguial sob zho. Goṅaque naa xalm grĕ zha ne psacsi miech, bga zho yan zho, beet zho zho loxaque ne no zho xnĕz Jesús ni bnee zho xtiidz me lo miech; goṅ naa grĕ zha ne bzhiguield nquitsgzhib lo ma ngol ne brieequia lo nisdoo ga, bzhiguield zho niunnon zho mdio ne rlu zig rlu ma, niicle bzhiguield zho nio zho xbey ma. Goṅ naa brieegan zho grĕse zho, par gbannie zho Jesús, gnabey me grĕ me zho dipse len tib mil iz.

⁵ Lĕĕ grĕ zha co nac miech ne glopaa grieeban, laa grĕraa mengut, zha co grieeban zeṅe laa tib mil iz co gza. ⁶ Dichos grĕ zha ne glo grieeban ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús guṅ zho dziin, gac zho zig tib pxoz lo me; tipse gnabey me grĕ me zho len tib mil iz co.

⁷ Zeṅe blozh tib mil iz co, dzigo goṅ naa laa mendox brie zaatne niogyu ma ga, ⁸ güey ma güeyquidie ma zha Gog, güeyquidie ma zha Magog, grĕse guiedz ne ndxie lo guidzliu güeyquidie ma miech, tipse been ma zho grĕse zho parne tilnie zho Dios. Miech guizhiuw, miech ne lĕb ne glab new, guṅ ne cuent yuzh ne ndxie ro nisdoo, ⁹ ntseeb rac zho, grĕse zho laa zho bdziṅ zaatne ndxie guiedz ne rleyne Dios, zaatne no grĕ zha ne ngab lo me ga;

per zeene laa zho ndxiele igo guiedz co parne gnitlo zhow, hor co bnabey Dios bliaa|gui lad zho, bzëega zho grëse zho. ¹⁰ Laa mendox, bnabey me bgaa ma bey ma lo guidox ne nac gabil, zaatne nole ma ngol ne sca brieequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdziandraa dze ne gree ma ga; caxtigwdox ne ted ma.

Beenquizh Dios miech mine been zho

¹¹ Blozh ga, gon naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdziel pa niolana lo me. ¹² Grëse zha ne brieeband glo ga, zigtaa zha nona, zigtaa zha wina, laa zho bdziñ lo me. Laa zho ndxie ga, zeene laa lo bla libr co bzhiäl, ni bzhiälaque lo mine quia lë zha ne bgaa guielmban cub ne rdeed Dios ga; hor co bgaase zho mine rieguial zho tib tib zho tel zha zhobnee lo libr co wban zho. ¹³ Grëse zha ne biaan len nisdoo, blieequia nisdoo zho, grë zha ne bioliu blieequia baa zho; grëse zho blieequia guielgut zho. ¹⁴⁻¹⁵ Blozh ga, zigtaa guielguta, zigtaa zha ne quiad lë len libr ne no lë zha ne bgaa guielmban ga, laa zho biobe lo guidox ne nac gabil; lëe guielgut brop ga.

21

¹ Dzigo gon naa tib gbaa cub, ni tib guidzliu cub; sac zigtaa gbaa ne rdziuunbey ne, zigtaa guidzliu, zigtagaa nisdoo grësew bnitlo. ² Grop lo naa gon naa laa Jerusalén, guiedz ne nacchen Dios ga, ziad-zëeb zhan gbaa brievee zaatne zob me; tib guiedz cuba. Tib guiedz nzhixcuaa naca, pale tib ndzooop nguieg dze ne rtsieelna zho. ³ Dzigo bin naa nguiedz zëeb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuëz lo miech, nasi laa me gbannie zho; zanlo zho me, peet gunfaltraade lo zho. ⁴ Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grëse nis ne zo lo zho zeene biin zho, niina laa me gunmbew. Grëse ncuaan co, gdziandraa dze gan zhow.

⁵ Zëeb tsi men ne zob lo xcan co, rnee me:

—Grëse ncuaane no niina ncuble naca, ni naa beenncuba.

Blozh ga, nëchaa me lo naa:

—Grëse diidz ne gni naa lo luu nu niina gon, pquiaaw, ib none gacnan miecha, sac ncuaane no gaca. ⁶ jLëew nagon, grëse mine no gac, laaw blozh ben naa! jNaa psilow, ni naa psiaala, naa nac zigne nac letr “a” ni letr “z” lo grëse letr, “a” rsilow “z” riala!

jZha ne në rnab zhis, naa gded nis ne rdeed guielmban guie zho, ygad naa nis co lo zho, peet gacnonda! ⁷ Ni golgacnan ganle, grëse zha ne gdeete diidz lo grë ncuaane gunctal xtol zho, ible zgaa zho grë guielnzaac ne noyaquiet nu, naazhal gbannie zho peet gunfalte lo zho, masaque tib mëed gac zho lo naa. ⁸ Sangue grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuaan mbixladz, grë zha ne rut samiech, grë zha ne rionie zha ne led tsieeld zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co mine yгаа zho nac lo guidox ne noyec zufr ga; lëe guielgut brop ga.

Guiedz ne gdziñ zha ne ngab lo Dios

⁹ Lo gza gadz anjl ne bzhen cop ne bio grë guielnë ne gon miech ga, biaadgax tib me lo naa në me:

—De ganle zeena gan luu ndzooop nguieg ne gac tsieel men ne nac Xcarner yeen Dios i.

¹⁰ Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zëëb gbaa. ¹¹ Masaque rbebela guieIndzon ne rap me, lëëdaa grë quie niazh ne lë jasp, ni roĵ rnaw lëëdaa grë vidr. ¹² Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë mengoldoo ne goc xpëed Israel. ¹³ Tson puert co quia nëz ya, tsona quia nëz quiet, tsona quia ngali nëz ne rlan ngbidz, stsona quia ngali nëz ne rzëëb ngbidz. ¹⁴ Lo tsiipchop quie nroob ne zob biedz co, tibga lë xpoxtl men ne nac Xcarner yeen Dios gä quia lo co.

¹⁵⁻¹⁶ Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guiib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne zioola lalga nzhenä, ni lalgaque glaa; ¹⁷ laa xquieInaal biedz co nzhenä lal ne rgaa tsiipchop docen dzit nia ne; ptiix mew zigne rtiixaque ne nac ne miech.

¹⁸ Niapse guiib or niaa guiedz co, zigne rne naa ga, roĵ rnaw lëëdaa vidr. ¹⁹⁻²⁰ Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lë jasp,
 tiba ngalguiee quie niazh ne lë zafir,
 tiba ngalguiee quie niazh ne lë ágata,
 tiba ngalguiee quie niazh ne lë smerald,
 tiba ngalguiee quie niazh ne lë ónice,
 tiba ngalguiee quie niazh ne lë cornalin,
 tiba ngalguiee quie niazh ne lë crisólito,
 tiba ngalguiee quie niazh ne lë beril,
 tiba ngalguiee quie niazh ne lë topás,
 tiba ngalguiee quie niazh ne lë crisoprás,
 tiba ngalguiee quie niazh ne lë jacint,
 tiba ngalguiee quie niazh ne lë amatist.

²¹ Gza tsiipchop puert ne quiaaw ga, tibga quie perl niaa tib tib puert co; nëzyu ne rded groĵ guiedz co, niapse guiib or niaaw, masaque mbe roĵ rnaw.

²² Ni tib yadoo gon naa, sac dipse lad guiedz co rleynie zho Dios, rleynie zho men ne nac Xcarner yeen me. ²³ Led yedraa ga rquini xbiini ngbidz, rquini xbiini mëë, sac masaque xquieIndzon me, ni xquieIndzon men ne nac Xcarner yeen me ga nac biini.

²⁴ Grëse miech ne ngab lo me, ine gziini biini co lo zho së zho lad guiedz co; zha ne bnabey grë guiedz ne bre lo guidzliu, bio dze zha goc zha non, per zeene gdziñ zho ga ye zho zunnon zho me. ²⁵ Led yedraa ga ycow liu, tibaque niini gnaw, tibaque gzhiäl gza xpuerta. ²⁶ Grëse ncuane mbe ne gocnon lo grë guiedz ne bre lo guidzliu, laaw gdziñ ga; ²⁷ sangue grë ncuane mbixladz gdziñ ga. Zig nac grë miech ne run grë guieIntseeb, grë zha ne tibaque noquidie, gdziñd zhow; loxaque zha ne zhoob lë len xlibr men ne nac Carner yeen co (libr ne no lë zha ne yгаа guieImban cub ne gdeed Dios ga), zha cose gdziña.

22

¹ Blozh ga, blu anjl co tib guiubee lo naa, në me zha ne guie nis co, zгаа zho guieImban; mbe roĵ rnaw, haxta rbebel low. Merse zhan xcan ne zob Dios ni

zhan xcan ne zob meṇ ne nac Carner yeṇ co, ga rriee guiubee co, ² rdeda grołtaa nēzyu ne rded leṇ guiedz co. Gropse nēz ro guiubee co zēēb yag ne rdeed guielmban, gzobse mēē rquia nex low, tsiipchop vuelt rdeeda nex tib leṇ iz, haxta ye zhiblaga rquiin grē zha ne no ga, parne sacnēd zho. ³ Led yedraa ga no ncuaaṇe ndziibdee, ga zo zhixcan Dios ni zo zhixcan meṇ ne nac Carner yeṇ co; grēse miech ne ngab lo me, rleynie zho me runnon zho me. ⁴ Ranlo zho me, grēse zho quia lē me quia zho. ⁵ Led yedraa ga yquiin zho pe gziini lo zho, yquingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdzindraa dze ne griece zho ga.

Ile ziaad Jesús

⁶ Dzigo nēchaa anjl co lo naa:

—Grēse ncuaaṇe quiayan luu nu, ible ncuaaṇe no gaca. Bui ganle Dios meṇ ne rdeed guielbiini lo grē zha ne rieteed xtiidz me lo miech, rnee zho ncuaaṇe naraa gac, mezhal pxeel xanjł me ziadnee lo luu, zeēna gacnaṇ grēse zha ne ngab lo me ziaadyoble gac grē ncuaaṇ rii. ⁷ Ible nacle xtiidz meṇ ne rnabey ne, zhile laa me guiaad. ¡Dichos grē zha ne gliladz grē miṇe noxobneṇ Dios nu!

⁸ Grop lo naa gon naa grē ncuaaṇ rii, naazhal bin znu bnee anjl co. Nacne pquiitsgzhib naa lo me ni naa gunnon naa me; ⁹ dzigo nēchaa me lo naa:

—Guso i, rieguald gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grē luu grē zha ne noteed xtiidz meṇ ne rnabey ne lo miech, ni grēraa zha ne gliladz miṇe noxobneṇ me nu. Me none gunnon luu.

¹⁰ Blozh ga, nēchaa me:

—Bien, grēse miṇe quiayan luu nu, yqueetsd luuw, sac zhile gdziṇ dze ne gaca. ¹¹ Lo spalalse dze ne riaan niina, grē zha ne noyun guielntseeb, telne racladz zho mazdraa guielntseeb ne gun zho, maase gun zhow; zha ne runḡaa guilyozh, telne mincotaa rleynie zho, maase gunraa zhow. Sangue grē zha ne noxco gun miṇe rnabey Dios, none tsoxcoraa zhow; zha ne ngablegaa lo me, none gunraa zho miṇe racladz me, gbiched zho lo me.

¹² Horco bin naa tsi meṇ ne nac Carner yeṇ co, nē me:

—Psoladza sca gon, ible zialniob naa; zeēne laa naa guaial, hor co gded naa miṇe riegual tib tib miech, tel zha wban zho. ¹³ Notaque naa, zig nac grē ncuaaṇ rii naa psilow ni naa csiaala; nac naa zig nac letr “a” ni letr “z” lo grē letr, “a” rsilow, “z” riala. ¹⁴ Dichos grē zha ne noxco guiaanmbe zho nēz lo Dios, sac rrieequia xab zho ga nosanmbe zho, parne grielo ted zho ro puert ne quia guiedz cub ne nac Jerusalén ga; gdziṇ zho ga iṇe gow zho xnex yag ne rdeed guielmban ga. ¹⁵ Sangue grē miech ne ractseeb lo Dios, zha ne rleynie guielbruj, zha ne rionie zha ne led tsielēd, zha ne rut samiech, zha ne rleynie grē mdio, zha ne loxaque noquidie samiech, ni tib zha co grieelod ted ro puert co. ¹⁶ Naa gon nac Jesús, naa pxel xanjł naa ziaadlu grē ncuaaṇ rii lo luu, zeēna grēse zha ne no xnēz naa gacnaṇa. Naa ga brieequia lo xtiṇ rey David, per naa psan grēse xmengol me. Rrieequia naa nac mel ngol ne rziini ral sil.

¹⁷ Zigtaa Espiritu Sant, zigtaa grē zha ne no xnēz me, zha ne rrieequia gac tsielē me ga, laa zho quiambēz me; niicle zha ne gacnaṇragaa laa me no guiaad, none yquiambēz zho me. Zha ne nē rnab zhis, telne gacladz zho zac gbig zho lo me, me gdeed nis ne rdeed guielmban guie zho; ygad me nis co lo zho, peet gacnonda.

¹⁸ Grēse zha ne gon grē miṇe pxobneṇ Dios nu, laa naa rso diidz lo zho: Gneed zho ncuaaṇe nacda, sac zha ne gdziibraa diidz zeēne gnee zhow,

scagaa me, lo grë guielnë ne raquiet nu ygaa miech, zdziibraa me minë ygaa zho; ¹⁹ zha ne ctichegaa palala zeene gnee zhow, scaque stiche me lë zho lo libr ne zhobnee cho nac zha ne ygaa guielmban ne gdeed me, grieelodraa gdziñ zho guiedz ne blozh goquiet nu, ygaadraa zho yquiin zho xnex yag ne rdeed guielmban ga.

²⁰ Men ne blozh bnee lo naa ga, ible ziaadniob me rnee me. Gacxe waa, dib zdoo naa laa naa rne lo me nu:

—¡Scaw gon Jesús! ¡Dë, laa no quiambiaaz luu!

²¹ Me nac men ne gacniñ to grëse to, me gunlay to.

Juan